

**DIOSUN JESÚSWEN TAEXUN
YUBA BEN YINIKI**

Nuevo Testamento
JUNI KUIN
Kashinawa del Perú



Sociedad Bíblica Peruana

El Nuevo Testamento
en el idioma
Kashinawa

Primera edición La Liga Bíblica, 1980
Segunda edición revisada Sociedad Bíblica Peruana, 2004
Tercera edición, 2008

Publicado por
© La Sociedad Bíblica Peruana

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de © La Sociedad Bíblica Peruana (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

ÍNDICE

<i>Libro</i>	<i>Página</i>
<i>Kadape Mateon jatu kenexuniikiaki</i>	
<i>Mateo</i>	(Mt)..... 5
<i>Kakape Marcos jatu kenexuniikiaki</i>	
<i>Marcos</i>	(Mr) 72
<i>Kakape Lucasin kenenikiaki</i>	
<i>Lucas</i>	(Lc) 111
<i>Kakape Juanen kenenikiaki</i>	
<i>Juan</i>	(Jn) 180
<i>Jesúsun kushipayabun jaska wakubainibukiaki</i>	
<i>Hechos</i>	(Hch)..... 227
<i>Roma anuabu Pablón jatu kene bumanikiaki</i>	
<i>Romanos</i>	(Ro)..... 291
<i>Corinto anuabu ja dukun Pablón jatu kene bumanikiaki</i>	
<i>1 Corintios</i>	(1 Co) 326
<i>Corinto anuabu Pablón ja kachu jatu kene bumanikiaki</i>	
<i>2 Corintios</i>	(2 Cor)..... 358
<i>Gálatas anuabu Pablón jatu kene bumanikiaki</i>	
<i>Gálatas</i>	(Ga)..... 378
<i>Éfeso anuabu Pablón jatu kene bumanikiake</i>	
<i>Efesios</i>	(Ef) 389
<i>Filipos anuabu Pablón jatu kene bumanikiake</i>	
<i>Filipeses</i>	(Fil)..... 400
<i>Colosas anuabu Pablón jatu kene bumanikiake</i>	
<i>Colosenses</i>	(Col)..... 407
<i>Tesalónica anuabu Pablón ja dukun jatu kene bumanikiake</i>	
<i>1 Tesalonicenses</i>	(1 Ts)..... 415
<i>Tesalónica anuabu Pablón ja dukun jatu kene bumanikiake</i>	
<i>2 Tesalonicenses</i>	(2 Ts)..... 422
<i>Timoteo Pablón ja dukun kene bumanikiaki</i>	
<i>1 Timoteo</i>	(1 Ti)..... 426
<i>Timoteo Pablón ja kachu kene bumanikiaki</i>	
<i>2 Timoteo</i>	(2 Ti)..... 435
<i>Tito Pablón kene bumanikiaki</i>	
<i>Tito</i>	(Tit) 442

Filemón Pablon kene bumanikiaki

<i>Filemón</i>	(<i>Flm</i>)	446
<i>Jesúsun tsuma betsan Jesúsun enabu hebreonawabu kenexuniaki</i>		
<i>Hebreos</i>	(<i>He</i>)	448
<i>Santiagon jatu kene bumanikiaki</i>		
<i>Santiago</i>	(<i>Stg</i>)	472
<i>Pedron ja dukun jatu kene bumanikiaki</i>		
<i>1 Pedro</i>	(<i>1 P</i>)	482
<i>Pedron ja kachu jatu kene bumanikiake</i>		
<i>2 Pedro</i>	(<i>2 P</i>)	491
<i>Juanen ja dukun jatu kene bumanikiaki</i>		
<i>1 Juan</i>	(<i>1 Jn</i>)	496
<i>Juanen ja kachu jatu kene bumanikiaki</i>		
<i>2 Juan</i>	(<i>2 Jn</i>)	504
<i>Juanen ana ja kachu kene bumanikiaki</i>		
<i>3 Juan</i>	(<i>3 Jn</i>)	506
<i>Judasin jatu kene bumanikiaki</i>		
<i>Judas</i>	(<i>Jud</i>)	508
<i>Jaska inunbadiai Jesucriston juan unanmani janchakiaki</i>		
<i>Apocalipsis</i>	(<i>Ap</i>)	511

KAKAPE MATEON JATU KENEXUNIKIAKI

MATEO

Jesúsun xenipabu eska
tanakubidanpaunibukiaki, na janchadan
(Lc 3.23-38)

1 ¹Abrahamnen baba inun Davidin
baba Jesucriston xenipabukidi matu
yuinun ninkaidakanwen.

² Abrahamnen bake betsadan, Isaac
inikiaki.

Isaacun bake betsadan, Jacob inikiaki.
Jacobun bakebudan, Judá inun
jawen betsabu inibukiaki.

³ Judán bakebudan, Fares inun Zérah
inibukiaki, jatun ewan kenadan,
Tamardan.

Faresin bake betsadan, Hesrón
inikiaki.

Hesrónen bake betsadan, Aram
inikiaki.

⁴ Aramin bake betsadan, Aminadab
inikiaki.

Aminadabin bake betsadan, Nahasón
inikiaki.

Nahasónen bake betsadan, Salmón
inikiaki.

⁵ Salmónen Rahab ainwantan bakewa
jatun bake betsadan, Booz inikiaki.
Boozin Rut ainwantan bakewa jatun
bake betsadan, Obed inikiaki.

Obedin bake betsadan, Jesé inikiaki.

⁶ Jesén bake betsadan, xanen ibu
David inikiaki. Janua Urías

mawaken Davidin Urásin ain
bixun bakewa jawen bake betsabu
Salomón inikiaki.

⁷ Salomónen bake betsadan, Roboam
inikiaki.

Roboamin bake betsadan, Abías
inikiaki.

Abíasin bake betsadan, Asá inikiaki.

⁸ Asán bake betsadan, Josafat inikiaki.
Josafatin bake betsadan, Joram
inikiaki.

Joramin bake betsadan, Ozías
inikiaki.

⁹ Ozásin bake betsadan, Jotam
inikiaki.

Jotamin bake betsadan, Acaz inikiaki.
Acazin bake betsadan, Ezequías
inikiaki.

¹⁰ Ezequíasin bake betsadan, Manasés
inikiaki.

Manasésin bake betsadan, Amón
inikiaki.

Amónen bake betsadan, Josías
inikiaki.

¹¹ Januxun nawabun Israelnabu jatu
dayamaktsi achixun Babilonia
anu jatu iyunibu

Josásin bakebudan, Jeconías inun
jawen betsabu inibukiaki.

¹² Janua Babilonia anu jiweabun
Jeconíasin bake betsadan, Salatiel
inikiaki.

- Salatielin bake betsadan, Zorobabel inikiaki.
- ¹³ Zorobabelin bake betsadan, Abiud inikiaki.
- Abiudin bake betsadan, Eliaquim inikiaki.
- Eliaquimnen bake betsadan, Azor inikiaki.
- ¹⁴ Azorin bake betsadan, Sadoc inikiaki.
- Sadocin bake betsadan, Aquim inikiaki.
- Aquimin bake betsadan, Eliud inikiaki.
- ¹⁵ Eliudin bake betsadan, Eleazar inikiaki.
- Eleazarin bake betsadan, Matán inikiaki.
- Matánen bake betsadan, Jacob inikiaki.
- ¹⁶ Jacobun bake betsadan, Marían bene José inikiaki.
- Janua Marían bake betsadan, Jesús inikiaki, kenakin Mesías Cristo nun amisdan.
- ¹⁷ Janua Abraham anua jatun ibuwen pakea 14 xenipabu jiwekubidanaibutian janua David kainikiaki. Jaska inun, David anuadi ana jatun ibuwen pakea 14 xenipabu jiweaboutian nawabun jatu achitan dayamanun, iwanan, Babilonia anu jatu iyunibukiaki. Janua jatu iyunibu anuadi ana jatun ibuwen pakea 14 xenipabu jiweabu anudi Mesías Cristo kainikiaki.
- Jaskatan Jesús kainikiaki, na janchadan**
(Lc 2.1-7)
- ¹⁸ Jesucristo kain eskanikiaki. Matu yuinun ninkakanwen. Janua María ainwankatsi ikin jawen epa José yukaima bimadiamaken Diosun Yushin Pepatun juni bake naneima Marían unanyan, ¹⁹janua María ma tuya jawenabun ninkatan José yuiabu María

ana ainwankatsi ikamabia juni pepakin jaska yuda dasibi bebun Maríakidi chanikin dake wakatsi ikama jabe yubakaima june jenexanun, iwanan, ²⁰shinankubaini uxa namaya Diosun nai tsuman yuikin: “Joséen, miadan, min Davidin babaki. Mia yuinun ninkaidawe. Diosun Yushin Pepatun María bake naneimawen taea jawen datei jawa dakeama ainwanxanwen. ²¹Ja juni bake kaintan ewatan jawenabu Dioski pechia chakabumisbu jau jatun ana Dios chibanunbun jatu medabewaxanaiwen taexun kenakin: ‘Jesús’, waxanwen”, aka José jaska ninkatan shinanikiaki.

²²⁻²³ Jaska Jesús kaintan bebunkidi jaskanunbadiai jawen jancha yuixunika Isaías Diosun yuikin:

“Uian. Junin chutadiama chipashan
bake bima
juni bake kaian kenakin: ‘Dios
nukube jiweaki’,
axankanikiki, hebreo janchawen,
‘Emanuel’, wakinan”,
aka ninkatan keneniken jabias jaska dasibi bebunkidi inunbadiai chanini Diosun xabakabi jatu unanmaniki, jaska jawen jancha yuixunika kenemani keska menekinan.

²⁴⁻²⁵ José uxa bestentan jaska nai tsuman yuixu jawen jancha chibankin José María bikin ainwantan jabe dadatamebiaxun chutadiamaken jawen bake kaian José kenakin: “Jesúski”, anikiaki, nai tsuman yuima keska wakinan.

**Chaikea bishi unanikabun Jesús uinun
ika benibukiaki, na janchadan**

2 ¹⁻²Herodes Judea anu xanen ibuaya Belén anua Jesús kainken janua bishi unanikabun bishi bena taxnia uintan chaikea badi juai estekidia bekubidani Herodesin maewan Jerusalén anu jikitushitan jatu yukabaunkin:

–¿Judiobun xanen ibu bena kainmadan, janimen? jawen unanti bishi bena taxnia bechitan kenwanun ika nun juaidan– ikin jatu yuka keyubaunaibun ³janua Jerusalén anuabun dasibi ninkai dateaibun xanen ibu Herodesin ninkadiatan shinain: “Ea binuxanimenkain”, ika datekin ⁴tapinun ixun Diosbe nukunabu janchaxunika xanen ibubu inun Diosun janchakenenibu yusinanamisbu jatu kenaxun yukakin: “Diosun Katua Mesíasdan, ¿jania kainxanimenkain?” jatu wa yuinametan ⁵⁻⁶jatun xanen ibu yuikin:

–Jawen jancha yuixunika Miqueas
Diosun yuini ninkawe:
‘Belénmaan, Judea mae pakea anu
min mae jatiumabiaken
mia anua xanen ibu kayabi
kainxanikiki,
enabu Israelbu mekexanaidan’, akin
yuiakeneniki–

akabu

⁷Herodesin ninkatan jatu nichian buaibun janua badi juai estekidia bishi unanikabu beshianbu jabudi june kenaxun jatu yukakin: “¿Jatian bishi bena taxnia man bechibidanimamen?” jatu wa natian ma bechibidanimaxun Herodes yuiabu ⁸ninkatan jatu bepadankin yuikin:

–Belén anu buxun yuka ikin ja bake bechitan kenwantan eadi yui betankanwen, eadi kaxun en kenwain kanunan– jatu wa

⁹⁻¹⁰ninkabaini Belénkidi bukin bishi bena uinmabu ana taxnia chaxakaini jatu bebun kai uin benimajaidabainkin chibarbainaibun janu ja bake jiwea mamaki niti ikaya ¹¹ja jiwe anu jikikain ja bake jawen ewa Maríabe bechitushitan kenwain ja bebun danti iki beti itan benitan ja bau bekanxu bepenxun oro mane inun ja kuaxunti ininipa inun jawen puxati dau ininipa

inankuintan ¹²jaska watan bua uxa namaibun Diosun nai tsuman jatu yuikin: “Xanen ibu Herodes anu ana chintubainyamakanwen”, jatu wa jawaida bestentan bai betsawen inun bunibukiaki.

Egipto anu Joséán Jesús paxawanikiaki, na janchadan

¹³Bishi unanikabu ma inun buabun jabiatiandi José uxa namaya Diosun nai tsuman yuikin: “Joséen, jawaida bestenwen. Xanen ibu Herodesin bakeishta detenun, iwanan, jatu benamayuikiki. Jawaida bestentan ja bake jawen ewabe iyukin Egipto anu jatu paxawaditanwen. ‘Iwewe’, iwanan, en mia yuidiama jabiadi jiweyxanwen”, aka ¹⁴⁻¹⁵jawaida bestentan meshu medan ja bakeishta jawen ewabe paxawakin chajaida iyukin atimas Egipto anu jikimaima xanen ibu Herodes mawadiamaken jadia dayai jiweyuniaki. Jawen jancha yuixunika Oseas Diosun yuikin: “Egipto anua en juni bake en kenaxanaii”, aka ninkatan keneniken jaska dasibi bebunkidi inunbadiai chanini Diosun xabakabi jatu amaniki.

Herodesin juni bake mishtin jau detetanunbun jatu yununiaki, na janchadan

¹⁶Janua Herodes bishi unanikabun padanbainshinabu ana beabumaken Herodesin unantan sinatajaidakin jaska bishi unanikabun yuibainshina juni bake badi dabeyadiabuma inun badi dabeyabu jau dasibi jatu detekin tenantanunbun jawenabu soldadobu yunua Belén inun ja dapi jiwebaunabu anu buxun detekin tenankin keyunibukiaki. ¹⁷⁻¹⁸Bebunkidi jawen jancha yuixunika Jeremías Diosun yuikin:

“Jerusalén kema mae betsá Ramá
anua

Jacobun ain Raquelin baba
ainbuaiibu
jatun bakebu jatu deten
keyunshinabu manui
sain ikaibu ninkakin tsuan jatu
nesewatidubuma iki kaikiki”,
aka ninkatan keneniki. Jaska kenen
nakushkin soldadobun jatun bakebu
deten keyunibukiaki.

**Nazaret anu Jesús iyunibukiaki,
na janchadan**

¹⁹⁻²⁰Janua Herodes ma mawashinken Egipto anua José uxa namaya Diosun nai tsuma ana juxun yuikin: “Joséen, janun bestenwen. Jabun ja bake detenun ika ikimabudan, ma mawashinabuki. Janu Israelbun maiwan anu ja bake jawen ewabe ana jawendi iyudiwe”, aka

²¹José bestentan María jawen bake Jesúsbe iyui Israelbun maiwan anu jikia ²²⁻²³januxun betsabun yuikin: “Herodesin bake Arquelao xanen ibuikiki”, akabu José ninkatan datei Judea anu kadiama janua ana uxa namaya Diosun nai tsuman nemakin yuia bestentan Judea anu ana kama Galilea mai pakea anu mae betsa jatiuma Nazaret anu jikitjanu jiweyunibukiaki. Ja mae anu iyukinan, bebunkidi Diosun jancha yuixunikabun Jesúskidi kenekin: ‘Nazaret anuaki’, axanaibu jakidi kenenibu menekin jadi iyuimaxun jiwetanibukiaki.

**Janu tsua jiweamanu Nashimanika Juan
jiwenikiaki, na janchadan**
(Mr 1.1-8; Lc 3.1-9, 15-17; Jn 1.19-28)

3 ¹⁻⁵Bebunkidijaida jawen jancha yuixunika Isaías Diosun yuimakin: “Janu tsua jiweabumanuxun beaibu jui kushipawen chanikin jatu yuikin: ‘Nukun Xanen Ibu nai anua matuki bayui ma kemaikiki. Matun juintinin shinan

pewadikanwen, bai kayatapia keska wakinan”, ani keska wakin Nashimanika Juan junixun Judea anu tsua janu jiweabumanu camello dani sanpu tima sawea inun bichi nanexeketi sawea inun jawen piti pe bexmas chanpu inun ni medanua buna bata aki jiwexun jadixun jatu yusinkin taewai bana ninkatan Jerusalén anua inun Judea anua inun Jordán jene kexa jiweabun ninkanun ika bebidan bebidanaibu jatu yusinkin: “Dios nenu xanen ibui ma kemaikiki. Dioskidi shinanma man chakabumis jenedikanwen”, jatu wakubainai “jabun ikunwankin jatun chakabu Juanki chanikin jatun chakabu jenekatsi ikin shinan betsa waibu jawen unanti wakin Jordán jene anu Juanen jatu nashimapakeaya

⁷⁻⁸janua Juanen jau ea nashimanun ika saduceobu inun fariseobu bebidan bebidanaibu jatu yuikin: “Matudan man padananbuki, dunun jatu pimis keskabudan. Man jaska keska matuki Dios sinatakin matu kupijaidaxanaiwen taea matun shinan betsa wakanwen. Jaskatan matun chakabu man ma bextekeea xabakabi man ea uinmaya en matu nashimaxanaii. ⁹Jamen matumebi ibubis kenkin man shinamis: ‘Nukun xenipabu Abraham Diosbe jaibunameniwen taea nun jawen bababu nuku kupiaman ixanikiki’, ikin, ana shinanyamakanwen. Jakia Abrahamnen bababu dasibi matu yamawakin keyutan na mishki manibauna Diosun damiwakin Abrahamnen bababu benawaxuntiduki. ¹⁰Jaskaken matu yuunin ninkakanwen. Ji tibi bimi pepa jayama dedatan man kuamis keska wakin bestibu Diosun matu kupixanikiki. Jamen tsuabuda Abrahamnen baba kayabibun jawen yusian jau chibankubainunbunwen. Jakia man jaska wamaken matu kupinun, iwanan, duewen matu deda keska watan

chi anu matu udenun, ixun manaikiki”,
¹¹iwanan, “Eanan, jawen unanmati wakin
jenewen besti en matu nashimakubainaii.
Jakia juni betsadan, kushipajaida ea
binuan chipu juxanikiki. Jawen tsumapan
jawen daya axunmis keska wakin en jawen
jawaumajaidatun ean medabewakin en
duawatidumaki, jawen bichi tae mepxun
tsitsaukain en pekaxuntidumadan. Jakia
matu pepawakin Diosun Yushin Pepa
matu inantan bika matu tenemakin matun
chakabu yamawaxanikiki, chiwen jawada
chakabu bechipaiama kua keska wakinan.
¹²Ja inun, xekiwan bimi ta keyuxun pepa
adutan jawen xepa kuamisbu keska wakin
dasibi jawenabuma danankin jawa chi
nukaisma anu udenxun kuanun, iwanan,
manayubainikiki”, akin Nashimanika
Juanen jatu yuikubainikiaki.

Juanen Jesús nashimanikiaki, na janchadan
(Mr 1.9-11; Lc 3.21-22)

¹³Janua Galilea anua Jesús ewatan
Juanen jau ea nashimanun ika Jordán
Jene kexa anu kaxun Juan yuka
¹⁴nemanun, iwanan, yuikin:
–Mian ea binuxun min ea nashimatibia
ćaskai eanu min juxumen?– aka
¹⁵Jesúsun yuikin:
–Ea jaska wama ea nashimawe, Diosun
nuku yununiwen taexunan– aka
–Jaskakenan, peki– ikain, Juanen
Jesús nashimakin ¹⁶meneaya nexekei
mapekekainaya nai baxnei Diosun Yushin
Pepa deiwan itsakidan jamamaki butuai
Jesúsun uiyanan ¹⁷yudabu ninkamai nai
anua jui taxnikin yuikin: “Nadan, en bakeki.
En bechipaijdaii, en Katuadan”, anikiaki.

**Diablo Satanásan padanpaia Jesúsun
ninkama inikiaki, na janchadan**
(Mr 1.12-13; Lc 4.1-13)

4 ¹Jabatiandi jau diablo Satanásan
unanti wanun, iwanan, janu tsua
jiweabumanu Diosun Yushin Pepatun

Jesús nimakin iyua ²jadia 40 xaba
inun 40 meshu Jesúsun jawa piama
bunijaidaya ³diablo Satanás jaki nukutan
unanti wanun ixun yuikin:

–¿Jaska min Diosun bakemenkain? Min
buniaidan, na mishki mania damiwakin
misi watán piwe– aka

⁴Jesúsun kemakin:

–Jaska Diosun jancha kenenibudan,
ninkawe. “Piti besti pidan, yudabu pei
jiwetidubumaki. Jakia Diosun jancha
yuini ninkatan chibain yudabu pei
jiwetidubuki”, aniven taexun ja jaska
min ea yunuaidan, en akamaki– aka

⁵januxun Jerusalén anudi iyuxun
Templo jiwe keyatapa mamaki
mapematan jabe nixun ⁶Satanásan ana
yuikin:

–Jaska Diosun jancha kenenibudan,
miandi ninkawe:
‘Jau mia mekenunbun
jawen nai tsumabu Diosun
yunuxanikiki.

Mishkiki min jutekepanan
min kawanai mia mekesuxankanikiki’,
aniven taea jaska min Diosun bake
kayamenkain mia uinun nenua ea
uinmai main ishchuwe– aka

⁷ana Satanás nemakin Jesúsun yuikin:

–Jaska kenenibu min dama ea yuiai
chanimabiaken ana betsa entsedi mia
yuinun ninkawe: “Matun mekenika yushin
Dios unanti wayamakanwen”, iwanan,
kenekin yusindianiwen taexun min ea ana
yunuaidan, en ikamaki, ishchuidan– aka

⁸jawen jenekin mati keyatapajaida
anudi Jesús iyuxun mai jidabi anu
maewan jawendua tibi inun jawen
xanen ibubu diablo Satanásan jawaida
uinmakin jawen damiwati kushipawen
uinmakin keyutan ⁹Jesús yuikin:

–Eki mesei danti ixun kenwankin min
ea xanen ibu waya na dasibi en mia
uinmaxudan, en mia jatu xanen ibu
wamakubainxanaii– akaya

¹⁰ana nemakin Jesúsun yuikin:

–Jaska Diosun jancha kenenibu ana ninkawe: “Matun mekenika yushin Dios besti duawakin kenwankubainxankanwen, yushin betsaki meseamadan”, aniven taexun ja min jaska yuiidan, en mia akamaki. Satanásan, kadiwe– aka

¹¹januxun Satanásan jeneyubainaya Diosun nai tsumabu bexun Jesúus medabewakin duawanibukiaki.

Galilea anuxun Jesúsun jatu yusin taewanikiaki, na janchadan

(Mr 1.14-15; Lc 4.14-15)

¹²Janua xanen ibu Herodesin Nashimanika Juan jatu bichimashina banabimabu Jesúsun ninkatan Galilea mai pakea anu chintunkaini ¹³Nazaret anu kai bashikuama janua mai pakea dabe anu Jacobun bake Zabolón inun Neftalí jatun bababu xukuabu namakis ian kexa mae betsa Cafarnaúm anu ka janus jiwekidankidanpauniki.

¹⁴⁻¹⁶Januxun jawen jancha yuixunika Isaías Diosun yuikin:

“Zabolón maewan anu inun Neftalí maewan pakea anu ianenwan kexa anu Jordán jene kexa betsaudi Galilea anu janu nawabu nukunabuma jiwebaunabu anuxun bin ewapa chaxajaida keska ea jawa unanbuman uinxankanikiki. Ja inun, meshu medan punu nuka mawa keska jiweabu jatu medabewai bin dekua chaxajaida keska ixanikiki”,

aka ninkatan keneniki. Jaska yuini keskai Jesúus Cafarnaúm anu jiwekidankidanpauniki.

¹⁷Januxun Jesúsun yusinkin taewakin jatu yuikin:

–Nukun Xanen Ibu nai anua matuki bayui ma kemaikiki. Man Dioskidi chakabumis jenetan shinan betsa watan janu bekanwen– jatu wakubainiki.

Baka nexenikabu dabe inun dabe Jesúsun jatu katunikiaki, na janchadan

(Mr 1.16-20; Lc 5.1-11)

¹⁸Janua Galilea ianenwan kexa Jesúsun ketankubainkin baka nexenika dabe Simón, jawen kena betsa Pedro, inun jawen betsa Andrésin jatun xaxunxun jisin punteaibu jatu bechitan ¹⁹kenatan jatu yuikin:

–Ea chibankubainkanwen. Ana baka nexeama jakia man baka nexemis keska wakin yudabu en matu ichawamaxanaii, jau ea ikunwanxanunbunan– jatu wa ²⁰januxun jatun xaxu inun jatun jisin jatun jaibu betsa yunu keyutan jawaida jenebaini Jesúsbé buaibun ²¹janua jatube ana ketanbaini kakin Santiago inun jawen betsa Juan jatun epa Zebedeoebetan xaxu namaki tsauxun jatun jisin kexekin junuaibu bechitan Santiago inun Juanki nukuxun jatu yuidiakin: “Ea chibankubainkanwen”, jatu wa ²²jawaida jatun xaxu jatun epaki jenebainkin Simón inun Andrésbetan Jesúus chibanbainibukiaki.

Yuda ichapabu Jesúsun jatu yusinikiaki, na janchadan

(Lc 6.17-19)

²³Janua Galilea anuxun yusinkubaunkin mae tibi jatun ichati jiwe anuxun kakape Dios xanen ibui ma kemaikidi jatu yusinkin isin betsa betsapa teneaibu jatu xuxawakin kayawakubainaya ²⁴janua Siria mai pakea jidabi anuxun Jesúsun jatu xuxawai kakaibu ninkatan isin betsa betsapa teneaibu inun, yushin chakabuyabu inun, yuda chakabu saki saki ikaibu inun, yuda babubú nuitapaibu jatu iwebidanbidanaibu Jesúsun jatu xuxawakin kayawapakeaya ²⁵Galilea anuabu inun, Decápolis anuabu inun, Jerusalén anuabu inun, Judea

anuabu inun, Jordán jene kexa betsaudi este badi juaikidia bei jatuki dasitan yudan kaian ichapabun Jesús chibankin uinkubainbukiaki.

Mati anuxun Jesúsun jatu yusinikiaki, na janchadan
(Lc 6.20-23)

5 ¹Jatibu jachun buaibu uinkin mati anu mapekeaa makenku anu tsauken janua jawen tsumabudi ja dapi tsauabun ja yudan kaianendi chibankain ninkai maniabun ²Jesúsun jatu yusinkin taewakin yuikin:

³-Benimatidubukidi matu yuinun ninkakanwen. Tsuabuda kenkubainsbuma Dios xanen ibukin jatu duawaxanaiwen taea benimapaketi shinain benimakubainkanikiki, manaidan.

⁴-Ja inun, tsuabunda jatun jointi nishma kaxakatsis ikaibuwen taexun Diosun jatu shinan chankanwan benimapaketi shinain benimakubainkanikiki.

⁵-Ja inun, tsuabuda shinan pepaya keinsbuma Diosun mae pepa jatu yubani jatu yunuxanai shinain benimakubainkanikiki.

⁶-Ja inun, tsuabuda jawada pepa besti bechipai chakayamai jawen nuijaidaiwen manakukin Diosun jatu yaniwama keska waxanaiwen taea benimapaketi shinain benimakubainkanikiki.

⁷-Ja inun, tsuabuda nuidaxanaiwen taea benimapaketi shinain benimakubainkanikiki.

⁸-Ja inun, tsuabuda shinan xunpin pepa jaya jabun Dios uin jiwexanaibuwen taea benimapaketi shinain benimakubainkanikiki.

⁹-Ja inun, tsuabuda duapa unanuma jatube jiwekatsi yuda betsabu sinataibu jatu daewamisbu Diosun jawen bakebu wakin jatu

kenamiswen taea benimapaketi shinain benimakubainkanikiki.

¹⁰-Ja inun, tsuabunda Diosun jancha shinankin chibainbu jatu ichakawabiabu chintuinsbumawen taea Dios xanen ibuai anu janus xukukatsi ikin shinain benimakubainkanikiki- iwanan,

¹¹jaki chiti ikabudi yuikin:

-Ja inun, tsuabunda man ea chibainbuwen taexun matu usankin ichakawakin matukidi chanichakakin matu danainbu matun benimapaketi shinain man benimapakediaxanaiii.

¹²Janua Diosun jancha yuixunikabu ichakawanibu keska wakin matudi ichakawaibu nai anuxun Diosun matu duawaxanaiwen taea jawa dateama shinan chankankubainxankanwen- itan,

Jesús ikunwainbu tewe keskabu inun xaba keskabukidi Jesúsun jatu yusinikiaki, na janchadan

(Mr 9.50; Lc 14.34-35)

¹³-Jamen matudan, jawawenda Dios benimawati yudan kaian man yusintidudan, Diosun jau jatu mekexanun man jawen meketi tewe bata keskaki. Tewewenan, jawen nami chaputimawatiki. Man ma nami teweya wabia ja tewe payukui jawen bata keyu kaken tsuan ana mekekin bata watidumaki. Man jaska keskaibu tewe batauma jemaintin putabu jaki paimisbu keska man itidubuki, uindaxankanwen.

¹⁴-Jamen betsadan, ekidi man jatu yusinxanaidan, man xaba keskaki. Janu mae betsaa mati mamaki jiwe junetidubuma keska wakin en matu yusiainwen juneama jatu xabakabi yusinkubainxankanwen.

¹⁵Ja inun, bin dekutan bau naman junekin tsauinsbumaki. Jakia janu dasibibun uiainbu chaxamis anu manaundi tsautiki. ¹⁶Bin chaxamis keskai jawa juneama medabenaín

jiwekubainxankanwen, matun jancha ninkakin man pepaibu shinankin jabundi jau Epa Dios kenwanxanunbunan-iwanan,

**Moisés inun Diosun jancha
yuixunikabun yusinibukidi Jesúsun
jatu shinanmanikiaki, na janchadan**

¹⁷ana jatu yusinkin:
—Eanan, Diosun jancha
yuixunikabubetan jaska Moisin
yusinikidi nemanun ika en juamaki.
Jaska ekidi shinanyamakanwen. Jatun
jancha bextenun ika en juama jakia
Diosun jancha chanima kayabi xabakabi
matu yusinun ika en juniki. ¹⁸Chanima
nai anua inun mai keyudiamaken Diosun
jancha yuixunikabubetan jaska Moisin
jatu yusini jancha chanimadan, ean en
matu yuiaidan, jawa tsuan nemakin
inun jawa betsa wama jancha tibi
menepakexanikiki. ¹⁹Jakia tsuabunda
yusian betsa bikama maewaxun
jawenabu jatu yusianyan Dios jatuwen
benimama ixanikiki. Jamen tsuabunda
Diosun jancha ninka kayabitian jawenabu
jabias jancha betsa maewama yusiaiibu
Dios jatuwen benimajaidaxanikiki.
²⁰Jaskawen taea Dios benimawakatsi iki
fariseobu inun Diosun jancha kenenibu
yusinanannmisbu jiwekubainaibu keska
ikama pe jiwekin Dios benimawakin
man jatu binuama nai anu Dios xanen
ibuai anu matudi man jikitidubumaki-iwanan,

**Sinatamisbukidi Jesúsun jatu
yusinikiaki, na janchadan
(Lc 12.57-59)**

²¹ana jatu yuikin:
—Moisin nukun xenipabu yusinkin:
“Sinatakin juni betsak sinatakin man
deteken xanen ibubu ichaxun jaska jadi
unantan jau kupixanunbunwen”, axun

keneniki. ²²Jawen jancha chanimaki.
Ana jabiasdi matu yusinun ninkakanwen.
Tsuada yuda betsaki sinatakin detekatsi
ikin man shinankubainaiwen taexun
Diosun matu kupixanikiki, matun
shinan chakabuwenan. Ja inun, tsuada
yuda betsaki sinatakin ichakin: “Min
unainsmapaki”, ikubainmisbu jau xanen
ibubun kupixanunbunwen. Jamen ana
yuda betsaki sinata chakayamakin
chitekin: “Min jawa unanmajaidaki”,
ikubainmisbu chi jawa nukaisma anu
Diosun udenkatsi manakubainikiki.

²³Jaskaken januxun Dios kenwanti chi
tapu anu matun inankuin man buai jaki
kematian uatian kanekin yuda betsak
chakabuwashina shinantan ²⁴jawen Dios
daewati man buai jabianu janayutan
kaxun daewakin ana jaki nukutan ana
jabe janchai pekanwen. Jaska watani
ana juxun jawada man Dios inankatsis
ikaiwen man ana kenwantidubuki.

²⁵Jaska inun, yuda betsak
dibijaidawen taexun ja man dibiatun
nawa xanen ibu anu matu iyuaya
jau xanen ibun jawen policiabu
matu bichimayamanun ja man dibia
jawawenda daewakanwen. ²⁶Man
daewabainama matu bichiabu
man paka keyuama chanima
man jaskatan kaintidumaki.
Jabiaskadi wakin ea jaibuwatan
Epa Dios daewadiakubainkanwen,
matun chakabuwen jau matu
kupiyamaxanunan-iwanan,

**Kemutimakidi Jesúsun jatu
yusinikiaki, na janchadan**

²⁷ana jatu yuikin:
—Jaska inun, betsakan, Moisin nukun
xenipabu ana yusinkin: “Juni betsak ain
chutanyamakanwen”, axun keneniki.
²⁸Jawen jancha chanimaki. Ana jabiasdi
matu yusinun ninkakanwen. Tsuanda
ainbu kawanai uin jawen kemukin

chutakatsis ikin shinainan, ma chuta keskaki.

²⁹Jaskawen taea min bedu betsawen jawada uin min kemuai bedu betsa tseka keskatan jawada shinankin min chakabuwai jawaida jenekubainkanwen. Min bedu dabeyadan, janu chi nukaisma anu matu puta pemajaidaki. Jakia bedu bestichai keskaya Diosbe jiwei kai peki. ³⁰Ja inun, min meken betsawen min chakabuwai min meken betsa mextekeaa keskatan jawada min mekenen min chakabuwai jawaida jenediakubainkanwen. Min meken dabeyadan, janu chi nukaisma anu mia puta pemajaidaki. Jakia meken bestichai keskaya Diosbe jiwei kai peki– iwanan,

**Ainbu jenetimakidi Jesúsun jatu yusinikiaki, na janchadan
(Mt 19.9; Mr 10.11-12; Lc 16.18)**

³¹ana jatu yuikin:

–Moisin nukun xenipabu ana yusinkin: “Tsuanda matun ain jenekatsi ikin jawen taexun ainbu jeneti kene jau inankubainxanunbunwen”, axun keneni. ³²Janua juni betsan jawen ain juni betsabe chutanameamabiaken jenekatsis ikin jawen ain jawamabiaken jenebainadan, janua ainbu jaska shinamabiaken ja junin ma putabaina januxun ja junin chakabuwu taea janu ainbu jawen benen chakabumaikiki, bene betsa benayatikidi shinamakinan. Janu ainbu jawen benen ma jenebainima juni betsan ja ainbu jabe biakanantant jabe chutanamei pebiaidan, juni betsan ainbe chutanamei keskaikiki.

Jawada tibi datan akin jamen jakidi yubakatimakidi Jesúsun jatu yusinikiaki, na janchadan

³³–Jaska inun, betsadan, Moisin nukun xenipabu ana yusinkin: “Jawadakidi yubakakin yuikin: ‘En yubakai en

akamaken jau Diosun ea kupixanunwen’, ikama padanma Dios benimawakin axunkubainxankanwen”, axun matu kenexuniki. ³⁴Jaska yusinbianiken eanan, en matu betsa yusiaiin. Jawada betsa tibi datan aki yubakayamakubai nxankanwen. Eskaidan, nai datan akin shinain jawen yubakayamaxankanwen, Diosdi jadi jiwea inun jaki tsaudiakidan. ³⁵Maidi shinain jawendi yubakayamaxankanwen, na maikidan, Diosun jawen tae kenyankidan. Ja inun, maewan Jerusalén shinain jawendi yubakayamaxankanwen, janudi xanen ibujaida jiweakidan. ³⁶Ja inun, matumebi matun buxkakidi datan akin shinain jawendi yubakayamaxankanwen, man jaska waxun matun bu meshupa bestichai maewakin man juxupawatidumakidan. ³⁷Jaskaken man yubakatiduma shinankin chanima yuikinan: “Jaa, en atiduki”, ikasmai: “Jamaki. En atidumaki”, iki janchakin besti yuikubainxankanwen– iwanan,

**Kupinamei manakunantimakidi Jesúsun jatu yusinikiaki, na janchadan
(Lc 6.29-30)**

³⁸ana jatu yusinkin:

–Moisin nukun xenipabu ana yusinkin: “Miki sinatakin mia detekin min bedu kasmai min xeta kasmai jadatuda matu chakabuwabu xanen ibu min yuia jabianudi manakukin jau mia jatu kupixunxanunwen”, axun keneni.

³⁹Jawen jancha peki. Ana jabia keskadi ja binua matu yusinun ninkakanwen. Tsuada miki sinatakin yusiudi mia ispaus aka jabebis sinatakin kupiyamakanwen. “Uke betsadi ea awe”, ika dabekexunai keskakin shinankubainxankanwen. ⁴⁰Ja inun, min tsuada dibia xanen ibu anu mia iyua pakaxun min bixanun min sanpu jau biyunun xanen ibun mia yunua inanyuwe. “Pakaxun jau bixanun

dakukuti biantidubumaki”, akin Moisin yunubianiken xanen ibun mia yunua min dakukutidi yaushiyamawe.⁴¹ Ja inun, tsuada xanen ibukin yunukin kilómetro bestichai anu jawen mabu mia bumaya buxunkin janu mia yuia binumabain ana kilómetro betsa anu man buxuntiduki, sinatamadan.⁴² Ja inun, yuda betsaa nuitapai jawa jayama min mabu biyukatsi mia yuka yaushiaman inanyakubainxankanwen– iwanan,

**Matuki sinataibu ana dananma
jatuwen nuitikidi Jesúsun jatu
yusiniaki, na janchadan**

⁴³ana jatu yuikin:
—Jaska inun, betsadan, matun yusinanbun Diosun jancha matu yusinkin yuikin: “Matunabuwen besti nuikubainkanwen, nawabu matuki sinatamisbu bechipaiamadan”, akin matu yusinmisbuki.⁴⁴ Jakia eanan, jancha betsawen en matu yusiaiin. Matuki sinataibu jatuki sinatama jatuwen nuikubainxankanwen. Ja inun, matu ichaibu inun matu ichakawaibu jatu dananma medabewakin jau Diosun jatu duawanun yukaxunkubainxankanwen.⁴⁵ Jakia jaska matun Epa nai anuatan yuda pepabu inun yuda chakabubuwen nuikin jatu badi chaxamaxunmis inun ui imaxunmis keska wakin matudi yuda dasibubuwen nuikin man jatu medabewakubainaiwen taexun jabun uinkin man Diosun bakebu unanxankanikiki.⁴⁶ Jamen gobienre pei bixunikabu chakabubiai duanamemisbu keskakin tsuabunda matu duawaibu jatube besti man duanameaya matuwen Epa Dios benimamaki, jawa manakuti pepa matu inanmadan.⁴⁷ Ja inun, ikunwain betsabu bechitan jabube besti janchakin yuda betsabu danain ikunwanbuma jabiaskadiamisbuwen taexun pepakin man jatu binuamaki.

⁴⁸Jaskaken matun Epa Dios pepa nuikipa keskai matudi pepai dasibibube nuidiakubainxankanwen– iwanan,

**Jaskai pepatikidi Jesúsun jatu
yusiniaki, na janchadan**

6 ¹ana jatu yuikin:
—Yuda betsabu man medabewai jau matu uin bestikin kenwanunbun jask ayamakubainxankanwen. Jakia yudabun bedubi besti man jatu medabewakin duawamiskenan, Epa Dios nai anuatan jawa ana betsa matu manakuama ixanikiki, kenwanmadan.² Jaskaken nuitapaibu man medabewaidan, tsua jatu banabimakin xabakabi jatu uinmakin pawayamakubainxankanwen. Jakia jabu bepadamemisbun nuitapaibu jatu medabewakin jau yudabun ea kenwanunbun, iwanan, ichati jiwe anuxun inun bai namakixun jawada jatu inankin xabakabi wamisbuden, yudabun manakuti ma jayabuki. Jaskawen taexun chanima kenmisbu Diosun ana jatu kenwanma ixankanikiki.³ Nuitapaibu medabewakin tsua yuiyamakubainxankanwen, min jaibujaida yuikin unanmamadan.⁴ June pepa aki pepakubainxankanwen. Jawada june man jatu axunmis matun Epa Diosun unankin ana manakuti pepa matu tibi inanxanikiki– iwanan,

**Dios dayuikin yukatikidi Jesúsun jatu
yusiniaki, ja janchadan**
(Lc 11.2-4)

⁵ana jatu yuikin:
—Ja inun, betsadan, ja jatunmebi kenmisbun ichati jiwe anu kasmai jemaintin anu nixun jau ea ninkakin kenwanunbun ika jui kushipawen Dios kenwanmisbuki. Jaska waibu Diosun bechipaiama yudabun besti jatu bechipaimisbuwen taea matudan, jaskay amakubainxankanwen.⁶ Jakia matunan,

Dios dayuikatsis iki janu tsua niama anu ka june jabe janchakubainxankanwen. Man jaskai Epa Diosun dasibi june unainwen taexun ninkatan pepawen matu manakuxanikiki.

⁷Ja inun, matu Diosbe janchaidan, jau Diosun ea ninkanun, ika jabias jancha jawenchains yuiyamakubainxankanwen, jaska Dios ikunwanbuman amisbu keska wamadan, jamen janchawainan. ⁸Jawa man jayama man yukakatsis ikai man yukadiama matun Epa Diosun unainwen taexun jas shinankin jawenchains yukayamaxankanwen. ⁹Eska watiki, dayuikinan:

–Nukun Epa nai anuatuun, min kena medibidan,
mia duawakin jau mia
kenwankubainunbunwen.

¹⁰Nai anuxun min yunua jaska chibanmisbu keska wakin nenuxundi dasibibundi jau min shinan besti chibankubainunbunwen.

¹¹Ja inun, nuku mekekin na jabiatian nun piyunun jaska min shinainwen piti nuku inanwen.

¹²Ja inun, nuku chakabuwaibu jatu jakimawakin jatun chakabu nun ana jaska shinanmawen taexun nun mia chakabuwai buaxuntan ana jaskakidi nuku shinanmayamawe.

¹³Nuku mekekin jawen chakabuti tibi nuku kainmaxunyamawe. Ja inun, jawada chakabu tibi nuku nemaxundiakubainwen, atiki-atan

¹⁴ana jatu yusinkin:
–Yuda betsan matu chakabuwashina jaki sinatabiatan jawaida jabe daekubaikanwen, ana jas shinanmadan. Man jaskai bu matu chakabudi Diosun matu buaxuntan ana shinanma

idiaxanikiki. ¹⁵Jamen yuda betsabun matu ichakawabu ja shinankin man pewamaken matun Epa Diosun matun chakabudi buama ixanikiki.

Jaskai samaketikidi Jesúsun jatu yusinikiaki, na janchadan

¹⁶–Mamu samakeidan, besu atimapatan iyamakubainkanwen, jabu bepadamei kenmisbu samakei amua mapumisbu keskamadan. Jabu bepadamei kenmisbu jatun besu atimapata uinkin ma samakeaibu jau ea unanunbun ika jaska mapumisbuki. Chanima yudabun uinkin jatu kenwainbu jawen besti jatun manakuti bimisbuki. ¹⁷⁻¹⁸Jakia Dios shinain man samakeai jau tsuan matu unanyamanun bechukitan buexekei pekubainxankanwen. Samakei man jaskai matun Epa Diosun dasibi june unaintun man ikai uinkubainkin kenwankin matu manakuxanikiki-iwanan,

Dios jiwexuni pepatikidi Jesúsun jatu yusinikiaki, na janchadan
(Lc 11.34-36; 12.22-34; 16.13)

¹⁹ana jatu yuikin:

–Na mai anuxun juni ichapabu jiwxun mabuwen kemukin ichawamisbuki. Jakia matunan, mabuwen kemukin ichawayamaxankanwen. Jawada bikin man ichawa jawen masanen pesa pesa akin inun nakaxan pidatiiduki, matu benunkinan. Ja inun, junibu yumetsubun matun jiwe anu jikitin matun mabu dasibi man adu pewabiaken matu bianbaitidubuki. ²⁰Jaskaken yuda betsabu ikaibu keskakin kemukin mabu ichawama Epa Dios besti benimawakubainxankanwen. Man jaskakubainmisbuwen taexun Diosun matu manakukin jawada jawen masanen pesa pesa aisma inun juni yumetsubun mia bianbaitidubumawen matu

duawaxanikiki, jiwekuinmakinan.
²¹Tsuabuda jawen jiweti mabuwen kasmai Dioskidi shinain man Dios jiwexunaidan, jabiadidi matun shinanen man nuiai jayaki, nai anu kasmai mai anudan.

²²—Ja inun, matun yuda anudan, matun bedudan, bin chaxa keskaki. Jaskakidi matu yusinun ninkakanwen. Matun beduwen man uinmiski. Matun shinanwen matun yuda pepa jaya kemuama man xabakabi meke pewaki.
²³Jakia bedu chakabuya jaska shinan chakabu jaya kemukin uinchakakin man kanemiski. Ja inun, Diosun shinain unanbiakin tsuanda shinan pewama kanei chakabujaidamisbuki. Matudan, jaskayamaxankanwen.

²⁴—Ja inun, jadatuda dayadun jawen xanen ibu dabe dayaxunkin ja dabe medabewatidumaki, betsa bechipaikin chibankin betsa bechipaima danankin ninkamadan. Jabiaskadi wakin pei inun Diosdi chibankin ja dabe jaska waxun man duawatidumaki— iwanan,

**Diosun ikunwainbu dasibi
mekemiskiaki, na janchadan**

²⁵ana jatu yuikin:

—Eksa bestiwen taea matunmebi man jamapaiwen dabanan imisbukidi matu yusinun ninkakanwen. Jiwe bestia pepakunkainun ika piti pi inun tadi sawenun ika jawen dabanan iyamakubainxankanwen. Jiwea jayaidan, pitiwen besti nun itidubumaki. Yuda jayaidan, tadi sawe bestinun ika nun itidubumadiki. Jaskaken ja dabewen taea nun jiwenun Diosun nuku jiwea inanma iniki. ²⁶Uinkanwen, peiyabukididan. Nai anu peiyabunan, jabun jawa banama inun jawa bimi tsekatan jabun piti aduti jayamabiaken matun Epa Dios nai anuatuin jatu pimakubainmiski. Jaskaken Diosun matu bechipaikin peiyabu matu

binumakubainmiski, medabewakinan.
²⁷Ja inun, tsuabuda ibubis nuikin jawen mabu inun jawen piti shinainwen taexun jawen jiwea ana chaipawatidumajaidaki.

²⁸—Jaskai tadiwen taea shinain man jawen dabanan imisbumen? Uinkanwen. Ja jua yumei ewamisbukidi shinankanwen. Jua dayakin tadi timaisbumabia jua jawendua tuemisbuki.
²⁹Jua jaskabiamisken nukun xenipabu xanen ibu Salomón mabujaidayatun jawen tadi jawendua kadujaida sawexun jawenduakin jua binuama iniki. ³⁰Jakia ni maxu juaya sepashinxun kuamisbuki. Diosun jua jawenduawamistun ja jua binumakin Dios matuwen nuikin matu tadi sawematiduki, man ikun bexmas wabiayadan. ³¹⁻³²Jaskaken yuda dasibbu mai jidabi anuabu piti inun tadiwen kemukin benakubaunmisbuki. Jakia matudan, man betsaki. Matun Epa Dios nai anuatuin matu unainwen taea ja piti inun tadi man bikatsis imisdan, ana jas shinain jawen dabanan iyamakubainxankanwen. ³³Jakia jawada Diosun bechipaiai chibankin ja dukun Dios xanen ibuwakin shinankubainxankanwen. Man jaska wai ja kachu jawen jiweti piti inun tadi man jayakunkainxanaii, Diosun matu medabewadan. ³⁴Jaskaken meshukidi min jawada waxanaiwen dabanan iki dateyamakubainxankanwen. Jakia xaba tibi jawanda mia itimaska wai taxnikunkainmis shinankanwen— iwanan,

**Jatu unanti watan chitenametimakidi
Jesúsun jatu yusinikiaki, na janchadan**
(Lc 6.37-38, 41-42)

7 ¹ana jatu yuikin:
 —Tsuada ja akin chitekin unanti wayamaxankanwen. Man jatu jaska wamaken Diosundi jabiaskadi wakin matu chitekin ja akamadi iyanikiki.

²Jamen jatuwen nuiama chitekin man jatu ja amisken jabiaskadi wakin Diosun ja man janchai ja imiswen Diosun matu ja akin chitediaxanikiki. Ja inun, jabias shinanwendi min jatu unanti wamiswen Diosun matudi unanti waxanikiki, kaneamadan. ³¿Jaskaken ikunwain betsa pewakin medabewanun, iwanan, jawen jamapai tude jawen beduki jikia min bikatsis ikaidan, mina anu ja dukun ja ji ewapa min jaya min shinanmamen? ⁴Ji jidabiwen betimanabia jawa shinanma yuikin: “Jani min ji pese beduki ikadan, ¿mia bipa?” akin kanekin man yuimiski. ⁵Jakia bemakis bepadamei janchamisbuun, matudi chakabubia betsan chakabuai uinkin man ja amiski. Man ji jidabi betimanabia tsekaxun puta keska watan matun juinti medanua matun chakabu ewapa putatan ana kaneama medabenankin ji pese min jaibun bedu anua bia keska wakin juni betsan chakabu bexmas jayadi medabewakin man yusintiduki.

⁶–Jaska inun, jawada pepa Diosuna kaman puben man inantidumaki, jawen unanti watan matu keyutiduwen taexunan. Jabiaskadi wakin ina yawa puben man mabu pepa inantidumadiki, chakabuwakin jau matu pema pema akanyamanunan. Jabiaskadi wakin tsuabunda Diosun jancha dananjaidamistun jau matu deteyamanunbun jatu ana yusinyamaku bainxankanwen– iwanan,

Dios yukai chikishtimakidi Jesúsun jatu yusinikiaki, na janchadan
(Lc 11.9-13; 6.31)

⁷⁻⁸ana jatu yuikin:

–Jaska inun, betsadan, tsuanda Dios yukakin ea akadan, jawen jawada inanmiski. Tsuanda jawada benakin Dios yukadan, jaki nukumamiski. Tsuanda jawada bi jikinun ixun Dios

kenadan, bepenxunmiski. Jaskaken shinanchakama Dios ea akadan, betsaki. Jawada min yuka mia axuntiduki. Benakin jawada min yuka mia bechimaxanikiki. Jawada bi jabe janchanun ixun min kena mia bepenxunxanikiki.

⁹–Ja inun, matun baken misi matu ea aka jaki dakekin mishki man inainsmaki. ¹⁰Ja inun, baka matu ea aka jaki dakekin dunu man inainsmadiki, jatuwen nuikinan.

¹¹Jaskaken matun shinan pepamabia matun bakebu man duawamis man unaini. Jamen tsuanda Epa Dios nai anua ea akin man yukadan, jawada pepa yaushiamma matu inantidumaki. ¹²Jaska inun, betsadan, tsuada miwen nuikin jau mia medabewaxanunbun matun dukun jaska shinankin uinmakin jatu medabewakubainxankanwen, jaska wai nukipakin man kaneamakidan. Jabias shinanwen Diosun jancha yuixunikabubetan Moisin jatu yusinidan, jaki dasi watan na jabias yununi jakimama shinain man jatube medabenankunkainxanaii– iwanan,

Bai dabekidi Jesúsun jatu yusinikiaki, na janchadan
(Lc 13.24)

¹³⁻¹⁴ana jatu yuikin:

–Chi nukaismakidi kaidan, janu jikiti xui inun jawen kati bai jaxpa keska jawen kai bikamawen taea yushin chakabun bai bechipai yudan kaian ichapa jawen bumisbuki. Jamen jiwekuiankidi kaidan, janu jikiti xui inun jawen kati bai jashu bika keskawen taea ja bai benakubaini atimas nukutan yuda eskadabes jawen bumisbuki. Matudan, ja bai jashuki nukutan jawen bukin ea chibankubainkanwen– itan

Ji tibi jawen bimiwen unantiki, akin yusinkin Jesúsun jatu unanmanikiaki, na janchadan
(Lc 6.43-43)

¹⁵—Ja inun, betsadan, ja padanananmisbu pepa keskakin Dioskidi yusinbiakin jawen juinti inu puben keskan chani jancha matu yusiaiñbu ana ninkama jatu uindakubainkanwen. ¹⁶Nishi muxaya anua uva bimi man tsekaismaki. Ja inun, isne muxa anua higuera bimi batapa man tsekaismadiki. Jabiaskadi wakin jaskai jiwemisbu pepaibu inun chakabuaibu uinkin ja padanananmisbu man unanxanaii, jaskai jiwemisbu uinkinan. ¹⁷⁻¹⁸Ja inun, ji pepa bimiai chakabu ikama pepa bestimiski. Jamen ji chakabu bimiai pepamadi chakabu besti idiamiski. ¹⁹Janua ji bimiuma tibi dedatan kuamisbuki. ²⁰Jaskaken jadatuda bimi chakabu jaya keskatun tsuabuda yusin pewakin jatu medabewabuma unantan danankin jatu ninkayamakubainxankanwen— itan

Diosun yunuawen besti amisbu jawenabukidi Jesúsun jatu yusinikiaki, na janchadan
(Lc 13.25-27)

²¹—Ja inun, tsuabunda jatun kexa bestiwen ea kenakin: “Xanen Ibuun, Xanen Ibuun”, ea wabiakin jaska shinainsbumadan, jabun en Epan jancha chibanka nai anu nukube jiweama ixankanikiki. Jakia en Epa nai anuutun jawada yununi inun bechipaiai chibankin akubainmisbu besti nukube jiweama ixankanikiki. ²²Na jaska en matu yuiai keska enabu kayabi jatu ichawanun ika en ana juaya ichapabun ea yuikin: “Xanen Ibuun, Xanen Ibuun, mikidi yusinkubainkin min kena kushipawen yuikin yushin chakabu nichinkin dami atimaska betsa betsapa nun mia

axunkubainmiski. Nukudi katudiwe”, ea akaibu ²³jatu yuikin: “Padananain chani chakakin man chakabuwamiski. Man enabumaki. Tudi budikanwen”, en jatu waxanaii— itan

Unanepabukidi inun unainsmapabukidi Jesúsun jatu yusinikiaki, na janchadan
(Mr 1.22; Lc 6.47-49)

²⁴—Jakia jabun en jancha ninkakin akubainxanaibukidi miyuiwen matu yusinun ninkakanwen. Tsuanda jiwe wakatsi ikin mai basanbainkin uke medan mishkiki pesaxun jaki mishki tsamabidankin jiwe waimaken ²⁵janua ui ika bai matajaidabidankin jawen jiwe achia ja jiwe mishkiki tsamianwen taea niwewanen tsibusketiduma keska jawen daya benuama ja juni unanepaki. En jancha ninkamisbu jaska keskaki. ²⁶Jamen jawada en yuiai danankin chibainsbumakidi matu yuinun ninkakanwen. Tsuanda jiwe wanun, iwanan, mashi anu basankin kini chai wama bexantu besti watan mishki tsamabidankin jabebis watan jiwe waimaken ²⁷janua ui ika bai matajaidakin jawen jiwe achia mishkiki tsamianmawen taea jawaida niwewan bekin tsibuskea di ika keskakin jawen daya benujaidamisbuki. Jaska dayamisbu keska patapabuki, en jancha danainbunan— akin jatu yusinkin jancha meneai ²⁸⁻²⁹ninkai “Betsabun Diosun jancha nuku yusinmisbu keskamaki. Jakia xanen ibu kushipa keskakin nuku yusinbikain!”, iki Jesúsun jatu yuiai ninkai e iake iakenibukiaki.

Juni yudaki chamini Jesúsun kayawanikiaki, na janchadan
(Mr 1.40-45; Lc 5.12-16)

8 ¹Janua Jesúsun jatu jancha wakin menetan mati anua butukidanaya yudan kaianen chibankidanaibun ²juni

yudaki chamini jabias baiwen Jesús juaiki nukutan ja bebun danti ixun yuikin:

—Yusinaan, ea kayawakatsis ikin min ea kayawatiduki— aka

³jawen chamiwen mesekin danankin tsuanmekatsi ismabiaken Jesús jawen dabanan ikin mexunkain mekin yuikin:

—En mia xuxawakin kayawai— akaya jawen chami sakada iki daxnukui keyuaya ⁴Jesúsun nemakin yuikin:

—En mia yuiai ninkaidawe.

Jawada en mia axukidi tsua yuiyamayukubaintanwen. Ja dukunan, Diosbe nukunabu janchaxunika anu min yuda min ma kayaxu jatu uinmatanwen. Jaska min ma kayaxu jau jabun mikidi unanunbun jabiaskadi inankuin Moisin yununi jatu anu buditanwen. Min jaska buaya min ma kayaxu jabun mia unanxankanikiki— abainikiaki.

Romano capitánen dayadu Jesúsun xuxawanikiaki, na janchadan
(Lc 7.1-10; Jn 4.43-54)

⁵Janua Jesús Cafarnaúm mae anu jikiaya ea anun, iwanan, romano capitán Jesúski nukuxun ⁶yuikin:

—Yusinaan, en dayadu isin tene chakayamai ma babua ana benitiduma nuitapajaidaikiki— aka

⁷Jesúsun yuikin:

—Jaskakenan, en mia xuxawaxuin katiduki— akaya

⁸ana capitánen shinantan yuikin:

—Yusinaan, min ea binua en jawamaki. En jiwe anu kama min kushipa besti yunuwe, jau en dayadu ea xuxaxununan.

⁹Ja inun, jatun ea yunumisdan, en xanen ibu jayaki. Eandi soldadobu yunui en xanen ibumiski. Betsa yunukin: “Kawe”, en wa kamiski. Betsa yuikin: “Juwe”, en wa jumiski. En dayadudi yunukin: “Ea axunwen”, en wa amiski— aka

¹⁰Jesúsun ninkai e itan ja jachun beaibu jatu yuikin:

—Na jaska nawa capitánen ea ikunjaidawai nukunabu Israelbun ikunwainbu jaska keska en jatuki nukudiamaki. ¹¹Eanan, chanima en matu yuiai. Dios xanen ibukin mai jidabi anua badi juaikidia inun badi jikiaikidia ikunwainbu dasibibu jatu ichawatan duawakin Abraham inun Isaac inun Jacobetaan jatu pimaxanikiki. ¹²Jakia nukunabu Diosun yubabiani jawen jancha chibankin ikunwanbumaken jatu danantan janua kaxai xeta yenx yenx imisbu meshuajida medan jatu udenxanikiki— itan

¹³Jesús nasaukekauan capitán yuikin:

—Jaska min ea ikunwainwen taexun en mia axunxuki. Min jiwe anu kadiwe— akaya jabiatiandi jawen jiwe anua jawen dayadu xuxanikiaki.

Pedron dais ainbu inun isin betsapa teneaibu Jesúsun jatu xuxawanikiaki, na janchadan
(Mr 1.29-31; Lc 4.38-39)

¹⁴Janua jawen jiwe anu Simón Pedron Jesús iyua kai jikiton jabianudi jawen dais ainbu yuna daka uintushikin ¹⁵Jesús jawen nuikin metsunxun yuna xuxawa benikidan duawakin bawaxun jatu pimaya

¹⁶janua ma badi kai meshuaya ja mae anu jiwea akeakeabun yushin chakabu jayabu inun isin betsapa teneaibu Jesús anu iweabu yushin chakabu kainmakin isin teneaibu dasibi xuxawanikiaki. ¹⁷Diosun jancha yuixunika Isaásin yuikin: “Diosun Katuatun nun isin teneai mainwankin nuku xuxawaxanikiki”, akin jatu bebunkidi yuini Jesúsun jabiaskadi wakin jatu anikiaki.

Jesús chibanun, iwanan, yukanibukiaki, na janchadan
(Lc 9.57-62)

¹⁸Xaba betsation januxun dasibi jatu xuxawashina tsubaunxun daketapawaibu uinkin jawen tsumabu Jesúsun yuikin:

–Ian kexa betsaudi juindukuin nun bununbun matun xaxu pewakanwenjatu wa pewaibun¹⁹ Diosun jancha kenenibu yusinanamis betsa juxun Jesús yuikin:

–Yusinaan, janida min kai anu en mia chibankatsis ikaii. ¿Mibe kapa?– aka²⁰ jawen shinan unanun, iwanan, Jesúsun yuikin:

–Kaman inu jawen kini jayaki. Peiyabu jawen na jayabuki. Jakia matun Juchi Kayabi Iyua ean en jatu yusinkubaunai janu uxati jiwe en jayamaki. ¿En ikai keskai min idiatidumen?– akaya

²¹jaki chiti ika betsandi Jesús yuikin:

–Xanen Ibuun, ea jeneyuwe, ja dukun en epa mawa maiwatan en mia chipu chibanaxanaidan– aka

²²nemakin Jesúsun yuikin:

–Jaskamaki. Jabun ea chibanbuma mawa keskabun min epa mawa mia maiwaxuntidubuki. Jakia mianan, na jabiatian tapin ebe kawe– abaini

**Niwe inun ianenwan Jesúsun
nemanikiaki, na janchadan**

(Mr 4.35-41; Lc 8.22-25)

²³janua jawen tsumabube xaxun inatan tu abaini kaya²⁴ ianenwan besusi pukeaibun Jesús ma bika xaxu chixukidi daka uxaken janua niwe kushipajaida bekin jene buspu tsaubidankin xaxu jene matawa ma jiki kemaya²⁵ datei Jesús anus ichaxun datekin bestenwankin yuikin:

–Yusinaan, yusinaan, menan nuku medabewadiwe, jiki nun jasatidukidan– akabu

²⁶bestentan jatu yuikin:

–¿Jaskai man dateai? ¿Man ea ikun kayabiwadiamamen?– itan benikauan niwewan inun ianenwan buspu tsaubidanai nemakin:

–Nesewe. Peswe– aka niwe main neseaya ianenwandi bechuduni

maianny²⁷e itan jawen tsumabu yuinamekin:

–Na junidan, čjawa junimen? min atidumakidan. Niwe inun ianenwanendi ninkaikidan– ibaini bui

**Juni dabe yushin chakabu jaya Jesúsun
kainmanikiaki, na janchadan**

(Mr 5.1-20; Lc 8.26-39)

²⁸janua kai ianenwan kexa betsaudi mai pakea Gadara anu keti itan Jesús bututan mapekekainaya janua juni dabe yushin chakabu jayabu janu mawabu maiwamisbu anu besti jiwea pubenjaidaken jatuwen datei tsuan dunkebainsma maiwati anua kainbidani Jesúski nukuaibun²⁹ yushin chakabun jatu bis imakin yuimakin:

–Jesúsuun, min Diosun bake nun unaini. Nukudan, ¿min nuku jaska wai? Janu kupiaitian idiamabiaken čunanti wakin min nuku kupi juai?– iwanan,

³⁰ja mati anuxun ina yawa ichapabun pilkin mai mixexaibu³¹ yushin chakabun uintant Jesús yukakin:

–Min nuku kainmakin nichianan, ua ina yawa anu nuku nichinwen, ja medan nun jikinunan– akabu

³²Jesúsun jatu yuikin:

–Peki. Jadi butankanwen– jatu wa ja juni dabe anua yushin chakabubu kainbaini ina yawa medan jikibainaibun ja ina yawa datei mawa keyatapa butei nidi ibaini ianki pukui keyutan jasai keyuaibun

³³jaskai uintant ja ina yawa mekenikabu datei kushibaini mae anu buxun juni dabe yushin chakabu jayabu jaskaxu jatuki chania akeakeaibun

³⁴janua ja mae anua yuda ichapa kainbidan jaskaxu uinun ika Jesús anu bexun ina yawa jasai keyukanxu uintant datekin Jesús nichinkin yuikin:

–Nukun mae anua kadiwe– anibukiaki.

**Jesúsun juni yuda babuni xuxawakin
jawen kushipa jatu
uinmanikiaki, na janchadan**
(*Mr 2.1-12; Lc 5.17-26*)

9 ¹Jaska wabu jawen tsumabube Jesús xaxun nanetan ana chintunkaini ianenwan pukebaini jawen mae Cafarnaúm anu jiki keti ikaibun ²ma ana Jesús jua ninkatan juni yuda babuni jawen dakatiki daka jawen jaibuaibun bakebidan datantan: “Jesúsun xuxawatiduki”, iwanan, shinainbun ikunwainbu Jesúsun unankin juni yuda babuni yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau ana shinanyamanun en mia buaxunaii-akaya

³Diosun jancha kenenibu yusinanamisbun ninkatan Jesúski sinatai yuinamei: “Ja juni chakabuki. Nuku padain Dios keskakatsis ikikiki. Diosun besti jawen chakabu buatiduki”, ikaibun ⁴tsuan Jesús yuiamabia jatun shinan unankin Jesúsun jatu yukakin:

—Matunan, ⁵jadatun bikamamen, jawen chakabu buaxunadaka, jawen yuda beniadaka? ⁶Ja dabe bikaken Diosun besti atiduwen taexun ⁷jadatun chakakim man shinanchakai? En matun Juchi Kayabi Iyu na mai anua ea en jawen kushipa jayatun jawen chakabu en buaxuntidu man unanun en akai uinkanwen- iwanan, juni yuda babuni kaya wakin yuikin:

—Benitan min dakati iabaini min jiwe anu kadiwe- aka

⁷jawaida yuda damesteni kayatan benikauan jawen dakati bitan iabainaya ⁸mapubaunxun uin datekin yuikin:

—Jabaa! tsuan jaska waismaki. Jakia Dios pepajaidatun na juni ma

kayawaxuki- iwanan, uinkin Dios kenwanibukiaki.

**Gobierno pei bixunika Mateo Jesúsun
katukin taxnimabankiaki, na janchadan**
(*Mr 2.13-17; Lc 5.27-32*)

⁹Janua kainkaini januxun Roma gobierno pei bixunti jiwe anu en Mateo tsaua Jesúsun ea bechitan yuikin:

—En mia tapinmai: “Ea chibankubainwen”, ea wa benitan dasibi jene keyubain chiban taewabain ¹⁰en jiwe anu iyuxun jatu pimanun, iwanan, Roma pei bixunmisbu inun Diosun jancha kenenibu yusinanamisbun jatu ninkaisbuma en jaibuaibu ichawaxun Jesúsbetan nun piaibun ¹¹fariseobun uinkin Jesúsun tsumabu yukakin:

—¿Jaskakin matun yusinan pei bixunmisbu chakabubu inun nukun jancha ninkaisbumabetan pimenkain? Chakabuki- akaibun

¹²Jesúsun ninkatan jatu chitekin yuikin:

—“En peki”, iwanan, shinainbu anu juni dauga kaismaki. Jakia isin teneaibu anu besti juni dauga kenabu kamiski. ¹³Diosun Oseas yuiniidan, ¿man uindiamamen? Matu yuinin ninkaidakanwen: ‘Ea benimawanun ixun chaxuwani kuakin menu keyuaiwen besti akama yudabuwen nuikin jau ea benimawakubainunbunwen’, aka ninkatan Oseasin keneniki. Jaskaken “En chakabuki”, iwanan, shinainbu jatun juinti pewakin en jatu medabewa shinan betsa watan jau Dios ikunwanunbun en juniki, juni dauga keskaidan. Jakia “En chakabumaki”, ikin shinainbu jatu medabewatanun ika en juamaki- jatu waniki.

**Samakenikabun Jesús yukanibukiaki, na
janchadan**
(*Mr 2.18-22; Lc 5.33-39*)

¹⁴Janunkain xaba betsation Nashimanika Juanki chiti ikabu Jesús anu bexun yukakin:

–Nuku inun fariseobuki chiti ikabu nukun chakabuwen taea nukunmebi ichakanikai samakei nun piama uxayumiski. ¿Jaskai miki chiti ikabu samakeisbumamen?– akabu

¹⁵Jesúsun jatu yuikin:

–Juni ainyaín nawaibu anu jawen jaibuaibu paxkadiama manunamei jatunmebi piama ichakanikatidubumaki. Jakia jatu xunubaini kaken manui jawen jaibuaibu samakei piama ipaketidubuki. Ea iyuabun jabiaskadiai ewen nui en jaibuaibun piama idiaxankanikiki-iwanan, ana jatu yuikin:

¹⁶–En yusianan, tadi bena chukadiama keskaki. Matu yusinun ninkakanwen. Tadi xeni baxnekea tadi bena tuax chukadiamawen tadi xeni tsamian patsa estei ana baxnekemiski. Jamen matun yusianan, tadi xeni baxnekea keskaki. En yusianwen tsamian keska wakin matun yusian en pewatidumaki. ¹⁷Ana jabiaskadi keskawen matu yusinun ninkakanwen. Bichi bishtu xeniki uva jene bena buspudiamana manekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiaskadi wakin en yusian bena matun shinan xeni en jusitudumaki, benukinan-jatu wai

Ainbun jimi baxneni Jesúsun mainwantan Jairon bakedi bestenwanikiaki, na janchadan
(Mr 5.21-43; Lc 8.40-56)

¹⁸janua janchai menediamaken judio xanen ibu betsa Jesús bechibidani juxun ja bebun danti ixun yuikin:

–En ainbu bake mawakatsis ikikiki. Ebe kaxun uinkin jau xuxanun ea mexuniyewe– aka

¹⁹Jesús benitan kaya nun jawen tsumabudi nun jabe buaibun ²⁰⁻²¹janua ainbu jimi baxneni ja isin tenei ma 12

año kabia jawa neseisma badi betsa tukama ikunkainmis nuitkaapakin Jesús chibankin shinankin: “Jawen tadi kexa besti mea en xuxatiduki”, iki Jesúsun pechiudi chibanbaini kakın jawen tadi kexa besti metsa jawaida jawen jimi maianyan ²²Jesús niti itan nasaukekaun uinkin ja ainbu yuikin:

–Ainbuun, min ea ikunwanyan en mia xuxawaxuki. Ana isin teneama unanuma kai pediwe– aka jabatiandi ana jimi ikama kaya

²³jaska wabaini buaibun judio xanen ibun jiwe anu icha yudan kaian kaxai sain iki biski ikaibun jikikainkin jatiditun tepe dewe mawaibu Jesúsun ²⁴jatu yuikin:

–¿Jaskai eiskaun kaxai man biski ikanaí? Jawen bakedan, mawa kayabiamaki. Uxa bestia ikikiki. Unu taxniyukanwen– jatu waya: “Jawen yuda ma mawaki”, ixun ichapabun Jesús uinkin usainbu ²⁵jatu nichian buaibun janu ainbu dakanu Jesús jikikain chipash metsuan ana jiwei benikaunikiaki.

²⁶Januxun ja maewan anuxun Jesúsun jaska washina dasibibu chaniaibu ninka keyunibuki.

Juni bekun dabe Jesúsun xuxawanikiaki, na janchadan

²⁷Janua xanen ibu Jairon jiwe anua kainkainaya juni bekun dabetan chibankin jancha kushipawen yuikin:

–Davidin babaan, nukuwen nuiwe– akubainabu

²⁸janua Jesús jiwe betsa medan jikiaya juni bekun dabe jaki nukuabu Jesúsun jatu yukakin:

–En matu xuxawatidudan, ¿man ea ikunwain?– jatu wa

–Jaa. Xanen ibuun, nun mia ikunwaiin– akabu

²⁹januxun Jesúsun jatu bemepitan yuikin:

–Jaska shinankin man ea ikunwainan, man xuxaii– jatu waya

³⁰jawaida bepexetan uiainbun Jesúsun jatu nema chakayamakin yuikin:

–En matu jaska waxudan, tsua yuiyama mapuyukanwen– jatu wabia ³¹buxun jaska Jesúsun jatu xuxawaxu dasibi jatuki chanibaunkin kakapa waibun

**Juni juyu Jesúsun
xuxawanikiaki, na janchadan**

³²jabiatandi juni juyu yushin chakabu jaya Jesúsun anu juni betsabun iweaibun

³³Jesús jawen nuikin yushin chakabu kainma kaya janchai taeaya ja dapi mapubidankin uin e itan yuikin:

–Israelbun jaska nun uiain keska tsuan aismaki. Ja juni pejaidaki– akeakeaibun

³⁴jatun jancha bechipaiama fariseobun jatu yuikin:

–Na junidan, yushin chakabu xanen ibun kushipa jayaki. Jaska bestiwen taexun yushin chakabu jatu kainmaikiki– iakeaibun

**Jesúsun dayakapabu eskadabesken
ana midima yukatikidi jatu
yusiniaki, na janchadan**

³⁵janua jatu jaska wabaini kakin Galilea anu mae ewapabu inun mae jatiubuma anuxun jatun ichati jiwe anuxun yusinkin Dios xanen ibuaikidi kakape yusinkin isin betsapa teneaibu xuxawakubaunkin ³⁶yudan kaian uin jatuwen nuijaidakin jabu chaxuwan uinikauma keskabuweng taea jatuwen dabanan ikin ³⁷⁻³⁸nun jawen tsumabu nuku yuikin:

–En tsumabun en jancha ikunwankin chibanmisbun jatu yusian akeakebaunaibun ichapabun ea ikunwanxankanikiki. Jaskaken chanima Diosun bai anu miban midima ma jushin keyui keska dakaki. Jakia jawen

dayakapabu eskadabesken taexun ana dayakapabu ichapa jau yununun bai ibu Dios ana yukakanwen, jawen yunu tsekakin ichawaxunai keska wakin yudabu jau jawen jancha jatu yusinbaunxanunbunan– nuku waniki.

**Jesúsun jawen 12 tsumabu ichawaxun jatu
kushipa wanikiaki, na janchadan**
(Mr 3.13-19; Lc 6.12-16)

10 ¹Januxun nun jawen 12 tsumabu Jesúsun nuku ichawaxun jawen yushin chakabu kainmati kushipa inun jawen isin betsapa teneaibu xuxawati kushipa nuku yununiki. ²Nun jawen 12 kushipayabun nukun kenadan: Simón jawen kena betsapa Pedro inun, jawen betsapa Andrés inun, Zebedeoan bake dabe Santiago inun, jawen betsapa Juan inun, ³Felipe inun, Bartolomé inun, Tomás inun, nawan pei bixunika Mateo ea inun, Alfeon bake Santiago inun, Tadeo inun, ⁴Simón betsan nawabu bechipaisma inun, Judas Iscariote jatun Jesúsun jatu chipu achimaxanai nun jati inibuki, Jesúsun tsuma kushipayabudan.

**Kakape jau jatu yusintanunbun dabe
tibi jawen tsuma kushipayabu Jesúsun
nichinikiaki, na janchadan**
(Mr 6.7-13; Lc 9.1-6)

⁵Nuku jaska watan januxun nun jawen 12 tsuma kushipayabu Jesúsun nichinkin nuku yuikin:

–Nawabun mae anu buama inun Samaria mai pakea janu jiweabu anudi buyuama ⁶jakia Israelbu chaxuwan benua keskabu anu besti buxun ⁷jatu yuikin: “Diosun Katua xanen ibui ma kemaikiki”, akin jatu yusinkubauntankanwen. ⁸Jaska wakin isin teneaibu xuxawakin mawabu bestenwankin yudaki chaminibu kayawakin yushin chakabu jayabu kainmakin akubauntankanwen. Na kushipa jawa pakama man bixuwen taea

jabiaskadi wakin jabias kushipawen jatu medabewakin jawen jatun jamapai jatu yukayamakubauntankanwen.

⁹Kaidan, man eskabaintanun bun matu yuinun ninkakanwen. Mais butankanwen, jawa buamadan. Oro pei jexe inun, plata pei jexe inun, cobre pei jexe buama,
¹⁰kappakan buama sanpu betsa buama, matun bichi tae betsa buama, jawen mestenti betsa buyamatankanwen. Jakia man jaskakainaya dayakapabu pimamisbu keska wakin matu pimadiaxankankiki.

¹¹Janua mae betsa anu jikitan juni duapa yukai ikii jaki nukutan jawen jiwe anu matu iyua janu kaxun jawen mae anua kadiama ja juni duapatun jiwe anu jiweyuxun jawen mae anuxun yusinyuxankanwen. ¹²Janua jiwetan jikikainkin eska yuixankanwen: “Unanuma jiwekanwen, Diosun jancha nun matu bexuainan”, jatu waxankanwen. ¹³Januxun matu beyawaibunan, matun jancha pepa jatu yusinxankanwen. Januxun matu beyawakin Diosun jancha ninkaibu jau Diosun jatu unanuma jiwemakin duawakubainxanun yunuxankanwen. Jakia januxun matu beyawabumakenan, matun jancha pepa jatu anu jamen benuyamaxankanwen. ¹⁴Ja inun, janixunda matu danankin ninkakatsi ikabumaken jatu unanti wakin janua kainbainkin matun tae anua mai kudu jatuki tabainxankanwen, jau jabiaskasi jiwenunbunan, jawa unanmadan. ¹⁵Chania en matu yuiaii. Janu Diosun yudabu dasibi jatu kupiaitian jaska Sodoma inun Gomorra ja maewan dabe chiwen Diosun jatu kupikin jaska wani binumakin jabun matu dananibu Diosun jatu kupijaidaxankankiki– iwanan,

Jawen tsuma kushipayabu jatu ichakawaxanaibukidi Jesúsun jatu yusinikiaki, na janchadan

¹⁶ana nuku yuikin:

–Eskawen taexun en matu yuiai ninkaidakanwen. Kaman inu pubenbu anu man en 12 tsumabu chaxawan pepa nichian keska wakin en matu yunuaii, man en tsumabu ewen taea matuki sinataibu anudan. Jaskawen taea dunu tsuan padantiduma unanepai inun deiwan pepa keskakin tsua sintamayamaxankanwen. ¹⁷Man en kakapekidi jatu yusianwen taexun ikunwanbuman matu kupinun, iwanan, jatun mae xanen ibu anu matu iyuxankankiki. Ja inun, jatun ichati jiwe anuxun ekidi man jatu yusiaibnu betsabun matu kusha kusha axankankiki. Uindaxankanwen.
¹⁸Jakia en kakape ikunwankin man ea chibainbuwen taexun tsuabunda matu achixun xanen ibu kushipabu anu matu iyuabu en yusiankidi xanen ibu betsa betsapaki inun judiobuma nawa betsabuki ekidi man chanidaxanaii.
¹⁹Jakia achixun xanen ibu kushipabu anu matu iyuabu jawada man yuitidukidi Diosun Yushin Pepatun matu unanmaxanikiki. Jaskaken jawa dateama ¿Jadakidi yuixanpa? ikin bebunkidi shin anyamakubainxankanwen, ²⁰matunmebi man janchamaken matun Epa Diosun Yushin Pepatun medabewakin matu janchamaxanikikidan.

²¹Ja inun, yuda betsan janubi jawen betsabun ea ikunwainbu jatu achima akeakediaxankankiki, jau jatu tenanunbunan. Jabiaskadi wakin jatun ibubun janubi jawen bakebu jatu achimadiaxankankiki. Ja inun, jabiaskadi wakin bakebu jatun ibubuki sinatakin jatun ibubun ea ikunwainbu jatu achimaxun jatu tenanmadiaxankankiki. ²²Ekidi jaska yuibaunkin man ea chibainbuwen taexun yudabun matu danain midima matuki sinataxankankiki. Tsuabuda matu keskakin ea chibain jeneisbumadi

en jatu mekediakubainxanaii.²³ Jakia mae betsa anuxun matu ichakawaibun janua kainbaini mae betsa anudi kaxun jatu yusinkubaunxankanwen. Israelbun mae tibi anu nati ikin man jatu yusin keyudiamaken chanima matun Juchi Kayabi Iyua en xanen ibui taexanaii.

²⁴Ja inun, jatun tsumabun jawen yusinan binuntidubumaki. Ja inun, jawen dayadun jawen xanen ibu binuntidumadiki. ²⁵Jaskawen taea jawen tsumabudan, jatun yusinan jancha chibain jau jabiaskadi keska ikubainunbunwen. Jabiaskadiai dayadubu jatun xanen ibun yunua ninkai jau jatun xanen ibu keska idiakubainunbunwen. Jaskaken en matun yusinan ea kenakin: “Yushin chakabu xanen ibu Beelzebúki”, ea wamisbuwen taexun en yusian man chibankubainmisbuwen taexun matudi kenakin: “Beelzebún enabuki”, akin matukidi yuikin chitediaxankankikiki-iwanan,

Tsuki datetimakidi Jesúsun jatu yusiniaki, na janchadan
(Lc 12.2-7)

²⁶ana nuku yuikin:

–Jabun matu ichakawaibudan, jawada jabu bepadametan june akubainmisbudan, Diosun dasibi xabakabi jatu uinmaxanaiwen taea jatuki dateyamaxankanwen. ²⁷Jakia jawada en matu besti yuiai juneama xabakanxun jatu yubaunxankanwen. Ja inun, dintu medan jikiton jawen beputi bepua keska watan jamapai june en matu yuimis jemaintin anuxun jancha kushipawen xabakabi jatu yuixankanwen. ²⁸Ja inun, tsuabunda matun yuda besti tenantidubuwen dateyamaxankanwen, tenanxun matu ana ichakawapaketidubumakidan. Jaki besti mesei man datekubainunbun matu

yuinun ninkakanwen. Tsuanda matun yushin tenantan chi nukaismanu jawen kushipawen matu yunutidu bestiki mesei datekubainkanwen, Dioskidan. Chanima en matu yuiaidan, ja bestiki datei mesekubainxankanwen.

²⁹Jaska inun, isa mishtin dabe pei jexe bestichaiwen bitidubuki, kadumadan. Jaska wabiamisbun isa tibi tanai Dios jakimaismaki. ³⁰⁻³¹Jamen matun bu dasibi midimabiaken Diosun ma tana keyumistun isa mishtin ichapa bechipaabiakin Diosun isa mishtin binumakin matu bechipajaidamiski. Jaskaken jawaki dateyamakubainxankanwen– iwanan,

Jabun Jesús chanima ikunwain jaki dakeisbuma unanti waxanaibukidi jatu yusiniaki, na janchadan
(Lc 12.8-9)

³²ana nuku yuikin:

–Tsuabunda ea ikunwain dakeama ea datan akin yudabu jatu yuikin: “En Jesúsunaki”, iki eki janchakubainmisbu en Epa Dios nai anube janchakin: “Jadan, enabuki”, akin en jatu yuixunxanaii.

³³Jakia tsuabunda ea chibanma en janchaki dakei: “En Jesús ikunwanmaki”, iki eki janchakubainmisbudan, eadi en Epa nai anuabe janchai: “Nadan, enabumaki”, akin en jatu janchaxunamadi ixanaii– iwanan,

Jawenabun ikunwainbu inun ikunwanbuma bika tenemaxanaikidi Jesúsun jatu yusiniaki, na janchadan
(Lc 12.51-53; 14.26-27)

³⁴ana nuku yusinkin:

–Mai anuxun yudabu unanuma jiwemanun ika en juni dabanan ɿman shinainmenkain? Jaskamaki. Jatu paxkatan jatu bika tenemanun ika en juniki. ³⁵En jatu jaska waya juni bake jawen epabe sinatadabexankankikiki. Ja

inun, ainbu bake jawen ewabe sinatadabe diaxankanikiki. Ja inun, jawen babawan jawen yayabe jabiaskadiazankanikiki.
³⁶Ewen taea jawenabube dananain sinatanamexankanikiki.

³⁷⁻³⁸Jawen ibubu inun jawen bakebu bechipaijaidakin ea bechipai bexmas wamisdan, enabumaki. Ja inun, tsuabunda ea chibankatsi iki bika tenei eki jawa dakeama: “En jabe mawakatsi ikaii”, ikin yuiabumadan, jabu enabumadiki. ³⁹Jamen tsuabunda jatunmebi mekei: “En mawakatsi ikamaki”, ikin shinamisbudan, eauma mawaxankanikiki. Jakia ea ikunwankin en kakape yuikin ea chibainwen taexun tenanbu ebe jiwekuinxankanikiki– iwanan,

Manakuti pepa ja dukuntun bitikidi Jesúsun jatu yusinikiaki, na janchadan
(Mr 9.41)

⁴⁰ana nuku yuikin:
 –Jaska inun, en matu nichian man kaken tsuanda matun jancha ninkakin matu beya wakin eadi beya wakin jaibu waxankanikiki. Tsuabunda ea jaibu wakin jatun ea yununidi jaibu wadiaxankanikiki, jawen jancha ninkakinan. ⁴¹Diosun jancha yuixunifikatun yuiai jawen jancha ninkakin beya wanixun jabun Diosun jancha akaibun manakuti pepa bixankanikiki. Diosun jancha ikunwankin juni pepa beya wanixun juni pepan manakuti pepadi bixankanikiki. ⁴²Ja inun, eki chiti iki bexmasbiabun jatu unpax matsipa yukabu ea chibankisbuwen taexun jatuwen nuikin unpax jatu amakubainmisbu chanima jawen kupiti pepa bixankanikiki– nuku aniki.

11 ¹Januxun nun jawen 12 tsuma kushipayabu yusin menetan Jesúsun nuku nichian nun kaya mae betsa betsapa anuadi jibia dapikeadi jatu yusindiakubaunaya

Jesús anu Juanen jawen tsumabu yununikiaki, na janchadan
(Lc 7.18-35)

²⁻³Nashimanika Juan bichiti jiwe anu bichimabu jiwxun jaska Jesucriston akubainaikidi banabimatantanabu Juanen ninkakan jawen tsuma jatida kenaxun yunukin:

–Jesús anu buxun: “Mekenika Cristo Diosun nukun xenipabu yubani ja juxanaidan, ¿min jabiamen?
 ¿Betsa daka nun manai?” akin ea yukaxuntankanwen– jatu wa buxun yukabu

⁴Jesúsun jatu yuikin:
 –Jawada uinkin man ninkakubainaikan, jaska Juanki chaniditankanwen, eskaibukididan.

⁵Bekun inun bexuxbu uiainbu inun, jaska mapuisbuma mapuaibu inun, jabu bichiki dasibi chami betsaniki dakemisbu main sakada iki keyuaibu inun, patabun ninkakin keyuaibu inun, mawa ana bestearinbu inun, jabu nuitapaibun jatun paxati kakape ninkakan benimaibudan, jaska Juan yuitankanwen. ⁶Tsuanda ea ikunwain jawa jawen shinan chakabui chintuinsmadan, chanima benimaxankanikiki!– jatu wa

⁷Juan anu buaibun ja dapi mapubaunabu Jesúsun Juankidi jatu yui taewakin:

–Janu tsua jiweabuma anuadan, ¿jawa man uintantanimamen? Tawa pei niwen bubi bubi wai keska wakin ⁸junin jawen shinan betsa betsapa maewa akeakeimamenkain? ⁸¿Jaskamen? ¿Jaskamadaka? ¿Jaskada jakidi kaiaain man uintantanimamen? ⁹Junin tadi pepa sawea daka? Tadi pepa sawea mabu akunjaidayabu jatun xanen ibun jiwe jawendua anu besti jiwea ikaibu man uintiduki. ⁹Jaskakenan, ¿jawa

man uintantanimamen? ¿Diosun jancha yuixunikamenkain? Jaki. Juanan, chanima Diosun jancha yuixunikaki. Ja inun, yuixunika betsbu Diosun yununi Juanen ma jatu binuaki.¹⁰ Ja inun, Diosun jawen bake nichinkatsi Juankidi yuikin:

‘Ninkawe. Janu min kaxanun jau
pewai kanun en jancha yuixunika
betsa bebunkidi en yunuxanaii, en
mia nichindiamadan’,
akin jakidi jawen kaka kenenibuki.
¹¹Chanima en matu yuiaii. Yuda
dasibibun Dios dayaxunkin tsuan
Juan binuama ibianibun janu Epa
Dios xanen ibuaitian ikunwainbu jaki
dasiabu bexmasjaidabiabun Juan
binuxankanikiki.

¹²⁻¹³Nashimanika Juan judiama
matun ichati jiwe tibi anuxun
Moisin yusian inun Diosun jancha
yuixunikabun yusinpauni matu yusin
bestikubainimabuki. Jakia Juan juxun
Dios xanen ibuxanaikidi bebunkidi
jawan kaka pepa yusinkubainaya juni
pubenen detekatsis ikin Dios xanen
ibuxanai ewamamakin bextenun ika
ikanikiki.¹⁴⁻¹⁵Man pabinkiyabuki.
Ninkatan jakimayamaxankanwen,
Diosun jancha yuixunika Elías jau ana
juxanun Diosun yubani Juanan, jabiaki.
Man ikunwankatsi ikaidan, jawen jancha
ikunwankanwen– iwanan,

¹⁶–Nukunabu na jabiatian jiweabunan,
çjaskada shinankanimenkain? Matu
yuinun ninkakanwen. Mae namakis
jemaintin anu beyuskin jatun ibubu
imis mawai bake mishtinbu xuku dabea
tsauxun xuku betsan yuikin:¹⁷“Tepe
dewe nun mawabiaya benimai man
nawamaki. Janua nun kaxe i kaskin nun
nuiti nawa mawabiaya man kaxamadiki”,
jatu wabu jawawenda beyusti unanbuma
keskabuki, nukunabudan. Matun
shinan chankanti jubiaken man

benimamaki. Jamen matun chakabu
shinain kaxakatsi ikama man shinan
betsa waismaki.¹⁸Jabiaskadia ja
dukun Nashimanika Juan juxun matu
yusinkubainkin misi pepa piama vino
paepa akama matube beyusamaken
jakidi janchakin: “Yushin chakabu
jayaki”, iwanan, man yuia akeakeimaki.
¹⁹Janua eadi matun Juchi Kayabi Iyua
juxun misi pepa pikin vino paepa aki en
matube nawabiakunkainaya ea yuankin:
“Uinwen. Pikeki. Paenkin romano
pei bixunika chakabubu inun yuda
chakabu betsbu jaibu wamiski”, ikin
man eadi yuanmiski. Jamen nuku dabe
nun pepabiaken Diosunabu kayabibu
besti unanepakin jabun nukun yusian
ninkatan nuku chibankanikiki– iwanan,

**Mae betsap a anuxun Jesús
ninkabumaken jatu ja anikiaki, na
janchadan**
(Lc 10.13-15)

²⁰Januxun Jesúsun jatu yusinkin
taewaimanu mae betsap a anuxun
yudabu uinmakin dami atimaska jatu
waxunbia jawa jatun shinan betsap a wama
ikimabukidi yudan kaian Jesúsun jatu
yuikin:

²¹–Corazín inun Betsaida anu man
jiweabu matun chakabu jeneten man
shinan betsap a wakatsi ikamadan, man
nuitapajaidaxankanaii. Jakia Corazín
inun Betsaida anuxun jawen unanti
dami kushipa betsap a betsap a en matu
uinmakubainima keska Tiro inun
Sidón anu jiweabundi jabiaskadi uintan
jatu chakabu jeneten, iwanan, jointi
nishmajaidatan saku wati tadi bexa
xeni sawetan chi mapuwen mapu
tukutan jatu shinan betsap a watan
Dios ikunwankeanibuki.²²Jaskawen
taexun janu kupiaitian ja nawabu
Tiro inun Sidón anu jiweabu jatu
kupi midinkin Corazín inun Betsaida

anu jiweabudi shinan betsa wabuma Diosun jatu kupijaidaxanikiki.²³ Ja inun, Cafarnaúm anu jiweabun man shinankin: “Nun pepabuwен taexun Diosun nuku kenwanxanikiki”, ibiakin man ea ikunwanbumawen taexun janu chi nukaisma anu Diosun matu yunuxanikiki. Jakia Cafarnaúm anuxun jawen unanti dami kushipa betsa betsapa en matu uinmakubainima keska Sodoma anu jiweabutiandi jaskadi uintan jatun chakabu jenenibunan, jatun bababudi nuku dapi jiwekeankanaii.²⁴ Jaskawen taexun janu kupiaitian ja nawabu Sodoma anu jiwenibu jatu kopi midinkin Cafarnaúm anu jiweabu shinan betsa wabuma Diosun jatu kupijaidaxanikiki, jaska Sodoma ani keska binumakinan-iwanan,

Jesús bestitun Dios unainkidi jatu yusiniaki, na janchadan
(Lc 10.21-22)

²⁵janua Jesús shinan chankain benimakin yuikin:
—Epaan, nai inun mai jidabi minaski. Min duapa jancha ja unanepai kenmisbu min jatu unanmama jabu keinsbuma besti min jatu unanmakubainaiwen taexun en mia kenwaiin- iwanan²⁶—Epaan, chanima jaska wakatsi mekenixun min ma jatu unanmai- itan yuda betsabu mapuxun ninkaibun²⁷Jesusun jatu yuikin:

—En Epan jawen kushipa dasibi ea yununidan, tsuan en jawen bake ea unanbumaki. Jakia en Epan besti ea unan keyuikiki. Jakia tsuan en Epa unanmadiki. Ea jawen baken besti en Epa en unan keyudiaii. Jakia jabun ea chibainbu en Epa en jatu unanmamiski.²⁸Tsuabunda xankama ia inun daya chakayamai keskai man punu nukabudan, en matu juindukunmakin medabewanun ea anu bekanwen.²⁹Ja

inun, ina awa dabeki ji tekixkunxun jawada xankama bumabu bika dayabiai medabenain punu nukaisbumaki. Jabiaskadiai eadan, duapakin matu medabewakin ina awa ji tekixkundabea medabenamisbu keskai man ea chibanyan en kushipawen en matu medabewakubainxanaii, man bika tenebiaya matu juindukunmakinan.³⁰Janua ebe ji tekixkundabea keskaxun jawada bikajaida ana tenejaidama ebe medabenain nun xankapa aka wabaintidubuki- jatu anikiaki.

Juindukuntitian jawen tsumabun xekiwan bimi tsekaxun pikubainibukiaki, na janchadan
(Mr 2.23-28; Lc 6.1-5)

12¹Jatianda ana juindukunti sábado betsatian xekiwan bai namakis manan baiwen nun jawen tsumabu Jesúsbukin xekiwan bimi tsekaxun dashukidi axun bunikin nun pikubainaibun²fariseobun nuku chibankin uinkin Jesús ja akin:

—Uinwen. Juindukunti sábadotian dayakin Diosun Moisés nuku nemani min tsumabun kanekanikiki- akabu

³Jesúsun jatu kemakin:

—Bunikin jawada nukun xenipabu pepa Davidin jawen jaibuaibubetan anidan, ¿man uinsmamen? Matu yuinun ninkakanwen.⁴Dios kenwanti tadi jiwe medan David jikixun Diosun Moisés yusiniwen taexun Diosbe nukunabu janchaxunikabun besti pitibiaken jawen Dios kenwanti misi Davidin bixun pitan jawen jaibuaibudi pimadianiki.⁵Ja inun, Diosbe nukunabu janchaxunikabu juindukunti tibi Dios kenwanti Templo anu dayakubainkin kaneabumakidi Diosun Moisés kenetimani ¿man shinanmamen?⁶⁻⁸Jamen en kushipawen Templo en binuaiwen taexun juindukuntitian jaska jau akubainunbun jawen yunuti inun jawen

nemati en jatu yunudiatiduki. En matun Juchi Kayabi lyua jaska kushipa en jayaki. Diosun jancha yuixunika Oseas Diosun yuimakin: "Yuda betsabuwen nuikanwen, ea kenwankin chaxuwani kuakin menuai bestiwenmadan", aka jatu kenexunika. Matun juinti medan na jancha shinankin na junibun kaneabuma unankin man jawa yuiama ikeanxuki– jatu abainiki.

Juindukuntitian juni meyushki Jesúsun kayawanikiaki, na janchadan
(*Mr 3.1-6; Lc 6.6-11*)

⁹ Jabias juindukunti sábadotian jabia baiwen kai mae betsa anu jikitan jatun ichati jiwe medan jikixun Jesúsun jatu yusianyan ¹⁰jabianudi juni meken meyushki jatube icha tsauken jawen yusian danankin fariseobun Jesús yuanun, iwanan, yukakin:

–Juindukuntitianan, Moisin nuku kenexuni chibankinan, ¹¹juni isin teneai xuxawatimen?– akaubu

¹¹ Jesúsun jatu kemakin:

–Matunan, juindukuntitianbiaken matun chaxuwani unpax biti kini medan kauani pukua jawaida kain nexekin man dayadiamiski. ¹²Juindukuntitian matun inawen nuikin man medabewabiamiskin Diosun matu binumakin yudabuwen nuijaidakin jabatiandi jatu medabewamiski. Jaskaken juindukuntitian tsuanda xuxawai dayabiakin kaneamaki– iwanan,

¹³juni meken meyushki yuikin:

–Min meken meshanwen– aka meshanyan jawen meken betsa keskai ma mepekei peaya ¹⁴jaska waxu fariseobun uin jaki sinatai kainbaini jaska waxun Jesús tenantimen ika yuinamei yubakai taenibukiaki.

Diosun jancha yuixunikan jakidi keneni xabakabi Jesúsun jatu yusinikiaki, na janchadan

¹⁵Januxun jatun shinan unantan Jesús kainkainaya yudan kaianen

chibainbun isin teneaibu ichapa Jesúsun jatu xuxawakin ¹⁶mae betsa betsapa anu jau tsuki chaniyamanunbun jatu nemakubainiki. ¹⁷Jabiaskadi bebunkidi Jesúskidi jawen jancha yuixunika Isaías Diosun yuikin:

¹⁸ ‘En tsuma en katunidan, en bechipaiai ea benimawamiski. En Yushin Pepa en yunua medabewaya pepakidi en tsumapan yudabu xukuabu tibi yuibaunxanikiki. ¹⁹Jancha kushipawen juni betsa ja akama mae tibi anuxun jawen jui kunyan ikai ninkabuma ixankanikiki. ²⁰Chakabu maemakin binudiamma yudabuwen nuikin tawa yushtu senkeama keska wakin juinti babubu dananma ixanikiki, bin pajii ibubis nukabiai nukama keskadan. ²¹Januxun chakabu binuaya nawa xukua betsa betsapabun ikunwankin en tsuma manaxankanikiki’, aka ninkatankeneniki. Jaska jakidi keneni menekin Jesúsun yusinkin jatu xuxawakubainiki.

Jesúsdan, yushin chakabun kushipa jayaki, anibukiaki, na janchadan
(*Mr 3.20-30; Lc 11.14-23; 12.10*)

²² Jabianuxundi yushin chakabun juni bexux wakin juyu wani Jesús anu iweabu jawen yushin chakabu nichinkin Jesúsun xuxawa januxun uin pewai janchaya ²³yudan kaianen uin:

–Jabaa! Yuu! Davidin baba mekenika Diosun nukun xenipabu yubani jabiamenkain. Jamadaka– ikeakeaibun

²⁴jakia fariseobun jatun jancha ninkakin yuikin:

–Jaskamaki. Na junidan, yushin chakabu xanen ibu Beelzebún kushipa jayaki. Jaska bestiwen taexun yushin chakabu jatu kainmaikiki– jatu waibun

²⁵jatun shinanan kaneaibu unankin Jesúsun jatu yuikin:

—Mae betsa anu jatunmebi paxkatan detenamei jatunmebi debui keyumisbuki. Ja inun, yudabu xuku betsa paxkatan jatunmebi debui yamai keyudiatidubuki. ²⁶Jabiaskadi wakin Satanásan jawenabu junibu anua kainma jatun yuda punu nukai babui keyukeanaii. ²⁷Jamen, eanan, Beelzebún kushipawen en yushin chakabu kainmaya ḷtsuan kushipawen matun tsumabun yushin chakabu kainmamisbumen? ²⁸Jamen chanima Diosun kushipawen ean en yushin chakabu kainmamiswen taea Dios xanen ibui matu anu ma juaki. ²⁹Jaska man kanejaidai matu yuinun ninkakanwen. Tsuanda juni kushipatun jiwe anu jikitan yumetsunun, iwanan, jawen tae inun jawen meken dukun neatan jawen mabu yumetsutidubuki.

³⁰Jaskaken tsuabunda ea jaibuwama ea nemamisbuki. Ja inun, tsuabunda yuda betsabu ea chibanmama jau ea ikunwanyamanunbun jatu nemamisbuki, jamakidi shinanmakinan. ³¹Jaskaken matu yusinun ninkakanwen. Yudabun chakabu betsa betsapawakin chakabudi yuimisbu Diosun jatun chakabu buaxunkin jakimawatiduki. Jakia matu keskatun tsuabunda jawen Yushin Pepa danankin yuankubainaibudan, jatu buaxuntaskama ixanikiki. ³²Jamen tsuabunda en matun Juchi Kayabi Iyu ea yuanbiaibun Diosun jatun chakabu buaxuntiduki. Jakia tsuabunda Diosun Yushin Pepa yuainbu jatun chakabu Diosun buama shinanunbadikiki, natian inun badi jawen jeneatianan– iwanan,

**Ji tibi jawen bimiwen unantikidi Jesúsun
jatu yusinikiaki, na janchadan**
(Lc 6.43-45)

³³—Ji pepa bimiai jawen bimi chakabuismaki. Jamen ji chakabu

bimiai jawen bimi pepaismadiki. Jaskawen taexun jawen bimi tibiwen ji man unanmiski. Eanan, en pe yusinkubainmiswen taexun Satanásan kushipa en jayamaki. Jakia Diosun kushipa en jaya en pepaki. ³⁴Jakia matudan, man padanan dunubaibuki. Matun juinti chakabuken jaska shinankin kainmai janchakin jawada pepa yuama chakabu besti man yuikubainmiski. ³⁵Jamen tsuabuda duapa juinti pepaya jawa chakabu yuama jancha pepawens janchamisbuki. Ja inun, yudabu jawen juinti medan shinan chakabu jaya janchakin chakabus yuikin kainmamisbuki. ³⁶Matu yuinun ninkakanwen. Janu unanti waxanaitian: “Jancha jadi yuitimawen min yuipaunidan, jaskakenan ea yui pewawe”, akin yudabu bestibu tibi Diosun jatu yukaxanikiki– iwanan, ³⁷fariseobu ana yuikin: —Jamen matun jancha tibi shinankin Diosun matu unanti waxanikiki, “Min pemenkain, min chakabumenkain”, akin Diosun unantant matu kupixanikiki– jatu waya

**Dami betsa atimaska nuku
taxnimaxunwen, akin yukanibukiaki, na
janchadan**

(Mr 8.12; 3.31-35; Lc 11.29-32, 24-26; 8.19-21)

³⁸jatu jaska wai ninkatan januxun fariseobu inun Diosun jancha kenenibu yusinanannmisbun Jesúsun yuikin:

—Yusinaan, nun uinun naiudia jaska tsuan dami atimaska kainmaisma nuku axunwen– akabu

³⁹Jesúsun jatu kemakin:

—Nukunabu na jabiatian jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamashina ana kainma jiwenidan, jaska keska besti Diosun matu uinmakin matu axundiaxanikiki.

Shinankanwen. ⁴⁰Nínive anu kaxun jau jatu yusintanun Jonás yunua ninkama jadi kama mae betsa anu paxai kai ianenwan medan pukuabu jasapanan bakawan ewapatun xeashina xaba dabe inun besti meshu jabiatidi kaya mashin mapeketan bakawan janan Jonás besteniki. Eadan, matun Juchi Kayabi Iyua jabiaskadiai mawa mai anu daka xaba dabe inun besti meshu jabiatidi ka en ana bestendiaxanaii. ⁴¹Jaska inun, Nínive maewan anu jiweabu Jonásin Dioskidi jatu yusian ninkakin jatun shinan betsa wanibuki. Jaskawen taexun janu kupiaitian Nínive anu jiwenibun matu ja axankanikiki. Ja inun, en Jonás binujaidabiaken tsuan man ea ninkakin matun shinan betsa wakatsi ikamaki. ⁴²Jaska inun, betsadan, nawa ainbu xanen ibu surkidi chajaida Sabá maiwan anu jiwea nukun xenipabu Salomónen jancha unanepa ninkatanun ika juniki. Salomón en binujaidabiaken man ea ninkakatsi ikabumawen taexun janu matu kupiaitian ja nawa ainbu xanen ibun matu ja achakayamaxanikiki-iwanan,

Yushin chakabu kainkaina chintunmiskidi
Jesúsun jatu yusinikiaki, na janchadan
(Lc 11.24-26)

⁴³jatukidi Jesúsun miyui betsawen ana jatu yuikin:

–Juni betsa anua yushin chakabu kainma kai juindukunkatsi iki janu unpax jayama anu kakunkaunkin jani juindukunti pepa bechima shinankin: ⁴⁴“En janu jiwea en kainkidanshina anu en ana chintunkainaii”, ikaini kaxun ja yuda medan jiwe xaka matsua keska jawa jayama bechitan ⁴⁵kaxun ana 7 yushin betsa chakabujaida jatube dasikidan, ja dukuntun ja yuda ichakawakin midinwaima ana binumakin pikujaidamisbuki. Jaska

keskadiai natian na yudabu jatun shinan pewabumawen taea jiwe chakakubainaibu chipu Diosun jatu kupijaidaxanikiki– akin

Jawen ewa inun jawen betsabukidi
Jesúsun jatu yusinikiaki, na janchadan

⁴⁶Jesúsun jatu yusin menediamma janchaya janua jawen ewa inun jawen betsabu bea Jesúski jaska kematima jemaintin mapuxun juni betsan jau yuixuntanun jawen ewan yunua ⁴⁷kaxun Jesús yuikin:

–Min ewa inun min betsabununu jemaintinxun mibe janchanun ixun mia kenakanikiaki– aka

⁴⁸Jesúsun kemakin jatun yui ka yuikin:

–¿Tsuamen, en ewa inun en betsabudan?– iwanan,

⁴⁹nun jawen tsumabu nuku metukin yuikin:

–Na jabiabuki, en ewa inun en betsabudan. ⁵⁰Ja inun, Diosun jancha tsuabunda ninkatan ikunwankin axunmisbuden, jabiabu en betsabu inun en puibu inun en ewabudiki– jatu waniki.

Jexe bai anu banamisbukidi miyuiwen
Jesúsun jatu yusinikiaki, na janchadan
(Mr 4.1-9; Lc 8.4-8)

13 ¹Jabias xabatian Jesús jiwetanua kainkaini ianenwan kexa anu ka tsauken ²yuda ichapabu Jesús anu bebidan bebidani jaki ichabu jatu yusinun ika xaxun ina tsauxun ian kexa mapustunun mapuabu ³jancha junea betsa betsapawen yusinkin jatu yuikin:

–Juni betsa jawen bai anu xekiwan jexe sa aki kaxun ⁴sa akubaina jexe betsa janu kati bai namaki nidi aka peiyabu bexun keyu xeabun ⁵jexe betsa mishki ewapabu mania anu mai eskadabes bemanchimea anu kauanadan,

jawaida pexei benekaunaya ⁶badi jui kukin jawen tapun bemakis bewexekeua kua utsi xanamiski. ⁷Ja inun, jexe betsa muxa jukundiamanu nidi aka xekiwan beneai muxa jukunkin yabua jaskatan bimitidumaki. ⁸Jakia jexe betsa mai pepa anu nidi aka benei bimi ichapajaida jayamiski, betsa 100 jexeyaidan, betsadi 60 jexeyaidan, betsa 30 jexeyaidan– iwanan ⁹–Man pabinkiyabunan, ninkatan jakimayamaxankanwen– jatu wa

¶Jaskakin miyuiwens min jatu yusiain? iwanan, Jesús yukanibukiaki, na janchadan
(Mr 4.10-12; Lc 8.9-10)

¹⁰janua nun jawen tsumabu besti Jesúski xukutan jaska miyuiwen jatu yusiain nun yuka ¹¹nuku yuikin:
–Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaiki. Jakia jabudan, en jatu jaska unanmamaki. ¹²Jakia tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda eskadabes ninkabiakin ea chibainsbuma ja eskadabes en jatu mebinxanaii, jakimawakinan– iwanan ¹³–Na yudabun uinbiai uianbumaki. Ninkabiai ninkabumaki, jabu jawaumawen taexun miyui junea bestiwen en jatuki chanikunkainaii– itan ¹⁴⁻¹⁵–Jaskai buaibuwen taexun bebunkidi jawen jancha yuixunika Isaías jatukidi Diosun yuimakin:

‘Jabun jancha ichapa ninkabiakubainmisbu jawa unanma ixankanikiki.

Ichapa uinbiakubainmisbu jawa uinsma keska ixankanikiki.

Jau uinnyamanun bun jatun bedu bekua keskabuki.

Jau ninkayamanun bun jatun pabinki pabepukua keskabuki.

Na yudabu buxka kushibun jawa tapinkatsis ikabumaki.

Jau en jatu medabewakin xuxawapanan ea danain ea anu bekatsis ikabumaki’,

aka ninkatan nuku kenexuniki. Jabias jatukidi keneni keskai na yudabun uianma inun ninka pewabumadiki– iwanan

¹⁶⁻¹⁷–Na jaska yuinidan, man matun akaii, matun beduwen uinkin inun matun pabinkiwen ninkai natian man benimaidan. Chanima nukun xenipabu Diosun jancha yuixunikabu inun yudabu pepabun ea uinpaibiakin ea uianma inibuki. Ja inun, na man ea uiainan, ea uinkatsi ibiakin ea uianma inibuki. Ja inun, jabias man ninkaidan, ea ninkapaibiakin ea ninkamadi inibuki– akin

Jexe miyuikidi xabakabi Jesúsun jatu unanmaniaki, na janchadan
(Mr 4.13-20; Lc 8.11-15)

¹⁸–Jaskawen taexun jexe sa aka miyuiwen en jatu yusinxudan, matu xabakabi yuinun ninkaidakanwen.

¹⁹–Jexekidi yuiadian, Dios xanen ibuaikidi yusinti janchaki. Ja jexe janu kati bai anu nidi akadan, yudabun Dioskidi jancha ninkakin shinanbiaibus jamakidia Satanás juxun jawen jancha pepa jatun juinti anua mebinmiski.

²⁰Ja inun, jexe betsa mishki ewapabu mania anu mai eskadabes bemanchimea anu nidi akadan, tsuanda Diosun jancha ninkakin taewai benimabiaya

²¹shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki.

²²Jamapai jawen jiweawens kemui

jeneama jawens besti nuichakayamakin
Diosun jancha ninkabiakin ana
tapinkatsi ikama mabuwens besti kemui
pepaisbumaki, jaskatun yabua jancha
pepa chibana yudabu miban bimiuma
keskabuidan.²³ Jakia jexe betsa mai
pepa anu banadan, Diosun jancha ninkai
pepakunkainkin yuda betsabu yusinkin
jatu ikunwanmamisbudan, ja mai pepa
anu jexe bana benei ewai bimiyatan
100 jexeyai inun, 60 jexeyai inun, 30
jexeyamis keskabuki– nuku aniki.

Miban pepa chakabube jusiakidi miyuiwen
Jesúsun jatu yusinikiaki, na janchadan

²⁴Januxun ana betsatian miyui
betsawen yudan kaian Jesúsun yusinkin:
-Dios xanen ibui jaskamiskidi ana
betsa matu yusinun ninkakanwen. Juni
betsa jawen bai anu kaxun xekiwan jexe
pepa banabaini kaken ²⁵dasibi uxabun
janua jaki sinatamis juxun jexe chakabu
jabe jusikin sa abainken ²⁶janua xekiwan
jukunshina ma bimi taeai uinkin miban
chakabu jabe benediai jusia bechitan
²⁷janua jawen tsumabu bai anu buxun
ja miban uinbain bai ibu yuikin: “Min
bai anu xekiwan pepa min banatanima
anudan, Ɂaskai miban chakabudi jusia
umeimenkain?” akabu ²⁸bai ibuan
jatu yuikin: “Eki sinatamistun ea
ichakawakin atanimaki”, jatu wa, jawen
tsumabun yuikin: “Ja miban chakabudan,
Ɂau yumeyamanun betse betse atanpa?”
akabu ²⁹jatu nemakin: “Jamaki. Ja
miban chakabu jusia betsekin xekiwandi
man betseditidubuki. ³⁰Jau jabiaska
jabe yumeyunun meyamayukanwen.
Ja dabe jusia ewai janu jushiaintian
tsiekakin en jatu yunua ja miban chakabu
dukun mextexun neatan manchianbu
en kuaxanai. Januxun en xekiwan
bimi pepa mextekin ichawadiatan en
dayadubun ea aduxunxankanikiki”, jatu
waniki- iwanan.

Jexe pxeishtakidi inun misi
xaxawamiskidi Jesúsun jatu yusinikiaki,
na janchadan
(*Mr 4.30-34; Lc 13.18-21*)

³¹⁻³²ana miyui betsawen jatu yusinkin:
-Dios xanen ibui jaskamiskidi miyui
etsa ninkakanwen. Junin jawen
pai anu mostaza jexe jawen miban
ibi banaima anua jatube ja mostaza
jexe pexeishtajaidabia ewakin miban
etsa binumai punyan ewapabushina
awen mebiki peiyabu tsaua jaki
uindukunmisbuki. Dios xanen ibuidan
aska keskaki- itan

³³ ana miyui betsawen jatu yusinkin:
-Misi wakatsi ainbun xekiwan
ludu midima kencha ewapa
uchinin kesunxun jawen xaxawati
eskadabes unpaxki nemustan jawen
xaxawati xekiwan dudu kapan dasibi
puspukidankin xaxawamiski. Dios xanen
buidan, jaska keskadiki. Ja dukun
uni betsan Diosun jancha ikunwain
pepakunkainkin jawenabu yusian
keakeaya unanxubida midimabun
kunwantidubuki- jatu aniki.

34-35 Ja xanen ibutan jaska
janchanunbadiaikidi jawen jancha
yuixunika Diosun yuikin:

‘Mai jidabi en damiwani anua
jawada ean junenixun en jatu
unanmaisma miyui betsa
betsapawen yusinkin en jatu
kainmaxunxanaii’,

aka ninkatan nuku kenexuniki. Jabias
Diosun yuini keska wakin miyui betsa
betsapawen Jesúsun yudabu yusinkin
jawa miyuimawen yuiama miyui
bestiwen jatu yusin chanikunkainiki.

**Miban chakabu jusiakidi Jesúsun jatu
xabakabi yusinikiaki, na janchadan**

³⁶ Januxun Jesúsun yudan kaian yusinkin menetan jatu jenebaini jiwe

betsan jikiaya janua nun jawen tsumabu jaki ichaxun yuakin:

—Miban chakabu jusiakidi min jatu yusinxudan, xabakabi nuku yuiwe— nun wa

³⁷Jesúsun nuku yuikin:

—Ja miban pepa sa akadan, en matun Juchi Kayabi Iyuaki. ³⁸Baidan, mai jidabiki. Jexe pepadan, jabun Diosun jancha ninkakin pewamisbudan, jabu enabuki. Jakia jexe chakabudan, jabun en jancha ninkama Satanásan jancha besti chibannmisbudan, jawenabuki. ³⁹Ja inun, ja jaki sinatakin jexe chakabu sa axunmisdan, Satanáski. Ja inun, janu tsekatitian ixanaidan, ma mai jidabi keyuikiki. Ja jaskaitian mai anua jau yudabu bimi tseka keska wanunbun en nai tsumabu en jatu yunuxanaii.

⁴⁰⁻⁴¹Jamen ja miban chakabu mextekin ichawadan, mai jidabi anuxun yudabun chakabuwakubainmisbu inun yuda betsabun jawa unanma jabun yusinkin jatu dasibi ichakawamisbudan, ea en matun Juchi Kayabi Iyuatun en nai tsumabu en jatu yunua jabun ja yuda chakabu ichawaxun ⁴²chi nukaisma anu jatu udean janu jiwei peama kaxai xeta yenx yenx akubainxankanikiki.

⁴³Jakia jabun Diosun jancha pepa ninkakubainmisbudan, en jatu katua janu en Epan jiwe anu nukube jiwei badi keskai chaxai ikibi ixankanikiki. Man pabinkiyabunan, ninkatan jakimayamakanwen— iwanan,

Jaskai Dios xanen ibumiskidi miyuiwen jawen tsumabudi Jesúsun jatu yusinikiaki, na janchadan

⁴⁴ana miyui betsawen nuku yuikin:

—Tsuanda juni betsan bai anu pei midima adukin maiwani june benamabia juni betsan pukinxun bechitan ibu wakatsi ikin jawaida ana jabianudi achimatan benimajaidakin

pei june bikatsis ikin jawen mabu dasibi peiwen taexun jatu inan keyutan june yumetsukatsi ikama jawaida bai ibu anu kaxun jawen peiwen bai ibu watan ja pei maiwanibu bitiduki. Dios xanen ibuidan, pei midima adunibu junea keskaki.

⁴⁵⁻⁴⁶Jamen Dios xanen ibui jaskamiskidi betsadan, ninkakanwen. Mabu inanananikan perla chudi mane jawenduabu benabaunkin atimas ja mane jawendua jawa chakabuma bestichai kadujaida bechitan jawen kemukin bikatsis ikin jawen mabu dasibi jatu inan keyutan ja pei bixunwen taexun ja perla jawendua jawenas wakin biniki. Dios min xanen ibu waidan, jawada mabu min jayadan, ana jawen nuiama jenetan ja mabu betsabun ixun ja besti min jawen nuiai keskaki— iwanan, ⁴⁷ana nuku yuikin:

—Dios xanen ibui jaskamiskidi ana betsadan, ninkakanwen. Juni betsabun ianenwan anu jisin ewapa puntebaunxun baka betsabu betsapa jikia ⁴⁸jisin mataken ninibidan mashi anu mapematan janu tsauxun katukin baka ewapa piti pepabus kukiki nanekin jawen chudi chakabu putamisbuki. ⁴⁹Janu badi jawen jeneaitianan, jabiaskadi wakin Diosun nai tsumabu bexun yuda pepabube yuda chakabu jusia unantan jatu katukin paxkatan ⁵⁰chakabubu janu chi nukaisma anu jatu putaxankanikiki, janua jiwei peama jaska nun tenetiduma tenei kaxai jau xeta yenx yenx inunbunan.

⁵¹Na eska miyuiwen en matu yusianan, *čman ninkai?*— nuku wa

—Jaa, nun ninkai— nun akeakea

⁵²ana nuku yuikin:

—Jawen jiwe anuxun juni betsan jawen mabu betsabu tibi adutan mekeaa unainkiki, mabu bina inun xenidan. Jaska tibi adumiswen taexun jawada mabu pepa bina inun xeni ja dabe kainmamis keska

wakin Dios xanen ibuaikidi en yusian
bena inun yusian xeni katukubainkin
eadi chibankin ea ikunwandiatan Diosun
jancha kenenibu yusinanannmisbun jatu
pe yusindiatidubuki– nuku watan

Nazaret anu Jesús kanikiaki, na janchadan
(Mr 6.1-6; Lc 4.16-30)

⁵³miyuiwen nuku yusin keyutan
janua kainkaini ⁵⁴Jesús janua yumeni
anu kai nun jabe jikishinken ma jatu
yusin beyamis jatun ichati jiwe anuxun
Jesúsun jatu yusindianun ika jikixun jatu
yusin taewaya jatu yusian ninkai jaska
yusinanainsbumawen e itan yuinamei:

–Na junidan, ⁵⁵janixun jaska tsuan jawen
kushipa tapinmashinamen, ja atimaska nun
atiduma aki unanepajaidaidan? ⁵⁵Nadan,
⁵⁶ji mabu wanikatun bakemamen? Jawen
ewadan, Maríaki. Jawen betsabudan,
Santiago inun, José inun, Simón inun,
Judaski. ⁵⁶Jawen puibudan, nenu nukube
jiwediabuki. Jaskatan ⁵⁷janixun ja mesti
jaska jawaida tapin keyushinamen?–
itan ⁵⁷jawen jancha bechipaiama
ikunwanbumaken Jesúsun jatu yuikin:

–Diosun jancha yuixunika juxun
yudabu jatu yusianyan betsa betsapabun
ninkakin duawaibun jakia jawen mae
anu kaxun jawenabudi jatu yusindia
jabun jawen jancha danainbun
jabatiandi jawen jiwe anuabun
danandiamisbuki– jatu watan

⁵⁸januxun jawen yusian bechipaiama
jawa ikunwankatsi ikabuma danainbun
jawen unanmati dami atimaska ichapa
Jesúsun jatu axunkin uinmama iniki.

**Nashimanika Juan textenibukiaki, na
janchadan**
(Mr 6.14-29; Lc 9.7-9)

14 ¹Janua Jesúskidi yuia akeakeaibu
Galilea anuxun xanen ibu
Herodesin ninkatan ²jawen tsumabu
yuikin:

–Jaskakenan, Nashimanika Juan mawa
ana bestenshinxun jawen kushipa jatu
uinmakin atimaska dami jawa nun
atiduma jatu uinmaikiki– jatu wanikiaki.

³⁻⁴Janua badi betsation Jesúskidi
Herodesin ninkadiamaken Nashimanika
Juan mawani matu yuinun ninkakanwen.
Herodesin jawen betsabu Filipon ain
Herodías mebinmaken Juanen Herodes
ja akin yuikin:

–¿Jaskakin min betsan ain mebintan
min ainwainmamen? Jaskatimajaidaki.
Ainwanyamawe– akubainaya jawen ainin
janchawen taexun xanen ibu Herodesin
jawen soldadobu Juan achimaxun mane
dispiwen jatu menexmatan bichiti jiwe
medan jatu bichimaima janu Juan jiweken

⁵januxun Herodesin Juan tenankatsis
ibiai: “Nashimanika Juanan, Diosun
jancha yuixunikakl”, iwanan, yuia
akeakeaibu datekunkainaya ⁶janua
jawen badi janu kaini taxniaya jabube
xanen ibubu betsa pimakatsi jatu ia
ichabu bebun anua Herodíasin bake
chipash nawaxunkin xanen ibu Herodes
inun jatube icha benimawaya ⁷jaskai
uinkin xanen ibun jawen aniya yuikin:

–Min ea jaskaxunayadan, chanima
jawada min ea yuka en mia inanxanaii–
akaya ⁸janua chipash kainkaini kaxun
jawen ewa Herodías yukakin:

–Ewaan, ⁹jawa yukaxanpa?– aka jawen
ewan yuikin:

–Na jabatiyan Nashimanika Juanen
buxka yukatanwen– aka kaxun xanen
ibu Herodes yuikin:

–Nashimanika Juanen buxka ea
inanwen, sapa kenchakidan– aka

⁹jawen juinti metexekei punu nukatan
Nashimanika Juan tenankatsi ikamabia
ja jatu pimaibu bebunxun jawen aniya
ma yubai ninkakanxunwen taexun jawen
yuba binumakatsi ikama ¹⁰jakimamadi
ja soldado bichiabu jatun jatu tenanmis
xanen ibun yunukin:

–Juanen buxka textexun ea bexuntanwen– aka ¹¹soldado kaxun bichiti jiwe medanua Juan textetan jawen buxka sapa kenchaki nanebidan bexun ja chipash inan ja chipashan jawen ewa inanikiaki.

¹²Janua Juan ma tenanbu jawen tsumabun ninkatan bexun jawen yuda yuka itan bibain maiwatan jaska wabaini buxun chipu Jesúski chaninibuki.

Jesúsun 5,000 junibu pimanikiaki, na janchadan

(*Mr 6.30-44; Lc 9.10-17; Jn 6.1-14*)

¹³Januxun Juan jaska washinabu Jesúis banabimabu ninkatan nun jawen tsumabu nuku yuikin:

–Janu tsua jiweabuma anu benanta juindukuin buyunankanwen– nuku wa janua Jesúis nukubes xaxuwen kai janu tsua jiweabuma anu Jesúis kai yudabu tsuan jatu yuiambia ninkabaini chibain jatun mae anua main buaibun Jesúis jikidiama jabu dukun jikia maniabun ¹⁴Jesúis keti itan butukainkin yudan kaian uin jatuwen nuijaidakin jatunabu isin teneaibu janu iyuabu jatu xuxawaxunpakeaya ¹⁵janua ma badi kai meshukidanaya nun jawen tsumabu Jesúis anu buxun yuikin:

–Ma badi kaikiki. Nenu tsua jiweabumaki. Na yudan kaianen jania pitidubumaki. Ja mae udama tibi anua jau misi bitan pitan jaskadabaintanunbun jatu nichindiwe– nun wa

¹⁶Jesúsun nuku kemakin:

–Jatu nichianma matun jatu pimakanwen– nuku waya

¹⁷nun jawen tsumabun yuikin:

–Misi meken besti inun baka dabe besti nun jayaki. Jati nun jatu pima damaki– nun wa

¹⁸nuku yunukin:

–Jabiaska ea bexunkanwen– nuku watan

¹⁹januxun yudan kaian yunukin:

–Ja basiki xukua akeakea tsaukanwen– jatu wa manibaunaibun Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwantan misi inun baka tunke tunke apakekin nuku inankin yunua ja yudan kaian inanbaunkin nun jatu keyua ²⁰⁻²¹dasibibun yani wai benimai pepeaibun janua ja misi meken besti inun baka dabe jatu paxkaxuna 5,000 junibun pikanxu jawa jatun ain inun jatun bakebu tanama ja piti texe wakanxu ichawakin 12 kuki nun jawen tsumabun matawanibuki.

Jesús ianenwan bemaki bepai kainikiaki, na janchadan

(*Mr 6.45-56; Jn 6.16-21*)

²²⁻²³Janua bebunkidi nukun dukun ianenwan nun pukei kanun nun jawen tsumabu xaxuwen nuku yunua nun kaya yudan kaiandi jatu nichinbaini mati anu ka Diosbe janchai meshu medan Jesúis ja mesti niken ²⁴ianenwan namakis ma bui nun nunuabun niwewan besukidia bekin ian buspu tsaubidankin xaxu tsakama tsakama akaya unanxubida nun kaya ²⁵ma pena kemaya Jesúis nukuki nukuyui ian bepaikidanaya ²⁶jaskakidanai uin e itan datei jancha kushipawen yuikin:

–Yushinki!– nun ikaibun

²⁷Jesúsun nuku yuikin:

–En eaki. Ewen dateyamakanwen– nuku waya

²⁸Pedron yuikin:

–Yusinaan, min miamentain, en miki nukui kanun: “Ian bemaki juwe”, ea wawe– aka

²⁹Jesúsun yuikin:

–Jani nedí juwe– aka

Pedro xaxu anua butukaini ianenwan bemaki kai Jesúski kemayupanan ³⁰ja niwewanen ianenwan bechuduainki mesei datei jikikainkin jawaida yuikin:

-Yusinaan, ea nexewe- aka

³¹jawaida Jesúsun metsunxun nexeñan yuikin:

-¿Jaskai min dateai? En mia ian bepaimatidu ikunwanbiai ¿min jadakidi shinan buxkenxumen?- atan

³²Pedrobe xaxun inaya niwegian ian bechudunwain maianyan ³³janua ja xaxun nun tsauabu Jesús naman danti itan kenwakin yuikin:

-Chania min Diosun bakeki- nun ikaini

³⁴ianenwan pukei nun besusi kapaya niwen jamakidi nuku bukin xutua mae betsa Genesaret anu keti itan ³⁵nun butubainaibun yudan kaianen Jesús unantan jatuki chanibaunaibun mae kesua anua kushibidankin jatunabu isin teneaibu iwekin janu Jesús anu jatu iweabu ³⁶jau Jesúsun tadi metsanun, iwanan, Jesús jatu ea axuanbu jawen tadi kexa ja isin teneaibun metsatan dasibi main kaya akeakenibukiaki.

Jawada atimapu nun shinamistun nuku chakabuwamiskiaki, na janchadan
(Mr 7.1-23)

15 ¹Janua betsatián Jerusalénkidia bai beshianbu fariseobu inun Diosun jancha kenenibu yusinanamis betsabu Jesúski nukuxun uinkin yukakin:

²-Nukun xenipabun beya chibankin pidiamu nun mepanui taemiski.
¿Jaskakin min tsumabun nukun xenipabun beya chibankin mepanuama pikani menkain?- akabu

³Jaska waibu Jesúsun jatudi yukakin:

-Matunan, matun beya chibankin Diosun yuuni betsa watan ¿jaskakin man ana chibankin?

⁴Jaska Diosun yuini matu yuikin shinamunun ninkakanwen. “Matun epa inun matun ewa medabewakin jatu duawakubainxankanwen. Jakia matun

ibubu man jatu ichakawaya jau matu tenanxanunbunwen”, akin yunubianiken ⁵jakia matundi juni betsa yusinchakakin: “Matun ibubu jawadawen medabewati mabu man jaya man jaki tanabia Templo anu inankuinkatsi man butidu man shinantiduki. Tsuan matu ana bikawatidubumaki”, iwanan, jatu yusinmisxun ⁶ana jatu yusinkin jau jatun ibubu ana jatu duawakin medabewayamanunbun pepaibu jaska nemakin man jatu bextekubainmiski. Jaska wakin Diosun yuuni danankin matun beya betsa betsapa besti man chibankubainaii- iwanan ⁷-Bebunkidi Isaías man bepadamenikabukidi Diosun yuimakin:

⁸ ‘Na yudabunan, jatun janchawen ea kenwanbiakin

jatun juintiwen ea shinainsbumaki.

⁹ Ja inun, ichatan jawa ea kenwakin pewaisbumaki.

Jakia junibun yunuawen besti jatu yusinkubainmisbuki’,

aka jawen jancha yuixunika Isaásin ninkakan nuku kenexuniki- jatu atan

¹⁰januxun Jesúsun yudan kaiandi kenakin jatu ichawaxun yusinkin:

-Na jaskaibukidi matu yusinun ninkakan tapinkanwen. ¹¹Jawada yudabun piabu jawa jatu chakabuwamiski. Jakia yudabun juinti medanua jawada jancha chakabu shinain anua taxnikin jatun jatu chakabuwamiski, Dios sinatamakinan- jatu waya

¹²janua nun jawen tsumabun shinabidan Jesús dapi nitan nemakin:

-Ja fariseobu min jatu yusinun ninkakan mia ninkama miki sinataibudan, ¿min uianmamen?- nun wa

¹³Jesúsun nukudi yuikin:

-Tsuabunda ea inun en Epa ikunwanma nukun jancha danainbu en Epandi jatu

danandiaxanikiki, miban tsuan banama jamebi jukuinma tachayabis betsea keska wakinan.¹⁴ Jau shinan inunbunwen. Juni bekunman juni betsabebekun iyupai jadakidi iyuai unanma jabia dabe mikin maebain di idabemisbuki. Ja bepadameaibu jaska keskabuki, jabun tsua medabewatidumadan. Jaskaken jawa jatu yuiyamakanwen– nuku wa

¹⁵ Pedron Jesús yuikin:

–Na min pitikidi jatu yusinxudan, xabakabi nuku yuiwe– aka

¹⁶ Jesúsun nuku yuikin:

–Matundi, ḷman ninkakin pewadiabumamen? ¹⁷Xabakabi matu yusinun ninkakanwen. Jawada yudabun piabu jatun shinanki naneama jawa jatun shinan chakabuwatidumaki. Jakia jawada piabu jatun jatuki nanea puiabu kainmiski. ¹⁸Jakia jatun shinan medanua jawada chakabu jaya jawen chakabumisbuki. ¹⁹Janua eska yudabu jaya jatun shinan uke medan aduabu chakabu shinankin xabakabi taxnimamisbuki, eska tibi shinan medanua xabakabi kainkinan, juni betsaki yubakatan tenankinan, juni betsan ain chutankinan, xebi jayabu chutabaunkinan, yumetsuidan, chani chakaidan, yuda betsabeja akinan. ²⁰Jaska tibi yudabun shinan anua taxnikin jatu chakabuwamiski, Dios sinatamatikanan Jakia fariseobun beya chibannma mepanuama pikin Dios sinatamatidubumaki– nuku aniki.

**Sirofenicianawa ainbun ikunwainwen taexun Jesúsun medabewanikiaki, na janchadan
(Mr 7.24-30)**

²¹Janua Jesús kainkaini mae dabe Tiro inun Sidón dapi kaken ²²janua judiobuma Cananawa ainbu betsabe Jesús bechitan chibain kakin unanxubima juu akin kenakin:

–Yusinaan, min Davidin babaki. Ewen dabanan ikin en ainbu bake yushin chakabun ea bika tenemainkikiki. Ea kainmaxunyuwe– akubidanaya ²³Jesúsun ninkabai jawa yuiama kai tini tini ikainaya januxun nun jawen tsumabun yunukin:

–Juu ikin nuku mese wabidanikiki. Nichinwen, jau kanunan– akin nun yuikubaina

²⁴atimas Jesús niti itan ainbu yuikin:

–Israelbu chaxawan benuabu keska besti en jatu yusinkubainun Diosun ea yununiki. En mia medabewatidumakiabia ninkama

²⁵rukidan ja beぶun danti itan yuikin:

–Xanen ibuun, ea jaska wama ea medabewawe– aka

²⁶Jesúsun yuikin:

– Israelbun piti bianxun kaman anu putatimaki– akaya

²⁷ainbun jantsidi ana yuikin:

–Jeen. Jabiaskaki. Xanen Ibuun, en kaman keskaki. Israelbun tapukixun piabu jawen pese kamanen mitumisbuki. Jaska keskadi wakin en bake medanua yushin chakabu ea kainmaxunyuwe– aka

²⁸ninkatan Jesúsun yuikin:

–En jaska yuiai ikunwankin min pe yuiaii. Jaskaken min bake anua yushin chakabu ma kainkainxuki. Uinditanwen– akaya

jabatiandi jawen bake medanua yushin chakabu kainkainaya kayanikiaki.

**Isin betsabejapabu Jesúsun
jatu xuxawanikiaki, na janchadan**

²⁹Jaska wabidani janua iaketankidani Jesús kainkidani Galilea ianenwan ketanbidankin binubaini mati anu mapekeka tsauken ³⁰janu tsaua shinanbidani yudan kaianen jawenabu isin teneaibu jau Jesúsun jatu xuxawaxunun tidibun inun, bekunbu inun, chantui tsedesnibu inun, juyubu inun, isin betsabejapabu teneaibu iwexun ja dapi

jatu janabu xuxawai³¹ uinkin ja juyunibu janchaibu uinkin chantui tsedesnibu ni peaibu uinkin bekunibun uiainbu uin jabaia iakekin Israelbun mekenika Dios kenwankin taewakubainaibun

Jesúsun 4,000 junibu pimanikiaki, na janchadan
(Mr 8.1-10)

³²jabianuxun nun jawen tsumabu Jesúsun kenaxun nuku yuikin:

—Ma xaba dabe inun besti ea ninkakin jabun piti ma keyuabuwen taea en jatuwen nuaiaii. Jatun jiwe anu piti mais en jatu nichian bui bai puchinin punu nukai babui unanyamastidubuki— nuku waya

³³—Janu tsua jiweabumanua jania piti bixun jati junibu nun jatu pimatidumaki— nun wa

³⁴Jesúsun nuku yukakin:

—¿Jati misi man jayamen?— nuku wa

—Siete misi inun baka pishta eskadabes nun jayaki— nun wa

³⁵januxun Jesúsun ja yudan kaian yunukin:

—Ja main tsaubaunkanwen— jatu watan³⁶ ja siete misi inun bakadi bixun Dios kenwantan misi tunkeapekin bakadi tekepakekin nun jawen tsumabu nuku inanpakea ja yudan kaian nun inan akeakebauna³⁷⁻³⁸ januxun dasibibun yaniwai benimai pepeaibun 4,000 junibu besti tanakin jatun ainbauiba inun jatun bakebu nun tanama januxun ja pikantu jatun texe ichawakin siete kuki nun matawaya³⁹ Jesúsun jatu yunukin:

—Ma en kai inun budikanwen— jatu wabaini janua nun jawen tsumabubes xaxun inatan kai Magadán mai pakea anu nun kaniki.

Jawada tsuan atiduma fariseobu inun saduceobun Jesús yukanibukiaki, na janchadan
(Mr 8.11-13; Lc 12.54-56)

16 ¹Ana betsati fariseobu inun saduceobu bexun Jesús unanti wanun, ikin padankin yukakin:

—Dios anua jawen unanti dami nuku axunwen, min jawen kushipa jaya nun uinunan— akabu² jatun shinanan kaneaibu unankin Jesúsun jatu yuikin:

—Ma badi jikiaya matun yuikin: “Ikis nai tashipaki. Meshukidi penai badi pejaidaxanikiki”, man imiski.³ Janua penayadi yuikin: “Ikis nai tashipa ma nai kuin meshu meshuikiki. Natian ui bekatsis ikikiki”, ikin jaska ui inun niwe bemis unanbiakin janu jawen chakabu kupititian ma kemai en matu yusin chakayamabiakubaina ɿjawen unanmati man uintidumamen?⁴ Nukunabu na jabiatián jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeambashiñxun ana jiwemakin kainmanidan, jaska keska besti Diosun matu uinmakin matu axundiaxanikiki. Shinankanwen— jatu watan jenebaini

Fariseobu inun saduceobun yusian mesekeidi Jesúsun jatu yusinikiaki, na janchadan
(Mr 8.14-21)

⁵ianenwan kexa betsaudi jabe kakin nun jawen tsumabu jabe kakin misi buama nun jakimakainaya⁶ Jesúsun nuku yuikin:

—Shinaindakanwen. Fariseobu inun saduceobun misi xaxawati mesekei. Uindaxankanwen— nuku wa

⁷shinan pewama nun jawen tsumabu yuinamei:

—Nun misi beama ixuken nuku jaska yuikiki— nun ikaya

⁸Jesúsun nukun shinan unankin yuikin:

—¿Jaskai: “Nun misi beama ixuken nuku jaska yuikiki”, man ikai? Man ea uinbiakin man ea ikunwan chakaii.

⁹Jawada en matu yusian ninkakin ɿman tapindiamamen? Ja 5 misi tunkepakexun

5,000 junibu en jatu pimashina inun jawen texe ichawakin jati kuki man matawashina, ćman shinanmamen?
¹⁰Ja inun, 7 misi tunkepaketxun 4,000 junibu en jatu pimadiashina inun jawen texe ichawakin jati kuki man matawashina, ćman shinanmadimen? ćMan daka shinain? ¹¹Jaskai fariseobu inun saduceobun misi xaxawatikidi janchai ćjaskai jatun misi kayabikidi en janchamabiaken man shinan chakai?– nuku wa

¹²januxun fariseobu inun saduceobun misi xaxawatikidi yuikin jabun yusinkin kanemisbukidi nuku nemaxu atimas tapintan nun shinankubainiki.

Min nukun Mesías Cristoki, akin Pedron yuiniaki, na janchadan
(Mr 8.27-9.1; Lc 9.18-27)

¹³Janua Jesús nun jawen tsumabube kai ja mae pakea Cesarea Filipo anu jikitan nuku yukakin:

–Yudabunan, en matun Juchi Kayabi Iyuadan, ćen tsua ea yuimisbumen?– nuku wa

¹⁴–Betsabun yuikinan: “Nashimanika Juan ana bestenshinaki”, mia wakanikiaki. Betsabundi yuikin: “Elías ana besteinmaki”, mia wadiakanikiaki. Betsabundi yuikin: “Diosun jancha yuixunika Jeremías kasmai jawen jancha yuixunika betsa daka”, akin mikidi yuimisbukiaki– nun wa

¹⁵–Jamen matun shinankinan, ćman tsua ea wamismen?– nuku wa

¹⁶Simón Pedron kemakin:

–Miadan, Epa Dios jiweatun bake min nukun mekenika Mesías Cristoki– aka

¹⁷Jesúsun yuikin:

–Simón Jonásin bakeen, en jaken juni betsan mia yuiamabia en Epa nai anuatuun mia unanmakin mia duawaikiki. Benimadiwe. ¹⁸Ean mia kenakinan, mia Pedro wakin mishki kushipa keska en

mia waii. Min jaska janchakin yuixuwen taexun yudabu minwendi ichapa en jatu ikunwanmaxanaii. Yuda mema mawatidubiaken Satanásan datemakin ea ikunwainbu maematidumaki, jatu nemakinan. ¹⁹Jaska inun, ikunwainbu min jatu mekekubainxanun naiudia kushipa en mia yunuxanaii. Nenuxun yusinkin min jawada nemaya Epa Diosundi nemaxanikiki. Jawada nenuxun min nemamaken Epa Diosundi nemama ixanikiki– atan,

²⁰Jesúsun nuku nemakin:

–En Mesías Cristoki tsua banabimayamayuxankanwen– itan,

Mawaxanaikidi Jesúsun jatu banabimanikiaki, na janchadan
(Mr 8.31-9.1; Lc 9.22-27)

²¹Janua Jerusalén anu ka jaska waxanaibu nuku yusinkin taewakin:

–Eki sinatakin ea ichakawakin judio xanen ibubu inun, Diosbe nukunabu janchaxunikabu inun, Diosun jancha kenenibu yusinanamisbun ea danankin ichakawakin ea jatu tenanmabu xaba dabe inun bestitian en ana bestenxanaii– akin ²²nuku xabakabi yuiaya Pedron ja mesti paxkabain nemakin yuikin:

–Xanen Ibuun, jaskamaki. Diosun mia jaska yunuama iniki. Jau tsuan mia tenanyamaxanunbunwen– akaya

²³Jesús jawen tsumabukidi nasauketan uinkin Pedro nemakin yuikin:

–Satanásan shinanwen min ea teawakatsis ikai ana jadi jaskayamawe. Jawada Diosun uiain keska min uianmaki, eska shinankinan, jaska yudabun uinmis keskawen min ea nemaidan– abain

²⁴Janua Jesúsun nun jawen tsumabu nuku yuikin:

–Tsuada eki chiti ikatsis ikidan, jaska jamebi shinanmis jakimatan: “En jabe mawatiduki”, ikin jau ea

chibankubainunbunwen.²⁵ Ja inun, tsuanda jatun jiwea ibubis mekekatsi ikamadan, jau benununbunwen. Jatun jiwea ewen benuashinabudan, ea anua ana jiwekuian bixankanikiki.²⁶ Jamen tsuanda mabu midimawen kemu bestikin ichawaxun ea ikunwankin chibanma jatunmebi jatun jiwekuian benuxankanikiki, eauma mawaidan. Ja inun, jatun jiwea pakatan tsuan ana bitidumajaidaki.²⁷ Jamen en matun Juchi Kayabi Iyuadian, en Epan kushipaya Xanen Ibui jawen nai tsumabube ana juxun tsuabunda ea chibain jiwei pemisbu inun chakabumisbu jabu tibi en jatu manakuxanaii, pepa inun chakabuwenan– iwanan²⁸–Chanima en matu yuiai ninkakanwen. Na jibia man ebe mapuabudan, man betsa betsapa mawadiamaken en matun Juchi Kayabi Iyua en matu Xanen Ibui taexunai man uinxanaii– nuku aniki.

**Jesús jawen yuda damitan
chaxajaidanikiaki, na janchadan**
(Mr 9.2-13; Lc 9.28-36)

17 ¹Janua 6 día binuaya Pedro inun Santiago inun Santiagon betsa Juan Jesúsn jatun dapaxkabainkin iyui kai mati keyatapajaida jatube mapeketan² janua Jesús dami jawen besu dami badi keskai chaxai jawen tadi juxupajaidai xaba keskai juxu punte punte ikaya³ Moisés inun Elías Jesúsbē janchai uiainbun⁴ jawa unanma Pedron Jesús yuikin:

–Yusinaan, nun nenu juadan, pejaidaki. ¿Pean xubu dabe inun besti matu waxunpa, betsa mina inun, betsa Moisésna inun, betsadi Elíasinadan?–⁵ akaya januxun nai kuin juxu mayabidankin jatuhachiaya nai kuin anuxun jui taxnikin jatuhu yuikin:

–Na en bake en Katunidan, en bechipajaidaii. Jawen en benimajaidaii. Ninkaidakubainkanwen– jatuhu wa

⁶jawen tsumabun ninkai datejaidai main beua maniabun⁷ Jesús jatuhu dapi juxun jatuhu mekin yuikin:

–Ana dateama benidikanwen– jatuhu wa⁸ benitan bedu bedu ikin uin janu tsua niama Jesús besti nia uiainbun⁹ janua mati keyatapa anua butebidankin Jesúsn jatuhu nemakin yuikin:

–En matun Juchi Kayabi Iyua mawa en ana matu bestenxundiamaken na eska man uinxudan, tsua yuiyamayuxankanwen– jatuhu waya

¹⁰ana Jesús yukakin:

–Diosun jancha kenenibu yusinanamisbun yusinkin: “Nukun mekenan Cristo judiama bebunkidi Elías ana juxanikiki”, ikidan, ejaskai imisbumen?– akabu

¹¹jatuhu kemakin:

–Chanima Elías bebunkidi ana juxun dasibi benawakin pewakin taewaimaki.¹² Janunkain chanima en matu yuiai.

Elías ma ja dukun juyama unanma danankin jawen jawada wakatsis ikin Elías akimabuki. Jabiaskadi wakin en matun Juchi Kayabi Iyua jabun eadi danankin ichakawakin ea achitan jatuhu ea nuitapawamadiaxankanikiki– jatuhu wa

¹³janua Elíaskidi Jesúsn jatuhu yuiaja jakia Nashimanika Juankidi junea janchawen jatuhu yuia jawen tsuma dabe inun bestitun atimas shinanbidanibukiaki.

**Jesúsun yushin chakabu juni bake anua
kainmanikiaki, na janchadan**
(Mr 9.14-32; Lc 9.37-45)

¹⁴Janua Pedro inun, Santiago inun, Juan Jesúsbe jui janu yudan kaianki nukutushiaya jabianudi juni betsa jukidan Jesús bebun danti ixun yuikin:

¹⁵⁻¹⁶–Xanen ibuun, en juni bake yushinin duxku imakin nuitapawakin chi anu napukin jenen pukumisken min

tsumabu anu en iwebia jaska waxun tsuan ea kainmaxuntidumaki. En bakewen nuikin ea xuxawaxunwen– aka

¹⁷Jesúsun mapuabu jatu yuikin:

–Ikunwainsbuma inun chakabubuun, ċjatiki matu medabewai ana en matube jiweyuxanai? Nedi iwekanwen, ja bakedan– aka

¹⁸iwea Jesúsun yushin chakabu kainma kaya jakimamadi jawen bake kayai xuxaya

¹⁹chipu januxun nun jawen tsumabun Jesús paxkabain yukakin:

–¿Jaskakin ja yushin chakabu nukun nun kainmatiduma ixumen?– nun wa

²⁰⁻²¹Jesúsun nuku yuikin:

–Ea ikun kayabijaidawadiama man atiduma ixuki. Chanima jancha en matu yuiia ninkakanwen. Mostaza jawen jexe pexeishtabia banabu ewai ji ewapamiski. Jabiaskadi wakin ea ikun pishtawabiakin en kushipa shinankin na mati yuikin: “Nuela maei betsa anu katanwen”, man wa matu ninkatan ja mati maetiduki. Jamen ea ikun kayabi wakin dasibi man jaska atidubuki– nuku watan

²²janua dasibi nun jawen tsumabu jabe kai Galilea anu nun jabe kakunkaunaya Jesúsun nuku yuikin:

–Ea en matun Juchi Kayabi Iyuadan, tsuanda ea jatu achima ²³ea tenanbu xaba dabe inun bestitian en ana bestenxanaii– nuku wa jaska chaniai ninkatan nun nuijaidaniki.

Templo jawen pewati pei pakatikidi Jesúsun yusiniaki, na janchadan

²⁴Ana kai jawen mae Cafarnaúm anu nun jawen tsumabu Jesúsun nuku iyuken Templo pei bixunikabun Jesús bechibaini kaxun Pedro yukakin:

–Matun yusinanan, ċjawen Templo mekekin pewati pei badi betsa tibi pakakubainmismen?– akabu

²⁵Pedron jatu yuikin:

–Jaa. Pakamiski– jatu watan kai jiwtan jikiaya Pedron shinan unankin Jesúsun ja dukuntun jancha wakin:

–¿Jawen gobieno medabewati pei ichawakin xanen ibu kushipabun tsuabu dukun yukamisbumen, jawenabumenkain, nawabudaka? ¿Jaskada min shinain, Simóon?– aka

²⁶Pedron yuikin:

–Nawabu jatu amamisbuki– akaya januxun Jesúsun yuikin:

–Chanima xanen ibun jatun yunuaitun pakaisbumaki. Jabiaskadi wakin nun Diosunabun nun pakatidumabiaken

²⁷nukuki jau sinatayamanunbung xeamatiwen ianenwan anu xeamakin baka ja dukun min bia jabexutan pei jexe bestichai bechitan bixun Templo jawen pewati pei mina inun ena daken buxun jawen jatu pakatanwen– aka kaxun jaska Jesúsun yunua ninkabain bitanxun Pedron jatu pakanikiaki.

¿Tsua Jesúsbe ja kachu nun xanen ibuxanai? ikin shinanibukiaki, na janchadan

(Mr 9.33-37, 42-48; Lc 9.46-48; 17.1-2)

18 ¹Jabias xabatiandi nun jawen tsumabu Jesúski ichaxun yukakin:

–Mibe xanen ibukin jadatutun nun jatu binuxanimenkain, nuku yuiwe– nun wa

²januxun nuku yusinun, iwanan, bakeishta kena juai namakis nichinxun ³nuku yuikin:

–Chanima en matu yuiiai. Bake mishtinbun jawa dateama ea ikunwain chintunkatsi ikama ea chibankubaintidubuki. Tsuabuda jaska keskadiakin jawa keanma ea ikunwankin chibanmadan, nai anu man ebe jiwei xanen ibutidumajaidaki. ⁴Jakia tsuada juni ewabia na bakeishta keskai ibubis keanma jatu medabewa bestikubainmisbu ebe xanen ibukin betsabu man binuxanaii. ⁵Ja

inun, ea duawanun, iwanan, na bakeishta keska wakin tsuada en kenaya juai ea ikin akawakin man duawatiduki– iwanan,

Yuda betsan jawada jatu chakabuwamai mesekiaki, na janchadan
(*Mr 9.42-48; Lc 17.1-2*)

⁶ana nuku yuikin:

–Tsuabunda jawada Diosun nemamis inun yunumis chibanna chakabu wamisbun bake mishtinbun ea ikunwain jatu padankin chakabu jatu ama akeakediamisbudan, jaskawen taexun Diosun jatu kupijaidaxanaiwen taea jawen xekikan deneti mishki ewapa nexaxun teumatan ianenwan medan pukua jasadon, jawen kupiti bexmas mekeanai. ⁷Ja inun, jamapai betsa betsapawen kemukin yudabun chakabuwamisbuki. Jakia tsuabunda enabun Diosun yunumis inun nemamis shinanbiaibun juinti babubu padankin jatu chakabu ama akeakemisbu jabudi Diosun jatu kupia nuitapajaidaxankanikiki.

⁸Jaskaken matun meken kasmai matun taewen jawada man chakabuwakubainai matun meken kasmai matun tae mextea keska watan jawaida jenekubainkanwen. Man meken dabeya inun man tae dabeyaken janu chi nukaisma anu matu udean pemajaidaki. Jakia meken bestichaiya inun tae bestichaiya Diosbe jiwei kai peki. ⁹Ja inun, matun bedu betsawen jawada uinkin man chakabuwakubainai bedu betsa tseka keskatan jawada man chakabuwai jawaida jenekubainkanwen. Man bedu dabeyaken janu chi nukaisma anu matu udean pemajaidaki. Jakia bedu bestichaiya Diosbe jiwei kai peki– iwanan,

Chaxuwan benua benamisbu keska miyuiwen Jesùsun jatu yusiniaki, na janchadan
(*Lc 15.3-7*)

¹⁰ana nuku yusinkin:

–Na bakeishtan ea ikunwain keskabu jawa keinsbumadan, Diosun nai tsumabun jatu mekei en Epabe beisinain jabe janchakin jatu medabewamisbuwen taexun jawa jatu ichakawakin dananyamakubainkanwen– iwanan,

¹¹⁻¹⁴–Miyuiwen matu yusinun ninkakanwen. Tsuada 100 chaxuwan jaya bestichai benua 99 besti basi mati anu mapuken jeneyubain bestichai benua man benamisbuki. ¹⁵Chanimamen? Jaskaken ja 99 benuabumawen benimabiakin atimas ja bestichai benua bechitan man jawen benimajaidamiski. Jabiaskadi wakin matun Epa nai anuutun jawa bestichai bakeishtan ea ikunwain benuktasi ikamaki– iwanan,

Ikunwain betsan mia chakabuwa jakimawatikiaki, na janchadan
(*Lc 15.3*)

¹⁵ana nuku yusinkin:

–Ea ikunwain betsan kanekin mia chakabuwa jabies janchai pekin jadakidida mia chakabuwaxu jau unanun yuiwe. Mia ninkaya min jabe jaibunamexanai.

¹⁶Jakia mia ninkamaken januxun ea ikunwain bestichai kasmai dabe jatu kenatan jadidi mia chakabuwashina jabias janchadi jatudi banabimatan jatun mia chakabuwashina anu jatu iyewe, jau jabundi mia medabewanunbunga.

¹⁷Januxun jatun janchadi ninkamaken matun ichati jiwe anu iyuxun jatudi banabimadiawe. Januxun jabun pewakin yusianbudi binu keyukin ninkamaken jaskawen taexun ikunwanbuma inun gobierno pei bixunika chakabuwen meseisma keska wakin jatu danankubainxankanwen.

¹⁸Chania en matu yuiaii. Nenuxun ikunwainbu yusinkin man jawada nemaya Epa Diosundi nemaxanikiki. Jawada nenuxun man nemaxunamaken Epa Diosundi nemama idiaxunxanikiki.

¹⁹⁻²⁰Ja inun, ikunwainbu dabe kasmai dabe inun besti ichabu en kenawen janchakin yukaibu en kushipawen en jatube nashui ika ikunkainxanaii. Jabiaskadi wakin matu dabetundi jabias shinankin jawada pepas Dios man ea aka matu axunxanikiki–nuku waya

²¹jawen jancha ninkatan Pedron Jesús yukakin:

–Yusinaan, mia ikunwain betsan ea chakabuwaya ¿yatiki jawen chakabu jakimawaxanpa? ¿Metutikidaka?– aka

²²Jesúsun nemakin:

–Jaskamaki. Metutiki bestimaki. Jakia min chakabu Diosun mia tanaismaki. Jaskawen taexun jawen chakabu tanama jakimawakunkainxanwen– iwanan,

Xanen ibujaidatun tsumapan jabe dayadu betsya ja dibiawen nuiama inikidi Jesúsun jatu yusiniaki, na janchadan

²³⁻²⁴miyuiwen jabiaskadi nuku dasibi yusinkin:

–Dios xanen ibui jaskamiskidi matu yusinun ninkakanwen. Xanen ibujaida jawen tsumabun dibiabu pewanun, ixun jawen tsuma betsabu yunukin: “Ea dibiabu ea ixuntankanwen”, jatu wa juni betsan ichapajaida dibia iwexunabu ²⁵ja jawen tsumapan dibijaida jawawen pakatidumaken ja xanen ibun jawen tsuma betsabu yunukin: “Na ea dibijaida jawawen ea pakatimaki. Jaskaken jawada ea dibia jau jawen ea pakakin keyunun jawen jawada inun, na juni inun, jawen ain inun, jawen bakebu jatuwen pei bikatsi jatu inankanwen, jau juni betsya dayaxununbunan”, akaya ²⁶ja dibia jaska wai ninkatan jawen xanen ibu naman danti ixun nemakin: “Xanen ibuun, ea jaska wama ewen nuiyuwe, chipu unanxubida en mia pakakin keyukubainxanaidan”, aka ²⁷jaska wa ninkatan janua jawen xanen ibu jawen nuikin: “Dasibi min ea dibia en jakimai ana ea pakayamaxanwen. Ana jawen

nuiama inun kadiwe”, aka ²⁸janua kain kaini kakin jawen xanen ibun tsuma betsya jaki nukutan eskadabes dibibia jawen pei binun ixun tetsunxun yuikin: “Min ea dibiadan, ikis ea pakadiwe”, axun jenea ²⁹ja naman danti ixun nemakin: “Jawaida ikis jawawen en mia pakatidumaki. Ewen nuikin manayuwe, chipu unanxubida en mia pakaxanaidán”, abia ³⁰jawa ninkama bichiti jiwe anu iyukin policiabu jatu bichimaniki, januxun ja dibia pakamaken kaintidumawakinan. ³¹Jaska wai jawen xanen ibun tsuma betsabun uin jawen nuijaidakain jatun xanen ibu anu buxun ja junin jaska waxu dasibi yuiabu ³²januxun jatun xanen ibun jawen tsumabu yunukin jatu yuikin: “En tsumapan ea dibia en jakimabiaxu ja jatun jaska waxudan, ea ixuntankanwen”, jatu wa ixuntanabu yuikin: “Min juni chakabujaidaki. Ichapajaida min ea dibiaxun ea ea akin min ea nema miwen nuikin dasibi min ea dibia en mia jakimaxunxuki. ³³Jaska shinantan en mia jakimaxu keskai miadi en tsuma betsan mia jatida dibia min jakimatishadaxuki”, atan ³⁴jawen xanen ibu jaki sinatajaidakin bichiti jiwe medan jadi jau bichitanunbun yununiki, jau jadixun ja dibijaidatun jau pakakin keyuxanunan. ³⁵Matu man jaska keskadiai ikunwain betsan mia chakabuwa jawen nuikin jau ewen nuinun, iwanan, mia yubiaken miadi jawen nuiama min jakimamaken ja xanen ibu keskai en Epa Dios nai anua matuwendi nuiama ixanikiki, matun chakabu buamadan– nuku aniki.

Junin jawen ain jenetimakidi Jesúsun jatu yusiniaki, na janchadan
(Mr 10.1-12; Lc 16.18)

19 ¹Januxun Jesúsun nuku yusin menetan Galilea anua kainkaini kai Jordán jene kexa betsaudia este badi

juaikidia Judea mai pakea jatiuma anu nun jikiaya ²Jesúski yudan kaian ichakin isin teneaibu iweaibu jatu kayawakin jatu xuxawaxunpakeaya

³januxun fariseobu jatiditun Jesús unanti watan jaki bepadamenun ika jaki kematan yukakin:

—Jawen jamapaiwen taexunan, ējuninan, jawen ain jenetimen?— akabu
⁴⁻⁵Jesúsun jatu yuikin:

—Diosun jancha Moisin nukun xenipabu yusinxun kenenidan, ēman uinsmamen? Matu yuinun ninkakanwen. Diosun damiwakin taewakanan, juni inun ainbu damiwaniki. Januxun Diosun Moisés yudabu jatu yusinmakin yuikin: “Junin ainbu ainwankatsi jawen ibubu dapaxkabaini ka ainyantan jawen ainbe ketaxameawen taea ana yuda dabema jabias yuda bestichai keska jiwedidubuki”, aniki. ⁶Jaskaken Diosun juni inun jawen ain yuda bestichai keska jatu wa junin jawen ain dapaxkabainkin jenetimajaidaki— jatu waya

⁷januxun fariseobun Jesús ana yukakin:

—Jamen Moisin nukun xenipabu yusinkinan: “⁸Jaskakin animen, tsuanda jawen ain jenekatsi ikin jabe itimaskatanan, jawen taexun ainbu jeneti kene inankin: ‘En mia ana ainwanmaki’, iwanan, kene inantan jau taxnibainxanunbunwen”, akinan, jaskakin jaska jatu axunimen?— akabu

⁸Jesúsun ana jatu yuikin:

—Matun xenipabu uinti kushiken Moisin jaska jatu yununiki. Jakia Diosun dasibi damiwakin taewatanan, jaska yunuama iniki. ⁹Chanimen matu yuiaii. Jamapai shadabu chani ninkatan sinatakin jawen ain jenetidubumaki. Jamen jenetan kainkain ainbu betsa ainwaian, ibubis chakabumisbuki. Jakia tsuanda jawen ainin juni betsa chutamabiatan yuiaama padanyanan, jawen ainan jenetiduki— jatu waya

¹⁰nun jawen tsumabun Jesús yuikin:

—Juni ainyantan jau ana jeneyamaxanunbun Diosun nemaniwen taeadan, ainbu biama chutauma unanuma jiwea pepamenkaintsa— nun wa

¹¹Jesúsun nuku yuikin:

—Chanimaki. Jakia juni dasibibu jaska jiwedidubumabiaken jabu Diosun katuxun medabewakin jaska yunumis bestibu jaskai jiwedidubuki.

¹²Juni bestibu jubuxkuma kaian ewatan chutatidubumaki. Ja inun, juni bestibu jubuxkuya kaian ewai esclavo dayaduwakin jubuxku biabu chutatidubumadiki. Jakia juni bestibu jubuxkuya kaian ewatan Diosun jancha yusin besti dayakin chutaisbumadiki. Tsuabuda jaska jiwedidubudan, jau jiwekubainunbunwen— nuku waya

Jau Diosun bake mishtinbu duawanun Jesúsun yukaxunikiaki, na janchadan
(Mr 10.13-16; Lc 18.15-17)

¹³januxun mamepipakekin jau Dios yukaxunun Jesús anu jatun bakebu jabun iweaibu nun jatu nemanun ika ikaya ¹⁴uinkin Jesúsun nuku yuikin:

—Jatun bake mishtinbu ea anu iweaibu jatu nemayamakanwen. Dios xanen ibuaitanan, na bake mishtinbu eki dateabuma keskabu besti Dioski dasixankanikiki— nuku watan

¹⁵bake mishtinbu mamepipakekin Diosun jau unanuma duawanun jatu dasibi yukaxuntan janua kainkainaya

Bedunan mabu ichapaya Jesúsbe janchanikiaki, na janchadan
(Mr 10.17-31; Lc 18.18-30)

¹⁶janua bedunan betsa mabu inun bai midimaya Jesús anu kaxun yukakin:

—Yusinaan, ēmia yukapa? Jiwea kayabi bikinan, ējawa pepa akubainkin en jiwea kayabi en bitidumen? Ea yuiwe— aka

¹⁷Jesúsun yuikin:

–¿Jaskakin pepatikidi min ea yukai? Dios besti pepaki, ¿min unanmamen? Jakia jiwei ikibi ikatsidan, Diosun yunuti inun jawen nemati chibankin jeneyamaxanwen– aka

¹⁸bedunantun Jesús yuikin:

–¿Jadatumen?– aka
–Juni betsaki sinatakin tenantimaki. Ainbu min ainma chutatimaki. Yumetsutimaki. Juni betsaki chani chakatimaki. ¹⁹Matun ibubu duawakubaintiki. Jaska inun, min jabube jiweabu duawadiakubainkanwen, ibubis nui man mekemis keskaidan– aka

²⁰bedunantun ana yuikin:

–Na dasibi min ea yuiaidan, bakeishtatun tapinixun en jeneismaki. ¿Jawa betsa Diosun yununi en adiamamen?– aka

²¹Jesúsun ana yuikin:

–Min ea pe yuiaii. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian kayabi min bixanaii– aka

²²januxun bedunan mabu ichapa jayatun Jesúsun jaska yuiai ninkai jawen mabuwen taea pes juinti nishmai keyutan ana jawa yuiama kaya

²³⁻²⁴Jesúsun nuku yuikin:

–Chanima en matu yuiaii. Ja yuinaka ewapa camellodan, ja xumux jawen chixuki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsa wama Dioski chiti itidubumaki– nuku waya

²⁵–Jabaa!– iki yuinamei:

–Jaskakenan, ¿tsuabu Diosun nuku mekekin paxawakin jiwematisumen?– nun ikaya

²⁶nukuwen nuikin Jesúsun ana yuikin:

–Dateyamakanwen. Yudabun jaska watidubumajaidabiaken Dios nukipatun dasibi matu axuntiduki– nuku waya

²⁷Pedron yuikin:

–Yusinaan, nukunan, mia chibankatsi ikinan, jawada nun jaya dasibi bashikin keyubidan nun ma mia chibankapeakaii. Nun jaskakidanimadan, ¿nun jawa jayaxanai?– aka

²⁸Jesúsun ana nuku yuikin:

–Chanima en matu yuiaii. Badi jawen jenei keyuaitian en Epan dasibi benawayá en jabe xanen ibuaya chintuanma man en 12 tsumabun ea chibankubainmisbu ebe xanen ibukin Israelin 12 bakebu xukua akeakeabu man unanti wanun badiiaii. ²⁹Jaska inun, tsuabunda ea chibankin Diosun jancha kakape yusintanun ixun dasibi jatun jiwe jenekin jatun betsabu inun jatun puibu xununbainkin jatun ibubu xununkin jatun bakebu bashikin jatun bai jenekin keyubain yusinkubainmisbuwen taexun na jabiatian Diosun ana jatu manakukin duawamissun jaska uatian jiweshinawenma Diosun pepawen jatu manakujaidakin jaska tanatidubuma jatu ichawamakubainshinxun janu ma badi keyuaitian jiwea kayabi jatu inanxanikiki.

³⁰Jaska inun, yuda ichapabu na jabiatian kenkin yunumisbudan, Diosun jatu kenwanma ixanikiki. Jakia betsabu na jabatiandi jawa kenkin yunuismudan,

Diosun jatu kenwankin xanen ibuaidawaxanikiki– iwanan,

Dayakapabu tibikidi miyuiwen Jesúsun

jatu yusiniaki, na janchadan

20 ¹ana nuku yuikin:
–Dios xanen ibui jaskamiskidi ana matu yusinun ninkakanwen. Dios xanen ibuidan, bai ibuan dayakapabu katutan jatu yunupakemis keskaki. Penai taeaya jawen bai anu jau uva tsekaxuntanunbun dayakapabu katuxun

²yuikin: “Man ea dayaxuni ka badi kai jikiaya xaba jidabi daya pei en matu inaiin”, iwanan, dayakapabu jawen bai anu jatu yunua buabun ³janua ma badi chikeyaya jawen mae namakis jemaintin anu juni betsabun jawawama uinkin ⁴jatu yunukin: “Matundi en bai anu en bimi ea tsekaxuntankanwen, badi kai jikiaya en matu paka pewaidan”, jatu wa buabun ⁵janua bai ibu ana badi manananbi taxnikaun juni betsabu jatu yunua buabun ana badi nai puchinin dakaken juni betsabudi jatu yunua buabun ⁶janua ma badi jiki kemaya ana jawen mae namakis jemaintin anu kaxun juni betsabun jawawama uinkin jatu yukakin: “¿Jawai badi chaitanai man dayama ibaiai?” jatu wa ⁷jabundi yuikin: “Tsuau nuku jawa yunuama nun ikai”, akabu bai ibuan jatu yunukin: “Matudi en bai anu kaxun en bimi ea tsekaxuntankanwen, ma badi jikiaya en matu paka pewaidan”, jatu wa buabun

⁸janua ma meshu beaya bai ibun dayaibu uinika yunukin: “Ea dayaxuntankanxu jatu kenaxun jabianus kesua pei ea jatu inan akeakeaxuntanwen. Ja dama bukanxu ja dukun jatu paka taewabainkin ja jabu dukun buabu jawen jenekin jatu pakakin keyutanwen”, aka kaxun ⁹ja dama bukanxu jabu dukun kenaxun xaba jidabi daya pei jatu inankin keyutan ¹⁰janua ja badi nai puchinin dakaken dayai buabu jatu kenaxun jabianus kesua pei jatu pakatan janua ja badi manananbi dayai buabu jatu kenaxun jabianus kesua pei jatu pakatan janua ja badi chikeyaya dayai buabu jatu kenaxun jabianus kesua pei jatu pakatan janua jabu dukun buabu bekin shinain: “Ja jatu pakai binumakin nuku inainmenkaintsa”, ibiaibun jabianus kesua pei binuama jabias jatu inandiaya ¹¹jabun pei bitan bai ibuki sinatakin

ja akin ¹²yuikin: “Badin nuku kua niskain xaba jidabi nuku besti dayai nun nuitkaapaixaiken ɿjaskakin ja dama bubiakanxu daya eskadabesbiakanxuken nuku itsawakin xaba jidabi daya pei min jatu pakaxumen?” akabu ¹³bai ibuan jatu bestichai yuikin: “Jatixun kesua ma bebunkidi en mia yuba en mia pakaxuki, mia padanmadan. ¹⁴⁻¹⁵Ana eki sinatama en mia pakaxuya kadiwe. Jakia na dama bukanxu matu itsai xaba jidabi daya pei en jatu inanxudan, jawa chakabumaki. Ja pei man jawen nuiadaan, matunamaki. Enaki. Jameen en jatu duawaya ɿmin daka en peiwen nui ikai?” aniki.

¹⁶Jaskawen taexun yudabu babuaibun shinan pepakin ea dananma en jancha chibankin taewaibu pepawen en jatu mekexanai. Jakia badi ichapa en jancha chibain ikunwanmisbu ja kachukea jabu keskadi en jatu mekekubainxanaii– nuku waniki.

Mawaxanaikidi dabe inun bestiki Jesúsun jatus yuiniikiaki, na janchadan
(*Mr 10.32-34; Lc 18.31-34*)

¹⁷Janua Jerusalén baikidi nun kaya yudan kaian nukubedi buaibun januxun Jesúsun nun jawen ¹² tsumabu besti kenaxun tadi paxkabain nuku yuikin:

¹⁸–Jerusalén anu na jabiatian nun kaidan, man unaiin. Januxun en matun Juchi Kayabi Iyua Diosbe nukunabu janchaxunika xanen ibubo inun Diosun jancha kenenibu yusinanamisbu tsuanda ea jatu achima ¹⁹jabun ea tenankatsis ikin nawas betساب ea jatu yunuabu jabun ea kaxe wakin ea kusha kusha akin cruzki mastaxun ea tenanxankanikiki. Ea tenanbu janua mawa xaba dabe inun besti kaya en ana bestenxanaii– nuku waken

Santiago inun Juanen ewan Jesús jatu yukaxuniaki, na janchadan
(*Mr 10.35-45*)

²⁰chipu Zebedeon bake Santiago inun Juan jatun ewabe kai Jesús besti niaki nukutan jatu jancha waxunun ika ja bebun danti itushiyai ²¹Jesús Yukakin:

—¿Mia jawa medabewapa?— aka jatun ewan jatu yuixunkin:

—Min nukun xanen ibauitanan, na en bake dabe jau mibe xanen ibuxanun min inaitian betsa min yusiudi inun betsa min yusmaudi ea jatu katubain tsauemaxunxanwen— akaya

²²jawen bake dabe uinkin Jesús jatu yuikin:

—Man jaska ea yukaidan, man unandiamaki. Jawada en tenexanaidan, ćman idiatidumen?— jatu wa

—Nun idiatiduki— akabu

²³Jesús ana jatu yuikin:

—Chanima ea ichakawaibu en isin tenexanai keska man idiaxanai. Jakia en yusiudi inun en yusmaudi tsautant tsua ebe xanen ibuxanaidan, ibubis en yunutidumaki. En Epa Diosun jatu katunidan, jabudan, ebe ixankaniiki, xanen ibuidan— jatu waya

²⁴janua Santiago inun Juan jaska yuka ikaibu nun jawen 10 tsuma betsabun ninkai nun jatuki sinataya ²⁵januxun nun jawen tsumabu betsabu ana nuku xuku watan yuikin:

—Jaska nawá xanen ibubun jawenabu ja akin jatu mese wabetanan kushipawen jatu yunumisbu man unaiin. ²⁶Jakia matubunan, jaska shinanyamakubainkanwen. Matu anua tsuada xanen ibukatsis ikinan, jau dasibi matu medabewakin duawakubainunbunwen. ²⁷Jabiaskadiai tsuada xanen ibukatsis ikidan, dasibun tsuma jau idiakubainunbunwen.

²⁸Jamen ea iki juidan, en matun Juchi Kayabi Iyuabiadan, jau ea duawanunbun ika en juamaki. Jakia matu debuxunkin yuda ichapabu benuabu mexpamatán matu jiwemanun ika en juniki— nuku waniki.

Juni bekun dabe Jesúsun bepexkin kayawanikiaki, na janchadan
(*Mr 10.46-52; Lc 18.35-43*)

²⁹Janua Jericó maewan anu nun jawen tsumabube Jesús jikia ibai nun jabe kainkainaya yudan kainen nuku chibainbun ³⁰janu bai kaya kexa juni bekun dabe tsauabu Jesús juai juni betsa chaniaibu ninkatan januxun jabun unanxubima yuikin:

—Davidin baba Xanen Ibuun, nukuwen nuiwe— akubainaibus

³¹ichapabun nemapaibiabu ana unanxubimajaida yuikin:

—Davidin baba Xanen Ibuun, min miamenkain, nukuwen nuiwe— akabu

³²janua Jesús niti itan juni bekun dabe kena beaibu jatu yukakin:

—¿Jawa matu medabewapa?— jatu wa ³³ja dabetun yuikin:

—Xanen Ibuun, ana nun uinun nuku bepexwe ika nun ikaii— akabu

³⁴Jesús jatuwen nuikin jatun bedu mekin jatu bepexa jawaida uinkin pewatan Jesús chibanbaini nukube bunibuki.

Jerusalén maewan anu Jesús jikiniaki, na janchadan

(*Mr 11.11; Lc 19.28-40; Jn 12.12-19*)

21 ¹Janua Jesús Jerusalén anu kai Bettagé anu kemai Olivos Mati tetanbaini Jesús niti itan jawen tsuma dabe ²jatu yunukin:

—Ja mae besuudi kayanbis buxun burro yuxan tsua jaki katsaumediama jawen bakebe nexea bechitan tepetan ja dabe beyutankanwen. ³Ja inun, tsuanda matu

yukakin: “¿Jawakatsi man tepebainai?” matu wa yuikin: “Nukun Xanen Ibu nuku yunua nun bixunyuaii, samama jabianudi nuku bemaikikidan”, jatu watankanwen– jatu wa buaibun

⁴⁻⁵januxun bebunkidi jawen jancha yuixunika Zacarías Diosun yuikin:

“Jerusalén anu jiweabu yuikin:

‘Uinkanwen. Matun Xanen Ibu pepa keinsma burro bake kamaki tsaua jikixanikiki’, jatu yuiwe”, aka ninkatan Zacaríasin yuitan keneniki. Jaska yuini menei inun ika jawen tsuma dabe Jesúsun yunua ⁶ja dabe kaxun jaska Jesúsun jatu yuia jabiaskadi wakin ⁷burro bakeya bexuanbu nukun bemakia tadi pekatan nun kabekanxuna Jesús jaki inatan katsaumekainaya ⁸janua yuda ichapabia jatiditun jatun bemakia tadi bai namaki nabekanbainun bun betsabundi xenpan mextexun jabiaskadi wabainaibun ⁹jabu bebuabu inun jachun beaibun benimachakayamabaibin jui kushipawen jawenchains yuibainkin:

—Aichu! Aichu! Diosun kushipaya juaidan, benimawakin duawanankanwen. Yavé Dios dasibi binuatun kushipaya nuku mekei juikiki, nukun xenipabu David ipauni keska jawen baba xanen ibujaida aidan. Kenwanankanwen– akubaini bui

¹⁰janu Jerusalén anu Jesús jikiaya jaskakubainaibu ninkatan uinun ika bei:

—Nadan, ¿tsuamen?– ibidan ibidanaibun

¹¹Jesúsbe bukin jatu yuikin: —Diosun jancha yuixunika Jesúski. Galilea mai pakeanua jawen mae Nazaretki– jatu akubainaibun,

Templo jemaintin Jesúsun pewakin xunpi wanikiaki, na janchadan

(Mr 11.15-19; Lc 19.45-48; Jn 2.13-22)

¹²janua Templo jemaintin kenekauanu Jesús jikikainkin jawen Dios daewati

inabu kuamisbu chaxawan inun, ina awa inun, deiwan inananainbu inun biaibu jatu nichinkin pei janua bianananmisbun tapu nadabekin deiwan inanmisbun jawen kenedi nadabediakin ¹³jatu ja akin yuikin:

—Jawen Templokidi jawen jancha yuixunika Isaías Diosun kenemani matu yuinun ninkakanwen. “En jiwedan, janua ebe janchakin ea kenwanxankanikiki”, ibianiken na jiwe jemaintin xabatudu anua man yumetsun jiwe wamisbuki– jatu wakin jatu nichinkin taxnimakin keyuaya

¹⁴janua ja Templo jemaintin anu bekunbu inun kistsedesnibu Jesús anu iweabu jatu kaya waya ¹⁵Diosbe nukunabu janchaxunika xanen ibubu inun Diosun jancha kenenibu yusinanamisbun jaska jawen unanmati damiwi uinkin inun jabianuxundi bake mishtinbun kenwakin: “Davidin baba pepajaidaki”, iki shan shanki ikaibun ninkadiai jaki sinatakin ¹⁶Jesús yukakin:

—¿Mia jaska waibudan, min ninkai?– akabu

Jesúsun jatu yuikin:

—Jaa. Jabia en ninkaii. Diosun jancha yuixunikabun jaska ekidi kenenibudan, ¿man uindiamamen? Salmoskidi matu yuinun ninkakanwen:

‘Min pepajaidawen taexun bake mishtinbu inun chchu akaibun mia kenwanxankanikiki’, aka matu kenexuniki– jatu watan

¹⁷januxun jatu jenebaini Jerusalén anua kainkaini Betania anu uxatanun ika nun kaniki.

Jesúsun ji bimiuma bechitan yupuniaki, na janchadan

(Mr 11.12-14, 20-26)

¹⁸Uxashini bestenkaini Betania anua ana Jerusalénkidi Jesús kai bunikainkin ¹⁹ji betsa higuera benanta tupan bai kexa

nia bechitan jawen bimi jayamenkain uintanun ika kaxun jawa bimi jayama jawen peis besti uinkin Jesúsun ji bimiuma yupukin yuikin:

–Jau tsuan min bimi ana piyamaxanunbun ana bimitaskayamaxanwen– akaya jaskabiam e iskaun jawen pei nidi iki xanaya²⁰ nun jawen tsumabun uin jabaa! iwanan, Jesús yukakin:
–¿Jaskai ja ji jawaida xanaimenkain?– nun wa

²¹Jesúsun nuku yuikin:
–Chanima en matu yuiaii. Man jadatutunda ea ikunwain shinan dabeyama na ji en axu keska wakin na mati yuikin: “Matipaan, mimebi tsekekain ianenwan medan pukutanwen”, man waya Diosun jaska yunuxanikiki.
²²Ja inun, Diosun kushipa unain shinan dabeyama jabe janchakin yukakubainkanwen. Man jaska wai matu medabewaxanikiki– nuku abaini

**Jesús jaskai kushipaikidi
yukanibukiaki, na janchadan**
(Mr 11.27-33; Lc 20.1-8)

²³janua Templo jemaintin anu jikixun Jesúsun yuda ichapabu kakape yuikin jatu yusianyan Diosbe nukunabu janchaxunika xanen ibubu inun xanen ibu betsabun Jesús nemanun ika bexun yukakin:

–Na min eska waidan, ¿tsuan jawen kushipa mia yunuimawen min aki ikai?
¿Tsuau jawen kushipa mia inainmamen, min jaska wanunan?– akabu

²⁴Jesúsun jatu kemakin:

–Entsedi en matu yukai matun dukun ea yui taewakanwen, man ea yuiaya jawada man ea yukai en matu yuidiai ninkakanxunan– itan²⁵–Nashimanika Juan jau jatu nashimanun yunukinan, ¿tsuan kaya yunuyama man shinain, Diosundaka, junibundaka? Ea dukun yuikanwen– jatu wa

janua jabudi june yuinamekin:
–“Diosun yunuyamaki”, nun wadan, “¿Jaskakin Juanen jancha man ikunwanma ikimamen?” iwanan, nuku kunyan atiduki.²⁶Jamen Diosun Juan yunuyama yuda midimabun ikunwainbuwen taea jabuki datekin yuikin: “Junibun yunuyamaki”, nun wapanan nun jaska yuitidumaki– iwanan,²⁷jabun Jesús yuikin:
–Nun unanmaki– akabu Jesúsun jatu yuidiakin:
–Jaskakenan tsuanda jawen kushipawen ea yunuimadan, eandi en matu yuamaki– iwanan,

**Juni bake dabeyakidi miyuiwen Jesúsun
jatu yusinikiaki, na janchadan**

²⁸jabias xanen ibubu dake wanun, iwanan, Jesúsun miyuiwen ana jatu yuikin:

–Juni betsa juni bake dabeyakidi yusintan matu yukanun ninkakanwen-ixun, jatu yuikin:

–Jawen bake betsa yunukin: “Epaan, ikis en bai anu dayakin en uva bimi ea tsekaxuntanwen”, aka²⁹jawen baken yuikin: “En dayakatsi ikamaki”, ibia janua shinan betsatan bai anu ka dayajaidaimaki.³⁰Januxun jawen bake betsa jawen epan bechitan jadi yunukin yuikin: “Miandi en bai anu dayakin en bimi ea tsekaxuntanwen”, aka jawen baken yuikin: “Peki. Ia, en kaii”, ibia kama ikimaki.³¹⁻³²Jaskakenan, ¿matu yukapa? ¿Jadatutum jawen epan yunua ninkatan axuinmamen?– jatu wa

–Ja ja dukun yunuimatum ninkakin axuntanimaki– akabu

Jesúsun jatu yuikin:

–Eskatian chanima en matu yuiaii. Nashimanika Juan taxnimaxun jaskai jiwei peti matu yusinbia jawa matun shinan betsa watan man ikunwanma ikimabuki. Jakia ja gobierno pei

bixunika chakabubu inun ainbu
jininipabun Juanen jancha ninkakin
ikunwainbu uinbiakin matun man
shinan betsa wama ikubainshinabuki.
Jabiaskadiai natian nawa pei bixunikabu
inun ainbu jininipabu Diosun jancha en
yusiaiin jabun ninkaibu Diosun jawenabu
jatu waikiki, matu binukinan– iwanan,

**Dayakapabu mekenan besumakidi Jesúsun
jatu yusinikiaki, na janchadan**
(*Mr 12.1-12; Lc 20.9-19*)

³³ana jatu yuikin:

–Miyui betsawen matu ana yusinun
ninkakanwen. Xanen ibu betsan
bai waxun uva bimi batapa banatan
mishkiwen dakenbaunkin keyutan
janua jaki uva tsiniti watan januxun
dasibi uinbaanti jiwe pishta keyatapa
watan januxun jau bimi dabukun ea
inanxanunbun, iwanan, juni betsa
dayakapabube jabube yubakatan ibu
keska wakin inanyubaini chai kaimaken
³⁴janu ma kani tsekatitian ikaya bai ibuan
jawena dabukun jau yukatan bixuntanun,
iwanan, jawen tsuma betsabu yunu
buabu ³⁵jabun jawena inankatsi ikama
uva bimi mekeabun jawen tsumabu betsa
achixun kusha kusha atan betsa debu
watan betsa mishkiwen tsaka tsaka atan
jawa inanma nichianbu ³⁶januxun bai
ibuan ana jawen tsuma betsabu yunudia
buabun jabun uva mekexunabun jawen
tsuma tibi buabu jabiaskas jatu wabu mais
bebidan bebidanaibun

³⁷januxun tsua ana yunutima jawen
bake bechipajaidabiakin atimas yunukin
shinankin: “En bake en yunu ka jaki
mesekin en bimi ea inantidubuki”,
iwanan, yunu ka ³⁸jawen bake jatuki
kemai kai bechitan yuinamei: “Bai ibu
mawashinken na jawen baken jawen
bai tibi inun jawen jiwe tibi dasibi
jawenawayuikiki. Na bai nukunas nun
wanun tenanankanwen”, ixun ³⁹juai

achixun bai kene anua kainmaxun
tenanshinabuki– iwanan,

⁴⁰Jesúsun jatu yukakin:

–¿Jawenabu jaskawanshinabunan,
ja bai ibu juxun jaskada jatu
waxanimenkain?– jatu wa

⁴¹jabundi Jesú yuikin:

–Bai ibu juxun ja dayakapabu chakabubu
jawa jatuwen nuiama jawenabubetan
jatu tenantan januxun dayakapa betsabu
yunukin jau jabun en bimi dabukun ea
inanxanunbun, iwanan, yunutiduki– akabu

⁴²Jesúsun ana jatu yuikin:

–Diosun jancha kenenibu ɿyuikin man
uinsmamen? Matu ana yusinun ninkakanwen:

‘Iwe wanikabun mishki dananbiaibun

jabias mishki Diosun bixun

dexun makedex wakin jawen kene

mestenwan keska wakin

nuku uinmakin jabaa! imakin nuku

jadakidi shinantima waxanikiki’,

axun keneniki. ⁴³Jaska kenenii keska wakin
matun xenipabu Diosun katubianixun man
jawanabubiatun shinanma man danananyan
januxun yuda betsabundi ninkakatsi
ikaibu Diosun katutan jatu jabe xanen
ibumaxanikiki. ⁴⁴Ja inun, betsadan, tsuada ja
mishkiki sinatakin ea maemanun ika mishki
mamaki kauana teke teke ika keska itiduki.
Jakia ja mishki jadatukida kauani jaki tin ikin
chushakin mishpu waxanikiki– jatu waya

⁴⁵Diosbe nukunabu janchaxunika

xanen ibubu inun fariseobun na

miyuiwen jabukidi yusiaiin ninkatan

⁴⁶Jesús achikatsis ibiai yudan kaianen:

“Jesús Diosun jancha yuixunikaki”,
ikaibuki datekin jawa achiyuabumaken

Xanen ibun jawen bake ainyanwankin

jatu pimatidukidi miyuiwen Jesúsun

jatu yusinikiaki, na janchadan

22 ¹januxun Jesúsun miyui
betsawen ana jatu yusinkin:

²–Jaskai Dios xanen ibumiskidi
ana matu yusinun ninkakanwen.

Xanen ibujaidatun jawen juni bake ainyanwankatsi jawenabu xanen ibu betsa betsapa jau jabe nawai besi benunbun, iwanan, ³jawen tsumabun jau jatu itanunbun jatu yunua buxun jatu yuibiatanabu beabumaken ⁴ana jawen tsuma betsabu yunukin: “En jatu ikatsis ikaidan, eska ea yuixuntankanwen: ‘Nukun tsumapan ina awa inun jawen yuinaka ina tibi xuandanwan detexun ma matu bawakin xui pewaxunabuki. Jaskaken jawen bakebe nawai bekanwen’, ea jatu waxuntankanwen”, jatu wa bui jatuki chanikubaunbiabu ⁵jawa bekatsi ikama betsabu yuikin: “Janu nawati ma dasibi pewabuki. Jakia en jatu chanimashina chakabui beabumaken en ana jatu ikatsi ikamaki. ⁹Jaskaken ja bai puchinin jiwekubainabu anu bui jatuki nukuxun jau nawai benunbun jatu yuidiatankanwen”, jatu wa ¹⁰bui bai tanabaini jatuki nukuaibu tibi jatu yuikubainkin chakabubu inun pepabu jatu kenatan jatube ichai jiwe teke xaka betsabu anu junin kaian texke ikabun

¹¹janua jatun xanen ibujaida juxun jikikain nawaibu uinkin juni betsabu jaya nawati tadi danankin saweama bechitan ¹²yuikin: “Baa, en tadi jaya nawati ejaskakin min saweama jikiamen?” aka dakei jawa janchamaken ¹³januxun xanen ibun ja jabun jatu piti inainbu jatu yuikin: “Na juni chakabu junexkin menextan bukin janu meshujaida medan udentankanwen, jau jadi jiwea bika tenei kaxai xeta yenx yenx axanunan”,

jatu waniki. ¹⁴Dios xanen ibuaitanian, jabiaskadi waxanikiki. Ichapabu Diosun jatu kenabiapakeaya ichapamatun ninkatan ikunwainbu ja jawenawakin jatu katumiski– jatu waya

Nawa xanen ibu pei inantikidi Jesúsun jatu yununiaki, na janchadan
(Mr 12.13-17; Lc 20.20-26)

¹⁵janua fariseobu Jesúsun jatu jaska yuia ninkatan bua: “Jawawen taexun jaska waxun Jesús padantan Romano xanen ibu anuxun nun chitetidumenkain”, ika yubakatan ¹⁶januxun jatuki chiti ika betsabu inun xanen ibu Herodeski chiti ika betsabudi jau Jesús unanti watanunbun jatu yunuabu Jesús anu buxun yuikin:

–Yusinaan, juni betsabu miki sinatabiaibun jawa jatuki dakekin jabu daewama chanima jancha besti yusinkin jaska wakin Dios chibantidubu besti min xabakabi jatu yusinkubainmis nun unaiin. ¹⁷Jaskawen taexunan, ejaskada min shinainmenkain mia yukapa? Ja Romano xanen ibu Césarn nuku pei yukamisdan, ejaska wananaxpana?

–Pakananaxpana? –Pakatimadaka?– aki
¹⁸jaki bepadameaibu Jesúsun unankin jatu yuikin:

–Bepadamenikabuun, jancha pewen man ea bepadanun ika ikanai?
¹⁹Jawen gobierno impuesto pakati pei jexe betsabu ea uinmakanwen– jatu wa jawen pakamisbu pei jexe betsabu bexun tsumaxun uinmabu ²⁰uinkin Jesúsun jatu yukakin: –Nadan, itsuan besu inun tsuan kena neamen? Ea yuikanwen– jatu wa ²¹jabun yuikin:

–Romano xanen ibu Césarnaki– akabu januxun Jesúsundi jatu yuikin:

–Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia

Diosdi duawakin jawen yusian chibankin jawada bechipaiai axundiakubainkanwen– jatu wa

²²ninkai e itan: –Nun jaska waxun padantidumaki– itan jenebaini dabekebainaibun

Mawanibu bestenxanaikidi Jesús yukanibukiaki, na janchadan
(*Mr 12.18-27; Lc 20.27-40*)

²³janua saduceobu judiobu paxka betsa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

²⁴–Yusinaan, Moisin yusinkin: “Juni betsa ainyanbia juni bakewadiama mawaken janua jawen betsan ain janubi ainwantan juni bakewaxuntiki, jawen betsya mawaimatun kena dabikin jawena waxunkinan”, nuku waniki. ²⁵Jaskakidi ja jawen 7 betsabukidi mia yuinun ninkawe. Ja dukun iyuatun ainbu betsa ainwanxun juni bakewadiama mawaken ²⁶ja kachukeatun jawen betsya jabis ainwanxun juni bake wadiamadi mawaken ana ja kachukeatun jawen betsya ain jabiadi ainwandiatan juni bake wadiamadi mawaniki. ²⁷Janua ja 7 jawen jenekin jabis ainbudi bixun jabu tibitun jawa juni bake wabuma mawai keyuabun janua jawen jenei ainbu juni bake biamas mawadianiki. ²⁸Ja jaskanibudan, mawabu ana bestearinbutian ²⁹ja ainbu bestichai ja juni 7bun ainwanibudan, jadatutun kaya ana ja ainbu bixanimenkain?– akabu

²⁹Jesúsun jatu kemakin:

–Matunan, Diosun jancha kenenibu unanma jawen kushipa man unanmadiki. Jaska wakin man kanemiski. ³⁰Xabakabi matu shinanmanun ninkakanwen. Mawanibu ana bestenxanaibutianan, jawa ana ainyain inun ana beneyai ikama ixankanikiki. Jadia Diosun nai tsumabu keska beneuma inun ainyuma

jiwexankanikiki. ³¹⁻³²Mawakubainaibu bestein ana jiwxexanaibukidi matu shinanmanun ninkakanwen. Ji maxu kua jede ji ikai anuxun Diosun Moisés jancha wakin: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, ɿman uinkin yuismamen? Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bena Diosun jatu inanxanai shinanma man kanejaidamiski– jatu wai ³³Jesús saduceobube yuinameai yudan kaianen ninkabaikin Jesús jaskakidi yukabu jatu yui pewaxukidi ninkai “Jabaal!” ikaibun

Diosun yununidan, ɿjadatu bestitun binu keyuamen? ikaikidi Jesúsun jatu yusiniaki, na janchadan
(*Mr 12.28-34*)

³⁴januxun saduceobun Jesús yukabu jatu yusinkin jatun bepadanti jancha jatu nesewawen taea jawa ana yuia ma mapuabun janua fariseobundi ninkatan jabudi icha yubakanametan ³⁵jabundi unanti wanun ika yuinamebidan Jesús anu buxun jabu betsya Diosun jancha kenenibu yusinanamis betsya unanti wanun iwanan, yukakin:

³⁶–Yusinaan, ɿjadatu yunua kushipa binua Moisin nuku kenexuniwen besti nun chibainwen taexun Diosun nuku mekekubaintidumen?– aka

³⁷Jesúsun yuikin:

–Na eska yununi betsya betsapa tibi dasibi binujaidadan, na janchaki ninkawe. “Yavé min Mekenika Dios duawakin bechipaikin min juinti jidabiwen inun, min yushin jidabiwen inun, min shinan jidabiwen chibankin duawakubainwen”, ani ³⁸chibankin na eska bestiwen min Dios benimajaida wakubaintiduki. ³⁹Ja inun, ana ja kachu yunua betsadan,

jabiaska dabeski. Ninkawe: “Min jabube jiweabu duawadiakubainkanwen, ibubis man nui mekemis keskaidan”,⁴⁰ ani ja dabe chibain man jaki chiti imiswen taea dasibi Diosun yunua Moisin keneni inun Diosun jancha yuixunikabun kenenibu jaki tsamia keskawen taea ja chibankin dasibi man shinandiatidubuki– atan

Mesías Cristodan, ɏtsuan babamen? iwanan, Jesúsun jatu yukanikiaki, na janchadan
(Mr 12.35-37; Lc 20.41-44)

⁴¹janu Templo jemaintin anu fariseobu icha budiabumaken ⁴²Jesúsun jatu yukakin:

–Nukun Mekenika Mesías Cristokididan, ɏjaskada jakidi man shinanmismen?
ɏTsuau babamen?– jatu wa

jabun yuikin:

–Davidin baba ixanikiaki– akabu

⁴³Jesúsun ana jatu yuikin:

–Diosun Yushin Pepatun David yusian ninkatan ɏjaskakin jawen Mekenika Mesías Xanen Ibu wanimen? Matu yuinun ninkakanwen. Davidin yuikin:

⁴⁴“Dios Mekenikatun en Xanen Ibu Mesías yuikin: ‘Miki sinataibu en jatu maemadiama manai en yusiudi tsauyuwe’”, aniki. Jaska watankeneniki. ⁴⁵“Mesías en xanen ibuki”, Davidin abianiken ɏjaskatan jawen xanen ibu janubi jawen baba itidumen?

Ea yuikanwen– akin jatu unantimaska wa

⁴⁶januxun tsuan jawa ana jancha betsa yuitiduamajaida dakekin jawen bepadankin yukatiwen ana jawenchains jawa yukama nesea mapuabun

Diosun jancha kenenibu yusinanamisbu inun fariseobu Jesúsun jatu chitenikiaki, na janchadan

(Mr 12.38-40; Lc 11.37-54; 20.45-47)

23 ¹januxun judio xanen ibubun ninkadiaibun Jesúsun yuda ichapabu inun jawen tsumabu ana nuku yuikin:

²–Diosun jancha kenenibu yusinanamisbu inun fariseobun Moisin jancha keneni matu yusinkin chanima jancha kaneama matu yuimisbuki.

³Jaska matu yusinmisbu jatun jancha pe chibankin jakia jatunmebi kein bepadamebisbudan, ja jatu mawayamakubainkanwen. Pe matu yuibiatan ibubis kanekubainkanikiki.

⁴Jaskawen taexun jabunan, xankamajaida matu iama keska wakin yusian tsuan chibantiduma matu yusinbiakin jabias yusian jabundi chibantidubumaki, jaska matu yusiaibun keska jiwekin matu uinmamadan. ⁵Ja inun, “Diosun jancha en chibanjaidai uinkin dasibibun jau ea kenwanunbun”, ika tadi chaipa danya panan pananyan sawetan Diosun jancha kene bichi bau pishtaki nanea bichiwen nexea betunku anu saweakin netantan punti anudi netandiatan jau ea uinunbun ika jatu kenwanmai mapumisbuki. ⁶Ja inun, pi ichaxun xanen ibu dapixun pinun, iwanan, benamisbuki. Ja inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. ⁷Ja inun, bai xexa tibi mapua mabu inananamisbu anuxun: “Yusinaan, akin jau ea duawanunbun”, ika mapumisbuki.

⁸Jakia matudan, jabu ikai keska iyamaxankanwen. Yudabu kenamakinan, jakia matun yusinanam bestichaiki. Ja ikunwain man jawen betsabu inun jawen puibu bestiki. Jaskawen taexun “Yusinaan”, akin jau matu kenayamaxanunbunwen. ⁹Ja inun, mai anu jiweabu binu keyua nai anu medabenan Yushin Epa Dios bestichai jiwea man jayawen taexun juni betsa Dios itsa wakin: “Eapaan”, akin kenayamaxakubainxankanwen. ¹⁰Ja inun, Diosun Katua Cristo ja besti matun tapinmanikaki. Jaskawen

taexun: "Tapinmanikaan", akin jau matu kenayamanun bun Dioskidi yusinkin jatu mikidi kenwanmayamaxankananwen.
¹¹⁻¹²Jakia tsuada natian keanma Diosun jatu duawakin xanen ibujaidawaxanikiki. Ja inun, tsuada natian ibubis kein xanen ibukatsis imisbu Diosun jatu dake wakin ana xanen ibu wama ixanikiki. Jaskawen taea matudan, tsuada keanma duapakin dasibi man jatu medabewakubainmiswen taeandan, man xanen ibu ixanaii– akin nuku yuitan
¹³⁻¹⁴nasaukei dabeketan betsabudi metukin yuikin:

–Diosun jancha kenenibu yusinanamisbu inun fariseobu man bepadamebuun, man peidawa! Diosun jancha jawen jiweti unanbiai ninka pewama tsuabuda Dios xanen ibuai anu jikikatsi ikaibu man jatu nemamiski. Matudi man jikitidumabia jabu betsabu jikipanabanun man jatu nemakubainaii.

¹⁵Janua matudan, Diosun jancha kenenibu yusinanamisbu inun fariseobu man bepadamebuun, main bukin ianenwan pukebaini buxun nawa betsa matu keska judio wanun ixun jatun shinan betsa wamakin jatu ikunwanmanun, iwanan, matun beya midima man jatu tapinmakin matun chakabu man jatu binumaibuwen taexun Diosun jatu kupijaidakin chi medan jatu udean jiwechakaxankanikiki.

¹⁶Janua matudan, matu bekun keskatun jatu yusinchakakin yuikin: "Chania Templo Diosun shinamis keska wakin en mia padanmaki, akin tsuada yubabiatan jawen yuba akama jawen nuiama peki", akin man jatu yusinmiski. Jakia "Jawen Templo medanua oro pei Diosun shinamis keska wakin en mia padanmaki, akin tsuada jaska yubatan jawen yuba jau anunwen. Jawen yuba jancha akamadan, chakabujaidaki", akin man

jatu yusinmiski. ¹⁷Man bekun keskabu inun man unainsmapabuki. ¹⁸Jadatu Diosun bechipaimismen? ¹⁹Peimen? ²⁰Jawen Templodaka? Matu yuinun ninkaidakanwen. Jawen Templo anuxun yudabun Dios kenwanmisbuwen taea jabun pei shinanma jawen kenwanti Templo besti shinankin Diosun bechipaimiski– iwanan ¹⁸–Jamen ana betsa jatu yusinkinan: "Chania jawen kenwanti chi tapu Diosun shinamis keska wakin chani chakakin en mia padanmaki, akin tsuada jaska yubabiatan chipu padananainan, man jawen nuiama peki", akin man jatu yuimiski. Jakia: "Jawen kenwanti chi tapu anu inan kuin betsa betsapa Diosbe nukunabu janchaxunikabun manchintan jatu kuaxunmisbudan, Diosun shinamis keska wakin chani chakakin en mia padanmaki, akin tsuada jaska yubatan jawen yuba jau anunwen. Jakia yuba jancha akamadan, chakabujaidaki", akin man jatu yusindiamiski. ¹⁹Bekun keska unainsmapabuu, ²⁰jadatu Diosun bechipaimismen? ²¹Inankuin mania bestimenkain? ²²Januxun kuakin Dios benimawamisbu tapudaka? ²⁰Matu yuinun ninkakanwen. Tsuada jawen kenwanti chi tapukidi yubakakin jawen inankuinkidi dasibi man yubakadiamisbuki. ²¹Ja inun, tsuada Templokidi yubakai Dios janu jiweakidi man yubakadiamisbuki. ²²Ja inun, tsuada naikidi yubakai janu Dios jiwea inun Diosun dasibi mekei tsaua xanen ibumiskidi man yubakadiamisbuki. Bepadamei man jaskamiswen taexun Diosun matu kupijaitian man nuitkaajadaxanaii.

²³Diosun jancha kenenibu yusinanamisbu inun fariseobu man bepadamemisbuun, man peidawa! Matun piti niswati tibi ichawaxun meken dabeti manchinwantan Diosbe

nukunabu janchaxunika manchin betsa inanbiakubainmis jaska Diosun jancha Moisin yusini man shinanma jawada jawen pepawati inun jawen nuiti inun jawen jancha betsa watima yunubianiken matubu jawen jiwekin man jatu uinmaismaki, kanekinan.

²⁴Bekun keska unainsmapakin matunabun chakabu pexepishta shiu tiubiaken uinkin man jatu yusinmiski, jatu pewanun, iwananan. Jakia matun chakabu ewapa camello tiubiaken matun chakabu jawa shinanma man jawa uin e itan jeneismaki.

²⁵⁻²⁶Diosun janchakenenibu yusinanamisbu inun fariseobu man bepadamebuun, man peidawa! Matun beya chibankin matun kencha tibi bemakis besti dachukin man napan pewamisbuki. Jakia bepadamekin yumetsui yaushikin jamapai chakabu tibi wai matun shinan man pewaisbumaki. Fariseobu bekun keskabuun, ja dukun matun shinan chakabu uke medanua pewakin taewakanwen, matun kencha tibi man bemakisa dachukin man amis keska wakanan. Jaskatan man jiwei pekunkainxanaii.

²⁷Janua matudan, Diosun jancha kenenibu yusinanamisbu inun fariseobu bepadamemisbuun, junibun pewakin janu mawabu maiwamisbu mishki tanpe jawendua wanun, iwanan, bemakis juxupawen dapuxmisbuki. Jakia uke medan xau inun nami chapui pisi maiai mania tsuan meisbuma ²⁸keskai matudi bepadamekin yudabu uinmai bemakis jawendua bestitan padananankin matun shinan chakabu man jenekin pewaisbumaki.

²⁹Janua matudan, Diosun jancha kenenibu yusinanamisbu inun fariseobu bepadamemisbuun, Diosun jancha yuixunikabu inun yuda pepa betsabu mawanibun januxun ana

jawen xau adukatsi maiwati tanpe pepa waxun jawen shinanmati jawendua wakin man dami waxun netanbaunmiski. ³⁰Ja inun, matun yuikin: “Nukun xenipabun Diosun jancha yuixunikabu tenanibu nukudi jiwxexun nukun xenipabu nun jatu medabewama ikeanaii”, man imiski. ³¹Jawa unanmabia yuikin: “En xenipabun Diosun jancha yuixunikabu tenanibuki”, man imiski, jawa dakeamadan. Jaskaken man detenan bababuki, jatu keskadan. ³²Matun xenipabun chakabuwakin taewanibuwen taexun man jabun bababun jabiaskadi wakin jatu menexunxankanwen.

³³Jamen matudan, man padanan dunu pianaan keskabuwen taexun Diosun matu kupijaidakin chi medan matu udean man jawawen taea paxatidubumaki. ³⁴Jaskawen taexun matu medabewanun ixun ea ikunwain Diosun jancha yuixunika inun unanepabu inun yusinanamis pepabu jau yusin benunbun en yunuxanaii. En jaska wabiaken matun jatu danankin betsabu tenankin bestibu cruzki jatu mastamakin betsabu matun ichati jiwe medanxun kusha kusha akin mae tibi anuxun man jatu ichakawakin bika tenemaxanaii. ³⁵Man jatu jaska waxanaibuwen taexun bebunkidi matun xenipabun Adánen bake betsabu Abel juni pepa tenanixun januxun juni pepa betsabu jatuki sinatakin tenankubidankin jawen jenekin Berequíasin bake Zacarías na jabia Templo jemaintin anu chi tapu dapikea tenanibuwen taexun matudi Diosun kupixanikiki. ³⁶Chanima en matu yuiaii. Matun xenipabun jatu tenanibu keska shinankin jabun chakabuwen taexun na jabiatian Israelbu dasibi matube

jiweabu Diosun jatudi kupixanikiki–
jatu watan

**Jerusalén anuabuwen taea Jesús punu
nukanikiaki, na janchadan**
(Lc 13.34-35)

³⁷yudabu uinbaunkin Jesúsun jatu
yuikin:

–Jerusalén anu jiweabuun, Jerusalén
anu jiweabuun, Diosun jancha
yuixunikabu inun jawen jancha jatu
bana bexunpakeiba Diosun jatu
yunubiaya jatu danankin jatu tenankin
matun xenipabun anibu keska wakin
mishkiwen man jatu tsaka tsaka
amisbuki. Takadan jawen bake nuxamis
keska wakin eandi matu medabewakin
matu mekenun ika en jubianiken jaska
shinanma ea danankin man ea jawa
ninkamaki. ³⁸Uinkanwen. Matun mae
matun mesti man mekenun Diosun
matu jenexanikiki, ana Jerusalén
mekeamadan. ³⁹Jakia janu en ana
juaitian: “Yavé Diosun kushipaya
juaidan”, ikin man yuidiamadan, man
ana ea uiyuama ixankanaii– jatu
wabaini

**Jesús ana judiamá jaska taxninunbadiai
bebunkidi Jesúsun jatu unanmanikiaki, na
janchadan**

(Mr 13.1-23; Lc 21.5-24; 17.22-24)

24 ¹janua Jesús Templo jemaintin
anua kainkainaya nun jawen
tsumabu jaki nukubainkin yuikin: “Na
Dios kenwanti Templodan, jabi jawendua
benibin!” nun ikaya ²nuku yuikin:

–Chanimaki. Na mishki jiwe ewapa
jawendua wanibu man uiainan,
jawenduabia jabianu mishki betsaa
matsama dasibi ja mishki jiwe tekekin
pudekina keyuxankanikiki– nuku wabaini

³Olivos Mati anu mapeketan Jesús tadi
ka tsauken nun jawen tsumabun june
yukakin:

–Ja mishki jiwe tekekin pudekin
keyuxanaibu min nuku yuixudan, c'mia
yukapa? c'min ma mai jidabi jawen jenei
keyuaitian min ana juaxanai kemai taeai
jaskai nun unantidumenkain? Nuku
yuiwe– nun wa

⁴⁻⁸nuku yuikin:

–En ka en ana judiamaken eskai
nuitapai taexanaibu Diosun yununi
eskaxankanikiki. Xabakabi matu
yuinun ninkakanwen. En kani ma en
janu jua kemaya juni betsaa betsapa
bexun yuikin: “En Diosun Katua
Mesías Cristoki”, iwanan, yuda
ichapabu jatu padanxankanikiki.
Jau tsuabuda jaskadiakidan matu
padanyamaxanunbun uindaxankanwen.
Ja inun, yudabu nuitapai taeaitianan,
nawabu nawa betsabube detenamei inun
tsakanamea akeakeaibu mai pacha sakua
akeakeaya bunijaidai nuitapaibun isin
betsaa betsapa tenea akeakexankanikiki.
Jakia tsakanamea akeakeaibukidi bana
ninkai datei meseyamaxankanwen, na
jaskaidan, isin betsaa beai mekin man
uinhanai keska bebunkidi xabakabi en
matu banabimaidan.

⁹Januxun man ea ikunwainbuwen
taexun matu ichakawakin matu
bestibu tibi tenankin mai jidabi
anuxun ewen taea matuki sinatakin
matu dananxankanikiki. ¹⁰Matu
jaska waibutian ichapabun ea chibain
bexteketan januxun ikunwainbu
betsabu danankin jatu achima
akeakexankanikiki. ¹¹Janu jaskaibutian
juni ichapabu bexun yuikin: “Diosun
jancha matu yusinun ea ninkakanwen”,
ikin chani chakakin yuda ichapabu
jatu padanxankanikiki. ¹²Ja inun,
ikunwainbu ichapabu nawabun jatu
ichakawachakayamaibun ikunwain
betsabu ana bechipainamei nuiama
ixankanikiki. ¹³Matu jaska wabiaibun
tsuanda ea chibankin jeneisma jatu

mekekin en jatu paxawaxanaii.¹⁴Ja inun, betsadan, nawa dasibibun jau ekidi unanunbun en ana judiamaken yudabu mania akeakeabu dasibibu tsuabunda en kakapekidi jabun jatu yusinkubaunxankanikiki. Nawa xukua tibibun jau kakape ekidi ninkanunbun jatu yusinkin menetanaibuns en ana juxanaii.

¹⁵Jaska man unanxanun ja Dios danantan chakabu kenwainbukidi Diosun jawen jancha yuixunika Daniel yuia ninkatan bebunkidi keneni matu yusinun ninkakanwen- iwanan, ea en Mateon matu kenexunai tsuanda na jancha uinkin tapinkanwen, eska Jesúsun ana yuikubainkin:

—Danielin jaska waken Templo jemaintin anu jaska Diosun danamnis ja dami itsa taxnia nia bechitan¹⁶ja Judea anuxun ikunwainbu ja mati keyatapa anu jau paxaxanunbunwen.¹⁷Ja inun, betsabu na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jiklama jau jawaida paxadijananbunwen.¹⁸Ja inun, ikunwain ja bai anu dayaibudan, meshu medan jawen dakukuti bikatsis ibiai jau ana chintunbidanama jau jabiadiadi paxadijananbunwen.¹⁹Jamen ja yumainbutianan, tuyabu inun ja chuchu amamisbudan, nuitapajaidaxankanikiki.²⁰⁻²¹Jaska inun, Diosun mai damiwani anua yumainbutian jaskaxanai anu tsuan jaska tenediamma inun ana teneama ixanai tenei dasibibu nuitapa chakayamaxankanikiki. Jaskaxanaiwen taea jau uitian inun juinduktition man paxayamaxanunbun Dios ea akin yukakubainxankanwen.²²Ja jaskaibutian Diosun jawa nemakin tsua paxawatidumabia ma jawenabu jatu katuniwen taexun jatuwen nuikin jau dasibibu debui keyuyamaxanunbun

yumainbutian Diosun badi ana chai wama chaima xekaxanikiki.

²³⁻²⁵Jabiatandi juni betsabu juxun jatu padankin yuikin: “Eadan, Diosun ea yunua en jawen jancha yuixunikaki. Ea ninkaidakanwen”, ikaibun betsabundi yuikin: “Eadan, Diosun Mesías Cristo matu anu ana en juxuki”, ikaibu betsabun ninkatan jatu yuikin: “Uian. Nuku anu Cristo ma juxukiaki”, ikaibu ninkatan ana betsabun yuikin: “Uian. Janu ma juxukiaki, Cristodan”, ikaibun januxun jabun jamapai betsabetsapa yuda betsabun atidubuma jabun akin yuda ichapa padankin Diosun jawena wakin jatu katudiani padankatsis idiaxankanikiki. Jaskaibu ninkatan ikunwankin man kaneyamaxanunbun bebunkidi xabakabi ja padanananxanaibukidi en matu besuunbi bana bimai ninkakanwen²⁶Jaskaken padanun, iwanan, matu yuikin: “Uian. Unu janu tsua jiweabumanu Cristo ma juaki”, ikaibun buyamaxankanwen. Ja inun, matu padanun, iwanan, matu yuikin: “Uian. Cristodan, nenu dintu medan juneaki”, ikaibu jawa ikunwanyamaxankanwen.²⁷Jakia en matun Juchi Kayabi Iyua en ana eskakidanxanai matu yuinun ninkakanwen. Jawaida uke bukun kana bedi iki bakamis keskatan en ana juai dasibibun ea uinxankanikiki.²⁸Janu yuda mawa daka pisi mayai xeten xetebidan janu ichai nuyabaunmis keskai ixankanikiki- iwanan,

Nukun Juchi Kayabi Iyua ana juidan, eskakidanunbadikiaki, na janchadan (Mr 13.24-37; Lc 17.26-30,34-36; 21.25-33)

²⁹januxun nuku yusinkin menediamma anu nuku yuikin:

—Yumain keyuaibu binukainaya nai anua dasibi betsabetsapaxanikiki. Badi ana pexeama nukai taeaya uxedi ana

chaxama meshuaya bishi nidi iki keyui dasibi nai takataka iki chuduanyan
³⁰nai anua jaskai yudabun uin mai jidabi anua datejaidai kaxai keyubaunaibun en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uiainbun ³¹Diosun jawen nai tsumabu yunua jawen trompetchaan akin jawen katuabu mai jidabi anu manibaunabu jatu ichawaxankanikiki.

³²Jaskaken higuera jiwen man unantidubukidi miyuwiwen ana matu yusinun ninkakanwen. Ji mebi jawen pei petakatan metubistan peiyai uinkin ma badi kemai man unanmis keskai ³³jawada en matu yuixu bechitan en samama juai man unanxanaii. ³⁴Jaska inun, yudabu dasibi jiwebaunabu yamadiabuma chanima dasibi en matu yuixu jaskai taexankanikiki. ³⁵Jakia jabiaskadai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

³⁶Janua jawatianda en ana juxanai tsuan unanmaki. Diosun nai tsumabun unanma inun ea Diosun baken en jawa unanmadiki. Jakia Epa Dios ja bestitun unainkiki.

³⁷Jaska inun, Noé jiweken chakabui jiwekubainibu keskadiaibun matun Juchi Kayabi Iyua en ana chintunkidanxanaii.

³⁸Eskanibuki. Jawen nunutiwen Noé jikidiamaken yudabun pikin mabex aki ainyankin jatun bakebu beneyawakin Dioskidi jawa shinanma jiwekubainaibu Diosun yunua Noén chibain jawenabubes jawen nunuti menetan jikiaya ³⁹jenen jatuchiaiyan Diosun yunua ninkaisbuma jatunmebi debui jasai keyunibuki.

Jabiaskadai matun Juchi Kayabi Iyua en juai yudan kaianen ea shinankin manabumaken en jatujaskadi wakin kupixanaii. ⁴⁰Ja inun, na jabiatián

bai anu juni dabe dayaibu betsan ea chibamis iyukin betsan ea chibainsma Diosun nai tsuman jenebainxanikiki.
⁴¹Ja inun, ainbu dabetan deneaibu betsan ea chibamis iyukin betsan ea chibainsma jenediabainxanikiki. Jaska wakin Diosun nai tsumabun bestibu jatu katuxankanikiki.

⁴²Jaskaken jatianda en ana juxanai man unanmabia jawa chikishama ea manakakin jeneyamaxankanwen. ⁴³Ja inun, chanima jatiada yumetsu juai bebunkidi unankin jiwe ibun bextekatsi manatiduki, jau jikiyamanunan.

⁴⁴Jaska keskadiai jatianda en matun Juchi Kayabi Iyua en ana juxanai tsuan unanmaken matun, matun jiwea pewakin keyutan ea manakubainxanwen- iwanan,

Jawen jancha jabun ninkaxanaibu inun ninkama ixanaibukidi Jesúsun jatu yusinikiaki, na janchadan
(Lc 12.41-48)

⁴⁵januxun nuku shinanmakin nun jawen tsumabu nuku ana yusinkin:

-Xanen ibu chai kakin jawen tsuma unanepa yunubainmiskidi matu yuinxun ninkakanwen. Jawen tsuma betsabu pimakin jau jawen jiwe mekexunkubainun jatun xanen ibun jawen tsuma unanepa yunubainmiski.

⁴⁶Janua xanen ibu ana chintunkidan jaska yunubainima axunkubainaya ja xanen ibu jaki nukutushitan benimajaidaxanikiki. ⁴⁷Chanima ja xanen ibu jawen tsuma dasibi jawen jamapai mekemaxanikiki, jawen jiwe inun, jawen bai betsaa betsapa inun, jawen inabu inun, jawen tsumabu betsadan. ⁴⁸Jakia jawen tsuma shinan pema ja xanen ibun yunubainima shinanchakakin yuikin: "En xanen ibu yane juamaki. Uatian jui kaimenkain", iki ⁴⁹dayanika betsabu juni inun ainbu

ichakawai inun nawachakayamai paenkin⁵⁰ jatian jawen xanen ibu juai shinankin manama xanen ibu jui jikitushitan⁵¹ manaka chakabube kupidajaidaxanikiki, bepadamemisubetan jau bika tenejaidai kaxai xeta yenx yenx anunan– iwanan,

Miyuikin 10 chipashbukidi Jesúsun jatu unanmakin yusiniaki, na janchadan

25¹januxun miyui betsawen nuku ana yusinkin yuikin:

–Dios xanen ibui jaskaxanaikidi matu ana yusinun ninkakanwen. Chipashbu meken dabetibun jatun bin dekutan jatun jaibu beneyai anu jaki jabe nukui kakatsi jawen bene juai jaki nukutan iyuxunun ika bai puchinin jaki nukui ka maniabu keskanu Dios xanen ibuxanikiki. ²⁻⁴Janua ja chipash meken besti bebunkidi unanepakin jatun bin dekua inun netsuai ana maneti bishtu betsa jayabun janua ja chipash betsa meken besti unanepama jatun bin dekua besti netsua jawa ana maneti jayabumaken⁵ janua ja juni jatuki nukuti washina binuaya manachakayamashinaibun ja chipash meken dabeti uxabun⁶ atimas juni ja manaibu yamenapun juai tsuanda ninkatan jatu bestenwankin unanxubima yuikin: “Jawen bene man manaidan, ma juikiki. Iyuxunditankanwen”, jatu wa⁷ dasibi bestenbaun jatun bin ma nuka kemai bin jene manenun, iwanan,⁸ ja chipash meken besti unainsmapabun ja bebunkidi unanepabu jatu ea akin yuikin: “Jau nukun bin nukayamadianun matun bin jene nuku tusaxunyukanwen”, jatu wabu⁹ jakia ja chipash unanepabun jatu yuikin: “Jaskamaki. Matuna nun matu manexunken nukunadi netsui nukatiduki. Jaskakenan, buxun janua bin jene inanmisbu anua bitankanwen, matuna ibubisdan”, jatu wabu¹⁰ ja

unaismapabun bin jene bi jamakidi buabun jatumaki jatun jaibun bene juai ja chipash unanepabun itani jua jabe nawai jikiabun januxun beputi ma bepuabun¹¹ janua ja kachu ja chipash unanepama bexun jatu kenakin yuikin: “Xanen ibuuun, nun mibe jikiai nuku bepenxunwen”, akabu¹² jatu yuikin: “Jaskamaki. Man ea manakakin pewama ixuki. Man tsuabumenkain, en matu unanmaki”, jatu waxanikiki– nuku watan,

¹³–Na miyuidan, ɿjaska man ninkaxumen? En matun Juchi Kayabi Iyua jatianda en ana juxanai tsuan man unanmawen taea tsuada ebe jiwekatsi iki unanepai jawa chikishama pepakunkaini Diosbe janchakin ea manakin uindakubainxankanwen– nuku watan

**Jawen tsuma pepabu inun
chikishbukidi miyuiwen Jesúsun
jatu yusiniaki, na janchadan**

¹⁴januxun miyui betsawen Jesúsun nuku ana yusinkin:

–Dios xanen ibui jaskaxanaikidi betsa matu ana yuinun ninkakanwen. Dios xanen ibuidan, juni chai ka keska ixanikiki. Juni betsa mai pakea betsa anu katanun, iwanan, jawen tsumabu kenaxun jau jawen taea dayanunbung jawen pei tanaxun paxkatan jatu inanyukin¹⁵ jawen tsuma unanepa betsa jawen pei ja dukun inankin pei jexe ichapa 5,000 inantan ja kachu unanepa bexmas pei jexe ichapadi 2,000 inandiatan janua jawen tsuma betsa unanepa midin 1,000 inandiatan chai kashinken¹⁶ ja unanepa 5,000 inanbainshina jawa chikishama dayai inananankin ana 5,000 jawen xanen ibu bixunkubainkin ichawaxunaya¹⁷ ja unanepa bexmas 2,000 inanbainshinadi jabiaskadi dayaxunkin ana 2,000 jawen xanen ibu bixunkubainkin ichawaxunaya

¹⁸jakia ja 1,000 besti inanbainshinadi chikishi jawa dayaxunkatsi ikama june mai pukinxun janu jawen xanen ibun pei adukin bepukin pewaxunshinken

¹⁹janua jatun xanen ibu badi ichapa jiwtani juxun jawen tsumabu jawen pei inanbaini: "En pei ea jaskawanyamabumenkain uinun", iwanan, jatubetan pewakatsi jatu kena ²⁰ja 5,000 inanbainyama ja dukun juxun pei ichawaxunkubainshina bexun inankin yuikin: "Xanen ibuun, 5,000 min ea inanbainyamadan, inananankin ana 5,000 en mia bixunkubainshinadan, naki", akin 10,000 inanyan ²¹jawen xanen ibun yuikin: "Min en tsuma pejaida kaneismaki. Eskadabes en mia yunubiabaini inananankin jawa benuama min pe mekekin kaneama ishianwen taexun ana daya ichapa en mia yunuxanaii. Jaskawen taea natian ebe benimachakayamadi", akin ²²janua ja 2,000 inanbainyamadi ja kachu jikixun pei ichawaxunkubainshina bexun jantsidi inandiakin yuikin: "Xanen ibuun, 2,000 min ea inanbainyamadan, inananankin ana 2,000 en mia bixunkubainshinadan, naki", akin 4,000 inanyan ²³jawen xanen ibun jadi yuikin: "Min en tsuma pejaida kaneismadiki. Eskadabes en mia yunubiabainyama inananankin jawa kaneama min pe mekekubainshinawen taexun ana daya ichapa en mia yunuxanaii. Jaskawen taea natian ebe benimachakayamadi", akin ²⁴⁻²⁵janua ja 1,000 inanbainyama jadi jawen jenei jikixun jawen xanen ibu yuikin: "Xanen ibuun, naki, min peidan. Miwen datekin min pei benukatsi ikama bibaini kaxun mai pukinxun en mia aduxunyamaki. Dayakin jawa miban banamabia min ichawamiski. Janua jexe sa akamabia min ichawadiamiski. Min juni meseken miwen datekin min pei en

mia aduxunyamaki", akaya ²⁶januxun xanen ibun yuikin: "Min en tsuma chakabu chikishchakamaki. Chanima dayakin jawa miban banaumabia en ichawamiski. Ja inun, jexe sa akamabia en ichawadiamiski. ²⁷Ja unantan *čjaskakin* banco anu cuenta watan inananankin en pei min ea aduxunama iyamamen, ibubis juxun en pei xekekunkainai en biyui kanunan?" atan ²⁸jawen tsuma betsabu mapuabu jatu yuikin: "Ja chikishin pei ja 1,000 mebintan ja 10,000 jaya inankanwen", iwanan, ²⁹ana jatu yuikin: "Tsuada na en tsuma pepa keskatun jawada jaya pe mekeea unantan ichapa jayawen manakukin ana ichapa en inanxanaii, binumakinan. Jakia tsuada na en tsuma chikish keskatun jawada jaya pe mekeama ja eskadabes jaya unantan en mebinxanaii. ³⁰Jaskawen taexun meshujaida anu janua bika tenei kaxai xeta yenz yenz axanaibu anu na en tsuma chakabu udentankanwen", jatu waniki- iwanan,

**Mai jidabi anu jiweabu unantiwatan
Jesúsun jatu kupixanaikidi jatu
yusiniaki, na janchadan**

³¹na miyuiwen nuku ana yusin pewakin:

-En matun Juchi Kayabi Iyua Xanen Ibu chaxajaida jui en nai tsumabube juxun yudabu jancha betsaa betsapa tibi xukuabu unanti watanun ika Xanen Ibun tsauti pepaki en tsauken ³²⁻³³en nai tsumabun ea jatu ichawaxunkin keyuxunxankanikiki. Januxun jaska chaxuwaa mekenikan jawen chaxuwaa paxkamis keska wakin dasibi enabu chaxuwaa kayabi keskabu en yusiudi jatu ichawatan ja enabuma chaxuwaa kayabi keskabuma en yusmaudi en jatu ichawadiaxanaii. ³⁴Janua en xanen ibujaidatun enabu en yusiudi en jatu

nichian mapuabu jatu yuikin: “En Epan mai damiwakin taewakin matu jabe jiwemakatsi matu katunixun natian matu ma kenaikiki. Jabe jiwedii bekanwen, matu duawai benimaikikidan.³⁵ Matunan, en buniaya man ea pimaniki. En unpax manuaya man ea unpax amaniki. En chairea jua jani en uxatima yumanyan ea jawa unanmabia janu uxati ea inankin man ea duawaniki.³⁶ En tadiumaken man ea tadi betsa inaniki. En isin teneaya man eki bakin man ea shinan chankanwaniki. En bichiti jiwe medan niken ka man eki bakin man ea shinan chankanwaniki”, en jatu waya³⁷ Januxun jabundi ea kemakin: “Xanen Ibuun, jaskamaki. Min buniaidan, ɿjanixun mia uinkin nun mia pimanimen? Min unpax manuaidan, ɿjatian nun mia amanimen?³⁸ Mia unanmabia duawakinan, ɿjatian janu uxati nun mia yununimen? Min tadiumaken ɿjatian nun mia tadi betsa inanimen?³⁹ Min isin teneaidan, ɿjatian nun mia uinkin nun mia shinan chankanwanimen? Min bichiti jiwe medan nikenan, ɿjatian nun miki bai kaxun nun mia shinan chankanwanimen?” ea wabu⁴⁰ eandi jatu yuikin: “Chanimaa en matu yuiaii. Na dasibi en betsabu inun en puibudan, jawaumabubiaken nuikin man jatu medabewakubainmiski. Jatu jaska wakin chanima eadi man ea duawakubainmiski”, iwanan, jawen yusiudiabu yui keyutan

⁴¹ Januxun jawen yusmaudiabu mapuabudi yuikin: “Matu man chakabubudan, man enabumaki. Tudi budikanwen. Jaskawen taea matunamabia janu chi nukaisma anu diablo Satanás inun jawen nai tsuma chakabubube yumankin tenekubainxanaibu anu matudi budikanwen.⁴² Matubunan, en buniaya

man ea pimama iniki. En unpax manuaya man ea amama iniki.⁴³ En chairea jua jani uxatima yumanyan janu uxati ea yunukin man ea duawama iniki. En tadiuma yumanyan man ea tadi betsa inanma iniki. En isin tenei yumanyan ea uin man eki bama iniki. En bichiti jiwe medan nia yumanyan man eki bamadi iniki”, en jatu wa⁴⁴ jabundi ea yuikin: “Xanen Ibuun, jania min jaskaya ɿjatian mia medabewakin nun mia duawama inimen?” ea wabu⁴⁵ eandi jatu yuikin: “Chanimaa en matu yuiaii. Na dasibi en betsabu inun en puibudan, jawaumabubiaken nuiama ewendi man nuiama ikubainyamabuki”, en jatu waxanaii.⁴⁶ Januxun ja yuda chakabubu jatu kupikin chi medan jatu yumanwakin enabu pepabu besti jatun pepawen manakukin ebe en jatu jiwekuinmaxanaii, ikibi imakinan– nuku waniki.

Jesús achixanun ika yubakanibukiaki,
na janchadan

(Mr 14.1-2; Lc 22.1-2; Jn 11.45-53)

26 ¹ Januxun nun jawen tsumabu jaska dasibi Jesúsun nuku yusin menetan nuku ana betsa yuikin:

² –Ja Pascuatianan, Egipto anuxun Diosun yunua debuwaniaka nai tsuman nawan bakebu tenankin nukun xenipabu dunkebaini shinanmatitinan, ux a dabe ma kemai misi xaxama nun pimis man unaiin. Jaska inun, en matun Juchi Kayabi Iyua ea tenanun ixun cruzki ea mastakatsi ikin samama ea achitan ea jatu inankatsis ikanikiki– nuku waya

³ jabatiandi Diosbe nukunabu janchaxunika xanen ibubu inun judio mae xanen ibu betsabu bui Diosbe nukunabu janchaxunika xanen ibujaida Caifásin jiwe anu dasitan icha⁴ jaska waxun Jesúsun bepadanttan tenantima yubakaibu⁵ betsan jatu nemakin yuikin:

—Pascua nawaibutian
meyamayuxankanwen, nukunabu
nukuki sinatai bedukubauntidubukidan,
betsatian nun atidumenkainan— jatu wa
jaska shinainbun

**Ainbun Jesúski xeni maukanikiaki,
na janchadan**

(Mr 14.3-9; Jn 12.1-8)

⁶Jerusalén chaima Betania anuxun Simón yudaki chaminí Jesúsun kaya waimatun jawen jiwetanxun ⁷Jesús pimaya ainbu betsan nenkati bishtu juxupaki xeni inin jas kadujaida bexun tesketan Jesúsun buxkaki mauka jaki jababainaya ⁸nun jawen tsumabu jatiditun inin mayai xetekin uin jaki sinatai yuinamei:

—¿Jaska wakin ja xeni kadujaida jamen chakawakin maukaxumen? ⁹Jatu inanxun jawen pei midima bitan nuitapaibu medabewatibin!— iki ainbuki nun ja ikaya ¹⁰nun jaskaibu Jesúsun ninkatan nuku yuikin:

—Na ainbun ea duawai ¿jaskai man jadi janchai? ¹¹Nuitapaibu matube jiweabu man jatu duawapaketiduki. Jakia eadan, jawenchains man ea duawapaketidumaki. ¹²Jaskaken eki xeni ininipa maukakin na ainbun en mawadiama bebunkidi en yuda ea pewaxuki, jau jawama ea maiwashadaxanunbunan— itan ¹³Xabakabi chanima en matu yuiaii. Mai jidabi anuxun kakape ekidi chanibaunkin na ainbun ea axu shinankin yuidabaunañxankanikiki, tsua jau jakimayamaxanunbunan— nuku waya

**Judasin Jesúsun jatu achimaxanun ika jatube
yubakanikiaki, na janchadan**

(Mr 14.10-11; Lc 22.3-6)

¹⁴janua Jesúsun 12 tsumabu betsa paxkakain Judas Iscariote Diosbe nukunabu janchaxunika xanen ibubube yubakanun ika kaxun ¹⁵jatu yukakin:

—Jesús en matu achimayadan, éjati pei man ea inantidumen?— jatu wa jabu benimakaun jabun 30 pei jexe plata kadujaida inanbu ¹⁶jatube jaskatani jui nukuki ana nukutan: “¿Jatian janixun Jesúsun en jatu achimatidumen?” ikin shinankubainaya

**Badi kaya Jesúsun jawen tsumabubetan
jawen shinanmati jatu pimanikiaki, na
janchadan**

(Mr 14.12-25; Lc 22.7-23;
Jn 13.21-30; 1 Co 11.23-26)

¹⁷ja badi Pascua besi taemisbutian jabianudi misi xaxama pikubainmisbutian ikaya, januxun nun jawen tsuma betsabun Jesúsun yukakin:

—¿Jani kaxun nawakin badi kaya piti bawakin mia pewaxuntanpa?— akabu

¹⁸Jesúsun jawen tsuma dabe nichinkin yuikin:

—Bui Jerusalén anu jikitan ja juni betsa nun unain anu jawen jiwe anu kaxun yuikin eska watankanwen: “Nukun yusinan nuku yuixudan, émia yuipa? Ma en mawa kemaxun min jiwe anuxun Pascuatian nawakin shinanmati piti en tsumabubetan pinun ika juikiaki. ¿Janixun bawakin pewaxunpa?” akin ea yuixuntankanwen— jatu wa

¹⁹jawen tsumabu kainbaini Jerusalén maewan anu jikitan jaska Jesúsun jatu yuixu jiwe ibu yukatan januxun nawakin Pascua piti bawa menetan chintunbaina

²⁰ibai ma badi kai meshuaya Jesúsun nun jawen 12 tsumabube kai jikitan tapu anuxun nun jatubetan piaibun ²¹Jesúsun nuku yuikin:

—Chanima en matu yuiaii. Jadatutunda man ea jatu achimai kai— nuku wa

²²nuku jaska wai ninkatan nun jawen tsumabu juinti nishmai keyutan yukakin:

—Xanen ibuun, éjibia en eamen?— nun iaketanyan

²³Jesúsun nuku yuikin:

–Na jabias kenchaki ebetan misi pukuxun man piaitunan, jatun ea jatu achimai kaikiki.²⁴ Jaska ekidi kenenibu chibain matun Juchi Kayabi Iyua en jaskai mawai kaii. Jakia ja junin ea jatu achimai kaidan, pemajaidaki! Jaskaken ja juni kaianma inidan, pepakeanaii– nuku waya

²⁵ Jesúsun jatu achimai kabiakatsi Judasin bepadankin yukakin:
–Yusinaan, ḥabia en eamenkaintsa?– aka

Jesúsun yuikin:

–Jawaikika! Jabiadi min yuiaii– aka ya²⁶ nun piaibun Jesúsun misi betsa tsumaxun Dios kushipa yukatan tunketan inankin nuku yuikin:

–Na misi betsadan, en nami keskaki. Bibaunkin pikanwen– nuku wa tude betsa bitan metex atankin nun pibaunaibun

²⁷⁻²⁸ januxun kencha vino mata tsumaxun Dios kenwandiati nuku inankin yuikin:

–Yuda ichapa medabewakin jatun chakabu Dios jatu buamai en mawaya en jimi ea ikunwainbu jatu dasibi jabadunxanikiki. Na vino en jimi keskaki, jawen en yubakai bena shinanmatidan, akanwen– nuku wa bitan tusa nun nuxabaunaibun

²⁹ –Chanimi en matu yuiaii. En Epa Diosbe xanen ibui en ana judiama na uva vino en ana matubetan ayuama ixanaii. Abaunkanwen– nuku waya

Pedro jaki dakei kaikidi Jesúsun yuiniaki, na janchadan
(Mr 14.26-31; Lc 22.31-34; Jn 13.36-38)

³⁰ jabianuadi Salmos Davidin keneni betsa betsapa nukun juiwen nawai menetan janua ma Judasin nuku paxkabainken Olivos Mati anu nuku iyuxun³¹ Jesúsun nuku ana yuikin:

–Jawen jancha yuixunika ekidi Diosun yuikin: “Chaxuan jatun

mekenika en tenanyan jawen chaxuan datei paxai keyuxankanikiki”, aka ninkatan keneniken na jibia meshutian jabiaskadai matu dasibibun ea shinanma man ea jenebaini paxadii, chaxuan keskaidan.³² Jakia ea tenanbiabu ana bestantan janu matuki nukunun ika bebunkidi Galilea anu en matu kaxunxanaii– nuku waya

³³ Pedron yuikin:

–Miwen datei dasibi paxai keyuaibun eanan, en mia jawa jenekin putamaki– ikaya

³⁴ Jesúsun Pedro yuikin:

–Jaskamaki. Chanima en mia yuiaii. Na jibia meshu medan takada keudiamaken: “En ja unanmaki”, iki dabe inun bestiki eki dakekin min yui kaii– aka

³⁵ ninkamas jancha kushipawen Pedron ana yuikin:
–Jaskamaki. En mibe mawabiai kai jaskai en miki dakeamaki– ikaya nun jawen tsuma dasibibun shinanma jabiaskasdi nun yuidianibuki.

Getsemaní anu ka Jesúsun Diosbe janchanikiaki, na janchadan
(Mr 14.32-42; Lc 22.39-46)

³⁶ Janua Jesúsun nun jawen tsumabube kai miban xuku betsa jawen kena Getsemaní mishkiwen kenenibu anu jikiton nuku yuikin:

–Nenu jabianu tsauyukanwen, en Diosbe janchai kaidan– ikainkin

³⁷ Pedro inun Zebedeon bake dabe Santiago inun Juan besti iyui kai punu nuka jawenchains jointi metexekei niti itan³⁸ jatu yuikin:

–En yudawen mawakin en matu xunubainxanai shinain en punu nukajaidaki. Na jabianuxun uxama ea manakanwen– jatu wabaini

³⁹ janua kai chaima ka beua maiki beti ixun Dios yukakin:

-En Epa Diosuun, jamapai dasibi min atidu en unaii. Jau ea tenanyamanunbun min jatu nematidubia jaska en shinainwen akama min shinan bestiwen ea axanwen- atan

⁴⁰janua jawen tsuma dabe inun besti anu chintunkidan uxabuki nukutan jatu datekin Pedro yuikin:

-¿Jawai man uxamen? ¿Uxama hora bestichai bedu mestenwantan man ea manatidumamen? ⁴¹Chanimá matun shinan pebia matun yuda babuwen taea man punu nukaya matuki chakabu jikia man kaneyamanunbun Diosun jau matu medabewanun uxama jabe janchakanwen- jatu awani

⁴²ana Diosbe janchai kaxun yuikin:

-En Epa Diosuun, en yumanyamanun ea unanti wakin min jenekatsi ikamadan, peki. Min shinanen besti ea axanwen- atan

⁴³ana jua ma uxa paen jatu achia uxabuki nuku wani ⁴⁴jawa jatu yuiama ana chintunkain Diosbe janchai kaxun jabias jancha yuitan ⁴⁵janua jawen tsumabu anu ana juxun jatu yuikin:

-¿Jaskaida man uxa ninkama uxa bestia man juindukunsi ikanai? Uinkanwen. En Diosun bake matun Juchi Kayabi Iyua juni chakabubun ea achi bei ma kemakanikiki. ⁴⁶Benidikanwen, nun kanunan. Ea jatu achimai jatube ma juikiki- jatu wai

Jesús unanmambain achinibukiaki, na janchadan

(Mr 14.43-50; Lc 22.47-53; Jn 18.2-11)

⁴⁷Jesús jancha menediamaken Diosbe nukunabu janchaxunika xanen ibubu inun mae xanen ibubu betsabun jatu yunua juni ichapa nupe chaipayabu inun kushati jiyabube Jesúsun 12 tsuma betsa Judas Iscarioten jatu iwekin ⁴⁸Judasin bebunkidi jatu yubakin yuikin:

-Ja en tantsu akaidan, jaki. Achixun iyukanwen- jatu abidanxuwen taexun

⁴⁹Judas Iscariote Jesúski nukutushikin yuikin:

-Yusinaan, en miki nukuyuái- iwanan, tantsu akaya ⁵⁰Jesúsun yuikin:

-Peki, en jaibuun. Ea jaska wanun ika min jatube yubakakidanaidan, ea jatu amadiwe- akaya -Jakiaki. Akanwen- ibain achiabun

⁵¹Jesúsun tsuma betsan jatu mepanmanun ika nashui ikain jawen nupe chaipa sitan Diosbe nukunabu janchaxunika xanen ibujaidatun tsuma mapexpaikin maebain paxteaya ⁵²Jesúsun jawen tsuma nemakin:

-Ana jatu meama min nupe ana jawendi usunwen. Tsuabuda nupe chaipawen detenameaibu jabiawendi mawaxankanikiki. ⁵³Na ea eska waibu en Epan jau ea medabewanun en yukaya samama jawen nai tsumabu 12,000 ea medabewamai jawaida nidi ibidan ea axuntidubu ¿min unanmamen?

⁵⁴Jakia Diosun jaska waya jawen jancha yuixunakabun ekidi keneama inibudan, ea jaska wabuma ikeankanai- iwanan,

⁵⁵mapuabu uinkin jatu yuikin:

-Uatian xaba tibi Templo jemaintin anuxun en matu yusinkubainai man ea xabakabi achiamá ikubainshinabuki. ¿Jaskai natian meshu medan yumetsu achimisbu shinain jawen deteti nupe chaipaya inun jawen kushati jiya man bekanxumen? ⁵⁶Eskawen taea man ikaii. Diosun jancha bebunkidi ekidi kenenibu jaska yuiniwen taexun man ea achiai- jatu waya janua dasibi nun jawen tsumabu datekin Jesús besti jenebaini paxai nun junei keyubainaibun

Xanen ibubu Junta Suprema anu Jesús iyunibukiaki, na janchadan

(Mr 14.53-65; Lc 22.54-55, 63-71; Jn 18.12-14, 19-24)

⁵⁷janua achitan iyukin Diosbe nukunabu janchaxunika xanen ibujaida Caifásin jiwe anu janu mae yununika xanen ibu betsabu inun, Diosun jancha

kenenibu yusinanamisbu jabu dasibibu
jabu dukun bua icha maniabu anu Jesús
iyukin janu bichiaibun⁵⁸janua Pedro
datei benanta kakin chibankubaina
Caifásin jiwe jemaintin mishki
kenebaunibu anu jikidiatan čjaska
wakanimenkain? uinun ika Templo
mekenikabube tsauxun uiyan

⁵⁹januxun Diosbe nukunabu
janchaxunika xanen ibubu inun Junta
Supremabu dasibi ichaxun Jesús
jau tenanunbun jakidi chakabujaida
yuiabiwen chani jancha ikun keska
watan jawen unanti watan tenankatsi
benai maniabun⁶⁰juni betsa betsapabun
jakidi chani chitebiakin jakia juni
dabetun jabias chani yuiabumaken
atimas juni dabedi jaki chani chakakin
⁶¹yuikin:

–Nukun ninkakinan, Jesúsun eska
yuiai nun ninkashinaki. Matu yuinun:
“Na mishki Templo junibun anidan,
tekekin pudekin keyutan uxu dabe inun
besti kaya junibun akamaken ana en
benixanaii”, ikai nun ninkashinaki– jatu
wabu

⁶²jaska waibu ninkabaikin Diosbe
nukunabu janchaxunika xanen ibujaida
Caifás namakis dasibube tsaua benitan
nixun Jesús yukakin:

–Na junibun mikidi chakabu
yuiabudan, čmiadan, jaskai min jatube
kemanameamamen?– aka

⁶³Jesús pes jawa yuiama niken
Diosbe nukunabu janchaxunika xanen
ibujaidatun ana yuikin:

–Dios jiweatun mia ninkaya jau min
chani chakayamanun en mia yunuai,
chanima nuku yuiwe. ČJabia min
miamen ikaidan, min Diosun bake
nukun mekenan Mesías Cristodan?– aka

⁶⁴Jesúsun yuikin:

–Jabiadi min yuiaii. Jamen ean en mia
yuiaidan, en Epa Dios kushipajaidatun
yusiudi en tsaua matun Juchi Kayabi

Iyua nai kuinwen en juai man ea
uinxanaii– akaya

⁶⁵Diosbe nukunabu janchaxunika
xanen ibujaida jaki sinatajaidakin jawen
sanpu tadi ushnitan yuikin:

–Dios ichaikiki. Ana jatida janchai
en ninkakatsi ikamaki. ⁶⁶Na jaska
janchayadan, čjaskada jakidi man
shinain?– jatu wa

jabun yuikin:

–Dios ma ichawen taexun jau
tenanunbunwen– iake iaketan

⁶⁷ichakawakin taewakin betsabun
besuki kemu michukin kushabun
betsabundi tanpais akin ⁶⁸kaxe wakin
yuikin:

–Min Diosun Mesías Cristodan, čtsuan
mia kushaimenkain? unantan nuku
yuiwe– akaibun

**Pedro Jesúski dakei kaikidi yuibidana
jaskanikiaki, na janchadan**

(Mr 14.66-72; Lc 22.56-62; Jn 18.15-18, 25-27)

⁶⁹janua jemaintin anu Pedro tsaua
xanen ibu dayaxunmis ainbu betsan
bechitan yuikin:

–Miadan, Jesús Galilea anuabe min
nimiski. En mia unaiin– aka

⁷⁰Pedron padankin jabube ichabu
bebunxun yuikin:

–Jaskamaki. Ja min jadi yuiaidan, en
ja unanmaki– abaini ⁷¹janu jemaintin
kenekauana jikiti xui anu ka niken ainbu
betsandi janu nia uinkin jatu yuikin:

–Ja junidan, Jesús Nazaret anuabe
nimiski– jatu waya

⁷²januxun Pedron ana jatu yuikin:

–Jaskamaki. Diosun ea kupididuwen
taea en chani chakamaki. Ja junidan, en
ja unanmaki– jatu wa

⁷³janua jabianu manixun betsabundi
Pedro uindiakin jaki kemaxun yuikin:

–Chanima Galilea anuabu min jawen
janchaki. Min Jesúsun tsuma betsaki. Jadi
man janchamisbin nun mia ninkai– akabu

⁷⁴januxun Pedron jatu ana padankin yuikin:

–Ja juni man yuiaidan, en ja unanmajaidaki. En chani chakayadan, jau Diosun ea kupinunwen– jatu waya jakimamadi takada keuai ⁷⁵ninkatan jaska Jesúsun Pedro yuikin: “Dabe inun bestiki: ‘En ja unanmaki’, akin takada keudiamma min yuixanaii”, abidana Pedron shinain taxnikain kaxa chakaya manikiaki.

Pilato anu Jesús iyuaibun Judas eiskain tenexeketan mawanikiaki, na janchadan

(Mr 15.1; Lc 23.1-2; Jn 18.28-32)

27 ¹Janua penaya Diosbe nukunabu janchaxunika xanen ibubu inun judio xanen ibu betsabu icha jaska wakin Jesús tenantikidi yubakaxun ²Jesús menexxun romano xanen ibu Pilato anu iyuaibun

³Judasin jatu achimabidana Jesús tenankatsi ikaibu uinkin unankin shinain jawen nuikin ja 30 pei jexe Diosbe nukunabu janchaxunika xanen ibubu inun xanen ibu betsabun inanshinabu ana jatu inanun, iwanan, ⁴jatu yuikin:

–Jesús juni pepabiaken jau man tenanun chakabu shinankin en matu achimashinaki. Na pei man ea inanshinadan, en ana jaska jayakatsi ikamaki– jatu wa

jawen pei ana bikatsi ikama jabun Judas yuikin:

–Min chakabushina nun jawen nuiamaki. Min nuku jaska wamashinadan, minaki– akabu

⁵janua juinti nishmajaidai keyutan janu Templo jikiti xui xexekaian nitan ja pei jexe putakin sa atan kainkaini ka dispiwen tenexeketan dunua mawanikiaki.

⁶Ja pei jexe sa abaina Diosbe nukunabu janchaxunika xanen ibubun tupitan yuinamei:

–Na peiwen juni achishinxun nun jatu tenanmai kaiwen taexun Dios kenwankin janu inankuinti bauki nun jaska jaki nanetidumaki, ja pei jimiwen iduma keskadan– itan

⁷¿jawen jawa jaska wanana? ika yuinamei yubakakin shinantan Jerusalén anu bai Bea mawabu medibi janu jatu maiwati wanun, iwanan, mai kenti wanikan bai ja 30 pei jexewen bikin ibu wanibukiaki.

⁸Jaska wanibu na jabatiandi kenakin: “Jimi Baiki”, nun wamiski. ⁹⁻¹⁰Jaska Diosun jancha yuixunika Jeremfasin bebunkidi jatu yuikin: “Jabun 30 pei jexe bixun mai kenti wanikan bai bikin jaska Israelbun jawen kadu yubashina jawen pakakin ibu waxankanikiki, akin Diosun ea yuia en matu yuixuki”, jatu waxunkeneniki. Jabiaskadi kaneama menekin Judasin peiwen bai bikin ibu wanibukiaki.

Pilaton jau Jesús unanti wanun janu iyunibukiaki, na janchadan

(Mr 15.2-20; Lc 23.3-5, 13-25; Jn 18.33-19.16)

¹¹Janua romano xanen ibu Pilato anu Jesús iyubu kainkidan tsauxun yukakin:

–¿Miadan, min judio xanen ibubu binu keyuamen?– aka

Jesúsun yuikin:

–Jawaikika! Jabiadi min ea yuiai– akaya

¹²Diosbe nukunabu janchaxunika xanen ibubu inun xanen ibu betsabun jakidi yuikin chani tibi chiteabun Jesúsun jawa yuima niken ¹³Pilaton ana yukakin:

–Ja mikidi betsabetsapa chakabu yuiaibuden, ¿min jawa ninkamamen?– aka

¹⁴Jesúsun jawa jancha betsab yuima niken:

–Jabaa! ¿Jaskai janchamamen? –itan Pilato jadakidi shinantimawa

Jesús jau tenanunbun Pilaton yununiaki, na janchadan

(Mr 15.6-20; Lc 23.13-25; Jn 18.38-19.16)

¹⁵romano soldadobun jatu achixun bichimabu badi tibi ja Pascua

nawaibutian jau bestichai taxninun ja romano xanen ibu Pilaton beyawen taexun maen katuaya jatu kainmaxunpakemisken¹⁶ jabiatiandi juni betsa detenameti unan keyuai Barrabás achixun bichimabun¹⁷⁻¹⁸ janua Diosbe nukunabu janchaxunika xanen ibubu Jesúski chani chakai jaki sinatakin jaska waxun maematima maemanun ixun iyuabu Pilaton unankin mae anua dasibi ichabu jatu yukakin:

–¿Jadatu man bechipaiai, ja en matu taxnimaxunaidan? ¿Barrabásmenkain? ¿Jesús Diosun Katua Mesías kenamisbudaka? – jatu wai¹⁹ janu Pilato gobernador tsauti anu tsaudiaken jawen ainen jancha bumakin yuikin:

–Jesúswen taea en nama chakashinaii. Jaskawen taexun ja juni pepa jawa jatubetans jakidi chakabu yuikin jawa yunuyamawe– aka juxun jawen tsumapan yuixunbiaya

²⁰Pilato ninkamama june Diosbe nukunabu janchaxunika xanen ibubu inun xanen ibu betsabun yudan kaian Jesúski jatu sinatajaidamakin yunukin:

–Barrabás jau nuku taxnimaxuntan Jesúski jau jatu tenanmanun yunukanwen– jatu waibu mae anuabun ninkaibun

²¹Pilaton ana jatu yukakin:

–Ja juni dabeledan, ¿jadatu man bechipaiai? jawa meama ja en matu taxnimaxunaidan– jatu wa jabundi Pilato yuikin:

–Barrabás nuku axunwen– iake iakeaibun

²²Pilaton ana jatu yukakin:

–Jesús Mesías Cristo kenamisbudan, ¿jadan, jaska wapa? – jatu wa dasibibun yuikin:

–Cruzki nuku mastaxunwen– iake iakeaibun

²³ana Pilaton jatu yukakin:

–¿Natunan, jawa chakabuwashinamen? – jatu wa

ana unanxubima jancha kushipawen yuikin:

–Cruzki nuku mastaxunwen– jawenchains ikaibun

²⁴Pilaton jancha jawa ninkama ana keketikubainaibun jabun shinan jatu mae wamatiduma Pilaton unankin jatu unanti wanun, iwanan, jawen soldado yunua unpax bexuan yudan kaianen bedubi mepanukin jatu yuikin:

–Na juni pepa en jatu tenanmakatsi ikama matu unanmanun ika en mepanuaii. Matun man jaska yunuai bestiwen taea mawatiduki– jatu wa

²⁵ja yuda dasibibun yuikin:

–Peki. Nuku inun nukun bakebun nun yunuaiwen besti jau mawanunwen– akabu

²⁶januxun Pilaton jatu daewakin Barrabás jatu taxnimaxuntan Jesúski jatu kusha kusha amatan jau jiki mastatanunbun jawen soldadobu yunua

²⁷januxun xanen ibu Pilaton jiwe ewapa jemaintin anu soldadobun Jesúski iyuxun soldado jabus jaki xukui kexebauntan

²⁸januxun Jesúski tadi pekatan kaxe wakin xanen ibun bemakia tadi tashijaida Jesúski sawematan²⁹janua muxa maiti waxun maimatan jawen meken yusiudi ji sidi jawen xanen ibun mestenti keska tsumamatian janua jaki kaxeji ja be bun danti itan yuikin:

–Judío xanen ibu kayabidan, min miaki– atan atankin

³⁰ jaki kemú michukin jabias ji sidiwen tsumamatian makush makush atan

³¹kaxe wai jaki beyusi keyutan bemakia tadi tashijaida pekatan jawen tadi kayabis sawemabainkin cruzki mastanun, iwanan, jaki mastai kanun, iwanan, cruz iamatan xadamabainkin iyuabun

Cruzki Jesúski mastanibukiaki, na janchadan

(Mr 15.21-32; Lc 23.26-43; Jn 19.17-27)

³²janua juni betsa Simón jawen mae Cirene anua juaiki nukuxun Jesúski

cruz jau iaxunyubainun soldabobun
yunua iaxunbainaya

³³Gólgota anu Jesús jadi iyukin
mapematan, jaska yuidan, Buxka Xau
Mati anudan, ³⁴vino isin nemati dau
muka jusia amabu metan danankin
akamaken

³⁵januxun cruz bexuki Jesús mastaxun
nichintan januxun soldadobun jawen
beyustiwen maemanankin jawen tadi
paxkanun iwanan: “Tsuan dukun jawen
tadi bimenkain? Akanwen”, ikin Jesúsun
tadi paxkakin menetan ³⁶janua jau
mawanun Jesús kexea tsauxun uiainbun
³⁷jabatiandi jawen unanti ji bexa tuaxki
kenekin: “Nadan, judiobun Xanen
Ibu Jesúski”, Pilaton aka buxun Jesús
mamaki mastadiabun

³⁸jabianudi jabe juni yumetsu dabedi
cruz dabeki mastaxun betsa jawen
yusiudi nichinxun betsa jawen yusmaudi
akabun ³⁹janua juni betsabun ichakin
dainbaini budi budi ikin ⁴⁰yuikin:

–Uinwen. “Dios kenwanti mishki
Templo tekekin pudekin keyutan xaba
dabe inun besti kaya en ana benixanaii”,
min ishianki. Min ja kushipa jayadan,
jaska min Diosun bakemenkain ja
cruz anua mimebi paxai butudiwe,
mawamadan– akaibun

⁴¹Diosbe nukunabu janchaxunika xanen
ibubo inun, Diosun jancha kenenibu
yusinanamisbu inun, judio xanen ibu
betsabudi Jesúski kaxekin yuikin:

⁴²⁻⁴³–Juni betsabu medabewabiamis
jamebi paxatidumaki. Jaskakenan, jaska
Israelbun Xanen Ibu Cristo kayamenkain
cruz anua butuai uinkin na jabiatian
nun ikunwantiduki. Dios ikunwain
jakidi janchakunkainshinaki. Natiandi
Dios benimakin jau medabewanunwen,
paxawakinan, jaska waya nukundi nun
ikunwainan– akaibun

⁴⁴juni yumetsu dabe jabe mastabundi
Jesús ichadianibukiaki.

Jesús mawanikiaki, na janchadan
(Mr 15.33-41; Lc 23.44-49; Jn 19.28-30)

⁴⁵Janua badi manananbibiaken badi
nuka meshua itsa daka manaibun
ma badi nai puchinin dakaken
bepenakainaya ⁴⁶jabatiandi Jesúsun jui
kushipawen yuikin:

–Elí, Elí, élémá sabactani?– ikidan
juni kuin janchadan, “En Diosun, en
Diosun, éjaskakin min ea jeneamen?”
ikaya

⁴⁷ja naman jatidi mapuxun betsabun
ninkatan yuikin:

–Ninkakanwen, Diosun jancha
yuixunika Elías kenaikikidan– ikaibun

⁴⁸janua ja naman mapuabu betsa
kushikidan janu jawen tsiniti vino muka
pu atan tawaki ustaxun bexun amanun,
iwanan, sananxunaya ⁴⁹betsabun
nemakin yuikin:

–Jaska wama jeneyuwe, Elásin
butekin paxawayuimenkainan– akaibun

⁵⁰janua Jesús ana unanxbima bis itan
mawaya ⁵¹jabatiandi Templo medan tadi
dintu wakin kebenibu Jamebi manaundia
dis iki keyuaya mai pacha sakuya
mishkipanwan bepunibu maei dabekeaya
⁵²janua janu maiwati tanpe xabakabiaya
jabun Dios ikunwain mawanibu Diosun
jatu bestenwan ⁵³Jesús bestendiamawen
taea jabu dukun kainbaini Jerusalén ja
mae medibi anu jikiabu januxun yuda
ichapabun jatu uinibuki.

⁵⁴Janua romano capitán inun jabun
Jesús mekekin mai pacha sakui betsa
betsai uin datejaidakin yuikin:

–Chanimá kayaki. Na junidan, Diosun
bakeki– ikaibun

⁵⁵⁻⁵⁶janua ainbuaibun Galilea anuxun
duawakin Jesús chibamisbu María
Magdalena inun Santiago inun José
ewa María betsa inun Zebedeo juni
bake dabeta ewadi Jesús mawai jabu
benanta nixun uindianibuki.

**Jesús mawa maiwanibukiaki, na
janchadan**

(Mr 15.42-47; Lc 23.50-56; Jn 19.38-42)

⁵⁷Janua ma badi kaya judio betsa
mabu pai paimaya jawen kena
José Arimatea anua kainitun Jesús
ikunwankin chibankubainshinatun ⁵⁸ana
jawaki dateama Pilato anu kaxun Jesús
maiwakatsi jawen yuda yuka jau José
butetan butanun Pilaton jaska yunua
⁵⁹kaxun Joséñ jawenabubetan butetan
tadi juxupawen dayabutan buaibun
⁶⁰ainbu dabetan jatu chibainbun jawen
yuda bakebainkin bukin jawen bai neki
mishki kini bena jatu amaima anu Jesús
datantan mishki beputi ewapawen
beputan buaibun ⁶¹jabianudi María
Magdalena inun María betsa maiwati
tanpe anu ja bebun niti ika tsauxun
dasibi uinibukiaki.

**Jesús yuda jau yumetsuyamanunbun
soldadobu kexemanibukiaki, na janchadan**

⁶²maiwashinabu judiobun
juindukuntitan Diosbe nukunabu
janchaxunika xanen ibubu inun
fariseobu Pilato anu jabe janchanun ika
buu ichaxun ⁶³yuikin:
—Xanen ibuun, ja juni chani chakakin
mawadiama janchai nun ninkamisdan:
“Mawa xaba dabe inun besti kaya
en ana bestenxanaii”, ishian nuku
yuishinabu nun shinaii. ⁶⁴Jaskawen
taexun xaba dabe inun besti binudiam
maiwashinabu jau kexexun meke
pewanunbun min soldadobu yunuwe.
Min jatu jaska wamamaken meshu
medan jawen tsumabu bexun jawen
yuda june tsekabain butan chipu
yudan kaian yuikin: “Nukun Xanen
Ibu ma nuku bestenxun kainshinaki”,
iwanan, dasibibu jatu padantidubuki.
Jaska wakin jawen chani jancha jatu
pikumatidubuki— akabu

⁶⁵Pilaton jatu yuikin:

—Na soldadobu man jayaki. Matudi
maiwashinabu anu jatube buxun
jatu pewamatankanwen, jau jaska
yumetsuyamanunbunan— jatu wa

⁶⁶buxun jawen beputi mishkiki juni
betsan bepean unanti shadawakin jawen
unanti dispiki tsamintan puntekin
bewexetan jau mekekin uinunbun
soldadobu yunukin kexematan
benibukiaki.

**Jesús maiwashinabu bestenkainikiaki,
na janchadan**

(Mr 16.1-8; Lc 24.1-12; Jn 20.1-10)

28 ¹Janua ma sábado juindukunti
binukainaya penai taeaya
domingotian María Magdalena inun
María betsa maiwashinabu anu buxun
²uiainbun mai pacha sakuaya jabiatandi
Diosun nai tsuma maiwati tanpe anu
butuxun mishkiwen bepushinabu bepentan
jamamaki tsaua ³jawen yuda kana bakai
keska chaxai jawen tadi juxupajaida juxu
punta punte ikai ⁴soldadobun uin datei saki
saki iki tin ika mawa keska tsistibainbaina
maniabun ⁵januxun nai tsuman ainbu dabe
beabu yuikin:

—Jesús mastashinabu man benai jua en
unaiin. Dateyamakanwen. ⁶Jaska bebunkidi
matu yuishina keskai ma bestenkainaki.
Ana nemumaki. Janu datanshinabu jikixun
uin ⁷bekanwen. Uinbaini buxun jawaida na
jancha jawen tsumabuki chanikin: “Jesús
mawashinadan, ma bestenkainaki. Matu
bebunkidi Galilea anu kaxuinkiki. Jadia
matube ana ichai benai kaikiki. Jadi buxun
uinditankanwen”, akin jawen tsumabu jatu
yuiditankanwen. Jaska bestiki, en jancha
matu be xuanki— jatu wa

**Ainbu dabeki Jesús nukui
taenikiaki, na janchadan**

⁸ainbu dabe maiwati tanpe
anua uintan datei taxnibaini

benimachakayamai kushibaini jawen tsumabu yui buaibun ⁹Jesús jatuki nukui jatu bechankametan jatu jancha wa ainbu dabe jaki nukuxun Jesús kenwain danti ixun jawen tae jutsundabeabu

¹⁰Jesúsun jatu yuikin:

–Dateyamakanwen. En betsabu jau Galilea anu bununbun ea jatu yuixunditankanwen. Jadixun jabundi ea uin bukanikiki– jatu wa

**Xanen ibubun jamakidi chaniti soldadobu
jatu yununibiaki, na janchadan**

¹¹ainbu dabe buaibun Jesús maiwashinabu soldadobun kexeabu jatidi Jerusalén anu buxun jaska uinkanxu Diosbe nukunabu janchaxunika xanen ibubuki chaniaibun ¹²janua jabu xanen ibu betsabube janchai bua jaska wakin yudan kaian padantidubu yubakatan soldadobu pei midima inankin ¹³jatu yuikin:

–Jadi man jatu yuikubaintanun matu yuinun ninkakanwen: “Meshu medan nun uxaken jawen tsumabu bexun jawen yuda yumetsubainabuki”, ¹⁴man ikaya Pilaton jaska ninkatan jau matu kupiyamaxanun nuku nun jabe janchakin nun matu yui pewaxunxanaii– jatu wa

¹⁵januxun soldadobun pei bitan jaska jatu yuixukidi jabu chania akeakenibu na jabatiandi judiobun jabiaskadi jatu yuikubainmisbuki.

**Jawen daya Jesúsun jatu yununibiaki,
na janchadan**

(Mr 16.14-18; Lc 24.36-49; Jn 20.19-23)

¹⁶Janua nun jawen 11 tsumabu Galilea anu mati betsa anu jaska Jesúsun nuku yunushina anu kaxun

¹⁷Jesús bechitan ikunwain ja bebun danti itan kenwainbun jatiditun shinan chankanma kenwanma juinti kushikin kenwanbumaken ¹⁸Jesús nukuki kematian nuku jancha wakin yuikin:

–Jawen kushipa ea inankin jawada nai anua inun jawada mai anua mekekin en yunukubainxanun En Epan ea Xanen Ibu waniki. ¹⁹Jaskawen taexun matu yununun ninkakanwen. Kakunkaunkin dasibi en matu yusinmis nawa betsa betsapa xukuabu tibi yusindiakin en tsumabu ea jatu waxunkubainxankanwen. Januxun ea ikunwankin jawenabu jau jatu unanti wamanunbun Epa Dios inun ea jawen bake inun jawen Yushin Pepa kena dayuikin jatu nashimakubainxankanwen.

²⁰Jatu jaska wakin jaska en matu yusinmis jau jabundi chibanunbun dasibi jatu yusian akeakexankanwen. Man jatu jaska waya eadan, janu na mai jidabi anu badi keyudiamatian dasibi man ea ikunwainbube dasitan badi tibi en matu medabewapakexanaii– nuku waniki.

Jatiski, nukun Xanen Ibukidi en jancha chanimadan.

Mateo

KAKAPE MARCOSIN JATU KENEXUNIKIAKI

MARCOS

**Janu tsua jiweabumanuxun Nashimanika
Juanen jatu yusinkin jatu nashimanikiaki,
na janchadan**

(Mt 3.1-12; Lc 3.1-9, 15-17; Jn 1.19-28)

1 ¹Ja dukun bebunkidi Diosun jawen
bake Jesús Mesíaskidi jatu yubani
jaska jawen kakape taxnimakin taewani
matu yuinun ninkakanwen.

²⁻³ “Naiudixun Diosun jawen bake
yuikin: Min kadiama mia bebun
en jancha yuixunika jau mikidi
bebunkidi chanixanun en mia
yunuxunxanaii. Jatun janu tsua
jiweabumanuxun jui kushipawen
jatu yuikin: ‘Nukun Xanen
Ibu nai anua matuki bayui ma
kemaikiki. Matun juintinin shinan
pewadikanwen, bai kayatapia
keska wakinan’, jatu wakin mia
jatu yuixunxanikiki”,
ayama Diosun jawen jancha yuixunika
betsakidi jaska yuini chipu Isaásdi jaska
Diosun yuia ninkatan jawen jancha
yuixunika Isaásin keneniki.

⁴ Janua jaska yuini keskai jadi tsua
jiweabumanu Nashimanika Juan
kaima jiwea taxnitushitan jatu yuikin:
“Matun shinan betsya watan matun
chakabu Diosun jau matu buaxunxanun
ninkatan jawada chakabuwen man
benua jiwea jenedikanwen. Matun

shinan maewatan man ea uinmaya en
matu nashimaxanaii”, iwanan, jatu
yusinkubainaya ⁵ Judea mai pakeanu
jiweabu inun Jerusalén maewan anu
jiweabu dasibi bexun Juanen jatu
yusiain ninkakin jabun ikunwankin
jatun chakabu Juanki chanikin
jatun chakabu jenekatsi ikin shinan
betsa waibu jawen unanti wakin
Jordán jene anuxun Juanen jatu
nashimapakekubainikiaki.

⁶ Janua Juanen tadi inun jawen
pitikidi matu yuinun ninkakanwen.
Camello dani sanpu tima sawea inun,
bichi nanexeketi sawea inun, jawen piti
pe bexmas chanpu inun ni medanua
buna batapa aki jiwekunkainikiaki.

⁷ Januxun yudan kaian jatu
banabimakin:

–Xanen ibu kushipajaida betsya
binuan ea kachu dama juxanikiki.
Jaskawen taexun mawaida en
kushipa jayamatun kakain en jawen
jawaumajaidatun jawen bichi tae
mexpun tsitsauxun pekaxunkin
akawakin en duawatidumaki. ⁸ Jamen
eanan, jenewen besti en matu
nashimakubainaii. Jakia jatunan,
Diosun Yushin Pepawen matu
unanti wakubainxanikiki, nashima
keska wakinan– akin Juanen jatu
yuikubainikiaki.

**Juanen Jesús nashima kashinken
Satanásan Jesús padanpai inikiaki, na
janchadan**

(Mt 3.13-4.11; Lc 3.21-22; 4.1-13)

⁹Ja jaskaitian Jesús jawen mae Nazaret Galilea mai pakeanua kainkidani Juan anu ka Jordán jene anuxun Juanen nashimakin meneaya ¹⁰nexekei mapekekidaninkin Jesúsun uiyanan nai udia Diosun Yushin Pepa deiwan keska jamamaki butuaya ¹¹nai uidixun Diosun yuikin:

—Miadan, min en bakeki. En mia bechipaikin katunidan, en miwen benimajaidaii— anikiaki.

¹²Janua jadi tsua jiweabuma benanta yuinaka mese piananbu anu Diosun Yushin Pepatun Jesús iyushina ¹³40 día Satanásan Jesús padanun, iwanan, unanti wa akeakeaya kakunkaunkin Jesúsun Satanás maemakubaunaya Diosun nai tsumabun medabewakubainibukiaki.

Galilea mai pakea anuxun Jesúsun jatu yusinkin taewanikiaki, na janchadan

(Mt 4.12-17; Lc 4.14-15)

¹⁴Januxun bichiti jiwe anu Juan ma bichishinabun Galilea mai pakeanu kaxun Diosun kakapekidi Jesúsun jatu yusinkin ¹⁵taewakin:

—Na jabiatian Dios ma nenu xanen ibuiki. Jaskaken man Dioskidi chakabumis jenetan en kakape ekidi ikunwankubainkanwen— jatu wanikiaki.

Baka nexenikabu dabe inun dabe Jesúsun jatu katuniaki, na janchadan

(Mt 4.18-22; Lc 5.1-11)

¹⁶Janua kai Galilea ianenwan kexa Jesúsun ketankubaini kakin baka nexenika dabe Simón inun jawen betsa Andrésin jatun jisin ewapa punteaibu jatu bechixun ¹⁷Jesúsun jatu katukin yuikin:

—Ea chibankanzun matun daya jenekanwen. Man jaska dayamisbudan, ana baka nexeama jakia man baka nexemis keska wakin yudabu en matu ichawamaxanaii, jau ea ikunwanxanunbunan— jatu wa ¹⁸januxun jatun xaxu inun jatun jisin jatun jaibu betsa yunu keyutan jawaida jenebaini Jesúsbe buaibun ¹⁹janua Jesús ana ketankubainkin Zebedeoan bakebu Santiago inun Juanen xaxunxun jatun jisin tadas ika junukin kexeaibu bechixun ²⁰Jesúsun jatudi katukin yuikin:

—Ea chibankubainkanwen— jatu wa ninkatan jabianu jatun ibu Zebedeo xaxu namaki jabun medabewamisbube bashibaini Jesús chibain budianibukiaki.

Juni yushin chakabu jaya Jesúsun kainmanikiaki, na janchadan

(Lc 4.31-37)

²¹Jatu jaska wabaina Jesúsbe bui mae betsa Cafarnaúm anu jikishinabun sábado juindukuntitan janu ichamisbu anu Jesús jikixun jatu yusiaín ²²Diosun jancha kenenibu jabun jatu yusinkin shinan chankanwainsma keskama Jesús xanen ibu kayabi kushipakin jatu yuiai yudabun ninkai e itan: “¿Jaskamen?” iki benimakubainaibun ²³jabianudi juni yushin chakabuya tsaua yushinen unanxubima bis imakin ²⁴yuimakin:

—Jesús Nazaret anuaan, ¿jaskai nuku anu min juxumen? ¿Nun yushin chakabu nuku yamawanun ika min juadaka? En mia unaín, min Diosun bake pepa medibidan— ikaya

²⁵yushin chakabu Jesúsun nemakin yuikin:

—Janua jaskama neseten ja juni anua kaindikaintanwen— aka

²⁶ja juni anua yushin chakabu kainkainkin unanxubimajaida sai imatan mai pusamatan duxku imatan kainkainaya ²⁷dasibibun uin

–Jabaa!– ike ikei yuinamekin yuikin:
 –Nadan, yusian betsa jayaki. Xanen ibu
 keska kushipajaidaki. Jawen jancha
 paepaki, yushin chakabu xunsa yunua
 ninkai jawen datei kainkanikikidan–
 itan ²⁸samama bui jakidi jatu banabimai
 chania akeakeaibun Galilea mai
 pakeanuxun Jesúskidi kakaibu dasibibun
 ninkabaunibukiaki.

**Simónen dais ainbu isin teneai Jesúsun
 xuxawanikiaki, na janchadan**

(Mt 8.14-15; Lc 4.38-39)

²⁹Janu ichamisbu jiwe anua Jesú
 kainkaini Simón inun Andrésin jiwe
 anu Santiago inun Juanbe buaibun
³⁰Simónen dais ainbu yuna tenei daka
 anu jikitan jaska isin teneaikidi jabun
 Jesú yuiabu ³¹jaki kemaxun metsunxun
 benitushia jawen yuna damaintan
 benimakin jatu duawakin bawaxun jatu
 pimaya

**Isin betsa betsapa teneaibu Jesúsun jatu
 xuxawanikiaki, na janchadan**

(Mt 8.16-17; Lc 4.40-41)

³²⁻³³janua ma badi kai meshuaya
 dasibi ja mae anu jiweabu Simón inun
 Andrésin jiwe anu ichai bekin dasibi
 isin teneaibu inun yushin chakabu
 jayabu Jesú anu iweaibun ³⁴isin betsa
 betsapa teneaibu ichapa xuxawakin
 yushin chakabu ichapayadi yudabu
 anua kainmapakenikiaki. Jaska wakin
 yushin ichapatun Jesú unainbuwen
 taexun Jesúsun jatu janchamamakin
 nemapakenikiaki.

**Jatun ichati jiwe tibi anuxun Jesúsun jatu
 yusinikiaki, na janchadan**

(Lc 4.42-44)

³⁵Janua uxashini ma penabiai
 meshuyuken Jesú butukaina mae
 dapi benanta Diosbe janchai ka jabe
 janchaya ³⁶Simón bestenkauan jawen

jaibaububetan Jesús benabaunkin
³⁷atimas jaki nukutan yuikin:

–Dasibibun mia benakanikiki– akabu

³⁸Jesúsun jatu yuikin:

–Diosun jancha yusinbaunun ika
 en kainkidanshinaki. Jaskawen
 taea mae betsa udama janudi yusin
 budinankanwen– jatu wabaini

³⁹Galilea mai pakea dasibi anu
 kakunkaunkin janu Diosun jancha
 ninkakatsis iki janu ichamisbu jatun
 jiwe tibi anuxun kakape yusinkin
 yushin chakabu yudabu anua
 kainmakubaunikiaki.

**Juni jawen yuda dasibiki chami betsani
 Jesúsun kaya wanikiaki, na janchadan**

(Mt 8.1-4; Lc 5.12-16)

⁴⁰Janua juni jawen yudaki chami
 betsani Jesúski nukutan danti ixun
 yuikin:

–Ea kayawakatsis ikin min ea
 kayawatiduki– aka ⁴¹jawen chamiwen
 datekin danankin tsuan metsakatsi
 isbumabiaken Jesú jawen dabanan ikin
 mexunkain mekin yuikin:

–En mia kaya waii– akaya ⁴²jawen
 chami sakada iki daxnukui keyuaya
⁴³Jesúsun nichinkin nemakin:

⁴⁴–En mia yuiai ninkaidawe.
 Jawada en mia axukidi tsua
 yuiyamayukubaintanwen. Jadi dukun
 kakin Diosbe nukunabu janchaxunika
 min yuda min ma kayaxu uinmatanwen.
 Jaska min ma kayaxu jau dasibibun
 mikidi unanunbun jawen jatu
 bepadanbainkin jabiaskadi inankuin
 Moisin yununi jatu anu buditanwen.
 Min jaska buaya min kayaxu jabun
 unanxankanikiki– abia ⁴⁵ninkama
 kaxun jaska Jesúsun axunxu juneama
 tsuabudaki nukua akeakekaini
 dasibibuki chaniaya xabakabi jamapai
 mae anu Jesú ana jikitiduma jadi tsua
 jiweabumanu besti niaketanaya mae

tibi anuxun yudabun Jesús uinun ika “¿Janimen?” iki yuka ibidan ibidani jaki ichanibukiaki.

Juni yuda babuni Jesúsun kaya wanikiaki, na janchadan
(Mt 9.1-8; Lc 5.17-26)

2 ¹Janua uxa eskadabes jawen mae Cafarnaúm anu Jesús katani jikiaya banabitán yuinamei: “Ma ana nenu juxukiaki”, ikaibun ²yuda ichapabu janu bei jaki xukui ana jani maputima jemaintin anu ika kai bestuabu ana jadakidi tukuama mapubaunabun Diosun jancha jiwe uke medanxun Jesúsun jatu yusianyan ³juni yuda babuni jawen baketiki daka juni dabe inun dabetur Jesús anu jawen dakatiki bakebidan ⁴janu yudan kaian xukuabuwen taea jaska watan bichibain Jesús uinmatima mai bawa jiwe sapa xeni mamaki inabain jawen dakatiki janu butenun, iwanan, janu bexpa wakin pudenkin xui watan janu ja juni yuda babuni Jesús anu buteaibun ⁵jaska jatun shinan ikunjaidawaibu unankin juni yuda babuni Jesúsun yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau ana shinanyamanun en mia buaxunai-akaya

⁶januxun Diosun jancha kenenibu yusinanamisbu bestibu tsauxun shinankin: ⁷“Ja juni chakabuki. Nuku padain Dios keskakatsi ikikiki. Diosun besti jawen chakabu buatiduki”, ikaibun ⁸⁻¹⁰januxun tsuan Jesús yuiamabia jatun shinan unankin Jesúsun jatu yuikin:

—Matunan, ejaskakin man shinan chakai ikai? ¿Jadatu bikamamen, jawen chakabu buaxunadaka? ¿Jawen yuda beniadaka? Ja dabe bikaken Diosun besti atiduwen taexun ejaskakin man shinanchakai? En matun Juchi Kayabi

Iyua na mai anua ea en jawen kushipa jayatun jawen chakabu en buaxuntidu man unanun en akai uinkanwen-iwanan, juni yuda babuni kaya wakin yuikin:

¹¹—Benitan min dakati bui min jiwe anu inun kadiwe— akaya ¹²jawen yuda damestentan benikauan jawen dakati bitan iabainaya mapubaunabun uinkin yuikin:

—Jabaa! Tsuan jaska waismaki. Jakia Dios pepajaidatun na juni ma kayawaxuki— iwanan, Dios kenwanibukiaki.

Jesúsun Leví katukin kenanikiaki, na janchadan
(Mt 9.9-13; Lc 5.27-32)

¹³Janua ana ianenwan kexa anu Jesús ka jaki yudan kaian ichabu jatu yusinbai ¹⁴janua kakin Cafarnaúm anuxun Romabun gobierno pei bixunmisbu jiwe anu Alfeon bake Leví jawen kena betsa Mateo tsaua Jesúsun bechitushitan yuikin:

—Ea chibankubainwen— aka Leví benitan chibankin taewabainaya

¹⁵⁻¹⁶janua chipu Jesús inun jawen tsumabun Levín jiwe anuxun piaibun jabianudi Roma xanen ibu pei bixunmisbu ichapa inun jabun fariseobun yusian ninkaisbuma ichapabun Jesúsun tsumabu jabubetan pidiaibun Diosun jancha kenenibu yusinanamis fariseobun Jesúsun jabubetan piai uinkin jawen tsumabu yukakin:

—¿Jaskakin matun yusinan pei bixunikabu inun ja juni chakabun nuku ninkaisbumabetan pimenkain? Chakabuki— ikaibu ¹⁷Jesúsun jatun jancha ninkatan jatu yuikin:

—“En peki”, iwanan, shinainbu anu juni dauty kaismaki. Jakia isin teneaibu anu besti juni dauty kenabu

kamiski. Jaskaken “En chakabuki”, iwanan, shinainbu jatun juinti pewakin medabewatanun ika en juxuki, juni dauya keskaidan. Jakia “En chakabumaki”, iwanan, shinainbu jatu medabewatanun ika en juamaki– jatu wanikiaki.

**Samakemisbun Jesús yukanibukiaki,
na janchadan**

(Mt 9.14-17; Lc 5.33-39)

¹⁸Janua Nashimanika Juanki chiti ikabu inun fariseobuki chiti ikabudi samakea bun juni betsabu Jesús anu kaxun yukakin yuikin:

–Juanki chiti ikabu inun fariseobuki chiti ikabu jatun chakabuwen taea jatunmebi ichakanikai samakekin jabun jawa piyuisbumaki. ¿Jamen jaskai miki chiti ikabu samakeama pikubainmisbumen?– akabu ¹⁹Jesúsun jatu yuikin:

–Juni ainyain nawaibu anu jawen jaibuaibu paxkadiabuma piama jatunmebi ichakanikatidubumaki. Jakia jatu xunubaini kaken manui jawen jaibuaibu samakekin piama iyutidubuki. ²⁰Jabiaskadi wakin ea achixun iyuaibun ewen nui en jaibuaibun piama idiaxankanikiki– iwanan,

²¹ana yusinkubainkin yuikin:

–En yusianan, tadi sera chukadiama keskaki. Matu yusinun ninkakanwen. Tadi xeni baxnekeaa tadi sera tuax chukadiamawen tadi xeni tsamian patsa estei ana baxnekemiski. Jamen matun yusianan, tadi xeni baxnekeaa keskaki. En yusianwen tsamian keska wakin matun yusian en pewatidumaki. ²²Ana jabiaskadi keskawen matu yusinun ninkakanwen. Bichi bishtu xeniki uva jene sera buspudiamma manekin mata waxun denex mestenwan jamebi katsai buspui bichi bishtu xeni pexemiski, vino sera inun bichi xeni benuidan.

Jabiaskadi wakin en yusian sera matun shinan xeni en jusitudumaki, benukinan– jatu wanikiaki.

**Sábado juindukuntitian Jesúsun tsumabun
xekiye bimi tsekanibukiaki, na janchadan**

(Mt 12.1-8; Lc 6.1-5)

²³Januxun ana sábado juindukunti betsation xekiwan banaimabu anu manan baiwen kakin jawen tsumabu Jesúsbe bukin xekiwan bimi tsekaxun pikubainaibun ²⁴fariseobun jatu uinkin Jesús yukakin:

–¿Jawai juindukunti sábadotian dayakanimenkain? Dayakin Diosun Moisés nuku nemamani min tsumabun kanekanikiki– akabu ²⁵Jesúsundi jatu yuikin:

–Bunikin jawada nukun xenipabu pepa Davidin jawen jaibuaibubetan anidan, ¿man uinsmamen? ²⁶Matu yuinun ninkakanwen. Abiatar Diosbe nukunabu janchaxunika xanen ibuaya Dios kenwanti tadi jiwe medan David jikixun ja medibi misi Dios uinmakin janakubainaibu Diosbe nukunabu janchaxunika jabun besti pitibiaken jawen Dios kenwanti misi David bunikin bixun pitan jawa dateama jawen jaibuaibudi pimadianiki. Jaska wabiaya Dios jaki sinatama iniki– jatu watan

²⁷jabianuxundi Jesúsun ana jatu yuikin:

–Juindukuntiwen yudabu bikawanun, iwanan, Diosun juindukunti wama iniki. Jakia jatu medabewanun, iwanan, juindukunti wakin Diosun yudabu axuniwen taexun ²⁸en matun Juchi Kayabi Iyuatunan, juindukuntitian jamapai betsa betsapa en atiduki– jatu wanikiaki.

**Sábado juindukuntitian juni meyushki
Jesúsun kaya wanikiaki, na janchadan**

(Mt 12.9-14; Lc 6.6-11)

3 ¹Janua ana ichati jiwe medan Jesús jikiaya juni meken meyushki jadi jatube jikia tsauken ²januxun jabun

jawen yusian danankin Jesús chitenun, iwanan, juindukuntitan ja juni mepeai uinun, ixun manai maniabun ³juni meken meyushki bechitan Jesúsun yuikin:

—Benikidan ja maniabu namakis niwe— aka benia niken ⁴ja dapi maniabu jatu yukakin:

—Moisin jancha pepa chibankin juindukuntitan, ¿jaska watimen? ¿Pewakin medabewatidaka?

¿Chakabuwakin ichakawatidaka? ¿Jawen jiwea meketidaka? ¿Jawen jiwea yamawatidaka?— jatu wa jabun jawa yuiama manixun ⁵yuinamea akeakekin jatun shinan bikawaiabun Jesús ninkakatsis ikabumaken janua Jesús sinatai juinti nishmaxun jatu uinkin keyutan ja juni meken meyushki yuikin:

—Min meken meshanwen— aka meshanyan jawen meken ma mepekei peaya ⁶fariseobu kain keyubaina judio xanen ibu Herodeski chiti ikabube icha jaska waxun Jesús tenantimen ika yuinamei yubakai taenibukiaki.

Ianenwan kexa anu Jesús kaken yudan kaian jaki ichanibukiaki, na janchadan

⁷Janua Jesús jawen tsumabube ian kexa anu kaya yudan kaian Galilea anuabun jatu chibainbun ⁸januxun jamapai betsa betsapa Jesúsun akai ninkabidanbidanaibun uintanun ika bei, Judea anua bei, Jerusalén anuadi bei, Idumea anuadi bei, Jordán jene kexa betsaudiadi bei, Tiro inun Sidón anuadi beake beakeaibun ⁹⁻¹²isin teneaibu ichapa xuxawashinken jabundi jawenabu isin teneabudi iwekin Jesús mematanun ika bei jaki ichai keyuabun jabianudi yushin chakabu yuda medan jiwexun Jesús uintan ja yuda Jesús anu danti imatan jancha kushipawen yuimakin:

—Madian, min Diosun bake kayabiki— ibidan ibidanaibu jatu janchamamakin:

—Janua ekidi jaska janchama kainkanwen— jatu wapakekin Jesúsun yushin chakabu jatu nichiaiwen taea ana jaki ichai texke ikaibu uinkin jatu dapaxkabainun, iwanan, jawen tsumabu yunukin:

—En xaxun inai ea xutukanxun xaxu pewai bukanwen— jatu wanikiaki.

12 junibu kushipa wakin Jesúsun jatu katunikiaki, na janchadan
(Mt 10.1-4; Lc 6.12-16)

¹³⁻¹⁵Xaba betsati mananan mati anu mapekexun Jesúsun jaki chiti ikabu betsabu kenakin:

—Ea anu bekanwen— jatu wa bei jaki ichaibu 12 juni besti katukin yuikin:

—Matu yusinun tapin ebe bukubainkanwen. Kakape ekidi man jatu yuikubainxanunbun jancha kushipawen yunutishada wakin en matu yunuaii, man en kushipayabu wakin matu kenakinan. Jaska bitan isin teneaibu man jatu xuxawakubainxanunbun inun, yushin chakabu jayabu man jatu kainmadiakubainxanunbun en matu yunuaii— akin ¹⁶ja 12 junibu katukin Simón, kena betsa wakin Pedro watan ¹⁷Zebedeo bake dabe Santiago inun jawen betsa Juanbe ana jatu kena betsa wakin Boagnergues, juni kuin janchadan, Kana Tin Ikainkainmis Keskatun Bakebudan, jatu watan ¹⁸Andrés inun, Felipe inun, Bartolomé inun Mateo, jawen kena betsa Leví, inun Tomás inun, Alfeon bake Santiago inun, Tadeo inun Simón, ja Roma anua xanen ibubu jatu danankin jatu nichinkatsis imis ¹⁹inun, Judas Iscariote, jatun Jesús chipu jatu achimaxanaidan, jati katunikiaki, Jesúsun tsumabudan.

Jesús Beelzebún kushipa jayaki, iwanan, ja akin chitenibukiaki, na janchadan
(Mt 12.22-32; Lc 11.14-23; 12.10)

²⁰Janua jatu jaska wabidani jawen tsumabube jiwe betsanu Jesús

jikiken ana yudan kaian jaki ichabu janixun Jesús inun jawen tsumabun pitidubumaken ²¹Jesús jaskai jawen ewa inun jawen betsabun ninkatan yuinamei:

–Unainsmapai tidumai ikikiki. Inun bukanwen– ibidanaibun

²²janua Jerusalén anua Diosun jancha kenenenbu yusinanamisbun uinkin Jesúskidi yuikin:

–Na junidan, yushin chakabu xanen ibu Beelzebún kushipa jayaki. Jaska bestiwen taexun yushin chakabu jatu kainmaikiki–ikaibu ²³ninkatan Jesúsun jatu ichawaxun eska miyuiwen jatu yuikin:

–Satanásan ibubis jawen yuda Satanás kainmatidumaki. ²⁴Miyuiwen matu yusinun ninkakanwen. Mae betsa anua nawabu jatunmebi paxkatan detenamei jatun yuda debui keyumisbuki. ²⁵Jaska inun, yudabu jawenabuyas paxkatan jatunmebi duanameama sinatai jiwea petidubumadiki. ²⁶Jaskaken Satanásan jawenabu kainma jawen yuda punu nukai babui keyukeanai.

²⁷Jabiaskadi wakin tsuanda juni kushipatun jiwe anu jikiton yumetsunun, iwanan, jawen tae inun jawen meken dukun neatan jawen mabu yumetsutidubuki. Jamen eanan, jaska keskadi wakin Satanás maemakin jawen kushipa mebintan en binutiduki– jatu waya

²⁸⁻³⁰Diosun jancha kenenenbu yusinanamisbun yuikin: “Min yushin chakabu jaya iki ikaii”, akaibuwen taexun Jesúsun jabu yuikin:

–Chanima en matu yuiai ea ninkakanwen. Yudabun jabun chakabu betsa betsapa inun jabu Dioski xechakamisbu Diosun jatu jakimawakin jatun chakabu jatu buaxuntiduki, pewakinan. Jakia matu keskakin tsuanda jawen Yushin Pepa danain jaki xechakamisbu jatun chakabu jatu buaxuntaskama iyanikiki– iwanan,

Jabu jawen ewa kayabi inun jawen betsabu kayabikidi Jesúsun jatu yusinikiaki, na janchadan
(Mt 12.46-50; Lc 8.19-21)

³¹Jesúsun jatu yusinkin keyudiamaken jemaintin anu jawen ewa inun jawen betsabu jabe janchanun, iwanan:

–Jesús ea yuixunkanwen– jatu wa ³²ja dapi tsubaunxun Jesús yuikin:

–Min ewa inun min betsabun unu jemaintinxun mibe janchanun ixun mia kenakanikiaki– akabu ³³Jesúsun jatu yukakin:

–¿Tsuabumen, en ewa inun en betsabudan?– iwanan, ³⁴ja dapi tsauabu uinbaunkin jatu yuikin:

–Na jabis ea dapi manixun ea ninkaibuden, jabiabu en ewa kayabibu inun en betsa kayabibu inun en pui kayabibuki, na jabiabuden. ³⁵Ja inun, Diosun jancha tsuabunda ninkatan ikunwankin jabun chibancainkin axuainbudan, jabiabu en betsabu inun, en puibu inun, en ewabudiki– jatu anikiaki.

Jexe banakidi miyuiwen Jesúsun jatu yusinikiaki, na janchadan
(Mt 13.1-9; Lc 8.4-8)

4 ¹⁻²Ianenwan kexa anuxun Jesúsun ana jatu yusinkin taewaya yuda ichapabun ninkanun ika beabu ianenwan kexa anu dasibi tsauxun ninkaibun ian kexa xaxu namaki Jesús tsauxun miyui betsa betsapawen jamapaikidi jatu yuikin:

³–Miyuiwen matu yusinun ninkakanwen. Juni betsa jawen bai anu xekikan jexe sa aki kaxun ⁴sa akubaina jexe betsa janu katì bai namaki nidi aka peiyabu bexun keyu xeabun ⁵jexe betsa mishki ewapabu mania anu mai eskadabes bemanchimea anu kauanadan, jawaida pexei benekaunaya ⁶badi jui

kukin jawen tapun bemakis bewexekea kua utsi xanamiski. ⁷Ja inun, jexe betsa muxa jukundiamanu nidi aka xekiwan beneai muxa jukunkin yabua jaskatan bimitidumaki. ⁸Jakia jexe betsa mai pepa anu nidi aka benei bimi ichapajaida jayamiski, jexe betsa yumetan 30 jexeyai inun, jexe betsa yumetan 60 jexeyai inun, jexe betsa yumetan 100 jexeyaidan– iwanan, ⁹ana jatu yuikin:
–Man pabinkiyabuki. Ninkatan jakimayamaxankanwen– jatu wanikiaki.

Jexe miyuikidi xabakabi Jesúsun jatu unanmanikiaki, na janchadan
(Mt 13.10-23; Lc 8.9-15)

¹⁰Janunkain yudan kaianen ma Jesús jenebainabun ja mesti tsauken jawen 12 tsumabu inun jaki chiti ika betsabun jaska miyuiwen jatu yusinxu yukabu–
¹¹Jesúsun jatu yuikin:

–Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaikiki. Jakia jabun Diosun jancha ninka bestiaibu miyuiwens besti en jatuki chanikunkainai, ¹²jabun chakabu Diosun jatu buaxunkatsi ikamawen taexun ninkabiakubainkin jau xabakabi ninkayamanunbun inun uinbiakubainkin jau jatun chakabu bexteketan Dios ikunwanyamanunbunan– akin

¹³–¿Jaska jancha juneawens en jatu yusinxudan, man ninkama ixumen? ¿Dasibi miyuiwen en matu yusianan, man daka tapinkin ninkama ikubainkanai?– iwanan, ¹⁴ana jatu yuikin: –Miyui jexe nidi akakidi matu xabakabi yusinun ninkakanwen. Juni betsan Diosun jancha kenenibu yusinanamisdan, jexe sa aka keskaki.
¹⁵Ja jexe betsa jawen kat i bai namaki nidi ikadan, yudabun Diosun jancha ninkabiaibun jamakidia Satanás juxun jawen jancha pepa ninkatanais

mebinmiski, jakimawakinan. ¹⁶Ja inun, jexe betsa mishki ewapabu mania anu mai eskadabes bemandchimea anu nidi akadan, tsuanda Diosun jancha ninkakin taewai benimabiaya ¹⁷shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki. ¹⁸Ja inun, jexe betsa muxa jukundiamanu nidi akadan, yuda betsabun Diosun jancha chiban taewabiai ¹⁹jamapai jawen jiweawens kemui jeneama jawens besti nuichakayamakin Diosun jancha ninkabiakin ana tapinkatsi ikama mabuwens besti kemui icha bestiwanun ika pepaisbumaki, jaskatun yabua jancha pepa chibanma yudabu miban bimiuma keskabuidan. ²⁰Jaska inun, jexe betsa mai pepa anu sa akadan, Diosun jancha ninkaxun yuda betsabu jatu yusinkin ikunwanmamisbuki, mai pepa anu jexe nidi aka ewai benei bimiai betsa 30 jexeyai keska inun, betsa 60 jexeyai keska inun, betsa 100 jexeyai keskadan– iwanan,

Bin dekutan xabakabi tsautikidi miyuiwen Jesúsun jatu yusinkikiaki, na janchadan
(Lc 8.16-18)

²¹Jesúsun ana jatu yusinkin:

–Bin dekutan ji bau medan junetima inun tapu naman tsautima man unaiin. Jakia bin dekuxun jau jawenabu jikikin uinshanadanunbun manaundi tsauñmisbuki. ²²Jaskaken jawada en matu yusinkubainai yuda betsabu jatu yusinkin juneyamakubainxankanwen. Jaska inun, jamapai tibi junekin man jatu axuanmadan, dasibi Diosun jatu xabakabi waxunkin keyuxanikiki. ²³Jaskaken man

pabinkiyabunan, na jancha ninkatan jakimayamakubainkanwen– iwanan,
²⁴januxun ana jatu yusinkin:
 –Man yuda betsa medabewakin pewamis jabiaskadi wakin Diosun matu manakukin pepawendi man amis keskama ana matu binumaxanikiki. Januxun man jatu medabewachakamis jabiaskadi wakin Diosun matu inanchakadiakin manakukin pemawendi matu kupixanikiki, nuitapawakinan.
²⁵Jaska inun, tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda eskadabes ninkabiakin ea chibainsbuma ja eskadabes en jatu mebinxanaii, jakimawakinan– iwanan,

Miyuiwen yunu bana ewamiskidi Jesúsun jatu yusinikiaki, na janchadan
²⁶jaska keskai na mai anua Dios xanen ibumiskidi Jesúsun ana jatu yuikin:
 –Dios xanen ibuidan, eskamiski, matu yusinun ninkakanwen. Junin xekiwan banatanima ²⁷uanmas uxa ichapa binutan janua xekiwan jukuin yumei ewamiski. Jaskai yumeai ja junin unanmabiaken ²⁸main yunu benemakin ja dukun jawen pei kainmakin ewa wakubauna ja kachu jawen taxudi kain ewatan janua juatan bimiai beduyai kanimiski. ²⁹Janua chushiaya ibuan tsekakin mextekian ichawamiski. Jaska keskadi wakin Dios ikunwainbu ichawadiaxankanikiki– iwanan,

Jexe pexemishtinkidi Jesúsun jatu yusinikiaki, na janchadan
^(Mt 13.31-35; Lc 13.18-19)

³⁰ana Jesúsun jatu yuikin:
 –Dios xanen ibu jaska keskamiskidi miyui betsawen ana matu yusinun ninkakanwen. ³¹Miban betsa mostaza jexe pexeishtajaidabia ³²mai anu bana bestibiabu ewakin miban betsa tibi

binumiski. Jaska inun, jawen punyan ewapashinaki peiyabu jaki juindukuin utamisbuki. Dios xanen ibuidan, jaska keskadiki– iwanan,

³³⁻³⁴yuda dasibibu jancha junea miyuiwens Jesúsun jatu yusinkin jawada ninkatidubu jatu yuia akeakeaya januxun jawen tsumabun jawa xabakabi unankin tapindiabumaken miyuiwens jatu yusinshina januxun jawen tsumabu Jesúsun jatu yui tapinmakin jatu xabakabi yuinikiaki.

Niwewan kushipajaida inun ianenwan buspu tsaubidanai Jesúsun nemanikiaki, na janchadan

(Mt 8.23-27; Lc 8.22-25)

³⁵Janua badi kai meshuaya jawen tsumabu Jesúsun yuikin:

–Ianenwan kexa betsaudi buyanankanwen– jatu wabaini
³⁶januxun yudan kaian xunubaini Jesús jawen tsumabube xaxun inatan xutubaini buaibun janua xaxu betsawen chibain jabe budiaibun
³⁷janua niwewan kushipajaida besubainaibukidia bekin jene buspu tsaubidankin xaxu jene mata waya
³⁸Jesús jawen tedatametiki xaxu chixukidi daka uxaken jawen tsumabu datekin bestenwantan yuikin:

–Yusinaan, nun jikiidan, ḡmin nukuwen dabanan ikamamen?– akabu

³⁹janua Jesús bestenkauan benitan niwewan kushipa inun ianenwan nemakin:

–Peswe. Nesewe– aka niwewan main neseaya ianenwandi buspu tsaubidanai main neseaya ⁴⁰Jesúsun jatu yuikin:

–¿Jaskai man dateai? Ea shinainan, man dateama ikeanaii– jatu wa

⁴¹e iki dateyabi yuinamekin:

–Na junidan, ḡjawa junimen? min atidumakidan, niwe inun ianenwanendi ninkakanikikidan– ibaini bui

Gerasa anu kaxun Jesúsun juni yushin chakabu jaya kainmanikiaki, na janchadan
(Mt 8.28-34; Lc 8.26-39)

5 ¹janua ianenwan kexa betsaudi Gerasa mai pakeanu Jesús kai keti itan ²xaxu anua bututan jawen tsumabube mapekekainaya janu mawabu maiwamisbu anu juni yushin chakabu jaya Jesús bechitan juaya ³⁻⁴ja juni yushin chakabu jaya jawawen jaska watima mane dispiwen nexakin mestenwanbiakubainabu jawenchains mane dispi nasakin tesaya jawen tae tanexkin inun jawen meken menexbiabu dasibi pekakin ja mane dispi tesakin chudi mishtinwakin keyuaya ana jaska waxun tsuan nematidumadan, ⁵janua meshu medan inun badidi nia sai ikin mawabu maiwamisbu anu inun mati anua sai idiae inun mishki maniaki ibubis tin tin iki dachakamemisken ⁶jakia Jesús chai juai bechibidanu kushi chakayamakidan ja dapi danti ikaya ⁷⁻⁹Jesúsun yuikin:
 –Yushin chakabuun, ja juni anua kainwen– atan yukakin:
 –Jadakidi min kena ikai?– aka yuikin:
 –En kenadan, “Ichapajaida En Jayaki”, en yushin midimayadan– iwanan, sai ikin jancha kushipawen yuikin:
 –Jesúsuun, min Dios kushipajaidatun bakedan, en unaiin. Diosun nuku uianyan nukudan, kupikin nuku nuitapawayamawe!– itan sai ikin ¹⁰ana yushin chakabun Jesús ea akin yuikin:
 –Nun nanta kakatsi ikamaki. Nuku nanta nichinyamawe– iwanan, ¹¹ja mati anuxun ina yawa ichapabun piaibun ¹²yushin chakabun uintan ea akin yuikin:
 –Ja ina yawa anu nuku nichinwen, ja medan nun jikinunan– akabu
¹³januxun Jesúsun jadi jatu yunua ja juni anua kainbaini ina yawa medan

jikibainaibun ja ina yawa 2,000 datei mawa keyatapa butei nidi ibaini ianki pukui jasai keyuaibun

¹⁴janua ja ina yawa mekenikabu datei kushibainkin mae tibi anu jiweabu inun bai puchinin jiweabu jatu banabima akeakebainaibun yuda ichapabun ninkatan uin beaibun ¹⁵⁻¹⁶janu Jesúski nukuxun ichapajaida ja juni yushin chakabu jaya ikunkidanshina ma tadi sawea ana unainsmapa keskama janu Jesúsbe tsaua ana jaska dabanan ikin datekin ja juni jaskaxu jabun uintan jatu yuikin ja yushin chakabu ina yawa medan jikibainxu chaniaibun ¹⁷ninkatan ja mae anuabun mesekin Jesús nichinkin:

–Nukun mae anua kadiwe– akabu

¹⁸janua Jesús xaxun naneaya janua ja juni yushin chakabu kainmaxutun Jesús ea akin yuikin:

–¿Mibe kapa?– aka ¹⁹nemakin yuikin:

–Ebe kayamawe. Jakia minabu anu kaxun jaska Dios miwen nuikin yushin chakabu mia kainmaxu minabu yuiditanwen, jau miwen benimadinunbunan– abaini kaya

²⁰januxun ja juni yushin chakabu jaya Jesúsun kainmabaina kaxun nawa betsabun mae Decápolis yuiadian, juni kuin janchadan, Mae Meken Dabeti anu kaxun ja juni jaska Jesúsun duajaidawakin ja yushin chakabu kainmabainxu jatuki chanikunkainaya ninkai dasibi benimai Jabaa! iki keyunibukiaki.

Ainbun jimi baxneni neseisma Jesúsun mainwantan Jairon bake mawa bestenwanikiaki, na janchadan
(Mt 9.18-26; Lc 8.40-56)

²¹Janua Jesús ianenwan kexa betsaudi katani ana jawendi chintunkidani jui keti ikaya janua ian kexa anu yudan kaian Jesús uinun ika bei ichabidanbidanaibun

²²janua janu ichati jiwe mekemis xanen ibu betsa jawen kena Jairon Jesús bechibidani juxun danti ixun ²³ea akin yuikin:

–En bake ainbu mawakatsis ikikiki. Ebe kaxun en jiwe anuxun uinkin jau xuxanun ea mexuniyuwe– aka

²⁴janua Jesús jabe kaya yudan kaandi jabedi bukin Jesús nashui akin texke abainaibun ²⁵janua ainbu jimi baxneni ja isin tenei ma 12 año kabia jawa neseisma badi betsa tukama ikunkainmis ²⁶janua nuitapaya juni dauyabun jau ea xuxawanun, iwanan, jawen pei dasibi putakin keyubia jawa maianma ikunkaini jakia ana pikujaidakin ²⁷⁻²⁸Jesúskidi janchakin yuaibu ninkatan ja yudan kaian supu ibaini jabe buaibu anu ja ainbu isin teneya chipu kakin: “Jawen tadi kexa besti mea en xuxatiduki”, iwanan, shinambaini kakin nashui ikain Jesúsun tadi kexa metsatushia ²⁹jawaida jawen jimi nesei maintan: “Ma en xuxaxubiin!” iwanan, shinanyan ³⁰jawen kushipa kainkain tsuada ma xuxaxu Jesúsun unankin yudan kaian jachun beaibu uinbaunkin Jesús niti itan jatu yukakin:

–¿Tsu man en tadi metsaxumen?–
jatu wa

³¹januxun jawen tsumabun yuikin:
–Na yuda ichapa bei miki supu ibidankin mia akanikiki. Tsuan mia axu nun unanmaki– akabu ³²jatun Jesús metsaxu ainbu uinun ika nasaukekauanaya ³³ainbun unain datei saki saki ikin jawada Jesúsun axu unain ja bebun danti itan xabakabi Jesúski chaniaya ³⁴Jesúsun yuikin:

–Ainbuun, min ea ikunwanyan en mia xuxawaxuki. Ana isin teneama unanuma kai pediwe–

³⁵aki niken janua Jairon jiwe anua jawen tsumabu bexun Jairo yuikin:

–Min bakedan, ma mawaxuki. Ana juni yusinan daketapa wayamawe– akin ³⁶yuaibu Jesúsun ninkakin Jairo yuikin:

–Dateama ea besti ikunwankubainwen– abaini kakin ³⁷janua Pedro inun Santiago inun jawen betsa Juan besti Jesúsun jatu iyukin ³⁸Jairon jiwe anu jabe buaibun janua jancha biski ikaibu ninkakin yuda ichapa kaxai sain iki bau bau ikaibun ³⁹janua Jesús jatu anu jikikain yuikin:

–¿Jaskai e iskaun kaxai man biski ikanai? Jawen bake mawa kayabiamaki. Uxaki– jatu waya ⁴⁰januxun Jesúsun jaska yuiai yuda ichapabun usanbaunaibun januxun Jesúsun jabu kainmatan jawen epa inun jawen ewa inun jawen tsumabu jabe buabube ja ainbu bake janu daka anu dintu medan jikikain ⁴¹metsunxun yuikin:

–Talitá, cum– iwanan, nukun janchadan –Chipashaan, beniwe– aka ⁴²jawaida ja chipash 12 badiya benikaunaya jawen ibubu inun jawen tsumabu e itan yuikin: “Jabaa!” ikaibun ⁴³januxun Jesúsun jatu nemakin jau tsuki chaniyamayununbun ana yuikin:

–Matun bake pimakanwen– jatu wabainikiaki.

**Nazaret anu ana Jesús chintunkidanikiaki,
na janchadan**
(Mt 13.53-58; Lc 4.16-30)

6 ¹Janua Jesús jadi katani ana jawen mae janua yumeni anu jawen tsumabube jikishinabun ²sábado juinduktitian janu judiobu ichamisbu anuxun jatu yusinkin taewaya juni ichapabun ninkai e itan Jabaa! iki yuinamei:

–¿Na junidan, janixun jaska tsuan jawen kushipa tapinshinamen, ja atimaska nun atiduma aki unanepajaidaidan?– iwanan ³–Jakia nadan, ji mabu wanikaki. Jawen ewadan, María inun, jawen betsabudan, Santiago inun, José inun, Judas inun, Simónki. Janua jawen puibudan, nenu nukube

jiwediabuki– itan ikunwanma danainbun
⁴Jesúsun jatu yuikin:

–Diosun jancha yuixunika juxun yudabu jatu yusianyan betsa betsapabun ninkakin duawaibun jakia jawen mae anu kaxun jawenabudi jatu yusindia jabun jawen jancha danainbun jabiatiandi jawen jiwe anuabu inun jawenabu betsabun danandiamisbuki– jatu watan ⁵januxun isin teneaibu eskadabes jatu mekin jatu xuxawatan jawada atimaska Jesúsun ana jatu axunkin jatu uinmama ⁶jaska jatufen nuikin yusinbia jabun ikunwanbumawen taea jointi nishmai e inikiaki.

Jesúsun jawen tsumabun jau jatu yusintanunbun dabe tibi yununikiaki, na janchadan
^(Mt 10.5-15; Lc 9.1-6)

Mae udama jiweabu tibi besti anu kakunkaunkin Jesúsun jatu yusinkubauntani juxun ⁷januxun jawen 12 kushipayabu kenaxun yushin chakabu kainmati kushipa jatu yunukin juni dabe tibi yunua akeakekin yuikin: ⁸–Kaidan, man eska baintanunbun matu yuinun ninkakanwen. Mais butankanwen, jawa buamadan. Jakia matun mestenti besti man butiduki. Ja inun, misi inun, kapankan inun, jaki pei aduti buyamaxankanwen. ⁹Matun tae pewetametia inun sanpu ma saweaya besti bukanwen, ana betsa buamadan– akin ¹⁰ana jatu yuikin:

–Kadan, jiwe bestichai mae tibi anu jiweyuxun yusinkubaintankanwen. Januxun yusinkin menetan mae betsa anudi maekubainxankanwen. ¹¹Jaska inun, janixunda matu danankin ninkakatsi ikabumaken Dios jatuki sinatai unanti wakin janua kainbainkin matun tae anua mai kudu jatuki tabainxankanwen, jau jabiaskasi maninunbunan, jawa unanmadan– jatu

wa ninkatan ¹²janua jawen tsumabu buake buakexun dabe tibi kaxun jatu yusin taewakin:

–Dioskidi man chakabumis jenetan matun shinan betsa wadikanwen– jatu wakin ¹³yushin chakabu kainmakin kaya wakubainkin isin teneaibu xeniwen dapuxkin jatun isin mainwankubaunibukiaki.

Nashimanika Juan tenanibukiaki, na janchadan
^(Mt 14.1-12; Lc 9.7-9)

¹⁴Janua jawada Jesúskidi chania akeakeaibu xanen ibu Herodesin ninkatan jawen tsumabu yuikin:

–Nashimanika Juan mawashina ana bestenshinxun jawen kushipa Jesúski maewa jatun jawen kushipawen atimaska jawa nun atiduma Jesúsun jatu uinmaikiki– ikaya

¹⁵januxun juni betsan jawen shinanen yuikin:

–Ja Jesúsdan, Elías ana jushianki. Elías ikibikain– ikaya betsandi yuikin:

–Ja Diosun jancha yuixunika nukun xenipabube jiwepauni betsaki, ja Jesúsdan– ikaibun

¹⁶Herodesin jatu ninkatan yuikin:

–Jabaa! Juan en jatu yunua texteimabudan, ma bestenshinamenkain– inikiaki.

¹⁷⁻¹⁸Herodesin eska shinankin anidan, matu yuinun ninkakanwen. Badi betsatian Herodesin jawen betsa Filipon ain Herodías mebinmaken Juanen nemakin yuikin:

–¿Jaskakin min betsan ain mebintan min ainwainmamen? Jaskatimajaidaki. Ainwanyamawe– akubainaya atimas jawen ainkidi shinain jenekatsi ikama nuikin xanen ibu Herodesin jawen policiabu yunua Juan achixun mane dispiwen menextan bichiti jiwe medan bichiabun ¹⁹xanen ibun ain Herodías

Juanki sinatakin jatu tenanmanun ikaya²⁰jakia Herodesin jaska Juan juni pepa unankin jawen ain nemakubainkin dasibi jawen yusian ninkabiakubainkin jawen shinan pewadiama ikunkainaya²¹janua jawen badi janu kaini taxniaya januxun jatu beyusmakin nawamakatsis ikin jabu jatubetan yunumisbu inun, soldadobu xanen ibubu inun, Galilea anu pei ichapayabu jawen jiwe anu jatu ichawaxun jatu pimaya Herodíasin jawen bene padankin Juan jatu tenanmakatsis ikaya²²Herofasin bake chipash jatu nawaxunkin xanen ibu Herodes inun ja jatu pimakin ichawa jatu benimawaya Herodesin jawen aniya yuikin:

—Jawada min ea yuka en mia inanxanaii– iwanan,²³yubakin ana yuikin:

—Jawada betsa betsapa min ea yuka nukun mai pakea namakis paxkaxun en mia yunutiduki– akaya²⁴ninkatan chipash nawai mainkaini kaxun jawen ewa Herodías yukakin:

—Ewaan, ĥawa yukatarpa?– aka jawen ewan yunukin:

—Nashimanika Juan jatu textemaxun jau mia jatu bemaxunun ja ea atanwen– aka²⁵jawen epa xanen ibu Herodes anu jawaida ana jikikain yuikin:

—Na jabiatian Nashimanika Juanen buxka ea inandiwe, sapa kenchakidan– aka²⁶jawen juinti metexekei punu nukatan Nashimanika Juan tenankatsi ikamabia ja jatu pimaibu bebunxun jawen aniya ma yubai ninkakanxunwen taexun jawen yuba binumakatsi ikama²⁷jakimamadi ja soldado bichiti jiwe anu jau katanun xanen ibun yunukin:

—Juanen buxka textexun ea bexuntanwen– aka²⁸soldado kaxun bichiti jiwe medanua Juan textetan jawen buxka sapa kenchaki nanebidan bexun ja chipash inan ja chipashan

jawen ewa inanikiaki.²⁹Jaska wakin Juan tenankanxu jawen tsumabun ninkatan bexun jatu yukatan jawen yuda bibain maiwati anu maiwanibukiaki.

**Jesúsun yudan kaian pimanikiaki,
na janchadan**

(Mt 14.13-21; Lc 9.10-17; Jn 6.1-14)

³⁰Janua jawen kushipayabu yunua butani Jesúski ana jaki dasitan jaska wakubauntanshinabu Jesúski chania akeakei meneabun³¹yudan kaian Jesúski ichabu janixun jawen tsumabun pitidubumaken Jesúsun jatu yuikin:

—Benanta jatu dapaxkabain jadia juindukunyunun bukanwen– jatu wabaini³²janua Jesúsun jawn tsumabubes xaxun inatan kai janu tsua jiweabumanu buaibun³³jakia Jesúsun jatu jenebaini kakin mae tibi dunkebainai uin Jesúsun dunkenanain bechibaini chibain kushibaini mae bestibu tibi anuabudi bui Jesúsun jikidiama jabu dukun bebunkidi jikia maniabun³⁴Jesúsun xaxuwen kai keti itan xaxu anua butukainkin yudan kaian uin jatuwen nuijaidakin jabu chaxuwan uinikauma keskabuwen taea jatuwen dabanan ikin jatu yusin taewaxun betsa betsapawen jatu yusinbaiaya³⁵janua ma badi kaya jawen tsumabu Jesúsun dapi buxun yuikin:

—Ma badi kaikiki. Nenu tsua jiweabumaki.³⁶Na yudan kaianen jabun jania pitidubumaki. Ja mae udama tibi anua jau misi bixun pitan jau jaskadabaintanunbun jatu nichindiwe– akabu³⁷Jesúsun jatu kemakin nemakin:

—Jaska jatu wama, matun jatu pimakanwen– jatu wa januxun jawen tsumabun yuikin:

—¿200 día nun dayai peiwen jatu misi bixuntanpa, jau pinunbunan?– akabu³⁸Jesúsun jatu yukakin:

—¿Jati misi man jayamenkain?
Uintankanwen– jatu wa buxun uintanxun yuikin:

-Meken besti misi inun baka dabe besti nun jayaki- akabu ³⁹januxun jawen tsumabu Jesúsun yunukin:

-Jatu ichawa akeakekanwen. Ja basiki jau tsanunun bun jatu yunukanwen- jatu wa ⁴⁰jatu yunuabu jatidi xuku betsai 100 inun jatidi xuku betsai 50 mania akeakebaunaibun ⁴¹Jesúsun ja misi meken besti inun baka dabe tsumaxun naiudi teskanxun uinkin pitikidi Dios kenwantan misi tunke tunke apakekin jawen tsumabu inankin jatu yunua ja yudan kaian inanbaunaibun januxun baka dabedi jatu inan jadi jatu inan keyuabu ⁴²dasibibun yani wai benimai pepeaibun ⁴³⁻⁴⁴janua ja misi meken besti inun baka dabe ja dabe jatu paxkaxuna 5,000 junibun pikin texe wakanxu ichawakin 12 kuki jawen tsumabun mata wanibukiaki.

**Jesúsun ian bemaki bepai kainikiaki,
na janchadan**
(Mt 14.22-27; Jn 6.16-21)

⁴⁵⁻⁴⁶Janua nuku dukun bebunkidi ianenwan pukei Betsaidaudi nun jawen tsumabu kanun xaxuwen nuku yunua nun kaya yudan kaiandi jatu nichinbaini mati anu ka Diosbe janchanun ika ka Jesúsun ja mesti niken ⁴⁷meshu medan jawen tsumabu ianenwan namakis bui nunubainaibun Jesúsun ja mesti main nixun uiainyan ⁴⁸jawen tsumabun xaxu tuein bikaibun niwegian bekin xaxu chixtekidi butan butanaya ma pena kemaya Jesúsun jatuki nukuyui ian bemaki bepaikidankin jatudainbaini ⁴⁹ja ian bemaki kaya uin yushin dabanan sai iki ⁵⁰dateibun Jesúsun jatu janchawakin:

-En eaki. Ewen dateyamakanwen- jatu watan ⁵¹janua jawen tsumabuki xaxun inaya niwegian ian bechudunwain maianyan jabu jadakidi shinantima jatu wa Jabaa! iake iakekin ⁵²Jesúsun jaska jatu misi pimai uinbiabidankanxu jawa

jatun shinan xabakabidiabuma jaska tapindiabuma inibukiaki.

**Genesaret mae anuabu isin teneabu
Jesúsun jatu xuxawanikiaki, na janchadan**
(Mt 14.34-36)

⁵³Janua ianenwan pukei besusi bupananbun niwen jamakidi jatu bukin xutua mae betsa Genesaret anu keti itan jatun xaxu nexatan ⁵⁴janua butubainaibu yudan kaianen Jesúsun unantan ⁵⁵mae kesua anua kushibidankin isin teneabu jatun baketiki bakebidankin Jesúsun anu jatu iweabu ⁵⁶janunkain mae udama tibi anua inun bai puchinin jiweabu anua isin teneabudi bai tanamabidankin januxun jau Jesúsun tadi metsanun, iwanan, jatu Jesúsun ea axuanbu jawen tadi kexa ja isin teneabun metsatan dasibi main kaya akeakenibukiaki.

**Jawada atimapu nun shinanmistun nuku
chakabuwamiskiaki, na janchadan**
(Mt 15.1-20)

7 ¹⁻⁴Fariseobu inun judiobu dasibibun jatun xenipabun beyakidi matu yusinun ninkakanwen. Jabun xenipabun beya tibi chibankin fariseobu inun judiobu dasibibun pidiamma mepanui taemisbuki, chakabu nemaidan. Jaska inun, piti bitani jui jikiton jawen beyawen taea jatu meuxkeabu mepanukubainmisbuki. Jaska inun, jatun xenipabun beya betsa betsapa chibankin jatun kencha dachukin jatun shumu napankin jatun mane kencha dachukin jatun dakati unpaxwen bewash bewash atan tede amisbuki. Jaska jatun xenipabun beya chibankin akeakekubainmisbuki.

Jaska wamisbuwen taea fariseobu inun Diosun jancha kenenibu yusinanamisbu Jerusalén anua beshianbu Jesúski kemaxun uinkin jaska jatun xenipabun beya chibankin Jesúsun tsumabun

pidiam mepanuabuma piaibu uinkin jatu yuankin ⁵Jesús yukakin:

—¿Jaskakin min tsumabun nukun xenipabun beya chibanna mepanuma pikani menkain?— akabu ⁶⁻⁷Jesúsun jatu yuikin:

—Man yusinmis keska akama man bepadamemisbukidi chanima bebunkidi Diosun matukidi yuikin:

‘Na yudabunan, jatun janchawen ea kenwanbiakin
jatun juintiwen ea shinainsbumaki.
Ja inun, ichatan jawa ea kenwankin
pewaismaki.

Jakia junibun yunuawen besti jatu yusinkubainmisbuki’,
aka jawen jancha yuixunika Isaafasin
ninkatan keneniki. ⁸Jaska waniwen
taea Diosun ynuua shinankin chibanna
yudabun beya besti man chibannmisbuki-
iwanan,

⁹ana jatu yuikin:

—Matun beya betsa betsapa besti chibankin jakia Diosun yunuui
shinanbiakin man akin pewaismaki.
¹⁰Eска Moisin yunuui ana matu
shinanmanun ninkakanwen: “Matun
epa inun matun ewa medabewakin jatu
duawakubainkanwen. Jakia matun
ibubu man jatu ichakawayu jau matun
xanen ibubun matu tenanxanunbunwen”,
abianiken ¹¹jaska shinanna matumebi
ibubis matun jancha watan jatu
yusinkin: “Matun ibubu jawadawen
medabewati mabu man jaya man jaki
tanabia Templo anu inankuinkatsi
man butidu man shinantiduki. Tsuan
matu ana bikawatidubumaki”, akin
man jatu yunuchamiski, nemakinan.
¹²Jaska wakin jatu nemakin man jaska
wakubainaibu tsuan ana matu ynuu
ynuu atidubumaki, matun ibubu man
medabewanunbun, akin man jatu
yunumiski. ¹³Jaska wakin matumebi
ibubis beya betsa chibanti matuna

watan Diosun yunuui jancha man jatu jakimawamiski, yunuti betsa betsapa jatu maewaxuanke akekinan, jau ja chibabunbunan— jatu watan

¹⁴⁻¹⁶ana Jesúsun yudan kaian kenaxun jatu yuikin:

—Man pabinkiyabuki. Matu yusinun ninkakin peidawakanwen. Piti tibi yudabun piabu jawa jatu jawen chakabuwaismaki. Jakia yudabun juinti medanua besti jawada chakabu taxnikin Dios jatu dananmamiski, yudabuki sinatamakinan— jatu watan

¹⁷Janua Jesúsun yudan kaian jenebaini jawen tsumabube jiwetan jikiaibun ja miyuiwen jatu yusinxukidi ana jawen tsumabun yukabu ¹⁸⁻¹⁹Jesúsun jatu yuikin:

—¿Matundi man ninkakin tapindiabumamen? Kabakabi matu yusinun ninkakanwen. Piti shadabu yudabun piabu jatun shinan medan naneama jawa jatun shinan chakabuwatidumaki. Jakia piti shadabu piabu jatun jatuki naneabu puiyabu kainmiski— iwanan —Jaskaken piti shadabun jawa jatu chakabuwatidumaki— jatu anikiaki. Jaskawen taea jawada piti shadabu pikin nukun puku anu nun nanemisdan, pekiaki. Jadan, jatun Dios sintamaismaki. ²⁰Jaskawen taexun Jesúsun ana jatu yuikin:

—Yudabun shinan medanua jawada chakabu jayabu taxnikinan, jaskatun jatu chakabuwamiski, Dios sinatamakinan. ²¹Jaska inun, eska yudabu jaya jatun shinan uke medan aduabu chakabu shinankin xabakabi taxnimamisbuki. Eska tibi xabakabi shinanwen kainkinan, kemukin jamapai tibi xebi jayabu chutabaunmisbuki. Ja inun, yumetsumisbuki. Ja inun, yuda betsaki yubakatan tenanmisbuki. ²²Ja inun, ainyan inun beneyabia betsabe chutanamemisbuki. Ja inun, yuda

betsan mabuwen kemumisbuki. Ja inun, chakabu betsa betsapa wamisbuki. Ja inun, yuda betsa padanmisbuki. Ja inun, jatun yudawen jawada pae tibi aki paein chakabumisbuki. Ja inun, yuda betsa jawen jiwea keskama jatu uin juni betsa jaska jayatidumawen nui jatuwen bika tenemisbuki. Ja inun, chani chakabaunmisbuki. Ja inun, ibubis shinain kein: “En pepaki”, imisbuki. Ja inun, yuda betsawen nuikin duawakin medabewaisbumaki.²³ Jaska tibi yudabun shinan anua taxnikin jatu chakabuwamiski, Dios sinatamakinan–jatu anikiaki.

Sirofenicianawa ainbun ikunwainwen taexun Jesúsun medabewanikiaki, na janchadan

(Mt 15.21-28)

²⁴Janua Jesús kainkidani Tiro mae pakea anu junekain jikipanan tsuanda unainbun jiwe betsa anu jikiaya²⁵⁻²⁶janua judiobuma Sirofenicianawa ainbu jawen bake yushin chakabuya Jesúskidi chaniaibun ninkabidani Jesúski nukuxun danti itan yuikin:
–En ainbu bake yushin chakabu jayaki. Ea kainmaxuin kawe– aka ²⁷Jesúsun yuikin:

–Israelbun piti bixun kaman anu putama ja dukun jau jawen bababun yaniwayununbun metidubumaki– aka ²⁸jawen jancha ninkatan Jesús ana yuikin:

–Jeen. Yusinaan, nun kaman keskaki. Israelbun besti tapukixun piabun jawen pese kamanen pimisbuki. Jaska keskadi wakin en bakedi min ea kainmaxuntiduki– aka ²⁹jaska ikunwain unankin Jesúsun yuikin:

–Min pe yuiaya en mia medabewaxuki. Jaskawen taea min bake anua ma yushin chakabu kainkainxuki. Uinditanwen–aka ³⁰kaxun jawen jiwe anu jikitana ja

ainbu bake ma yushin chakabu kainma pes daka uintushinikiaki.

Juni patani inun juyuni Jesúsun xuxawanikiaki, na janchadan

³¹Janua Jesús Tiro mae pakeanu chintuntani Sidón dunkeatain Decápolis kesua anu Galilea ianenwan kexa anu jikiken ³²janua juni betsa patani inun juyuni Jesús anu iyuxun ea axunkin:

–Min mekenwen jaki mepitan nuku xuxawaxunwen– akabu ³³ja isin teneai tadi ja mesti metsunbain Jesúsun iyuxun jawen metutinin pamistubuktant jaxpa watan jawen kemu jamichutan ³⁴naiudi besutan juinsinakin yuikin:

–Efatá!– iwanan, nukun janchawen yuikin: –Jau pabepemenunwen– aka ³⁵jawen pabinki dabe ma pabepemea inun jawen janadi ma janpekea ma jancha kayabiaya ³⁶Jesúsun jatu anu ana iyuxun jatu nemakin:

–Tsua yuiyamayutankanwen– jatu wabia kaxun yudabu betsa betsapa jatu banabima akeakeabu ³⁷e itan Jabaa! Yuu! ikin yuikin:

–Jesúsun jamapai betsa betsapa pepa atiduki, patanibu ninkamakin inun juyunibudi janchamaikikidan–inibukiaki.

Jesúsun 4,000 yudabu pimanikiaki, na janchadan

(Mt 15.32-39)

8 ¹⁻²Januxun ana xaba betsation yudan kaian Jesúsun jatu yusinkubainaya ma xaba dabe inun besti kaya jatun piti ma keyuabu jania pitibumaken Jesúsun jawen tsumabu kenaxun yuikin:

–Ma xaba dabe inun besti ea ninkakin jatun piti ma keyuabuwen taea en jatuwen nuiiai. ³Jatun jiwe anu piti mais en jatu nichian bui bai puchin anua punu nukai babui unanyamastidubuki,

betsabu chaika beshianbudan– ikaya
⁴jawen tsumabun Jesús yuikin:

–Nenu tsua jiweabumaki. Jania piti
bixun nun jatu pimatidumabin– akabu

⁵Jesúsun jatu yukakin:

–¿Jati misi man jayamen?– jatu wa
–Sieteki– akabu

⁶januxun Jesúsun ja yudan kaian
yuikin:

–Ja main tsaubaunkanwen– jatu watan
ja siete misi bixun Dios kenwantan
tunke tunke akai jawen tsumabun
bibainbainkin ja yudan kaian jatu inan
akeakeabun ⁷janua baka eskadabesdi
jaya Jesúsun bixun Dios kenwandiatan
tekepakediakin jawen tsumabu inan
jabun jatu inankin mebesa ⁸januxun
dasibibun yaniwai benimai pepeaibun ja
pikanxu piti texea ichawakin siete kuki
matawabun ⁹janua 4,000 yudabun pikin
keyuabun Jesúsun jatu yunukin:

–En ma kai buditankanwen– jatu
watan ¹⁰janua jawen tsumabubes xaxun
nanetan bui Dalmanuta mai pakeakidi
bunibukiaki.

**Jawada jawen unanmati dami atimaska
fariseobun Jesús yukanibukiaki,
na janchadan**
(Mt 16.1-12; Lc 12.54-56)

¹¹Janua fariseobu Jesús anu bexun
jabe ja inundan, iwanan, unanti wakin
yuikin:

–Dios anua jawen unanti dami nuku
axunwen, min jawen kushipa jaya
nun uinunan– akabu ¹²Jesús jointi
nishmaxun jatu yuikin:

–¿Jaskakin jawada Diosun besti
damiwatidu uinun ixun man ea yuksi?
Chanima en matu yuiai ninkakanwen.
Jamapai betsa uinmakin en ana matu
axuntaskamaki– jatu watan ¹³januxun
jatu jenebaini xaxun nanetan ana
chintunkaini ianenwan kexa betsaudi
jawen tsumabu jatu iyua

¹⁴janua bui misi jakimabaini jawa piti
buama misi bestichaiya besti xaxun
buaibun ¹⁵Jesúsun bebunkidi jatu
banabimakin yuikin:

–Fariseobu inun xanen ibu Herodesin misi
xaxa wati meseki. Uindakubainkanwen–
jatu wa ¹⁶jatu jaska wa jamakidi shinain
jawen tsumabu yuinamei:

–Nun misi beama ixuken nuku jaska
nemaikiki– ikaibun

¹⁷Jaskakidi yuinamei janchaibu
unantan Jesúsun jatu yuikin:

–¿Jaskai buxka kushikin man
ninkadiabumamen? ¿Jaskai: “Nun misi
beama ixuken jaska nuku yusinkiki”, iki
man yuinamekanai? ¹⁸Man beduyabia
jawada en matu axuain man uin pewama
ikunkainai. Man pabinkiyabia jawada
en matu yusiai man ninka pewama
idiakunkainai. ¹⁹Eska uinbiaidan, misi
mekan besti tunkepaketexun 5,000 junin
kaian en jatu pimadan, ɿjati kuki jawen
texe man ichawashinamen, ja pitidan?–
jatu wa

–Doce kain– akabu

²⁰Janua betsadan, siete misi
tunkepaketexun 4,000 en jatu pimadan,
texe wabudan, ɿjati kuki man
matawashinamen?– jatu wa

–Siete kain– akabu

²¹januxun Jesúsun jatu yuikin:

–Matunan, ɿjaskakin man
tapindiabumamen?– jatu wabaini

**Betsaida anuxun juni bekun Jesúsun
xuxawanikiaki, na janchadan**

²²janua bui mae betsa Betsaida anu
jikiabun juni bekuni jau xuxawanun
Jesús anu iwexun ea axunkin:

–Jaki bemepiwe– akabu ²³juni bekun
metsunbainkin benanta iyuxun jawen
beduki kemu michuxun bemepitan
metseketan yukakin:

–¿Jaskada min uiain?– aka ²⁴bepexe
midintan yuikin:

–Junibu uinbiakin ji mapua keska buanaibu en jatu uialin– aka ²⁵Jesús ana jawen beduki meopia janunkain ma xuxa xabakabi dasibi uinkin pewaya ²⁶Jesúsun jawen jiwtetan nichinkin yuikin:

–Na mae anu ana jadi kama min jiwe anu inun kadiwe– abainikiaki.

Min nukun Mesías Cristoki, akin Pedron yuinikiaki, na janchadan
(Mt 16.13-20; Lc 9.18-21)

²⁷Janua Jesús jawen tsumabube kai Filipon mae Cesarea chaima anu ana bai tanabainkin jawen tsumabu yukakin:

–Yudabunan, ḷen tsua ekidi yuimisbumen?– jatu wa ²⁸jawen tsuma betsan yuikin:

–Betsabun mikidi yuikinan: “Nashimanika Juan ana besteshinaki”, mia wakanikiaki. Betsabundi yuikin: “Elías ana jushianki”, mia wadiakanikiaki. Betsabundi yuikin: “Diosun jancha yuixunika betsana besteinmaki”, mia wadiamisbukiaki-akabu

²⁹januxun Jesúsun jabudi yukakin:

–Jamen matun shinankinan, ḷman tsua ea yuimismen?– jatu waya

januxun Pedron jatu yuixunkin:

–Miadan, min nukun mekenika Mesías Cristoki– akaya

³⁰Jesúsun jatu nemakin:

–En Mesías Cristoki tsua banabimayamayuxankanwen– iwanan,

Jesús mawaxanai bebunkidi jatu banabimaniaki, na janchadan
(Mt 16.21-28; Lc 9.22-27)

³¹Jesúsun ana jatu yuikin:

–Diosun bake en matun Juchi Kayabi Iyuadan, ea nuitapawaxankanikiki. Eki sinatakin ea ichakawakin mae xanen ibubu inun, Diosbe nukunabu janchaxunika xanen ibubu inun, Diosun

jancha kenenibu yusinanamisbundi ea danankin ea jatu tenanmabu dabe inun besti xaba kaya en ana bestexanaii-akin ³²jaska wakin jatu xabakabi yuiai ninkatan Pedron Jesús ja mesti paxkabain nemakin yuikin:

–Min jaskatidumaki– aka ³³Jesús jawen tsumabukidi nasauketan uinkin Pedro nemakin yuikin:

–Satanásan shinanwen min ea nemaii. Ana jadi jaskayamawe. Jawada Diosun uiain keska min uianmaki, eska shinankinan, jaska yudabun uinmis keskawen min ea nemaidan– atan

³⁴januxun Jesúsun jawen tsumabu inun yudabu jabe buaibu kenaxun yuikin:

–Tsuabuda eki chiti ikatsis ikidan, jamebi jaska shinamis jakimatian: “Bika tenei en jawen taea mawatiduki”, ikin jau ea chibankubainunbunwen.

³⁵Jamen tsuabunda shinain: “En mawakatsi ikamaki”, iki jatunmebi mekeaibudan, eauma mawakin jatun jiwea benuxankanikiki. Jakia ea ikunwakin en kakape yusinkin ea chibainwen taexun tenanbiabu jatun jiwea benuama jiwekuinxankanikiki.

³⁶Jaska inun, jaskati dabanan yudabun shinanma mai anua mabuwen inun jamapai tibiwen kemukin ichawai jiwemisbuden, jabudi eauma mawai benuxankanikiki. ³⁷Ja inun, jawada inananankin jawen jiwea pakatan jawen jiwekuinti tsuan bitidumbajaidaki.

³⁸Jaska inun, tsuabuda na yudabu chakabu bebunua eki inun en janchaki dakemisbuden, en Epan kushipaya jawen nai tsuma pepabube jua jabiaskadiai en jatuki dakediaxanaii– iwanan,

9 ¹ana jatu yuikin:

–Chanima en matu yuiai ninkakanwen. Na jabia man ebe mapuabuden, betsabu man mawadiamaken Dios Xanen Ibui taei

kushipajaidai man uinxanaii– jatu anikiaki.

Jesús jawen yuda damitan jatu uinmanikiaki, na janchadan
(Mt 17.1-13; Lc 9.28-36)

²Janua ana 6 día binuaya Pedro inun, Santiago inun, Juan Jesúsun katubainkin jatu iyui kakin mati keyatapajaida mapeketan janua jatu bebun Jesús dami ³jawen tadi juxupajaidai chaxajaaidai tsuan tadi patsakin juxupa wakin jaska waisma keskai ikaya ⁴jaskaya jabianudi Elías inun Moisés Jesúsbē janchai uin ⁵⁻⁶datejaidaibun jadakidi shinantima Pedron Jesús yuikin:

–Yusinaan, nun nenu juadan pejaidaki. ⁷Pean xubu dabe inun besti matu waxunpa, betsa mina inun, betsa Moisésna inun betsadi Elásinadan?– ikaya ⁷janua samama nai kuin bekin jatu bepuaya nai anua jui taxnikin yuikin:
–Nadan, en bakeki. En bechipajaidaii. Ninkaidakubainkanwen– jatu waya ⁸samama bedu bedu ikin uin ja jabe mapukanxu ana niama Jesús besti nia uiainbun

⁹janua mati keyatapa butebidankin Jesúsun jatu yuikin:

–En matun Juchi Kayabi Iyu matu mawaxuntan en ana matu bestenxundiamaken jawada na jaska man uinxudan, tsua yuiyamayuxankanwen– ¹⁰jatu wa tsua yuiama jatunmebi yuinamekin: “Mawatan ana bestenxanaidan, čjaskadamen?” ixun ¹¹ana jawen tsumabun Jesús yukakin:

–Yusinanbun jatu yusinkin Diosun jancha kenenibuwen jatu yuikin: “Nukun mekenan Cristo judiama bebunkidi Elías juxanikiki”, ikidan, čjaskai imisbumen?– akabu ¹²jatu kemakin:

–Chanimá Elías bebunkidi ana juxun dasibi benawakin pewakin

taewaimaki. Ja dikabi, Diosun jancha yuixunikabun kenekin: “Diosun bake jatun Juchi Kayabi Iyuandan, jabun danankin ichakawabu nuitapaxanikiki”, adianibuki. ¹³Jakia eanan, en matu yuiaii. Elásdan, chanima ja dukun juimaxun jatu yusianyan danankin Elías Diosun jancha yuixunika ichakawakin jaskadaxanaikidi Diosun jancha yuixunikabun bebunkidi jakidi kenenibu akin jabiaskadi wakin ichakawaiabuki– jatu abidani

Juni bake yushin chakabuya Jesúsun kainmanikiaki, na janchadan
(Mt 17.14-21; Lc 9.37-43)

¹⁴janua Jesús jawen tsuma betsabuki nukunun ika jui janu yudan kaian jawen tsumabuki icha Diosun jancha kenenibu yusinanamisbube jatube icha yuinamea akeakeaibu Jesúsun uinkubidanaya

¹⁵Jesús juai dasibibun uin benimajaidai kushibaini jaki nukuxun yukakin:

–¿Min ma juai?– akabu ¹⁶januxun Jesúsun jatu yukakin:

–¿Jawai Diosun jancha kenenibu yusinanamisbube jadakidi man janchawen yuinamei ikai?– jatu waya ¹⁷ninkatan juni betsan yuikin:

–Yusinaan, en juni bake yushin chakabun juyu wani en mia anu iwexuki. ¹⁸Ja yushin chakabun achixun duxku imakin tin imatan mai pusama daxka daxka iki bakuxyai xeta yenx yenx iki bakux kebus iki chadish chadish imakin jaska wakin babu wakubainmiski. Jaskamisen: “Jau yushin chakabu ea kainmaxununbun ika”, min tsumabu en jatu shinanbiabidana tsuan jawa ea kainmaxuntidumbaki– aka

¹⁹mapuabu Jesúsun jatu yuikin:

–Ikunwainsbumaan, čjatiki matu medabewai ana en matube jiweyuxanai? Nedi iwekanwen, ja bakedan– aka

²⁰iweaibun yushin chakabun Jesús bechitan ja juni bake ana duxku ima

main tin itan taka taka iki kemu bus bus ikaya²¹ Jesúsun jawen epa yukakin:

–¿Jatian bedukui taenimen?– aka jawen epan yuikin:

–Bakeishta iki taeniki. ²²Ja yushin chakabun tenanun, iwanan, jawenchains chi medan napukin inun jene medandi pukumiski– atan –Jamapai min atiduwen taexun čen bake min ea xuxawaxuntidumen? Nukuwen nuikin min atidudan, ea medabewawe– aka

²³Jesúsun yuikin:

–En mia medabewatidudan, čmin shinanmamen? Min ea ikunwanyan jamapai betsa betsapa en mia axuntiduki– aka

²⁴jawaida jawen epan unanxubima yuikin:

–En mia ikunwaiin. Ana en ikunjaidawanun uinmakin ea medabewawe– aka

²⁵yudan kaian ichabidanbidanaibun uinkin Jesúsun yushin chakabu yuikin:

–Yushin pata wakin inun juyu wamistuuun, ja juni bake medanua kaindikaintanwen. Chintunkidan ana jaki jikiyamaxanwen– akaya

²⁶yushinin bis imatan ana duxku imabaini kainkainaya ja juni bake mawa keska dakaken ichapabun yuikin: “Ma mawaki”, ikaibun ²⁷januxun Jesúsun metsunxun benia benikauan niken

²⁸janua Jesúsun jiwetan jikiaya jawen tsumabus jabe jikibain ana yukakin:

–¿Jaskakin ja yushin chakabu nukun nun kainmatiduma ixumen?– akabu

²⁹Jesúsun jatu kemakin yuikin:

–Na eska yushin chakabu kainmakinan, Dios dayuikin ea a bestikubainkin man kainmatiduki– jatu watan

Mawaxanaikidi ana ja kachu Jesúsun jatu yuiniaki, na janchadan

(Mt 17.22-23; Lc 9.43-45)

³⁰⁻³¹janua Jesúsun jawen tsumabu besti tadi iyuxun yusinun ika yudabu

uinmama jatube june kai Galilea napaibaini kakin jatu yusinkin:

–En matun Juchi Kayabi Iyuadian, tsuanda ea jatu achima ea tenanbu xaba dabe inun bestitian en ana bestenxanaii-jatu wa³²jaska jatu yuiai jawen tsumabun jawa ninkamajaida jawa yuiai dabanen datekin Jesúsun ana jawa yukama inibukiaki.

Tsuanda jatu binuntidukidi Jesúsun jatu yusinikiaki, na janchadan
(Mt 18.1-5; Lc 9.46-48)

³³Janua Cafarnaúm maewanu bei jiwetan jikiabun Jesúsun jatu yukakin:

–Bai tanabidianan, čjawakidi man yuinamekubidankanxumen?– jatu wa

³⁴bai tanabidani janchai yuinamekubidani:

–Jesúsbé xanen ibukin čnukunan, jadatubun betsabu nun matu binunxanimenkain? ¿Eamenkain?– iki yuinamekanxu dakei jawa yuimama pes maniabun ³⁵Jesúsun tsauxun jawen 12 tsumabu kenaxun yuikin:

–Jadatuda man xanen ibu pepa ikatsis ikaidan, ja dukun yuda dasibibu medabewakin jatuwen nuikin jabun tsuma keska ikubainkin jau jatu duawakubainunbunwen– jatu watan

³⁶januxun bakeishta betsa jawen tsumabu nashui abidan iwexun ikuxun jatu yuikin:

³⁷–Ea duawanun, iwanan, na bakeishta keska wakin tsuada en kenaya juaidan, ikin ea akawakin man duawatiduki. Jabiaskadi wakin ea besti duawama jatum ea yununi Diosdi jabun duawaxankanikiki– jatu waya

Tsuanda nuku dananma nukun jaibuki, anikiaki, na janchadan
(Mt 10.42; Lc 9.49-50)

³⁸Juanen Jesúsun yuikin:

–Yusinaan, juni betsan min kena kushipa paewen yushin chakabu kainmai

nun uinbidanshinaki. Nukubetan mia chibankaken nun nemakin nun bextepaibia nuku ninkama ishianki. Jadi nun nemashinadan, ¿pemen?– aka

³⁹Jesúsun jatu yuikin:

–Nemakin man jatu bextetidumaki. Tsuada nukuki sinatamadan, nuku medabewaikiki. Jawada atimaska yudabun atidubuma en kena kushipawen abiakin samama ekidi chakabu yuitidubumaki. ⁴⁰Ja inun, tsuada nukuki sinatamadan, nuku medabewaikiki. ⁴¹Ja inun, man ea ikunwainbuwen taexun jamapai tibiwen matu duawakin unpax amai keskawen matuwen dabanan ikin matu inainbudan, chanima Diosun jatu duawaxanikiki, pepawen manakukinan-iwanan,

Tsuanda jawada chakabu jatu memaidan, meseikiaki, na janchadan

(Mt 18.6-9; Lc 17.1-2)

⁴²Jabias bake ikuxun ana jawen jatu shinanmakin yusinkin:

–Tsuabunda jawada Diosun nemamis inun yunumis chibankma chakabu wamisbun bake mishtinbun ea ikunwain jatu padankin chakabu jatu ama akeakediamisbuden, jaskawen taexun Diosun jatu kupijaidaxanaiwen taea jawen xekikan deneti mishki ewapa nexaxun teumatan ianenwan medan pukua jasadon, jawen kupiti bexmas mekeanaii. ⁴³⁻⁴⁸Jaska man ikatsi ikamadan, jawanda matu chakabuwamis bextekedin jawaida jenedikubainkanwen. Janua min meken betsa kasmai min tae betsa kasmai min bedu betsa kasmai jadatuwenda mia chakabuwamis ja mextekea keskakin jamapai chakabu man imis inun man amis tibi jawaida bextekedin jetetiki. Min meken dabeya kasmai min tae dabeya kasmai min bedu dabeyadan, janu chi nukaisma anu inun janu nami xena debuisma anu chi medan

mia puta pemajaidaki. Jakia min meken bestichaiya inun min tae bestichaiya inun min bedu bestichaiyadan, Dios anu niti ikama min jiwenunbadiai pejaidaki.

⁴⁹Chi keskawen man ikunwainbu tibi chuxakin akawakin matu bika tenemaxankanikiki. Matu jaska wabiabu Diosun jawen kushipawen matu mekeka man kushipaxanaii, tewen nami mekemis keskaidan. ⁵⁰Tewedan, nami chaputima wati inun nami meketibia payukui keyumiski. Matubunan, Diosun jancha man unainbuwen taexun matunabu yusiin man tewe batawen meketi keskabuki. Jakia jaskai tewe jawen bata keyu bumis ana meketiduma keskama Diosun jancha ninkakin pewatan ea chibainbube medabenain unanuma jiwekubainxankanwen– jatu anikiaki.

Juni inun ainbu jenenametimakidi Jesúsun jatu yusinikiaki, na janchadan
(Mt 19.1-12; Lc 16.18)

10 ¹Janua Cafarnaúm anua kainkaini kai Jordán jene kexa betsaudi estekidi Judea mai pakea anu jikia yudan kaian ana jaki ichaibu jaskabidanaibu jatu yusinmis keskaibu Jesúsun ana jatu yusianyan ²januxun fariseobu jatiditun Jesús unanti watan jaki bepadamenun ika jaki kematan yukakin:

–Juninan, čjawen ainan jenetimen?– akabu ³Jesúsun jatudi yukakin:

–Moisinan, čjaskada nukun xenipabu yusinkin yununimen?– jatu wa

⁴jabundi yuikin:

–Moisin yusianan, ainbu jenekatsi ikinan, jawen jeneti unaki kenexun inantan jenebaintiki, ani nun uinmiski– akabu

⁵januxun Jesúsun fariseobu jatu yuikin:

–Chanimaki. Matu keska matun xenipabu juinti kushiken jaska Moisin jatu yununiki.

⁶Jakia Diosun dasibi damiwakin taewakinan, juni inun ainbu jau ja dabe ketaxamenunbun, iwanan, Diosun jatu damiwaniki. ⁷Jaskaken jawen ibubu dapaxkabain junai nyantant jawen ainbe ketaxameawen taea ⁸ana yuda dabema jabias yuda bestichai keska jiwitidubuki. ⁹Janua Diosun juni inun jawen ain yuda bestichai keska jatu wa junin jawen ain dapaxkabainkin jenetimajaidaki–jatu watan

¹⁰janua Jesús jawen tsumabube jiwetan jikia maniabun jaska jatu yusinxu ana yukabu ¹¹Jesúsun jatu yuikin:

–Tsuabuda jawen ain jenetan ainbu betsai ainwankinan, jawen ain xeni danankin Diosun yununidi danain chakabumisbuki. ¹²Jaska inun, ainbun jawen bene jenetan juni betsai benewakinan, jawen bene xeni danankin Diosun yununidi danain chakabudiamisbuki– jatu anikiaki.

**Bake mishtinbu unanuma wakin Jesúsun
Dios jatu yukaxuniaki, na janchadan**
(Mt 19.13-15; Lc 18.15-17)

¹³Janua jatun bakebu jau ea Jesúsun mexunkin unanuma waxunun, iwanan, janu iwebidanbidanai bu jawen tsumabun jatu nemaya ¹⁴⁻¹⁵Jesúsun uin jawen tsumabuki sinatakin jatu yuikin:

–Jatun bakebu ea anu iweaibu jatu nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasixankani kiki– jatu watan

¹⁶januxun bake mishtinbu ikuxun mamepixun duawakin bestibu jatu yuikin:

–Dios miwen nuikin mia bechipaiaya unanuma yumei pekanwen– jatu wa akeakenikiaki, Jesúsun.

**Juni mabu ichapa jaya Jesúsbe
janchanikiaki, na janchadan**
(Mt 19.16-30; Lc 18.18-30)

¹⁷Janua Jesús ana kainkainaya juni betsai kushikidan jaki nukutan ja bebun danti itan yukakin:

–Yusinan pepaan, ¿Mia yukapa? Jiwea kayabi bikinan, ¿jaska kayatan en bitidumen? Ea yuiwe– aka

¹⁸Jesúsun yuikin:

–¿Jaskakin ea kenakin: “Pepaan”, min ea wai? Dios bestiki, pepadan, ¿min unanmamen? ¹⁹Mianan, Diosun yunuti inun jawen nematidan, ¿min unanmamen? Eska yuinidadan: “Ainbu min ainma chutatimaki. Juni betsaki sinatakin tenantimaki. Yumetsutimaki. Juni betsaki chanichakatimaki. Padananantimaki. Ja inun, min epa inun min ewa duawakubaintiki”– aka

²⁰ja juni mabuyatun Jesús yuikin:

–Chanimaki. Dasibi Diosun yunuti inun jawen nemati jaskadan, en ma unan keyuaii. Bakeishtatun tapinixun en chibankubainmiski– aka

²¹Jesúsun uin jawen nuikin ana yuikin:

–Min pe ea yuiiai. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi min jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian min bixanaii– aka

²²Jesúsun jaska yuia ninkai jawen mabu ichapawen nui juinti nishmai keyutan ana jawa yuialma benikainaya

²³Jesúsun jatu uinbaunkin jawen tsumabu yuikin:

–Juni mabujaidayan, Dios xanen ibuai anu jikinun ikaidan, bikajaidaki– jatu wa

²⁴⁻²⁵jawen tsumabun jawen jancha ninkai Jabaa! ikaibun Jesúsun ana jatu yuikin:

–Chanimaki. Ja yuinaka ewapa camellodan, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu

besti shinain jawen nuikin jatun shinan betsa wama Dioski chiti itidubumaki-jatu waya

²⁶jawen jancha ninkatan pes
juinti nishmaxun yuikin: Jabaa! iki yuinamekin:

—Jaskakenan, Ʉtsua Diosun nuku mekekin paxawakin jiwematidumen?—ikabun

²⁷jatu tibi uinbaunkin yuikin:

—Tsuada yudabun matu jaska waxuntidubumabiaken Diosun besti dasibi matu axuntiduki— jatu wa

²⁸Pedron yuikin:

—Yusinaan, nukunan, mia chibankatsi ikinan, jawada nun jaya dasibi bashikin keyubidanimaxun nun ma mia chibankapekaii— aka

²⁹Jesúsun ana jatu yuikin:

—Chanima en matu yuiai ninkakanwen. Jadatutunda ea chibankin Diosun jancha kakape yusintanun ixun jawen mae jenekin jawen betsabu inun, jawen puibu inun, jawen epa inun, jawen ewa inun, jawen bakebu inun, jawen bai jenekin keyubainken ³⁰tsuabunda jamapaiwen jatu bika tenemabiaibun na jabiatian Diosun jatun pepawen manakujaidakin ana jiwe betsya inankin, betsabu inankin, puibu inankin, ewabu inankin, bakebu inankin, bai inankin jatu jaska waxunxanikiki. Jatu jaska wanixun nai anu jatu jabe jiwemaxanikiki, ikibi imakanin. ³¹Ja inun, yuda ichapabu na jabiatian kenkin yunumisbuden, Diosun jatu kenwanma ixanikiki. Jakia betsabu na jabatiandi jawa kenkin yunuismadanan, Diosun jatu kenwankin xanen ibujaidawaxanikiki— jatu anikiaki.

Mawaxanaikidi dabe inun bestiki ana Jesúsun jatu yuiniaki, na janchadan
(Mt 20.17-19; Lc 18.31-34)

³²Janua Jerusalén bai tanabainaibun Jesús bebukainaya jaki chiti ikabu

jachun bui supuibaini jadia Jesúski jaki sinatamisbu anu kaya jawen tsumabun jaska shinain yuinamekubainaibun yudan kaian jatube bui dateyabi chibainbun januxun Jesúsun jawen 12 tsumabu besti kenaxun jatu tadi iyuxun jaska wakin ichakawaxanaibu ana jatu yuikin:

³³—Jerusalén anu na jabiatian nun kaidan, man unaiin. Januxun Diosun bake en matun Juchi Kayabi Iyua Diosbe nukunabu janchaxunika xanen ibubo inun Diosun jancha kenenibu yusinananimisbu jabu tsuanda jatu ea achimaxanikiki. Jabun ea tenankatsis ikin nawa betsabu ea jatu inanbu ³⁴jabu eki kaxekin eki kemu michukin ea kusha kusha axun ea tenanbu xaba dabe inun besti kaya en ana bestenxanaii— jatu wanikiaki.

Santiago inun Juan daketapaibukidi Jesúsun jatu yusinikiaki, na janchadan
(Mt 20.20-28)

³⁵Janua Zebedeon juni bake dabe Santiago inun Juan Jesús dapi kaxun yukakin:

—Yusinaan, nun mia jaskakidi yukaidan, nuku axanwen— akabu

³⁶—¿Man jawa ea yukai?— jatu wa

³⁷jabun Jesús ana yuikin:

—Min xanen ibu kushipai pepaya mibe nun xanen ibudianun mibe nuku tsauemaxanwen, betsya min yusiudi inun betsya min yusmauditikan— akabu

³⁸Jesúsun jatu kemakin:

—Jaska man ea ea akaidan, shinankin man ninkadiabumaki. Jawada en ixanai keskadan, Ʉman idiatidumen?— jatu wa

³⁹Nun idiatiduki— akabu

Jesúsun ana jatu yuikin:

—Chanima ea ichakawaibu en isin tenexanai keska man tenedioxanaii.

⁴⁰Jakia en yusiudi inun en yusmaudi man ebe xanen ibutidudan, en matu

yunutidumaki. Jakia en Epa Diosun jatu katunidan, ebe xanen ibuxankanikiki-jatu waya

⁴¹janua Santiago inun Juan jaska yuka ikaibu Jesúsun tsuma betsa meken dabetibun ninkai jatuki sinataibus

⁴²januxun Jesúsun jawen tsumabu keyu ichawaxun jatu yuikin:

—Jaska nawa xanen ibubun jawenabu ja akin mese wabetanan kushipawen jatu yunukin jatun tsumabu jawen kushipa jatu uinmakin jatu babu watan yunumisbu man unaiin. ⁴³Jakia matubunan, jaska shinanyamakubainkanwen. Matu anua tsuada xanen ibukatsis ikinan, jau dasibi matu medabewakin duawakubainunbunwen. ⁴⁴Jabiaskadiai tsuada xanen ibukatsis ikidan, dasibun tsuma jau idiakubainunbunwen. ⁴⁵Jamen ea iki juidan, en matun Juchi Kayabi Iyuabiadan, jau ea duawanunbun ika en juamaki. Jakia matu debuxunkin yuda ichapabu benuabu mexpamatian matu jiwemanun ika en juniki— jatu abaini

Jesúsun Bartimeo bekun xuxawanikiaki, na janchadan

(Mt 20.29-34; Lc 18.35-43)

⁴⁶Janua Jericó maewan anu Jesúsun jawen tsumabube jikia ibai janua Jesúsun kainkaini yudan kaian inun jawen tsumabube kaya janu bai kexa anu Timeon juni bake Bartimeo bekun tsauxun pei jatu yukamistun ⁴⁷Jesúsun Nazaret anua yumeni yui jakidi janchabainaibu ninkatan unanxubima jawenchains yuikin:

—Davidin babaan, ewen nuiwe— akaya

⁴⁸ichapabun nemabiabu ana unanxubimajaida yuikin:

—Davidin baba Jesúsuun, ewen nuiwe— abaunbauna

⁴⁹Jesúsun niti itan junibu jatu yuikin:

—Kenakanwen— jatu wa

januxun juni bekun kenakin yuikin:

—Mia kenaikiki. Shinan chankain benidikanwen— akabu

⁵⁰jawen yabukuti peputakatan jawaida benikidan Jesúski nukua ⁵¹Jesúsun yukakin:

—¿Mia jawa medabewapa?— aka juni bekunman yuikin:

—Xanen ibuun, ana en uinun ea bepxewi ika en ikaii— aka

⁵²Jesúsun yuikin:

—Ana uindiwe, min ea ikunwainwen taea xuxatan inun kadiwe— aka samama Bartimeo bepxetan Jesúsun chibanbaina ya

Jerusalén maewan anu Jesúsun jikinikiaki, na janchadan

(Mt 21.1-11; Lc 19.28-40; Jn 12.12-19)

11 ¹janua Jesúsun Jerusalén anu kai Betfagé inun Betania ja mae dabe anu kemai Olivos Mati tetanbainkin jawen tsumabu dabe yunukin:

²—Ja mae besuudi kayanbis buxun burro nexea tsua jaki katsaumediama bechitan tepetan beyutankanwen. ³Jaska inun, tsuanda matu yukakin: “¿Jawakatsi man tepeai?” matu wa yuikin: “Nukun Xanen Ibun biyukatsis ikikiki. Samama jabianudi nuku bemaxanikiki”, atankanwen— jatu wa

⁴ja dabe buxun jiwe beputi dapi burro nexea bai namaki nia bechitan tepeaibun

⁵jabianudi manixun yukakin:

—¿Jaskakin burro man tepeai?— jatu waya

⁶januxun Jesúsun jaska jatu yuixukidi yuiabu:

—Peki. Buxunytankanwen— jatu wa ⁷tepetan januxun jatun bemakia tadi burro kamaki kabekanbain Jesúsun anu buxuanbu Jesúsun jaki inatan katsaumekainaya ⁸ichapabun jatun bemakia tadi bai namaki

nabekanbainaibun janua ana betsabundi
xenpan mextexun jabiaskadi wakin
nabekanxundiabainaibun

⁹bebubainaibu inun chipu beaibun jui
kushipawen jawenchains yuibainkin:

–Aichu! Aichu! Ja Diosun kushipaya
juaidan, benimawakin duawanankanwen.

¹⁰Nukun xenipabu David ipauni
keska xanen ibujaidai juikiki. Dios
kenwanxunankanwen– akubaini bui

¹¹Janu Jerusalén anu jikixun januxun
Dios kenwanmisbu Templo jemaintin
anudi Jesús jikidaxun janua jawen
jamapai dasibi uinbaunkin keyutan
janua ma badi kaya kainkaini jawen 12
tsumabube Betania anu bua

**Ji bimiuma Jesúsun yupunikiaki,
na janchadan**
(Mt 21.18-19)

¹²uxashini xaba betsatian meshukidi
Betania anua bunikainkin ¹³ji betsa
higuera benanta tupan nia Jesúsun
bechitan jaska bimiyamenkain uintanun
ika kaxun jawa bimi jayama jawen
pejaida besti uinkin janu bimimistian
idiamaken ¹⁴januxun Jesúsun ji bimiuma
yupukin:

–Jau tsuan taska min bimi ana
piyamaxanunbunwen– akai jawen
tsumabun ninkabaini buaibun

**Templo jemaintin Jesúsun pewakin xunpi
wanikiaki, na janchadan**
(Mt 21.12-17; Lc 19.45-48; Jn 2.13-22)

¹⁵janua Jerusalén anu Jesús ana
jikitushitan janu Templo jemaintin
kenekauanu jikikain januxun jawen
Dios daewati inabu chaxuwani inun,
ina awa inun, deiwan inananainbu
inun biaibu jatu nichinkin taewakin
pei bianananmisbun tapu nadabekin
deiwan inanmisbun kenedi
nadabediakin keyutan ¹⁶janu jawen
jemaintin kapukekin jau jawada

iabaunyamanunbun jatu nemaxun ¹⁷ana
xanen ibubu jatu chitekin yuikin:

–Jawen Templokidi jawen jancha
yuixunika Isaías Diosun kenemani matu
yuinun ninkakanwen: “En jiwedan, janua
yuda betsaa betsapabu ebe janchakin
ea kenwanxankanikiki”, ibianiken
na jemaintin xabatudu anua matubu
padananankin yumetsun jiwe man
wamisbuki– ikaya

¹⁸jawen jancha ninkai Diosbe
nukunabu janchaxunika xanen
ibubu inun Diosun jancha kenenibu
yusinanannmisbun shinankin jabiadi
yudan kaianen jawen jancha
ikunwainbuwen taea jaki sinatai
Jesúsun yusinkin jatu binutidu shinain
jaki datei jaskatan tenantimen ika
yubakai taeaibun ¹⁹ma meshuaya
Jesús jawen tsumabube Jerusalén anua
kainbainaibun

**Higuera ji Jesúsun yupubainshina
xananikiaki, na janchadan**
(Mt 21.20-22)

²⁰janua meshukidi ana bai tanabainkin
ja ji bimiuma anu ana dainbainkin jawen
tacha inun jawen ibu ma xanashinken

²¹Jesúsun jaska yuiai ninkashinxun
Pedron shinankin Jesús yuikin:

–Uian. Yusinaan, ja ji bimiuma min
yupushinadan, ma xanashinabin– akaya

²²Jesúsun jatu kemakin:

–“Diosun jamapai atiduki”,
ikunwankanwen– itan ²³–Chanim
en matu yuiai. Na mati tsuanda
yuikin: “Matipaan, mimebi tsekekain
ianenwan medan pukutanwen”, akin
man shinan dabewen shinanwen
akama man ikunwankin jadi yuiaiwen
taea Dios matuwen dabanan ikin
matu axunxanikiki. ²⁴Jaskati en matu
yuiai. Diosbe janchakin: “En jaska
bikatsis ikaii”, ikin yuikubainkanwen.
Man shinan dabeyamaken jaska

Diosun matu yunuaya man bixanaii.
 25 Jaska inun, Dios dayui jabe
 janchakin tsuanda jawada matu
 chakabuwashina jaki sinatabiatan
 jawaida jabe daekubainkanwen, ana
 jas shinanmadan. Man jaskaibu matun
 chakabudi Diosun matu buaxuntan ana
 shinanma idiaxanikiki. 26 Jamen yuda
 betsabun matu ichakawabu man jatube
 daenameamaken Dios nai anuatuun
 matun chakabudi matu buaxunamadi
 ixanikiki– jatu abidan

**Jaska kushipakin jatu binuaikidi Jesús
 yukanibukiaki, na janchadan**
(Mt 21.23-27; Lc 20.1-8)

27 janua Jesús inun jawen tsumabu
 Jerusalén anu ana chintunkidan jikitán
 janu Templo jemaintin anu Jesús
 jikixun uiantani nikén Diosbe nukunabu
 janchaxunika xanen ibubu inun, Diosun
 jancha kenenibu yusinanamisbu inun,
 mae xanen ibu betsabu ja dapi buxun
 28 yukakin:

–Na min eska waidan, ɿtsuan jawen
 kushipa mia yunuimawen min aki ikai?
 ɿTsuan jawen kushipa mia inainmamen,
 min jaska wanunan?– akabu

29 Jesúsun jatu kemakin:

–Entsedi en matu yukai matun dukun
 ea yui taewakanwen, man ea yuiaya
 jawada man ea yukai en matu yuidiai
 ninkakanxunan. 30 Nashimanika
 Juan jau jatu nashimanun yunukinan,
 ɿtsuan kaya yunuyama man shinain,
 Diosundaka, junibundaka? Ea dukun
 yuikanwen– jatu wa

31 janua jabudi june yuinamekin:

–“Diosun yunuyamaki”, nun
 wadan, “ɿJaskakin Juanen jancha
 man ikunwanma ikimamen?” iwanan,
 nuku kunyan atiduki. 32 Jamen yuda
 midimabun Diosun Juan yunuyamakidi
 jabun ikunwainbuwen taea jabuki
 datekin yuikin: “Junibun yunuyamaki”,

nun wapanan nun jaska yuitidubuki-
 itan 33 jabun Jesús yuikin:

–Nun unanmaki– akabu
 Jesúsun jatu yuidiakin:
 –Jaskakenan, tsuanda jawen
 kushipawen ea yunuimadan, eandi en
 matu yuiamaki– jatu watan

**Dayakapabu mekenan besumakidi Jesúsun
 jatu yusinikiaki, na janchadan**
(Mt 21.33-46; Lc 20.9-19)

12 1jabianuxundi miyuiwen Jesúsun
 xanen ibubu jatu yusinkin:

–Juni betsan bai waxun uva
 bimi batapa banatan mishkiwen
 dakenbaunkin keyutan janua jaki uva
 tsiniti watan januxun dasibi uinbaanti
 jiwe pishta keyatapa watan januxun
 jau bimi dabukun ea inanxanunbun,
 iwanan, juni betsaa dayakapabube jabube
 yubakatan ibu keska wakin yunuyubaini
 chai kaimaken 2janu ma kani tsekatitian
 ikaya bai ibuan jawena dabukun jau
 yukatan ea bixuntanun, iwanan, jawen
 tsuma betsaa yunua ka 3jabun jawena
 inankatsi ikama uva bimi mekeabun
 achixun kusha kusha axun jawa inanma
 mais kaya 4januxun bai ibuan ana
 jawen tsuma betsaa yunudia ka kunyan
 axun makushkin mapextan nichindiabu
 kadiaken 5januxun bai ibuan ana jawen
 tsuma betsaa yunua ka tenanbun januxun
 betsaa betsapadi yunua buabu jatu kusha
 kusha akin jatidi tenanbun

6jatu jaska tibi wabia jabun
 inanbumaken jawen bake bestichai
 bechipaijaidai ja besti niti itanaya
 jakidi shinankin: “En bake en yunua
 kaya jaki mesekin en bimi ea ja
 inanxuntidubumenkain”, iwanan, yunua
 ka 7jawen bake jatuki kemai kai bechitan
 yuinamei: “Bai ibu mawashinken na
 jawen baken jawen bai tibi inun jawen
 jiwe tibi dasibi jawenawayuikiki. Na bai
 nukunas nun wanun tenanankanwen”,

ixun ⁸achixun tenantan bai tsisumen putanibuki– iwanan,

⁹–¿Jaskakenan, ja bai ibuan jaskada jatu waxanimenkain? Matu yuinun ninkakanwen. Bai ibu jawenabube juxun bai anu dayamisbu jatu tenantan januxun juni betsabu jawen bai anu jau dayaxununbun jatu yunuxanikiki– iwanan

¹⁰–¿Diosun jancha kenenibu uinkin man yuismamen? Matu ana shinanmanun ninkakanwen:

‘Jiwe wanikabun mishki dananbiaibun jabias mishki Diosun bixun dexun makedex wakin jawen kene mestenwan keska wakin

¹¹ nuku uinmakin jabaa! imakin nuku jadakidi shinantima waxanikiki’, jatu waya ¹²na miyuiwen jatu ja akin chiteai unankin xanen ibubun Jesús achikatsis ibiai yudan kaianki mesekin jawa meama jeneyunibukiaki.

‘Ja gobierno dayaxunmisbu pei pakatimen? ikaibu Jesúsun jatu yununiaki, na janchadan

(Mt 22.15-22; Lc 20.20-26)

¹³Januxun Jesús jaska waxun tenantima jawen padantan romano xanen ibu ja amakatsi ikin judio xanen ibubun fariseobu inun Herodeski chiti ika betsabu Jesús anu jatu yunuabu

¹⁴jaki bepadamebain yuikin:

–Yusinaan, yuda betsabu miki sinatabiaya jawa jatuki dateama chanima jancha besti yusinkin jaska wakin Dios chibantidubu besti min jatu xabakabi yusinkubainaidan, nun unaiin. Jaskawen taexunan, ¿jaskada min shinainmenkain mia yukapa? Ja Romano xanen ibu Césarn nuku pei yukamisdan, ¿jaska wananaxpana? ¿Pakananaxpana? ¿Pakatimadaka?– akaibu

¹⁵Jesús jawen bepadankin jamakidi yuimatan ichakawatidubu unankin jatu yuikin:

–¿Jaskadawen man ea unanti wakin bepadanun ika ikanai? Jawen gobieno impuesto pakati pei jexe betsaa ea uinmakanwen– jatu wa

¹⁶betsaa bexun inanbu uinkin Jesúsun jatu yukakin:

–Nadan, ¿tsuan besu inun tsuan kena neamen? Ea yuikanwen– jatu wa jabun yuikin:

–Romano xanen ibu Césarnaki– akabu ¹⁷Jesúsundi jatu yuikin:

–Césarnawen taexun matun xanen ibu César duawakin jawen gobieno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaiai axundiakubainkanwen– jatu waya

–Nun jaska waxun padantidumaki– iki e itan ana jawa yuitima buaibun

Mawanibu bestenxanaikidi Jesús yukanibukiaki, na janchadan
(Mt 22.23-33; Lc 20.27-40)

¹⁸janua saduceobu judiobu paxka betsa: “Ja mawabu jawen yuda tsua ana besteinsmaki”, imisbu Jesús anu jabudi bexun yukakin:

¹⁹–Yusinaan, Moisin yusinkin: “Juni betsa ainyan juni bakewadiama mawaken janua jawen betsan ain janubi ainwantan juni bakewaxuntiki, jawen betsaa mawaiamatun kena dabikinan”, nuku waniki. ²⁰Jaskakidi ja jawen 7 betsabukidi mia yuinun ninkawe. Ja dukun iyuatun ainbu betsaa ainwanxun juni bakewadiama mawaken ²¹ja kachukeatun jawen betsan jabias ainbu ainwanxun juni bake wadiamadi mawaken ana ja kachukeatun jawen betsan ain jabiadi ainwandiatan juni bake wadiamadi mawaniki. ²²Janua ja 7 jawen jenekin jabias ainbudi bixun jabu tibitun jawa juni bake bawabuma mawai keyuabun janua jawen jenei

ainbu juni bake biamas mawadianiki.

²³Ja jaskanibudan, mawabu ana bestearinbutianan, ḋja ainbu bestichai ja juni 7bun ainwanibudan, jadatutun kaya ana ja ainbu bixanimenkain?– akabu

²⁴Jesúsun jatu kemakin:

–Matunan, Diosun jancha kenenibu unanma jawen kushipa man unanmadiki. Jaskakin man kanemiski. Xabakabi matu shinanmanun ninkakanwen.

²⁵Mawanibu ana bestenxanaibutianan, jawa ana ainyain inun ana beneyai ikama ixankanikiki. Janua Diosun nai tsumabu keska beneuma inun ainyuma jiwxankanikiki. ²⁶Mawakubainaibu bestein ana jiwxanaibukidi matu yusinun ninkakanwen. Ji maxu kua jede ji ji ikai anuxun Diosun Moisés jancha wakin: “Eadan, natian en Abrahamnen mekenikaki. En Isaacun mekenikaki. En Jacobun mekenikadiki”, ikai ninkayamaxun Moisin kenenidan, ḋman uinkin yuismamen? ²⁷Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bena Diosun jatu inanxanai shinanma man kanejaidamiski– jatu wa

Diosun yununidan, ḋjadatu bestitun binu keyuamen? ikaikidi Jesúsun jatu yusinikiaki, na janchadan
(Mt 22.34-40)

²⁸Jesús saduceobube yuinameai ninkabaikin Jesús jaskakidi yukabu jatu yui pewaxukidi unain Diosun jancha kenenibu yusinanamis betsa Jesúski kemaxun unanti wanun ixun yukakin:

–**ḍJadatu yunua kushipa binua** Moisin nuku kenexuniwen besti nun chibainwen taexun Diosun nuku mekekubaintidumen?– aka

²⁹Jesúsun yuikin:

–Na eska yununi betsa betsapa tibi dasibi binujaidadan, eskaki.

Ninkakanwen: “Israelbuun, nukun Xanen Ibu Dios ja besti ikibi ini jiweapekeikiki. ³⁰Jaskaken nukun Xanen Ibu Dios duajaidawakin bechipaikin jawen nuikin matun juinti inun, matun yushin dasibiwen inun, matun shinan dasibiwen inun, dasibi matun kushipawen jeneama akubainkanwen.” Min jaska tibiwen shinankin akaidan, ja yunua betsa dasibi binujaidaki. ³¹Ja kachu yunua betsadan, jabe ketaxnidan, ninkawe: “Min jabube jiweabu duawadiakubainkanwen, ibubis man nui mekemis keska wakinan”, akin yuini ja yunuti dabe chibain man jaki chiti ikaiwen taea matuwen Dios benimaxanikiki– aka

³²Diosun jancha kenenibu yusinanamistun Jesús yuikin:
–Yusinaan, min yusianan, peki. Chanima min yui kayabiai. Nun bechipaijaidaii. Chanima Epa Dios bestitun nuku mekekubaintiduki, betsan nuku mekeamadan. ³³Jaska inun, nukun juinti inun, nukun yushin dasibiwen inun, nukun shinan dasibiwen inun, dasibi nukun kushipawen Epa Dios duawai jaska nukunmebi nun nuimis keskai yuda betsabu tibiwen nun nuiawaien taexun Diosun nuku bechipaijaidaikiki. Jamen jaskama jatida yuinaka detexun kuakin Dios nun inankuinmis inun jatida inankuinti betsa betsapa Dios kenwanti jiwe anu nun bumisdan, jawama keska Diosun shinanmiski– akaya

³⁴Diosun jancha pe ninkakin yuiai Jesúsun yuikin:

–Dios xanen ibuaike min ma jaki dasi kemaki– aka ana tsuan jawa yukama mapuabun

Mesías Cristodan, ɿtsuan babamen? iwanan, Jesúsun jatu yukanikiaki, na janchadan

(Mt 22.41-46; Lc 20.41-44)

³⁵jabianuxundi Templo jemaintin anuxun Jesúsun jatu bepxumakin yukakin:

–Diosun jancha kenenibu yusinanamisbun matu yusinkin: “Cristodan, Davidin baba ixanikiki”, ikin ɿjaskakin matu jaska yusinmisbumen?

³⁶Matu yuinun ninkakanwen. Diosun Yushin Pepatun David yusian kenenitun matu yuikin:

Dios mekenikatun en Xanen Ibu Mesías yuikin:

“Miki sinataibu en jatu maemadiama manai en yusiudi tsauyuwe”, aniki. Jaska watan keneniki. ³⁷Jakia: “Mesías en xanen ibuki”, Davidin abianiken ɿjaskatan jawen xanen ibu janubi jawen baba itidumen? Ea yukanwen– akin xanen ibubu shinanmaya yuda midimabun Jesúsun jancha ninkai benimai tse ikaibun

Diosun jancha kenenibu yusinanamisbu Jesúsun jatu chitekin dabin wanikiaki, na janchadan

(Mt 23.1-36; Lc 11.37-54; 20.45-47)

³⁸jabianuxuns Jesúsun ana jatu yusinkin:

–Diosun jancha kenenibu yusinanamisbuden, jatu uindakanwen. Jatun tadi chaipa jawendua sawea mae jemaintin ewapa plaza anu en kauanai ea bechipaikin ea kenwankin jau jancha pewen ea duawanunbun ika mapumisbuki. ³⁹Jaska inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. Ja inun, ichatan pinun, iwanan, janu xanen ibubu dakai baxti ixun pimisbu benadiamisbuki. ⁴⁰Jaska inun,

ainbun bene ma mawakin xununiken jawen jamapai pepayabi jawen jiwe mebinun itan ainbu bepadankin jakidi pe shinanmanikapai Diosbe janchai chaipajaidamisbuki. Jaskamisbuwen taexun Diosun jatu unanti watan kupiadan, yumanjaidaxankanikaniki– jatu watan

Ainbu beneuma nuitapaitun pei pishta inankuinikiaki, na janchadan

(Lc 21.1-4)

⁴¹Jesúsun jatu yusin meneaya nuitapaibu jawen medabewati inankuin pei janu mistumisbu anu bau bebun tsauxun Jesúsun uiangan yuda pei midima jayabun ichapa mistubidanbidanaibun ⁴²ainbu beneumadi nuitapai juxun pei jexe dabe jawa damajaida mistuaya Jesúsun uintan ⁴³⁻⁴⁴jawen tsumabu kenaxun jatu yuikin:

–Eskaki, matu xabakabi yuinun. Ja junibu pei ichapayabun jatun pei paxkaxun texe besti inankuin kanxuki. Jakia ja ainbu nuitapaitun dasibi jawen jawada biti pei inankin keyuxuki– jatu watan

Templo jiwe tekei pudekei keyuxanaikidi Jesúsun jatu yuiniakiaki, na janchadan

(Mt 24.1-28; Lc 21.5-24; 17.22-24)

13 ¹Januxun Templo jiwe jemaintin anua jawen tsumabube Jesús kainkainaya jawen tsuma betsan yuikin: –Yusinaan, uinwen. Na Templo jiwe wakin mishki tsama akeakenibudan, jabi jawendua benibin!– aka

²Jesúsun yuikin:

–Chanimaki. Na dasibi jiwe ewapa wanibu jawendua man uiainan, jawenduajaidaki. Jaskabiaken ja mishki jiwe tekekin pudekin keyuxankanikaniki, mishki betsaa ana matsanbaunabumadan– jatu abaini

**Mai anua jaska taxni keyununbadiai
bebunkidi Jesúsun jatu
yusinikiaki, na janchadan**

³janua bui Olivos Mati anu mapeketan Templo bebun tsauabun Pedro inun Santiago inun Juan inun Andrésin Jesús june yukakin:

⁴—Ja mishki jiwe tekei pudekei keyuxanai min nuku yuixudan, ¿mia yukapa? ¿Ma kemai taei jaskai nun unantidumenkain? Nuku yuiwe— akabu

⁵⁻⁸ Jesúsun jatu yuikin:

—En ka en ana judiamaken eskai nuitkaapai taexanaibu Diosun yununi eskaxankanikiki. Xabakabi matu yuinun ninkakanwen. En kani ma en janu jua kemaya juni betsa betsapa bexun yuikin: “En Diosun Katua Mesías Cristoki”, iwanan, yuda ichapabu jatu padanxankanikiki. Jau tsuabunda jaska wakin matu padanyamaxanun bun uindaxankanwen. Ja inun, yudabu nuitkaapai taeaitianan, nawabu nawa betsabube detenamei inun tsakanamea akeakeaibu mai pacha sakua akeakeaya bunijaidai nuitkaapibun isin betsa betsapa tenea akeakexankanikiki. Jakia tsakanamea akeakeaibukidi bana ninkai datei meseyamaxankanwen, na jaskaidan, isin betsa beai mekin man uinxanai keska bebunkidi xabakabi en matu banabimaidan.

⁹⁻¹¹ Jakia matu dukun taewakin betsabun matu kupinun, iwanan, jatun mae xanen ibu anu matu iyuxankanikiki. Ja inun, ichati jiwe anuxun ekidi man jatu yusiaibun betsabun matu kusha kusha axankanikiki. Uindaxankanwen. Jakia en kakape ikunwankin man ea chibainbuwen taexun tsuabunda matu achixun xanen ibu kushipabu anu matu iyuabu jawada man yuitidu Diosun Yushin Pepatun matu yuimaxanikiki. Jaskaken jawa dateama:

“¿Jadakidi yuixanpa?” ikin bebunkidi shinanyamaxankanwen, jawen Yushin Pepatun matu jaska medabewaya en yusiankidi xanen ibu betsa betsapabuki man chanixanaidan. En ana judiamaken chanima yudabu mania akeakeabu dasibibu tsuabunda en kakapekidi ea ikunwankin jatu yusinbaunxankanikiki.

¹² Ja inun, yuda betsan janubi jawen betsabun ea ikunwainbu jatu achima akeakediaxankanikiki, jau jatu tenanbunban. Jabiaskadi wakin jatun ibubun janubi jawen bakebu jatu achimadiaxankanikiki. Ja inun, jabiaskadi wakin bakebu jatun ibubuki sinatakin jatun ibubun ea ikunwainbu jatu achimaxun jatu tenanmadiaxankanikiki. ¹³ Ekidi jaska yuibaunkin man ea chibainbuwen taexun yudabun matu danain midima matuki sinataxankanikiki. Matu jaska wabiaibun tsuada ea chibankin jeneisma jatu mekekin en jatu paxamaxanaii.

¹⁴ Jaskaken ja ichakanikakidi Diosun Daniel yuia keneni tsuanda ja yuikin unanmisdan, ja ichakanika taxnia Templo medan nia man bechiaya ja Judea anuabu mati keyatapa anu jau paxaxanunbunwen. ¹⁵ Ja inun, betsabu na mai bawa jiwe sapa xenia manaudi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxadiaxanunbunwen. ¹⁶ Ja inun, ikunwain ja bai anu dayaibudan, meshu medan jawen bemakia tadi kextupa bikatsis ibiai jau ana chintunkidanama jau jabiadiadi paxadiaxanunbunwen.

¹⁷ Jamen ja yumatianan, tuyabu inun ja chuchu amamisbudan, jatu peidawaxankanwan. ¹⁸⁻¹⁹ Jaska inun, Diosun mai damiwani anua yumanxanaibudan, tsuan jaska tenediamma inun ana teneama ixanai tenei dasibibu nuitkaapachakayamaxan

kanikiki. Jaskaxanaiwen taea uitian man jaska teneyamaxanunbun Dios ea akin yukakubainxankanwen.²⁰ Ja jaskaibutian Xanen Ibu Diosun jawa nemakin tsua paxawatidumabia ma jawenabu jatu katuniwen taexun jatuwen nuikin jau dasibibu debui keyuyamaxanunbun yumainbutian Diosun badi ana chai wama chaima xekaxanikiki.

²¹⁻²³ Jabatiandi juni betsabu juxun matu padankin yuikin: “Eadan, Diosun ea yunua en jawen jancha yuixunikaki. Ea ninkaidakanwen”, ikaibun betsabundi yuikin: “Diosun Mesías Cristo, eadan, matu anu en ana juxukl”, ikaibu betsabun ninkatan jatu yuikin: “Uian. Nuku anu Cristo ma juxukiaki”, ikaibun ana betsabun yuikin: “Uian. Janu ma juxukiaki, Cristodan”, ikaibun januxun jabun jamapai betsa betsapa juni betsabun atiduma jabun akin yuda ichapa padankin Diosun jawena wakin jatu katudiani padankatsis idiaxankanikiki. Jaskaibu ninkatan ikunwakin man kaneyamaxanunbun bebunkidi xabakabi ja padanananxanaibuki en matu besuunbi banabimai ninkakanwen–iwanan,

**Nukun Juchi Kayabi Iyua juidan,
eskakidanunbadikiaki, na janchadan**
(Mt 24.29-35, 42,44; Lc 21.25-36)

²⁴⁻²⁵ ana jatu yusinkin:

–Yumain keyuaibu binukainaya nai anua dasibi betsa betsapaxanikiki. Badi ana pexeama nukai taeaya uxedi ana chaxama meshuya bishi nidi iki keyui dasibi nai tako tako iki chuduanyan²⁶ en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uiainbun²⁷ Diosun jawen nai tsumabu yunua jawen katuabu mai jidabi kesua anu manibaunabu jatu ichawaxankanikiki.

²⁸ Jaskaken ji higuerawen man unantiduwen miyuiwen matu yusinun ninkakanwen. Ji pei petakatan chipu metubistan peiai uinkin ma badi kemai man unanmis keskai²⁹ jawada en matu yuixu bechitan en samama ana juai man unantidubuki.³⁰ Jaska inun, yudabu dasibi jiwebaunabu yamadiabuma chanima dasibi en matu yuixu jaskai taexankanikiki.³¹ Jakia jabiaskadiai nai anua inun mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

³² Janua jawatianda en ana juxanai tsuan unanmaki. Diosun nai tsumabun unanma inun ea Diosun baken en jawa unanmadiki. Jakia Epa Dios ja bestitun unainkiki.³³ Jaskaken tsuan jawa unanmawen taea matubudan, jawa chikishama pepakunkaini Diosbe janchakin ea manakin jatianda jaskaxanai uindakubainxankanwen.

³⁴ Jaska inun, juni chai kakin jawen tsumabu jawen daya tibi jawen jiwe anu yunua akeaketan jiwe beputi kexemis yunutan bumisbu keska wakin en matu yunubainkin akawaii.³⁵ Jawa chikishama ea manakaxankanwen. Jawa badida jiwe ibu jumis keskai eadi en ana juxanai man unanmadiki. Meshui taeayamenkain. Yamenapunmenkain. Takada keui taeayamenkain. Meshukidimenkain.

³⁶ Jaskaken jawaidakidan uxabu keska en matu bechiama ixanun³⁷ en matu yuiai jakimama uindakubainxankanwen, jabiaskadiai dasibibuki en jatuki chanidaidan– jatu anikiaki.

**Jesús achixanun ika yubakanibukiaki,
na janchadan**
(Mt 26.1-5; Lc. 22.1-2; Jn 11.45-53)

14 ¹Ja Pascuatianan, Egipto anuxun Diosun yunua debuwanika nai tsuman nawan bakebu tenankin nukun xenipabu dunkebaini shinanmatitianan,

uxa dabe ma kemai misi xaxama nun pimis ma kemaya Diosbe nukunabu janchaxunika xanen ibubu inun Diosun jancha kenenibu yusinananmisbu Jesús june padanxun achitan tenanun ika yubakaibun ²jakia betsabun jatu yuikin:

–Nukunabu nauaibutian
meyamayuxankanwen, jawen taea bedukubauntidubukidan– inibukiaki.

**Jesús ainbun xeni maukanikiaki,
na janchadan**

(Mt 26.6-13; Jn 12.1-8)

³Chipu Betania anuxun Simón yudaki chamini Jesúsun kaya waimatun jiwetanxun Jesús pimaya ainbu betsan nenkati bishtu juxupaki xeni inin pepa kadujaida bexun tesketan Jesúsun buxkaki mauka jaki jababainaya ⁴ja jabetan piaibu jatiditun inin mayai xetekin uin jaki sinatai yuinamekin yuikin:

–¿Jaska wakin ja xeni kadujaida jamen chakawakin maukaxumen? ⁵Jatu inanxun 300 xaba daya pei bitan nuitapaibu medabewatibin!– ika ainbuki ja ikaibun ⁶ jaki jaskaibu Jesúsun jatu nemakin:
–¿Na ainbun ea duawai jaskakin man dakewai? ⁷Nuitapai matube jiweabu medabewakin man jatu duawapaketidubuki. Jakia eadán, jawenchains man ea duawapaketidubumaki. ⁸Jaskaken eki xeni ininipa maukakin na ainbun en mawadiama bebunkidi en yuda ea pewaxuki, jau jawama ea maiwashadaxanunbunan. ⁹Jakia chanima en matu yuiaii. Mai jidabi anuxun kakape ekidi chanibaunkin na ainbun ea axu shinankin yuidiabaunxankananikiki, tsua jau jakimayamaxanunbunan– jatu wai ninkashinabun

Judasin Jesús jatu achimaxanun ika jatube yubakanikiaki, na janchadan

(Mt 26.14-16; Lc 22.3-6)

¹⁰janua Jesúsun 12 tsumabu betsabu Judas Iscariote Diosbe nukunabu

janchaxunika xanen ibubube janchai ka jaska wakin Jesús jatu achimatidu Judas jatube yubakai ¹¹ninkai shinan chankankin pei inankatsi yubabu chintunkidankin “¿Jatian janixun en Jesús jatu achimatidumen?” ikin shinankubidanikiaki.

Badi kaya Jesúsun jawen jenekin jawen tsumabubetan pinikiaki, na janchadan

(Mt 26.17-29; Lc 22.7-23;
Jn 13.21-30; 1 Co 11.23-26)

¹²Ja badi Pascua besi taemisbutian ja dukun chaxuwan bake tesenxun taewamisbutian jabianudi misi xaxama pikubainmisbutian jawen tsumabun Jesús yukakin:

–¿Jani kaxun Pascuatián badi kaya piti bawakin mia pewaxuntanpa?– akabu

¹³januxun jawen tsuma dabe yunukin yuikin:

–Bui Jerusalén anu jikitán jabianua juni betsan unpax shumuwan iabainaiki nukutan chibanbaintankanwen. ¹⁴Man chibanbaina janu jikiai uintan ja jiwe ibu yukakin eska watankanwen: “Nukun yusinan nuku yunuxudan, ¿mia yukapa? ¹⁵Jadatu dintu anuxun badi kaya en tsumabubetan nukun shinanmati Pascua piti pipa?” man wa ¹⁵januxun dintu ewapa manauundi ma pewe matu uinma januxun nukun piti bawakin pewatankanwen– jatu wa

¹⁶jawen tsumabu kainbaini Jerusalén anu jikitán jaska Jesúsun jatu yuixu keska ja juniki nukutan chibanbaini jabe kaxun jiwe ibu yukatan januxun Pascua nawakin piti bawakin menetan buxun jatu itani

¹⁷badi kai meshuaya Jesús jawen ¹² tsumabube kai jikitán ¹⁸tapu anuxun jabetan piaibun Jesúsun jatu yuikin:

–Chanima en matu yuiaii. Na jabiatian ebetan man piaibunan, jadatutunda man ea jatu achimai kaii– jatu wa

¹⁹jatu jaska wai ninkatan juinti nishmai keyutan yukakin:
–¿Jabia en eamen?– iaketaibun
²⁰ana Jesúsun jatu yuikin:
–Man en 12 tsumabun jabias kenchaki man misi pukuxun piaibunan, man bestichaitun ea jatu achimai kaii.
²¹Jaskawen taea jaska ekidi kenenibu chibain matun Juchi Kayabi Iyua en jaskai mawaxanaii. Jakia ja junin ea jatu achimai kaidan, pemajaidaki! Jaskaken ja juni kaianma inidan, pepakeanaii– ikaya
²²piti betsa keyudiabumaken Jesúsun misi betsa tsumaxun Dios kushipa yukatan tunketan inankin nuku yuikin:
–Na misi betsadan, en nami keskaki.

Pikanwen–

²³januxun kencha vino mata tsumaxun Dios kenwadiatan jatu inanbauna uva bimi vino abaunaibun ²⁴jatu yuikin:
–Yuda ichapabu medabewai mawakin en jimi en jatu jabaxunxanaii. Na vinongan, en jimi keskaki, jawen yubaka bena shinamatidan. ²⁵Chanimá en matu yuiaii. En Epa Diosbe xanen ibui en ana judiama na uva vino en ana matubetan ayuama ixanaii. Abaunkanwen– jatu watan

Pedro jaki dakei kaikidi Jesúsun yuiniaki, na janchadan
(Mt 26.30-35; Lc 22.31-34; Jn 13.36-38)

²⁶jabianuadi Salmos Davidin keneni betsa betsapa jatun juiwen nawai menetan janua Judasin jatu paxkabainken Olivos Mati anu jatu iyuxun ²⁷Jesúsun jatu yuikin:

–Jawen jancha yuixunika ekidi Diosun yuikin: “Chaxuan jatun mekenika en tenanyan jawen chaxuan datei paxai keyuxankanikiki”, aka ninkatan keneniken na jabiatian jabiaskadiai matu dasibun ea shinanma man ea jenebaini paxadiakanaii, chaxuan keskaidan.

²⁸Jakia ea tenanbiabu ana bestentan janu matuki nukunun ika bebunkidi Galilea anu en matu kaxunxanaii– jatu waya
–²⁹Pedron yuikin:
–Miwen datei dasibi paxai keyuaibun, eanan, en mia jawa jenekin putamaki– ikaya
³⁰Jesúsun Pedro yuikin:
–Jaskamaki. Chanimá en mia yuiaii. Na jabia meshu medan takada keu dabelediamaken: “En ja unanmaki”, iki dabe inun bestiki min eki dakekin yui kaii– aka
³¹ana unanxubima Pedron yuikin:
–Jaskamaki. En mibe mawabiai kai jaskai en miki dakeamaki– ikaya dasibibundi jabiaskasdi yui janchai keyutan

Getsemaní anu ka Jesús Diosbe janchanikiaki, na janchadan
(Mt 26.36-46; Lc 22.39-46)

³²Janua Jesús jawen tsumabube kai miban xuku betsa jawen kena Getsemaní mishkiwen kenenibu anu jikitán jatu yuikin:

–Nenu jabianu tsauyukanwen, en Diosbe janchai kaidan– ikainkin

³³Pedro inun Santiago inun Juan besti iyui kai punu nuka jawenchains juinti metexekei niti itan ³⁴jabudi yuikin:

–En yudawen mawakin en matu xunubainxanai shinain en punu nukajaidaki. Na jabianuxun uxama ea manakanwen– jatu wabaini

³⁵⁻³⁶janua kai benanta kakain main beui beti ixun Diosbe janchakin yuka jeneama yuikin:

–En Epa Diosuun, jamapai dasibi min atidu en unaiin. Ea jaska waibu minaki. En mawayamanun min nematidubia en shinain keskawen ea akama min shininan besti ea axanwen– atan

³⁷janua jawen tsuma dabe inun besti anu chintunkidan uxabuki nukutan jatu datekin Pedro yuikin:

—Simóneen, ¿min uxamen? ¿Jaskai hora bestichai bedu mestenwantan man ea manatidumamen? ³⁸Chanima matun shinan pebia matun yuda babuwen taea man punu nukaya matuki chakabu jikia man kaneyamanun bun Diosun jau matu medabewanun uxama jabe janchakanwen— jatu wabaini

³⁹ana jabianudi Diosbe janchai kaxun jabias jancha yuitani ⁴⁰ana jua ma uxa paen jatu achia uxabuki nukutan ana jatu bestenwan jawa jancha yuitima maniabun ⁴¹ana Diosbe janchatani juxun jatu yuikin:

—¿Jaskaida man uxa ninkama uxa bestia man juindukunsi ikanai? Uinkanwen. En Diosun bake matun Juchi Kayabi Iyua juni chakabubun ea achi bei ma kemakanikiki. ⁴²Ma ea jatu achimai juikiki. Benidikanwen, nun bununbunan— jatu wabidani jatuki dasitushitan jatu yui

Judasin Jesús jatu achimanikiaki, na janchadan

(Mt 26.47-56; Lc 22.47-53; Jn 18.2-11)

⁴³Jesús jancha menediamaken Diosbe nukunabu janchaxunika xanen ibubu inun Diosun jancha kenenibu yusinanamisbu inun mae xanen ibubu betsabun jatu yunua juni ichapa nupe chaipayabu inun kushati jiayabube Jesúsun 12 tsuma betsa Judas jatube jukin ⁴⁴Jesúski nukuyukin Judas Iscarioten bebunkidi jatu yubakin yuikin:

—Ja en tantsu akaidan, jaki. Achixun iyukanwen— jatu abidanxuwen taexun

⁴⁵Judas Iscarioten Jesús bechitushitan jaki nukuxun yuikin:

—Yusinaan, en miki nukuyuaii— iwanan, tantsu akaya ⁴⁶“Jakiaki, akanwen”, ibain achiaibun

⁴⁷Jesúsun tsuma betsan jatu mepanmanun ika nashui ikain jawen nupe chaipa sitan Diosbe nukunabu

janchaxunika xanen ibujaidatun tsuma mapexpaikin maebain paxteaya ⁴⁸⁻⁴⁹Jesúsun jawen tsuma nematan ma jaki nkuabu Jesúsun jatu yuikin:

—Uatian xaba tibi Templo jemaintin anuxun en matu yusinkubaina man ea xabakabi achiama ikubainshinabuki. ¿Jaskai natian meshu medan yumetsu achimisbu shinain jawen deteti nupe chaipaya inun jawen kushati jiya man bekanxumen? Jamen man ea akamaki. Diosun jancha kenekin bebunkidi ekidi yuini jaska menekin man ea achiaii— jatu waya

⁵⁰janua dasibi jawen tsumabu datekin Jesús besti jenebaini paxai junei keyubainaibun

⁵¹bedunan betsa tadi juxupa bestiwen yabukua ja paxama Jesús chibain policiabu betsan achipaikin ⁵²jawen tadi besti tsumaya mepamai jawen tadi pekabaini tadiuma paxai junekainiki.

Xanen ibubu Junta Suprema anu Jesús iyunibukiaki, na janchadan

(Mt 26.57-68; Lc 22.54-55, 63-71;
Jn 18.12-14, 19-29)

⁵³Janua Diosbe nukunabu janchaxunika xanen ibubu dasibi inun, mae yununika xanen ibubu betsabu inun, Diosun jancha kenenibu yusinanamisbu jabu dasibibu janu Diosbe nukunabu janchaxunika xanen ibujaida Caifásin jiwe anu jabu dukun bua icha maniabu anu Jesús iyukin janu bichiaibun ⁵⁴janua Pedro datekin benantaxun uinkubaini ka xanen ibun jiwe jemaintin anu Templo mekenikabube tsaua chin yukin june uianyan

⁵⁵januxun Diosbe nukunabu janchaxunika xanen ibubu inun Junta Supremabu dasibi ichaxun Jesús jau tenanunbun jakidi chakabujaida yuiaibuwen chani jancha ikun keska watan jawen unanti watan tenankatsi

benai maniabun⁵⁶juni betsapabun jakidi chani chitebiakin jakia juni dabetun jabias chani yuiabumaken⁵⁷jaskaibun betsabudi benitan chani jakidi chitekin yuikin:

⁵⁸–Nukun ninkakinan, Jesúsun eska yuiai nun ninkashinaki. Matu yuinun: “Na Dios kenwanti mishki Templo junibun anidan, tekekin pudekin keyutan uxa dabe inun besti kaya junibun akamaken ana en benixanaii”, ikai nun ninkashinaki– jatu wa akeakeaibun⁵⁹jabun jabias chani chakabu jakidi yuiyabuma ninkai jaska waxun kupitima shinainbun⁶⁰jaska waibu ninkatan Diosbe nukunabu janchaxunika xanen ibujaida Caifás namakis dasibube tsaua benitan nixun Jesús yukakin:

–Na junibun mikidi chakabu yuiaibudan, ćmiadan, jaskai min jatube kemanameamamen?– aka

⁶¹Jesús pes jawa yuiama niken Diosbe nukunabu janchaxunika xanen ibujaidatun ana yukakin:

–Jabia min miamen ikaidan, min Diosun bake nukun mekenan Mesías Cristodan?– aka

⁶²–Jaa. Jaska min ekidi yuaidan, en jaki. Epa Dios kushipajaidatun jawen yusiudi en tsaua matun Juchi Kayabi Iyua nai kuinwen en juai man ea uinxanaii– ikaya

⁶³⁻⁶⁴ninkatan Diosbe nukunabu janchaxunika xanen ibujaida Caifás jaki sinatajaidakin jawen sanpu ushnitan yuikin:

–Dios ichaikiki. Ana jatida janchai en ninkakatsi ikamaki. Na jaska jadi janchayadan, ćjaskada jakidi man shinain?– akin jatu yuka:

–Dios ma ichaxuki. Jau tenan menunwen– iake iakeaibun

⁶⁵januxun ichakawakin taewakin jaki kemu michukin jawen bedu beputan kaxe wakin kushakin yukakin:

–¿Tsuau mia kushaimenkain? Unantan nuku yuiwe– akubainaibun januxun Dios kenwanti Templo mekenikabundi bepas bepas akaibun

Pedro Jesúski dakenikiaki, na janchadan
(Mt 26.69-75; Lc 22.56-62; Jn 18.15-18, 25-29)

⁶⁶⁻⁶⁷janua jemaintin anu Templo mekenikabube Pedro chin yuaya Caifásin tsuma ainbu betsan bechitan yuikin:

–Miadan, Jesús Nazaret anuabe min nimiski. En mia unaiin– aka

⁶⁸Pedron padankin yuikin:

–En ja unanmaki, ja jaska min jakidi janchaidan– itan janu jemaintin kene jikitxui anu ka niken takada keui taeaya⁶⁹janua ja ainbu ana Pedro bechitan janu maniabu yuikin:

–Na junidan, Jesúsun tsuma betsaki– jatu waya

⁷⁰Pedron ana jatu yuikin:

–Jaskamaki– ikaya jabianudi mapuxun Pedro uinkin yuikin:

–Chanima min Jesúsun tsuma betsai en unaiin. Galilea anua min jancha en ninkaii– akabu

⁷¹Pedron jatu yuikin:

–Ja juni man jakidi janchaidan, en ja unanmaki. En chani chakayadan, jau Diosun ea kupinunwen– ikaya

⁷²jakimamadi ja kachu takada keuai ninkatan jaska Jesúsun yuikin: “Takada dabeki keudiamma dabe inun bestiki: ‘En ja unanmaki’, iki min eki dakei kaii”, abidana shinantan Pedro kaxa chakaya manikiaki.

**Pilato anu Jesús iyunibukiaki,
na janchadan**

(Mt 27.1-2, 11-14; Lc 23.1-5; Jn 18.28-38)

15¹Ma penaya Diosbe nukunabu janchaxunika xanen ibubu inun Diosun jancha kenenibu yusinanamisbu inun mae xanen ibubu Junta Suprema

jidabi ichaxun jaska wakin Jesús tenantikidi yubakatan Jesús menexxun romano xanen ibu Pilato anuxun chitenen ixun iyuabu ²Pilaton Jesús yukakin:

–¿Miadan, min judio xanen ibubu binu keyuamen?– aka

Jesúsun yuikin:

–Jawaikika! Jabiadi min ea yuiai– aka

³Diosbe nukunabu janchaxunika xanen ibu betsa betsapabun jakidi chani yuikin chiteaibun ⁴Pilaton ana Jesús yukakin:

–Ja mikidi betsa betsapa chakabu yuiaibudan, ¿min jawa jatu yuiamamen?– aka

⁵Jesúsun jawa yuaima niken: “¿Jaskai janchamamen?” itan Pilaton jadakidi shinantima tsauken

Jesús jau tenanunbun Pilaton jatu yununiaki, na janchadan

(Mt 27.15-31; Lc 23.13-25; Jn 18.38-19.16)

⁶romano soldadobun jatu achixun bichimabu badi tibi ja Pascua naawaibutian jau bestichai taxninun ja romano xanen ibu Pilaton beyawen taexun maen katuaya jatu kainmaxunpakemisken ⁷jabatiandi juni betsa jawen kena Barrabás juni betsabube detenamekin jatun xanen ibu detepaikin jatubetan juni betsa tenainmaken jabun achixun bichimabun ⁸janua yudan kaian Pilato anu ana bexun yuikin:

–Nawaibutian juni betsa badi tibi min nuku taxnimaxunmis keska wakin natiandi juni betsa nuku kainmaxunwen– akabu ⁹⁻¹⁰Diosbe nukunabu janchaxunika xanen ibubu Jesúski chani chakai jaki sinatakin jaska waxun maematima maemanun ixun iyuabu Pilaton unankin yudan kaian yukakin:

–¿Judiobun xanen ibu kayabi Jesús jawa wama matu nichinxunpa?– ikaya

¹¹Diosbe nukunabu janchaxunika xanen ibubun yudan kaian ana Jesúski sinatajaidamakin jatu dasibidi sinatamakin keyukin:

–Jau Barrabás nuku kainmaxunun yuikanwen– jatu waibun yudan kaianen jabiaskadi yuiaibun ¹²Pilaton ana jatu yukakin:

–Ja juni: “En judiobun xanen ibuki”, iki kenamisdan, ¿matu jaska waxunpa?– jatu wa

¹³jancha kushipawen ana yuikin:

–Cruzki nuku mastaxunwen– ikaibun

¹⁴ana Pilaton jatu yukakin:

–¿Natunan, jawa

chakabuwashinamen?– jatu waya ana unanxubima jancha kushipawen yuikin:

–Cruzki nuku mastaxunwen –aka jawenchains ikaibun

¹⁵jaskaibun Pilaton yudan kaian daewakin Barrabás jatu kainmaxuntan Jesús jatu kakush kakush amatan jau cruzki jatu mastaxuntanunbun jatu yunua

¹⁶januxun xanen ibu Pilaton jiwe ewapa jemaintin anu soldadobun Jesús iyuxun soldado jabus jaki xukui ichatan ¹⁷xanen ibun bemakia tadi chaipa tashijaida Jesús sawemaxun muxa maiti waxun maimatan ¹⁸unanxubima jancha kushipawen kaxe wakin yuikin:

–Judio xanen ibu kayabidan, min miaki– akin jawenchains yuibetanan

¹⁹ji sidiwen makush makush atan jaki kem u michutantankin jaki danti itan jancha pepawen yuixunikapaikin kaxe wakin ²⁰keyutan bemakia tadi chaipa tashijaida pekatan jawen tadi kayabis Jesús sawemaxun cruzki mastakatsi kainmabainaibun

Cruzki Jesús mastanibukiaki, na janchadan

(Mt 27.32-44; Lc 23.26-43; Jn 19.17-27)

²¹janua juni betsa Simón jawen mae Cirene anua jawen bakebu Alejandro

inun Rufodan, bai anu dayatani jui jatuki nukutan Jesúsun cruz jau iaxunybainun soldabobun yunua iaxunbainaya

²²Gólgota anu Jesús jadi iyukin mapematan, jaska yuiadan, Buxka Xau Mati anudan,²³uva vino jene isin nemati dau muka jusia amapayabu danankin akamaken²⁴⁻²⁵ma badi jui nai puchinin dakaken Jesúsun tadi peka keyutan mastaxun cruzki nichintan soldadobun shinankin yuikin:

—¿Tsuán jawen tadi tibi biainmenkain? Akanwen— ixun jawen beyusti putapakekin jawen tadi paxkatan

²⁶jawen taexun jatu tenanmai unanti ji bexa tuaxki kenekin: “Judiobun Xanen Ibjujaidaki”, aka bexun Jesús mamaki ja ji tuaxki kenea mastadiaxun²⁷⁻²⁹jabianudi jabe juni yumetsu dabedi cruz dabeki mastaxun betsa jawen yusiudi nichinxun betsa jawen yusmaudi nichindiabu junibun dainbainkin budi budi ikin yuikin:

—Uinwen. “Dios kenwanti mishki Templo tekekin pudekin keyutan xaba dabe inun besti kaya en ana benixanaii”, min ishianki.³⁰Min ja kushipa jayadan, ja cruz anua mimebi paxai butudiwe, mawamadan— akaibun

³¹Diosbe nukunabu janchaxuniaka xanen ibubu inun Diosun jancha kenenibu yusinanamisbundi Jesús kaxe wadiai yuinamekin:

—Juni betsabu medabewabiamis jamebi paxatidumaki.³²Jaskakenan, jaska Israelbun Xanen Ibu Cristo kayamenkain cruz anua butuai uinkin na jabiatian nun ikunwantiduki— ikaibun ja jaska waibu ninkatan juni yumetsu dabe jabe mastadiabudi jancha chakabukin Jesús yuandiaibun

Jesús mawanikiaki, na janchadan (Mt 27.45-56; Lc 23.44-49; Jn 19.28-30)

³³⁻³⁴janua badi manananbibiaken badi nuka meshua itsa daka manaibun

ma badi nai puchinin dakaken bepenakainaya jabiatandi Jesúsun jui kushipawen yuikin:

—Eloí, Eloí, ¿lémá sabactani?— ikidan juni kuin janchadan, “En Diosuun, en Diosuun, ejaskakin min ea jeneamen?” ikaya

³⁵ja naman jatidi mapuxun betsabun ninkatan yuikin:

—Ninkakanwen, Diosun jancha yuixonika Elías kenaikikidan— ikaibun

³⁶janua ja naman mapuabu betsa kushikidan janu jawen tsiniti vino muka pu atan tawaki ustanaxun bexun amanun, iwanan, sananxunkin shinankin yuikin:

—En daka manakayuti Elásin buteyui juimenkain— itan nikén

³⁷janua Jesús ana unanxubima bis itan mawaya³⁸Templo medan tadi dintu wakin kebenibu jamebi manaundia dis iki keyuaya³⁹soldado romano capitán Jesúsun besuudi nixun uinkin Jesús bis itan mawaya yuikin:

—Chanima kayaki. Na junidan, Diosun bakeki— ikaya

⁴⁰⁻⁴¹janua ainbuabu Galilea anuabun Jesús Galilea anu ka jabun duawakin chibamisbun uiainbun jatubetan uindiaibudan, Josén betsa maxku Santiago ja dabetun ewa María inun, Salomé inun, María Magdalenaan jabun benantaxun uiainbun janua ainbu betsa betsapabu Jerusalén anu Jesúsbe beshianbundi jatubetan Jesús mawai uinibukiaki.

Jesús mawa maiwati medan jananibukiaki, na janchadan

(Mt 27.57-61; Lc 23.50-56; Jn 19.38-42)

⁴²Janua ma badi kaya jabiatandi judiobu sábadotian juindukunkatsi bebunkidi piti pewamisbukén⁴³janua judio Junta Supremabube jatube xanen ibumis betsa José Arimatea anua kainitun Cristo Xanen Ibuxanai

manakubainshina jawa dateama Pilato anu kaxun Jesús maiwakatsi jawen yuda yuka ⁴⁴Pilato e itan yukakin:

–¿Ma jawaida jaskatan mawaxumen?– ixun soldado capitán kenaxun yukakin:

–¿Jesúsdan, jatian ma mawaxumen?– aka

⁴⁵capitánen uinxu ja badi mawaxu yuia Pilaton ninkatan jawen yuda José yunua kaxun ⁴⁶⁻⁴⁷tadi juxupa chaipa bixun Jesúsun yuda jawenabubetan butexun tadiwen dayabutan bukin janu maiwati mishki kini waimabu anu datainbu María Magdalena inun José ewa Marián uiainbun mishki beputi ewapawen bepunibukiaki.

Jesús bestenkainikiaki, na janchadan
(Mt 28.1-10; Lc 24.1-12; Jn 20.1-10)

16 ¹Ma sábado juindukunti binushinken María Magdalena inun, Santiagon ewa María inun, Salomén jatibun Jesúsun yuda jawen dapuxkatsi xeni intinti bitanshina ²janua penayajaida domingotian maiwati anu bui ma badi kainyuaya ³yuinamekunkainkin:

–Ja mishki beputi ewapadan, ⁴tsuan nuku bepenxunkin tadanxuntidumen?– ikubaini

⁴jakidi besukainkin uinkin ja mishki ewapawen bepushinabu ma jamaudi tadanmea bechitan ⁵ja maiwati kini medan jikitan uinkin jabianudi juni bedunan tadi juxupa chaipa sawea yusiudi tsaua uin e ikaibun ⁶jatu yuikin:

–Jesús mastashinabu man benai jua en unaiin. Dateyamakanwen. Jaska bebunkidi matu yuishina keskai ma bestenkainaki. Ana nenumaki. Janu datanshinabu jikixun uinbaini ⁷buxun Pedro inun jawen tsuma betsabu menan jatu yuditankanwen: “Jadan, matu bebunkidi Galilea anu kaxuinkiki. Jadia matube ana ichai benai kaikiki, jaska matu yuishina keskaidan”– jatu wa

⁸ainbuaibun ninkatan maiwati kini anua kainkaini saki saki iki kushibidani dateyabi bekin jatu dainkubidankin tsua yuiana benibukiaki.

Ja dukun María Magdalena Jesús nukuniaki, na janchadan
(Jn 20.11-18)

⁹Penayajaida domingotian Jesús bestenkaini jatuki nukutanun ika kai ja dukun María Magdalena ja 7 yushin chakabu jaya kainmayamaki nukua ¹⁰janua benimakaini jatu banabimai kakin jabun Jesúsun chibanmisbu pes mania Jesúsun manui kaxaibuki nukuxun ¹¹jaska Jesúsun jiwea uinbain jatu yuia jawa ikunwanma ikaibun

Jesús jawen tsumabuki ana nukuniaki, na janchadan
(Mt 28.16-20; Lc 24.13-49; Jn 20.19-23)

¹²janua Jesúsun tsumabu dabe bai tanabainaibu jaska uinmisbu keskama jatuki Jesúsun nukua uinbidani ¹³bexun jabun chibanmisbu ichapabu jatu banabima ninkatan jabun janchadi jawa ikunwanma idiaibun

¹⁴janua Jesúsun jawen 11 tsumabun pi maniabuki nukua uin juinti kushikin Jesúsun bestean uinbidan jatuki chanibiabu jawa jatu ikunwanma ibayaibun Jesúsun jatu ja atan ¹⁵jatu yunukin:

–Mai jidabi anu bukin Diosun kakape ekidi dasibibu jatu yusinkubainxankanwen.

¹⁶Jabun ea ikunwain jenewen man jatu nashimaya en jatu mekexanaii. Jakia jabun ea ikunwakin shinan betsa wabuma en jatu kupixanaii. ¹⁷Jaska inun, tsuabunda ea ikunwain jaskakubainxanaibu matu yuinun ninkakanwen. En kushipa jayaxun en kenawen taexun yushin chakabu kainmaxankanikiki. Ja inun, jancha bena tapindiamawen janchaxankanikiki. ¹⁸Ja inun, dunu pianan meabu jawa jatu piama ixanai inun, jawada mawati dau jatu amabiabu

aka jawa jatu chakabuwatan tenema ixankanikiki. Ja inun, isin teneaibu jatu meabu xuxaxankanikiki—jatu watan

Nai anu Jesús inanikiaki, na janchadan
(Lc 24.50-53)

¹⁹Xanen Ibu Jesús jatube janchai meneaya januxun Diosun nai anu

ainitan jawen yusiudi tsau maya
²⁰janua Jesúsun tsumabu kainbaini bukin mae tibi anu yusinkubaunaibun nukun Xanen Ibu Jesúsun jatu medabewakin jawen kushipawen jawada unanti dami atimaska chanima jatu uinmakubainibukiaki.

Marcos

KAKAPE LUCASIN KENENIKIAKI

LUCAS

Jawen jaibu Teófilo kene
bumanikiaki, na janchadan

1 ¹⁻⁴Xanen ibu Teófiloon, en mia kene bumai uinwen. Jaska Jesúsun yusinkin taewani anua jawen tsuma kayabibun uian akeakenibu inun Jesúsun jawada jatun bedubi uinkubainima Diosun jatu katua jabun jawen kushipayabu jau chanikubainxanunbun jabun nuku yusianbu juni betsabun jabiaskadi bebunkidi unankin pewatan nuku kenexunimabuki. Jakia jawen tsumabun yusinmiskidi miandi min ninkaima: “Chanimaki”, eandi jabikaskadi shinankin en mia kenexunai min unankubainxanun jaskani Jesúskidi dasibi yuka iki nati itan eandi ninkakin pewatan en mia kene bumaii.

Nashimanika Juan kainxanaikidi
bebunkidi jawen ibuki nai tsuma
chaninikiaki, na janchadan

⁵⁻⁷Judea mai pakea jatiuma anu Herodes jatun xanen ibu ikunkainaya jabiatiandi jawenabu Diosbe janchaxunika Abíasin enabu xuku betsa anua jawen kena Zacarías jiwekunkainikiaki. Janua jawen ainin kena Isabel Aarónen babadi yuxabujaidakin bake biama jawen benedi anibujaidatun bakewanun

ixun shinankubainkin Diosun jancha chibankin jawen yunuti inun jawen nemati kaneabumaken jatuwen Dios benimakunkainikiaki.

⁸Janua janu Dios kenwanti Templo anu Abíasin enabu betsabube Zacarías uxe bestichai dayakin ⁹Templo anu jikixun jau ininti jatu kuaxuntanun jatun beya chibankin jatun kena tibi kenetan ja una tude bitan jawen kena bechitan Zacarías katuabu ¹⁰jikixun chi tsistuki jawen Dios kenwanti ininti dau Zacaríasin jatu kuaxunaya jemaintin anuxun yuda ichapabu ichaxun Dios kenwain danti ika maniabun ¹¹januxun ininti kuati chi tapu yusiudia Diosun nai tsuma damia nia ¹²Zacaríasin uin e itan en jaskai iki datejaidaya ¹³⁻¹⁶januxun nai tsuman yuikin:

–Zacaríasin, dateyamawe. Jawada min yukai ninkamisxun Diosun mia axunxaniki. Min ain Isabel yuxabubiatun bake bima juni bake kainxaniki. Kaiyaintian min benimaya minabudi benimaxankanikiki. Kenakinan: “Juanki”, axanwen. Januxun minabu Israelbu chakabubiakubainaibun Juan kainixun jatu yusinkin nukun medabenan yushin Dioskidi yuda ichapabu chibanmaya benimajaidaxankanikiki. Nanei taea Diosun Yushin Pepatun kushipa

wakubainkin jeneama uva jene vino
inun jene paepa tibi akama min baken
Dios benimawakin minabu Yavé Dios
anu ana jatu chintunwanxanikiki, jatu
chibankakinan. ¹⁷Jaska inun, min bake
Juanenan, Diosun kushipaya jawen
Yushinyan bebun nixun jaska Elásin
Diosun jancha yuixunikatun ani keska
wakin jatun ibubu jabun bakebu ana
danananain sintanameama inun ja
patapakin ninkaisbuma jau jabundi Dios
chibankunbun min bake Juanen yudabu
jatun Xanen Ibu juai manamakin jatu
shinan betsa wamaxanikiki– aka

¹⁸jawen jancha ninkabiatan shinankin
Zacaríasin nai tsuma yukakin:

–Ma en anibuaki. En ain yuxabudiki.
¿Jaska waxun min jancha chanima en
unantidumen?– aka

¹⁹nai tsuman yuikin:

–Eadan, en Gabrielki, nai tsuma
xanen ibudan. Diosbe beisinain en
janchamiski. En mibe janchanun na
kakape Diosun ea yunuxuki. ²⁰Jakia
en jancha min ikunwanmawen
taea min bake kaindiamma juyu min
jiweyukunkainxanaii. Na en mia
yuiaidan, Diosun akatsis ikin axanikiki–
atan kaya

²¹jaskai nishma dakaken Templo
jemaintin anuxun manakin jawenabu
yuinamekin yuikin: “Jawa dakiai ikikiki,
taxniamabin!”, iki maniabun ²²atimas
taxnitan jaska waxun jatu jancha
watimaken jabun unanbaunkin jakidi
yuikin:

–Jaskakenan, ¿Templo dintu
medianuxun namai keskakin Dios anua
uinxumenkain?– ikaibun jawen meken
bestiwen jatu unanmatan jabiaska
janchama jatube dayakunkainkin

²³Templo anua jatun daya uxe
nichintan Zacarías inun kaxun

²⁴jawen ain bakewa tuyaima 5
uxe besti jawenabube janchakatsi

ikama Isabel jawen jiwe anus
jiwekunkainkin shinankin: ²⁵“En bake
bitidumawen taexun jau ana enabun
ea dake wayamaxanunbun Diosun ea
bechipaikin ea medabewaikiki”, ika
benimakunkainikiaki.

**Jesús nanexanaikidi Maríaki nai
tsuma chaniniakiaki, na janchadan**

²⁶⁻²⁷Isabel tuya 6 uxe kaya chipash
jawen kena María chutanamei
pesediamá jawen epan beneyawakatsi
jatun xenipabu xanen ibujaida Davidin
baba José yubakin ibu waimaken
januxun Diosun jawen nai tsuma Gabriel
jau kakape María yuinun Galilea mai
pakea namakis mae betsa Nazaret anu
yunua ²⁸damitan jawen dintu medan
jikixun Gabrielin María yuikin:

–En miki baiyuaii. Yavé Dios miwen
benimajaidakin mia bechipaikiki–
atushia

²⁹jawen jancha ninkai e itan Maríán
shinankin: “¿Jaskakin ea jaska
yuimenkain?” ixun shinanyan ³⁰⁻³¹nai
tsuman ana yuikin:

–Maríaan, ewen dateyamawe. Miwen
daban Dios benimajaidaiwen
taexun juni bake mia bimakin miki
nanexanikiki. Chipu kaian kenakin:
“Jesúski”, axanwen. ³²Jamen Xanen Ibu
kushipajaidakunkainaya jabun yuikin:
“Yushin kushipa jatu binuatun bakeki”,
iwanan, kenakubainxankanikiki. Ja inun,
jaska matun xenipabu xanen ibu David
xanen ibu ini keskai ³³Diosun yunua min
bake Jesús Jacobun bababun Xanen Ibu
ipaxanikiki, niti ikama ikibi ikidan– aka

³⁴Maríán yukakin:

–En chutanamei pesediamabia
¿jaskakan en bake nanetidumen?– aka

³⁵jawen nuikin nai tsuman ana yuikin:

–Kushipa jatu binuatun jawen
kushipawen jawen Yushin Pepa yunua
mikia dami naneima kainmaxun jatun

Dios chibanyan: "Jadan, medibi Diosun bakeki", ixun kenakubainxankanikiki.

³⁶⁻³⁷Jamen betsadan, minabu Isabel ma yuxabubia ma juni bake bimaki. "Jaskatun bake bismaki", iwanan, yuanbiakubainmisbu jamapai shadabu Diosun atiduwen taea ikis uxe meken buxka ka pustuki- akaya

³⁸Marían yuikin:

-Peki. Jaska min ea yuiaidan, jau shinanxun ea anunwen. Diosun tsumadan, en eaki- aka ninkatan kainkainikiaki.

**Isabel anu María bai
kanikiaki, na janchadan**

³⁹Gabrielin María jancha wawanshinken Judea mai pakea mawa mati matipa anu mae jatiumanua María jawaida bai ka ⁴⁰Zacaríasin jiwe anu jikitan Marfan Isabel yuikin:

-Ewaan, miki bakin en mia uiuyuiai- atushiaya ⁴¹Isabelin María ninkaya jawen pustu medanua jawen bake tukuaya Diosun Yushin Pepatun kushipa waya ⁴²benimakin Isabelin unanxubima bis iki eai itan yuikin:

-Diosun mia bechipaikin ainbu betsabu binumakin mia inun min bake naneshinxun mia jabe duajaida waikiki. ⁴³⁻⁴⁴Min ea kena min jancha en ninkaya en bakedi benimajaidai en pustu medanua tukuxuki. En jawayaidaken Diosun ea duawayan en Xanen Ibun ewa min eki bayuui. Jaskaken en benimajaidaii. ⁴⁵Jaska inun, jawada Diosun mia axunxanai mia yuishina min ikunwainwen taea min benimajaidaii- aka

⁴⁶⁻⁴⁸januxun Maríandi yuikin:

"En jawen tsuma bexmasjaidabiaken Diosun ea shinankin ea katushinaki. Jaska inun, dasibibun shinankin: 'Diosun María shinan chankanwanmiski', iwanan,

ekidi yuikubainxanaibuwen taea en mekenan Dios kushipawen taea jointi benimakin en Xanen Ibu Dios en kenwaiin.

⁴⁹⁻⁵⁰Ja inun, duawai jawen kushipaki mesemisbuwen nuikunkaini shinan pepa kushipa jatu binukin keyuatun ea duajaida washinaki, jawen kena medibi pepatunan.

⁵¹⁻⁵³Jaska inun, ibubis yubakatan keinsbuma jatu xanen ibu wakin betsabu nuitkapi buniaibu piti pepa jatu yani wamakin mabu ichapayabu nuitkapawakin meken bestia mais jatu nichinmiski.

Jaska inun, ibubis keainbu ichakawakin jatu jointi nishma wakin ibubis xanen ibui kushipamisbu jatu mintanuma wakin Diosun jawen kushipa uinmakin jatu unanmaxanikiki.

⁵⁴⁻⁵⁵Janunkain jaska nukun xenipabu Abraham inun jawen bababukidi yubaxuni shinain nukuwen nuikin nun jawen tsumabu Diosun ana nuku medabewakin taewani jeneama nuku axunkubainikiki",

ishian ⁵⁶janu María bayui niti ikama jabe jiwejun uxe dabe inun besti nichintan janua María inun kanikiaki, jawen jiwe anu chintunkainidan.

Juan kainikiaki, na janchadan

⁵⁷Janua Isabelin bake bima ewai pustujaidatan juni bake kainken

⁵⁸⁻⁵⁹ja dapi jiweabu inun jawenabun Dios Isabelwen nuikin medabewaya ma bake kaian jabun ninkatan benimashianbun janua kainshina 8 xabatian ibu dabetaan jawenabu kena uinun ika bexun jaska jatun xenipabun yununi chibankin jawen jina kubichi mextexuntan jawen epa

Zacarías dabipananbun⁶⁰ jawen ewan jatu nemakin yuikin:
 –Jaskamaki. Jawen kenadan, “Juan” wakanwen– jatu wa⁶¹ jabun Isabel yuikin:
 –¿Jaskakin jadi min kenai? Min benen enabun kenadan, jadi jayabumaki– ikeaketen⁶² januxun jadakidida jau kenanun jawen epa jujuwen taexun mekenen besti yukabu⁶³ mekenendi jaki keneti jau bexununbun jatu yunuua bexuanbu Zacaríasin kenekin: “Jawen kenadan Juanki”, jatu wa uin e itan “Jadidikiaki”, ikaibun⁶⁴ jaskatanaibuns Zacarías jawaida ana janchakin Dios kenwanikiaki. ⁶⁵ Januxun ja dapi jiweabu dasibi e iki: “Jabaal!” ishinxun janu mai pakea Judea mati matipanu jiweabu anu jaskashina jatuki chanibaunaibun⁶⁶ jaskaibu dasibibun ninkakin unain jaskakenan: “Diosun ja bake yumewaidan, jaskadada ixanikika”, iki ja bakekidi janchanibukiaki.

Zacariásin Dios kenwanikiaki, na janchadan

⁶⁷ Juanen epa Zacarías Yushin Pepatun kushipa wa janchakin Dios kenwain Dios janchaxunkin yuikin:

⁶⁸ “En Xanen Ibu pepa Israelitabun Diosuun,
 min ma minabu medabewakin
 jatu pekakin akawai jushianwen
 taexun en mia kenwaini.

⁶⁹ Min tsuma Davidin baba betsa
 kushipajaida mekenan kayabi
 nuku anu min ma nuku
 nichinxunshinaki.

⁷⁰ Nukun xenipabu jatu yubai
 jakidi jabias min jancha
 yuinxunika medibi tibi min jatu
 janchamapaunidan,

⁷¹ jawen taexun nukuki sinamatibusu inun,
 dasibi nuku danammisbu min
 jatu jawen maemakin nuku
 paxawatiduki.

⁷² Jaska bebunkidi nukun xenipabu jawawen jatu jaska wati nuijatuwen yubakai
 jatukidi jancha medibi wai min janchapaunidan, jakimama min shinauin.

⁷³ Jaska jawen kanetima wai nukun xenipabu Abraham min jabe yubakani
 natian min ma ana nuku shinankin bechipaiaii.

⁷⁴ Ana tsua dateyabi nun jiwestidubuma inun nukuki sinamatibusu min jatu nuku daewaxunaki.
 Jawama nun mia dayaxuni

⁷⁵ jaska chanima pepawen bestiwen medibitan
 nukun jiwea jidabiwen mia bebun
 nun pe nikatsis ikaii, itan

⁷⁶ janua epaan, miadan, ‘Dios dasibi binu keyuatun yuixunikaki’,
 iwanan,

mia kenaxankanikiki. Janu nukun
 Xanen Ibu Mesías juxanai
 bebunkidi jawen bai min jatu
 pewamaxunxanaii,

⁷⁷ jau jawenabun jatun chakabuwen taea
 Dioski mesekin jatun shinan chakabu
 jenetan
 Dios buamatan jau meketi jiwea jatu
 inanxanunan.

⁷⁸ Nukun Dios nukipa chakamatun
 nuku bechipaikin
 nai anua jawen bake xaba badi bena
 keska nuku butexunxanikiki.

⁷⁹ Yudabu jatun chakabuwen taea
 atimapanu mawai benui
 bupananbun meshu ten ikai anua
 bin chaxa watan nuku inan keska
 wakin nun jabu jiweyuabu nun
 jawen unanuma jiwei kai nuku
 yusinxanikiki”,

iniken

⁸⁰ Zacaríasin bake Juan ewai Diosbe jaibunamejaidai unanepai jawenabu

Israelbu yusindiamma jadi tsua
jiweabumanu jiwekunkainikiaki.

Jesús kainan, eskanikiaki, na janchadan
(Mt 1.18-25)

2 ¹Janua ja jaskaitian romano xanen ibujaida César Auguston jawen maiwan kesua jidabi anuxun juni tibitun kena netankin jau tanaxanunbun jawen tsuma betsa betsapabu yununiaki.
²Januxun tsuan jaska tanakin taewadiama Siria mai pakea anu romano xanen ibu bexmas Quirinio xanen ibuaya romano xanen ibujaida César Augusto ja dukuntun jau jawenabu tananunbun xanen ibu bexmas dasibibu jatu yunuimawen taea ³jau tananunbun jatun xenipabun mae tibi anua besti ichai buaibun ⁴José jawen mae Nazaret mai pakea jatiuma betsa Galilea anu jiwebia Davidin babawen taea ⁵Josén jawen kena jatu netanmanun ika jawen xenipabu Davidin mae Belén, Judea mai pakea anu kakin María José bimakatsi ibuama bestimabu dadatamea tuyaima iyui jabe kai jikia ⁶⁻⁷Belén anu jiwe pakatan uxati ma keyubia texke ikabun jani itima ina jiwe anu José inun María ikabun janua Maríán juni bake iyua kaian dachutan yabuxun burro pimati ji xantu wanibuki basi nawatan datanxun uiainbun

**Nai tsuma damitan chaxuwan
mekemisbuki Jesús kaiankidi
chaninikiaki, na janchadan**

⁸jabiatandi Belén dapixun jabun ina chaxu mekemisbuki basi xukua anuxun meshu medan uiainbun ⁹Diosun nai tsuma damia Diosun kushipawen chaxajaida jatu dapi nia chaxuwan mekemisbuki uin datejaidaibu ¹⁰nai tsuma jatu yuikin:

-Dateyamakanwen. Matunabu jawen benimai keyuxanaibu en matuki chanikin kakapepa bexunxuki,

ninkakanwen. ¹¹Matun xenipabu xanen ibujaida Davidin mae Belén anu jaska Diosun yubani matun medabenan Xanen Ibu ma kaianki, Cristo Mesíasdan.

¹²Janu benabaunkin ina jiwe anu yabuxun burro pimati ji xantu wanibuki datanbu man bechi katiduki. Jaska bechitan en jancha chanima man unanxanai- jatu waya

¹³jakimamadi nai tsuma midimajaida damibidan jabetan Dios kenwain nawakin yuikin:

¹⁴ “Mai anuxun tsuabunda jabun Dios chibankin duawamisbu Dios kushipajaidatun jau jatu unanuma jiwemanunwen. Jaskaken dasibibun Dios kushipa nai anua jau kenwandianunbunwen”, jatu watan ¹⁵nai anu ana buaibun benimai yuinamekin yuikin:
 –Jabaa! Jaska Diosun nuku yuixudan, Belén anu benakin uinun bukanwitan

¹⁶jawaidabaini Belén anu jikitan benabaunkin atimas ina jiwe medan José inun María inun jawen bake burro pimati ji xantu wanibuki datanbu ¹⁷bechitan jaska nai tsuman bakeishtakidi jatu yuia ninkabidana jatunmebi chaniaibun ¹⁸⁻²⁰jaska Diosun nai tsuman jatu yuixu ninkabidana uinwani chanima jabiaska uinkanxu chaxuwan mekenikabu chintunbainkin Dios kenwankubainaibun dasibibun jaska jabun yuikubainaibu yuda betsabun ninkai e itan shinain: “¿Jawa yui ikanimenkain?” ikaibun janua Maríán jaska wanaibu jawen jointi medans shinan jeneama inikiaki.

**Templo anuxun Jesús jatu uinmakin
iyunibukiaki, na janchadan**

²¹Janua 8 día ka manashinxun jawen xenipabu Abrahamnen ani keska wakin jawen jina kubichi mextekin jatu

bimatan María bake nanediamma jabias
kena Diosun nai tsuman yuimakidi
shinankin Josén Maríabetan kenakin
Jesús wabun

²²Moisin yunukin bake kainma
naxuxatan besti jau ichati jiwe anu
jikixan unbunwen, ani jaska chibain
María bake kainma ma naxuxai pea janu
jawen ibu dabetan ja bake Jerusalén anu
jatun Xanen Ibu Dios jawenawamanun
ixun iyuabun ²³ja dukun bebunkidi Dios
janchai “Juni bake ja dukun kaianan,
enaki”, ikai Moisin ninkatan keneni jaska
chibankin jawenawamatanun, iwanan,
²⁴iyukin ja inantan ana jawena wakatsi
ikin jaska Diosun yununi keska wakin
deiwan dabe ja menuxunti buaibun

²⁵jabatiandi juni betsa pepajaida
Dios kenwakin kaneisma jawen kena
Simeón Jerusalén anu jiwexun Diosun
Israelbu dasibi ana medabewakin jatu
pekkakin akawaxani yubani Simeón
manakakubainshina jawen Yushin Pepa
jaya jatun medabewakin unanmaya
²⁶Mesías Diosun yunuxanai uindiamma
jau debuyamaxanun Diosun Yushin
Pepatun yubaimaken ²⁷januxun Templo
jemaintin anu Diosun Yushin Pepatun
Simeón yunua ka tsauken jaska Moisin
yusini jawen juni bake bianananun
ixun ibubun iyui jemaintin anu jikiaya
januxun Diosun Yushin Pepatun
Simeón yusinkin jadatuda bake jabun
medabenan jau unanun ixun unanma
²⁸benimakain María Jesús mebintan
ikuxun Ibu Dios kenwakin yuikin:

²⁹“Xanen Ibu kushipatuun, natian ea
duawakin jaska min ea yubaima
min ma akaki.

Jaskawen taea jawa dateama
unanuma benima paewen
en mawaxanai ea ana
nemayamaxanwen.

³⁰Na bakewen yudabu paxawakin min
mekexanai en ma uiain,

³¹jawen taexun na bakewen dasibi
jiwebaunabu min xanen ibuai
jawen min jatu unanmaxanaidan.

³²Jadan, bin ewapa chaxa keska nawa
betsa betsapabun uinkin minabu
Israelbu min kushipawen min jatu
duawai uindiaxankanikiki”,

akaya

³³jaska wai ninkai José inun María e
idabeaibun ³⁴⁻³⁵januxun Simeón jatu
yuikin:

–Diosun jau matu
duawakubainxanunwen– iwanan, María
besti yuikin:

–Na bakedan, jawen yuda Israelbu
unanti wakatsi Diosun katuniki.
Jawen yusian ninkatan jatiditun
shinan betsa watan chibainbun
inun jatiditun shinan betsa wama
danankubainxankanikiki. Min bake
danankin nupe kenujaidawen min juinti
chachia keska wakin mia yumanwakin
mia nuitkaapawaxankanikiki- anikiaki.

³⁶⁻³⁷Jamen betsadan, Israelin bake
Aserin baba betsakidi mia yuinun
ninkawe. Penuelin ainbu bake Ana
chipash beneyaima 7 badi besti jabe
jiwea jawen bene mawaniken janua
beneuma 84 badi jiwekunkaini Diosun
jawen jancha yunua jawenabu jatu
yuixunmis Dioski mesei samakekin
jau jawenabu medabewanun ika jawen
kenwanti Templo jemaintin anua
kaiānma jatu Dios yukaxunkubainmis
³⁸José inun Maríaki nukutan jadi
benimakin Dios kenwantan jaska Diosun
Jerusalénkidi yubani dasibibun manaibu
Anan uinwanshinxun Jesúskidi jatu
yuikin kaka wakubainikiaki.

³⁹Januxun juni bake ja dukun kaiān
jau jaska wai bununbun Moisin kenekin
yununi chibankin menetan Galilea
jawen mae Nazaret anu chintunwankin
ana jawendi José jatu iyuima ⁴⁰jadia
Jesús ewai jawen yuda kushipai

unanepaya Dios jawen benimakin duawakubainikiaki.

**Jesús bedunan Templo
jemaaintin anu kashian ibubun
bechinibukiaki, na janchadan**

⁴¹ Jaska inun, Pascuatian Egipto anuxun jatun juni bakebu tenanma jatun xenipabu Diosun nai tsuman jatu dunkebaini shinain besinun ika badi tibi Jerusalén anu Jesúsun ibubu bupakemisbun ⁴²janua ma Jesús 12 badiyaken jawen ibubu jatun beya chibain buaibu jabatiandi Jesús jatube kai taeshina ⁴³⁻⁴⁴jawen ibubu besi keyutan jawen mae anu jatube jiwemisbube José inun María chintunbidanaibun janu Jerusalén anu Jesús besti bashikua ibuan unanma benadiama shinankin: “Jabe bedunanbube juikiki”, itan, José inun María shinanyabi kai ma xaba jidabi chai buxun badi kaya Jesús jawenabu anu benakin nati atan ⁴⁵jawenabu anu inun jawen mae anu jiweabu anua jawa bechiama benakin keyutan janu uxashini Jerusalén anu benanun ika chintunkainshina ⁴⁶janua 3 díá ibubun benakubaunkin atimas Templo jemaaintin anu jaki nukutushikin Diosun jancha kenenibu yusinanamisbube tsauxun jatu ninkakin Jesúsun jatu yukai jatube janchanamekunkainaya ⁴⁷Jesús unanepai ninkakin jabun ja yukaibu tibi yui pewaiwen taea dasibibun ninkai: “Jabaa! ¿Tsuán juni bake bedunan unanepamen?” iki jabube maniabu anu ⁴⁸atimas jawen ibubu jaki nukui e itan jawen ewa María yuikin:

–Kukaan, ejaskakin min nuku jaska washinamen? Ea inun min epa miwen nui chakayamai datekin nun mia benakin mae nati ashianki– aka ⁴⁹Jesúsun jatu yuikin:

–¿Jaskakin man ea benabaunai?
¿En Epan jiwe anua ma en jatube

yuinametidu man shinanmamen?– jatu wa ⁵⁰jawa jatu yuiai dabanan ikin ninkabumaken

⁵¹janua kainmabaini jawen ibu dabebe Nazaret anu chintunbainima jadia Jesús yumei ninkanikai jawen ibubun jancha tapinkubainaya ibu María juinti medans Jesús jaskai jakimama shinanxunkubainaya ⁵²janua jawen yuda ewai jawen shinan unanepaya Dios inun jawenabu jawen benimakubainibukiaki.

**Janu tsua jiweabumanuxun Nashimanika
Juanen jatu yusinikiaki, na janchadan**
(Mt 3.1-12; Mr 1.1-8; Jn 1.19-28)

3 ¹Janua badi ichapa kaya romano xanen ibujaida betsa Tiberio César ma 15 badi xanen ibukin dasibi jatu yunukubainaya Judea anu Poncio Pilato romano xanen ibu bexmasaya Galilea anudi jawen tsuma Herodes romanoma xanen ibu bexmasdiaya Iturea inun Traconítide anudi jawen tsuma Herodesin betsa Filipo xanen ibu bexmasdiaya Abilene anudi jawen tsuma Lisaniás xanen ibu bexmasdiaya ²ja jaskaibun Jerusalén anuadi judiobu Anás inun Caifás Diosbe jawenabu janchaxunika xanen ibujaida dabe inibukiaki.

Ja jaskaibу betsation Zacaríasin bake Juan janu tsua jiweabumanua ewaima jiwea Diosun yunua ³taxnikidan Jordán jene ketankubaunkin jiweabu tibi jatu yusin taewakin yudabu yuikin: “Matun shinan betsa watan matun chakabu Diosun jau matu buaxunxanun ninkatan jawada chakabuwen man benua jiwea jenedikanwen. Matun shinan maewatan man ea uinmaya en matu nashimaxanaii”, iwanan, jatu yusinkubainikiaki. ⁴Jaska Diosun jancha yuixunika Isaíasin jakidi kenekin yuini keska axuin Juan jaskanikiaki:

“Jadi tsua jiweabumanua jui kushipawen chanikin jatu yuikin:

'Nukun Xanen Ibu nai anua matuki bayui ma kemaikiki.
 Matun juintinin shinan
 pewadikanwen, bai kayatapia
 keska wakinan.
⁵ Napaku tibi buakin mata waxun
 mati tibidi pewakin panpa waxun
 xantu xantupadi keyu buakin panpa
 waxun
 jawen bai pewaxuna keska wakin
 jatun jiwea pewatan
⁶ januxun Diosun medabewati jua
 dasibibun uinxankanikiki",
 akin jaska yuini keska wakin Juanen
 akin jatun chakabu Diosun jau ana
 shinanyamakubainxanun chakabu
 jenekin jatun shinan betsa watan
 jawenabu jawen unanmati Juan yukakin:
 "Ea nashimawe", jau ea anunbun ixun
 Juanen jatu yusinkubainikiaki.
⁷⁻⁸ Janua Juanen jau ea nashimanun
 ika bebidan bebidanaibu jatu yuikin:
 -Matudan man padananan dunu
 pianamemis keskabuki. Man jaska
 keska matuki Dios sinatakin matu
 kupijaidaxanaiwen taea matun shinan
 betsa wakanwen. Jaska waxun matun
 chakabu man ma bextekeea xabakabi
 man ea uinmaya en matu nashimaxanaii.
 Jamen jaskama ibubis kein shinan
 betsa wakatsi ikama: "Nukun xenipabu
 Abraham Diosbe jaibunameniwen
 taea nun jawen bababu nuku kupiama
 ixanikiki", ikin, ana shinanyamakanwen.
 Jakia Abrahamnen bababu dasibi
 matu yamawakin keyutan na mishki
 manibauna Diosun damiwakin
 Abrahamnen bababu benawaxuntiduki.
⁹ Jaskaken matu yuinun ninkakanwen.
 Ji tibi bimi pepa jayama dedatan man
 kuamis keska wakin bestibu Diosun
 matu kupixanikiki. Jamen tsuabuda
 Abrahamnen baba kayabibun jawen
 yusian jau chibankubainunbunwen.
 Jakia man jaska wamaken matu kupinun,

iwanan, duewen matu deda keska watan
 chi anu matu udenu ixun manaikiki-
 jatu waya
¹⁰ januxun yudabun Juan jaskai
 ninkatan yuka ikin:
 -Jaskakenan, Dios daewakinan, *čjaska*
 waxanpa?– akeakeabu ¹¹ Juanen jatu
 yuikin:
 -Dios daewakinan, min tadi dabeyadan,
 ja nuitapai tadiuma man betsaa
 inantiduki. Ja inun, min pitiyadan, yuda
 betsaa piti jayama man betsaa inantiduki-
 iwanan, jatu yuikubainaya
¹² jabun romano gobieno pei
 bixunmisbudi jau eadi nashimanun ika
 bexun yukakin:
 -Yusinaan, *čnukukain*, nun
 jaskatidumen?– akabu
¹³ Juanen jabudi yuikin:
 -Gobierno pei bixunkin man
 ichawaxunmisdan, janu kesua
 besti xanen ibun matu yunua
 bixunkubainxankanwen, ana jatu
 padanmadan– jatu waya
¹⁴ januxundi soldadobundi yukakin:
 -Nukukain, yusinaan, shinan betsa
 watan mia unanmakatsidan, *čnun*
 jaskaxanai?– akabu Juanen jabudi
 yuikin:
 -Matudan, matun shinanen
 ichakanikakin jatun jamapai mebinya
 makubainxankanwen. Ja inun, chani
 chakakin yuda betsaa pei padantan
 mebinyamakanwen. Jakia matun daya
 pei besti bi benimakubainxankanwen-
 jatu waya
¹⁵ ninkatan ichapabu jawen janchawen
 benimakin jabun medabenan manakin
 Juankidi shinain yuka iki yuinamekin:
 "Diosun yubani nukun Mesías Cristodan,
čjamenkain?" ikaibu ¹⁶ jaskaibu Juanen
 jatun shinan unankin dasibi jatu
 nemakin yuikin:
 -Chanima, eanan jawen matu
 unanmati wakin jenewen besti en matu

nashimakubainaii. Jakia ja man jakidi shinainan, kushipajaidatun ea binuan chipu juikiki. Kushipajaida mesetun ea binujaidawen taexun en jawen jawaumajaidatun jaska waxun jawen bichi tae mexpun pekakin medabewakin jawen dayadu itsakin kushipa midintun en axuntidumaki. Jakia jatun matu pepawakin Diosun Yushin Pepa matu inantan bika matu tenemakin matun chakabu buakin yamawa keska waxanikiki, jawada chakabu bechipaiama chiwen kua keska wakinan.¹⁷ Jaska inun, xekiwan bimi ta keyuxun pepa aduti anu adutan jawen xepa man kuamis keska wakin dasibi jawenabuma danankin jawa chi nukaisma anu udenxun kuanun, iwanan, manakubainikiki– iwanan,

¹⁸januxun jancha ichapawen jatu nemakin yusinkin jatun shinan jatu betsa wamakin kakape Juanen jatu yusinkubainaya ¹⁹januxun judiobun xanen ibu Herodesin jawen betsa Filipon ain Herodías mebinshina inun chakabu betsa betsapa wakubainai ninkakubainink uintan yudabu jakidi yuishinxun Juanen nemakin jawen chakabu jenemanun, iwanan, betsabun ninkaibun Juanen Herodes nemakin ja ashianwen taexun ²⁰Herodes jaki sinatakin Juan jau ana jakidi janchayamanun, iwanan, jawen soldadobu jatu bichimanikiaki.

**Juanen Jesús nashimanikiaki, na
janchadan**
(Mt 3.13-17; Mr 1.9-11)

²¹Juan bichidiabuma yuda ichapabu nashimakubainkin Jesúsdí Juanen nashima jawen Epa Diosbe janchaya nai baxnei ²²Diosun Yushin Pepa deiwan keska jui jamamaki butuaya nai anuxun jawen Epan yuikin:

–Miadan, min en bakeki. En mia bechipajaidakin katunidan, en miwen benimajaidaii– anikiaki.

**Jesúsun xenipabu eska tana
keyunibukiaki, na janchadan**
(Mt 1.1-17)

²³Jabatiandi Jesús 30 badiya jawen Epa Dios dayaxunkin taewayá Josén yumewaimawen taexun yudabun yuikin: “Jesúsun epadan, Joséki”, iwanan, yuikubainibukiaki. Jawen xenipabukidi mia yuunun ninkawe.

Josén epadan, Elíkiaki.

²⁴Elín epadan, Matat inikiaki.

Matatin epadan, Leví inikiaki.

Levín epadan, Melquí inikiaki.

Melquín epadan, Janai inikiaki.

Janain epadan, José inikiaki.

²⁵Josén epadan, Matatías inikiaki.

Matatíasin epadan, Amós inikiaki.

Amósin epadan, Nahúm inikiaki.

Nahúmnен epadan, Eslí inikiaki.

Eslín epadan, Nagai inikiaki.

²⁶Nagain epadan, Máhat inikiaki.

Máhatin epadan, Matatías inikiaki.

Matatíasin epadan, Semeí inikiaki.

Semeín epadan, Josec inikiaki.

Josecin epadan, Joiadá inikiaki.

²⁷Joiadán epadan, Johanán inikiaki.

Johanánen epadan, Resá inikiaki.

Resán epadan, Zorobabel inikiaki.

Zorobabelin epadan, Salatiel inikiaki.

Salatielin epadan, Nerí inikiaki.

²⁸Nerín epadan, Melquí inikiaki.

Melquín epadan, Adí inikiaki.

Adín epadan, Cosam inikiaki.

Cosamnen epadan, Elmadam
inikiaki.

Elmadamnen epadan, Er inikiaki.

²⁹Erin epadan, Josué inikiaki.

Josuén epadan, Eliézer inikiaki.

Eliézerin epadan, Jorim inikiaki.

Jorimnen epadan, Matat inikiaki.

Matatin epadan, Leví inikiaki.

³⁰Levín epadan, Simeón inikiaki.

Simeónen epadan, Judá inikiaki.

Judán epadan, José inikiaki.

- Josén epadan, Jonam inikiaki.
 Jonamnen epadan, Eliaquim inikiaki.
³¹ Eliaquimnen epadan, Meleá inikiaki.
 Meleán epadan, Mená inikiaki.
 Menán epadan, Matatá inikiaki.
 Matatán epadan, Natán inikiaki.
³² Natánen epadan, David inikiaki.
 Davidin epadan, Jesé inikiaki.
 Jesén epadan, Obed inikiaki.
 Obedin epadan, Booz inikiaki.
 Boozin epadan, Sélah inikiaki.
 Sélahn epadan, Nahasón inikiaki.
³³ Nahasónen epadan, Aminadab
 inikiaki.
 Aminadabin epadan, Admín inikiaki.
 Admínen epadan, Arní inikiaki.
 Arnín epadan, Hesrón inikiaki.
 Hesrónen epadan Fares inikiaki.
 Faresin epadan, Judá inikiaki.
³⁴ Judán epadan, Jacob inikiaki.
 Jacobun epadan, Isaac inikiaki.
 Isaacun epadan, Abraham inikiaki.
 Abrahamnen epadan, Térah inikiaki.
 Térahn epadan, Nahor inikiaki.
³⁵ Nahorin epadan, Serug inikiaki.
 Serugin epadan, Ragau inikiaki.
 Ragaun epadan, Péleg inikiaki.
 Pélegin epadan, Éber inikiaki.
 Éberin epadan, Sélah inikiaki.
³⁶ Sélahn epadan, Cainán inikiaki.
 Cainánen epadan, Arfaxad inikiaki.
 Arfaxadin epadan, Sem inikiaki.
 Semin epadan, Noé inikiaki.
 Noén epadan, Lámec inikiaki.
³⁷ Lámecin epadan, Matusalén inikiaki.
 Matusalénen epadan, Henoc inikiaki.
 Henocin epadan Jéred inikiaki.
 Jéredin epadan Mahalaleel inikiaki.
 Mahalaleelin epadan, Cainán inikiaki.
³⁸ Cainánen epadan, Enós inikiaki.
 Enósin epadan, Set inikiaki.
 Setin epadan, Adán inikiaki.
 Adánen epadan, Dios inikiaki.
 Jaskaken Jesús juni kayabi idianiki,
 nuku keskadan.

**Diablo Satanásan padanpaia Jesúsun
 ninkama inikiaki, na janchadan**
(Mt 4.1-11; Mr 1.12-13)

4 ¹⁻²Janua Juanen Jesús nashimaya
 Diosun jawen Yushin Pepawen
 kushipajaida wa jene Jordán anua Jesús
 kai janu tsua jiweabumana Diosun
 Yushin Pepatun Jesús iyushina kauanaya
 yushin chakabu xanen ibu diablon
 padankin kanemanun ikaya janua 40 día
 janu jiwxun jawa piama binukainaya
 jaskakainaya Jesús bunijaidai ³uinkin
 unanti wanun, iwanan, yushin chakabu
 diablon Jesús yunukin:

–¿Jaska min Diosun bakemenkain?
 Na mishki damiwakin misi wawe, min
 bunia ja pixunan– aka

⁴januxun Jesúsun nemakin:
 –Jaskakidi Diosun jancha kenenibudan,
 ninkawe. “Piti besti shinain yudabu
 jawens jiwtidubumaki. Jakia Diosun
 jancha yuini ninkakin chibain yudabu
 pei jiwtidubuki”, aniki– iwanan
 –Jaskawen taexun ja min ea yunuaidan,
 en akamaki– akaya

⁵jaska ninkatan januxun mati
 keyatapajaida anu yushin chakabu
 diablon Jesús iyuxun mai jidabi anu
 mai pakea jawendua tibi inun jawen
 damiwati kushipawen jawaida xabakabi
 uinmakin ⁶yuikin:

–Na mai jidabi mai pakea tibi anu inun
 jawen xanen ibubu dasibi mebinixun
 en mekeawen taexun tsuada en kushipa
 inankatsi en jaska wamiswen taexun jau
 mia kenwanxanunbun en mia jatu xanen
 ibu wamatiduki. ⁷Jaskawen taexun eki
 mesei danti ixun ea kenwankin min
 ea xanen ibu waya dasibi mia inantan
 en mia jatu mekemakubaixanaxai– aka
⁸Jesúsun ana nemakin:

–Na Diosun jancha kenenidan, ana
 ninkawe. ‘Matun medabenen Yavé Dios
 ja besti duawakin kenwankubainkanwen,

yushin betsa ninkamadan', aniki. Jaska keneniwen taexun ja min jaska yuiaidan, en mia akamaki- aka

⁹⁻¹¹januxun Jerusalén anudi iyuxun Templo keyatapa mamaki nichinxun diablon ana yuikin:

-Na Diosun jancha kenenidan, miandi ninkawe.

'Jau mia mekekubainun bun jawen nai tsumabu Diosun yunuxaniki.

Mishkiki min jutekepanan min kauanai mia mekesuxankaniki', aniwen taea jaska min Diosun bake kayamenkain ea uinmai nenua ishchuwe- aka

¹²ana nemakin Jesúsun yuikin:

-Jaska kenenibu min dama yuiai chanimabiaken ana betsa entsedi mia yuinun ninkawe. 'Matun Yavé Dios unanti wayamakanwen', akin kenekin yusindianiki. Jaskawen taexun min ea ana yunuaidan, en ikamaki- aka

¹³ana jawawen padankin unanti watima janu tsua jiweabumanu ana iyuxun chipu ana padankatsi Jesús diablon jeneyubainaya

Galilea anuxun Jesúsun yusinkin taewanikiaki, na janchadan

(Mt 4.12-17; 13.53-58; Mr 1.14-15; 6.1-6)

¹⁴⁻¹⁵janua Galilea anu kaxun mae tibi anu jatun ichati jiwe anu jikia akeakekin Diosun Yushin Pepatun kushipa jayawen taexun Jesúsun jatu yusiain ninkai jakidi janchakin dasibibun kenwankubaunibukiaki.

¹⁶Jaskakunkauntani janua yumei ewaima Nazaret anudi ka jaskai jatube ichai beyamis juindukuntitian janu ichamisbu jiwe anu jatube jikia Diosun jancha kenenibu yuixunun ika Jesús benia niken ¹⁷Diosun jancha yuixunika Isaíasin kenenji jancha una inanbu chudetan jakidi jancha kenenibu bechitan jatu yuikin:

¹⁸⁻¹⁹"Nuitapaibu kakape en jatu yusinun

Diosun ea katuniwen taea

jawen Yushin Pepa en jayaki.

Januxun juinti nishmabu jatu

benimawakin

yuda betsan jatu tsuma wa

jenemakin

bekun keskabu bepexa keska wakin

jatu yusin pewakin jatu ichakawaibu nemakin

Dios benimawatikidi dasibibu en jatu unanmakubainxanun Diosun ea yununiki",

jatu watan kenenji jancha yuikin keyuxun ²⁰ana sebitan una mekenika inan mebintan aduaya ana jatukidi besua tsaua manibaunxun beis chakayamaibun

²¹Jesúsun jatu yusinkin taewakin:

-Jaskakidi Isaásin kenenji en matu yuixunai man ninkaxudan, nukunabu medabewakin na jabiatian Diosun ma meneiki- iwanan, ²²unanepakin jancha pewen jatu yusiain ninkai e itan jawen jancha bechipaibiakin shinain:

"Nadan, nukunabuki, Josén bakeki.

¿Janixun jaska tapintanshinxun nuku yuimenkain?" iki yuinamebaunaibu

²³Jesúsun ana jatu yuikin:

-Man ea itimaska kaya wai en uiaiin.

Unanepa janchawen man ea yuikin:

"Min juni dauyakiaki. Mimebi xuxakin

min kushipa nuku uinmawé", ea akin,

"Cafarnaúm anuxun jawen unanmati

dami kushipa min jatu uinmashinakiaki.

Min ashian keska wakin na min mae

anuxundi nuku axundiawe, nun

uinunan", akin man ea yuitidubuki-

iwanan, ²⁴ana jatu yusinkin:

-Chanima Diosun jancha yuixunikan, jawenabun jawen mae anuxun ninkakatsi ikama dananmisbuki.

²⁵Jaska inun, Diosun jancha yuixunika

Elías jiweken badi dabe inun besti

namakis ui ikamaken pitiuma nukun

xenipabu nuitapajaidaibun ainbu jawen

bene ma mawayama midimabudi yumankubainibu man ninkamiski.
²⁶Jaskabiaibun nukun xenipabu Israelbu beneuma nuitapaibu jau Elíasin dasibi jatu medabewanun Diosun yunuama iniki. Jakia maewan Sidón dapi mae betsa Sarepta anu nawa ainbu beneuma nuitapai jiwea besti jau medabewanun Diosun Elías yunukin nichiniki. ²⁷Jaska inun, Diosun jancha yuixunika Eliseo jiweatiandi jatidi nukunabun chami buisma teneaibun nukun xenipabu jatuki dakekin danainbu Eliseon jatu xuxawamadi iniki. Jakia Siria anua nawa betsa jawen kena Naamán Eliseo anu Diosun yunuja ja besti xuxawaniki– akin ²⁸nawabukidi jatu yuiai ninkai dasibi ichati jiwe anu ichabu jatu jaska wai ninkatan jaki sinatajaidakin ²⁹kainmabainkin Jesús tsumaxun ninikubainkin jatun mae mawa keyatapa mamakixun januxun xutunun, iwanan, iyuaibun ³⁰janua Diosun kushipawen ichabu namakisa kakin jatu mepanmabaini jawen mae jenebainikiaki.

**Juni betsa yushin chakabu jaya Jesúsun
kainmanikiaki, na janchadan
(Mr 1.21-28)**

³¹Janua Galilea mai pakea anu Nazaret jenebaini mae betsa Cafarnaúm anu jikishinxun sábado tibi jatun ichati jiwe anuxun jatu yusinkubainkin ³²xanen ibu kayabi kushipakin jatu yuiai yudabun ninkai e itan: “¿Jaskamen?” iki benimakubainaibun ³³jabianudi juni yushin chakabuya tsaua yushinen bis imakin unanxubima yuimakin:

³⁴–Jesús Nazaret anuaan, éjaskai nuku anu min juxumen? ¿Nun yushin chakabu nuku yamawanun ika min juadaka? En mia unaiin, min Diosun bake pepa medibidan– ikaya ³⁵yushin chakabu Jesúsun nemakin yuikin:

–Janua jaskama nesetan ja juni anua kaindikaintanwen– aka yushin chakabu juni medanua kainkainkin jawa wama mai pusamabainai uin dasibibu ³⁶datei:

–Jabaa!– ike ikei yuinamekin yuikin: –Nadan, yusian betsa jayaki. Xanen ibu keska kushipajaidaki. Jawen jancha paepaki, yushin chakabu xunsa yunua ninkai jawen datei kainkanikikidan– itan ³⁷janua bui jakidi chania akeakeaibu dasibi janu jiwea akeakeabun Jesúsun jaska wai ninkanibukiaki.

**Simónen dais ainbu inun isin betsa
betsapa teneaibu Jesúsun jatu
xuxawanikiaki, na janchadan
(Mt 8.14-17; Mr 1.29-34)**

³⁸Ja juni medanua yushin chakabu nichintan jatun ichati jiwe anua kaya Simón Pedron jawen jiwe anu Jesúsiyuva Simón Pedron dais ainbu yuna chakayama daka ninkatushitan jawen isin jau mainwanun jakidi Jesúsiyuabu ³⁹janu dakanu Jesúsi kaxun jawen yuna nemaxuna damaintan benikain jabatiandi jatu duawakin bawaxun jatu pimaya

⁴⁰jaska waxu ninkabaikin janua mabadi kai meshuaya dasibi ja mae anu jiwea akeakeabun dasibi isin betsa betsapa teneaibu Jesúsiyuva anu iweabu Jesúsun jabutibi mekin xuxawakin kaya wapakekin ⁴¹ja isin betsa betsapa teneaibu anua yushin chakabu nichian kainkainkin unanxubima jancha kushipawen yuikin:

–Miadan, min Diosun bakeki– akin yuikin Diosun Mesías Cristo unainbuwen taexun jau jadidi janchakin ana yuiyamanunbun Jesúsun jatu janchamamakin nemapakekin yushin chakabu kainmapakenikiaki.

**Judiobun ichati tibi anuxun Jesúsun jatu
yusinkubaunikiaki, na janchadan
(Mr 1.35-39)**

⁴²Janua uxashini ma pena kemaya Jesúsun butukaina mae dapi benanta ja

desti ka benabaunkin jawen jaibuaibun bechitan jaki nukuxun yuikin:

—Dasibitun mia benakanikiki. Nenua ana kayamawe— akabu ⁴³Jesúsun jatu nemakin yuikin:

—En Epa xanen ibuaikidi en jatu yusinkubaunun ea yununiki. Jaskakenan, mae betsa betsapa anu en yusindiai katiduki— jatu wabaini ⁴⁴Israelbun mae tibi anu Jesús kakunkaunkin janu Diosun jancha ninkakatsis iki janu judiobu ichamisbu tibi anuxun jatu yusian akeakenikiaki.

Baka midima Jesúsun jatu nexematan janubi jatu katunikiaki, na janchadan
(Mt 4.18-22; Mr 1.16-20)

5 ¹Jatu yusinkubauntani Galilea ianenwan ketankubaini kakin jawen kena betsa ian Genesaret anu niti ixun jatu yusianyan Diosun jancha ninka pewakatsis iki jaki midima ichakin texke akabu ²xaxu ewapa dabe xaka mashin keti axun baka nexenikabun jatun jisin chukaibu Jesúsun uinkubaini ³kakain Simón Pedron xaxuki inatan jau ana ja kachu xekanunbun yunua jawen betsabetan jawen jisin jawaida nexetan jawen xaxu ja kachu xekakin nuntanxunabu ja namaki tsauxun kexa mapubaunabu Jesúsun jatu yusinpakekin ⁴keyutan Simón yuikin:

—Ana ja kachu nuajaidanu xekaxun januxun baka bikin nexekatsi matun jisin pukubaunkanwen— aka ⁵Simónen yuikin:

—Yusinaan, yame chai tanakin nun pukujaidabia nun jawa biama ishiaiin. Jakia jaska min nuku yunuai en anun kain— ixun

⁶nuajaida anu xekatan jawen jisin jawen betsabetan pukubaunabu baka midima jikia ninibidanabu xankamajaida jatun jisin tadas iki taeaya ⁷xaxu betsa anu jawen jaibuaibu jabe dayamisbu jau

medabewai benunbun jatu meken bea bea aka jawaiddabidan medabewakin jatun xaxu dabe baka mata wabu xaxu jikikatsis ikaya ⁸⁻¹⁰baka midima nexekanxuwen taea Simón Pedro inun jabe dayamisbu inun Zebedeon bakebu jawen jaibu betsabu Santiago inun Juan e iki dateaibun Simón danti itan Jesús yuikin:

—Yusinaan, en juni chakabuki. Ea anua butukaini ea jenebaini kadiwe— abia Jesús yuikin:

—Eki dateyamawe. Na ikis min baka nexexu keska wakin yudabu min ea jatu ichawaxunxanaii— aka ¹¹jatun xaxu dabe keti atan janu jawenabube xaxu inun jisin bakayabi bashibainkin tapinkatsis ikin Jesús chibain jabe bunibukiaki.

Juni betsa bichiki dasibi chami betsani Jesúsun kaya wanikiaki, na janchadan
(Mt 8.1-4; Mr 1.40-45)

¹²Janua chipu betsation mae betsa anu Jesús kaken juni bichiki dasibi chami betsani Jesúski nukutan ja bebun dankui sapakain di itan beuxun ea akin:

—Yusinaan, ea kayawakatsis ikin min ea kayawatiduki— aka ¹³jawen chamiwen datekin danankin tsuan metsakin meisbumabiaken Jesús jawen dabanan iki mexunkain mekin yuikin:

—Jaa. En mia kayawai— aka jawen chami sakada iki daxnukui keyuaya

¹⁴Jesús nichinkin nemakin:

—En mia yuiai ninkaidawe. Jawada en mia axukidi tsua yuiyamayukubaintanwen. Jadi dukun kakin Diosbe nukunabu janchaxunika min yuda min ma kayaxu uinmatanwen. Jaska min ma kayaxu jau dasibibun mikidi unanunbun jawen jatu bepadanbainkin jabiaskadi inankuin Moisin yununi jatu anu buditanwen. Min jaska buaya min kayaxu jabun unanxankanikiki— abaini kaya

¹⁵yuda betsabun Jesúsun jaska wakin akaikidi chanibaunaibu ninkatan jawen jancha ninkakatsis iki inun jau jatu xuxawanun badi tibi Jesúsun anu bebidan bebidanaibu jatu xuxawapakei ¹⁶janua jawen Epabe besti janchanun ika jatu paxkabain janu tsua jiweabumanu kakunkainikiaki.

Juni yuda babuni jawen chakabu buaxunkin Jesúsun xuxawanikiaki, na janchadan
(Mt 9.1-8; Mr 2.1-12)

¹⁷Janua ana xaba betsatian Galilea inun, Judea mae betsa betsapa anua inun, Jerusalén anuadi beshinxun Jesúsun yusia in ninkai tsauabun jabianudu Moisin jancha chibajaidanika fariseobu inun Moisin jancha yusinanamisbu jiwe medan ichaxun Diosun xuxawati kushipayatun Jesúsun jatu yusianyan ¹⁸jau Jesúsun xuxawanun, iwanan, juni yuda babuni jaki isin teneaibu butiki datantan jawen jaibuaibun Jesúsun anu bakebidani ¹⁹janu yudan kaian xukuabuwen taea jaska watan bichibain Jesúsun uinmatima mai bawa jiwe sapa xeni mamaki inabain jawen dakatiki janu butenun, iwanan, janu bexpa wakin pudenkin xui watan janu ja juni yuda babuni Jesúsun anu buteaibun ²⁰jaska jatun shinan ikunjaidawaibu unankin juni yuda babuni Jesúsun yuikin:

—Dateyamawe. Min chakabuwen Diosun mia kupikatsis ibiakin man ea ikunwainwen taexun jau Diosun ana shinanyamanun en mia buaxunaii— akaya

²¹Moisin jancha jatu yusinmisbu inun fariseobun ninkatan Jesúski sinatai june yuinamei: “Ja juni chakabuki. Dasibi nuku padain Dios keskakatsi ikikiki. Diosun besti jawen chakabu buatiduki”, ikaibun ²²januxun tsuan Jesúsun yuiamabia jatun shinan unankin Jesúsun jatu yukakin:

—Matunan, ¿jaskakin man shinan chakai ika? ²³¿Jadatu bikamamen, jawen chakabu buaxunadaka, jawen yuda beniadaka? Ja dabe bikaken Diosun besti atiduwen taexun ²⁴¿jaskakin man shinan chakai? En matun Juchi Kayabi Iyua na mai anua ea en jawen kushipa jayatun jawen chakabu en buaxuntidu man unanun en akai uinkanwen-iwanan, juni yuda babuni kaya wakin yuikin:

—Benitan mia jaki bakebidankanxu bui min jiwe anu kadiwe— akin ²⁵jawaida kayawa benikauan jawen dakati bitan buaya mapubaunabun ²⁶date paeyabi yuikin:

—Jabaa! Tsuan jaska waismaki. Jakia Dios pepajaida kushipatun na juni ma kayawaxuki. Natian jaska nun uinsma nuku uinmaikikidan— iwanan, Dios kenwanibukiaki.

Leví gobierno pei bixunika Jesúsun katunikiaki, na janchadan
(Mt 9.9-13; Mr 2.13-17)

²⁷Janua kainkaini janu bai kexa anu januxun Roma gobierno pei bixunmisbu jiwe anu Leví tsaua Jesúsun bechitushitan yuikin:

—Ea chibankubainwen— aka

—Leví benitan dasibi jenebainkin chibankin taewai jabe kashinxun ²⁹jawen jiwe anuxun Jesúswen benimakin piti midima jatu pewamatian xanen ibu pei bixuin padanananmisbu inun jawen jaibu betsa betsapabu jatu ichawa Leví inun Jesúsbetan piaibun ³⁰Diosun yunuti inun jawen nemati yusinanamisbu inun fariseobun Jesúsun jatubetan piai uinkin yuankin jaki chiti ikabu yukakin:

—¿Jaskakin matun yusinan pei bixunika chakabubu inun nuku ninkaisbumabetan pimenkain? Chakabujaidabubin!— ikaibu ³¹Jesúsun jatun jancha ninkatan jatu yuikin:

—“En peki”, iwanan, shinainbu anu juni dauya kaismaki. Jakia isin teneaibu anu besti juni dauya kenabu kamiski.

³²Jaskaken: “En chakabuki”, iwanan, shinainbu jatun juinti pewakin en jatu medabewa shinan betsa watan jau Dios ikunwanunbun en juniki, juni dauya keskaidan. Jakia: “En chakabumaki”, ikin shinainbu jatu medabewatanun ika en juamaki– jatu wa

Samakenikabun Jesús yukanibukiaki, na janchadan

(Mt 9.14-17; Mr 2.18-22)

³³januxun ana betsan Jesús jatu yukaxunkin:

—Nashimanika Juanki chiti ikabu inun fariseobuki chiti ikabun jatun chakabuwen taea jatunmebi ichakanikai samakechakayamakin Dios kenwakin jawen kushipa yuka chakayamakin jawa piyuisbumaki. ³⁴Jaskai miki chiti ikabu samakeama badi betsa tukanma pikin nexukubainmisbumen?– akabu ³⁴Jesúsun jatu yuikin:

—Juni ainyain nawaibu anu jawen jaibuaibu paxkadiabuma piama jatunmebi ichakanikatidubumaki. ³⁵Jakia jatu xununbaini ma jatu dapaxkabaini kaken manukin jawen jaibuaibu samakekin piama itidubuki. Jaska keska kainkin en jatu xununbaina ewen nui en jaibuaibun piama samakexankanikiki– iwanan,

³⁶ana jatu yusinapekin miyuiwen yuikin:

—En yusianan, tadi bena estediamaka. Matu yusinun ninkakanwen. Tadi xeni baxnekea tadi bena tuax estediamaka mextexun jawen tadi xeni tsamian patsa estei ana baxnekei pikumiski. Jamen matun yusianan, tadi xeni baxnekea keskaki. En yusianwen tsamian keska wakin matun yusian en pewatidumaki. ³⁷⁻³⁸Ana jabiaskadi

keskawen matu yusinun ninkakanwen.

Bichi bishtu xeniki uva jene bena buspudiama manekin mata waxun denex mestenwan jamebi katsai buspui bichi bishtu xeni pexemiski, vino bena inun bichi xeni benuidan. Jabiaskadi wakin en yusian bena matun shinan xeni en jusitidumaki, benukinan. ³⁹Jamen vino xeni ma beya wanixun vino bena pepabiaken akatsi ikabuma keska wakin matun beya xeni bechipaikin matun shinan bena wakatsi ikama en yusian bena man danaiin– jatu wanikiaki.

Juindukuntitian jaki chiti ikabun xekiwan bimi tsekaxun pikubainibukiaki, na janchadan

(Mt 12.1-8; Mr 2.23-28)

6 ¹Januxun ana juindukunti sábado betsatian xekiwan bai namakis manan baiwen bukin jaki chiti ikabu Jesúsbə bukin xekiwan bimi tsekaxun daxukidi axun pikubainaibun ²fariseobu jabudi jatube kakin jatu uinkin Jesúski chiti ikabu jatu yukakin:

—¿Jawai juindukunti sábadotian man dayai? Sábadotian dayakin Diosun Moisés nuku nemani chibanma man kaneaii– jatu waibu ³Jesúsun jatu yuikin:

—Bunikin jawada nukun xenipabu pepa Davidin jawen jaibuaibabetan anidan, ¿man uinsmamen? Diosun janchadan. ⁴Matu yuunun ninkakanwen. Dios kenwanti tadi jiwe medan David jikixun Diosun Moisés yusiniwen taexun Diosbe nukunabu janchaxunikabun besti pitibiaken jawen Dios kenwanti misi Davidin bixun pitan jawen jaibuaibudi pimanikiaki. Jaska wabiaya Dios jaki sinatama iniki, kaneamawen taeandan-iwanan,

⁵—Jaskaken juindukunti sábadotiandi matun Juchi Kayabi Iyua xanen ibukin en yunuaiwen taea eki chiti ikabundi

bunikin pikin kaneabumadiki– jatu wanikiaki.

Juindukuntitian juni meken meyushkini Jesúsun kaya wanikiaki, na janchadan
(Mt 12.9-14; Mr 3.1-6)

⁶Chipu ana sábado betsation mae betsa anu kaxun jatun ichati jiwe medan jikixun Jesúsun jatu yusianyan jabianudi juni meken yusiudi meyushkini jatube tsauken ⁷januxun jabun jawen yusian danankin Jesúsun yuanun, iwanan, juindukunti sábadotian ja juni mepeai unun, ixun, jaska wai uintan unanti watan ja anun ika manai tsauxun ⁸jaskaibu Jesúsun jatun shinan unankin juni meken meyushkini yuikin:

–Benikidan ja maniabu namakis niwe– aka jawenabu maniabu namakis benia niken ⁹januxun fariseobu inun Mosésin jancha jatu yusinmisbu Jesúsun jatu yuikin:

–En matu yukai jaskadamenkain, ea yuikanwen. Moisin jancha pepa chibankin juindukunti sábadotianan, ćaska watimen? ćpewakin medabewatimen? ćchakabuwatidak? ćuda betsan jiweadan, paxawakin meketimen? ćnuitapawakin yamawatidak?– jatu watan ¹⁰jatun jancha manakin Jesúsun uinbaunaya jawa yuiabumaken juni meken meyushkini nia Jesúsun ana yuikin:

–Min meken meshanwen– aka meshanyan jawen meken ma mepekei peaya ¹¹uin fariseobu inun yusinanananmisbu jaki sinatakin jaska waxun Jesúsun nematimen ika june yuinamei jaki yubakai taenibukiaki.

Doce junibu kushipa wakin Jesúsun jatu katuniaki, na janchadan
(Mt 10.1-4; Mr 3.13-19)

¹²Janua xaba betsa badi kaya Jesúsun ja mesti kai mati mapetan uxama Diosbe

janchashini ¹³penaya jaki chiti ikabu dasibi jatu kena beabu 12 besti katutan jatu kenakin: “Man en kushipayabuki”, jatu wanikiaki. ¹⁴Ja 12 junibun kena mia yuinun ninkawe. Simón kena betsa wakin Pedro wani inun, jawen betsa Andrés inun, Santiago inun, Juan inun, Felipe inun, Bartolomé inun, ¹⁵Mateo inun, Tomás inun, Alfeon bake Santiago inun, romano nawabu nichinkatsis imis Simón inun, ¹⁶Santiagon bake Judas inun, Judas betsa Iscariote anua yumeni chipu jatun Jesúsun jatu achimaxanaidan, jati Jesúsun katuniaki.

Yuda ichapabu Jesúsun jatu yusinikiaki, na janchadan
(Mt 4.23-5.12)

¹⁷⁻¹⁹Januxun 12 junibu katutan jatu iwei bututan mawa tenanman panpanuxun jaki chiti ikabu Jesúsun yusinun ika tsauken jabianudi jabun chibainbu inun midima yudabu Judea anua inun, Jerusalén anua inun, ianenwan kexa betsa Tiro inun Sidón anua jawen jancha ninkatanun ika bekin isin teneaibu jatu kayawamakatsi iweshinabu jaki dasiabu isin teneaibu xuxawakin yushin chakabun jatu nuitapawai kainmakin jawen kushipa janua kainkin Jesúsun jatu kayawaya uin bechipaikin Jesúsun mekatsis ikaibun

Diosun jatu benimawaxanaikidi jawen tsuma kushipayabu Jesúsun jatu yusinikiaki, na janchadan

²⁰jatu xuxawakin menetan jaki chiti ikabu besti beiskin jatu jancha wakin:
–Tsuabuda yumain matunmebi man kenkunkainama Dios xanen ibukin matu mekekubainxanaiwen taea man benimakunkainmiski.

²¹Ja inun, tsuabuda jawada pepa besti bechipai chakayamai jawen nuijaidaiwen kupikin Diosun jatu yaniwama keska

waxanaiwen taea benimapaketi shinain
benimakubainkanikiki.

Ja inun, tsuabunda matun chakabu
shinain juinti nishma man kaxakatsis
imisbuwen taexun Diosun matun
juinti shinan chankawan man
benimakunkainmiski.

²²Ja inun, matun Juchi Kayabi Iyua
tsuabunda man ea chibainbuwen
taexun jabun matuki ejen iki danain
matu ichakin jatun ichati jiwe anu man
ana jikiyamanun matu nemakin matu
danainbun man benimakunkainxanaii.
²³Jaska inun, Diosun jancha
yuixunikabu ichakawanibu keska wakin
matudi ichakawaibu nai anuxun Diosun
matu duawaxanaiwen taea jawa dateama
shinan chankubainxankanwen–
iwanan,

²⁴mapuabudi yuikin: –Jamen
matudan, mabuwen jiwei kein “En mabu
midima jayaki”, iki tsuabuda natian
man jawen benimaii. Jakia uatian man
nuitapaxanaii.

²⁵Ja inun, tsuabuda yaushikin piti
yani bestiwatan man benimakubainaibu
ana tsuan matu medabewakin
matu duawabuma buni tenei man
nuitapajaidanaxanaii.

Ja inun, natian tsuabunda Dios
shinanma matun jamapai besti shinain
man usanmis ana jaskama matun juinti
nishma kaxai man nuitapajaidanaxanaii.

²⁶Tsuada ibubis jawawenda
jawenduakin dasibibu jatu bechipaimakin
man jatu kenwanmatidudan,
uindaxankanwen, mesekidan. Jabun Dios
yuixunikapaiaibun jatu padan paepawa
matun xenipabun jatu kenwanpaunibu
keska iyamaxankanwen– iwanan,

Nukuki sinataibuwen nuitikiaki, na
janchadan
(Mt 5.38-48; 7.12)

²⁷ana jatu yusinkin:

–Man ea ninkaibu matu
yusinun ninkakanwen. Matuki
sinataibu jatuki sinatama jatuwen
nuikubainkanwen. Ja inun, matu
danainbu jatu bebis danananma jatu
duawakubainkanwen. ²⁸Ja inun,
tsuabunda matu ichakawai matuki
sinataibun jatu bebis manakunama jau
Diosun jatu medabewanun jatu Dios
yukaxunkubainxankanwen. ²⁹Ja inun,
tsuada miki sinatakin mia detekin
ispais aka jabebis sinatai kupinameama:
“Uke betsadi ea awe”, ika dabekexunai
keskakin shinankubainxankanwen. Ja
inun, tsuada min dibiawen taexun min
dakukuti tadi mia biankin buaya min
tadi manankidiadi yaushiyama jadi
inanyukanwanen. ³⁰Jamen tsuada
nuitapai juxun min jawada mia yuka
medabewakin inanyukubainxankanwen.
Jamen betsadan, tsuanda min jawada
bushinxun ibu wakin mia ana
inankatsi ikamaken jas shinain jaki
sinatayamakubainxankanwen. ³¹Jamen
betsadan, tsuada miwen nuikin jau
mia medabewaxanun bun matun
dukun jaska shinankin uinmakin jatu
medabewakubainxankanwen, jaska wai
nukipakin man kaneamakidan.

³²Jaska inun, Diosun jancha
danain chakabumisbu jabiaskadiai
duanamemisbuki. Jaskaken matudi
matun jaibubes man duanamei man
jawa binunananmaki. ³³Ja inun, juni
chakabu jabetan chakabu wamisbube
nui medabenankubainmisbuki. Jaskaken
matudi pepabuwen nui jabu besti
medabewai ma pepamadiki. ³⁴Jamen
betsadan, juni chakabubu duanamekin
betsan jawen jaibun jamapai buxun
jawaida ana bexunmiswen taexun
duawakin jawen jamapai ana yuka
inanyukatsis imisbuki. Jaskaken matudi
duanamei pepabiai tsuanda matun
jamapai jawaida ana matu bexunmis

besti man inanmiski, ana manakuti pepa bikatsi shinanmadan.³⁵ Jakia pepakatsis ikidan, eskatiki. Matuki sinataibuwen nuikin jatu duawankin matun pepa jatu uinmakubainkanwen. Jaskawen taexun tsuabunda min jamapai biwanshinxun mia ana bexunmisbu besti ana ja shinanma mia yane bexuinsbumadi jatu inandiakin yuda dasibibu jatu duawakubainxankanwen. Jaska wakin man jatu binumamisken matun pepawen Dios dasibi binuatan matu manakuxanikiki, jawen bakebu matu wakinan. Janunkain jabun Dios kenwainsbuma inun juni chakabububiaken betsa betsapa inankin Diosun jatu duawamiswen taea³⁶ matun Epa Dios nuikipa keskai nuikipadiakubainkanwen-iwanan,

**Yuda betsa chitekin ja atimatikiaki,
na janchadan**
(Mt 7.1-5)

³⁷ Jesúsun ana jatu yusinkin yuikin:
–Tsuada ja akin chitekin unanti wayamakanwen. Man jatu jaska wamaken Diosundi jabiaskadi wakin matu chitekin ja akamadi ixanikiki. Ja inun, tsuada jatu dake wayamakanwen. Man jatu dake waismaken Diosundi matu dake wama ixanikiki. Ja inun, tsuabunda matu chakabuwaibu ja shinanma jatu jakimawakin buawe. Man jaska waya Diosundi matun chakabu matu buaxunxanikiki.³⁸ Ja inun, jawada man jaya paxkaxun juni betsa inankubainkanwen. Jaska wai man yaushiamaken Diosdi matuki yaushiamaka jabiaskadi matu waxanikiki. Tsuanda man xeki inankin tana pewatan sakuki deukin yaushiamma tsinki tsinki akin mata waxun man jatu inanmis keska wakin jabias shinanwendi Diosun matu manakuxanikiki– atan,

³⁹ Jesúsun miyui betsa tibiwen jatu yusinkin yuikubainkin:

–Juni bekunman juni betsa jabe bekun iyupai jadakidi iyuai unanma jabia dabe mikin maebain di idabemisbuki. Jaska keskai matun shinan pewakin mae wadiama jawa jatu yusinkin man pevatidumaki.⁴⁰ Ja inun, jawen tsumabun jatun yusinan binutidubumaki. Jakia jatun yusinan jatu tapinmakubainaya jatun yusinan keska itidubuki.

⁴¹ Jaskai ikunwain betsa pewakin medabewanun, iwanan, jamapai pese jawen beduki jikia min bikatsis ibiai mina dukun ji ewapa min uianmamen? Ji jidabiwen betimanabia jawa shinanma yuikin: “Uian. Min ji pese beduki ikadan, ‘mia bipa?’ akin min yuimiski, kanekinan.⁴² Jakia bemakis bepadamei janchamisbuun, matudi chakabubia betsa chakabuai uinkin man ja amiski. Man ji jidabi betimana tsekaxun puta keska wakin matun juinti medanua matun chakabu ewapa putatan ana kaneama medabewakin ji pese min jaibun bedu anua bia keska wakin juni betsan chakabu bexmas jayadi man medabewakin yusintiduki– iwanan,

**Jawen bimi tibiwen ji unanmisbukiaki,
na janchadan**
(Mt 7.17-20; 12.34-35)

⁴³ ana miyui betsawen Jesúsun jatu yusinkin yuikin:
–Ji pepa bimiai jawen bimi chakabuismaki. Jakia ji chakabu bimiai jawen bimi pepaismadiki.⁴⁴ Jaskawen taexun jawen bimi tibiwen ji man unanti wamisbuki. Mae muxa anua higo bimi man tsekaismaki. Ja inun, isne anua uva bimi man tsekaismadike.⁴⁵ Jabiaska keskadi tsuabuda duapabu juinti pepaya jancha pepawens janchamisbuki. Jamen tsuabuda duapa juinti pepa jaya jawa chakabu jayama yui jancha pepawens janchamisbuki. Ja inun, tsuabuda

jatun juinti medan shinan chakabu mata janchakin chakabu yuikin kainmamisbuki- iwanan,

Ninkaibu inun ninkaisbumakidi yusinikiaki, na janchadan
(Mt 7.24-27)

⁴⁶Jesúsun jatu yusinkubainkin yuikin:
—Xanen Ibuun, Xanen Ibuun, akin man ea kenabiamis éjaskakin en matu yusian man aismamen? ⁴⁷En jancha ikunwankin ea chibunan, iwanan, jawada en yuai akubainxanaibukidi matu yusinun ninkakanwen. ⁴⁸Tsuanda mishki jiwe wakatsi ikin jene kexa mai basankin uke medan mishkiki pesaxun ja mamaki mishki tsamabidankin jiwe wadan, en yuiai akubainmisbunan, ja jiwe wanika keskabu ixankanikiki. Janua bai matajaidabidankin jawen jiwe achia ja jiwe mishkiki tsamiawen taea jawa takax iki tsibusketidumaki. ⁴⁹Jamen jawada en yuiai ea danankin akama ixanaibukidi matu yuinun ninkakanwen. Tsuanda mishki jiwe wanun, iwanan, jene kexa mai basankin kini keyatapawama bexantu bestiawan mishki tsamabidankin jabebis watan jiwe wadan, ea danainbunan, ja jiwe wanikabia unainsmapabu keskaki. Janua bai matajaidabidankin jawen jiwe achia mishkiki tsamiamawen taea jawaida tsibukei di imiski. ¿Jadatu man jaskamenkain? Uindakanwen- akin Jesúsun jatu yusinikiaki.

Romano capitánen dayadu Jesúsun xuxawanikiaki, na janchadan
(Mt 8.5-13; Jn 4.43-54)

7 ¹Januxun jatu yusin menetan Cafarnaúm anu Jesús chintuntani jikiken ²janua jabianudi romano soldado xanen ibu capitánen dayadu isin tenei mawakatsis ikai bechipajaidakin ³Jesús ma jua ninkatan jau xuxawaxunyunun

judio xanen ibu anibubu nichinkin Jesús chanimakin jatu yunua ⁴⁻⁵Jesús anu buxun jau xuxawaxuin kanun ea akin yuixunkin:

—Capitán juni duapaki. Nukun ichati jiwe nuku jatu amaxunyamaki. Ja inun, nukunabu bechipajaidadiamiswen taexun medabewakin jawenadi xuxawaxuin kawe- akeakeabu ⁶jatun jancha ninkatan jatube kai ma jawen jiweki kemai kaya jau yuixununbun soldado capitánen jawen jaibuaibudi yunua Jesús juaiki nukuxun capitán yuixunkin:

—Xanen Ibuun, en jaibu capitánen jancha en mia yuiai ninkawe. Ewen dabanan en jiwe anu juyamawe. ⁷En pe bexmasjaidawen taea mianu en kama ixuki. Jaskaken en tsuma jau xuxanun min jancha besti yunukin ea xuxawaxunwen. ⁸Ja inun, jatun ea yunumisdan, eadi en xanen ibu jayaki. Eandi soldadobu yunui en xanen ibudiamiski. Betsa yunukin: “Kawe”, en wa kamiski. Betsa yuikin: “Juve”, en wa jumiski. En dayadudi yunukin: “Awe”, en wa amiski. Jakia min ea binuawen taexun min jancha bestiwen min xuxawatiduki, en unanan- akin capitán jancha yuixuna

⁹Jesúsun jawen jancha ninkatan soldado capitán ikunjaidawaiwen taea Jesús e itan yudan kaianen chibain jachun beaibukidi nasauketan jatu yuikin:

—Jaska na nawa xanen ibun ea ikunjaidawai keska nukunabu Israelbu en jaska jatu uindiamaki- jatu waya ¹⁰jawen jaibuaibu soldado capitánen jiwe anu chintunbain jawen dayadu ma xuxaxuna uinibukiaki.

Beneyabia jawen bene ma mawatun bake mawa Jesúsun bestenwanikiaki, na janchadan

¹¹⁻¹²Jesúsun jaska wabaini jawen 12 tsumabu kushipayabu inun, jaki chiti

ikabu inun, yudan kaianen chibain jabe bukin mae betsa jawen kena Nainkidi kai kemaya ainbu jawen bene mawayamatun jawen bake bestichai mawaxuna maiwanun, iwanan, juni dabetan baketiki beaibu jawenabu jachun bei jawen ewabe kaxakubidanaibu¹³ Jesús jaki nukutan jawen ewa nuitapaiwen nuikin yuikin:

—Kaxama nesewe— atan¹⁴ bedunan mawa beaibuki Jesús kemaxun jawen baketi besti tsumaya niti itan tsumabun mawa yuikin:

—Bedunaan, en mia yuiai bestenwen-aka

¹⁵mawa jawen tadiwen yabukin mestenjaida wabu jaska peketima bestenkauan natsaua janchai taeaya jawen ewa benimawatan jawen bake nichinxuna iyuaya¹⁶ Jesúsun jaska wai uin jaska uinsbuma jawen datei mesejaidakin:

—Jabaa! Nuku anu Diosun jancha yuixunika pepajaida ma ana taxnishinaki. Jawenabu duawai Dios ana bayuxuki— ikin Dios kenwankubainaibus¹⁷ jaska Jesúsun axu ninkabain Judea mai pakeanuabu inun mae betsa betsapa anuabundi yuiaibu bana ninka akeakenibukiaki.

**Jaki chiti ikabu Nashimanika Juanen Jesús anu jatu yununiaki, na janchadan
(Mt 11.2-19)**

¹⁸Nashimanika Juan bichiti jiwe anu jiwea jaska Jesúsun akubainaikidi jawen tsumabu Juanki chanikubainaibu¹⁹ninkatan jawen tsumabu dabe kenaxun jatu yunukin:

—Jesús anu kaxun: “Mekenika Diosun nukun xenipabu yubani chanima juxanaidan, ¿min jabiamen? ¿Betsa daka nun manai?” akin ea yukaxuntankanwen-iwanan, jatu yunua

²⁰⁻²¹buxun isin betsa betsapa teneaibu xuxawakin yushin chakabu betsa

betsapa kainmakin bekun inun bexuxbu uinmakin Jesúsun jatu kaya wapakeaya Nashimanika Juanki chiti ika dabe Jesús anu kaxun jaska wai bechitan atimas jaki nukutan betsan yuikin:

—Mianu Nashimanika Juanen nuku yunushinaki. Mekenan Diosun nukun xenipabu yubani chanima juxanaidan, ¿min jabiamen? ¿Min jamadaka? ¿Betsa daka nun manayuai?— aka²² ja dabe shinanmakin Jesúsun yuikin:

—Jawada uinkin man ninkakubainaidan, jaska Juanki chaniditankanwen, eskaibudan. Bekun inun bexuxbu uiainbu inun, jaska mapuisbuma mapuaibu inun, jabu bichiki dasibi chami betsani jaki dakemisbu main sakada iki keyuaibu inun, patabun ninkakin keyuaibu inun, mawa ana besteinbu inun, jabu yumainbu jatun paxati kakape ninkatan benimaibudan, jaska Juan yuitankanwen.²³ Tsuanda ea ikunwain jawen shinan chakabui chintuinsmadan, chanima benimaxankanikiki!— jatu wa

²⁴Juanen jatu yunushina iwani ana chintunbainabun ja dapi mapubaunabu Jesúsun Juankidi jatu yui taewakin:

—Janu tsua jiweabumanuadán, ¿jawa man uintantanimamen? Tawa pei niwen bubi bubi wai keska wakin ¿junin jawen shinan betsa betsapa maewa akeakeimamenkain?²⁵ ¿Jaskamen? ¿Jaskamadaka? ¿Jaskada jakidi kaiain man uintantanimamen? ¿Junin tadi pepa sawea daka? Tadi pepa sawea benimai beyusidan, mabu akunjaidayabu jatun xanen ibun jiwe jawendua anu besti jiwea ikaibu man uintidubuki.²⁶ Jaskakenan, ¿jawa man uintantanimamen? ¿Diosun jancha yuixunikamenkain? Jaki. Juanan, chanima Diosun jancha yuixunikaki. Ja inun, yuixunika betsabu Diosun yununi Juanen ma jatu binuaki.²⁷ Ja inun,

Diosun jawen bake nichinkatsi Juankidi yuikin:

‘Ninkawe. Janu min kaxanun jau
pewai kanun en jancha yuixunika
betsa bebunkidi en yunuxanaii, en
mia nichindiamadan’,

akin jakidi jawen kaka kenenibuki.

²⁸Chanimma en matu yuiaii. Yuda
dasibibun Dios dayaxunkin tsuan
Juan binuama ibianibun janu Epa
Dios xanen ibuaitian ikunwainbu jaki
dasiabu bexmasjaidabiabun Juan
binuxankaniki– jatu wai

²⁹Jesúsun jancha ninkakin jabun
Nashimanika Juanen jancha ninkatan
shinan betsa waibu jawen unanti wakin
Juanen jatu nashimaimawen taexun
yudan kaian inun romanon xanen ibu
pei bixunikabun yuikin: “Chanimaki.
Jawada Diosun akaidan pepaki”, iwanan,
shinan akeakeaibun ³⁰jakia judio
fariseobu inun Diosun jancha kenenibu
yusinanamisbun Juanen jancha
ninkama inun jawen unanti nashimati
danainmabuwen taexun Diosun jabudi
duawapanan danainmabun ³¹Jesúsun
ana jabianudi jatu yuikin:

–Nukunabudan, čjaskada shinain
imisbumenkain? Matu yuinun
ninkakanwen. ³²Mae namakis jemaintin
anu beyuskin jatun ibubu imis mawai
bake mishtinbu xuku dabea tsauxun
xuku betsan yuikin: “Tepe dewe nun
mawabiaya benimai man nawamaki.
Janua nun kaxei ikaskin nun nuitei
nawa mawabiaya man kaxamaki”, jatu
wabu jawawenda beyusti unanbuma
keskabuki, nukunabudan. Matun shinan
chankanti jubiaken man benimamaki.
Jamen matun chakabu shinain kaxakatsi
ikama man shinan betsa waismaki.

³³Eskaki, matu yuinun ninkakanwen. Ja
dukun Nashimanika Juan juxun matu
yusinkubainkin misi pepa piama vino
paepa akama matube beyusamaken

jakidi janchakin: “Yushin chakabu
jayaki”, iwanan, man yuia akeakeimaki.

³⁴Janua eadi matun Juchi Kayabi Iyu
juxun misi pepa pikin vino paepa aki en
matube nawabiakunkainaya ea yuankin:
“Uinwen. Pikeki. Paenkin romano pei
bixunika chakabubu inun yuda chakabu
betsabu jaibu wamiski”, ikin man
eadi yuanmiski. ³⁵Jamen nuku dabe
nun pepabiaken Diosunabu kayabibu
besti unanepakin jabun nukun yusian
ninkatan nuku chibankanikiki– jatu
waya

Fariseo Simónen Jesús pimanikiaki, na janchadan

³⁶januxun fariseo betsa jawen
kena Simón jawen jiwe anuxun Jesú
pimakatsi chanima jawen jiwe anu
Jesús ka pikatsi ixkexkanan dakai
baxti ibaunxun piaibun ³⁷jabia mae
anuadi ainbu jininipan Jesúsun piai
ninkatan xeni jene ininipa kadujaida
nenkati juxupa bishtuki bexun ³⁸june
Jesúsun tae dapi danti itan jawen
chakabu shinain juinti nishmajaida
june kaxakin jawen beun jene besti
Jesúsun tae pechiki tuis tuis axun jawen
bu chaipawen jutekede atan jawen tae
petsu petsu akin keyutan xeni jenewen
jawen tae cha akaya Jesúsun unanbiakin
uiyanmaken ³⁹Jesús jatun iatun uintan
Jesúskidi shinankin: “Dios nuku
yuixunika kayabitunan ja ainbun jawen
tae meaidan ainbu chakabukunkainmis
unankeanaii”, ikaya ⁴⁰Jesúsun jawen
shinan unantan medabewakin yuikin:

–Simóon, čjawada mia yuipa?– aka
fariseon yuikin:

–Ea yuiwe, yusinaan– aka

⁴¹miyuiwen Jesúsun yuikin:

–Juni dabetan juni betsa anua
pei biyuimabu dibiabuki. Betsan
500 xaba daya pei dibiken betsandi
50 dibiaki. ⁴²Ja dabetun jania pei

bixun pakatidubumaken juni betsan ja dabe pei inanyuima dibiaibu jatuwen nuikin ja dabetun dibia jatu kenatan jakimashinaki, ana shinanmadan. Jaskaken ja dabetanan, ɿjadatutun ja jatun pei inanyuima bechipaijaidamenkain, betsa binunkinan?– aka ⁴³fariseon yuikin:

–En shinanan, ja midima jakimawashinatun bechipaijaidaikiki-aka

–Chanimaki. Min yui kayabiaii– iwanan ⁴⁴Jesús nasauketan ainbu uinkin Simón yuikin:

–Na ainbun ea duawaidan, ɿmin uiain?– iwanan –Min jiwetan en jikiae jaska wamisbu keska wakin juchukiti unpax min ea tsauxunama ibiaxuken na ainbun jawen beunwen ea juchuxun jawen buwendi en tae ea jutekede axuki. ⁴⁵Ja inun, ea beya wakin min ea tantsu akamaken mia anu jikiae en dakaken na ainbun besti ea beya wakin en tae petsu petsu akin jeneamaki. ⁴⁶Ja inun, ea beya wakin xeni teipa ininjaidawen en bu min ea macha akamaken xeni jene ininjaidawen jatun en tae cha axuki, ea beya wakanan. ⁴⁷Jaskaken ewen nuikin ea bechipaijaidaiwen taexun jawen chakabu midimabiaken ma en buaxuna min unantiduki. Jamen tsuanda chakabu eskadabes nun buaxuna mawaida ea inun en Epa shinankin midinwanmisbuki– iwanan, ⁴⁸ainbudi yuikin:

–Epa Dios en mia daewaxunxuki, min chakabu mia buaxuntan jau ana shinanyamanunan– akaya ⁴⁹jabube jatu iabun piaibun ninkatan baxexen yuinamei:

–Nadan, ɿjawa juni ikimenkain? yudabun chakabu xunsa buaxuntidudan- iwanan, yuia akeakeaibun

⁵⁰jaskabiabun ainbu Jesúsun ana yuikin:

–Min ea ikunwainwen taexun min chakabu min ma bextekei pexuki. Ana jawa dakei dateama unanuma inun kadiwe– anikiaki.

Ja ainbuaibun Jesús medabewanibukiaki, na janchadan

8 ¹Janua ana betsation jaska pepawen inun chakabuwen kupi Dios nenu ana xanen ibuxanaikidi mae ewapa betsa betsapa inun mae jatiubuma anuxun Jesúsun jatu yusinkubaunaya jawen 12 tsuma kushipayabun tapin jabe bukubainaibun ²⁻³ja dikabi ainbu betsa betsapa isin teneaibu xuxawakin yushin chakabu kainmakin Jesúsun jatu medabewakin xuxawaiamaken jatun peiwendi Jesúsun inun jawen tsumabu medabewakubaini María Magdalena anua Jesúsun ⁷ yushin chakabu kainmaima inun, Susana inun, xanen ibu Herodes yunuxunmis Cuzan ain Juana inun, ainbu betsa betsapabudi Jesúsun anu butan butankin medabewakubainaibun

Jexe sa akakidi miyuiken Jesúsun jatu yusiniaki, na janchadan (Mt 13.1-23; Mr 4.1-20)

⁴mae betsa betsapa anua bei Jesúsun uinkin jawen jancha ninkanun ika ichabidanbidanaibun yudan kaian jaki dasi ichabu Jesúsun jawen jancha juneawen jatu miyuikin:

⁵–Juni betsan jawen bai anu xekiwan sa aki kaxun sa akaya jexe betsa kati bai namaki kauana yudabun pema pema akaibu deiwan juxun xea keyuabun janua xekiwan jukuanmaken ⁶jexe betsa mishki ewapabu mania anu mai eskadabes bemanchimea anu bana pexei benekaunaya mai eskadabesken badi jui kukin mai tsusinwan jawen tapun bemakis bewexekea xanai utsimiski.

⁷Ja inun, jexe betsa muxa jukundiama anu nidi ika jukuainki muxan buxekin

yabua bimitidumaki. ⁸Jakia jexe betsa mai pepa anu nidi aka benei bimi ichapajaida jayamiski, betsa 100 jexeyaidan– iwanan, unanxubima yuikin:
 –Man pabinkiyabuki. Ninkatan jakimayamaxankanwen– jatu wabainaya

Jexe miyukidi xabakabi Jesúsun jatu unanmanikiaki, na janchadan
(Mt 13.10-23; Mr 4.10-20)

⁹jawen tsumabu besti Jesúski dasixun jaska miyuiwen jatu yusinxu yukabu
¹⁰jatu yuikin:

–Matudan, jaskai Dios xanen ibumiskidi Diosun jawen pepa juneni xabakabi man en tsumabu matu yusinkin unanmaikiki. Jakia jabun Diosun jancha ninka bestiaibu miyuiwens besti en jatuki chanikunkainaii, uinbiakin jau uin pewayamanun bun inun ninkabiakin jau ninka pewayamanun bunan– iwanan,

¹¹–Man en tsumabudan, jexe sa akakidi miyui matu xabakabi yuinun ninkaidakanwen. Jaxedan, Dioskidi yusinti janchaki. ¹²Jexe betsa janu kati bai anu kauanadan, yudabun Diosun jancha ninkabiaibun jamakidia diablo Satanás juxun jawen jancha pepa jawen uintiki banai mebinmiski, jau ikunwain mekeyamaxanunan. ¹³Ja inun, jexe betsa mishki ewapabu mania anu mai eskadabes bemandchimea anu nidi akadan, tsuanda Diosun jancha ninkakin taewai benimabiaya shinan pewamawen taexun jawen jiwepanan Diosun jancha dananmakin jatu bika wakin jawen jamapaiwen jatu ichakawabu tenei jawawen jaskatima ja uintan ana jawendi chintunbainmisbuki, jatun tacha ichapama keskawen taeadan. ¹⁴Ja inun, jexe betsa muxa anu nidi ikadan, jabun Diosun jancha bechipaibai jatun jiweawen nui inun mabu betsa betsapawen kemu chakayamai jayakatsis ikin jatun jatu yabua Diosun jancha

ninkabiai tapinkatsi ikama unanxubida jenekubainmisbuki, yudabu miban bimiuma keskabuidan. ¹⁵Jakia jexe betsa mai pepa anu banadan, Diosun jancha pepa tapintan juinti shinan chankankin jeneama mestentan chibankubainkin januxun yuda betsabu yusinkin jatu ikunwanmamisbuki, mai pepa anu jexe sa aka ewai benei pamis keskaidan– jatu watan

Binkidi miyuiwen Jesúsun jatu yusinikiaki, na janchadan
(Mr 4.21-25)

¹⁶janua yudan kaian anu ana kaxun Jesúsun miyui betsawen ana jatu yusinkin:

–Bin dekutan jamapaiwen bepukin junetima inun tapu naman tsautima man unaai. Jakia bin dekuxun jau jawenabu jikikin uinshadanun bun manaundi tsau misbuki. ¹⁷Jaskaken jawada en matu yusinkubainai yuda betsabu jatu yusinkin juneyamakubainxankanwen. Jaska inun, jawada junekin man jatu yusianma inun jawada june ibubis man ikaidan, dasibi Diosun jatu xabakabi waxunkin keyuxanikiki. ¹⁸Jaskawen taexunan, ninka peidawakanwen. Jakia tsuabunda en jancha besti ninkakin chibainbu ichapa en ana jatu xabakabi yusinkubainxanaii. Jamen tsuabunda ea chiban kayabismabia: “En ikunwaii”, ikin jaska besti shinanmis ja eskadabes en jatu mebinxanaii, jakimawakinan– jatu wai

Jawenabu kayabikidi Jesúsun jatu yusinikiaki, na janchadan
(Mt 12.46-50; Mr 3.31-35)

¹⁹Jesúsun jatu yusinkin menediamaken yudan kaian texke ikabuwen taea jawen ewa inun jawen betsabu bea Jesúski jaska kematima ²⁰juni betsa yunua yuia

akeakebainabu atimas jawen ewa juni betsan Jesús yuixunkin:

–Min ewa inun min betsabun unu jemaintinxun mibe janchanun ixun mia kenakanikiaki– akaya

²¹jatu yusinkin Jesúsun yuikin:

–Diosun jancha ninkakin akubainmisbudan, jabiabu enabu kayabiki, en ewabu inun, en puibu inun, en betsabudan– jatu wanikiaki.

Jesúsun niwe inun ianenwan nemanikiaki, na janchadan

(Mt 8.23-27; Mr 4.35-41)

²²Ana betsatian Jesúsun jawen tsumabu jatu yuikin:

–Ianenwan besusi pukei kexa betsaudi buyunankanwen– jatu wa jawen tsumabube xaxun inatan xutubaini buaibun ²³janua ianenwan besusi pukeaibun Jesús ma bika xaxu chixukidi daka uxaken janua niwe kushipajaida besubainaibukidia jene buspu tsaubidankin xaxu jene mata wa ma jiki kemaya ²⁴datei Jesús anus ichaxun bestenwankin yuikin:

–Yusinaan, yusinaan, nun jikiaii– akin bestenwanbu Jesús bestenkauan benitan niwegian inun ianenwan buspu tsaubidanai yuikin:

–Nesewe. Peswe– aka niwe main neseaya ianenwandi buspu tsaubidanai main pesaya

²⁵Jesúsun jawen tsumabu yuikin:

–¿Man jawawen datei ikai, ea shinanmadan?– jatu wa e iki keyutan yuinamekin yuikin:

–Jabaa! Na junidan, čjawa junimen? min atidumakidan. Niwe inun ianenwanendi ninkakanikiidan– ibaini bui

Gerasa anu kaxun Jesúsun juni yushin chakabubu jaya kainmanikiaki, na janchadan

(Mt 8.28-34; Mr 5.1-20)

²⁶Galilea ianenwan kexa betsaudi Gerasa mai pakeanu Jesús kai atimas

keti itan ²⁷⁻²⁹xaxu anua butui jatube mapekkekainaya janua juni betsai yushin chakabuya unainsmapa tadiuma jiwetan jiweisma janu mawabu maiwamisbu anu besti jiwekunkainmis natian jawenabun mane dispiwen nexabiakubainmisbu yushin chakabun kushipa wa mane dispi nasamis jabun unainsmapa watan janu jiweabumanu iyumis Jesús juai bechibidani kushikidan unantan bis ikidan Jesús naman danti iken ja juni anua yushin chakabu Jesúsun yunukin taewa janua jancha kushipawen yushinen juni unainsmapa yuimakin:

–Jesúsuun, min Dios kushipajaidatun bakedan, en mia unaini. En mia yukai nukudan, kupikin nuku nuitapawayamawe!– aka ³⁰Jesús yukakin:

–¿Jadakidi min kena ikai?– aka yushin chakabu ichapa ma juniki jikinibuwen taexun yushinen juni janchama Jesús yuikin:

–En kenadan, “Ichapajaida En Jayaki”, en yushin midimayadan– akaya ³¹janu kupiti mai kini uke medanjaida anu Jesúsun jau jatu yunuyamanun yushin chakabun Jesús nematan ³²ja mati anuxun ina yawa ichapabun pikin mai mixexaibu yushin chakabun bechitan Jesús ea akin yuikin:

–Ja ina yawa anu nuku yunuwe, ja medan nun jikinunan– akabu janua Jesúsun jadi jatu yunua ³³ja juni anua kainbaini ina yawa medan jikibainaibun ja ina yawa midima datei mawa butei nidi ibaini ianki pukui dasibi jasai keyuaibun

³⁴janua ja ina yawa mekemisbu datei kushibainkin jaskaxu jatun mae anu jiweabu inun bai puchinin jiweabu jatu banabima akekeabun ³⁵yudan kaianen uin beaibu janu Jesúski nukuxun ja juni: “Yushin chakabu ichapa en jayaki”, iku ma tadi sawea ana unainsmapa

keskama janu Jesúsbe tsaua ana jaska ikunkainshina keska dabanen ikin shinain dateaibun³⁶ jabun Jesúsun jaska wai uinbaina jatu yui kakaibun³⁷ janu Gerasa anuabu datekin Jesús nichinkin:

–Nukun mae anu ana mapekeama kadiwe– akeakeabu janua Jesúsun jatun jancha ninkatan kai xaxun inai kaya³⁸ ja juni yushin chakabu kainmaxutun Jesús ea akin:

–En mibe kaii– aka nemakin yuikin:

³⁹–Ebe kayamawe. Jakia minabun jiwe anu kaxun jaska Dios miwen nuikin min yushin chakabubu mia kainmaxu minabu yuiditanwen, jau miwen benimadinunbunan– abaini kaya ja junin jaska Jesúsun yushin chakabu midimajaida kainmaxunbainshina jatu yuikubaunikiaki.

**Ainbun jimi baxneni neseisma
Jesúsun mainwantan Jairon bakedi
bestenwanikiaki, na janchadan**

(Mt 9.18-26; Mr 5.21-43)

⁴⁰Janua Jesús ianenwan kexa betsaudia chintuntani ana jawendi jui keti ikaya yudan kaianen manajaidaibun Jesús juai bechitan jawen benimai ii jaki ichabu⁴¹⁻⁴² ichati jiwe anuxun yunumis xanen ibu betsa Jairon Jesús bechitan jukidan ja bebun di iki beutan ea akin yuikin:

–En ainbu bake bestichaiyaki, 12 badiyadan. Ma eskatian ea isin tenexuni mawakatsis ikaya miki chani en juxuki. Ebe kaxun uinkin ea xuxawaxunyuwe- atushia janua jaska Jesúsun ninkatan jawen jiwe anu jabe kaya ja yudan kaian ichapabundi itimaska wai supu ibainaibun

⁴³janua ainbu jimi baxneni ja isin tenei ma 12 año kabia jawa neseisma badi betsa tukama ikunkainmisen janua nuitapaya juni dauyan mainwankin xuxawapaibaibu jawen pei dasibi putakin

keyubia jawa maianma ikunkainkin yudan kaianbetan Jesús chibain⁴⁴ ja ichun kakin jawen tadi kexa metsaya jawaida jawen jimi bextekei maianyan

⁴⁵jaska jawen kushipawen tsuada xuxawa Jesúsun unankin yudan kaian jachun beaibu niti itan uinbaunkin jatu yukakin:

–¿Tsuau man en tadi metsaxumen?– jatu wa

–Tsuau mia metsamaki– akaibun Pedro inun Jesúsun tsuma betsabun yuikin:

–Yusinaan, na yudan kaian bei michun supu ibidankin mia aki ikanikiki.

¿Jaskakin nuku yukakin: “¿Tsuau man en tadi metsai?” min nuku wai ikai?– akabu⁴⁶ Jesúsun jatu yuikin:

–Tsuanda ea metsaya chanima en kushipa kainkainkin xuxawaxu en unaii– ikaya

⁴⁷ainbu datei saki saki ikin jani junetima jawada Jesúsun axunxu unain jaki kematan ja bebun danti itan xabakabi ichapabun bedubi Jesúski chaniaya⁴⁸ Jesúsun yuikin:

–Ainbuun, min ea ikunwanyan en mia xuxawaxuki. Ana isin teneama unanuma kai pediwe–

⁴⁹aki nikken jabatiandi xanen ibu Jairon jiwe anua jawen tsuma betsa juxun Jairo yuikin:

–Min bakedan, ma mawaxuki. Ana juni yusinan daketapa wayamawe– akai⁵⁰ Jesúsun jawen tsumapan Jairo jawada yuiai ninkatan Jairo yuikin:

–Dateyamawe. Ea besti min ea ikunwanyan min bake xuxaikiki– abaini

⁵¹bui Jairon jiwe anu jikikainkin ja mapuabu jau jikiyamanunbun jatu nemakin niti atan Pedro inun Santiago inun Juan inun chipashan ibu dabe jatu jikimakin⁵²junin kaian kaxai sain iki bau bau ikaibu jatu yuikin:

–¿Jaskai e iskaun kaxai man biski ikanai? Jawen bakedan mawa

kayabiamaki. Uxa bestia ikikiki– jatu
waya

⁵³yuda ichapabun: “Ma mawaki”,
iwanan, uintan Jesúsun jaska yuiai
ninkatan usainbun ⁵⁴januxun Jesúsun
chipash metsunxun unanxubima yuikin:

–Chipashaan, en mia yuiai beniwe–
aka ⁵⁵ana bestein samama benikaunaya
januxun jau pimanunbun Jesúsun jatu
yunuaya ⁵⁶jawen ibu dabe benimai e
ikaibun jaska Jesúsun axunxu jau tsua
yuiyamayununbun jatu nemanikiaki.

Jesúsun jawen tsumabun jau jatu
yusintanunbun jatu nichiniaki, na
janchadan

(Mt 10.5-15; Mr 6.7-13)

9 ¹Januxun Jesúsun jawen 12
tsumabu kenaxun jatu ichawatan
yushin chakabu betsa betsapa
kainmati kushipa inun isin teneaibu
jawen xuxawati kushipa jatu inantan
²nichinkin yuikin:

–Jaska Dios xanen ibuxanaikidi
yusinkubaunkin isin teneaibu man
xuxawatanun en matu yunuyuiai.
³Kaidan, man eskakanintanun
matu yuinun ninkakanwen. Mais
butankanwen, jawa buamadan. Mestenti
beta inun, kapankan inun, misi
inun, pei matun chinexeketiki usua
inun, sanpu betsa buyamaxankanwen.
⁴Jaska inun, mae tibi anu buxun yusin
jiwe bestichai anu jiweyuxankanwen.
Januxun yusinkin menetan mae betsa
anudi bukubainxankanwen. ⁵Jaska inun,
janixunda matu danankin ninkakatsi
ikabumaken Dios jatuki sinatai unanti
wakin janua kainbainkin matun tae
anua mai kudu jatuki tabainxankanwen,
jau jabiaskasi maninunbunan, jawa
unanmadan– jatu wa

⁶mae tibi anu buake buakexun jaska
Dios xanen ibuxanaikidi jatu yusinkin
isin teneaibu xuxawakubainaibun

¿Jesús tsuamen? ixun Herodesin
unankatsis inikiaki, na janchadan
(Mt 14.1-12; Mr 6.14-29)

⁷⁻⁸janu judiobun xanen ibu Herodesin
Jesúsun jawada akeakeaikidi ninkaya
betsabun yuikin:

–Juan tenanbiashinabu ma ana
besteanmenkain– ikaibun betsabundi
yuikin:

–Elías Diosun jancha yuixunika kabiani
jawen yushin damimamenkain– idiaibun
betsabundi yuikin:

–Nukun xenipabu Diosun jancha
yuixunika betsa mawanidan, ma
ana besteinmamenkain– ikeakeaibu
Herodesin ninkaxun shinain: “¿Jadatu
chanima kayabimen?” iwanan, ⁹yuikin:

–Juan jau textenunbun ean en jatu
yunuimaki. Jaskaken ja Jesúskidi
yuaibudan, ¿tsuamen?– iwanan, Jesús
uinun ixun manakubainikiaki.

Jesúsun 5,000 junibu pimanikiaki, na
janchadan

(Mt 14.13-21; Mr 6.30-44; Jn 6.1-14)

¹⁰Janua jawen 12 kushipayabun Jesú
anu chintunbidan jaska washinabu Jesúski
chani meneabun Jesúsun jawen tsumabu
janu tsua jiweabuma Betsaida dapi anu jatu
iyuaya ¹¹yudan kaianen unantan Jesú
chibainbu jawa jatuki sinatama jatu ikin
pewaxun Dios xanen ibuxanaikidi yusinkin
isin betsa betsapa teneaibu xuxawabaiaya

¹²ma badi kaya jawen 12 tsumabu
jawen kushipawen yununikabu Jesú
dapi bea ichaxun yuikin:

–Ma badi kaikiki. Nenu tsua
jiweabumaki. Na yudan kaianen
jabun jania pitidubumaki. Jau pitan
juindukundi bununbun mae udama anu
jatu nichindiwe– akabu

¹³⁻¹⁵Jesúsun jatu nemakin yuikin:

–Jaska jatu wama, matun jatu
pimakanwen– jatu wa

5,000 junibu mapuabuwen taea e itan Jesús yuikin:

—Meken besti misi inun baka dabe besti nun jayaki. ¿Nun daka jatu piti bixuin kai?—akabu Jesúsun jawen 12 tsumabu yuikin:

—Ja basíki 50 tibi xuku akeakea jau tsauunbun jatu yunukanwen—iwanan, Jesúsun jatu yunua jawen tsumabun jatu tsauakin keyuken¹⁶ januxun Jesúsun ja misi meken besti inun baka dabe tsumaxun naiudi teskanxun uiakin pitikidi Dios kenwantan misi inun baka tunke apakekin jawen tsumabu inankin jatu yunua ja yudan kaian inanbaunkin keyuabun¹⁷ dasibubun yaniwai benimai pepeabun janua ja misi meken besti inun baka dabe 5,000ti junibun pikin texe wabu ichawakin 12 kuki mata wanibukiaki.

**Min nukun Mesíaski, akin Pedron
yuinikiaki, na janchadan**
(Mt 16.13-19; Mr 8.27-29)

¹⁸Janua betsatian janu tsua jayamanu Jesúsun jawen tsumabube ka Diosbe janchai menetan Jesúsun jawen tsumabu yukakin:

—Yudabunan, ¿en tsua ekidi yuimisbumen?— jatu wa ¹⁹jabun yuikin:
—Betsabun yuikinan: “Nashimanika Juan ana bestenshinaki”, mia wakanikiaki. Betsabundi yuikin: “Diosun jancha yuixunika Elías ana jushianki”, mia wadiakanikiaki. Betsabundi yuikin: “Diosun jancha yuixunika betsa ana besteinmaki”, mia wamisbukiaki—akabu

²⁰januxun Jesúsun jabudi yukakin:

—Jamen matun shinankinan, ¿en tsua man ea wamismen?— jatu wa

Pedron yuikin:

—Miadan, Diosun yubani min nukun Mesías Cristoki— akaya

**Jawen tsuma kushipayabu jawen
mawaxanaikidi Jesúsun yusinikiaki, na
janchadan**
(Mt 16.20-28; Mr 8.30-9.1)

²¹januxun Jesúsun jatu nemakin:

—En Mesías Cristoki tsua banabimayamayuxankanwen— iwanan,
²²ana jawen tsumabu jatu yusinkin yuikin:

—Diosun bake matun Juchi Kayabi Iyuanan, eki sinatakin ea ichakawakin nukun xanen ibubu inun Diosbe nukunabu janchaxunika xanen ibubu inun yusinananmisbun ea danankin ea jatu tenanmabu mawa xaba dabe inun besti kaya en ana bestenxanaii— jatu watan

²³januxun yudan kaian jatu ichawaxun jatu yusinkin yuikin:

—Tsuabunda ea chibankatsis iki ibubis jawenakidi jaska shinanmis jau ana jaska shinanyamakubainunbunwen. Jaska inun, “Bika tenei Jesúswen jawa dakeama ja keskai en jabe mawatiduki”, jau ikubainunbunwen. ²⁴Jamen tsuabuda jatunmebi mekei: “En mawakatsi ikamaki”, ikin shinanmisbuden, eauma mawaxankanikiaki. Jakia ea ikunwakin en kakape yuikin ea chibainwen taexun tenanbu ebe jiwekuinxankanikiaki. ²⁵Ja inun, mabu midimawen kemukin ichawaxun ea ikunwakin chibambuma jatunmebi jatun jiwekuian benuxankanikiaki, eauma mawakinan. ²⁶Jaskaken tsuabuda eki inun en janchaki dakemisbuden, en Epan kushipaya jawen nai tsuma pepabube jua jabiaskadai en jatuki dakediaxanaii—iwanan ²⁷—Chanima en matu yuiai ninkakanwen. Betsabu na jabia man mapuabudan, man mawadiamaken Dios kushipajaidai xanen ibui taeai man uinxanaii— jatu wanikiaki.

**Jesús damitan jatu uinmanikiaki, na
janchadan**
(Mt 17.1-8; Mr 9.2-8)

²⁸Janua janchashina 8 día xaba kasmai jatida kaya Pedro inun Santiago inun Juan Jesúsun jatu iyui kai Diosbe

janchanun ika kakin mati keyatapajaida jatube mapeketan ²⁹janua Jesús Diosbe janchaya ma besu betsai damia jawen tadi juxupajaidai chaxa chaxa ikaya ³⁰⁻³¹Elías inun Moisés jabiaskadiai ja dabedi chaxajaida punte punte iki mapuxun jaska Jerusalén anua Jesús mawaxanai yui jabe janchaibu ³²Pedro inun Santiago inun Juan yuda datsupe ika uxakatsis ibia uxama Jesús inun ja dabe jabe mapuabu uiainbun ³³ja dabetan Jesús ma dapaxkabainaibun xabakabi shinanma Pedron Jesús yuikin:

—Yusinaan, nun nenu juadan, pejaidaki. ¿Pean xubu dabe inun besti matu waxunpa, betsa mina inun, betsa Moisésna inun betsadi Elfasinadan?— ikaya ³⁴⁻³⁵janua nai kuin bekin jatu bepuaya dateaibun nai kuin anuxun jatu yuikin:

—Na en bake en Katunidan, ninkaidakubainkanwen— jatu waya ³⁶jakimamadi samama bedu bedu ikin Jesús besti nia uinibukiaki. Januxun jaska june uinbidanimaxun tsua yuiyama iyukubainibukiaki.

Juni bake yushin chakabuya Jesúsun kainmanikiaki, na janchadan
(Mt 17.14-21; Mr 9.14-29)

³⁷Mati anua Jesús damia uintan jabianu niti ika jatube uxashini penaya butubidanaibun Jesúski dasitanun ika yudan kaian jaki nukui buaibun ³⁸januxun juni betsa jatu nashui ikaina nixun jui kushipawen unanxubima Jesús yuikin:

—Yusinaan, en juni bake bestichaiyaki. Ea uinxunwen. ³⁹Yushinin achixun bis bis imakin duxku imakin kemu bus bus imakin ichakawakin jeneismaki. ⁴⁰Jaskamisen: “Jau yushin chakabu ea kainmaxununbun ika”, min tsumabu en jatu shinanbiadana tsuan jawa ea kainmaxuntidubumaki— ikaya

⁴¹Jesúsun mapuabu dasibi yuikin:
—Ikuwainsbuma inun chakabubuu, ejatiki matu medabewai ana en matube jiweyuxanai?— iwanan, ja juni yuikin:
—Min bake uinun nedí iwewe— aka

⁴²iweaya yushin chakabun Jesús bechitan ja juni bake duxku imakin main tin imatan taka taka imaya Jesúsun uinkin yushin kunyan akin kainmaxuntan jawen epa yunuaya ⁴³Diosun pepa kushipawen Jesúsun jatu uinmakubainaiwen taea dasibi e iki Jabaa! ike ikeabun

Mawaxanaikidi Jesúsun ana jatu yuiniaki, na janchadan
(Mt 17.22-23; Mr 9.30-32)

janua Jabaa! iki mapuabun jawen tsumabu besti Jesúsun yuikin:

⁴⁴—Eska en matu yuiai ninkatan jakimayamaxankanwen. Ea en matun Juchi Kayabi Iyuadan, tsuanda ea jatu achimaxaniki— jatu waya

⁴⁵jaska Jesúsun jatu yuixu jau ninkayamanunbun Diosun jatu nemaiwen taexun jawa ninkamajaida jawa yuiai dabanen datekin Jesús jawa ana yukama inibukiaki.

Tsuanda jatu binuntidukidi Jesúsun jatu yusinikiaki, na janchadan
(Mt 18.1-5; Mr 9.33-37)

⁴⁶Janua Jesúsun tsumabu yuinamei:
—Jesúsbe xanen ibukin cnuukan, jadatubun betsabu nun matu binunxanimenkain? ¿Eamenkain?— ibidakanku ⁴⁷unantan jatu yusinun, iwanan, bakeishta betsa ixun ⁴⁸jatu yuikin:

—Ea duawanun, iwanan, na bakeishta keska wakin tsuada en kenaya juaidan, ikin ea akawakin man duawatiduki. Jabiaskadi wakin ea besti duawama jatun ea yununi Diosdi jabun duawaxankanikiki. Jaskaken tsuada

jawa shinanma keanma dasibibu
medabewakin ja kenmisbu jatu
binuxankanikiki– jatu waya

**Tsuanda nuku dananma nukun jaibuki,
anikiaki, na janchadan**
(Mr 9.38-40)

⁴⁹januxun Juanen Jesús yuikin:
–Yusinaan, juni betsan min kena
kushipa paewen yushin chakabu kainmai
nun uinbidanshinaki. Nukubetan mia
chibanmaken nun nemakin bextepaibia
nuku ninkama ishianki. Jaska wakin nun
nemashinadan, ¿pemen?– aka

⁵⁰Jesúsun Juan yuikin:
–Nemakin man jatu bextetidumaki.
Tsuada nukuki sinatamadan, nuku
medabewaikiki– jatu wanikiaki.

**Santiago inun Juan nemakin Jesúsun
jatu kunyan anikiaki, na janchadan**

⁵¹Janua jawen Epa anu Jesús kaxanai
kemaya dateama Jerusalén anu kai taekin
⁵²janu uxati jiwe jau unanti watanunbun
jawen jancha yuixunika bebunkidi jatu
yunua bui Samarianawabun mae anu
jikixun yukabu ⁵³Jerusalén anu Jesús
kaiwen taea janu jau uxayamanunbun jatu
danankanxu chanitushiaya ⁵⁴Santiago
inun Juanen ninkaxun Jesús yuikin:

–Yusinaan, jaska Elíasin ani keska
wakin ćnai anua chi kauankin jau
Diosun ja mae jatu yamawakin keyunun
Dios yukapa?– ikaya

⁵⁵Jesús sinaxun jatu kunyan akin
nemabaini ⁵⁶mae betsan anu uxanun ika
bunibukiaki.

**Jesús chibanun, iwanan, yukanibukiaki,
na janchadan**
(Mt 8.19-22)

⁵⁷Ana Jerusalénkidi bui bai
tanabainaibun juni betsan Jesús yuikin:
–Yusinaan, janida min kai en mia
chibankatsis ikaii. ¿Mibe kapa?– aka

⁵⁸jawen juinti pepamenkain, unanun,
iwanan, Jesúsun yuikin:

–Kaman inu jawen kini jayaki. Peiyabu
jawen na jayabuki. Jakia matun Juchi
Kayabi Iyu ea en yusinkubainmiswen
taea janu uxati jiwe en jayamaki. ¿Ea
keskai min jiwekunkaintidumen?– akin

⁵⁹juni betsadi Jesúsun yuikin:

–Tapinkin ea chibankubainwen– aka
–Xanen Ibuun, ea jeneyuwe, ja dukun
en epa mawa maiwatan en mia chipu
chibanxanaidan– aka

⁶⁰nemakin Jesúsun yuikin:

–Jaskamaki. Ikunwanma mawa
keskabun min epa maiwatinidubuki. Jakia
mianan, na jabiatian ebe kai taekin Dios
xanen ibuxanaikidi yusinkubainxanwen–
akaya

⁶¹januxun betsandi Jesús yuikin:

–Yusinaan, eandi en mia chibankatsi
¿ja dukun en jiweanua enabuki
chaniyutanpa?– aka

⁶²nemakin Jesúsun yuikin:

–Tsuabunda ea chibankiakin jawen
shinan dabewen unudi shinain inun
unudi uiainan, jaska Dios xanen
ibuxanai pe dayaxuntidumbumaki–
anikiaki.

**Jesúsun 72 junibu yununikiaki,
na janchadan**

10 ¹Januxun mae tibi anu janu Jesús
chipu kaxanai anu jau bebunkidi
yusintanunbun 72 juni jaki chiti ikabu
katuxun juni dabe tibi jatu yunua
akeakekin ²jatu yuikin:

–En tsumabun en jancha
ikunwakin chibankisbun jatu yusian
akeakebaunaibun ichapabun ea
ikunwanxankanikiki. Jaskaken chanima
Diosun bai anu miban midima ma
jushin keyui keska dakaki. Jakia jawen
dayakapabu eskadabeswen taexun
ana dayakapabu ichapa jau yununun
bai ibu Dios ana yukakanwen, jawen

yunu tsekakin ichawaxunai keska wakin yudabu jau jawen jancha jatu yusinbaununbunan.³ Eanan, kaman inu pubenbu anu chaxuhan bake yunua keska wakin man en tsuma pepabu matuki sinataxanaibu anu en matu yunuai yusinditankanwen.⁴ Man jaskabaintanunbun matu yusinun ninkakanwen. Mais butankanwen. Jaki mabu aduti kapankan buama jaki pei aduti matun chinexeketiki usua nuxatiya buama inun matun bichi tae betsa buyamakanwen. Jaska inun, bai tanabaini tsukida nukutan jabe janchai niti ikama dainbainxankanwen.⁵ Ja inun, mae anu jikitan tsuanuda jiweyukatsi iki jatun jiwe anu jikitan jatu yuikin: “Diosun jau matu unanuma jiwemakubainunwen”, jatu axankanwen.⁶ Man jaska wa yuda duapa janu jiweabu matun janchawen benimaxankanikiki. Jakia yuda duapa janu jiweama matun jancha danainbun matun duapa jancha ana jatu mebinbainxankanwen.⁷ Ja inun, jani mae anuxunda matu beya waibu anu janu jiweyuxankanwen. Dayakapabu pakamisbu keska wakin matu pimakin mabex amakin jawada matu inanbu jabianuxundi piyuxankanwen, jiwe betsa tibi anua piti benabaunamadan.⁸ Janida mae anu man jikia matu beya waibu anuxun jawada piti matu inanbu piyuxankanwen, dananmadan.⁹ Ja inun, jabianu jiweabu isin teneaibu xuxawakin jatu yusinkin: “Dios xanen ibui nenu ma kemaikiki”, akin jatu yuikubaunxankanwen.¹⁰ Jakia janida mae anu jikitan man jatu yusian danainbu jatun bai namakixun yuikin:¹¹ “Dios matuki sinatai man unanun matun jemaintin anua matun mai mishpudi buama nun jutakai jushukidi ikainaii. Jakia matu duawayui Dios xanen ibui ma kemabiaya jawen jancha man danain uindaxankanwen”, akin

jatu yuixankanwen.¹² Jamen betsadan, janu Diosun yudabu dasibi jatu kupiaitian jaska Sodoma chiwen Diosun jatu kupikin jaska wani binumakin jabun matu dananibu Diosun jatu kupijaidaxanikiki– jatu watan

**Mae betsapa anuxun Jesús
ninkabumaken jatu ja anikiaki, na
janchadan**
(Mt 11.20-24)

¹³ jatidi betsabu mapuabu ana jatu yuikin:

–Corazín inun Betsaida anu man jiweabu matun chakabu jenetan man shinan betsa wakatsi ikamadan, man nuitapajaidaxankanaii. Jakia Corazín inun Betsaida anuxun jawen unanti dami kushipa betsa betsapa en matu uinmakubainima keska Tiro inun Sidón anu jiweabundi jabiaskadi uintan jatun chakabu jenenun, iwanan, jointi nishmajaidatan saku wati tadi bexa xeni sawetan chi mapuwen mapu tukutan jatun shinan betsa watan Dios ikunwankeanibuki.¹⁴ Jaskawen taexun janu kupiaitian ja nawabu Tiro inun Sidón anu jiweabu jatu kupi midinkin Corazín inun Betsaida anu man jiweabudi shinan betsa wabuma Diosun jatu kupijaidaxanikiki.¹⁵ Ja inun, Cafarnaúm anu jiweabun man shinankin: “Nun pepabuwen taexun Diosun nuku kenwanxanikiki”, ibiakin man ea ikunwanbumawen taexun janu chi nukaisma anu Diosun matu yunuxanikiki– iwanan,

¹⁶ jabun chibainbu betsabu yuikin:

–Tsuabuda en jancha man jatu yusiany an matu ninkakin eadi ninkaxankanikiki. Jamen tsuabunda matun jancha danankin enadi danandiaxankanikiki. Ja inun, ea danankin jatun ea yununidi danandiaxankanikiki– jatu watan nichian bunibukiaki.

**Ja 72 junibu jaki chiti ikabu
chintunbidanibukiaki, na janchadan**

¹⁷Jesúsun jatu yunuima yusinkin jatu xuxawakubauntani shinan chankanyanbi benimajaidakubidani jikibidanbidani ja 72 junibu Jesús anu ichai keyutan yuikin:

–Yusinaan, isin teneaibu xuxawakin min kushipawen inun min kenawan taexun yushin chakabundi nun yunua ninkatan kaindiakubainshinabuki. Jaska watani jui nun benimajaidakunkidanaii-akeakeabu ¹⁸Jesúsun jatu yuikin:

–Yushin chakabubu man jatu kainmakubaunaibun Satanás kushipabiaken Diosun jawen kushipa mebian nai anua kana bakai mai anu tin ikai keskai Satanás babutan kauanai en uinshinaki. ¹⁹Ninkakanwen. En kushipa en matu inankin yunuimaki, jau tsuan matu meyamakubainxanunbunan. Dunuki man paia matu pia jawa man isin tenetidumaki. Ja inun, nibuki man paia matu pia jawa man isin tenetidumadiki. Ja inun, Satanásan binukin matu jawa maematidumaki. ²⁰Jaska man washina peki. Jaskabia yushin man kainmashinawen besti benimayamakanwen. Jakia nai anu Diosbe man jiwxanaibu Diosun matun kena tibi ma kenenawi taea jaska bestiwen benimakubainkanwen– jatu waya

**Jesús benimakin jawen Epa kenwanikiaki,
na janchadan**
(Mt 11.25-27; 13.16-17)

²¹januxun Diosun Yushin Pepatun Jesús benimawakin shinan chankanwan Jesúsun kenwankin yuikin:

–Epaan, nai inun mai jidabi minaski. Min duapa jancha ja unanepai kenmisbu min jatu unanmama jabu keinsbuma besti min jatu unanmakubainaiwen taexun en mia kenwaiin– atan

²²mapubaunabu yuikin:

–En Epan jawen kushipa dasibi ea yununidan, tsuan en jawen bake ea unanbumaki. Jakia en Epan besti ea unan keyuikiki. Jakia tsuan en Epa unanmadiki. Ea jawen baken besti en Epa en unan keyudiaii. Jakia jabun ea chibainbu en Epa en jatu unanmamiski-iwanan,

²³⁻²⁴jawen tsumabukidi dabekexun jatu besti yuikin:

–Mamu yuinun ninkakanwen. Ea en matun medabenan man uiainan, nukun xenipabu Diosun jancha yuixunikabu inun xanen ibubun uinpabiakin ea uianma inibuki. Ja inun, na man ea uiainan, uinkatsi ibiakin ea uianma inibuki. Ja inun, jabias man ninkaidan, ninkapaibiakin ea ninkamadi inibuki. Jaskaken jabias man uiainan, tsuabunda uindiai benimakanikiki– jatu waya

**En jabube jiweadan, ɿtsuabumen?
ikai miyuwen samaritanokidi
Jesús yusinikiaki, na janchadan**

²⁵mapuxun ninkaibun Moisin keneni yusinanamistun Jesús unanti wanun ika benikauan yukakin:

–Yusinaan, jiwea kayabi bikatsi ikin Dios benimawakin ɿjaska waxanpa?– aka

²⁶Jesúsundi yukakin:

–Moisin kenenedan uinkin ɿjawa min yuimismen?– aka

²⁷yusinmistun Jesús yuikin:

–Eksa nuku kenexuniki: “Matun shinan jidabiwen inun, matun kushipa jidabiwen inun, matun yuda jidabiwen matun Xanen Ibu Dios duawakubainkanwen. Ja inun, min jabube jiweabu duawadiakubainkanwen, ibubis man nuimekemis keskaidan”, nuku waniki– aka

²⁸Jesúsun yuikin:

–Min pe yuiaii. Jaska min yuiai keska akubaini Dios anu min jiwea kayabi ixanaii– aka

²⁹ibubis penun ixun Jesús yukakin:
 -En jabube jiweadan, čtsuabumen?– aka
³⁰unanmakin miyuiwen Jesúsun yuikin:
 -Jerusalén anua juni betsa kai Jericó
 bai tanabainai juni yumetsubun jawen
 mabu binun, iwanan, kusha kusha axun
 dasibi jawen mabu biantan jenebainabun
 shinanea dakaken ³¹janua Diosbe
 nukunabu janchaxunika betsa jawa
 shinanma jui jabias bai tanabidankin juni
 kushabainabu daka bechitan jawen nui jaki
 kemakatsi ikama benantaxun besti uintan
 dunkebainken ³²janua Dios kenwanti jiwe
 anuxun jatu medabewai dayamis Levín
 baba betsa jabias baiwendi jukin bechitan
 jawen nuiamadi dunkedabainken ³³ja
 Samarianawabube danananain man
 dakekenanmis betsa jabias baiwen jukin
 matunabu betsa kushabainabu daka
 bechitushitan jawen dabanan iki niti
 itan ³⁴ja juni detebainabu jawen nui jaki
 kematan jawen dete piti xeniwen inun
 vinowen dapuxxun neatan jawen burroki
 katsauntan janu chaikea bei uxamisbu
 anu iyuxun duawakin mekeshini ³⁵penaya
 kakin jawen pei aduti saku anua pei ewapa
 dabe bixun jiwe ibu inankin yuikin: “En
 ma kai na juni ea duawaxunkubainxanwen.
 Na pei keyukan ana kauankin jawen texe
 ana en mia pakayuxanaii”, abainimaki–
 iwanan, ³⁶Diosun jancha kenenibu
 yusinanamis Jesúsun yukakin: –Ja juni
 dabe inun bestidan, čja juni kushabainabu
 jadatu jawen nuikin jabube jiwea keskakin
 duawaiamamen? Min shinanan, ea yuiwe–
 aka

³⁷yusinmistun Jesús yuikin:
 -Ja juni jawen nuimaki– aka januxun
 Jesúsun yuikin:
 -Miadi jabiaskadi ikunkainwen– abaini

Marta inun Marían jiwe anu Jesús
 bai ka jikinikiaki, na janchadan

³⁸janua ana jawen tsumabube
 kakunkaini mae betsa anu Jesús jikiaya

ainbu betsa Martan jawen jiwe anu
 iwana ³⁹januxun jawenabu yusianyan
 jawen betsa María Jesúsun tae dapi
 tsauxun ninkaya ⁴⁰Martan piti ichapa
 bawai ja mesti bikakin jaskawen
 dabanan Jesús yuikin:

-Xanen Ibuun, mia pimanun ika en
 mesti bawai en daya chakayamaya en
 betsan ea medabewamaki. Jaskaken
 ewen nuikin ea yunuxunwen, jau ea
 medabewanunan– aka

⁴¹Jesúsun Marta nemakin yuikin:

-Martaan, Martaan, dayakin piti nuku
 bawaxunkin min jiwe nuku pewaxuni
 pebiai min juinti ma sinaki. ⁴²Ea
 duawaidan, jaskatimaki. Jakia Marían
 en yusian ninkakin ea duawai tsuan
 nematidumaki– anikiaki.

**Jaskai Diosbe janchatikidi Jesúsun
 yusinikiaki, na janchadan**

(Mt 6.9-15; 7.7-11)

11 ¹Ana betsatian Jesús ka Diosbe
 janchai meneaya jawen tsuma
 betsan ea akin yukakin:

-Xanen Ibuun, jaska Juanen jaki chiti
 ikabu yusinma keska wakin Diosbe
 janchai jadakidi itimenkain nuku
 yusinwen– aka

²Jesúsun jatu yuikin:

-Diosbe janchakin yuikinan eska watiki:
 ‘Epaan, min kena medibidan, mia
 duawakin
 jau mia kenwankubainunbunwen.
 Nai anua xanen ibukin min yunua
 jaska chibanmisbu keska wakin
 nenuxundi nun mia chibankatsis
 ikaibu
 min shinan besti nuku chibanmakin
 nuku medabewakubainwen.

³ Ja inun, nuku mekekin na jabiatian
 jaska min nuku axuain nun
 piyunun piti nuku inankubainwen.

⁴ Ja inun, tsuabunda nuku
 chakabuwaibu jatu jakimawakin

jatun chakabu nun ana jaska
shinanmawen taexun
nun mia chakabuwai buaxuntan ana
jaskakidi nuku shinanmayamawe.
Ja inun, nun kaneyamanunbun
jawada nun jawen kemumis kainyain
nuku nemaxunkubainwen’,
atiki- iwanan,
⁵⁻⁶ miyuwen ana jatu xabakabi yusinkin:
-Matubudan, man jaibu tibiyaki.

Yamenapun min jaibun jiwe anu kaxun
kenakin: “Xexei, xexei, ɿmin uxamen?” min
wa “Jawamen?” ikaya “Nukun jaibu eki bai
juxu en jawa pimatimaki. Misi dabe inun
besti ea inanyuwe”, min wa ⁷jawen jiwe
medanxun mia nemakin yuikin: “Ma en
bakebube inakin beputi en bexeaki. Jaska
butukain en mia inantimaki. Ea chikish
wama kadiwe”, mia wabia ⁸min jawen
jaibuwen taea chikishkin mia inankatsi
ikama ibiaya ninkamas daketapa wakin
min yuka jeneamawen taexun butuxun
jawada min bikatsis ikai mia inantiduki.

⁹⁻¹⁰Jaska wakin tsuanda Dios yukakin
ea akadan, jawen jawada inanmiski.
Tsuanda jawada benakin Dios yukadan, jaki
nukumamiski. Tsuanda jawada bi jikinun
ixun Dios kenadan, bepenxunmiski. Jawada
min yuka mia axuntiduki. Benakin jawada
min yuka mia bechimaxanikiki.

¹¹Ja inun, betsadan, min baken baka
mia ea aka jaki dakekin dunu man
inainsmaki. ¹²Ja inun, takada bachi mia ea
aka jaki dakekin nibu man inainsmadiki.
¹³Jaskaken man pepamabia matun bakebu
man duawamis man unaini. Jamen jaska
binumakin Epa Dios nai anuatuun man
tsuabunda yukai ninkakan jawen Yushin
Pepa matu inanmiski- jatu wanikiaki.

**Jesús Satanásan kushipa besti jayaki, akin
yuanibukiaki, na janchadan**
(Mt 12.22-30; Mr 3.20-27)

¹⁴Ana betsation yushin chakabun juni
betsa juyu wayama Jesúsun nichian

kainkainaya juni ana janchai taeaya
yudan kaianen uin yuinamei: “Jabaa!
Nadan, juni kushipa pejaidakí”, ikaibun
¹⁵jakia jatiditun yuikin:

-Na junidan, yushin chakabu xanen
ibu Beelzebún kushipa jayaki. Jaska
bestiwen taexun yushin chakabu jatu
kainmaikiki- ikaibun

¹⁶betsabun Jesúsun unanti wanun, ixun
Jesús yuikin:

-Dios anua jawen unanti dami nuku
axunwen, min jawen kushipa jaya
nun uinunanan- akabu ¹⁷jatun shinanen
kaneibu unankin Jesúsun jatu yuikin:

-Mae betsa anu jatunmebi paxkatan
detenamei jatunmebi debui keyumisbuki.
Ja inun, jabias yudabu paxkai jatunmebi
jenenamei yamai keyudiatidubuki.

¹⁸Jabiaskadi wakin Satanásan jawenabu
yudabu anua kainma jawen yuda punu
nukai babui keyukeanaii. Ja inun,
Beelzebún kushipa en jaya jawenabu
en kainmama ikeanaii. ¹⁹Jamen eanan,
Beelzebún kushipawen en yushin
chakabu kainmaya matun tsumabunan,
ɿtsuan kushipawen yushin chakabu
kainmakanimenkain? Jaskaken man
kanejaidai jabun matu chitekin ja
axanikiki. ²⁰Jamen chanima Diosun
kushipawen ean en yushin chakabu
kainmamiswen taea Dios matuki bai ma
juaki. ²¹Jaskakin man kanejaidai matu
yuinun ninkakanwen. Juni kushipa jawen
pia inun jawen kushatiyatun jawen mae pe
mekeaya tsua jikikain yumetsutidumaki.

²²Jakia juni betsa ja binuan juxun
maemakin jawen yuda junekin mekemis
inun jawen pia inun jawen kushati
mebinxun jawen jamapai ibu watan jawen
jaibuaibu inanbaunmiski. Eanan, Beelzebú
binukin jawen kushipa jatuwen dayai
mebintan ena en watiduki. ²³En jaskaken
tsuanda ea jaibuwama ea nemaikiki. Ja
inun, tsuanda juni betsabu ea chibanmama
jatu eki dakemamisbuki- iwanan,

**Yushin chakabu kainkaina chintumiskidi
Jesúsun jatu yusinikiaki, na janchadan**
(Mt 12.43-45)

²⁴miyui betsawen jatu yuikin:

–Juni betsawen anua yushin chakabu kainma kai jiundukunkatsi iki janu unpax jayama anu kakunkaunkin janu jiundukunti pepa bechiam shinankin:
²⁵“En janu jiwea en kainkidanshina anu en ana chintunkainaii”, ikaini kaxun ja yuda medan jiwe xaka matsua keska jawa jayama bechitan ²⁶kaxun ana 7 yushin betsawen chakabu jatube dasikidan, ja dukuntun ja yuda ichakawakin midinwaima ana binumakin pikujaidamisbuki– ikin

**Jesúsun jancha ninkai benimati kayabi
jaya jatu yuinikiaki, na janchadan**

²⁷Jesúsun jatu yuikin menediaman yudan kaian nashui ixun jancha kushipawen ainbun yuikin:

–Min ewa mia kainxun mia chuchu amaniwen taea benimajaidakiki– aka
²⁸Jesúsun ainbu yuikin:

–Chania jabiaskaki. Jakia tsuabunda Diosun jancha ninkakin chibannmisbun en ewa binui ana benimajaidakanikiki– jatu waya

**Jawen dami wati kushipa yukamisbu
Jesúsun jatu yusinikiaki, na janchadan**
(Mt 12.38-42; Mr 8.12)

²⁹janua ana jaki yudan kaian ichabidanbidani mapubaunaibun Jesúsun jatu yuikin:

–Nukunabu na jabiatian man jiweabudan, man chakabuki. Jamapai Dios anua unanti tsuan atiduma uinkatsi man ea yukabiamisdan, Diosun Jonás bakawan xeamashina ana kainma jiwenidan, jaska keska besti Diosun matu uinmakin matu axundiaxanikiki. Shinankanwen. ³⁰Níniwe aewan anu

kaxun jau jatu yusintanun Diosun Jonás yunua ninkama mae betsawen anu paxai xaxuwen kai ianenwan medan jasa bakawan ewapatun xea xaba dabe inun besti ka janan Jonás ana besteanwen taexun Níniwe anuabun unankin jatun shinan betsawen watan Dios kenwanibuki. Jamen eadan, matun Juchi Kayabi Iyua mawa en jabiaskadiaya bestibu man ea ikunwanxanaii. ³¹Jaska inun, betsawen, nawa ainbu xanen ibu surkidi chajaida Sabá maiwan anu jiwea nukun xenipabu Salomónen jancha unanepa ninkatanun ika juniki. Salomón en binujaidabiaken man ea ninkakatsi ikabumawen taexun janu matu kupiaitian ja nawa ainbu xanen ibun matu ja achakayamaxanikiki.

³²Ja inun, Níniwe anuabu Jonásin Dioskidi jatu yusian ninkakin jatun shinan betsawen watan Dios ikunwanibuki. Jamen eanan, en Jonás binujaidabiaken tsuan man ea ninkakin matun shinan man betsawen wakatsi ikamawen taexun janu kupiaitian Níniwe anu jiwenibundi matu ja adiaxankanikiki– iwanan,

**Binkidi miyuiwen Jesúsun jatu yusinikiaki,
na janchadan**
(Mt 5.15; 6.22-23)

³³ana jatu yusinkin:

–Bin dekuxun june anu tsauinsbuma inun ji bauwen achimaisbumaki. Jakia jikikin jau uinunbun dekuxun manaundi tsauinmisbuki. ³⁴Jaska keskadi matun yuda anudan, matun bedudan, bin chaxa keskaki. Jaskakidi matu yusinun ninkakanwen. Matun beduwen man uinmiski. Matun shinanwen matun yuda pepa jaya kemuama man xabakabi meke pewaki. ³⁵Jakia man bin jayadan, man meshu medan jiwea keskatidubumaki. Uindakubainkanwen. ³⁶Jamen tsuabuda Diosun mekeba bin chaxa keskawen chakabuuma man pe besti shinanxanaii, kaneamadan– jatu watan

**Fariseo inun Diosun jancha
yusinanamisbu Jesúsun chitenikiaki, na
janchadan**

(Mt 23.1-36; Mr 12.38-40; Lc 20.45-47)

³⁷janua Jesús janchai meneaya fariseo betsan pimakatsi jawen jiwe anu iyua Jesús jikikain tapu dapi tsauxun piaya

³⁸fariseon uin metsayamas katan yuikin:
–Nukun xenipabun beya chibankin
čpidiama min mepanuamamen?– aka

³⁹Jesúsun yuikin:

–Fariseobun man shinanmiskidi mia yuinun ninkawe. Matun beya chibankin matun kencha tibi bemakis besti dachukin man napan pewamisbuki. Jakia yumetsukin jamapai chakabuwatan uke medanua matun shinan man pewaibumaki. ⁴⁰Man unainsmapabuki. Bemakia jawada man uintidu chukakin man pewabiamis matun juinti uke medan chakabubiaken man unainsmaki. Matun meken man uintidu inun jawada uke medan man jaya jabias Diosun damiwaniki. Shinaindakanwen. ⁴¹Ja inun, ja dukun matun shinan pewatan Dios duawakatsi ikin yaushiama nuitkaapu inankuin man pepakunkainxanaii.

⁴²Fariseobuun, man peidawai! Matunan, man kanekubainmisbuki. Matun piti nis wati ichawaxun maspu meken dabeti waxun bestichai Dios kenwanti jiwe anu dayanikabu medabewakin man jatu inankuimiski. Jaska pewabiai jaska Diosun jancha Moisin yusini man shinanma jawada jawen pepawati inun jawen nulti inun jawen jancha betsa watima yunubianiken matubu jawen jiwekin man jatu uinmaismaki, kanekinan.

⁴³Fariseobuun, matudan, matun ichati jiwe anu jikikain jaki tsauti pepa janu dasibibun matu uintidubu anu man tsaukatsis imisbuki. Ja inun, bai tanai

nia jau ea duawanunbun, ika kemutapa man nimiski. Man jaskaya Dios matuki sinatamis man nuitkaapaii.

⁴⁴Matudan, man bepadamemisbuki. Matunabu yusin chakakin jatu padankin man jatu kanemakubainmisbuki, tsuada mawa nitimabiaken maiwanibу unanma jamamaki jaki paia keskakinan– aka

⁴⁵jawen janchaki sinatakin Moisin keneni yusinanamis betsan Jesús yuikin:

–Jabaa! Yusinaan, jaska yuikin nukudi min nuku chiteaai– aka

⁴⁶Jesúsun yuikin:

–Moisin jancha yusinanamisbuun, matudan, fariseobu keskai matudi man peidawai! Xankamajaida matunabu iama keska wakin yusian tsuan chibantidubuma man jatu yusinbiakin jaska man jatu yusinmis ibubis chibanma janua man jatu medabewaismadiki.

⁴⁷⁻⁴⁸Matudan, man dakeisbumaki.

Matun xenipabun Diosun jancha yuixunikabun yusiaiinbu danankin jatu tenanxun maiwanibу jaska besti shinankin matun xenipabun ani medabewakin matundi jabias jawen shinanti jiwe jawendua besti man wamisbuki. ⁴⁹Jaskawen taexun Dios unanepatun yuikin: ‘Ea jatu yuixunikabu inun en tsuma kushipayabun jau jatu yusinunbun en jatu yunupakea jatu danankin betsabu tenankin betsabu ichakawakin jatu nichinxankanikiki’, iniki.

⁵⁰⁻⁵¹Matun xenipabun jatu dananpauni keska shinankin Diosun jancha yuixunikabu man danandiamisbuki, na

jabiatianan. Jabias shinanwen Diosun matu manakudiaxanikiki. Jaskawen taexun mai damiwakin taewani anua jatun Adánen bake Abel tenani inun Dios kenwanti chi tapu inun jawen kenwanti Templo namakixun Diosun jancha yuixunika Zacarías detenibu inun dasibibun Diosun jancha yuixunika betsa

tibi matun xenipabun tenanpaunibuwen taea ja shinanwen Dios jakimamawen taexun na jabiatian jiweabube man keainbu Diosun matu kupijaidaxanikiki.

⁵²–Diosun jancha kenenibu yusinaninanmisbuun, man peidawa! Diosun jancha jawen jiweti unanbiai ninka pewama tsuabuda Dios xanen ibuai anu jikikatsi ikaibu man jatu nemamiski. Matudi man jikitidumabia jabu betsabu jikipananbun man jatu nemakubainali– jatu waya

⁵³⁻⁵⁴yusinaninanmisbu inun fariseobun jawen jancha ninkai Jesúski sinatakin ibubis kanemanun iwanan, padanpaikin jawen yusankidi jaikaimas jamapai yukanibukiaki.

Jawada junea imisbu xabakabi unanxanaibukidi Jesúsun jatu yusiniaki, na janchadan

12 ¹Januxun Jesúsun jaska waibun ana midimajaida jaki ichabu jani ni pexun ninkatidumbabia ninkaibun Jesúsun jaki chiti ikabus dukun yusin taewakin yuikin:

–Fariseobu yusinanain bepadamemisbu misi xaxa wati keskabuki. Jatun yusian matuki jikitan matu kanematiduki. Jatun yusian uindakanwen. ²Jawada jabun june akubainmisbudan, ana juneama xabakabi dasibibun unanxankanikiki. ³Januxun jawada dasibibun yui meshu medan nua keska junea janchamisbu xaba keska anuxun ana juneama xabakabi ninkaxankanikiki. Ja inun, dintu medan jikitan beputi beputan jamapai junexun yuimisbu jemaintin anua jancha kushipawen chaniai keska ninkaxankanikiki– iwanan,

Jaki besti mesei datetikidi Jesúsun jatu yusiniaki, na janchadan
(Mt 10.28-31)

⁴ana betsa jaki chiti ikabu yuikin:

–En jaibuaibuun, ana matu yuinun ninkakanwen. Tsuabunda matun yuda besti tenantidubuwen dateyamakanwen, tenanxun matu ana ichakawapaketid ubumakidan. ⁵Jakia jaki besti mesei man datekubainun bun matu yuinun ninkakanwen. Tsuanda matun jiwea tenantan chi nukaismanu jawen kushipawen matu yunitidu bestiki mesei datekubainkanwen, Dioskidan. Chanima en matu yuiaidan, ja bestiki datei mesekubainkanwen.

⁶Jaska inun, isa mishtin meken besti bikin pei jexe pishta dabeswen bitidubuki, kadumadan. Jabiaskabiaken isa tibi tanai Dios jakimaismaki.

⁷Jamen matun bu dasibi midimabiaken Diosun ma tana keyumistun isa mishtin ichapa bechipaibiakin Diosun isa mishtin binumakin matu bechipaijaidamiski. Jaskaken jawaki dateyamakubainkanwen– iwanan,

Jabun Jesúsun chanima ikunwain jaki dakeisbuma unanti waxanaibukidi jatu yusiniaki, na janchadan
(Mt 10.32-33, 12.32; 10.19-20)

⁸ana jatu yusinkin:

–Tsuabunda ea ikunwain dakeama ea datan akin yudabu jatu yuikin: “En Jesúsunak”, ikubainmisbu eandi Diosun nai tsumabu bebun nixun mekekin: “Nadan, enabuki”, akin en jatu yuixunxanaii. ⁹Jakia tsuabunda ea chibanma en janchaki dakei: “En Jesúsun ikunwanmaki”, eki ikubainmisbudan, eadi Diosun nai tsumabu bebunxun: “Nadan, enabumaki”, akin en jatu janchaxunamadi ixanaii.

¹⁰Jamen tsuabunda en matun Juchi Kayabi Iyua ea yuanbiaibun Diosun jatun chakabu buaxuntiduki. Jamen betsadan, tsuabunda Diosun Yushin Pepa yuainbu jatun chakabu Diosun buaismaki.

¹¹Jaska inun, matuki sinatakin jau matu kupinun bun jatun ichati jiwe anu

kasmai xanen ibu betsa anu kasmai matu iyuxun jatun xanen ibubu anu matu nichianbu: “*Jadakidi yuixanpa?*” iki dateyamaxankanwen. ¹²Matu jaska waibu jabiatian matu janchamakin Diosun Yushin Pepatun matu unanmakin jaska matu janchamaxanikiki– jatu waya

Jawen jiwetimabiaken mabuwen kemuaidan, meseikiaki, na janchadan

¹³januxun mapuabu anuxun juni betsan jau Jesúsun ea medabewanun ixun yuikin:

–Yusinaan, en ibu mawashinken en juchin jawen mabu ea paxkaxunamaki. Jau ea paxkaxunun ea yuixunwen– aka ¹⁴nemakin Jesúsun yuikin:

–En matun xanen ibumaki. Jaska watan en matu paxkaxuntidumaki– iwanan, ¹⁵yudan kaian yuikin:

–Man mabuwen kemuaidan, matu yuinun ninkakanwen. Man mabuyabia jatun matu jiwestidumawen taea jamapai mabu shadabu besti bechipai ja jayanun ika man kemukunkainaidan, uindakanwen– iwanan,

¹⁶januxun jaskakidi miyuiwen jatu yusinkin

–Juni betsa mabu midimayatun jawen bai anu yunu betsa betsapa waxun ichawatan ¹⁷jawen shinanan shinankin: “En xekiwan midima en jani adutidumaki. *¿Jaska waxanpa?*” iwanan, ¹⁸“En shinanan, en xekiwan aduti betsa betsapa apakin keyutan ana janu aduti jiwe ewapa wakin janu en xekiwan inun en mabu en aduxanaii”. ¹⁹Jaska watan jamebi shinankin yuikin: “Ma janu en mabu inun en piti ichapa aduti en jayaki. Jaskaken ana dayama juindukunkin piti ichapa pikin mabex aki benimakunkaini badi ichapa en jiwexanaii”, ikaya ²⁰januxun Diosun yuikin: “Jaskamaki. Jaska min yuiaidan, min unanmajaidaki. Na jabia meshu medan min mawaya

ja min mabu min pewakin keyuxudan, tsuabunda paxkaxankanikiki”, akin yuitiduki. ²¹Ja juni keskakin tsuabunda jamebi mabu ichawakin yaushikin Dios jaibuwama Dios bebunga nuitapaikiki– iwanan,

**Diosun jawenabu mekekubainmiskiaki, na janchadan
(Mt 6.25-34)**

²²januxun Jesúsun jawen tsumabu besti ana yuikin:

–Eska bestiwen taea matunmebi man jamapaiwen dabanan imisbukidi matu yusinun ninkakanwen. Jiwe bestia pepakunkainun ika piti pi inun tadi sawenun ika jawen dabanan iyamakubainxankanwen. Jiwea jayaidan, pitiwen besti man itidubumaki. Yuda jayaidan, tadi sawe bestinun ika man itidubumadiki. Jaskaken ja dabewen taea man jiwenun Diosun matu jiwea inanma iniki. ²³Jamen Diosun matu mekekubainmistun matu damiwanan matu jiwemakin chanima piti inun matun tadi matu inankubainmiski.

²⁴Ja inun, nai anu peiyabukidi matu shinanmanun ninkakanwen. Jabun jawa miban banana inun jawa bimi tsekaisbuma inun jabun piti aduti jayabumabiaken Diosun jatu pimakubainmiski. Jaskaken Diosun matu bechipaikin peiyabu matu binumakubainikiki. ²⁵Ja inun, tsuabuda ibubis nuikin jawen mabu inun jawen piti shinainwen taexun jawen jiwea ana chaipawatidumajaidaki. ²⁶Min jaska bestitidumawen taea jawada betsa betsapa inun ika jawen dabanan iyamakubainkanwen.

²⁷Jaskakan sua tuemis shinankanwen. Jawa dayakin tuduaismabia jawenduai tuemiski. Jakia nukun xenipabu xanen ibu Salomón mabujaidayatun jawen tadi jawendua sawexun jawenduakin

jua tuemis binuama iniki.²⁸ Jakia ni maxu juaya sepashinxun kuamisbuki. Diosun jua jawenduawamistun ja jua binumakin Dios matuwen nuikin matu tadi sawematiduki, man ikun bexmas wabiyadan.²⁹⁻³⁰ Jaskaken yuda dasibibu mai jidabi anuabu piti inun tadiwen kemukin benakubaunmisbuki. Jakia matudan, man betsaki. Matun Epan matu unainwen taea ja piti inun tadi man bikatsis imisdan, ana jas shinain jawen dabanan iyamakubainxankanwen.³¹ Jakia jawada Diosun bechipaiai chibankin ja dukun Dios xanen ibuwakin shinankubainxankanwen. Man jaska wai ja kachu jawen jiweti piti inun tadi man jayakunkainxanai, Diosun matu medabewadan– iwanan,

Dios jiwxuni pepatikidi Jesúsun jatu yusinikiaki, na janchadan

(Mt 6.19-21)

³² Jesúsun jawen tsumabu yusinkubainkin yuikin:

–En matu mekeawen taea man en chaxuwan keskabuki. Ja inun, man ikunwainbu ichapamabiaken matun Epa Diosun jawenabu matu watan jabe matu jiwemakubainxanikiki. Jaskawen taea jawawen dateyamakanwen.³³ Matun mabu jawada ma jayawen nuiama matun mabu betsawen pei bitan jawen nuitapaibu medabewakubainxankanwen. Jamen ja pei matun kapankanki man adua yumetsubun bibaintidubuki. Ja inun, jawen masanen pesa pesa atiduki. Jakia matun pei yaushiaman man inanananmisbu pewen matu kupikin nai anua jawa chapui keyuisma Diosun matu inanxanikiki.³⁴ Jamen tsuabuda jawen jiweti mabuwen kasmai Dioskidi shinain man Dios jiwxunaidan, jabiadidi matun shinanen man nuiai jayaki, nai anu kasmai mai anudan-iwanan,

Uxa keskama ninkai keskakin Jesús juxanai manakubaintikiaki, na janchadan

³⁵ Jesúsun jatu yusinkubainkin ana yuikin:

–Tadi pekadiama inun bin nukawadiama keskaxun man ea manakubainxanun bebunkidi matu yuinun ninkakanwen.³⁶ Jawen jaibu ainyain anu jiwe ibu nawai ka jawen tsumapan manaya juxun jikinun ixun kenaya jawen beputi xui jawaida bepenxunxanun ika uxama manai keskakubainkanwen.³⁷⁻³⁸ Janunkain éjatian juimenkainan? yamenapun kasmai takada keui taeaya kasmai jiwe ibu jukin jawen tsuma uxabuma bechitushiaya jawen tsumabu benimajaidaxankanikiki. Januxun chanima jiwe ibun jawen tsumabu duawakin jau jabetan pinunbun jatu baxti imatan jatu pimaxanikiki.³⁹ Ja inun, chanima jatiada yumetsu juai bebunkidi unankin jiwe ibun bextekatsi manatiduki, jau jikiyamanunan.⁴⁰ Jaska keskadiai jatianda en matun Juchi Kayabi Iyua en ana juxanai tsuan unanmaken matunan, matun jiwea pewakin keyutan ea manakubainxankanwen– ikaya

Tsuma chikish inun tsuma chikishmakidi Jesúsun jatu yusinikiaki, na janchadan

(Mt 24.45-51)

⁴¹januxun Pedron Jesús yukakin yuikin:

–Yusinaan, na miyuiwen min nuku yusiainan, ènukuna bestimen? èdasibitunadaka?– aka

⁴² Jesúsun yuikin:

–Eska keskaki. Xanen ibu betscha iakin jawen tsuma unanepa yunubainmiskidi matu yuinun ninkakanwen. Jawen tsuma betsabu pimakin jau jawen jiwe

mekexunkubainun jatun xanen ibun jawen tsuma unanepa yunubainmiski.

⁴³Janua xanen ibu ana chintunkidan jaska yunubainima axunkubainaya ja xanen ibu jaki nukutushitan benimajaidaxanikiki. ⁴⁴Chanimja xanen ibun jawen tsuma dasibi jawen jamapai mekemaxanikiki, jawen jiwe inun, jawen bai betsapa inun, jawen inabu inun, jawen tsumabu betsadan. ⁴⁵Jakia jawen tsuma shinan pema yunubainima shinan chakakin yuikin: “En xanen ibu yane juamaki. Jatiada juxanikiki”, iki dayanika betsabu juni inun ainbu ichakawai nawachakayamai paenkin ⁴⁶jatian juai manama ja xanen ibu jikitushitan jawen yunua axuanmawen taexun manaka chakabube kupijaidaxanikiki.

⁴⁷Jaskaken tsuabunda jawen xanen ibun daya unan keyubiakin jaska bechipaiai akama inun chibannmawen taexun jatu kupijaidaxanikiki. ⁴⁸Jakia betsadan, xanen ibun yunuama kaken jawen shinan jaska bechipaiai unanma kanemisbu ja mawaida jatu kupiamma ixanikiki. Januxun tsuada Diosun jancha ichapa inanshina jawen taexun jawen daya ichapadi yukaxanikiki. Tsuada Diosun ichapa mekemamis jani jaska wamis ichapadi yukadiakubainxanikiki-iwanan,

Jesúsun jatu paxka akeakenun ika junikiaki, na janchadan
(Mt 10.34-36)

⁴⁹Jesúsun ana jawen tsumabu yusinkin yuikin:

—Ea ikunwainbu inun ea ikunwanbuma jawen unanti wakin jatu paxkakin unanti wanun ika en juniki. Jaskaken ewen taea jau paxkanunbun en manayuaii.

⁵⁰Jaskaken Diosun ea unanti wakin jatu ea tenanmakin ea nuitapawaxanaibu manai en yumanayuaii. ⁵¹Man

shinan, mai anuxun unanuma matu jiwematanun ika en juni dabanan ćman shinainmenkain? Jaskamaki. Yudabu paxkanun ika en juniki. ⁵²Jaskaken na jabiatiān taewakin jiwe betsa anuxun jau ea chibannbun jawenabu meken besti paxkakin dabe kasmai dabe inun bestibun ea ikunwainbu dabe kasmai dabe inun bestibun ea ikunwanbuma en jatu paxka akeakekubainnai. ⁵³En jatu jaska waya ewen taea juni bake jawen epabe sinatanamexankanikiki. Ja inun, ainbu bake jawen ewabé sinatanamexankanikiki. Ja inun, jawen babawan jawen yayabe jabiaskadixankanikiki. Jatu jaska wakin en jatu paxka akeakekubainxanaii– jatu watan,

Janu kupiti juaitian unanbumakidi Jesúsun jatu yusiniaki, na janchadan
(Mt 16.1-4; Mr 8.11-13)

⁵⁴januxun mapuabu Jesúsun jatu dasibi yuikin:

—Badi kaikidi meshu meshuai uinkin: “Ui bekatsis ikikiki”, ikin uinkin man yuimiski, kaneamadan.

⁵⁵Ja inun, surkidia niwe bei xunku ikai uinkin: “Ikis badi kujaidayuikiki”, ikin man yuidiamiski, kaneamadan.

⁵⁶Bepadamemisbuun, jaska ui inun niwe bemis unanbiamisxun janu chakabu betsa betsapa kaiankeakeai uinbiakin ćjaskai man jiwea matu kupixanai man unanmamen?– iwanan

Dibiawen jau jawen nuinun daewatikidi Jesúsun jatu yusiniaki, na janchadan
(Mt 5.25-26)

⁵⁷—Jaskai matunmebi unanbiakin ćjawada pepa man pewaismamen? ⁵⁸Jaska inun, yuda betsa man dibijaidawen taexun ja man dibiatun nawa xanen ibu anu matu iyuaya jau xanen ibun jawen policiabu matu bichimayamanun ja man dibia jawawenda

daewanwen.⁵⁹ Man daewabainama matu bichiabu man paka keyuama chanima man jaskatan kaintidumaki. Jabiaskadi wakin ea jaibuwatan Epa Dios daewadiakubainkanwen, matun chakabuwen jau matu kupiyamaxanunan-jatu waya

Jawen shinan betsa watikidi yusinikiaki, na janchadan

13¹januxun jabiatandi juni betsan Jesús yuikin:

–Uatian min mai pakea jatiuma Galilea anuabu Templo jemaintin anuxun kenwankin jatun chaxuwan tesenxun kuakin menupananbun xanen ibu Pilaton jawen soldadobu yunua machatuwen jatut detekin jatun jimi chaxuwan jimi yabi jusishinabukiaki. ¿Jaskakin Pilaton jatut jaska washinamen?– akabu ²Jesúsun jatut shinan pewakin jatut yuikin:

–Man shinanan, ja junibu tenanshinabudan, jatunabu Galilea anu jiweabu jabun chakabujaida wakin jawenabu binuanwen taexun jatut kupishina dabanen man shinainmen ikaitsa. ³Jaskamaki. Jamen matundi matun shinan man betsa wama man jabiaskadiai mawaxanaii, Diosun matu kupiaitiana.

⁴Ja inun, ¿ana betsa matu yukapa? Jerusalén anu mishki jiwe keyatapa jawen kena Siloé januxun uinbaanti jiwe pudekeidan 18 junibu ja naman mapuabu tenanidan, chakabuwakin juni betsabu Jerusalén anu jiweabu jatun chakabuwen jatut binuawen taexun kupini ¿man jaska shinandiamismenkain?⁵ Jaskamadiki. Jamen matundi matun shinan man betsa wama man jabiaskadiaxanaii, niti ikama nuitkaunkainidan– iwanan,

Miban bimiumakidi Jesúsun jatut yusinikiaki, na janchadan

⁶januxun jabias yusian Jesúsun miyuiwen ana jatut yusinkin

–Juni betsan jawen bai nemaki higuera ji banayamakidi matu yuinun ninkakanwen. ¿Bimi jayamenkain? ixun uin ka jawa jayama uintantanmis ⁷jawen dayanikaki nukuxun yunukin: “Uian. Dabe inun besti badi ka na higuera ji anu bimi en jamen benabidanbidanmiski. Bimiumasken ea dedaxunwen, jamen uinbain niakidan”, aka ⁸jawen tsumapan nemakin yuikin: “Ana badi bestichai manayuwe. Mai pukinkin mishpu bitan ina awa pui jusitan en mia tamanchinxunyuxanaii. ⁹En jaska wa bimiyaxanimenkain. Bimiyamasken en mia dedaxunxanaidán”– akin yuinikiaki.

Juindukuntitian ainbu kakuni Jesúsun kayawa kawenikinikiaki, na janchadan

¹⁰Mae betsa anuxun juindukuntitian jatut ichati jiwe anuxun Jesúsun jatut yusianyan ¹¹jabianudi ainbu betsa yushin chakabun ichakawakin kaku wani 18 badi kabia kawenikitidumajaida jatube tsaua ¹²⁻¹³Jesúsun uinkin kenaxun ainbu yuikin:

–Ainbuun, min ma xuxaki, min isin tenenidan– akin kamepiaya jawaida kawenikitan januxun Dios kenwankin taewaya

¹⁴janua juindukuntitian Jesúsun jaska wai uinkin shinain jatut ichati jiwe xanen ibu sinaxun jawenabu ichabu yuikin:

–Semana tibi 6 xaba nun dayamiski. Jau matu xuxawanun dayatian besti bekanwen, juindukuntitian xuxai juamadan– ikaya

¹⁵januxun Jesúsun jatut chitekin yuikin:

–Min jaska shinain keska minabubetan shinain man bepadamemisbuki.

Juindukuntitianbiaken matubun matun ina awa inun matun burro jawen nuikin tepebain man jatut unpax amamiski.

¹⁶Jabiaskadi wakin na ainbu matu

keska Abrahamnen babadi 18 badi ka Satanásan kanexkin isin tenemani jawen nuikin juindukuntitian en kaya wakin burro tepea keska waxudan, Ɂchakabumen?– akaya ¹⁷jabu jaki sinataibu jatu chitea dake chakayamai jawa yuiama maniabun yuda ichapabun Jesúsun betsa betsapa pepa dasibi waiwen taea benimai keyuaibun

Dios xanen ibuidan, jexe pexemishtin yumei ewapamis keskakidi jatu yusinikiaki, na janchadan
(Mt 13.31-32; Mr 4.30-32)

¹⁸Jesúsun jatu ana yusinkin yuikin:

–Dios xanen ibui jaskamiskidi

¹⁹miyuiwen matu yusinun ninkakanwen. Junin jawen bai anu mostaza jexe pxeishtabia banaima yumei ewai ewapashina jawen mebiki peiyabun jaki juindukuin utamisbuki. Dios xanen ibuidan, jaska keskaki. Ja dukun juni betsan Diosun jancha ikunwankin jawenabu yusian akeakeaya jawen yusian ninkakin bechipaikin chibanmisbuki, ichapabunan– iwanan,

Dios xanen ibuidan, misi jawen xaxa wati keskakidi Jesúsun jatu yusinikiaki, na janchadan
(Mt 13.33)

²⁰miyui betsawen ana jatu yuikin:

–Dios xanen ibui jaska keskamiskidi ana matu yusinun ninkakanwen.

²¹Misi wakatsi ainbun xekiwan dudu midimabiaken kencha ewapaki puchinin kesunxun jawen xaxa wati eskadabes unpaxwen nemuskin kapan dasibi buspukidankin xaxa wamiski. Dios xanen ibuidan, jaska keskaki. Ja dukun juni betsan Diosun jancha ikunwain pepakunkainkin jawenabu yusian akeakeaya unanxubida midimabun ikunwantidubuki– jatu wabaini

Janu jikiti xui jashuwen jikitikiaki, na janchadan
(Mt 7.13-14; 21-23)

²²Jerusalén baiwen kakin mae tibi anuxun Jesúsun jatu yusinkubainaya ²³juni betsan Jesús yukakin:

–Xanen ibuun, janu min xanen ibuayadan, Ɂeskadabes besti min jatu mekexanai?– aka

²⁴–Jaa. Chanimaki. Ea chibankatsis iki menan shinan mestenwantan janu jikiti xui jashu anu jikikanwen, chipu ichapa jikikatsis ibiai jikitubuma ixankanikiki. Jaska en matu yuiaii. ²⁵Eskaki, matu yuunun ninkaidakanwen. Iklis en jancha ikunwankin man ea chibantiduki. Jakia en Epan mae jikiti xui ma en bepuken tsuabuda jikinun, iwanan, kene pechiudi nixun kenakin yuikin: “Xanen ibuun, nuku bepenxunwen”, man wa matu nemakin yuikin: “ɁMan jania ikimenkain? En matu unanmabin!”, matu wa ²⁶tsuanda yuikin: “Mibetan nun piniki. Nukun mae anuxun min yusiniki”, man wa ²⁷januxun matu yuikin: “Man enabumaki. ɁMan jania ikimenkain? En ma matu yuixuki. Chakabuwakin matun shinan man betsa waismaki. Nenua budikanwen”, en matu waxanaii. ²⁸Januxun matun xenipabu Abraham inun jawen bake Isaac inun jawen baba Jacob inun Diosun jancha yuixunika dasibi Diosun mae anu dasiabu uin chai matu udenibuwen taea jatu uin jaska man mapeketidubumawen taea xeta yenx yenx iki man kaxakunkainxanaii. ²⁹Ja inun, Dios xanen ibukin mai jidabi anua nortekidia inun, surkidia inun, estekidia inun, oestekidia ikunwainbu dasibi dasia tsauxun pixankanikiki. ³⁰Jaskawen taea na jabiatian tsuabuda jabu xanen ibuisbumadan, jabu dukun xanen ibu ixankanikiki. Ja inun, na jabiatian tsuabuda xanen ibumisbuden, mawaida ana xanen ibuama ixankanikiki– jatu waya

**Jesús Jerusalén anuabuwen taea punu
nukanikiaki, na janchadan**
(Mt 23.37-39)

³¹jabatiandi fariseobun Jesús datekin mese wanun ika bexun yuikin:

–Xanen ibu Herodesin mia detekatsis ikikiaki. Nuela janida paxadiwe– akabu ³²Jesúsun jatu yuikin:

–Uian. Ijis inun meshukidi yushin betsa betsapa kainmakin isin teneaibu xuxawakin en yusinkubainaii. Jaska watan ua betsation en daya en keyuxanaidan, en jaskayukunkainaii. Kaxun ja kaman inu keska padanan yuiditankanwen– iwanan, ³³ana jatu yuikin: –Diosun jancha yuixunikabu Jerusalén anua debumisbuwen taea eadi jabiadidi en kaii. Ijis inun, meshukidi inun, meshukidi betsation en daya en menei kaiwen taea matun shinanwen janu en niti itidumaki– ikin,

³⁴–Jerusalén anu jiweabuun, Jerusalén anu jiweabuun, Diosun jancha yuixunikabu inun jawen jancha jatu bana bexunpakeaibu Diosun jatu yunubiaya danankin jatu tenankin matun xenipabun ani keska wakin mishkiwen man jatu tsaka tsaka amisbuki. Takadan jawen bake nuxamis keska wakin eandi matu medabewakin matu mekenun ika en jubianiken jaska shinanma ea danankin man ea jawa ninkamaki. ³⁵Uinkanwen. Matun mae matun mesti man mekenun Diosun matu jenexaniki, ana Jerusalén mekeamadan. Jakia janu en ana juaitian: “Yavé Diosun kushipaya juaidan”, ikin man yuidiamadan, man ana ea uinyuama ixankanaii– jatu wabaini

**Jesúsun juni betsa jawen yuda jene ichai
xaxani xuxawanikiaki, na janchadan**

14 ¹Ana juindukunti betsation fariseo xanen ibun jiwe anuxun Jesúsun jabatan piaya fariseo betsabun

uiainbun ²Jesúsun besuudi juni betsa jawen yuda jene ichai xaxaima tenei tsauawen taexun ³Moisin keneni yusinanamisbu inun fariseobu unanti wakin Jesúsun jatu yukakin:

–Jaska Diosun Moisés yusini chibankinan, ējuindukuntitian xuxawati yununimen? ēYunuama inidaka? Ea yuikanwen– ⁴jatu wabia pes jawa yuaima maniabun juni jawen yuda jene ichai xaxaima tsaua metsunxun xuxawatan nichian kaya ⁵fariseobu Jesúsun ana jatu yuikin:

–ēMatubunan, juindukuntitianbiaken min bake kasmai min ina awa unpax biti kini medan kauana uinsama jawaida kain min nexeismamen?– jatu wa ⁶jatu xabakabi chiteawen taea jawa yuiamabumaken

**Ainyanwakin jatu ixun pimatikidi
Jesúsun jatu yusinikiaki, na janchadan**

⁷janua fariseobun jiwe anuxun jatu pimakatsi jatu ia betsabu binunun ika xanen ibu dapi baxti ikatsis ikaibu uinkin Jesúsun jatu yusinkin:

⁸–Ja ainyankin nawa wai anu min jua pinun ika xanen ibu dapi baxti iyamakanwen. Jamen mia dukun xanen ibu dapi min baxti iken xanen ibu betsa mia binua juken ⁹jiwe ibuan mia yunukin: “Janu ikama uani iwe. Jau betsa janu inun ukedi xekexunwen”, akin mia mebinkiki. Mia jaska wa dakejaidai benikain jawen jenei baxti ixun min pixanaii. ¹⁰Jakia mia kayabis iwanxun jawen jenei man baxti ika dakaken jiwe ibun mia uinkin yuikin: “Baa, ja xanen ibu dapi ikiyuwe”, iwanan, mia yunukiki. Mia jaska watan mibetan piaibu mikidi jatu pe shinanmaxanikiki. ¹¹Jabiaskadi wakin tsuada ibubis kenmis Diosun dake waxanikiki. Jakia tsuada ibubis keinsma Diosun kenwanxanikiki. Ninkaidakanwen– iwanan,

¹²jiwe ibun pimabiaxu jadi Jesúsun yuikin:

–Min duapawen kupikin jau mia chipu pimadiaxanumbun pimakin min jaibuaibu inun, min betsabu inun, minabu betsabu inun, mabuya mia dapi jiweabu besti jatu iyamakubainxanwen.

¹³Jakia nuitapaibu jatu ixun pimakin jawaumabu inun yuda babunibu inun, pakebu inun, bekunbu medabewakin min jatu duawaya ¹⁴jaska waxun mia ixun jabundi mia pimatidubumawen taexun pepabu mawa ana besteaintian min pepawen Epa Diosun mia manakua min benimaxanaii– akaya

**Piti ichapa ichawashinxun yuda ichapa
jatu pimatikidi miyuiwen yusinikiaki, na
janchadan**

(Mt 22.1-10)

¹⁵jaska wai dakaxun ninkabaikin betsan Jesúsbetan pikin Jesús yuikin:

–Dios xanen ibuaitianan, chanima tsuabunda jabetan pidan, jabe benimajaidaxankanikiki– aka

¹⁶januxun Jesúsun miyuiwen yuikin:

–Juni betsan nawakin piti wakatsis ikin ichapabu yubashina ¹⁷ma janu pia kemaitian jawen tsuma yuikin: “Jatu yuibautanwen, jau ikis bedinunbunan”, iwanan, yunua yuikubaunaya

¹⁸dasibibu bepadamekin ja dukuntun yuikin: “Bai wakatsi juni betsan bai en bianxuki. En ja uinyukai en jabetan piyuamaki, ea yuixunyanutanwen”, ikaya

¹⁹ja kachu betsandi yuikin: “Jawen dayati ina awa meken dabeti en dama bixuki. Jatu unanun, ixun iyunun ika en jabetan piyuamaki, ixuki, akin ea yuixunyanutanwen”, ikaya ²⁰januxun betsandi yuikin: “En dama ainyanxuki. Jaskawen taea en yudanwanyuai ea yuixunyanutanwen”, aka ²¹ninkatani chintunkidan jawen xanen ibu jaskakanxu dasibi yuia sinatakin ana

jawen tsuma yuukin: “Nukun mae anu jiweabu bai jatiubuma inun bai ewapabuwen benabaunkin nuitapaibu inun, yuda babunibu inun, nia chakabubu inun, bekunbu jatu itanwen, jau ebetan pi benunbunan”, aka ²²kaxun jatu itankin jawen xanen ibu yuikin: “Min ea yunua en abiaxu min nawati dintu medan ichai texke idiabumaki. ¿Jaska wapa?” aka ²³“En jiwe anu jau ichai texke iki benunbun nukun mae dapi jiweabu daya jayabiabun jatu bikawakin jatu ea ixuntanwen, jau piyui benunbunan. ²⁴Chanimabu dukun en yubashinabun en piti piabumaki”, akin jawen tsuma yuiniiki. Dios xanen ibunun badiatianan, Diosun jabiaskadi waxanikiki– akin Jesúsun jatu yusinikiaki.

Jesús chibanan bikakiaki, na janchadan

(Mt 10.37-38; 5.13; Mr 9.50)

²⁵Januxun yuda ichapabun jawen jancha tapinkin chibainbu dabekekauan Jesúsun jatu yusinkin yuikin:

²⁶–Tsuada eki chiti ikatsis ikinan, jau ea dukun bechipaikin chibankubainxanunbunwen. Jamen ja dukun jawen ibubu inun, jawen ain inun, jawen bakebu inun, jawen betsabu inun, jawen puibu bechipaikin jeneama inun, jawen jiwea bechipaikin jeneamadi ea bechipaikin binumamadan, en tsuma itidumaki. ²⁷Ja inun, tsuabunda ea chibanan ibiai ewen bika tenekatsi ikamadan, en tsuma itidumaki. ²⁸Jamen betsan ea chibankatsi ikinan, man eska shinantiduki. Matun bai nemaki janu mapekea nixun uinbaanti keyatapa wakatsis ikin, ¿en pei damenkain? iwanan, jawen kadu tanakin man shinanmiski. ²⁹Jakia man jaska wama janu mapekea nixun uinbaanti min taewaima min keyutidumawen taexun juni betsan mia usankin ³⁰yuikin:

“Jaska jawen kadu shinandiamabia ja unainsmapatun ja dukun janu mapekean nixun uinbaunti taewaima jaska waxun menetidumaki”, mia watidubuki.

³¹⁻³²Jamen betsadan, jaki sinatakin nowa xanen ibu betsan 20,000 soldadobu iweai nemakatsi jawen soldadobu yunudiamna shinankin yuikin: “¿En 10,000 soldadobun jawen 20,000 soldadobu maematidumen?” ixun atidubuma unantan ja dapi bediabuma jaska wakin daewatidu jau yukatanunbun jawen tsumabu yunumiski. ³³Jaska keskadi wakin tsuabunda matun jamapai tibi ana shinanma jawada dasibi man jaya ana jawen nuiama bestibu man eki chiti ikubaintidubuki.

³⁴⁻³⁵Jamen betsadan, tewekidi matu yuinun ninkakanwen. Tewe jawen nue wa peki. Jakia jawen bata keyu ka paismaken ana jaska waxun jawen min miban min pewatidubumawen taexun putamisbuki. Bestibu man jaskatiduki. Uindaxankanwen. Man pabinkiyabunan, ninkaidakanwen– jatu waya

Chaxuwan bestichai benua jawen ibuan bechitidukidi miyuiwen yusiniaki, na janchadan
(Mt 18.10-14)

15 ¹gobierno pei bixunika ichapabu inun yuda betsabu kaka chakamisbu ichapabundi Jesúsun jancha ninkanun ika jaki xukuabu ²uinkin Moisin keneni chibanjaidamis fariseobu inun Diosun jancha kenenibu yusinanamisbun Jesúsun yuain yuinamekin yuikin:

–Ja juninan, yuda chakabun Moisin keneni chibainsbuma beya wakin jatubetan pikiki– ikaibu

³jaska yuainbu jatun shinan unantan miyuiwen Jesúsun jatu yusinkin:

⁴–Tsuada man 100 chaxuwan jayatun bestichai benua ja 99 bai anu mapuken

bestichai benua man benamiski. ⁵Chanimamen? ⁵Atimas ja benua bechitushitan benimakin iabidani ⁶min jiwe anu jikitan min jaibuabu inun mia dapi jiweabu kenakin ichawaxun jatu yuikin: “En chaxuwan benuadan, ma en bechitanaii. Jaskawen taea ebe benimajaidakanwen”, akin man jatu yuimiski. ⁷Chania jabiaskadi imisbu en matu yuiai. ⁹yuda ichapabun ea ikunwain pepakubainmisbuwen taea nai anu jabu Diosbe jiweabu benimabiamisbun jakia bestichai benua keska chakabui jiwekunkainmistun jawen chakabu jenetan jawen shinan betsa waken jawen benimai chakayamai shinan chankajaidamisbuki– iwanan,

Pei jexe bestichai benua jawen ibuan bechitikidi miyuiwen Jesúsun jatu yusiniaki, na janchadan

⁸Jesúsun ana jatu yusinkin –Ainbu 10 pei jexe kadujaida jaya bestichai pakea benanun, iwanan, bin dekuxun jawen jiwe medan unanxubida matsukin bechidama matsu jeneismaki. ⁹Janua atimas bechitan jawen jaibuabu inun ja dapi jiweabu jatu kenakin ichawaxun yuikin: “En pei jexe en benushina en bechixuwen taea ebe benimajaidadikanwen”, akin man jatu yuimiski. ¹⁰Chania jabiaskadi en matu yuiai. Yuda bestichaitun jawen chakabu atimas jenetan jawen shinan betsa watan ikunwanyan Diosun nai tsumabu benimamisbuki– iwanan,

Jawen bake maxku benua keska jawen epa anu chintukidankidi miyuiwen Jesúsun jatu yusiniaki, na janchadan

¹¹Jesúsun ana jatu yusinkubainkin yuikin:

–Juni betsaa juni bake dabeyakidi en matu yuiai ninkakanwen. ¹²Jawen bake maxkun yuikin: “Epaan, min

mawadiamabia jatiada min mawaken jawada enaxanaidan, paxkaxun menan ea inandiwe”, aka shinantan yuikin: “Peki. En mia axuntiduki”, iwanan, jawen jamapai dasibi jawen bake dabe paxkaxun jawen bake maxku jawena inanshina¹³uxa eskadabes ka chipu jawen bake maxkun pei binun, iwanan, jawen mabu jatu inankin keyubaini ja pei bishianyan chai kai mai pakea betsa anu kaxun jawen pei mekeama jawada betsa betsapawen kemukaunkin jawaida puta keyutan¹⁴jawen pei yamaken ja mai pakeanuabu buni taeaibun jawen bake maxku bunidiakin¹⁵januxun daya benabaunkin nawa xanen ibu tsuma wanun, iwanan, daya yuka jawen bai anu ina yawa mapua jau mekenun yunua¹⁶ja ina yawa pimakin jawen piti yani wapanan tsuan jawa inanma¹⁷januxun xabakabi shinan pewakin yuikin: “En epan jiwe anuxun jawen dayadubun piti piabu texe jayabiaken nenua buni en mawatiduki.¹⁸ Jaskaken nenua chintunkain jikixun yuikin: ‘Epaan, Diosun yunua ninkama ichai miadi ichakawai en chakabukaintanaii.¹⁹ Kanekin en mia xunubainima jaskawen taexun ana min bakewakin ea kenama min dayadu betsa ea wawe’, akin en yuixanaii”, iwanan,²⁰nawa jenebaini jawenabu anu chintunkaini jawen epan jiweki kemadiamabiaken chaike jawen epan bechibaini jawen nui kushikaini jaki nukutan benimajaidakin ikuxun tantsu tantsu akaya²¹jawen bake maxkun yuikin: “Epaan, Diosun yunua ninkama ichai miadi ichakawabaini en chakabu kaintanaii. Kanekin en mia xunubainima jaskawen taexun ana min bakewakin ea kenayamawe”, abia²²ninkama jawen epan jawen dayadubu yunukin yuikin: “Tadi pepa jawaida bitanxun sawemakanwen. Ja inun, meichikiti sawematan bichi

tae sawemadiakanwen”, iwanan,²³⁻²⁴“Na en bake mawaima keska ma ana bestean keskaki. Benuima nun ma jaki nukuawen taexun ina awa bake xuajaida bitanxun textexun ja naiti piti ichapadi bawakanwen, pi nun jabe benimanunbunan”, jatu wa jawen jancha ninkai jabe benimajaidai nawai taeaibun²⁵jaskaibun jawen bake iyua bai anu dayatani jui jawen jiwe dapi kemakin nawaibu ninkakubidankin²⁶jawen dayadu betsa kenaxun “Jaskai e iskaun beyusi nawai ikanimenkain?” ikaya²⁷jawen dayadun yuikin: “Min betsa maxku chintunkidani jawa isin teneama jikixuwen taea benimakin ina awa bake xua jau bawaxununbun min epan jatu yunua detetan bawaxun pi min epabe ma benimai beyusi nawakanikiki”, aka²⁸janua sinatai jiweten jikikatsi ikamaken jawen epan daewanun ika taxnixun jancha wa²⁹jakia jawen epa nemakin yuikin: “Eskai en sinatai mia yuinun ninkawe. Badi ichapa mia dayaxunkin min jancha en ninkakubainmiski, jawa kaneamadan. En jaskabiaken en jaibuaibube jaya beyusi en nawai benimanun chaxuwani bake babupa min ea detexuinsmaki.³⁰Jakia ja min bake maxkun ainbu jininipabubetan min pei puta keyutani mais jubiaken nukun ina awa bake xua min jamen bawaxunxuki. Jaska watimaki”, aka³¹daewanun, iwanan, jawen epan yuikin: “Epaan, min en bake iyuadian, min ebe jiwekunkainmiski. Dasibi en jaya minaski.³²Jaskabiaken min betsa maxku mawa keska ishian ma ana jiwea keskaki. Uatian benushina ikis nun ma bechiawen taea benimai nun beyusi nawai pejaidaii”– jatu watan

**Mabu mekexunikatun jawen
xanen ibu padanikidi miyuiwen
yusinikiaki, na janchadan**

16 ¹januxun fariseobun ninkadiaibun Jesúsun jawen tsumabu uinkin jabudi yusinkin:

–Juni betsa mabujaidaya inun bai ichapaya jabu dasibi mekexunika dayaxunmiskidi matu yuinun ninkakanwen. Jawen dayaxunikatun kanekin jawen jamapai tibi pe mekexunamaken jaki chaniabu ninkaxun² jawen tsumapan kenaxun yuikin: “Mikidi yuiaibu en ninkaidan, ¿chanimamen? En pei inun en mabu min ubisita wamiskiaki. Jaskaken jaska nuku dibiabu cuenta tibi pewaxun ea inantan ana ea dayaxunama janida kaindikaintanxanwen”, aka³ jawen mabu mekexunikatun shinankin: “En tsumapan ea nichiainan, ¿jaskaxanpa? En yuda ma en babu bai anu pukin en dayatidumaki. Ja inun, jamapai jatu ea abauni en daketapakauntidumaki, pei ea ikidan.⁴ Jaskakenan, en tsuma dibiabun jiwe anu en ka jau ea medabewakin jaibuwaxanunbun jaska wakin en jatu jaibu watidu en jatukidi shinaii”, itan⁵ jawen tsuma dibiabu tibi bestibu kenaxun ja dukun jua bichitan yukakin: “En tsumadan, ¿jati jawen jawa min dibiamen?” aka⁶ ja dibiatur yuikin: “Jawen piti xeni 100 bidón en dibiaki”, aka jawen mabu mekexunikatun jaibuwakin yuikin: “Jaki min dibia una cuenta bitani nenu tsauxun ana bera wakin jawaida na jabiatian 50 bidón besti kenediwe, min dibia xeni ana shinanmadan”, aka kainkainaya⁷ januxun ja kachu juadi yukakin: “En tsumadan, ¿Jati jawen jawa min dibiamen?” aka, “Xekiwan 1,000 saku en dibiaki”, aka: “Jaki min dibia una cuenta bixun ana bera wakin 800 besti kenediwe, min dibia xeni ana shinanmadan”, akin kainma kaya⁸ dibiabu tibi jabiaskas jatu waken jawen tsumapan jawen aka jaki chaniaibu unantan jaska nuitapatiduma jaskai jaibuyai jiwxanai unantan jawen mabu mekenika chakabubia unanepawen

taexun kenwaniki. Chanima mabuwen kemukin inananain jawen nuiama unanepatan Diosunabuman jaska wai jiwekin jabun Dios ninkaibu jatu binumisbuki.⁹ Jaskawen taexun mabuya man jaskakubainxanunbun matu yusinun ninkakanwen. Mabuwen kemua mesebiaken ja mabu man jayawen medabenankin yudabu jaibuwakin man beyawatidudan, yudabube inananain pepaxankanwen. Matun mabu keyuaya janua man ea chibankin jaska jatu axunmiswen taea Dios matuwen benimakin nai anu jiwti kayabi inankin matu manakuxanikiki.

¹⁰ Ja inun, tsuabuda mabu eskadabes jaya pe mekemisdan, mabu ichapadi jayakin ichapadi pe meketidubuki. Jamen tsuabunda mabu eskadabes pe mekeismadan, ichapadi pe meketidubumaki.¹¹ Jaskaken mai anua mabuwen kemukin man pe meketidumaken Diosun daya pepajaida matu yunuamadi ixanikiki.¹² Ja inun, yuda betsan mabu man pe mekexuntidumaken jawada Diosun matu yubani matu inanmadi ixanikiki.¹³ Ja inun, jadatuda dayadun jawen xanen ibu dabe dayaxunkin medabewatidumaki, betsa bechipaikin chibankin betsa bechipaima danankin ninkamadan. Jabiaskadi wakin pei inun Diosdi shinankin ja dabe jaska waxun man duawatidumaki– jatu waya

¹⁴ fariseobu peiwen kemukin bechipaimisbun Jesúsun yusian ninkakin kaxe wakin usainbu¹⁵ Jesúsun jatu yuikin:

–Matudan, bemakis pepakin junibu padankin man jatu kenwanmamiski. Jakia Diosun matun shinan unanmiski. Ja inun, kenkin jawada yudabun bechipaiai Diosun dananmiski– iwanan,

Diosun jawen yusian jatu yununi tsuan betsa watimakiaki, na janchadan

¹⁶ Jesúsun jatu yuikubainkin:

—Jamen Nashimanika Juan judiama matun ichati jiwe tibi anuxun Moisin yusini inun Diosun jancha yuixunikabun yusinpauni yusinkubainkin Juanki tekiwanibuki. Januxun Juanen kaka pepa Dios xanen ibuxanaikidi chaniaya ichapabun bechipaijaidai janu jikinun ika naxukunibukiaki.¹⁷ Jabiaskabiaken Diosun yusini dainbainai keska wakin tsuan betsa watidumaki. Nai inun mai yamaxanai bikama keskaki. Jakia dasibi Diosun Moisés yusian keneni jawa betsa texe wama menexanikiki, tsuan betsa watidumajaidawen taeandan.

Ainbu jenetimakidi Jesúsun jatu yusinikiaki, na janchadan
(Mt 19.1-12; Mr 10.1-12)

¹⁸ Jaskaken Diosun Moisés yusian eskaki. Tsuanda jawen ain jenetan ainbu betsa bikinan, Diosun jancha kanei chakabumisbuki. Ja inun, ainbu jawen benen jenebaina juni betsan ainwainan, ja juni betsadi jawen chakabudiaikiki, jaska Diosun Moisés yusian keneni kaneidan– iwanan,

Juni mabujaidaya inun Lázaro nuitkapanikidi Jesúsun jatu unanmanikiaki, na janchadan

¹⁹ januxun Jesúsun jawen yusinti betsawen jatu yusinkin yuikin:
—Juni betsa mabujaidaya inun bai ichapayatun xanen ibukin tadi pepas sawekein pei ichapa putaxun jawen jaibuaibus pimai jatube beyusi nawai benimakunkainiki, jawen shinan betsa wamadan.²⁰ Jamen juni betsa nuitkaai chaminitun Dios ikunwain jawen kena Lázaro jawauma juni mabujaidayatun jemaintin kene xui xexekaian jawenabun janatantanmisbu²¹ piti texe xanen ibun putai pikin yani wanun ika dakaken kaman bexun jawen chami dataxkubainmisbu²² janua Lázaro

nuitkaai mawa jawen xenipabu Abraham anu jau pepa besti jiwenun Diosun nai tsumabun jawen yushin iyuabu janua jatianda ja mabujaidayadi mawa jawenabun maiwabu²³ janu mawabu bumisbu anu juni mabujaidayaaima nuitkaai yumankin uinbaunkin chaikea Abrahamnen Lázaro duawai bechitan²⁴ sai ikin yuikin: “Epa Abrahamneen, ewen nuiwe. Chi jede anua en yumatun”, Unpax metsabidan jau en jana ea matsi wayunun Lázaro ea yunuxunwen”, aka²⁵ Abrahamnen yuikin: “Baa, eskaki shinanwen. Min jiweadan, jawa bika teneama mabujaidaya min jiwekunkainimaki. Min jaskaya Lázarodan, nuitkaai isin chakabu besti tenei jiwekunkainimaki. Jakia natian Lázaro Diosun duawakin mia kupiaiwen taea min nuitkaai.²⁶ Jaskaken miaudia ea anu jau tsua kayamanun inun ea anua mia anu jau tsua kayamanun na kini keyatapajaida waxun Diosun nemaniki”, aka²⁷⁻²⁸ mabujaidayaimatun yuikin: “Jaskakenan Epaan, en mia yukaii. En meken bestiti betsayaki. Nenu en yumatun anu jau jabudi beyamaxanunbun en epabe jiweabu jau jatuki chanitanun Lázaro ea yunuxunwen”, aka²⁹ Abrahamnen ana yuikin: “Moisin yusian inun Diosun jancha yuixunikabun yusian keneni minabu jayawen taexun jatun yusian jau tapinunbunwen”, aka³⁰ mabujaidayaimatun yuikin: “Epa Abrahamneen, chanimaki. Enabu Diosun jancha jayabia tapinsbumaki. Jakia juni mawa ana bestenkain jatuki chania jatun shinan betsa watidubuki”, aka³¹ ana nemakin Abrahamnen yuikin: “Moisin yusian chanima inun Diosun jancha yuixunikabun jatu yusini jawa ninkaisbumawen taexun juni mawa ana bestenkain kaxun minabu jatu yusinbia jawa ninkamadi itidubuki”, akin Abrahamnen nemaimaki– iwanan,

**Yuda betsan jawada jatu chakabuwamai
meseikiaki, na janchadan**
(Mt 18.6-7, 21-22; Mr 9.42)

17 ¹⁻²Januxun Jesúsun jaki chiti ikabu besti yusinkin yuikin:
—Tsuanda jaska shinanmabiaken yuda betsan jawada chakabu memakin mia beya wamanun, iwanan, jaska Diosun yunumis inun nemamis matu amakin chakabuwamisbuki. Jakia tsuabunda enabu juinti babubu padankin jatu chakabuwamamis jabudi Diosun jatu kupia nuitkaajaidaxanaiwen taea jawen xekiwan deneti mishki ewapa nexaxun teumatan ianenwan medan pukua jasadon, jawen kupiti bexmas mekeanaii.

³Jaskaken chakabuwakin man kanekatsi ikamadan, uindakanwen. Jamen ea ikunwain betsan kanekin mia chakabuwa dakeama kaxun xabakabi chitekin dakewawe. Min jancha pewen jawen chakabu min jakimawa jawen shinan betsaya jawen chakabu ana shinanyamawe.
⁴Jabias xabatian tsuanda 7ki mia chakabuwaxu jabiati kidi mia yuikin: “En ana kanexuki. Ana en jaskayamaxanun en chakabu ana shinanyamawe, nun ana sinatadabeyamanunan”, mia waya jabiati diki jawen chakabu ana jabetan shinantimaki– jatu wa

**Jawen tsumabun ana ikunjaidawati
kushipa ea anibukiaki, na janchadan**

⁵jawen tsuma kushipayabun Jesús ea akin yuikin:

—Nun mia ikunwanbiaya ana ikunjaidawati kushipa nuku inanwen-akabu

⁶januxun Jesúsun jatu yuikin:
—Man ea ikunwainan, mostaza jexe pxeishta keska man jayaki. Jaska keska jayabun na ji yunukin: “Nenua min tacha betsekekain unu ian nemaki ni maewe”, man aka matu ninkatan itiduki– iwanan,

**Jatun xanen ibuan yunua axunkin
duawai kentimakidi Jesúsun
yusinikiaki, na janchadan**

⁷ana jatu yusinkin:

—Tsuada man dayaduya matun bai udutani kasmai matun chaxuhan inun ina awa matu mekexunbai jukidan jiwtan jikiai man yuikin: “Tsauxun pidiyuwe”, akin ɿman yuimismen?
⁸Man jaska waismaki. Yuikin: “Badi kaya nun pinun bawa taewawe, ea dukun en piaya chipu min tadi betsawetan miandi min piaidan”, akin matun dayadu man pe yunumiski.

⁹Jaska yunua jawen tsumapan ninkakin pe akubainaiwen taexun jawen xanen ibun jawen tsuma: “Peki”, aismaki.

¹⁰Matudan man jabiaskadi keskaki. Jaskaken jawada Diosun matu yunua atan ibubis keanma yuikin: “En xanen ibun ea yunuas besti en akubainaii. En jawen tsuma bestiki”, ikin jawada matu yunua ja besti shinankin axunkin ja dukun menexunkubainkanwen, jawa chikishamadan– jatu wanikiaki.

**Meken dabeti junibu bichiki
chamini buisbuma Jesúsun
xuxawanikiaki, na janchadan**

¹¹Janua betsatian Jesús Jerusalénkidi kakunkaini Samaria mai pakea inun Galilea mai pakea ja dabe namakis anu kai ¹²mae betsya anu jikiaya 10 junibu yudaki chaminibun Jesús bechitan benanta mapuxun ¹³jancha kushipawen yuikin:

—Jesús yusinaan, nukuwen nuiwe-akabu

¹⁴Jesús jatuwen nuikin uinkin jatu yunukin:

—Jerusalén anu buxun Diosbe nukunabu janchaxunikabu matun yuda uinmaditankanwen– jatu wa jawen jancha ikunwanbaini dabekebaini

bukin jatun yudaki chamini ma xuxa ana chami jayama uiainbun¹⁵ jabu bestichaitun jawen yudaki chamini ma xuxa uintan dabekekidan jui kushipawen Dios kenwain¹⁶ Jesúsunabuma Samarianawabia Jesúsun besuudi danti iki beti ixun kenwanyan

¹⁷Jesúsun yuikin:

–10 juni chaminibu en xuxawaxuki. ¿Chanimamen? ¿Janimen, ja 9 juni Israelbudan?– ikin¹⁸–Na nawan besti Dios kenwain chintunkidanxuki. Jawen tapinkanwen– iwanan, ¹⁹nawa danti ika yuikin: –Benitan inun kadiwe. Min ea ikunwainwen taea min xuxaxuki– anikiaki.

Jaskai Dios xanen ibui ana juxanaikidi yusinikiaki, na janchadan
(Mt 24.23-28, 36-41; Mr 13.15-16)

²⁰Januxun fariseobun Dios xanen ibui ana juxanaikidi yukabu Jesúsun jatu yuikin:

–Dios xanen ibuaidan, ikis beduwen man uintidumaki.²¹Ja inun, tsuanda yuikin: “Uinwen. Dios xanen ibui naki”, ikasmai: “Uinwen. Unuki”, ikin yuimaa ixankanikiki. Chanima en matu yuiaii. Dios xanen ibuidan, ikis matube dasia niaki, taeidan– jatu watan

²²januxun jawen tsumabu beiskin yuikin:

–Eadan, matun Juchi Kayabi Iyua ea uinbianixun ana ea uinkatsis ibiakin man yane ana ea uianma ixankanaii.²³Man jaskaya matu padankin yuikin: “Nenu ma juaki, Cristodan”, ikasmai, “Unu ma juaki”, ikaibu ninkabiatan jadi jatu chibanyamaxankanwen.

²⁴Jakia en matun Juchi Kayabi Iyua en ana eskakidanxanai matu yuinun ninkakanwen. Jawaida uke bukun kana bedi iki bakamis keskatan en ana juai dasibibun ea uinxankanikiki.²⁵En jaskadiama ja dukun na jabiatian

ea danankin yudabun bikajaida ea tenemakin ea nuitapawayuxankanikiki.

²⁶Jaska inun, Noé jiweken chakabui jiwekubainibu keskadiaibun matun Juchi Kayabi Iyua en ana chintunkidanxanaii.

²⁷Eskanibuki. Jawen nunutiwen Noé jikidiamaken yudabun pikin mabex aki ainyankin jatun bakebu beneyawakin Dioskidi jawa shinanma jiwekubainaibu Diosun yunua Noén chibain jawenabubes jawen nunuti menetan jikiaya jenen jatu achiaya Diosun yunua ninkaisbuma jatumebi debui jasai keyunibuki.

²⁸–Jaska inun, jabiaskadiai Lot jatube jiwediaken chakabuwakubainmisbu

Diosun jatu kupikin yamawani ana matu shinanmanun ninkakanwen. Jabun pikin mabex akin mabu bikin mabu inananankin bai waxun banakin jiwe wakubaini Dioski jawa dateama jiwekubainaibus²⁹Lot juni pepa jawen mae Sodoma anua Diosun paxa watan nai anua chi inun azufre ui keskai nidi ikin Sodomanawabu jatu yamawaniki.³⁰Jabiaskadiai matun Juchi Kayabi Iyua en juai yudan kaianen ea shinankin manabumaken en jatu jabiaskadi wakin kupixanaii.

³¹–En jatu jaska waxanaitian na mai bawa jiwe sapa xeni manaundi maniabudan, butuxun jawen jamapai bikatsis ibiakin jau jawen jiwe anu jikiama jau jawaida paxaxanunbunwen. Ja inun, ikunwain ja bai anu dayaibudan, meshu medan jatun bemakia tadi kextupa bikatsis ibiai jau ana chintunkidanama jau jabiadiadi paxadiaxanunbunwen.³²Jamen betsadan, eskaniki. Shinankanwen. Lotin ain Sodoma anua jabe paxabiai jawen mabuwen nui jaskaimenkain uinun ika nasaukeai Diosun jabiadi damiwakin tewe wanidan, man jaskadiatiduki. Uindaxankanwen.³³Jaskaken tsuabunda jawen jiwea yaushikin benuxankanikiki.

Jakia tsuabuda ewen taea mawanun ika jawen jiweawen nuiama mawabudan, jawen jiwea benuama jiwekuinxankanikiki, niti ikamadan.

³⁴⁻³⁶Ja inun, betsadan, meshu medan jabias dakatiki dabe uxabu betsan ea chibamis iyukin betsan ea chibainsma Diosun nai tsuman jenebainxanikiki. Ja inun, ainbu dabetan deneaibu betsan ea chibamis iyukin betsan ea chibainsma jenediabainxanikiki- jatu wa

³⁷jaska yuiai jawen tsumabun ninkatan yukakin:

-Xanen Ibuun, dasibi min nuku yuiaidan, ³⁸jania jaskaxanimenkain?- akabu junea janchawen ana jatu yuikin:
-Janu yuda mawa daka pisi mayai xeten xetebidan janu ichai nuyabaunmis keskai ixankanikiki- iwanan,

Punu nukama Dios yukatikidi miyuiwen yusinikiaki, na janchadan

18 ¹januxun jawen tsumabun Dios kushipa yukai jau punu nukayamaxanun bun miyuiwen Jesúsun jatu yusinkin ²yuikin:

-Mae betsa anu juez jiwexun Dioski meseama juni betsan jancha ninkaismadi ³jabias mae anua yuxabu jawen bene ma mawayama jau ea medabewanun ika juez anu kaxun yuikin: "Juni betsan ea ichakawakin padainkiki. Medabewakin ea pewaxunwen", abidan abidankin chikish waya ⁴ja dukun jawen jancha ninkama ikunkainkin januxun atimas shinankin: "Yudabuwen nuiama Dioski en meseamabia ⁵natun ea daketapa wabidan wabidanaiwen taexun en nemaxuni kaiii. En jaska waxunamaken jukidan jukidankin ea punu nukawatiduki", ixun medabewaniki-iwanan,

⁶ana Jesúsun jatu yuikin:

-Ja juez chakabun jaska wamisbun ⁷⁻⁸jamien Diosun nuku medabewakin

jabun matu chakabuwakatsi ikaibu nemaidan, jawen shinan betsajaidaki. Jawen katuabu Diosun matu medabewakin badidi inun meshu medan man ea atan manaibu ninkatan manama jawaida jatu nemakin matu pewaxunmiski. Jaskawen taea ea matun Juchi Kayabi Iyua en ana juaitian jabun ea ikunwankin jenekubainabuma ⁹en jatu bechitushixanmenkain?– iwanan,

Fariseo inun pei bixunikakidi Jesúsun miyuiwen jatu yusinikiaki, na janchadan

⁹janua ichapa mapuxun ninkaibukidi jabu jatidi ibubis kenkin shinain bepadamei: "Ea besti en pepaki. Jakia betsabudan, jaskaisbumaki", ikin jatu dananmisbu Jesúsun ana miyui betsawen jatu yusinkin jatu dabinwankin yuikin:

¹⁰-Templo jemaintin anu juni dabe Diosbe janchai bua mapuabukidi matu yuinun ninkakanwen. Ja juni dabedan, betsa Moisin yusian inun jawen xenipabu betsabun yusian chibanjaidamis fariseoki. Ja inun, betsadan, Romanawa xanen ibu pei bixunikaki. ¹¹Jaskakain fariseo nia naiudi besuxun Dios dayuikin: "Diosuun, yuda betsabu keskama en pewen taexun en mia kenwaiin. Yumetsumisbu inun, padanananmisbu inun, chutanamebaunmisbu inun, ja pei bixunika chakabu en jatu keskamaki. ¹²Ja inun, semana tibi xaba dabe mia kenwain en samakemiski. Ja inun, jamapai dayakin bixun meken dabeti paxkatan bestichai min kenwanti jiwe mekenikabu en inankuinmiski", iki ibubis keanyan ¹³janua ja Romanawa xanen ibu pei bixunika jawa keanma benanta nidiroxun jawa naiudi besuama dakei aitin iki xutidin xutidin ikin yuikin: "Diosuun, min jancha en kanemisbiaken ewen nuikin en chakabu

ea buaxunwen”, ¹⁴abaini inun kaya Dios jawen nuikin jawen chakabu buaxunkin pewaxunimaki. Jakia fariseon jancha ninkama Diosun jawa buaxunama ikimaki. Jaskaken tsuabuda ibubis kenmis Diosun dake waxanikiki. Jakia tsuabuda keinsma Diosun duawaxanikiki– jatu wa

**Bake mishtinbu unanuma wakin Jesúsun
Dios jatu yukaxuniaki, na janchadan**

(Mt 19.13-15; Mr 10.13-16)

¹⁵janua jatun bake mishtinbu Jesús anu iwekin jau ea mamepikin uinxunkin Dios ea duawamaxunun, iwanan, jabun jatun bake iwebidanbidanaibu Jesúski chiti ikabun uinkin jatu nemaibun ¹⁶nantaxun jatu jaska waibu Jesúsun jatu kenaxun yuikin:

–Jatun bake mishtinbu ea anu iweaibu jatu nemayamakanwen. Dios xanen ibuaitianan, na bake mishtinbu eki dateabuma keskabu besti Dioski dasixankanikiki. ¹⁷Chانيا en matu yuaii. Bake mishtinbun jawen ibu bechipaimis keska wakin Epa Dios bechipaiabuma Dios xanen ibuaitian jaki dasiama ixankanikiki– jatu wa

**Juni xanen ibu mabu ichapaya Jesúsbe
janchanikiaki, na janchadan**

(Mt 19.16-30; Mr 10.17-31)

¹⁸januxun xanen ibu betsan Jesús yukakin yuikin:

–Yusinan pepaan, ɿmia yukapa? Jiwea kayabi bikinan, ɿjaska kayatan en bitidumen? Ea yuiwe– aka

¹⁹Jesúsun yuikin:

–ɿJaskakin ea kenakin: “Pepaan”, min ea wai? Dios bestiki, pepadan, ɿmin unanmamen? ²⁰Mianan, Diosun yunuti inun jawen nemati min ma unaianin: “Ainbu min ainma chutatimaki. Sinatakin yuda betsawen tenantimaki. Yumetsutimaki. Yuda betsaki chanichakatimaki.

Padananantimaki. Ja inun, min epa inun min ewa jatu duawakubaintiki”– aka

²¹jaska wa ana xanen Ibun Jesús yuikin:

–Jaa. Dasibi Diosun yunuti inun jawen nemati bakeishtatun tapinixun jeneama en chibankubainmiski– aka

²²ninkatan Jesúsun uin jawen nuikin ana yuikin:

–Min pe ea yuiaii. Na besti min shinandiamaki. Mia yuinun ninkawe. Nai anua Diosun manakuti pepa bikatsis ikin min jawada dasibi min jaya jatu inan keyutan ja pei min bishian ja nuitapaibu inankuintan chintuanma ebe kakin ea chibankubainxanwen. Min jaskakunkainaiwen taexun jiwekuian min bixanaii– aka

²³jakia juni mabujaidayatun Jesúsun jaska yuiai ninkai pes juinti nishmai keyutan ana jawa yuama jawen mabuwen nuiaya ²⁴⁻²⁵Jesúsun uinkin ana yuikin:

–Ja yuinaka ewapa camellodan, ja xumux jawen chixuiki jawen yuda kainmakinan, tsuan atidumaki. Jakia jaska keska bikadan, juni mabu ichapayadan, jawen mabu besti shinain jawen nuikin jatun shinan betsa wama Dioski chiti itidubumaki– jatu wa

²⁶januxun jabun Jesúsun jancha ninkatan yukakin:

–Jaskakenan, ɿtsua Diosun nuku mekekin paxawakin jiwematidumen?– ikaibun

²⁷Jesús jatuwen nuikin yuikin:

–Dateyamakanwen. Yudabun jaska watidubumajaidabiaken Diosun besti matun shinan matu betsa wamatian dasibi matuwen nuikin matu axuntiduki– jatu waya

²⁸Pedron yuikin:

–Xanen ibuun, nukunan, mia chibankatsi ikinan, nukun jawada nun jaya dasibi bashikin keyubidanimaxun nun ma mia chibankapeakeaii– akaya

²⁹Jesúsun ana jatu shinanmakin yuikin:
–Chanima en matu yuiai ninkakanwen. Tsuabunda ea chibankin Diosun jancha kakape yusintanun, ixun matun jiwe xununkin matun ibubu xununkin matun betsabu bashibainkin matun ain xununyubainkin matun bakebu bashikin keyuyubainxanaibu ³⁰na jabatiandi dayaibu Diosun pepawen matu duawakin manakukubainshinxun jabiaskadi wakin nai anudi matu jabe jiwekuinmaxanikiki, ikibi imakanin– jatu wabaini

Mawaxanaikidi dabe inun bestiki Jesús jatuki chanikiaki, na janchadan
(Mt 20.17-19; Mr 10.32-34)

³¹januxun jawen 12 tsumabu besti jatu kenaxun Jesúsun jatu tadi iyuxun yuikin:
–Jerusalén anu nun ma mapekei kaidan, man unaiin. Nun janua jaskaxanaikidi matu yuinun ninkakanwen. Diosun jancha yuixunikabun ea matun Juchi Kayabi Iyuakidi ekidi kenenibu menekin ea axankanikiki. ³²Januxun eki sinatakin ea achixun nawabu anu ea iyuxun inanbu jabun ea chitekin ichakawakin eki kaxekin eki kemu michukin ³³ea kusha kusha axun ea tenanbu xaba dabe inun besti kaya en ana bestenxanaii– jatu wabia ³⁴jawen 12 tsumabun jawen jancha ninkabiakin jawa jatu yuiai dabanan jawa xabakabi ninka pewatiduma ibainaibun

Jericó bai kexakea juni bekun Jesúsun bepxenxiaki, na janchadan
(Mt 20.29-34; Mr 10.46-52)

³⁵janua Jerusalénkidi kai maewan betsa Jericó anu kemaya bai kexa juni bekun tsauxun pei jatu ea akin ninkaya ³⁶yuda ichapabun dainbainaibu ninkatan yuka ikaya ³⁷betsabun yuikin:

–Jesús Nazaret anua kauani ikikiki– akabu ³⁸jancha kushipawen yuikin:
–Davidin babaan, ewen nuiwe– akaya ³⁹bebubainkin nemapaibiabu ninkama unanxubima jatu binumakin yuikin:
–Davidin baba Jesúsun, ewen nuiwe– ikaya
⁴⁰Jesús niti itan junibu jatu yunukin:
–Iwekanwen– jatu wa iweabu chaimaxun yukakin:
⁴¹–¿Mia jaska wapa?– aka juni bekunman yuikin:
–Xanen Ibuun, ana en uinun ea bepxewe ika en ikaii– aka ⁴²xuxawakin Jesúsun yuikin:
–Ana uindiwe, min ea ikunwainwen taea min xuxaidan– akaya ⁴³jawaida bepxetan Dios kenwakin Jesús chibanbainaya ichapabundi Jesúsun jaska wai uintan dasibibun Dios kenwan bainaibun

Jesús Zaqueoki nukunikiaki, na janchadan

19 ¹janua Jericó baiwen Jesús jikikaini mae kapukekainaya ²jabianudi juni betsa mabujaidayatun Roma pei bixunikabu jatun xanen ibu jawen kena Zaqueon ³Jesús uinkatsis ibiaya juni ichapabube Jesús kaya Zaqueo juni chanpaishtatun jaska waxun uintima ⁴Jesús uinun ika bebui kushikain jiwen ina tsauken ⁵Jesús jukin manaundi uinkin Zaqueo bechitan yuikin:

–Zaqueoon, min jiwe anu en uxai kakatsis ikaii. Menan butudiwe– aka ⁶janua jawaida butukidan benimakin jawen jiwe anu Jesús inun jawen tsumabu itan iyuaya ⁷jaska wabainai dasibibun uintan Jesús yuankin: “Juni chakabu anu uxai kaxuki”, ikaibun ⁸januxun Jesúsun jancha ninkakin jawen shinan betsaa watan Zaqueo benitan Jesús yuikin:

–Xanen Ibuun, en jatu jaska waxanai ninkawe. En mabu inun en pei

tanatan dabukun ja nuitkaabu en jatu inanbauntidu en shinaiin. Ja inun, tsuabuda jatu padanxun jatun jamapai en bianmis dabe inun dabeki en ana jawendi en jatu inanxanaii– akaya

⁹⁻¹⁰Jesúsun yuikin:

–Eadan, matun Juchi Kayabi Iyuautun juni chakabu benua keska benabaunkin medabewanun ika en juniki. Na jabiatian na jiwe anu matun mekenan ma matu anu jikixuki. Jaskawen taea min shinan betsa waya Diosun minabube mia mekekubainxanikiki. Jaska Abrahamnen ikunwanpauni keskakin ikunwain min ma Abrahamnen baba kayabiki– akaya

**Pei jexekidi miyuiwen Jesúsun
jatu yusinkiaiki, na janchadan**

¹¹yuda ichapabun Jesúsun yusia in ninkakubainkin shinankin: “Jerusalén anu kematan nawabu nichintan Dios samama xanen ibujaidai kaimenkain”, iwanan, yuaibuwen taexun ¹²jabun shinan Jesúsun unantan jatu pewanun, ixun miyuiwen jatu yusinkin:

–Xanen ibu bexmasbiaken jau mae ichapa xanen ibujaidaxanun, iwanan, xanen ibu kushipa binuatun kena ka ja xanen ibu bexmas katanima matu yuinun ninkakanwen. ¹³Chai mae betsa anu kadiama jawen 10 dayaxunikabu kenaxun pei jexe ichapajaida ja tibi jatu inan akeaketan jatu yunubainkin: “En judiama na en peiwenan, jamapai tibi bitan jawen inananankin ana binumaxankanwen”, jatu watan chai kaimaken ¹⁴januxun jawen maewan anuxun jawenabun ja xanen ibu bexmas danankin bechipaiabumawen taexun jawenabu betsabu yunukin yuikin: “Xanen ibujaida binuatun jiwe anu kaxun ja juni jau nukun xanen ibu iyamaxanun yuitankanwen”, jatu wa buimaxun jaki nukutan yuiabu

¹⁵jabun danankin jaska jakidi yuibiaibun ja xanen ibujaida binuatun

ja juni jawenabun bechipaiabumabiaken jau jabun xanen ibu inun jatu katuxunshinken chintunkidan jikixun ja jawen 10 dayanikabu kenaxun ja pei jatu inanbainimakidi jatu yukakin: “¹⁶Jati man ana ea ichawaxunshinamen?”, iwanan, bestibu tibi jatubetan pewanun, iwanan, jatu kena ¹⁶ja dukun juxun yuikin: “Xanen ibuun, min pei jexe ichapa inananankin ana midimajaida 10tiki binumakin en mia ichawaxunshinaki”, aka ¹⁷jawen xanen ibun yuikin: “Pejaidaki. Min en dayanika pepaki. Eskadabes min pemekeshinawen taea mia manakukin 10 mae jati mekei ea xanen ibuxunyuwe”, akaya ¹⁸ja kachu jawen dayaxunika betsa juxun yuikin: “Xanen ibuun, min pei jexe ichapa inananankin ana 5tiki binumakin ichapa en mia ichawaxunshinaki”, aka ¹⁹jadi yuikin: “Jaskakenan, miandi 5 mae jati mekei ea xanen ibuxunyuwe”, adiaya

²⁰janua jawen dayanika betsadi danas inanbainima juxun yuikin: “Xanen ibuun, naki, min peidan. Benukatsi ikama dakutan en mia aduxunimaki. ²¹Min juni meseken miwen datekin min pei benukatsi ikama tadi tuaxwen yabutan en mia aduxunimaki. Dayakin jawa miban banamabia min ichawamiski. Janua jexe sa akamabia min ichawadiamiski”, akaya ²²januxun xanen ibun yuikin: “Min en dayadu chakabu chikish chakamaki. Chanima dayakin jawa miban banaumabia en ichawamiski. Ja inun, jexe sa akamabia en ichawadiamiski. Ja unantan ²³čjaskakin banco anu cuenta watan inananankin en pei min ea aduxunama ikimamen, janua ibubis juxun en pei xekei ana jaki ichashina en biyuxanunan?” atan ²⁴jawen dayadu betsabu mapuabu jatu yuikin: “Ja chikishin pei mebintan ja 10tiki binumashina ana ichawamakanwen”, iwanan, ²⁵jabun

jatun xanen ibu yuikin: “Ma 10 binujaida jayaki. ¿Jaskakin min ana pei inain?” aka ²⁶xanen ibun jatu yuikin: “Tsuada na en dayadu pepa keskatun jawada jaya pe mekeaa unantan ichapa jayabiaken manakukin ana ichapajaida en inanxanaii, binumakinan. Jakia tsuada na en dayadu chikish keskatun jawada jaya pe mekeama ja eskadabes jaya unantan en mebinxanaii.” ²⁷Ja inun, jabu eki sinatakin jau jatun xanen ibu en iyamaxanun, jabun ea bechipaama danainmabudan, itanxun en besuubi jatu tenankanwen”, jatu akimakiaki- Jesúsun jatu wabaini

Jerusalén anu Jesús jikiniaki, na janchadan

(Mt 21.1-11; Mr 11.1-11; Jn 12.12-19)

²⁸januxun jatu jaska yusinbaini kaya yuda ichapabun Jesús chibankainaibun Jesús Jerusalénkidi ana kai ²⁹Betfagé inun Betania ja mae dabe anu kemai Olivos Mati tetanbainkin jawen tsuma dabe yunukin ³⁰yuikin:

-Ja mae besuudi kayanbis buxun burro nexea tsua jaki katsaumedia ma bechitan tepeyan beyutankanwen. ³¹Ja inun, tsuanda matu yukakin yuikin: “¿Jawakatsi man tepeai?” matu wa yuikin: “Nukun xanen ibun biyukatsis ikikiki”, atankanwen- jatu wa

³²ja dabe buxun burro nexea bai namaki nia bechitan tepeai

³³jabianudi burro ibubu manixun jatu yukakin:

-¿Jaskakin man burro tepeai?- jatu wa ³⁴jabun yuikin:

-Nukun Xanen Ibun biyukatsis ikikiki- akabu -Peki. Buxunditankanwen- jatu wa ³⁵tepetan januxun jatun bemakia tadi burro kamaki kabekanbain Jesús anu butan Jesús jaki tsauanbu ³⁶katsaumekainaya jatun bemakia tadi bai namaki nabekanbainaibun ³⁷Olivos

Mati butebidani jaki chiti ika ichapabun Jesús chibankin Jesúsun atimaska betsa betsapa wai uinkubidan Shinabuwen taea benimakin jui kushipawen Dios kenwain nawakin ³⁸yuibainkin:

-Aichu! Aichu! Ja Xanen Ibu Diosun kena kushipaya juaidan, benimakin kenwanankanwen. Naiudia unanuma jiwea inun kushipa binu keyua unankin jau kenwanunbunwen- ikubainaibun

³⁹jabianudi fariseobu jatube bui sinataibun betsan Jesús jatu yuixunkin:

-Yusinaan, miki chiti ikabu jaskaibudan, jatu nemawe- aka

⁴⁰Jesús jatu yuikin:

-Chanima eki chiti ikabu neseaibun na mishkipan ea kenwain sai itidubuki- jatu wabaini ⁴¹Jerusalénki kemakin uinkubaini ja maewan Jerusalén anu jiweabuwen nui kaxakin ⁴²yuikin:

-Jawen Dios daewati man ea unanyan matu kupiama ikeanxankanikiki. Jakia natian ikunwanbumawen taexun junea keskaken shinankin man ana uintidubumaki. Man peidawa!

⁴³⁻⁴⁴Jaskaken Dios matu anu bai juai man jawa ikunwanmawen taea matuki sinatamisbun matu ichakawakin matu nuitapawakin matun mae dapi mai kene keyatapa wabaunkin matu keben keyutan man ana kaintiduma watan matuki sinataibun matun maewan mishki kene nidi akin keyukin matu inun matun bakebu detekin matun mae yamawaxankanikiki, jawa texe wamadan- ikunkaini Jerusalén anu jikitan

Templo jemaintin anua inananamisbu

Jesúsun nichiniaki, na janchadan

(Mt 21.12-17; Mr 11.15-19; Jn 2.13-22)

⁴⁵janua janu Dios kenwanti Templo jemaintin kenekauna anu jikikainkin januxun jawen Dios daewati ina janubia inananainbu jatu nichinkin ⁴⁶yuikin:

—Jawen Templokidi jawen jancha yuixunika Isaías kenemani matu yuinun ninkakanwen: “En jiwedan, janua ebe janchakin ea kenwanxankanikiki”, Dios ibianiken na jiwe xabatududan, janua matu padananankin yumetsun jiwe man wamisbuki— iaketankin jatu nichin keyutan

⁴⁷januxun xaba tibi Templo jemaintin anuxun Jesúsun jatu yusinkubainaya Diosbe nukunabu janchaxunikabu xanen ibubu inun, Diosun jancha kenenibu yusinanamisbu inun, judiobu xanen ibu betsa betsapabun Jesús jaska datanai detenun ika yuinamebiakubainaibun ⁴⁸yuda ichapabun Jesúsun yusiaiñ bechipaikin ninkajaidaibuwen taexun jaska waxun tenantima bika tenenibuk iaki.

¿Tsuán mia kushipa inainma min aki ikai?
akin Jesús yukanibukiaki, na janchadan
(Mt 21.23-27; Mr 11.27-33)

20 ¹Januxun xaba betsatián Templo jemaintin anuxun Jesúsun yuda ichapabu kakape yuikin jatu yusianyan Diosbe jawenabu janchaxunika xanen ibubu inun, Diosun jancha kenenibu yusinanamisbu inun mae xanen ibu bexmasbun Jesús nemanun ika jaki kemaxun ²jabun yukakin:

—Na min eska waidan, ¿tsuan jawen kushipa mia yunuimawen min aki ikai?
¿Tsuán jawen kushipa mia inainmamen, min jaska wanunan?— akabu

³Jesúsun jatu kemakin:

—Entsedi en matu yukai ea yuikanwen-itan ⁴—Nashimanika Juanen jau jatu nashimanun yunukinan, ¿tsuan kaya yunuyama man shinain, Diosdaka, junibudaka? Ea dukun yuikanwen— jatu wa

⁵janua jabudi june yuinamekin:

—“Diosun yunuyamaki”, nun wadan, “¿Jaskakin Juanen jancha

man ikunwanma ikimamen?” iwanan, nuku kunyan atiduki. ⁶Jamen yuda midimabun Diosun Juan yunuyamakidi jabun ikunwainbuwen taea jabuki datekin yuikin: “Junibun yunuyamaki”, nun ikaya mishkiwen nuku tsaka tsaka akin nuku tenantidubuki— itan ⁷januxun jabun Jesús unikin:

—Tsuanda Juan yunuyama nun unanmaki— akabu ⁸Jesúsun jatu yuidiakin

—Jaskakenan, tsuanda jawen kushipawen ea yunuimadan, eandi en matu yuiamaki— jatu watan,

Dayakapabu mekenan besumakidi Jesúsun jatu yusinikiaki, na janchadan
(Mt 21.33-44; Mr 12.1-11)

⁹januxun yuda ichapabun Jesús ninkanun ika beabu miyuiwen Jesúsun ana jatu yusinkin:

—Juni betsan bai waxun uva bimi batapa banatan jau bimi dabukun ea inanxanunbun, iwanan, juni betsa dayakapabube jabube yubakatan ibu keska wakin inanyubaini chai kaimaken ¹⁰janu ma kani tsekatitian ikaya bai ibuan jawena dabukun jau yukatan ea bixuntanun, iwanan, jawen tsuma betsa yunua ka jabun jawena inankatsi ikama uva bimi mekeabun achixun kusha kusha axun jawa inanma mais nichianbu kaya ¹¹januxun bai ibuan ana jawen tsuma betsa yunudia ka jadi inanxunkatsi ikamadi jabun kunyan akin kusha kusha adiatan jawa inanma mais nichindiabu kaken ¹²janua bai ibuan jawen tsuma betsa yunua ka jabiaskadi wakin deda deda atan kene pechiudi putabu isin tenei kaken ¹³atimas bai ibuan shinankin: “¿Jawa jaska waxanpa?”, itan “Jaskakenan en juni bake en bechipajaidai en yunua ka jaki mesekin en bimi dabukun ea inanxankanimenkain”, iwanan,

shinantan nichian kai¹⁴ jawen bake jatuki kemai kai bechitan yuinamei: “Bai ibu mawashinken na jawen baken jawen bai tibi inun jawen jiwe tibi dasibi jawenawayuikiki. Na bai nukunas nun wanun tenanankanwen”, ixun¹⁵ achibain bai nekixun tenanbun Ɂjaska washinabun ja bai ibuan jaskada jatu waxanimenkain? Matu yuinun ninkakanwen.¹⁶ Bai ibu kaxun jatu kupidiakin dayakapabu jatu tenan keyutan januxun dayakapa betsabu jawen bai jatu yunuxanikiki– jatu wai ninkai e itan yuikin:

–Jau jatu jaska wayamaxanunwenikaibu¹⁷ Jesúsun jatu beiskin yuikin:

–Ja Diosun jancha Isaíasin
kenenidan, Ɂjaskada jakidi man shinamismen?, eska yuiniidan:
‘Jiwe wanikabun mishki
danambiaibun jabias mishki
Diosun bixun
dexun makedex wakin jawen kene
mestenwan keska wakin
nuku duawakin nuku axunxanikiki’,

anidan.¹⁸ Eskaki, ninkakanwen. Tsuada ja mishkiki sinatakin ea maemanun ika mishki mamaki kauana teke teke ika itiduki. Jakia ja mishki jadatukida kauani jaki tin ikin chushakin mishpu waxanikiki– jatu waya

¹⁹januxun Diosbe jawenabu janchaxuniaka xanen ibubu inun Diosun jancha kenenibu yusinanamanisbun Jesúsun dayakapabu chakabubukidi miyuiwen jatukidi janchai jabun ninkakin unantant jaskaitian Jesúsun achikatsis ibiai yudan kaianki datekin jawa meama mapuxun uinkin

**Gobierno pei bixunmisbukidi Jesúsun
yukanibukiaki, na janchadan**
(Mt 22.15-22; Mr 12.13-17)

²⁰jaskawen unanti watan chitetan romano xanen ibu Pilato anu ja amakatsi

Jesús padanun ixun juni betsabu Jesúsun unandiamma judiobun jatu yunukin jau juni pepa itsakin jabun unanti watan Jesúsun yukakin yuimakatsi nawa xanen ibu jau achimaxanun yunuabu²¹ Jesúsun anu buxun padanpaikin yuikin:

–Yusinaan, junibun jatu kenwanmamisbu keskama chanima jancha besti yusinkin jaska wakin Dios chibantidubu besti min xabakabi jatu yusinkubainmis nun unaiin.²² Jaskawen taexunan, Ɂjaskada min shinainmenkain mia yukapa? Ja romano xanen ibu Césarn nuku pei yukamisdan, Ɂjaska wananaxpana? ɁPakananaxpana? ɁPakatimadaka?– aki

²³jaki bepadamebainabu Jesúsun unankin jatu yuikin:

–ɁJaskakin man ea padankatsis ikanai?²⁴ Jawen gobierno impuesto pakati pei jexe betsa ea uinmakanwen– jatu wa bexuanbu uinkin Jesúsun jatu yukakin: –Nadan, Ɂtsuan besu inun tsuan kena neamen? Ea yuikanwen– jatu wa jabun yuikin:

–Romano xanen ibu Césarnaki– akabu

²⁵Jesúsun jatu yuikin:

–Césarnawen taexun matun xanen ibu César duawakin jawen gobierno dayaxunmisbu pei jatu inanxunkubainkanwen. Jakia Diosdi duawakin jawen yusian chibankin jawada bechipaiai axundiakubainkanwen– jatu waya²⁶yudan kaianen ninkaya jabun achikatsis ikin unanti wabiabu jaska waxun padankin kanematima nawabun ninkatan min atidumaya Jesúsun janchawen e itan jaska watima pes mapuabun

**Ana bestenxanaibukidi saduceobun Jesúsun
yukanibukiaki, na janchadan**
(Mt 22.23-33; Mr 12.18-27)

²⁷janua saduceobu judiobu paxka betsa: “Ja mawabu jawen yuda tsua ana

besteinsmaki”, imisbu Jesús anu jabudi bexun yukakin:

²⁸—Yusinaan, Moisin nuku kenexuntanan, eska nuku bashixunbainiki: “Juni betsa ainyantan juni bakeyadiama mawaken janua jawen betsan ain janubi ainwantan juni bakewaxuntiki, jawen betsa mawaimatun kena dabikinan”, nuku waniki. ²⁹Jaskakidi ja jawen 7 betsabukidi mia yuinun ninkawe. Ja dukun iyuatun ainbu betsa ainwanxun juni bakewadiama mawaken ³⁰ja kachukeatun jawen betsan jabias ainbu ainwanxun juni bake wadiamadi mawaken ³¹ana ja kachukeatun jawen betsan ain jabiadi ainwandiatan juni bake wadiamadi mawaken janua ja 7 jawen jenekin jabias ainbudi bixun jabu tibibun jawa juni bake bawabuma mawai keyuabun ³²janua jawen jenei ainbu juni bake biamas mawadianiki.

³³Ja jaskanibudan, mawabu ana bestearinbutianan, ḷja ainbu bestichai ja juni 7bun ainwanibudan, jadatutun kaya ana ja ainbu bixanimenkain?— akabu

³⁴Jesúsun jatu kemakin:

—Na jariatian beneyai inun ainyain man jiweabuki. ³⁵Jakia Diosunabu kayabi ana jatu unanti wakin besten waintianan, jabe jiwei jau benimai jiwenunbun Diosun junibu inun ainbu jatu bestenwanan, jadia ana ainyain inun beneyama ixankanikiki. ³⁶Janua Diosunabu kayabi ana besteanbuwen taea Diosun nai tsumabu keska beneuma inun ainyuma jiwexankanikiki, ana mawamadan.

³⁷Mawakubainaibu ana bestenxanaibukidi Moisin yusini matu yuinun ninkakanwen. Ji maxu kua jede ji ikai anuxun mawanibu ana jatu bestenwain kakatsi ikin Diosun Moisés yuia kenekinan, eska waniki: “Eadan, natian en Abrahamnen mekenikaki.

En Isaacun mekenikaki. En Jacobun mekenikadiki”, ikai ninkayamaxun Moisin kenenedan, ḷman uinkin yuismamen? ³⁸Diosdan, mawabunamaki. Jakia jiweabunaki. Jaskaken Abraham inun Isaac inun Jacob jatun yushin jiweabuki. Chipu ana yuda bema Diosun jatu inanxanai shinanma man kanejaidamiski— jatu waya

³⁹janua Diosun jancha Moisés yusian keneni yusinanamis betsabun Jesús yuikin:

—Yusinaan, min pe jatu yuixuki— akaya ⁴⁰januxun tsuan ana jawa betsa yukabumaken

Mesíaskidi Jesúsun jatu yukanikiaki, na janchadan

(Mt 22.41-46; Mr 12.35-37)

⁴¹ja unanepabu jabu mapuabu Jesúsun jatu bepxumakin yukakin:

—Diosun jancha kenenibu yusinanamisbun matu yusinkin yuikin: “Mesías Cristodan, Davidin baba ixanikiki”, ikin ḷjaskakin matu jaska yusinmisbumen? ⁴²⁻⁴³Nukun xenipabu pepa Davidin Salmos anu keneni matu yuinun ninkakanwen:

—Dios kushipa dasibi binuatun en xanen ibu Mesías yuikin: Miki sinataibu en jatu maemadiama manai en yusiudi tsauyuwe’, aniki. ⁴⁴“Mesías en xanen ibuki”, Davidin abianiken ḷjaskatan jawen xanen ibu janubi jawen baba itidumen? Ea yuikanwen— jatu wa jawa yuiabumaken

Diosun jancha kenenibu yusinanamisbu Jesúsun jatu chitenikiaki, na janchadan

(Mt 23.1-36; Mr 12.38-40; Lc 11.37-54)

⁴⁵yudan kaianen Jesús ninkadiaibun jawen tsumabu Jesúsun yuikin:

⁴⁶—Diosun jancha kenenibu yusinanamisbuden, jatu uindakanwen.

Jatun tadi chaipa jawendua sawea mae jemaintin ewapa plaza anu en kauanai ea bechipaikin ea kenwankin jau jancha pewen ea duawanunbun ika mapumisbuki. Jaska inun, janu ichati jiwe anu jikikain jaki tsauti pepa janu dasibibun jatu uintidubu anu tsaukatsis imisbuki. Ja inun, ichatan pinun, iwanan, janu xanen ibubu dakai baxti ixun pimisbu benadiamisbuki. ⁴⁷Jaska inun, ainbu jawen benen xununitun jawen jiwe bianun, ixun, ainbu padain bepadani Diosbe janchai chaipajaidakubainmisbu ki. Jaskamisbuwen taexun jabu Diosun jatu kupijaidaxanikikiki– itan

Ainbu nuitkaaitun inankuinkin pei ichapayabu binunikiaki, na janchadan
(*Mr 12.41-44*)

21 ¹Templo jemaintin anu tsauxun Jesúsun uiyanan pei ichapayabun ja jakia nuitkaapai medabewati bauki inankuin namekin mistubainbainaibun ²ja jaska waibu uiyanan ainbu beneumadi nuitkaapabiai juxun pei jexe dabe jawa damajaida namekin mistuaya ³Jesúsun jawen tsumabu yuikin:

–Chanimna na beneuma nuitkaaitun jawen pei inankuin namekin dasibi pei ichapayabu jatu binumakin keyuxuki. ⁴Eskaki, matu xabakabi yuinun. Ja junibu pei ichapayabun jatun pei paxkaxun texe besti inankuinkanxuki. Jakia ja ainbu nuitkaaitun dasibi jawen jawada biti pei inankin keyuxuki– jatu watan

Dios kenwanti jiwe tekei pudekei keyuxanikidi Jesúsun jatu yuiniaki, na janchadan
(*Mt 24.1-2; Mr 13.1-2*)

⁵janua jemaintin anu mapuxun Templo inun ja mishkipanwanwen jiwe wakin jawenduawanibu inun inankuinti

jamapai shadabuwen dau wanibu uin jawen tsumabu bestibu jakidi janchaibu ninkakin Jesúsun yuikin:

–Na jiwe man uiainan, jawenduabia jabianu mishki betsa ana matsanmanama dasibi ja mishki jiwe tekekin pudekin keyuxankanikiki– jatu wa

Jaska tashinun badiai bebunkidi Jesúsun jatu yusinikiaki, na janchadan
(*Mt 24.3-28; Mr 13.3-23*)

⁷jawen tsumabun yukakin:
–Yusinaan, ja mishki jiwe tekei pudekei keyuxanai min nuku yuixudan, ḡmia yukapa? Ma janu kema taei jaskai nun unantidumenkain? Nuku yuiwe– akabu

⁸Jesúsun jatu yuikin:
–En ana judiamaken jaskai nuitkaapai taexanaibu Diosun yuini eskaxankanikiki. Xabakabi matu yuinun ninkakanwen. Ma en janu jua kemaya juni betsabu bexun yuikin: “En Diosun Mesías Cristoki. Ea ninkakanwen”, ikaibun betsabundi yuikin: “Cristo dama juikiki. Matu uinmanun ea chibankanwen”, iwanan, yuaibu jatu ninkayamaxangananwen, jau matu padanyamanunbunan. ⁹Ja inun, yudabu nuitkaapai taeaitianan, detenamei kakaibu ninkabiai e iki jawa dateyamaxanganwen, jaskaibutian en juamakidan– iwanan, ¹⁰ana jatu yuikin:
–Ja yudabu nuitkaabitianan, nawa betsa betsapa nawa betsabube detenameaibun ¹¹mai pacha sakua akeakeaya pitti jayama buni teneaibun isin betsa betsapa mae tibi anuxun tenea akeakeabun nai anua jawen unanti mese jaska taxnisma uiainbun janu en judiamaka iyanai.

¹²Jakia na dasibi eskaxanai idiamaken man ea chibankubainaibuwen taexun matu ichakawakin matu achitan ichati jiwe anu matu yunuabu januxun bichiti jiwe anu matu bichitan xanen ibu betsa betsapa anu matu iyuabu jabun betsabu

matu ekidi yuimaxankanikiki, man ea chibainbuwen taexunan.¹³ Matu jaska wabiabu kakape ekidi man jatu yuixanaii.¹⁴⁻¹⁵ Man jaskaibu ean matu medabewakin jancha pe yuiti shada en matu inan jawen unanepakin ja matuki sinataibun ninkakin jawa ekidi chakabu yuiama inun matu nematidubuma ixankanikiki. Jaskaken jawa dateama “¿Jadakidi yuixanpa?” ikin bebunkidi shinanyamaxankanwen.

¹⁶⁻¹⁷ Ja inun, ea chibakin man ekidi yusinkubainaibu yuda midimabun matu danain janubi matun ibubu inun matun betsabu inun matun puibu inun matunabu betsabu inun matun jaibuaibun matu danankin jabun nawabu matu achimaxun betsabu matu jatidi tenanmaxankanikiki.¹⁸ Matu jaska wabiaibun Dios matu jakimamajaida ixanikiki. Matu jaska waibuwen nuiyamaxanwen.¹⁹ Ja inun, tsuabunda ea chibain chintuanmawen taexun janu kupititian en matu piskumaxanaii, matu kupiamadan.

²⁰ Ana betsadan, nawa soldadobu Jerusalén mae kexebaunabu uinkin jawaida jatu yamawaxanaibu man unanxanaii.²¹⁻²² Ja inun, Diosun jancha yuixunikabun Diosun Jerusalén kupixanaikidi kenenibu samama keyunun badiyuai unain Judea anuabu mati keyatapa anu jau paxaxan unbunwen. Ja inun, Jerusalén anuabu jau taxnidabainxan unbunwen. Ja inun, bai anu dayaibu jatun jiwe anu ana beama jau paxadiyan unbunwen.²³ Nukun maewan jidabi anuabu yumainbutianan Dios danainbu jatuki sinatakin Diosun jatu kupyaya betsabu teneaibun tuyabu inun ja jatun bake chuchu amamisbuden, nuitkaajaidaxankanikiki.²⁴ Ja inun, detenamekin nupe chaipawen betsabu detekin jatidi tenantan betsabu

achixun tsuma waxun mai pakea betsa betsapa anu jatu iyuaibun Diosun nawa kushipabu jatu nemakin yamawadiama jabun Jerusalén anuabu ichakawaxankanikiki- iwanan,

Nukun Juchi Kayabi Iyua juidan,
eskakidanun badikiaki, na janchadan
(Mt 24.29-35, 42-44; Mr 13.24-37)

²⁵⁻²⁶ Jesúsun jatu yuikubainkin –Januxun Diosun badi inun uxe inun bishi betsa betsapa taxnimatanaya mai anu nawa xukua tibi jiwea akeabu jaskai tsuan ninkaisma betsajaidai ianenwan tunkax ikaiwen date paepai unanyamasi jawa dabanan ninkai mese chakayamaibun jabatiandi nai anua betsa betsapai nai chuduankin taka taka akaya ja yudabun shinain: “Ma nuku yamawaikiki”, ixankanikiki.²⁷ Ja jaskaibun en matun Juchi Kayabi Iyua xanen ibui kushipajaidai chaxajaida nai anua nai kuin medanua en juai uinxankanikiki.²⁸ Jaskai taeaya man jawawen ana jawa teneama samama en matu pepawen jiwemayuai unantan benimajaidai naiudi teskantan uinkin ea bechixankanwen- iwanan,

²⁹ miyuiwen jawen unanti jatu yusinkin: –Jiwen man unantidubukidi matu yusinun ninkakanwen.³⁰ Ja ji mebi jawen pei petakatan ana pei bena jui metubistan peiai uinkin ma badi kemai man unanmis³¹ keskai jawada en matu yuixu ikai bechitan en samama xanen ibui juai man unanxanaii.³² Ja inun, yudabu dasibi jiwebaunabu yamadiabuma chanima dasibi en matu yuixu jaskai taexankanikiki.³³ Jakia jabiskadiai nai anua inum mai anua Diosun damiwani jabu keyuxankanikiki. Jakia en janchawen bebunkidi en matu yusiainan, binuama menepakexanikiki.

³⁴⁻³⁵ Jaska tibi kainxanaiwen taea matun juintinin kemu betsa betsapa

mekin kaneama uindaxankanwen. Jawada chakabu aki juinti kushiyamaxankanwen. Eskaidan, paeanwen inun jawada matumebi man jaska shinainwens besti dabanan iki juinti nishmayamakubainxankanwen. Man jaskai jiweabun yudabu mai jidabi anu en jatu unanti watanun ika juaya bidun medan jikitan kebenmana keskama Diosunabu man paxaxanaii.
³⁶Jamen matunan, en jancha chibankin jeneama Diosbe badi tibi janchakubainxankanwen. Jaska mese tibi taxnixanai binutan man ma pewen taea janu matun Juchi Kayabi Iyua en matuki nukuitian ea bebun man mapuxankanaii– jatu wanikiaki.

³⁷Januxun badidi Templo jemaintin anuxun Jesúsun jatu yusinkubaini meshu medan tibi Jerusalén anua kainkaini Olivos Mati anu uxatantanaya
³⁸Jesúsun jancha ninkanun ika yudan kaian penaya bestentan Templo jemaintin anu jaki nukui ichabidanbida nibukiaki.

**Jesúsun ika yubakanibukiaki,
na janchadan**
*(Mt 26.1-5, 14-16; Mr 14.1-2, 10-11;
Jn 11.45-53)*

22 ¹Ja Pascuarianan, Egipto anuxun Diosun yunua debuwanika nai tsuman nawan bakebu tenankin judiobun xenipabu dunkebaini shinanmatitianan, uxa dabe ma kemai misi xaxama pimisbu ma kemaya
²jawenabu Diosbe janchaxunika xanen ibubu inun Diosun jancha kenenibu yusinanamisbun jaska waxun Jesúsun padanxun june achitan tenankatsi yubakai yuinamei yuda ichapabun Jesúsun ninkamisbuki ika mesei dateabun

³janua Jesúsun 12 tsumabu betsa Judas Iscariote Satanás jawen juintiki jikia jawen jaibuaibu dapaxkabain

⁴Diosbe jawenabu janchaxunikabu xanen ibubu inun jabun Templo mekenika xanen ibubube janchai kaxun jaska watan Jesúsun jatu achimaxanun ika jatube yubakaya ⁵jabu benimakin yuikin: “Nun mia pei inanxanaii”, akabu ⁶Judas jukin “¿Jatian janixun en Jesúsun jatu june achimatidumen?” ikin shinankin taewabidanikiaki.

**Badi kaya jawen tsumabubetan pikin
Jesúsun jatu yuba bena wanikiaki, na
janchadan**

*(Mt 26.17-29; Mr 14.12-25;
Jn 13.21-30; 1 Co 11.23-26)*

⁷Ja badi Pascua besi taemisbutian ja dukun chaxuwan bake tesenxun taewamisbutian jabianudi misi xaxama pikubainmisbutian ⁸Jesúsun Pedro inun Juan nichinkin yuikin:

–Ja Pascua shinanti nukun piti pewatankanwen– aka ⁹yukakin:
 –¿Jani kaxun bawakin pewatarpa?– akabu ¹⁰Jesúsun jatu yuikin:
 –Bui Jerusalén mae anu jikitan jabianudi juni betsan unpax shumuwanki iabidanai jaki nukutan chibantankanwen. Man chibantainan janu jikiai uintan ¹¹ja jiwe ibu yukakin eska watankanwen: “Nukun yusinan nuku yuixudan, ¿mia yukapa? ¿Jadatu dintu anuxun en tsumabubetan nukun Pascua shinanmati piti pipa?” man wa ¹²januxun dintu ewapa manaundi ma pewa matu uinma januxun nukun piti bawakin pewayutankanwen– jatu wa

¹³jawen tsuma dabe kainbaini Jerusalén mae anu jikitan jaska Jesúsun jatu yuixu keska ja juniki nukutan chibantainan jabe kaxun jiwe ibu yukatan januxun Pascua besikin piti bawa menetan butani

¹⁴badi kai meshuaya Jesúsun jawen 12 tsuma kushipayabube jui jikitan tapu dapi dakai baxti ibainbainxun piaibun
¹⁵Jesúsun jatu yuikin:

–En mawadiama na Pascua shinanti matubetan pikatsis ikin en manakakubainshinaki.¹⁶ Chania Dio danainbu juxun en yamawakin keyudiamma en ana jabiaskadi piama ixanaii. Jakia Dio xabakabi xanen ibuaya en matubetan ana pixanaii– jatu watan

¹⁷⁻¹⁸ jawen Pascua piti keyukin jawen kencha tsumaxun Dio kenwantan yuikin:

–Chania en matu yuiaii. En Epa Diosbe xanen ibui en ana judiamma na uva vino en ana matubetan ayuama ixanaii. Abaunkanwen– jatu watan

¹⁹ Pascua piti jawen jenekin jatu pima keyutan januxun shinanmati bera wakin misi betsa bixun Dio kenwantan namakis tunketan jatu inankin yuikin:

–Na misidan, en matu mawaxunxanai shinanti en yuda keskaki. Ea shinanbetanan man pixanai ikis pikin taewakanwen– jatu wa

²⁰ bitan tudexun pikubaunaibun jabiaskadi wakin kencha vino mata tsumaxun yuikin:

–Yuda ichapabu matu medabewai mawakin en jimi en matu jabaxunxanaii. Na vino en jimi keskaki. Jawen yubaka bera shinanmatiki. Ea shinanbetanan, man axanai ikis akin taewabaunkanwen– iwanan,

²¹ ana jatu yuikin: –Jamen matu bestichaitun na man ebtan piaibunan man ea jatu achimai kaii.²² Jaska ekidi kenenibudan, matun Juchi Kayabi Iyu en jaskai mawaxanaii. Jakia ja junin ea jatu achimai kaidan, peidaxanwan!– jatu waya

²³ yuinamei yuka idabebaunkin yuikin:

–¿Eamen, en jatu amaxanaitsa? –iake iakei keyutan

Jaskatan jatu binutikidi Jesúsun jatu yusinikiaki, na janchadan

²⁴ janua jawen tsumabu yuinamekin yuikin: “¿Jesúsbe xanen ibui jadatu kaya

nun binunanain kai?” ikaibu²⁵ Jesúsun ninkatan jatu shinan betsa wamakin yuikin:

–Nawa xukua tibi xanen ibubun jawenabu jatu bika tenemakin yunu chakayamabiakin jawenabu jatu kenwanmakin yuimakin: “Min xanen ibu pepaki”, jatu amamisbu, ichakawabia pepawanikapainun ikadan.²⁶ Jakia matunan, jaska jatu wayamaxankanwen. Jatu keskama eska shinankubainxankanwen, matubunan. Tsuada juni ewabia bedunan jawa yuimama yunuabu besti chibankin amisbu keskakin matunabu betsabu man binuxanaii. Ja inun, tsuanda jatu yunubiakin matunabu betsabu jatu duawakubainxankanwen.²⁷ Eska yudabun uinkin shinanmisbuki. Na baxti ika dakaxun pimisbu xanen ibuki. Jamen jatun jatu pimakin duawaidan, xanen ibumaki, iwanan, shinanmisbuki. Jamen eanan, matu anuxun matu tapinmanun ixun en matu bestibu duawakin uinmakubainnaii. Jaska keskakin jadatutunda ea chibankin betsabu man binuai man unantiduki– iwanan,

²⁸ ana jatu yuikin:

–Nukunabun ea unanti wakin betsa betsapa ea tenemabiaibun man ea jeneama ikunkainaii.²⁹⁻³⁰ Jaska man bika tenekubainshinawen taexun ebetan pikin jawen xanen ibu jaki tsauti ea dapi tsauxun Israelin 12 bakebun baba xukuabu tibi jau man jatu unanti watan mekexanunbun jaska en Epan ea yunua en jabe xanen ibumis keskakin ebe en matu xanen ibumaxanaii– iwanan,

**Pedro jaki dakei mesei kaikidi Jesúsun
yuinikiaki, na janchadan**

(Mt 26.31-35; Mr 14.27-31; Jn 13.36-38)

³¹ Simón Pedro besti Jesúsun yuikin:

–Simóon, Simóon, jawena matu wakatsis ikin xekiwan xaka

tamisbu keska wakin matu unanti wanun, iwanan, Satanásan Epa Dios ma yukashinaki. Uindawe.

³²Jabiaskabiaken ea chibain jau min juinti babuyamanun eandi Epa Dios ma en mia yukaxunshinaki. Mia jaska wa kanebiatan ana ea chiban taewakin ikunwain betsbu jau chintunyamanunbun jatu kushipa wakin medabewakubainxanwen– aka

³³Simón Pedron shinan pewama yuikin:

–Yusinaan, jaskamaki. Mibe kai bichiti jiwe anu ka kasmai janu min mawai anu en mibe kaii, jawa dateamadan– aka

³⁴jaska waya Jesúsun nemakin:

–Pedroon, min jaskamaki. Na jabia meshu medan pena kemaya takada keudiama yuikin: “En ja unanmaki”, iki chanima dabe inun bestiki min eki dakekin yui kaii– atan,

Jesúsun jawen tsumabu jenebainkatsi mapui jau jaskaxanunbun jatu yununiaki, na janchadan

³⁵januxun Jesúsun jawen tsumabu yunua butanimabu jatu yukakin:

–Man yusintanunbun peiuma inun kapankaunma inun tae pewetametia benauma en matu nichian man katanimadan, cjava man yupaimamen?– jatu wa jabu kemakin:

–Jaskamajaidaki. Dasibi nun jayaimaki– ikaibun

³⁶Jesúsun ana jatu yuikin:

–Natianan, matu ana nichinti en betsa waii. Tsuada man pei jaya buxankanwen. Tsuada man piti jaya buxankanwen. Tsuada man jawen detenameti jayamadan, matun dakukuti betsa inananantian jawen detenameti bixankanwen. ³⁷Na eska en matuki chaniaidan, jaska ea wakin binumama menexanaibu Isaíasin kenekin yuikin: “Juni chakabu yuibaunxankaniiki”,

ani chanima ekidi kenen dasibi betsa texewama ea axankanikiki, ewen menekinan– jatu wa

³⁸jawen tsumabun yuikin:

–Xanen Ibuun, nun ma dabe jayaki, jawen detenametidan– aka jatu yuikin: –Peki. Ana jadakidi matu yuitimaki –Jesúsun jatu watan

Getsemaní anu ka Jesús Diosbe janchanikiaki, na janchadan
(Mt 26.36-46; Mr 14.32-42)

³⁹Jerusalén anua kainkainkin jawen tsumabu iyui janu kamis anu Olivos Mati mapetan ⁴⁰januxun jatu yuikin:

–Matuki chakabu jikiaya man kaneyamanunbun Diosun jau matu medabewanun uxama jabe janchakanwen– jatu watan

⁴¹jatu jenebaini kai tsuanda jatixun tin ikimenkain ixun mishki tude putabu kai tin imistixun Jesús ka danti itan jawen Epa yukakin ⁴²yuikin:

–Epaan, jamapai dasibi min atidu en unaiin. En mawayamanun min nematidubia en shinain keska ea akama min shinanen besti ea axanwen– ikaya

⁴³ja jaskaitian nai anua Diosun nai tsuma taxnitan medabewakin kushipa watushiaya ⁴⁴janu bika tenechakayamai mestean daka anua niskanjaidai jimi keska tuis tuis ikin mai mecha watan

⁴⁵Diosbe janchai menetan benikidan jawen tsumabuki nukuyuxun juinti nishmajaidatan uxabu bechitan ⁴⁶Jesúsun jatu yuikin:

–¿Jaskai man uxamen? Bestentan chakabu juaya man kaneyamanun Diosbe janchakin jau matu medabewanun yukakanwen– jatu wai

Jesús unanmamabain achinibukiaki, na janchadan

(Mt 26.47-56; Mr 14.43-50; Jn 18.2-11)

⁴⁷Jesús jawen tsumabube jancha menediamana juni ichapabube Judas jui

jatu bebuxunkidani Jesúski nukutushitan tantsu akaya⁴⁸ Jesúsun yuikin:

–Judasiin, jawen bechipaiti tantsu akaiwen unanmakin min Juchi Kayabi Iyuá émin ea jatu achimai?– akaya

⁴⁹Jesúsbe mapuabun jaskabidanabu unankin yukakin:

–Xanen ibuun, éna eskabidankanxudan, machatuwen jatu detekin nemapa?– ikain

⁵⁰betsan jawenabu Diosbe janchaxunikabu xanen ibujaidatun tsuma jawen pabinki yusiudia maebain mepexpaikin paxteya⁵¹ Jesúsun nemakin jatu yuikin:

–Min ma axuki. Jatu jaska wayamakanwen– iwanan, jawen pabinki paxtea tin ika bixun patsankin Jesúsun xuxawatan⁵²⁻⁵³ jawenabu Diosbe janchaxunikabu xanen ibubu inun jatun Templo mekenika xanen ibubu inun mae xanen ibu bexmasbun Jesús achinun ika beabu Jesúsun jatu chitekin yuikin:

–Xaba tibi januxun Templo jemaintin anuxun en matu yusinkubainai man ea achlama ikunkainshinaki. ¿Jaskai natian yumetsu achimisbu shinain jawen deteti nupe chaipaya inun jawen kushati jiya man bekanxumen? Natian chanima chakabu dayaya ja medabewamai man ea achinun ika bekanxuki– jatu wa

Jesúski Pedro dakekin padanikiaki, na janchadan

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ninkamas Jesús achixun jawenabu Diosbe janchaxunika xanen ibujaidatun jiwe anu iyuaibun Pedro datekin benanta chipu kakin chibankubaina⁵⁵janu xanen ibun jemaintin chi ketian yui tsauaunabube Pedro jatube tsaua june yuaya⁵⁶janua ainbu dayadu juxun Pedro chin yuai uin kayati watan jatu yuikin:

–Na juni matube tsauadan, jawen tsuma betsaki– akaya

⁵⁷Pedron padankin yuikin:

–Ainbuun, jamaki. En ja unanmaki– ikaya

⁵⁸jakimamadi betsandi bechixun yuikin:

–Miadan, min jibia jatube uinanmandi– aka Pedron ana yuikin:

–Jaskamaki. Eadan, en jamaki– aka

⁵⁹janua jakimatsais katan Pedro metukin juni betsan unanxubima mapuabu yuikin:

–Chanima na junidan, jabe nimiski. Jibia Galilea anuabu jancha nun ninkaii– ikai

⁶⁰ninkatan Pedro datekin yuikin:

–Ja jadi min jaska yuiaidan, en unanmaki– ikaya

ja jaskaitian takada keuaya⁶¹ Jesús nasaukekauan Pedro uiannyán jaska Jesúsun Pedro yuia: “Takada keudiama yuikin: ‘En ja unanmaki’, ikin chanima dabe inun bestiki min eki dakei padanananxanaii”, aka jaska shinain⁶²janua Pedro taxnikain kaxachakayamaya

Xanen ibubu Junta Suprema anu Jesús iyunibukiaki, na janchadan

(Mt 26.59-68; Mr 14.55-65; Jn 18.19-24)

⁶³⁻⁶⁴jabianuxundi jabun Jesús achibidan ichakawakin besu beputan kaxe wakin kusha kusha akin yuikin:

–¿Tsuau mia kushaimenkain? Unantan nuku yuiwe– akubainkin⁶⁵betsa betsapa yuikin ichakawashinkin

⁶⁶janua badi chi pexeaya mae yununika xanen ibubu inun Diosbe jawenabu janchaxunika xanen ibubu inun, Diosun jancha kenenibu yusinanamisbu na Junta Suprema ichabu anu Jesús jatu iyuxunabu⁶⁷jabun yukakin:

–¿Jabia min miamenkain, nukun Mesías Cristodan? Menan nuku yuidiwe– akabu Jesúsun jatu yuikin:

–“Chanimá en jaki”, iwanan, en matu yuibia man ea ikunwantidumaki.⁶⁸ Ja inun, jawada eandi en matu yukabia man ea yuitidubumaki.⁶⁹ Jabiaskabiaken en matu yuiai ninkakanwen. Na jabiatián man ea tenanbia Dios kushipajaida dasibi binuatun yusiudi en tsaua en matun Juchi Kayabi Iyua en jabe xanen ibukunkainxanai– jatu wai⁷⁰ ninkatan dasibibun yukakin:

–Jaskakenan, ɿjabia min Diosun bakedaka ikai?– akabu Jesúsun jatu yuikin:

–Iubis matumebi jabiadi man yuiaii– jatu wa

⁷¹janua jaki sinatai jabudi yuinamei:

–Jawen kexawen Dios ichai jamebi chakabuikiki. Jaskai nun ninkaiwen taexun jau tenanunbunwen– itan yuinametan

Pilato anu anu Jesús iyuxun chitenibukiaki, na janchadan

(Mt 27.1-2, 11-14; Mr 15.1-5; Jn 18.28-38)

23¹xanen ibu dasibibun jaska wakin unanti wakin menetan janua benibainkin romano gobernador Pilato anu Jesús iyuxun ²jakidi chitekin Pilato yuikin:

–Na juninan, chakabu betsa betsapa jatu yusinkin nukunabu itimaska wakin jatu padainkiki. “Min xanen ibu César jau pei inanyamanunbun nukunabu jatu nemamiski”. Jabiadi “En Xanen Ibu Mesías Cristoki”, imiskiaki– akin jakidi yuiaibu

³Pilaton ninkakin Jesús uinkin yukakin:

–¿Miadan, min judio xanen ibubu binu keyuamen?– aka

Jesúsun yuikin:

–Jawaikika! Jabiadi min ea yuiaii– ikaya

⁴januxun judiobu Diosbe jawenabu janchaxunika xanen ibubu inun yudan kaian Pilaton jatu yuikin:

–Jawa chakabu akamaki. Jawawen taexun kupiti jayamaki– jatu wabia

⁵Pilaton jancha ninkama jawenchains unanxubima yuikin:

–Judea anuxun jatu yusian akeakekin jatu itimaska wamiski. Galilea anuxun taewaima nenuxundi jatu yusindiaikiki– akaibu

Herodes anudi Jesús iyuxun chitenibukiaki, na janchadan

⁶jaska yuiaibu Pilaton ninkatan jatu yuikin: “Aa, ja junidan, ɿGalilea anuadaka?” ikaya ⁷“Jaa, Galilea anuaki”, akabu Pilaton tapintan ja Galilea xanen ibu Herodes na jibia mae Jerusalén anu bai jushinken jawen soldadobu yunukin xanen ibu Herodes anu Pilaton Jesús jatu yunua iyubu ⁸jaska Jesúsun jamapai damiwakin betsa betsapa wai kakai Herodesin ninkamis jaska jawen bedubi dami betsa axuain uinun ixun manajaidamis atimas Jesús uin xanen ibu Herodes benimajaidakin ⁹jaska wamis keska yuka chakayamabiaya Jesúsun jawa yuimajaidaken ¹⁰jabianudi Diosbe jawenabu janchaxunika xanen ibubu inun Diosun jancha kenenibu yusinanamisbun Herodes yuidiakin jakidi Jesús chitekin ja akeakeaibun ¹¹Jesúsun jawa ja yukaikidi jatube janchama kutaxna nikken jawen soldadobubetan Herodesin Jesús ichakawakin kaxe wakin betsa betsapa watan xanen ibu keska wakin sanpu jawendua sawematan jawawen jaska watima ana jawendi Herodesin Pilato anu Jesús yunua iyubu

¹²romano xanen ibu Pilato inun judio xanen ibu Herodes uatian sinatanamebianibu na jabiatián daenamei jaibunamei taenibukiaki.

Pilaton Jesús jau mastanunbun jatu yununiaki, na janchadan

(Mt 27.15-26; Mr 15.6-15; Jn 18.39-19.16)

¹³Pilato anu Jesús ana chintuanbidanabu uinkin Diosbe

jawenabu janchaxunika xanen ibubu
inun mae xanen ibubu inun yudan kaian
Pilaton jatu ichawaxun¹⁴yuikin:

—Na juni ana ea anu iwexun matunabu
padankin jatu itimaska wamis yuikin
man chitexuki. Jakia dasibi man uiyanan
Jesús yukakin unanti wakin jawa
chakabuwakin meshina en bechiamaki.
¹⁵Januxundi jau Herodesin unanti watan
jaskada wanun, iwanan, en yunua unanti
wakin jawa chakabuwashina bechiamadi
ea anu Herodesin ana yunuxuki. Jawa
jaskashinawen taexun jau tenanunbun
en yunutidumaki.¹⁶Jaskaken kusha
kusha a bestitan jau jawama kanun en
jatu yunuaii– ikaya

¹⁷⁻¹⁹badi tibi Pascua besiaibutian
romano soldadobun jatu achixun
bichimabu jau bestichai taxnimanunbun
yudabun katua romano xanen ibun
jatu kainmaxunpakemisken jabatiandi
juni betsa Barrabás juni betsabube
detenamekin jatun xanen ibu detepaikin
jatubetan juni betsabu tenanken jabube
achixun bichimabun ja shinankin
januxun yudan kaianen unanxubima
yuikin:

—Jau Jesús tenanunbun yunuwe.
Jaska watan Barrabás kainmatan
nuku nichinxunwen– ikaibun²⁰Pilato
Jesúswen nuikin jawa wama nichinkatsis
ikin ana jatu yuikin:

—Jaskamaki. ¿Matun xanen ibu
Jesús matu kainmaxunpa?– jatu wabia
²¹ninkakatsi ikama unanxubimajaida
ana yunukin:

—Cruzki jatu mastamawe! Cruzki jatu
mastamawe!– akeakeabu

²²Pilaton ana jatu nemanun, iwanan,
yuikin:

—¿Jawa chakabuwashinamen? Jau
tenanunbun unanti wakin jawada
chakabuwashina en bechiamaki. Jatu
kusha kusha ama bestitan en jenekatsis
ikaii, jau jawama kanunan– jatu wabia

²³ninkamas yuda ichapabun
unanxubima ana yuikin:

—Cruzki nuku mastaxunwen– akin
jaska shinainbu keska jau jatu axunun
yunukin jeneabumaken²⁴⁻²⁵atimas jaska
shinainbu keska jau jatu axununbun
jawen soldadobu Pilaton yunutan ja
juni Barrabás detenameawen taexun
bichimabu yudabun katua kainmatan
januxun Jesús jau mastatanunbun jatu
yununikiaki.

**Cruzki Jesús mastanibukiaki,
na janchadan**

(Mt 27.32-44; Mr 15.21-32; Jn 19.17-27)

²⁶Januxun romano soldadobun
cruz Jesús jaki mastanun, iwanan,
iamabainkin iyukin juni betsa Simón
Cirene anua ewani Jerusalén anu jikiai
achixun jau Jesúsun cruz iaxunbainun
yunuabu Jesús bebuaya²⁷yuda
ichapabun Jesús chibancainabu
ainbuaibu jawen nui kaxai bis
ikubainaibu²⁸⁻³¹Jesúsun jatu uinkin
yuikin:

—Jerusalén anua ainbuaibuun, ewen
nui kaxayamakanwen. Jakia janu
nuitapaibutian nenuabun yuikin:
“Ainbun jabun bake bisbuma besti
benimaxankanikiki”, ikaibun januxun
yuda ichapabun jabun chakabuwen
datekin mawa yuikin: “Nukuki matekei
di ikin nuku junewe”, axankanikiki.
Jaska inun, ea en jawa wama nibiaken
ea ichakawakanikiki. Jamen jabun ea
ichakawaibu Diosun jabudi ichakawa
chakayamadiakin jatu kupijaidaxanikiki.
Jaskawen taea ana ewen nui kaxama
matumebi inun matun bakebuwen taea
nui kaxakanwen– jatu wabainaya

³²janua juni yumetsu dabe Jesúsbe
tenanun, iwanan, iyui³³Buxka Xau Mati
anu mapematan Jesús cruzki mastatan
januxun juni yumetsu dabedi jabianudi
jabe mastakin betsa jawen yusidi betsa

jawen yusmaudi mastaxun nichinkin

³⁴meneabun soldadobukidi Jesúsun

yuikin:

–Epaan, ea jaska waibudan, jawa
jatu kupiyamawe, jawa unanma iki
ikanikikidan– ikaya januxun soldadobun
jawen beyustiwen maemanankin jawen
tadi paxkanun iwanan: “¿Tsuán dukun
jawen tadi bimenkain? Akanwen”, ikaibun
³⁵jabianudi xanen ibubu inun yuda
ichapabun uinkin kaxe wakin yuikin:

–Juni betsabu medabewamiski.
Jamebidi jau paxadianunwen. Jaska
Diosun Katua Mesías kayamenkain cruz
anua na jabiatian butuai uinkin nun
ikunwantiduki– ikaibun

³⁶⁻³⁸ji bexa sapaki kenekin: “Nadan,
judiobun xanen ibujaidaki”, akin kenea
Jesús mamaki mastaxun soldadobun
chaima ja dapixun kaxe wakin vino jene
muka amapaikin yuikin:

–¿Min judio xanen ibu kayabimentkain?
Nuku unanmai mimebi paxai
butudikaintanwen– adiaibun

³⁹janua yumetsu dabe jabe mastabudi
betsa jancha chakabukin yuankin:

–¿Min Diosun Mesías Cristomenkain?
Mimebi bututan nukudi butediwe, nun
paxanunan– akaya

⁴⁰⁻⁴¹janua betsan kunyan akin
nemakin yuikin:

–Nukunan, nun chakabuwashinawen
taexun achixun ichakawakin nuku
tenankaniki. Jakia na juni pepatun
jawa chakabuwaismabiaken ichakawakin
nukube tenandiakaniki. ¿Dioski
meseama na juni pepa min jatubetans
jaska wai? Ana jaska yuiyamawe– iwanan,
⁴²jawen chakabuwen datekin Jesús yuikin:

–Jesúsun, min xanen ibui taeaitianan,
ewen nui ea jakimayamaxanwen– akaya
⁴³Jesúsun yuikin:

–Chanimá en mia yuiyaii. Min shinan
betsa waiwen taea na jabiatian pe besti
anu ebe ka min jiwapakexanaii– ikaya

Jaskatan Jesús mawanikiaki, na janchadan

(Mt 27.45-56; Mr 15.33-41; Jn 19.28-30)

⁴⁴⁻⁴⁵janua badi manananbibiaken
badi nuka meshua itsa daka manaibun
ma badi kai nai puchinin dakaken
bepenakainaya Templo medan dintu
wakin ja tadiwen kebenibu jamebi
manaundia namakis dis iki keyuaya
⁴⁶janua Jesús bis ikin yuikin:

–Epaan, mia anu en yushin en nichiaín
ea mekewe– akin jaska yuitan mawaya

⁴⁷januxun romano soldado capitán
Jesús jaskai uintant Dios kenwankin
yuikin:

–Chanimá na juni chakabumaki– akaya

⁴⁸ja dapi yudan kaian mapubaunabun
jaskaxu dasibibun uin jawen nui juinti
nishmai xutidin xutidin ibainaibun

⁴⁹janua jatidi Jesúsun jaibuaibu inun
ainbuai Galilea anua jabe beshianbudi
benanta nixun jaskai uinibukiaki.

Jesús cruzkia mawa butebain maiwanibukiaki, na janchadan

(Mt 27.57-61; Mr 15.42-47; Jn 19.38-42)

⁵⁰⁻⁵⁴Janua ma badi kaya jabiatandi
judiobu juindukunkatsi bebunkidi piti
pewakin dasibi menea badi jikiaya ana
dayatidubumawen taea janu Judea
anua José jawen mae Arimatea anua
ewai yumeni, juni pepa inun duapatun
Dios xanen ibuxanaitian manakin judio
xanen ibubiakin jau Jesús tenanunbun
xanen ibu betsabube Junta Suprema
jatube ja yubakama ishian José romano
xanen ibu Pilato anu kaxun Jesús
maiwatanun ixun jawen yuda yukai
kaxun yuka yunua ma juindukunti
kemaiwen taea jawaida kaxun cruz
anua jawen jaibubetan Jesúsun yuda
jatu butemaxun tadi chaipa juxupawen
dayabutan buxun maiwati mishki tanpe
bena kini waimabu anu janu yuda

betsa datandiabuma anu Josén jawen jaibuaiubetan Jesúsun yuda datantan mishki ewapawen bepubaibainbun⁵⁵janua ainbuaiib Galilea anua Jesúsbe beshianbun Jesúsun yuda buaibu chibabaini maiwati tanpe inun jaska Jesúsun yuda datantan bepubaibainbuintan⁵⁶jadia Jerusalén anu chintunbain jatun jiwe anu jikixun xeni ininipa pepa inun jawen dapuxti dau betsa jawen yuda taxka wakin chaputima wati dau pewakin meneabun ma badi jikiaya juindukuntianken jaska Diosun Moisés yununi shinain ainbuaiib juindukunkin manabaishina

**Jesús maiwashinabu bestenkaina
benanibukiaki, na janchadan**
(Mt 28.1-10; Mr 16.1-8; Jn 20.1-10)

24 ¹janua ma juindukunti binushinken domingotian penamajaida maiwati tanpe anu bukatsi jawen dapuxti xeni ma pewashinabu buaibun ainbu betsabudi jatu chibain jatube bui ²kematan ja mishki beputi ewapajaida tsuanda ma tadanbu bechitan ³jikikain Xanen Ibu Jesúsun yuda jawa bechiamma ⁴jani tsuan jaskada washina unanma janua e iki keyutan uiainbun jabianudi jawaida juni dabe jatu bebun taxnia tadi juxupa chaxajaida sawea bechitan ⁵jaska uin datejaidai main beui beti ikaibun juni dabetan jatu yuikin:
–¿Jaskakin maiwati medan juni jiwea man benakanai? ⁶⁻⁷Nenumaki. Ma bestenkainaki. Galilea anuxun matu yusinkin yuikin: “Eadan, Matun Juchi Kayabi Iyua juni chakabun ea achixun jiki ea mastabu mawa xaba dabe inun besti kaya en ana bestenxanaii, jaska Diosun yubanidan”, akin matu yusinkin yuimadan, ¿man shinanmamen?
Shinankanwen– jatu wa

⁸jaska Jesúsun jatu yuima chanima shinantan ⁹⁻¹⁰maiwati tanpe anua

kainbaini María Magdalena inun, Juana inun, Santiagon ewa María inun, ainbu betsabu jabun kaka buxun Jesúsun 11 tsuma kushipabu inun jabun Jesúsun chibanmis betsabu jaska uinkanxu jatu yuibiabu ¹¹jatun jancha jawa ikunwanma: “Jaskatandun jaskanun jumei ikanikanikiki”, ikaibun

¹²janua Pedro jadi chaniaibun ninkatan: “Eandi uintanun”, ika taxnikaini maiwati tanpe anu kushikain uinun ika kakui denikain uke medan uinkin jawen yabushinabu tadi jamaudi daka uintan jaska uin e iki teku itan Pedron jaskashina shinain shinanyabi kaya

**Emaús maeckidi bai tanabainaibu Jesúsun
jatuki nukunikiaki, na janchadan**
(Mr 16.12-13)

¹³janua Jerusalén anua bui 11 kilómetro mae betsa jawen kena Emaús anu jabias xabatian Jesúsun tsuma betsabu dabe bui ¹⁴jaska wa akeaketan tenanshinabu bestenkainakidi janchai ¹⁵yuinamekubainaibun jabiatandi Jesúsun jatu ichun taxnitán kakin jatu chibain kai jatuki nukukainaya ¹⁶jau unanyamanunbun Diosun jatun bedu betsa wa ¹⁷januxun Jesúsun jatu yukakin:

–Bai tanabidanidan, ¿jawa yui man ikubainkanai?– jatu wakin ana jatu nui chipea nuiyabi buaibun ¹⁸januxun jabu betsa Cleofásin yuikin:

–Jerusalén anua jaska dasibi washinabu dasibibun unankanikiki. Jerusalén anu bai jubiashina ¿jaskakin mian besti min jaska uianma ishianmen?– aka

¹⁹januxun jatu yukakin:

–¿Jaskashinamen? Ea yuiwe– aka ana yuikin:

–Jesús Nazaret anua ewani ichakawakin eskaya tenanshinabuki.

Mia yuinun ninkawe. Diosun jancha yuixunika pepajaida eskakin Dios inun yuda ichapabu jawen aka uinmakin daya duapa inun jancha kushipai unanepai²⁰ pepajaidabiaken jau tenanunbun Diosbe nukunabu janchaxunika xanen ibubu inun nukun mae xanen ibu betsabun nawabu anu Jesús yunuabu cruzki jatu mastamabu mawashinaki.²¹ Ja inun, Jesúsun nawabu nichinkin Israelbu nuku pe mekekin Dios nuku daewaxunxanai dabanen nun jamen dasibi manakakubainshinaki. Ja inun, ma xaba dabe inun besti binubiakainaya nun jawa uindiamaki.²²⁻²³ Jaska inun, nukubetan jabun Jesús chibandiamisbu ainbuai bu penamajaida maiwati tanpe anu buxun Jesúsun yuda jawa uianma nai tsuma dabe jatu bechankamea nia uiainbu jatu yuikin: "Jesús jiweaki", jatu wa bexunkiaki. Jaska nuku yuiabu datei nuku dateabu e itan nun ninkaki.²⁴ Jaska nukuki chaniaibun nukun jaibu betsabudi maiwati tanpe anu buxun jaska ainbuai bun yuixu keska uinkin jawa Jesús uianma idiakanxukiaki– aka²⁵ janua Jesúsbe janchai unandiabuma Jesúsun jatu yuikin:

–Diosun jancha yuixunikabun medabenan Mesías Cristokidi kenenibun unanbiakin unanxubida ikun bexmas wakin shinan pewadiama man kaneaii.²⁶ Nukun medabenan Mesías xanen ibudiamma jau jaskai yumain kanun Epa Diosun yununiki– iwanan,²⁷ Diosun Moisés yusian keneniwen jatu yusin taewakin Diosun jancha yuixunikabu dasibibun yusian janchawendi Jesúsun jatu yusinkin jatu unanmakubainaya

²⁸Emaúski kemai buaibun jatu binubainai dabanen²⁹ nemakin yuikin:

–Ma badi kai meshuikiki. Jabianu nukube niti iyuwe– akabu ninkatan jabianu jatube bashikui niti itan³⁰ jabianuxun jatubetan pinun ika baxti

itan misi bixun piti jayabuwen taexun Dios kenwantan tunkexun jatu inanyan³¹ jabiatandi Diosun jatun bedu ana betsa waya Jesús uinkin unantanaibuns samama ana damikainaya³² ja dabetan shinain yuinamekin:

–Bai tanabidankin Diosun jancha yuixunikabun yusini nuku unanmakin nuku yusianyan nun juinti shinan chankankunkidanxuki, ¿chanimamen? iki yuimetan³³ ma meshubiaken ana janu ikatsi ikama benibidani Jerusalén anu jawaida chintunbain Jesúsun 11 tsuma kushipayabu inun jatube jawen tsumabu betsabu ichabu anu jatu anu jikitushitan³⁴ januxun jabu ichapabu yuikin:

–Chanimma ma besteanki, nukun Xanen Ibudan, ja Simón Pedroki nukukin uinmaxudan– iwanan, yui jatuki chaniaya

³⁵januxun jaska Jesús unandiamabia bai tanabainkin Jesúsun ja dabe jatube kakin yusinxu yuitan januxun misi tunkexun jatu inain anu atimas xabakabi uinbidan jatu yuiaibun

**Jesús bestenkaina jawen tsumabuki
nukuniaki, na janchadan
(Mt 28.16-20; Mr 16.14-18; Jn 20.19-23)**

³⁶jaskaxu yui menediamma janchan wainbun Jesús jawaida dami nashui itan jatu jancha wakin yuikin:

–¿Jaska man unanumamen? Ma en juaki. Dateyamakanwen– jatu wabia³⁷ datekin shinankin yuikin: "Nadan, ¿yushinmenkain?" ikin uinkin shinainbun³⁸ Jesúsun ana jatu yuikin:

–¿Jaskai mesei datei man e ikanai? ¿Man juinti kushimen?– iwanan,³⁹⁻⁴⁰ jawen meken inun jawen tae jatu uinmakin yuikin:

–En tae inun en meken uinkanwen, jabia en eakidan. Nami inun xau en jaya keska yushin jayaismaki.

Mekin ea unankanwen– jatu wa
⁴¹shinan chankanbiai bika tenekin
 ikunjaidawadiabumawen taexun Jesúsun
 ana jatu yukakin:

–¿Piti man jayamen? Ea inankanwen–
 jatu wa ⁴²baka xui inanbu ⁴³jatun bedubi
 pitán ⁴⁴yuikin:

–“Moisin yusini jancha inun Diosun
 jancha yuixunika betsabun yusini jancha
 inun Davidin jawen nawakin kenwanti
 jancha Salmoswen Dios yubakaniki, jau
 dasibi jaskaxanunan”, iwanan, yuinibú
 en mawadiama matu anuxun jabiaskadi
 matu yusinkin dasibi ekidi nakenenibú
 bebunkidi en matu yuikubainimaki–
 iwanan,

⁴⁵ja kenenibú una jau ninka
 pewanunbun ⁴⁶jatu yuikin:

–Ekidi kenenibú matu yuinun
 ninkakanwen. Diosun Katua Mesías
 medabenan yumantan mawa xaba dabe
 inun besti kaya ana bestenxanikiki.
⁴⁷Jaskawen taexun jawen kushipawen
 jatu yusinxankanikiki, jau jatun
 chakabu Dioskidi chakabumisbu jau
 jenetan jabun shinan betsa waibu
 Diosun buaxunxanikikiki. Nawa
 xukua tibi ninkaxanaibu yuini matun
 Jerusalén anuxun taewakin ⁴⁸na kakape

ekidi chanibaunxankanwen. ⁴⁹Jaska
 en Epan ea yununi keska wakin eandi
 en matudi yunuaii. Diosun jawen
 janchati kushipa datetima en matu
 yunuxanai binun ika na jabia Jerusalén
 anu jiweyuxun manakayukanwen.
 Diosun jawen kushipa nai anua matu
 inan bitan nawa dasibibu yusinkin
 taewaxankanwen– jatu watan

**Jesús jawen tsumabun bedubi Diosun
 aininikiaki, na janchadan**
(Mr 16.19-20)

⁵⁰jaskakunkainkin xaba betsatian
 Jerusalén anua kainkaini Betania anu
 Jesúz kakin jawen tsumabu iyuxun
 jawen meken sananxun jau Diosun jatu
 duawakubainxanun jatu yukaxunaya
⁵¹jabu jenemabainkin nai anu jawen
 Epan ainiaya ⁵²jatu jenebainai uin
 jawen tsumabun teskanbainbainxun
 Jesúz kenwantan benimajaidai
 Jerusalén anu ana chintunbidan
⁵³Diosun kushipa manakakin xaba
 tibi jawen Templo anuxun Dios
 kenwankubainibukiaki.

Jatiski, Teófiloon, na kakape en mia
 kene keyuxunxudan.

Lucas

KAKAPE JUANEN KENENIKIAKI

JUAN

Diosun jancha jawen Shinain Janchati
yuda kayabi kainikiaki, na janchadan

1 ¹Bawakin taewadiama Diosun
Shinain Janchati Epa Diosbe jiwea
jabiaska dabes Dios ipaunibukiaki,
niti ikamadan. Jakidi matu yuinun
ninkakanwen. ²⁻³Bai taei yuda
jayadiama jabias jawen Shinain
Janchati Diosbe yubakatan jabetan
dasibi damiwakin keyuniaki. Dasibi
damiwakin jabe paxkama jiwea jauma
Diosun jawa wadiama jakia jawen
Shinain Janchatibetan dasibi betsa
betsapa damiwanun ixun damiwakin
keyunibukiaki. ⁴Jaska inun, jawen
Shinain Janchati xaba keskatun chanima
jancha jiwekuankidi jatu shinanmai
⁵jubiaken chakabu shinankin yudabu
meshu medan nia keskabun chanima
jancha ninkaktsi ikama ja xaba
jiwemanika bextekin nemanun ibiakin
atidubuma inibukiaki.

⁶Janua jawen Shinain Janchatin
yusinkin taewadiama juni betsa jawen
kena Juan Diosun yunua ⁷jawen Shinain
Janchatikidi jau dasibibun ninkakin
ikunwanxanunbun bebunkidi jatu
yui juniki, Juanan. ⁸Jaskawen taea
Juanan, Diosun Shinain Janchatimaki.
Jakia ja chanima jancha jakidi jau jatu
yusinyunun Diosun Juan yununiki.

⁹Januxun xaba keskatun jiwekuankidi
yusin jatu unanmai ¹⁰mai damiwani
anu juu jatube jiwea jawen yusian jabun
jawan jancha ninkama jatu jawenawakin
damiwabiani Diosun Shinain Janchati
midimabun unanma inibuki. ¹¹Jaska
inun, Diosun Shinain Janchati jawenabu
anu juken jabia jawenabundi jawen
jancha ninkama jabun beya wama
danainbun ¹²jakia jatiditun jawen jancha
ninkatan ikunwakin beya waibun
Diosun Shinain Janchatin jau Diosun
bakebu ixanunbun jawen kushipa
jatu inankin jatu duawakin taewaniki.
¹³Jaska inun, Diosun jawen bakebu jatu
pepa wakinan, chutakin akama inun
yudabun shinanwen akama jakia Diosun
jawan kushipawen besti jawen bakebu
wakin jatu jiwekuinmakin taewaniki.
¹⁴Janua jawen Shinain Janchati yuda
kayabi jayanun ika ainbu medanu
naneima kaian Diosun bake bestichai
ewatan nuku anua yumetan ewani jiwea
jawan Epa Dios itsa kushipa duapajaida
nun uinpauniki, nuikipa jaya inun chani
chakatima jancha jayadan.

¹⁵Jaska inun, jawen Shinain Janchati
Juanen Jesús unantan Juan ninkai beabu
jancha kushipawen jatu yuikin:
–“Ja dukun jiweniwen taea ea kachu
kainbiaimaxun ea binuyuxanikiki,
xanen ibujaidakinan”, akin jaskakidi en

matu yuikubainaii– akin Jesúskidi Juan janchaxunkunkainiki.

¹⁶Diosun dasibi pepa nuku inantiduwen taea nukuwen nuikin nuku tibi jawen aka kushipa tibi betsa betsapa nuku inan akeakemiski, chakabu katumamadan.
¹⁷Jaskawen taexun bebunkidi Diosun Moiséswen jawen jancha nun ja chibanan nuku yununiki. Jakia chanima jancha jaya inun jawen nui bechipainameti kayabi juidan, janua nun binun Jesucristowen taea besti juaki. ¹⁸Ja inun, natian tsuabunda Dios uinakamabiaken jawen bake bestichai Diosbe janchanameai Dios ja keskajaidadi jawen Epabe ketaxamexun xabakabi jatun besti Dioskidi nuku unanmakubainiki.

Nashimanika Juanen Jesúskidi pepa yuikubainikiaki, na janchadan
(Mt 3.11-12; Mr 1.7-8; Lc 3.15-17)

¹⁹Jaska Nashimanika Juanen Jesúskidi jatu unanmani en matu yuiae ninkakanwen. Jerusalén anuabun Juan kakaya judio mae xanen ibubun jau Juan yuka tapintanunbun Diosbe nukunabu janchaxunikabu inun Jacobun bake Levín baba betsabu jabu yunuabu Nashimanika Juan anu bexun jatun xanen ibubu yukaxunkin:

–¿Miadan, min tsuamen? –Min Mesías Cristomen?– akabu ²⁰jatu padanma yuikin:

–En ea Mesías Cristomaki– jatu wa

²¹–Min tsuadaka, Dios janchaxunika Elías kanidan, ¿min jamen?– akabu

–En jamadiki– jatu wa

–“Diosun jancha yuixunika kushipa ea keska juxanikiki”, akin Moisin yuinidan, ¿min jamenkain?– akabu

–En jamadiki– jatu wa

²²–Jabun nuku yunushinabu jadi nun jatu yuitanun, miadan, min tsuamenkain nuku yuiwe, mikidi nuku yunushinabu nun jatu yuitanunan– akabu

²³januxun Nashimanika Juanen jatu yuikin:

–Jaskakidi Dios janchaxunika Isaíasin keneni keskadan: “Janu tsua jiweabumanuxun jancha kushipawen jatu yuikin: ‘Nukun Xanen Ibu nai anua matuki bayui ma kemaikiki. Matun juintinin shinan pewadikanwen, bai kayatapia keska wakinan’”, akin kenenidan, en jaki– jatu wa

²⁴⁻²⁵janu jau Juanbe janchatanunbun fariseobun jatu yunushinabun ana yuikin:

–Min Mesías Cristomadaka. Min Elfasmadaka. Min Diosun jancha yuixunika betsamadaka. ¿Jaskakenan, jawawen taexun daka min jatu nashimakubaini ikai, miki chiti ikabu jatu wakinan?– akabu

²⁶⁻²⁷januxun Jesúskidi Juanen jatu yuikin:

–Chanima jenewen besti en jatu nashimakubainaii. Jamen ea dukun en kainbianiken ja juni betsa matube jiwebia man unandiamadan, jawen kushipawen ea binujaidaki. Jaskawen taea eadan, jawen tsumapan jawen daya axunmis keska wakin en jawen jawaumajaidatun ean medabewakin jawen bichi tae mexpun tsitsauxun en pekaxuntidumaki– ikin ²⁸Jordán jene kexa betsaudi Betania anuxun Juanen jatu nashimakubaini jadia jaska janchakin yuikubainiki.

Jesús Diosun bakeki, akin Juanen jatu unanmanikiaki, na janchadan

²⁹Janua uxashini bestentan maniabun Jesús juai chaima bechitan metukin Juanen jatu yuikin:

–Uinkanwen. Dios daewakin jatun chaxawan bake menumisbu keska wai yudabu dasibibun chakabu jatun jatu buaxunkin Dios nuku daewaxunti ma juikiki. ³⁰Jakidi jabias matu yuinun,

ninkakanwen: “Ja dukun jiweni ea kachu kainbianixun ea binuxanikiki, xanen ibujaidakinan”, iwanan, en matu yuishinaki.³¹⁻³⁴ Ja inun, man Israelbun ja juni unankin man shinan betsa waxanunbun matu unanmakin jenewen nashimakin en matu taewaimaki, ja juni eandi en unandiamabiadan. Jakia ea yununitun ea xabakabi yuikin: “Ja juniki Yushin Pepa jaki butua jaki matsaume min uinxanaidán, jabiatundi Yushin Pepawen jatu nashimaxanikiki”, ea washinken chanima ja juniki nai anua deiwan keska Diosun Yushin butua ja juni mamaki bashikuai en uinmaki. Jaskawen taexun: “Ja juni Diosun Bakeki”, akin en matu yuiiai– akin Nashimanika Juanen jatu yuitan

Jabu dukuntun Jesús chibankin taewanibukiaki, na janchadan

³⁵janua ana uxashini Nashimanika Juan jawen tsumabu betsa dabebe nixun

³⁶Jesús kauanai uinkin nuku yuikin:

–Uinkanwen. Jatun Dios sinatai daewanikaki, chaxuwan bake menumisbu keskadan– nuku wa

³⁷ninkatan ja dabe nun Juanen tsumabia Jesús chibantianun ika shinain nun kaya³⁸niti itan dabekekaun nuku uinkin yukakin:

–¿Man jawa benayuai?– nuku wa
–Yusinaan, émin jani jiwea ikai?– nun wa

³⁹–Ebe kaxun uin bukanwen!– nuku wa jabe kai janu jiwea anu nun jabe jikia ma 4:00 badi jikitushitan nun jabe janchaya⁴⁰⁻⁴¹ Nashimanika Juanen jancha ninkatan Andrésin Jesús chibantaina jabe janchatan jawaida jawen betsa Simón Pedro yuinun ika benabaunkin bechitan yuikin:

–Mesías Cristoki nun nukuxuki. Min tsidi uin kawe– itan⁴²januxun Jesús anu Andrésin Simón iyua januxun Jesúsun uinkin dais butan butankin yuikin:

–Miadan, min Juanen bakeki. Min Simónbiaken en mia kena dabeya waii. Cefas wakin mia kenaxankanikiki– aniki. Cefasdan, nawan janchawenan, Pedroki. Pedrodan juni kuin janchawenan, Mishki Ewapaki.

Jesúsun Felipe inun Natanael katunikiaki, na janchadan

⁴³Ana uxashini Galilea mae pakea anu Jesús kanun ika yubakashina kai Felipeki nukutan Jesúsun yuikin:

–Tapin ebe kakunkainwen– aka
–Peki– ikaini⁴⁴ja Felipen maedan, Betsaidadan, jabianudi Pedro inun Andrés jiweiñaken Galilea anu nun Jesúsbe kai nun jikiken⁴⁵Felipen jawen jaibu Natanael benakin jawen jiwe anu kaxun yuikin:

–Baa, mia yuinun, ea ninkawe. Jakidi Moisin inun Diosun jancha yuixunikabun kenenibudan, nun ma jaki nukushinaki, Josén bake Jesúsdan. Jawen mae Nazaretki– aka

⁴⁶Natanaelin yuikin:
–Ja mae Nazaret anua tsua duapa taxnitidumaki– aka

–Ebe kaxun ibubis uinkin unanyuwe– atan iwea

⁴⁷Natanael Felipebe juai uinkin Jesúsun nuku yuikin:

–Uinkanwen, ja Israelin baba kayabitun tsua jatu padainsmadan– nuku wai

⁴⁸jawen jancha ninkabidan Natanaelin Jesús yukakin:

–¿Jaskakin janixun ea uinmisxun min ea unain?– aka Jesúsun Nataniel yuikin:

–Felipen mia kenadiama miban higuera ji naman tsauxun min shinain en mia unanxuki– aka

⁴⁹ikunwakin yuikin:
–Yusinaan, chanima min Diosun bake kayabiki, Israelbun xanen ibu dasibi binuadán– aka

⁵⁰⁻⁵¹Jesúsun ana yuikin:
–“Miban higuera naman tsauxun min shinain en mia unanxuki”, akin

en mia yuiaiwen taexun min ea ikunwaii. Ana pepa betsa shadabu en binumai min ea uinxanaii- iwanan, ana yuikin: –Chanimá en matu yuiaii. Nai bepemanai anua en matun Juchi Kayabi Iyua ea anu Diosun nai tsumabu inabainbaini butubidanbidanaibu uinkin Diosun kushipa man uinxanaii- akin nuku yuники, Jesúsun.

**Unanmati dami Jesúsun
taewanikiaki, na janchadan**

2 ¹Jesúsun ja dukun damiwakin taewani matu yuinun ninkakanwen. Ana uxashini Caná mae Galilea anu ainyain nauaibu anu jatu medabewai Jesúsun ewa juken ²nun Jesúsun tsumabu Jesúsbe nukudi iabu ³uva vino akin netsuaibun jawen ewan ja dukuntun unankin Jesús yuikin:

–Kukaan, vino ma netsuabuki. Ana jatu bema waxunwen- aka Jesúsun yuikin:

⁴–Ewaan, mia inun eanan jaskas nun shinanmaki. Diosun ea jatu unanmaxanaidan, idiamaki- aka

⁵jawen ewan ja jabun jatu pimai yuikin:

–Matu yunuayadan, axunkanwen- jatu wa ⁶Dios pexuni pidiamma judiobu jaki mepanumisbuwen taea dintu betsa anu mishki shumuwan 50 kasmai 70 litro unpax mata wati tiibus 6 shumuwan xaka sedea ⁷Jesúsun uinkin jatu yuikin:

–Ja 6 mishki shumuwan tibiki unpax manekin mata wakanwen- jatu wa shumuwan tibi mata wakin bupakemaibun:

⁸⁻⁹Jesúsun ana jatu yunukin:

–Natianan, kenchawen beaishtabain ja jatun jatu besimai xanen ibu anu buxuntankanwen, jau menunan- jatu wa ma damia unankin ja dayakapabu betsan beatan buxuanbu jaskatan unpax damixu unanma ja jatun jatu besimai xanen ibun metan jania bekanzu

unanma ja xanen ibun juni ainyain kenaxun ¹⁰yuikin:

–Nawai taekin jabu dukun vino pepa jatu ama netsui bechantu bestia benimaibun ana pe bexmas jatu amamisbuki. Jakia mianan, pepajaida aduxun ikis min jatu taxnimaxunaii- aka jatu inanbaunaibun ¹¹jaska wakin Caná Galilea anuxun dami atimaska taewakin Jesúsun jawen kushipa nuku uinmakin taewayawen jawen tsumabun eskadabes ikunwankin nun taewanani.

¹²Januxun jatu jaska waxuntan Cafarnaúm anu jawen ewa inun jawen betsabube Jesúsbe nun bai kashian jiweyuabun

**Templo jemaintin anuxun yumetsui
inananaibinu Jesúsun bechitan jatu
nichinikiaki, na janchadan**

(Mt 21.12-13; Mr 11.15-18; Lc 19.45-46)

¹³janua Pascuatian janu nai tsuman detekin debu wanikatun nukun xenipabu dunkebaini shinain besinun ika judiobu mae tibi anua ma bea kemaibun Jerusalén anu Jesúsbetan nun uin ka

¹⁴januxun Templo jemaintin anuxun ina awa inun, chaxuwan inun, deowanen Dios kenwakin menu keyuti juni betsabu inananaibinu inun pei biananain tsauabu Jesúsun bechitushitan ¹⁵⁻¹⁶jaska waibu jatu uinkin bechipaiama bichi kapikunkin mayatan jabu inayabu jatu kusha kusha atankin Templo jemaintin anuadi jatu nichin keyukin janua pei biananainbudi jatun tapu nadabekin pei jexe jatu sa akankin deiwan inananaibinu yuikin:

–Matun inabu inun matun mabu dasibiya nenua taxnidibainkanwen. En Epa Diosun jiwedan, janua ana jamapai inananañamakanwen- jatu wa datei kaiin xadakabainbainaibun

¹⁷Jesúsun jaska wai uinkin jaska nukun xenipabu Davidin Jesúskidi

yuikin: "Dios kenwanti jiwenen taea jawa dateama naxukui sinatakin en yaushixanaii", akin keneni atimas nun shinanyan

¹⁸judio xanen ibubu bexun Jesús yukakin:

–¿Min jaska waxudan, pemen? Ja kushipawen min jatu akaidan, jawen nun mia unanti wanun jawada dami atimaska wakin nuku axunwen– akabu

¹⁹junea janchawen jatu yuikin:

–Na mishki jiwe man tekekin keyuadan, xaba dabe inun besti kaya ana en benixanaii– jatu wa

²⁰jaska janchaiwen taexun mishki jiwe shinankin xanen ibubun Jesús ja akin yuikin:

–46 año dayakunkainkin na Templo menediabumaki. ¿Jaska watan xaba dabe inun besti min ana benikin bena watidumen?– akabu ²¹jakia jawen yuda jiwe keskakidi Jesúsun shinanki. ²²Janua Jesús mawa ana bestenshinken: "Xaba dabe inun besti kaya ana en benixanaii", jatu wani nun shinainwen taexun jakidi jaska tibi kenenibu inun Jesúsun nuku yusinidi shinankin nun ikunwaniki.

²³Janua Jerusalén anu jabias Pascuatián dami atimaska wakin jawen kushipa Jesúsun jatu unanmaiwen taexun yuda ichapabun uinkin ikunwankin taewaibun ²⁴⁻²⁵jakia jaska yudabun jakidi shinankin jawada akaiwen besti benimaibu Jesúsun jawa jatu unanmayuama yudabun shinan mesten jayabuma dasibi jatu unainwen taea: "En Mesías Cristoki", ikin bebunkidi xabakabi Jesúsun jatu unanmayuama iniki.

Ana kain benatikidi Jesúsun Nicodemo yusinikiaki, na janchadan

3 ¹⁻²Janua judiobun ichati jiwe xanen ibu betsa fariseo Nicodemo meshu

medan june Jesúsbe janchai kaxun yuikin:

–Yusinaan, Diosun mia medabewamadan, min dami atimaska atidumaki. Jaskakenan, Dios anua yusinanan, min miaki, en unanan– aka ³Jesúsun ana yuikin:

–Chanima en mia yuiaii. Tsuada ana kain benama Dios xanen ibuai anu ka jiwtidumaki. Jakia ana kain benatan Dios xanen ibuaibe jiwxankanikiki– aka

⁴Nicodemón Jesús ninkama ana yukakin:

–¿Jaskai yuda ewabia jaskatan ana kaintidumen? ¿Jawen ewan baken nantiki nanetan ana jaska jikikaintani ana kaintidumen?– aka

⁵⁻⁶januxun Jesúsun yuikin:

–Jaskamaki. Chanima en mia yuiai ninkawe. Yuda kayabi medanua kaianan, yuda kayabi ikubainmisbuki. Ja inun, Yushin Pepatun kain benamatan jatuki jikiton jatu yaushikin mekekubainmiski. Ja inun, jene inun Yushin Pepawen nashiabumadan, Dios xanen ibuaiki man nukutidubumaki. Jakia ja dabewen pepakubainaibu jaki man dasitidubuki.

⁷Jaskaken: "Jau dasibibu ana kain benanunbunwen", iwanan, akin en mia yuia shinain: "¿Jaskada betsajaidamen?" iki jabaa! iyamawe. ⁸Jaska inun, niwe jaikaimas xunku iki danka imiski. Jakia jawen jui ninkakin janizada juai inun janida kai min unanmaki. Yushin Pepatun tsuada yuda betsá bera waidan, jaska keskadiki– aka

⁹Nicodemón ninkai tapianmajaida ana yukakin:

–¿Jaskatidumen, na jaska min yuiaidan?– aka

¹⁰–Israelbu yusinbiamis ¿jaskakin en mia yuiai min ninkamamen, tapinbainamadan?– iwanan ¹¹–Chanima en mia yuiaii. Eskaki, mia yuunun ninkawe. Nukun uinkin inun

tapinmisxun Nashimanika Juan inun ean nun matu yusinmiski. Jakia nukun jancha danankin nukukidi xabakabi man shinanbumaki.¹² Jaskaken yudabukidi en matu yuikubainai en jancha man ikunwanbumawen taexun Dios anua jamapaikidi en matu yuijadi man ikunwantidubumadiki.¹³ Jaska inun, Dioskidi unantanun ika Dios anu tsua inatidumaki. Jakia eadan, matun Juchi Kayabi Iyuatun matu unanmai Dios anua jua en taxniniki.¹⁴⁻¹⁵ Jaska inun, Diosun nukun xenipabu yusinkin unanti wamanikidi mia shinanmanun ninkawe. Janu tsua jiweabuma anu Moisin jatu iyuima janus nukun xenipabu jiwea akeakeakin jawen jancha ninkabumaken Diosun jatu kupinun, iwanan, dunu midima ichawaxun jatu pima isin teneaibun Diosun Moisés yunua mane damiwakin dunu itsa waxun jiki netanxun nichian tsuanda uinkin ikunwain xuxanibuki. Jabiaskadi wakin Diosun ea yubani keyukin jiki matun Juchi Kayabi Iyua ea mastanxun ea benitan ea nichinxankanikiki. Jaskawen taexun tsuabunda ea ikunwankin shinain ebe jiwxankanikiki, niti ikamadan- iwanan,

Yudabu dasibiwen Dios nuijaidakin Jesús yunua taxniniaki, na janchadan

¹⁶ Jesúsun ana Nicodemo shinanmakin yuikin:

-Yuda betsa betsapa dasibi jiwebaunabuwen nuijaidakin Diosun eska shinantan ea jawen bake bestichai yununkin taxnimaniwen taexun tsuabunda ea ikunwankin jawen jiwea kayabi benutima bitan mawa kayabiamma Diosbe jiwekuinxankanikiki, ikibi ikidan.¹⁷ Januxun jau ewen taexun yudabu jatu kupixanun, iwanan, Diosun ea jawen bake bestichai ea taxnimama iniki. Jakia Dios daewakin jau ewen dabanan

matun chakabu buaxunkubainxanun, iwanan, Diosun ea jawen bake bestichai taxnimaniiki.¹⁸ Jaskaken tsuanda Diosun bake ikunwainbu Diosun kupiamaki. Jakia tsuanda jawen bake bestichai ikunwanmawen taexun Diosun jatu danantan kupixanikiki.¹⁹⁻²⁰ Yudabu jamapai chakabuwen kemui bechipaikin jenekatsi ikama Diosun jancha xaba keska dananmisbuki. Januxun jatun shinan chakabuwen taexun Diosun jatu kupinun, iwanan, jawen jancha xaba keska yunukin taxnimaniiki. Jaskawen taexun tsuan jawa ninkama jawen bake danankin chakabuwen besti kemumisbu Diosun jatu kupijaidaxanikiki, niti ikamadan.²¹ Jakia tsuabunda Diosun jancha xaba keska ea ninkatan betsabu unanmakin jancha chanima yusinkubainmisbun jabun Diosun shinain keska chibankin ea ikunwanmisbuki- aniki.

Nashimanika Juanen Jesúskidi ana jatu shinanmanikiaki, na janchadan

²² Jerusalén anua jancha menetan Jesús nukube Judea mai pakea anu kaxun nuku yusianyan betsabun Jesús janchai ikunwankin taewaibu nun jatu nashimakubainaya²³⁻²⁴ janu jaskaitiandi Juan achixun bichidiabuma janu Jordán jene netsuisma anuxun mae betsa Salim dapi Enón anuxun Nashimanika Juanen jancha ninkanun ika beabu jabun jawen yusian ninkatan jatun shinan betsa wakin ikunwainbu jatu nashimadiakubainaya:²⁵ “Ja beya unpaxwen chukikin Dios xabakabi uinmai nun pepamiski”, ikin shinain judio yusinan betsabe Juanen tsuma betsabu jatun beyawen taea ja iki yuinamei menetan²⁶ Juan yuinun ika jawen tsumabu buxun yuikin:

-Yusinaan, Jordán jene kexa betsaudixun nuku yusinkin jakidi

min nuku kenwainmatunan, jatundi dasibi jawenabu wakin jatu nashimaya ninkatan bechibain jadi chibankanikiki-akabu

27Juanen jatu yuikin:

-Juni betsa Diosun yunuama xanen ibu kayabi itidumaki. ²⁸Jerusalén anua bexun ea yukaibu xabakabi chanima jatu yuikin: “Eadan, en Cristo Mesíasmaki. Jamen eadan, bebunkidi jakidi en chaninun Diosun ea yununiki”, akin en jatu yuiai man ninkaimadan, shinankanwen. ²⁹Ja inun, junin chipash bitan ainwanan, ja besti jawen beneki. Jakia jawen bene benimai jawen ainbe janchai ninkatan jawen jaibuabudi benimachakayamamisbu keskai eandi Jesús jaskai ninkatan en benimajaidadaii. ³⁰Jaska inun, jawen kushipawen ea binuin Jesús kushipayam janua eadan, en kushipa bextekei en bexmasaii- iwanan,

Juanen Jesúskidi xabakabi jatu yusinikiaki, na janchadan

³¹⁻³²ana jabias shinanwen Juanen jatu yuikin:

-Tsuada mai anua baadan, mai anu jiwxun jaska dasibi mai anuadi tapin janchamisbuki. Jakia ja junidan, Dios anua taxninixun yudabu dasibi binukin Dios anua ninkakin uintan jaska chanibiyaya tsuan jawa ninkama danankanikiki. ³³Jakia tsuabunda jawen bake dananma “Dios chani chakaismaki”, ikin jawen jancha mestenwanmisbuki. ³⁴Januxun jawen bake yunukin jawen Yushin Pepa keyuisma inankubainmiswen taexun Diosun bake ja yunitun jawen jancha yuimiski. ³⁵Epa Diosun jawen bake bechipaikin jau dasibi ibuai xanen ibuxanun jawen kushipa dasibi inaniki. ³⁶Jaska inun, tsuabunda jawen bake ikunwankin chibainbu jiwekuinxankanikiki, ikibi

ikidan. Jakia jawen bake danankin ikunwanbuma jatu danandiakin Dios jaki sinatakin jiwekuinmama jatu kupikubainxanikiki, jiwe chakamakinan-iniki.

Samarianawa ainbube Jesús janchanikiaki, na janchadan

4 ¹⁻²Juan binunkin Jesúsun yuda ichapa jaki chiti ikabu wakin jatun jatu nashimamabiaken nun jawen tsumabun jatu nashimapakebiaya ichati jiwe xanen ibu fariseobun ninkai jaki sinataibu Jesúsun ninkatan jatube ja ikatsi ikama ³⁻⁴jaska ninkabaini nukubetan Judea jenebaini Galilea anu ana kai Samaria mai pakea dunkemisbu ana janu kama dainbainkin napaibainun ika kai ⁵⁻⁶maewan betsa Sicar dapi Jacobun jawen bai jawen bake José yununi anu unpax bana kini anua dispiwen biti Jacobun jatu pukinmaniki kemai ma badi manananbi kemaya jin iki unpax bana kini dapi Jesús tsauken ⁷⁻⁸Sicar maewan anua piti bixuin nun kaken Samarianawa ainbu betsa juxun unpax biai Jesúsun yukakin:

-Min unpax biaidan, ea amawe- aka
⁹judiobu Samarianawabube

janchaisbumawen taea e itan ainbun yuikin:

-En Samarianawaki. Miadan, min judioki. ¿Jaskakin min ea unpax ea akai?- aka

¹⁰Jesúsun yuikin:

-Jawada Diosun mia inankatsi ikai inun tsuanda mia unpax yukai unankin min ea yuka unpax netsuisma en mia inankeanxuki- aka

¹¹⁻¹²ainbundi yuikin:

-Xanen ibuun, na unpax kini pukinkinan, nukun xenipabu Jacobun anixun jawen bakebu inun jawen inabubetan apaunibudan, nuku jenexunbainiki. Jaska nuku

axunbainiwen taexun nukun xenipabu Jacob kushipadan, ćmin binuanmen? Ja dikabi na kini keyatapajaidaki. Shumu inun dispi chaipa min jayamaki. Unpax netsuismadan, ćjania jawawen bitan min ea inantidumen?– aka

¹³–Tsuabunda na unpax kini anua biwanxun atan jawenchains tetsusinkin ana manuxankanikiki– iwanan, jancha juneawen ana yuikin: ¹⁴–Jakia tsuabunda unpax en inain atanana, ana tetsusini manuama ixankanikiki. Jabu tibi medan chacha unpax netsuisma keskatun jatu jiwekuinmaxanikiki, ikibi imakinan– aka

¹⁵ainbun ninkabiakin Diosun Yushin Pepakidi janchai unanma ana yukakin:

–Xanen ibuun, ana tetsusini unpax manuama en ana unpax bi bika tenekidankidanyamaxanun ja unpax netsuisma min ea yuiaidan, menan ea inandiwe– aka

¹⁶–Peki. Jaskakenan ja dukun min bene iyutanwen– aka

¹⁷–En bene jayamaki– aka

–“En bene jayamaki”, ikin min chanima yuiaii. ¹⁸Ja dukun 5 min beneyabiakunkainmis natian juni betsabe min jiweadan, chanima min bene kayabimaki– aka

¹⁹ninkai e iki teku iki juinti metexeketan yuikin:

–Xanen ibuun, min Diosun jancha yuixunika en mia ninkaii. ²⁰Na mati anuxun nukun xenipabun Dios kenwakin taewapaunibuwen taexun nun Samaranobun jabianuxundi nun kenwandiamisbuki. Jakia: “Jerusalén anuxun besti jau Dios kenwanunbunwen”, ikin man judiobun yuimiski. ćJadatu kenwanti kayabi pemenkain? ea yuiwe– aka

²¹–Ainbuun, ea ninkaidawe. Na mati inun Jerusalén anu kama jania kama man Epa Dios kenwanxanai ma

kemaikiki. ²²Jakia unandiamabia Epa Dios man kenwanmiski. Jamen nun judiobu anu Dios medabenen juxanaiwen taexun unankin kaneama nun Dios kenwan kayabimiski. ²³⁻²⁴Diosdan, yushinki, yuda kayabimadan. Jaska inun, jawen Yushin Pepatun jatu medabewakin shinanmaya Diosun yuini chanima unankin ikunwan kayabixanaibun Epa Dios duawakin kenwanxankanikiki, benimawakinan. Jaskawen taea na jabiatian ma jaska Diosun bechipai chanima man kenwakin taewaxanai ma taeikiki, Epa Diosun jawen Yushin Pepatun medabewayadan– aka

²⁵ainbun yuikin:

–En unaiin, ja Mesías Cristo juxun dasibi nuku unanmaxanaidan– aka

²⁶Jesús yuikin:

–Na jibia en mibe janchaidan, en jabiaki– aka

²⁷jaska watanayas nun jawen tsumabu nidi itushikin Jesúis ainbube janchai bextetushi e itan:

–¿Jaskai ainbube janchaimenkain? ¿Jawa yukai jabe janchai ixumen?– ikin nun yukatidububia nun jawa yukabumaken ²⁸⁻²⁹ainbu jawen shumu jenebaini jawen mae anu kaxun yudabu yuikin:

–Ebe kaxun uin bukanwen. Dasibi en ipauni ea yui keyuxuki, Mesías Cristomenkainan– jatu wa jawen jancha ikunwakin ninkabidani ³⁰jatun mae anua dasibi Jesúis anu bei natsekebidani taaibun

³¹ja jaskaibun nun jawen tsumabun Jesúis yuikin:

–Yusinaan, nun mia piti bixuntanxudan, menan pidiwe– nun akanwan

³²–Piti betsa man unandiamen jayaki– nuku wa

³³yuinamei:

–Janixun juni betsan piti bexun ćpima ikimenkain?– nun ikaya

³⁴Jesúsun nuku ana yuikin:

–Jatun ea yununitun shinan en jayawen taea jawen daya keyui en kushipamiski, yani wa keskaidan ³⁵–iwanan, ana nuku yuikin: –Matun bai man banashina uinkin yuikin: “Ana uxe dabe inun dabe ka bimi jushian nun tsekaxanaii”, iwanan, man shinanbiaya ana matu yusinun ninkakanwen. Diosun bai kaiskin uinkanwen. Ma janu ikunwainbu ichawati peki. ³⁶Tsuabunda jatu ichawakin jawen manakuti pepa bikanikiki, jatun jiwea ikibi ika bikinan. Jaskaken tsuabunda miban bana bimi jushiain jatu tseka keska waibudan, jabudi benimakanikiki. ³⁷Jaska inun, juni betsan banaima juni betsadi juxun tsekamiski, iwanan, nun yuimisdan, chanima janchaki. ³⁸Jaska inun, janiada dayakin Diosun jancha banaimabu ikunwainbu man ichawa bestinunbun en matu yunuxanaii. Jaska inun, betsabu dayai taemabun natiandi matundi jawa bika teneama ichawa bestikin man keyuxanaii, jatube benimakinan– nuku waya

³⁹januxun ainbun jatu yuiaiwen taexun jawen mae anuxun Samarianawabu ichapabun ikunwain Jesús anu ⁴⁰bexun uinkin yuikin:

–Nukuki bayuwe– akabu januxun Jesús yusin uxa dabei jatu anu bashikua ⁴¹jawen jancha ana ichapabun ikunwankin taewakin ⁴²ainbu yuikin:

–Ja dukun min jancha besti ninkatan mia chibانبaini kaxun nun uinshinaki. Janua chanima kayabi ibubis nukunmebi jawen janchadi ninkatan Jesúsun yudabu dasibi Mekenika Mesías Cristodan, natian nun ikunwaiin– akabu

**Gobiernobe dayanika xanen
ibu bexmastun bake Jesúsun
xuxawanikiaki, na janchadan**

⁴³⁻⁴⁴januxun: “Diosun jancha yuixunikadan, jawen mae anuxun

yusianyan jawenabuns kenwainsbumaki”, imisxun Jesúsun jamebi jatu kenwanmakatsi ikama uxa dabetan janua ana kai ⁴⁵Galilea mae pakea anu jikia Jerusalén anu Pascua nawai besiabutian jabun uin kaxun Jesúsun dami atimaska akai uinshinabuwen taexun ikin pewa wani jaki benimajaidakubainaibun

⁴⁶januxun Caná mae Galilea anuxun unpax dami waimanu Jesús ana chintunkain jikiaya jabatiandi Herodesin ja dayaxunmis xanen ibu betsan mae Cafarnaúm anua jawen juni bake isin teneaya ⁴⁷Jesús Judea anua Galilea anu ana chintunkidan jikiai ninkatan janu kaxun uinkin ea akin yuikin:

–Yusinaan, en juni bake mawakatsis ikikiki. En jiwe anu ebe kaxun ea xuxawaxunyuwe– aka ⁴⁸Jesúsun yuikin:

–Matunan, jawen unanmati dami atimaska en akai uianma man ea daki ikunwanbumaki– aka

⁴⁹jawen bakewen nuimanun, iwanan, Jesús daewakin yuikin:

–Xanen ibuun, jaskamaki. Janun en bake mawanun jawaida ea xuxawaxuin kawe– aka

⁵⁰jawen nuikin Jesúsundi yuikin:

–Nenua chintunkaini min jiwe anu kadiwe, min bakedan, mawama jiweakidan– aka ja junin Jesúsun jancha ikunwanbaini jawen jiwekidi kai ⁵¹janida bai puchinin uxashini jawen jiwekidi kaya unudiadi jawen tsumabu bei jaki nukuxun yuikin:

–Min bakedan, ma ana jiweaki– atushiabu

⁵²ninkatan jatu yukakin:

–¿Jatian jaskai xuxai taeshinamen?– jatu wa

–Uatian ma badi kapukeaya a la 1:00 jawen yuna mainshinaki– akabu

⁵³jabianudi: “Min bake mawama ana jiweaki”, Jesúsun ashian jabiaskadi

nakushxunaibuwen taea jikitushitan jatu yuia jawenabubetans Jesús ikunwanibukiaki.

⁵⁴Na jaska ana ja kachu juni bake xuxawakinan, tsuan jaska watiduma Jesúsun akinan, Judea anua chintunkidan Galilea anu jikitushishinxun ana jabianuxundi jaska waniki, jawen unanmati dami ja kachu ana akinan.

Betzatá kexa juni isin tenei babuni Jesúsun xuxawanikiaki, na janchadan

5 ¹Galilea anuxun Jesúsun juni bake xuxawaima ana betsation Jerusalén anuxun judiobun jatun beya betsa chibain besi nawaibu anu Jesús ana chintunkaini kakin ²⁻⁴januxun Jerusalén mae mishkiwen kenebaunibu janu jikiti xui jawen kenadan, Chaxuwan Kaintidan, ja dapi janu unpax uke medan jabai anu mishki pukinibu anu unpax tsaua jawen kenadan, Betzatádan, janu utai juindukunmisbu anu 5 utati anu bekunbu inun, tidibu inun, meyushkibu inun, isin betsa betsapa tenei maniabu anu mishki pukinibu unpax mata nai tsuman shubimaya: “Ea dukun ka en pukua en xuxatiduki”, iki maniabu anu ⁵juni betsa 38 año badi ka jawen yuda babuni ⁶daka Jesúsun bechitushitan badi ichapa ka isin teneai unankin yukakin:

–¿Min yuda xuxai min ana kushipakatsis ikai?– aka

⁷Jaa, Xanen Ibuun. Jakia nai tsumapan jene shubimai anu tsuan ea bakebain pukutimaken en unanxubida kaya isin teneai betsan ea maemai binukain jabu dukun pukukubainmisbuki?– aka

⁸jawen nuikin xuxawanun, iwanan, Jesúsun yuikin:

–Jaskakenan, benitan min dakati iabaini kadiwe– aka ⁹jawaida jawen yuda dakushi kayatan benikauan

sábado juindukuntitian dayatimabiaken jabiatiandi jawen dakati iabainaiwen taexun ¹⁰judio xanen ibubun yukakin:

–¿Jaskakin juindukuntitian min dakati iabainkin Moisin nuku nemani min chibankma kaneai?– akabu

¹¹–Ea xuxawaxutun yunukin: “Min dakati iabaini kadiwe”, ea wa en kai ikaii– jatu wa

¹²–¿Tsuán mia jaska yunuxumen?– akaibun ¹³janu ichabu anu Jesús jawaida nashui ikawen taexun jatun xuxawaxu unanma jadakidi jawa jatu yuitima nibai kaken ¹⁴chipu Jesús Templo jemaintin anu jaki ana nukuxun yuikin:

–Uinwen, ikis en ma mia xuxawaxuki. Jaskaken chakabu shinankin Diosun jancha ana kaneyamaxanwen, min ana jamapai betsa kaneaidan, jawada chakabujaidawen min ana pikutidukidan– aka

¹⁵ja juni jaska wa kaxun judio xanen ibubu jatu yuikin:

–Na en xuxaxu man ea yukadan, Jesúsun ea akakiaki– jatu wa

¹⁶juindukuntitian Jesúsun xuxawawen taea jaki sinatakin judio xanen ibubun Jesús danankin yuainbun ¹⁷jatun jancha ninkatan Jesúsun jatu yuikin:

–En Epa Diosun jatu medabewai dayakunkainmiski. Eadi jabiaskadiai en dayadiakunkainaii– jatu wa

¹⁸ninkatan june judio xanen ibubu yuinamei:

–Sábado juindukuntitian yununi kaneai bestimaki. Chakabu betsa wadiai jamebi Dios keskakatsis ikin yuikin: “Dios en Epaki”, ikin yuidiaikiki– ikaiwen taea jaki sinatajaidakin Jesús tenankatsis ichakayamaibun

Jawen Epan Jesús jawen kushipa inanikidi yusinikiaki, na janchadan

¹⁹Jesúsun ana jatu yuikin:

–Chanima en matu yuiaii. Diosun baken jawen shinanan besti jaska

atidumaki. Jakia jamapai shadabu Epa Diosun akai uinkin jabiaskadi wakin jawen bakendi adiatiduki. Jaskaken Epa Diosun shinanen ea jawen baken en adiaii.²⁰ Jaska inun, Epa Diosun jawen bake bechipaikin dasibi akin uinmamiski. Jaska inun, ana kushipajaidawen dami atimaska betsa betsapa jawen bakewen matu uinmaya uin man e ikunkainxanaii.²¹ Jaska inun, en Epa Diosun mawabu jiwemamiski. Jabiaskadi wakin jawen bakendi tsuabuda katutan jatu jiwekuinmadiatiduki.²²⁻²³ Jaskawen taexun tsuada Epa Diosun unanti waismaki. Jakia jau dasibibu jawen baken jatu unanti waxanun jawen kushipa inani jayaki. Jaskawen taexun jabias Dios kenwanmisbu keska wakin jawen bakedi jau kenwanxanunbunan. Tsuabunda jawen bake ma yununi kenwanbumadan jaskatan jawen Epadi kenwan kayabitidumaki.

²⁴Chanimma en matu yuikubainaii. Tsuanda ea ninka pewai jawen jiwea chakabukidi kai bexteketan jatun ea yununidi ikunwain jiwekuinkanikiki, ikisdan. Bikawen unanti wama mawa kayabi tenemama jiwekuainbu chakabuwen nun kupiama ixanaii.²⁵⁻²⁶ Chanimma ana en matu yuiaii. En Epa Diosun jawen jiwemati kushipa jamebi jayatun jabias ea inaniki. Jaskaken janu badi jawen jeneaitian mawabun en jui ninkatan bestein ana jiwexankanikiki.²⁷ En matun Juchi Kayabi Iyuawen taexun dasibi unanti kushipa en Epa Diosun ea yunudianiki, ean en jatu unanti wa akeakexanunan.²⁸ Na jaska jancha en matu yuiai ninkatan e iyamakanwen. Jaskaxanai matu yuinun ninkakanwen. Mawanibu dasibi en jui kushipawen en jatu kena ninkatan²⁹ mai anua janida jatu maiwanibu taxnibidanxankanikiki. Pepabu

jiwekuainbun jabu chakabumisbu ana bestenbiatan ana jawendi kai bika tenejaidai ikibi ixankanikiki- iwanan,

Jesúsun ibubis jawen shinanen aki juama inikiaki, na janchadan

³⁰Jesúsun xanen ibubu jatu ninkamakubainkin yuikin:

-Eadan, ibubis e iskaun en shinanen en ikamaki. Jakia jaska en Epa Diosun ea yunuai besti ninkatan en akubainaii. Jaska jawen pepa ea katumaidan, en jaska shinainwen en akama jakia jaska en Epan ea yununitun bechipaiai jaska yunuaya unanti wakin en axunkubainaii, kaneamadan.³¹ Emebi en keanyanan, en jancha chani ikeanaii.³² Jakia tsuabunda ekidi unanti watan ea kenwainan, jawen janchadan, pepaki, jaska unainan.

³³Nashimanika Juan Mesíaskidi man yukatanima chanima jakidi matu yuimaki.³⁴ Jau tsuabunda man ea kenwanxanunbun, iwanan, en jaskakidi shinanmaki. Jakia janu kupiaitian

Diosun jau matu kupiyamaxanun na kaka pepa en matu yuiai ninkatan man benuama ixanaii.³⁵ Jaska inun, Juan bin ewapa dekua ji ikin chaxawa keskaxun matu yusiai ninkai uxé eskadabes jawen yusian bechipai man benimakunkainimaki.³⁶ Jamen Epa Diosun ea yununidan, jawen kushipawen dami atimaska wakin en matu uinmaiwen taexun man ea unanti wakin tapintidubki, Diosun ea yununidan.

Jaskaken ekidi jawen unanmati jancha Juanen matu yusinmaki. Jakia eanan, atimaska betsa betsapa wakin jaska Juanen aisma akin en binuaii.³⁷ Ja inun, Dios man uianma inun jawen jui man ninkaismabiaken jabiatundi ea yununitun ea unankin jawen jancha jatu kenemani anuxun ekidi jatu yuini man uinkubainmiski.³⁸ Jakia matu anu Epa Diosun ea yununi man ea uinkin

ikunwanmawen taea jabiaskadi wakin jawen jancha uinkin shinain ja chibain man jawen jiweabumadiki.³⁹ Jaskaken matunan, ja chibain jiwei ikibi iti jancha kenenibu bechinun, iwanan, Diosun jancha yuixunikabun kenenibu anua man benakubainmiski. Jakia jabis kenewen ekidi yuinibu uinbiakinan,⁴⁰ jaskawen taea matun ea ikunwantan jiwekuinkatsi ikama man ea danaiin.

⁴¹ Jawada pepa ekidi yuiaibu besti en ninkakatsi ikamaki, yudabun janchawenan. ⁴² Jamen eanan, en matu unaiin, Dios nuimis keska jayama man ikunkainaidan. ⁴³ Epa Diosun kushipaya en jubianiken shinan betsatan man ea ninkamaki. Jakia juni betsa jamebi kenkin yuiai ninkakin man chibanmiski. ⁴⁴ Jaska inun, matumebi ibubis man yudabu kenwanma bestikatsis imiski, ja besti Dios jatu kenwanmamadan. Jaskawen taexun man ea ikunwantidubumaki. ⁴⁵ Jaska inun, Dios bebun nixun en matu ja axanai shinanyamakanwen. Jakia matun yusinan pejaida Moisés man ikunwain jatundi matu ja axanai shinain jakimayamaxankanwen. ⁴⁶ Ja inun, Moisin ekidi keneniben taexun Moisin jancha ikunwankin man ea ikunwandiaekeanaii. ⁴⁷ Jakia jaska jatun keneniben ikunwankin man chibanmadan, en janchadi man ikunwantidubumadiki-jatu waniki.

5,000 junibu Jesúsun pimanikiaki, na janchadan

(Mt 14.13-21; Mr 6.30-44; Lc 9.10-17)

6 ¹⁻⁴Janua jaskakainkin Pascuatian judiobu besikin pixanaibu ma kemaya Galilea Ianenwan, jawen kena betsa Tiberias Ianenwan anu Jesús nun jawen tsumabube pukexun jatu xuxawakin Jesúsun jawen unanmati dami atimaska betsa betsapa wai

uinshinxun ana uinkatsis iki main bukin midimabun nuku chibainbun mati mapebain tsaua nukube janchabaikin ⁵⁻⁶yudabu ichapabun chibandanabu uinkin jawada akatsi unanbiakin Felipe unanti wakin Jesúsun yukakin:

—Nabun jau pinunbun, ḋjania nun jatu misi bixuntidumen?— aka

⁷shinanma Felipen yuikin:

—Bestibu titbitun jau misi eskadabe pinunbun 200 día nukun daya peidan, damaki— aka

⁸jaskai ninkatan jawen tsuma betsa Andrésin, Simón Pedron betsan, yuikin:

⁹⁻⁵ misi inun 2 bakaishtha juni baken nuku inantidukiaki. Jakia jatibun na misi eskadabes pikin jawa yani watidubumaki— aka

¹⁰ Jesúsun jatu yuikin:

—Ja basiki jau tsuabaununbun jatu yunukanwen— nuku wa nun jatu yunua basi mamaki tsauí 5,000 junibu tsauabun ¹¹ja juni bake anua Jesúsun misi bitan Dios kenwantan misi tunkepakekin nuku inan ja tsauabu nun jatu inanbaunaya jabiaskadi wakin ja baka bitan tekepakekin nuku inandiaya nun jatu inan jati pikatsis ikin bitan ¹²pikin januxun yani wai pepeaibun Jesúsun jawen tsumabu nuku yunukin:

—Ja piti texe waibu jau

chakawayamanunbun

ichawabaukanwen— nuku wa

¹³ichawakin ja 5 misi pikin texeawabu 12 kuki nun mata waken ¹⁴jawen unanmati dami Jesúsun jatu axunxuwen taea uin yuinamei:

—Chanimá Diosun jancha yuixunika kayabiki, jaska Moisin yuinidan, ja junidan, jabiaki— ikubaunkin ¹⁵badikis xanen ibu wadinun, iwanan, achixun iyupananbu unantan jatu paxkabaini ana jawendi mati keyatapa mapebaini ja mesti jadi paxaxun shinanyui kaya

**Jesús ianenwan bemaki bepaikainikiaki,
na janchadan**
(Mt 14.22-27; Mr 6.45-52)

¹⁶ma badi jikiaya nun jawen tsumabu ianenwan kexa anu butukin Jesús nun xununbidana judiamaken ¹⁷xaxun inatan Cafarnaúm anu nun kai besusi pukenun ika nun kai taeaya meshujaidaken Jesús chintundiama ¹⁸niwenwan bekin ian buspu tsaubidanbidankin jatu teawa ¹⁹jaimanwen tuenshini ma chaiskabui 5 kasmai 6 kilómetro nunuxun Jesús ian bepaikidanai uin nun datejajdaya

²⁰nuku yuikin:

—En eaki. Ewen dateyamakanwen—nuku wa ²¹ninkatan benimakin yuikin:
—Nukube xaxun inayuwe— nun wa xaxun Jesús inaya niwewanen xaxu tsuma maianyan jawaida kain nun keti iniki.

**Yudabun Jesús benanibukiaki,
na janchadan**

²²Uxashini penaya ja yudabu ian kexa betsaudiabun shinain:

—Jabia besti xaxuwen jawen tsumabun Jesús iyuama bushianbuki, xaxu betsa jayamabiakenan— ikaibun ²³⁻²⁴ja jaskaibun maewan betsa Tiberias anua xaxu betsawen bei januxun Jesús
Dios kenwantan jatu pimashina anu keti itan Jesús inun jawen tsumabu jatu benakubidani jawa jatu bechiama ana jawendi butubidani jatun xaxuki inatan: “Cafarnaúm anu kashianmenkain. Jadi benanun bukanwen”, itan jaudi bui

**Jesúsun yudadan, misi
keskakiaki, na janchadan**

²⁵ianenwan pukebaini kexa betsaudia janu ichati jiwe anu jatube ichanua Jesús bechitushitan jabun yukakin:

—Yusinaan, ējatian min nekedi pukeshinamen? Ukedia nun mia benabidanaidan— akabu

²⁶Jesúsun jatu yuikin:

—Man unanti wakin kayatapinun dami jaskabiamma wakin en matu axuain uinshina ja tapinkin man shinanmawen taea jakia misi pikin yani washinxun jaskas pinun ixun man ea benai bei ikanaii.
²⁷¿Jaskai piti chapumiswen besti kemui man mapua ikanai? Jakia en Epa Diosun ea kushipa waniwen taexun jawen kushipa en matu inanxanai ja bestiwen kemui mapukanwen, jawen jiwekuin ikibi itidan. Jaskawen taexun jabia jawen unanmati wakin Epa Diosun ea matun Juchi Kayabi Iyu ea waniki, yunukinan— jatu wa

²⁸jabun ninka pewama Jesús yukakin:
—Diosun yunua axunkin chibankinan, ēnun jaska wakin benimawakin taewatidumen?— akabu

²⁹Jesúsun ana jatu yuikin:

—Dios benimawakinan, jatun ea yununi besti ikunwankanwen, en eakidan— jatu wa

³⁰⁻³¹betsabun ninkama ana yukakin:

—Min Dios anuadán, nuku ikunwanmakatsidan, ējawa jawen unanmati min nuku axunkin kayati wamatidumen, nun mia jawen taexun ikunwanunbunan? Nukun yusinan Moiséskidi mia yuinun ninkawe. Janu tsua jiweabumanu nukun xenipabu jatu iyuyama jadi jiweabun Dios anua maná dudu butea pikubaunibuki. Jaska wanibu kenekin: “Pimakin nai anua Moisin misi jatu pimakubaunpauniki”, iniken damiwakin ¿Moisés min binua ikai?— akabu

³²—Chanima nai anua misi butunidan, ja Moiséskidi man yuaidan, jatun jatu pimama iniki. Jakia en Epa Diosun jatu pimakubaunpauniki. Jakia ikis nai anua jabiaskadi wakin misi kayabi en Epa Diosun matu inankatsis idiaikiki. ³³Ja misi Diosun yudabu dasibi inankatsi ikaidan, ja nai anua butunitun jatu dasibi jiwekuinmatiduki— jatu wa

³⁴jawen jancha ninkabuma ana yukakin:

–Xanen ibuun, jaskakenan na misidan, jawenchains nuku pimapakexanwen– akabu

³⁵Jesúsun ana jatu yuikin:

–Jiwekuinmati misidan, jabia en eaki. Tsuabunda ea ninkakin shinan betsa watan eki chiti ikaibu en jatun yushin kushipa wa ana buniamma keska ixankanikiki. Ja inun, tsuabunda ea ikunwankin en jancha ninkakubainaibu en jatu shinan chankanwan ana unpax manui tetsusinama keska ixankanikiki.

³⁶Jaska en matu yuiai keska en akai uinbiashinxun man ea ikunwanbumaki.

³⁷⁻³⁸Jakia ea yununitun shinanan aki en juniki, emebi en shinanan aki juamadan. Jaskaken tsuabuda katuxun Epa Diosun ea anu jatu pexukin ekidi yunua ikunwankin ea jaibuwakubain xankanikiki. Ja inun, ea ikunwainbu en jatu danantaskama ixanaii. ³⁹Ea yununitun shinanwen akinan, tsuabuda ea anu yununi jawen jeneai xabatian jatu benuama jatu bestenwankin en jatu taxnimaxanaii. ⁴⁰Dasibibun Diosun bake shinankubainkin ikunwain jiwekuian ma jayabuwen taexun jawen jeneai xabatian en jatu bestenwanxanaii, jaska en Epan shinain yubakani keska menexunkinan– jatu wakin

⁴¹“Dios anua misi butunidan, en eaki”, iki daketapai itsakin jatu yuiaiwen taea judio xanen ibubu june Jesúski ja ikin yuain ⁴²yuinamei:

–Na junidan, Josén bakeki, Jesúsdan. Jawen ibu dabedan, nukun uinbuki. ⁴³Jaskai: “Dios anua en butuniki”, iki daketapaimenkain? –iake iakeaibun

⁴³jatun shinan unantan Jesúsun jatu yuikin:

–Matunan, jadi janchakin ana ea yuanyamakanwen. ⁴⁴⁻⁴⁵Epa Diosun ea yununitun jatu kenamadan, ea

jaibuwatidubumaki. Jakia jatu kena ea ikunwainbu jawen jeneai xabatian en jatu bestenwanxanaii. Diosun jancha Isaásin kenen matu yuinun ninkakanwen: ‘Diosun dasibi jatu yusinkin mextanmaxanikiki’, aniki. Jaskawen taexun tsuanda Diosun jancha ninkakin tapinkubainmixunan, ea jaibuwakanikiki. ⁴⁶Epa Dios tsuan man uinsmaki. Jakia Dios anua besti taxninitun Epa Dios uiniki.

⁴⁷⁻⁴⁸Jiwekuinmati misidan, jabia en eaki. Chanima tsuabunda ea ikunwain jiwekuinkanikiki, ikibi ikidan. ⁴⁹Ja inun, janu tsua jiweabumanuxun Dios anua misi matun xenipabun pibiakubaini atimas bika tenei mawanibuki. ⁵⁰Jakia misi nai anua butunikidi en janchaii. Na misi pikubaini ana mawatidubumaki.

⁵¹Nai anua butuni misi jiweadan, jabia en eaki. Tsuabunda na misi jiwea pikubaini jiwepakexankanikiki, ikibi ikidan. Na misi en jatu inanxanaidan, en yuda kayabiki. Jaskawen taea na mai anu yudabu xukuabu tibi jawen jiweitidubuwen taexun en yuda kayabi en jatu inanxanaii– akin junea janchawen jatu yuuya

⁵²ninkama e itan judio xanen ibubu jancha tibiwen yuinamei ja ikaibun:

–¿Jaskakin nun pinun jawen nami nuku inantidumen? Juni kuinen namidan, nun pitaskatidumaki– ikaibun

⁵³jabun shinan unankin Jesúsun ana jatu yuikin:

–Chanima matu yuinun ninkaidakanwen. Matun Juchi Kayabi Iyuautun nami piama inun en jimi akamadan, man jiwekuian jayatidumaki.

⁵⁴Jakia tsuabunda en nami pikin en jimi aki jiwekuinxankanikiki, ikibi ikidan. Ja inun, jawen jenea xabatian en jatu bestenwankin taxnimaxanaii.

⁵⁵Jaska inun, en namidan, piti kayabiki. Ja inun, en jimidán, nuxuti kayabiki.

⁵⁶Tsuabunda en nami pi inun en jimi akidan, ebe jiweaibun eadi jatube dasitan en jiwekunkainxanaii.⁵⁷Jaska inun, Epa Dios jiewi ikibi ikatun ea yununiwen taea jawen kushipawen en jiwekunkainxanaii. Jabiaskadai tsuabunda ea pi en kushipawen jiwekubainxankanikiki.⁵⁸Nai anua misi butunikidi en janchaii. Matun xenipabu jiwekin ja misi pikubauni mawanibu keskamaki, na misi en matu yuiaidan. Na misi pikubaini jiwekubainxankanikiki, ikibi ikidan-jatu wakin⁵⁹Cafarnaúm anu janu ichati jiwe anuxun Jesúsun jaska jatu yusiany

Jesús jamebi jiwea ikibi ini jayakidi jatu yusinikiaki, na janchadan

⁶⁰jawen jancha ninkatan Jesúski chiti ikabu ichapabu yuinamei:

—Na jaska yuiaidan, bikaki. Tsuan jaska chibankin axuntidumaki— ikaibun

⁶¹jabu yuanganainbu unankin Jesúsun jatu yukakin:

—¿En janchan matu dakewakin dananmaimenkain?⁶²Janua en juni anu jawendi en matun Juchi Kayabi Iyua en ana kai uinkin man shinan betsa waxanaii.⁶³Xabakabi matu yusinun ninkakanwen. En yushinin jatu jiwemaxanikiki. Jamen yudabun janchawenan, jawa jatu jiwemakin kushipa watidumajaidaki. En jancha en matu yuiaidan, en yushin keskaki. Man ikunwanyan en janchan matu jiwekuinmaikiki— iwanan,⁶⁴⁻⁶⁵yusinkin taewabidanxuwen jawen jancha ikunwanbuma inun tsuanda achimaxanai unainwen taexun Jesúsun ana yuikin:

—Jamen matunan, betsaa betsapabun man ea ikunwanbumaki. Jaskaken: “Epa Diosun matu kenama man ea ikunwantidumbuaki”, akin en matu yuixuki— nuku wa

⁶⁶jaskawen taexun Jesúski chiti imisbu ichapabu niti iki bashikutan Jesúbe ana buama ikaibun⁶⁷jakia nun jawen 12 tsumabu nun paxkabainabumaken Jesúsun nuku yuikin:

—¿Matundi man ea jenekatsi ikimenkain?—nuku wa⁶⁸⁻⁶⁹Simón Pedron yuikin:

—Xanen Ibuun, mia jenebain tsua mia keska nun chibantidumaki. Jiwekuinmati jancha min nuku yusinmiski. Diosun bake medibi pepadan, jibia min mia nun unaaiin— aka

⁷⁰Jesúsun nuku yuikin:

—Eanan, en matu katubiayama bestichai yushin chakabu man jayakin— nuku wa⁷¹nun jawen 12 tsumabu betsan Jesúsun jatu achimaxanaiwen taea Simón Iscarioten bake Judaskidi shinankin jaska nukukidi janchaniki.

Jawen betsabun Jesúsun ikunwandiamma inibukiaki, na janchadan

7 ¹Januxun judio xanen ibubun Jesúsun detekatsi ikin benaibuwen taea Judea anu ana kakatsi ikama Galilea anu besti mae tibi anu kakunkaukin jatu uinkin yusinkubaunaya²ja uxetian ni pei mextetan peantan judiobun xenipabu uxakubaunpaunibu jawen shinanti beya nawai pi besixanaibu ma kemaya³⁻⁵jawen betsabun ikunwankin kayatiwadiabumabia Jesúsun yunukin:

—Nenu janus kesu kesu isama Judea anu besiaibu anu kaxun uintanwen, kaxun jadixun min damiwai miki chiti ikabu ichaxun uin jaba! iki jau yuu! ixanunbunan. Tsuada xabakabi xanen ibukatsi ikinan jawen pepa june akin jamapai aibumaki. Jaskaken min akaidan, pepakiaki. Jerusalén anuabu jadixundi dasibi jaska min damiwamis xabakabi jatu uinmaditanwen, mianan— akabu⁶⁻⁷Jesúsun jatu yuikin:

—Jaska en ixanaidan, kemadiamaki. Matudan, tsuan matu jawa danambuma

jamapaiaibutian man katiduki. Jakia eanan, jatun chakabukidi xabakabi en jatu yuiaiwen taexun eki sinatakin ea danankanikiki. Jaskawen taea en daya en menediamawen taea en kayutidumaki.⁸⁻⁹ Jaskaken en jatu uinmaxanai kemadiamaken matube en kamaki. Matun mesti uintankanwen-jatu wa buaibun Galilea anu Jesús bashikui niti iken

**Judiobu janu besimisbutian Jesúsun
jatu yusinikiaki, na janchadan**

¹⁰nawai besiaibu anu jawen betsabu bushianbun Jesúsun tsua banabimama jadi jatu ichun kai Jerusalén medan june jikiken¹¹ nawai taeabun Jesús benakin judio xanen ibubun jatu yukakubauni:
–¿Jania man uiain, ja juni Jesúsdan?– ikaibun¹² yudan kaian Jesúskidi janchai yuinamei betsa betsapabun jakidi yuikin:
–Jadan, juni chakabuma pepaki– akaibun betsabundi yuikin:
–Jaskamaki. Juni pemaki. Nukunabu padanmiskiaki– adiaibun¹³ jaskabiakin tsua ninkamama jabu judio xanen ibubuki datei Jesúskidi june janchanameakeakeaibun

¹⁴uxa dabe inun besti kaya napundiama nawaibu jatixunbukuns namakis Templo jemaintin anu Jesús ka tsauxun ichabu jatu yusinkin taewaya¹⁵ xanen ibubun uin e itan jaki sinatai yuinamei:

–¿Jaskatan jaska yusian unanajaidai ikimenkain, nukubetan kene tapinsmabiadan?– ikaibun¹⁶ jaska janchaibu unankin Jesúsun jatu yuikin:

–Na en yusiain man ninkaidan, enamaki. Ea jatun yununitun shinanwen en matu yusin ikaai.¹⁷ Tsuabunda Diosun shinan akatsi ikinan en akai unantan jaska chanimamenkain ikin na en yusiain: “Dios anua juimenkain, en

ibubis en shinanen ikimenkain”, man unantidubuki.¹⁸ Jamen juni betsa ibubis jatu kenwanmakatsi ikidan, yusinan pepai jawenduamisbuki. Jakia jatun ea yununi en matu kenwanmakatsis ikaiwen taea chakabuuma pepa besti yui en chani chakamaki. Jaskawen taexun tsuan ja yusiankidi ekidi metutidubumaki.¹⁹ Chanima Diosun jancha Moisin matu yusinbiani mestenwantan matun jointinin Diosun jancha tsuan man chibainsbumaki. Jaskawen taexun jaska shinanma man ea detekatsis ikanaii– jatu waya

²⁰ja dapi mapuxun betsan yuikin:
–Min yushin chakabu jayaki. ¿Min jaska shinainan, tsuan mia tenankatsis ikimenkain?– aka

²¹ninkabiai jabe janchama xanen ibubu Jesúsun ana yuikin:

–Sábado juindukuntitian juni bestichai xuxawakin en medabewaima matuki chanimabu jaska shinain man eki sinataibu en unaiin.²² Jakia Moisin nuku yusinkin yuikin: “Jawen Dios unanmati wakin matun juni bake 8 xaba kaya jawen jina kubichi bikubainxankanwen”, akin nuku yununiki. Janunkain ja jina kubichi bikin Moisin taewama nukun xenipabu Abrahamnen dukun bikin taewani Moisin shinankin jabiaskadi nuku yununiki. Jaskaken juindukuntitianbiaken kaneama jina kubichi man bidiamisbuki.²³ Janua Moisin jancha man kanekatsi ikamawen taea juindukuntitianbiaken matun juni bake kainshina jina kubichi bi matudi man dayakubainmisbuki. Jabiaskadi keska wakin juindukuntitiandi juni betsa jawen yuda jidabi en xuxawaimawen taexun jaska shinain eki sinatakin man chakabu ekidi tanaki.²⁴ Jaskaken jawada bemakia uintan shinain jawaida janchayamakubainkanwen. Jakia jawada man unanti wakatsi ikaidan, jawa

kaneama uin pejaidawatan pe shinankin unanti watan ikubainkanwen– jatu waya

**Jania Jesús juni tsuan unanma
inibukiaki, na janchadan**

²⁵januxun Jesúsun yusiain Jerusalén anu jiwemisbun ninkatan yuinamei:

–Ja junidan, detekatsis ikin benakubaunaibudan, ¿jabiamen? ²⁶Un unu nashui ika yusin janchaidan, jawa tsuan nemama uinanmandi! ¿Nukun Xanen Ibubunan, “Mesías Cristoki”, iwanan, shinankanimenkain? ²⁷Jakia Mesías Cristo juxanaidan, jadakidiada juxanai tsuan nun unanmaki. Jaskaken janua Jesúsun nukun nun unainwen taea Mesías Cristo itidumaki– ikaibun

²⁸Templo jemaintin anuxun yusinkin jaska jabu janchaikidi shinain janchaibu ninkatan jancha kushipawen Jesúsun jatu shinanmakin:

–Matunan, ea unankin janua en yumediani man unandiaii. Emebi en shinanen ibubis en juamaki. Jakia padananainsmatun ea yununidan, matunan, man ja unanmaki. ²⁹Jakia ean ibubis jatun ea yununi anua en taxnikidaniwen taexun en ja unainjatu wa

³⁰janua jaskaiwen taexun achinun ixun shinanbiaibun janu mawaxanai kemadiamawen taexun tsuan meabuma iniki. ³¹Janua jakidi jaskabiaibu ichapabun ikunwain yuinamei:

–Mesías Cristo juxun dami ichapa nuku waxunxanaikidi nuku yusinmisbu na junin jaska nuku yusinmisbu keska waikiki. ¿Chipu Mesías Cristo juxun na junin akai binutidumamenkain? Nun shinanan, atidumaki– iki

**Jesús janu kaxanai tsuan unanma
jatu yuiniaki, na janchadan**

³²Jesúskidi yuiaibu fariseobun ninkabain Diosbe nukunabu

janchaxunika xanen ibubu anu buxun jabube yubakatan jau Jesú achitanunbun jabun Templo mekemisbu betsabu jatu yunuabun ³³januxun mapuabu Jesúsun ana jatu yuikin:

–Jaskaida ea wayamakanwen, uxá eskadabes besti matube en iyuaidan. Janua jatun ea yununi anu en ana chintunxanaidan. ³⁴Jaskaken matunan, janida en kai anu man unanmabia ea benakin ea bechiama man ixanaii, man jadi katidumawen taeandan– jatu waya ³⁵jaskai ninkai judio xanen ibubu yuinamei yuka iki:

–¿Jani ka nun bechiama itidu chani ikimenkain, jadan? ¿Nukunabu nawabube chai jiwebaunabu anu kaxanun ika shinain ikimenkaintsa? ¿Griegonawabun Dios unanbumanu yusintanun ika ikimenkain? ³⁶Na jaska yuaidan, jaskada shinain ikimenkain: “Janida en kai anu man unanmabia ea benakin ea bechiama man ixanaii, man jadi katidumawen taeandan”, ikai nun ninkaidan– ikin shinanibukiaki.

**Ikunwainbu jawen jiwekuinmati
unpax jayakidi Jesúsun jatu
yusiniaki, na janchadan**

³⁷Nawai keyui jawen jenei ma xaba dabe inun besti kaya nawai besi beshian ma kakatsi keyui dasibi ichajaidabun Jesú benikauan jancha kushipawen jatu yuikin:

–Unpax manujaidai man tetsusinaidan, eanu bexun aki bekanwen, ea ikunwankinan. ³⁸Jabiaskadi Diosun jancha keneni keska wakin tsuanda ea ikunwain jawen juinti medanua jiwekuinmati jene jabai netsuama ixanikiki, jatu kushipa waidan– jatu waniki.

³⁹Jaska nuku yuikinan, Diosun Yushin Pepakidi nuku yuiniiki. Januxun Jesús ikunwainbu jawen kushipa Diosun

inanun ikaya Jesús mawa bestean jawen Epanu kadiamaken Diosun Yushin Pepa nuku inanyuama iniki.

⁴⁰Januxun jatiditun Jesúsun jancha ninka pewatan yuikin:

–Chanima na junidan, Diosun jancha yuixunikakidi Moisin nuku yuiniidan, jaki- ikaibun

⁴¹betsabundi yuikin:

–Mesías Cristodan, jaki- akaya betsabundi yuikin:

–Jamaki. Galilea anua Diosun Mesías Cristo taxniama ixanai nuku yusinmisbuki. ⁴²Janua taxnikidanxanaidan, “Davidin mae Belén anua Davidin babadan, Cristo Mesías ixanikiki”, akin nuku kenexuniki. Jaskakenan Jesúsdan, Diosun Mesiasmaki- akaibun ⁴³Jesúsun jatun jancha ninkatan jawen taea Jesúskidi shinan betsa betsapawaibuwen taexun ⁴⁴jatiditun achibain bichibupananbun tsuan jawa meabumaken

Judio xanen ibubun Jesús ikunwanma dananibukiaki, na janchadan

⁴⁵janu fariseobu inun Diosbe nukunabu janchaxunika xanen ibubu ichaxun Jesús anu jatu yunua Templo mekenikabu jabun Jesús iweama mais beaibun xanen ibubu betsan jatu yukakin:

–¿Jaskakin Jesús achi biai kaxun man iweama ixumen?– jatu wa

⁴⁶mekenika betsan yuikin:

–Jaska ja juni janchai peaya juni betsadi janchakin nematidumaki, chakabu jatu yuiamawen taexunan– jatu wa

⁴⁷januxun fariseobun jatu yuikin:

⁴⁸–Jabi man unainsmapabenibin, matudi padainkikidan! Nuku nun xanen ibubu inun nun fariseobunan, nun jawa ikunwanmaki. ⁴⁹Jakia Moisin jancha unanbumawen taea ja yudabudan, ibubis yupukunain ikanikiki– jatu waya

⁵⁰janua fariseo betsa Nicodemo Jesús anu ka jabe janchatanimatun jatu yuikin:

⁵¹–Jawen jancha ninkadiama jawada dayai nun uindiamabia Moisin janchawen taexun: “Juni chakabuki”, akin nun kupitudumaki– jatu wa

⁵²Nicodemoki sinatakin yuikin:

–Galilea anua unainsmapabu keska shinanyamawe. Diosun jancha kenenibu una anua uintan Galilea anua Diosun jancha yuixunika taxniama ixanai min unanxanaii– itan ⁵³jenebaini jatun jiwe anu inun buake buakenibukiaki.

**Jawen taexun unanti wanun, iwanan,
ainbu chutanamei achitan Jesús
anu iyunibukiaki, na janchadan**

8 ¹⁻²Olivos Mati anu ka jadi uxashini penaya Templo jemaintin anu Jesús ana ka tsauken jaki ichabidanbidanaibu yudabu jatu yusinkin taewatanaya ³ainbu betsa beneyabia juni jawen benemabe chutanameai chitetan achixun Diosun jancha kenenibu yusinananmisbu inun fariseobun iwexun mapubaunabu namakis ainbu nashui akin Jesúsun besuudi nichintan ⁴yuikin:

–Yusinaan, na ainbunan, chakabukin juni betsa chutamaya achiabu mianu nun iwexuki. ⁵Ainbu jaskaxukanen: “Mishkiwen tsaka tsaka akin jau tenanunbunwen”, akin Moisin nukun xenipabu yununiki. Jaska wanikenan, zmianan, jaskada jakidi min yunuai?– iwanan, ⁶ja akatsi unanti wakin yukabu jakia jatun bepadameti jancha unain janchama tinixun Jesúsun metutiwen mai kenekin taewaya ⁷jaki sinatakin ana jabias yukadanwanbu bewenikitan jatu yuikin:

–Tsuada Dioskidi chakabu man jayamatun ja dukuntun mishkiwen tsakakin taewadikanwen– jatu watan

⁸ana tinixun ana mekenen mai keneaya ⁹Jesúsun jancha ninkatan

jabun iwea bestibu bui anibubu bui taei chipu jatidi bukin ichabu namakis ainbu nichianbu besti jenebainabu¹⁰ana beweninatan Jesúsun ainbu yukakin:

—Ainbuun, jabun mia tenanun, iwanan, iweabudan, čjania? čTsuán mia tsakama ixumen, kupikinan?— aka

¹¹—Xanen ibuun, tsuan ea jaska wamabin!— aka

—Peki. Jau mia kupinunbun, iwanan, eandi en yunuamaki. Jakia ana chintunkidan chakabukunkainama ixun inun kadiwe— aka ainbu kaya

Jesús dasibitun bin chaxajaida keskakidi jatu yusinikiaki, na janchadan

¹²Templo jemaintin anuxun Jesúsun yudabu uinkin mapuabu jatu yuikin:

—Eadan, mai jidabi en bin chaxajaida keskaki, jatu tapinmanikadan. Tsuabunda ea ninkatan chibainbudan, ja binki nukui jiwea bena jayakanikiki. Jaskawen taea jawa meshu medan ana biunma niama keska ixankanikiki— jatu waya

¹³janua fariseobun jaskai ninkai jaki sinatakin yuikin:

—Mimebi kein min pepaidan, jawa kushipa min jayamaki— akaibu

¹⁴—Emebi en dayuikibiakin janua en juni inun janu en kaxanai en unainwen taea en dayuikiaidan, jadan, kushipaki. Jakia janua en juni inun janu en kaxanai man unanbumawen taexun man kaneaii.¹⁵Yudabun shinanmiswen man ea unanti waii. Jakia eanan, jaskawen en matu unanti wamaki.

¹⁶Jakia jaska en Epan ea yununibetan shinankin chanima en mesti en akamaki, jawa kaneama ean unanti wakinan.

¹⁷Januxun Diosun Moisés yuia matu kenexunidan, ja uinkin jawada jakidi juni dabe jabias jancha chaniaibu jawen jancha man ikunwantiduki, chanimakenan.¹⁸Jaskaken emebi

ekidi en pe yuiaii. En jaskaya en Epa jatun ea yununidi jabiaskadi ekidi pe yuikiki. Ja nuku dabetañ jabiaskas chanikin nun yuitiduki, jau man nuku ikunwanunbunan— jatu wa

¹⁹—Min Epa mikidi chaniai nun ninkanun, čjani min Epadan?— akabu Jesúsun jatu kemakin:

—Matunan, man ea unanmaki. En Epa man unanmadiki. Ea unankin en Epadi man unankeanaii— akin²⁰Templo jemaintin anuxun na jaska yusinkinan, bau jaki nuitapaibu inankuinkin pei mistumisbu dapixun Jesúsun yusianyan janu mawaxanai kemadiamawen taexun tsuan mekin achiyuama inibuki.

Janida en kai anudan, man katidumaki, akin Jesúsun jatu unantimaska wanikiaki, na janchadan

²¹Jabianuxundi Jesúsun mapuabu jatu ana yuikin:

—Ea en janida kakenan, ea benai matun chakabuwen taea man mawaxanaii. Janu en kaxanai anu man katidumaki— jatu wa

²²ninkai judio xanen ibubu yuinamei:

—Ja jaska yuaidan, jamebi tenanmepai ikimenkain: “Ja en janu kaxanai anu man katidumaki”, ikaidan— ikaibun

²³Jesúsun ana jatu yuikin:

—Matudan, man nenuabu bestiki. Jakia eadan, en manaundiaki. Jaskawen taea mai anua besti man baki. Jakia eadan, na mai anua en bamaki.²⁴Jaskaken matu yuikin: “Matun chakabu jakimama man mawaxanaii”, akin en matu yuixuki. Ninkakanwen. Chanima en jiwei ikibi ini man ea ikunwankatsi ikama matun chakabuwen besti man mawaxanaii— jatu wa

²⁵e itan betsabun yukakin:

—Miadan, čmin tsua iki ikai?

—akeakeabu

—čJaskai jamendaka en matu jancha chakawai ikai? Jabia en matu yuikin

taewaxuki.²⁶En matukidi ichapa unanti wakin en yuitidubia jatun ea yununitun chanima jancha ea yuia ninkatan jabiaskadi yudabu en yuikubainaii– jatu wa²⁷jawen Epa Dioskidi Jesúsun yuiai jawen jancha ninkabiai jawa tapianbumaken²⁸jaskawen taexun Jesúsun ana jatu yuikin:

–Matunan, matun Juchi Kayabi Iyua ea binikin benimaxun janu man ea unanxanaii. Natianan, jaska en shinainwen en akamaki. Jakia jaska en Epan ea yusini besti en yuimiski.²⁹Ja inun, ea yununi eskatian ebeken jamapai betsa betsapa wakin bechipaimakin en benimawamiswen taexun en Epan ea besti jenebainamaki–³⁰jatu wai xanen ibu ichapabun ikunwankin taewaibun

Diosun bakebu inun diablo Satanásan tsumabukidi yusinikiaki, na janchadan

³¹⁻³²januxun ja xanen ibubun ikunwankin taewaibu Jesúsun jatu unanti wanun ixun jatu yuikin:

–Tsuabunda en jancha ninkatan chanima uke medan mestenwantan man chintuanmadan, man en tsuma kayabi itidubuki. Jaskawen taexun chanima jancha unankin man tapiyanan chakabun matu ana tsuma wama ikanikiki– jatu wa

³³jabun kemakin yuikin:

–Nukudan, nun Abrahamnen bababuki. Nukun yuda tsuma wabiaxun nukun shinan tsuan nuku biantidumaki. Jaskaken ćjaskakin: “Matu ana tsuan tsuma wama ikanikiki”, ikin min nuku yuiai?– akabu

³⁴⁻³⁶Jesúsun ana jatu yuikin:

–Chanima en matu yuiaii. Diosun jancha kanekin dasibibun chakabu shinainbu jatun chakabun jatu yabumiski, jawen dayadu keska wakinan. Jaska inun, juni betsan juni betsabikin jawen dayadu waimakenan, ana

jawenabube jiwtiduma shinankin nichinmisbuki. Jakia juni betsan bakedan, jawen bake kayabi jani nichianma jabe ikunkainmiski. Jaskaken eanan, jaska keska wakin Diosun juni bake kayabitun matun jawada chakabu man dibia keska jakimawakin en matu mekeaya chakabun matu ana yabutidumaki.³⁷⁻³⁸Jakia en jancha ninkama man Abrahamnen bababubia eki sinatakin man jatiditun ea detekatsis ikaii. Ea janchaidan, en Epan jawada akai uintan en matu yuimiski. Jakia matunan, matun ibuan akai uinkin ninkatan man mawamiski– jatu wa

³⁹–Jamaki. Diosun katuni Abrahamnen bababudan, nun nukuki– ikaibun Jesúsun ana jatu yuikin:

–Matu chanima man Abrahamnen bababudan, jaska Abrahamnen ani man adiakeanaii.⁴⁰Jakia Dios anua ninkatan chanima jancha en matu yuibia danankin man ea detepai ikaii. Diosun jancha chanima Abrahamnen ninkatan man ikai keska ikama iniki, danainan.⁴¹Jaskaken matunan, matun ibuan amis keska shinain man ikaii– jatu wa jaki sinatakin yuikin:

–Nukudan, nun jusi bakemaki. Nukun ibu kayabi bestichaidan, nun jayaki, Diosdan– akabu

⁴²–Dios anua en juniwen taexun Dios matun ibu kayabikenan, jaska shinankin man ea bechipaidiakaneaii. Eadan, en shininan aki en juamaki. Jakia jawen shininan Diosun ea yununi aki matube jiewi en juniki.⁴³¿Jaskakin man ea ninkakin pewakatsi ikabumamen? Matu yuinun ninkakanwen. En janchadan, pata keskatun en jancha man tapin pewabumaki.⁴⁴Man jaskawen taeadan, matun ibudan, diablo Satanáski. Jaska shinain keska axunkin man bechipaimamiski. Jaska inun, bai taeni anua diablo Satanás puben

detenen kain taeni ikunkainmiski. Ja inun, chانيا jancha jayamawen taea chani chakakunkaindiamiski. Ja inun, chani chakanikawen taea chanin epaki.⁴⁵ Jakia chanima jancha en matu yuibia man ikunwankatsi ikabumaki.⁴⁶ ¿Jadatutun bedubi en jawa chakabu akai man ea uinshinxun ea chitetidumen? Eanan, en chanima jancha yuibiaya ejaskakin man ea ikunwanma chitekubainkanai?⁴⁷ Jaska inun, Diosunabun Diosun jancha ninkamisbuki. Jakia man Diosunabumawen taexun man ninkakatsi ikabumaki– jatu waya

**Abraham jayadiama Cristo dukun
jiwea ipaunikiaki, na janchadan**

⁴⁸ januxun judio xanen ibubun Jesús yuikin:

–Chania nun mia yuiaidan, yushin chakabu jaya dikabia min Samarianawaki, unainsmapadan– akabu

⁴⁹ Jesúsun jatu kemakin yuikin:

–En jawa yushin chakabu jayamaki. En Epa en kenwanbiaya man ea danaiin.⁵⁰ Emebi en keanmaki. Jaska inun, “Ea kenwankanwen”, iwanan, en matu yuiamaki. Jakia jatun matu unanti waxanaitun matu ea kenwanmakatsis ikikiki.⁵¹ Jaskaken jabun en jancha ninkakin jeneama mawabia mawa kayabiama ixankanikiki– jatu wa

⁵²⁻⁵³ janua jabu Jesúski sinatakin yuikin:

–Chania min yushin chakabu jayaki. Nukun xenipabu pepa Abraham inun Dios janchaxunika dasibibudi mawakubainbuki. Jakia: “Tsuanda en jancha ninkai mawama ixankanikiki”, ikin min yuiaidan, ejanen ibukin min jatu binunkin keyua iki ikai? ¿Miadan min tsua iki ikai, jaska shinain ibubis keinan?– akabu

⁵⁴⁻⁵⁵ –Emebi en keainan, pemaki. Jakia en Epan ea kenwanmiski. Unanmabia:

“Nukun Dioski”, ikin en Epakidi man yuimiski. “Eadi en Dios unanmaki”, iki en chani chakakeanaii, matu keskaidan. Jakia en Epa Dios unankin jawen yunua en chibanmiski.⁵⁶ Yudabube jiwei en juai uinkatsi manakai ikunwain matun xenipabu Abraham benimaniki. Atimas ea uintan shinan chankain benimajaidaniki– jatu wa

⁵⁷ ninkai e itan yuikin:

–Min anibui 50 badi kadiamabia, ejaskatan nukun xenipabu Abraham min uinimen?– akabu

⁵⁸ –Chania en matu yuiaii. Abraham jayadiama ea dukun en ikibi ini en ikunkainaii– jatu waiwen taexun⁵⁹ detekatsi ikin mishki biakte biaketan tsakapananbu mapubaunabu anu junei nashui itan Templo anua kainkaini

**Juni bekun kaini Jesúsun
bepexniaki, na janchadan**

9 ¹janua sábado juindukuntitian Jesúsbe kainkaini kakin mae anu kenebaunibu janu jikiti xui kexa juni bekun kaini tsauxun buanaibu pei jatu ea aki tsaua binubainkin bechitan² nun jawen tsuma betsan Jesús yukakin:

–Yusinaan, ejaskai na juni bekun kainimen? ¿Kaindiamaken tsuan Dioskidi chakabuwanimen? ¿Jawen ibubun animenkain? ¿Jamebi inidaka?– aka

³ –Jaskamaki. Jamebi Dioskidi chakabuwamaki. Jawen ibubundi chakabuwabumadiki. Jakia ikis Diosun pepawati kushipa yuda dasibibu en uinmatiduwen taea jabiaska bekun kainiki– iwanan⁴⁻⁵ –Na mai anu yudabube jiwea en bin chaxajaida keskaki, jatu unanmanikadan. Jaska en xaba jayawen taea jatun ea yununitun daya axundinankanwen. Ea xaba keska ma en kaken chakabu juaya ana tsua dayatidumaki, meshu beai keskayadan–

⁶nuku watan main kemu michuxun
pupus watan jawen juni bekun bepxukin
⁷yuikin:

–Siloé janu unpax uke medan jabai
anu mishki pukinibu anu unpax tsaua
anu ka bechukitanwen– akadan,
nukun janchawen Siloé yuiidan, ‘Jadi
yunuaki’, Jesúsun jancha ninkakin
ikunwain benikaini ka bechukia
bepexetan uinbaini inun kaken ⁸janua
ja dapi jiweabu inun jabun pei ea ikai
uinmisbun yuka idabekin:

–Ja juni bekun tsauxun jatun jatu pei ea
amisdan, ⁹na junidan, jabiamen?– ikaibun

⁹betsabun yuikin:

–Jaa, jabiaki– ikeakeaibun

januxun betsabundi uinkin yuikin:

–Jamaki. Ja itsaki– ikaibun ibubis juni
bekun bepexeatun jatu yuikin:

–Jabia en eaki– ikaya

¹⁰januxun yukakin:

–¿Jaskatan min ma bepexeamen?–
akabu

¹¹jatu yuikin:

–Ja juni kenakin Jesús waibun
pupus watan ea bepxuxun: “Siloe anu
bechukitanwen”, ea wa ka en bechukia
bepexetan en uin taewabidanxuki– jatu
wa

¹²yukakin:

–¿Jania ja junidan?– akabu

jatu yuikin:

–En unanmaki. Janida niaki– jatu wa

**Juni bekun kaini bepexeshina fariseobun
yukanibukiaki, na janchadan**

¹³⁻¹⁴januxun sábado
juindukuntitian Jesúsun pupus watan
xuxawabainshinawen taexun fariseobu
anu juni bekun xuxashina iyuxun jatu
yuiabu ¹⁵fariseobun yukakin:

–Min bekunidan, ¹⁶¿jaskatan min ma
bepexeshinamen?– akabu

–Pupuswen Jesúsun ea bepxux
bechukitan en uin taewashinaki– jatu wa

¹⁶jatidi fariseobun jaska
shinanbumawen taea betsabu yuinamei:

–Moisin nuku yusini chibain jaki
meseama sábado juindukuanma
dayamisdan, ja juni Dios anuamaki–
ikaibun

jakia betsabudi yuinamei:

–Jawen unanmati dami atimaska
akinan, juni chakabun jaska watidumaki–
iki fariseobu jatun shinan dabe wai
paxkatan ¹⁷juni xuxashina ana yukakin:

–Min bedu mia xuxawashinawen
taexunan jakidi ¹⁸¿jawa min yuiae?– akabu

–Ja junidan, Diosun jancha
yuixunikaki– jatu wa

¹⁸jawen ibubu yukadiama ja juni
bekun kaini ma uin pewaiwen taexun
judiobun ikunwankatsi ikama jenetan
januxun jawen ibubu kenabu ¹⁹beabu
januxun judio xanen ibubun jawen ibu
dabe jatu yukakin:

–¿Nadan, min bakemen? ¿Chanima
bekun kaini man yuimismen? ¿Jaskatan
ma uinmenkain?– akabu

²⁰jawen ibubun kemakin jatu yuikin:

–Na junidan, nukun juni bakeki. Bekun
kainidan, nun unaiin. ²¹Jakia jaskatan
ma uinshina nun unanmaki. Tsuanda
xuxawakin uinmashina nun unanmadiki.
Jabi yukakanwen, juni ewakidan, jamebi
jaskashina jau matu yuinunan– jatu wa

²²⁻²³bebunkidi yuinamei:

–Tsuanda yuikin: “Jesúsdan,
Mesíaski”, ikaibu judiobu xanen ibubun
ninkatan jatun ichati jiwe anu jau
ana ichayamanun bun jatu nichinkatsi
yubakashinabuwen taea unain jatuki
datekin jawen ibubun yuikin:

–Juni ewaki. Ja yukakanwen– jatu wa
²⁴janua ana yuinametan xuxawashina
ana kenaxun yuikin:

–Chani chakamajaida Diosun besuubi
nuku yuiwe. Nukun nun uiainan, ja
junidan chakabuki, Diosun jancha
chibamadan– akabu

²⁵januxun ana jatu yuikin:

–Juni chakabumenkain, en unanmaki.
En bekunbiaken ikis ea uinmashina ja
besti en unaiin– jatu wa

²⁶ana jawenchains yukakin:

–¿Mia jaska kaya washina min
ikai uinmakinan, mia jawawen
uinmashinamen?– akabu

²⁷–¿Jaskakin man ea ana yukai?

Dama en matu yuixuki. ¿En jancha
man ninkamamen? ¿Matundi daka man
chibunun ika ikanai?– jatu wa

²⁸kunyan akin jancha kushipawen
yuikin:

–Min jawen tsumaki. Nukunan nun
Moisés chibapakea. ²⁹Dios Moisés
janchaniki. Jakia ja juni janiada
kainkidanimadan, nun unanmaki–
akabu

³⁰–Man ea peidawawa, ja juni janiada
taxnia man unanmadan. Jaskabia en
bedu ea bepexshinken en pe uiaini.

³¹Juni chakabun Dios ea akaidan,
Diosun ninkasmaki. Jakia Dioski
datekin jawen jancha ikunwankin yukai
Diosun ninkamiski, nun unanan. ³²Bai
taei anua bekun kaian bepexnidan, nun
jaska ninkasmaki. ³³Diosun yunuama
jaska watidumaki. Jaskaken Diosun
Jesús medabewashinaki– jatu wa

³⁴janunkain ana sinatajaidakin yuikin:

–Mia bekun chakabujaida min kainiwen
taexun min nuku yusintidumaki. Kadiwe–
atan jau ana jatube ichayamaxanun
nematan nichinibuki.

Fariseo xanen ibubu bekun keska inibukiaki, na janchadan

³⁵Janu ichati jiwe anuxun bepexshina
nichianbu ka Jesúsun ninkatan
benabauni jaki nukutan yukakin:

–Min Juchi Kayabi Iyua Diosun

Katuan, ¿min ikunwain?– aka

³⁶–Xanen ibuun, en Juchi Kayabi Iyua
en ikunwantidudan, ¿tsuamen?– aka

³⁷Jesúsun ana yuikin:

–Min uin jabe janchaidan, en jabiaki–
aka kenwain Jesús naman danti ixun
yuikin:

³⁸–Xanen Ibuun, en mia ikunwaiin–
aka

³⁹Jesúsun ana yuikin:

–Diosun jatu unanti waiwen
taea yudabube en jiwekunkainai. Tsuabunda
uinsbuman bexpexun jau
uinhanun bun inun natian tsuabunda
shinankin uinbiai bekun keska jau
ixanun bun en juniki– ikai ⁴⁰fariseo
betsabun jabetan ninkatan Jesús
yukakin:

–¿Nun uianma nun bekun keska min
nuku shinain?– akabu

⁴¹Jesúsun jatu yuikin:

–Diosun yusian unandiamatun
chakabuwen man kaneama ikeanai. Jakia
yuikin: “Nun Dios unaiin”, ikin
jawa ninkama man kaneaii– jatu watan,

**Chaxuwankidi miyuiwen Jesúsun
jatu yusinikiaki, na janchadan**

10 ¹ana Jesúsun jatu yuikin:
–Chanima en matu yuiai
ninkakanwen. Tsuada chaxawan meketi
xuiwen jikiama jamaudi jawen keneki
inakain butumisdan, yumetsubuki.

²Jakia janu jikiti xui kayabi bepexuni
jikimisdan, chaxawan mekenika kayabiki.

³Jamen kene xui mekenikatun chaxawan
uinkin bepexuna jawen ibuan chaxawan
tibi jawen kenawen kenapakea jawen
jui ninkatan kainbidanaibun ⁴jawenas
kainmakin dasibi kenakin keyubainkin
bepuaya jawen jui ninkabainkin
chibamisbuki. ⁵Januxun juni betsan
jatu iyunun ixun jatu kenadiabaina jawen
jui ninkama chibam paxai jamakidi
bumisbuki– akin ⁶chaxawan miyukidi
jancha juneawen Jesúsun jatu yuikin
jatu yusinpaia tsuan ninkabumajaidawen
taexun

**Jesús chaxuwan mekenika kayabi
jakidi yusinikiaki, na janchadan**

⁷judio xanen ibubu Jesúsun ana jatu yuikin:

–Chanima en matu yuiaii. Janu chaxuwan jikiti xuidan, jibia en eaki.

⁸En judiama jabu dukun bea dasibibu en kenawen padananankubainmisbudan, yumetsu keskabuken chaxuwan pepabun jatun jancha ninkama ikubainibuki.

⁹Jakia janu jikiti xuidan, en eaki. Tsuada eanu jikiaibu en jatu mekekubainxanaii, Diosunabu jatu wakinan. Chaxuwan meke pejaidawakin jatu bichitan kainmakin basi pepa pimakin en jatu ama keska wakubainxanaii. ¹⁰Juni ichakanikaidan, yumetsukin detekin yamawai padananain bemisbuki. Jakia jatu jiwekuinmai ikibi imaidan, en ea juniki, unanuma ichapa jatu inankin yaushiama jatu kushipa waidan.

¹¹Eadan, en matun mekenan pepaki. Mekenan pepatunan jawen chaxuwan mekei yaushi mawaxuntiduki. ¹²Jakia dayadun pei binun ika dayakin chaxuwan mekexunaya janua kaman inu pubenen chaxuwan pinun ika juaya bechitan jawenamawen taea chaxuwanki pechitan jenebaini paxaya inawan bestibu achiken jatidi paxai benumisbuki. ¹³Janua dayadu chaxuwanwen nuiama pei besti binun ika mese juaya paxamisbuki. ¹⁴⁻¹⁵Jaska inun, En Epan ea unanun eandi en Epa en unain keska wakin enabu chaxuwan keskabu en jatu unanyan jabundi ea unankanikiki. Jaskaken en mekenan pepawen taea enabu chaxuwan keskabu en jatu mawaxuntiduki. ¹⁶Nenu besti enabumaki, na chaxuwan kene anuadán. Jakia chaxuwan betsabudi Diosun ea ma yununiki. Israelbumabiaken jatidi en mekekubainxanaii. En jui ninkaibu chaxuwan xukua bestichai

mekenika bestichaiya keska Israelbun ea ikunwainbube Diosun enabu dasibi ea iwexunxankanikiki, jatuki dasi wakinan.

¹⁷Jaska inun, jawen mawati kushipa inun jawen bestenti kushipa en Epan ea yununi en jayaki. Ana bestenkatsi en jiwea yaushiama en mawaxanaiwen taea en Epan ea bechipai ewen nuikiki.

¹⁸Jaskaken tsuan ea debu watidumaki. Jakia ikatsis iki ibubis en shinanen en debutiduki. Mawakin en jiwea en jeneshina en ana bitiduki, ja kushipa en Epan ea yununiwen taeidan– jatu waya

¹⁹Jesúsun jancha ninkatan judio xanen ibubun shinan dabe wai paxkakin ²⁰betsabun yuikin:

–Yushin chakabu jaya patapaki.

¿Jaskakin nun ninkakubaini ikanai?– jatu waibun

²¹betsabundi yuikin:

–Yushin chakabu jayatun pepa jancha yuitidumaki. Yushin chakabuyatunan, bekun xuxawatidumadiki. Jaskawen taea Jesú suni pepaki– ibaini buaibun

**Judio xanen ibubun Jesús
dananibukiaki, na janchadan**

²²⁻²³janua uitian Jerusalén anu Dios kenwanti Templo pewanibu shinain besi nawaibutian Templo jemaintin kexa anu janu utai juindukuin tsauti chaipa jawen kena Salomón anu Jesúsun kai ²⁴xanen ibubun bebunTEXUN yukakin:

–Jatixuinda nun ana jamen bika teneyamanun menan jawa kushi xabakabi nuku yuidiwe, jibia min nukun Mesías Cristomenkainan– akabu

²⁵Jesúsun jatu kemakin yuikin:

–Matunan, en matu yuia man ea ikunwanma ikimaki. En Epan kushipawen jawada pepa xabakabi en amiswen taexun en tsuamenkain man ea unantiduki. ²⁶Jakia man en chaxuwanmawen taexun man ea jawa ikunwainsmaki. ²⁷En chaxuwanen

ea unankin en jui ninkakin ea
chibanaibain en jatu unaiin.
²⁸Eki chiti ikabu benuama en jatu
jiwekuinmakubainxanaii. Padanxun
tsuan jatu ea mebianma ixanikiki. ²⁹Ja
inun, tsuabuda en Epa kushipa dasibi
binuatun jabu ea yunua jatuwen nuikin
en jatu mekejaidakubainai tsuan ea
jatu mebintidubumaki. ³⁰Ea inun en
Epa Dios ja dabe nun bestichai keskaki,
dapaxkanaismadan— jatu wa ³¹mishki
tunkuwen tsakanun ixun judio xanen
ibubun bitanaibun ³²jatuki dateama
Jesúsun ana jatu yuikin:

—Epa Dios anua dami midima pepa en
matu uinmamiski. ¿Jadatu damiwen
taexun man ea tsakanun ika ikanai?—
jatu wa

³³—Pepawen taexun nun mia
tsakamaki. Jakia juni bestibia mimebi
min janchawen: “En Dioski”, ikin min
Dios ichaiwen taexun nun mia aki
ikaii— akabu

³⁴ana jatu yuikin:

—Manakanwen. En Dios ichamaki.
Diosun jancha yuixunikatun kenekin: “Ja
idabeaibu pewanika jatu wakin Diosun
jawen jancha jatu yunukin yuikin:
‘Man jatu medabewakubainaidan, man
diosbuki’, ikin Diosun jatu yuiniiki”,
akin jatu kenexuniki, na kenedan, nun
unankanaii. ³⁵Jaskawen taexun man
danantidubumaki. Jaskaken jawen
jancha jatu yunukin “Man diosbuki”,
akin nixun ³⁶Diosun ea medibi waxun
yudabu anu ea yununidan, ean yuikin:
“En Dios bakeki”, en ikaiwen taexun:
“Min Dios ichaii”, ikin ea chitekin man
kaneaii. ³⁷Jamen en Epan pepawai
keska en akamakenan, en jancha
ikunwanyamakanwen. ³⁸Jakia en Epan
pepawai keska en akai en jancha man
ikunwanma ibiakin en Epan kushipawen
en dami pepawai ikunwankanwen. Ja
dami ikunwankin en Epa ebe imis inun

en jabedi imis man unantidubuki— jatu
waya

³⁹ana achipananbun Jesús paxai

⁴⁰Jordán Jene pukei januxun
Nashimanika Juanen jatu nashimakin
taewani anu nun jabe kaken ⁴¹ana
midima jadi yudan kaian jaki xukuabu
jatu yusian yuinamei:

—Juanen damiwamabia dasibi
Jesúskidi nuku yuishinadan, chanimaki-
ikin ⁴²jadixun ichapabun Jesús
ikunwanibuki.

Lázaro mawanikiaki, na janchadan

11 ¹⁻²Janua shinan Betania anuxun
Maríán chipu xeni ininipawen
Xanen Ibu Jesúsun tae peukaxun jawen
buwen tede axanai anu jawen betsa
María inun Martabe jatun pui Lázaro
jiwea janua isin teneaya ³jau Jesús
yuixuntanunbun jawen pui dabetan jatu
yunua buxun Jesús jatu yuixunkin:

—Xanen Ibuun, min jaibu min
bechipaiaidan, isin teneikiki. Nukube
kaxun uin kawe— akabu

⁴Jesúsun ninkatan nun jawen tsumabu
nuku yuikin:

—Ja isinmanan tenankin debu wamaki.
Jakia Dios inun jawen baken kushipa
jatu uinmaxanun ika isin teneikiki—
ikaya

⁵María inun Marta inun jatun pui
Lázaro bechipaijaidabiai ⁶Lázaro isin
teneai yuiabu ninkatan kayuama ana
uxa dabei Jesús bashikushinxun

⁷nun jawen tsumabu nuku ana yuikin:

—Judea anu ana bunankanwen— nuku
wa

⁸—Yusinaan, judio xanen ibubun dama
jadixun mishki tunkuwen mia tsakapai
ishianbuki. ¿Jaskai jadidi min ana
kakatsi ikai?— nun wa

⁹nuku yuikin:

—Xaba tibidan, 12 hora jayaki. Badidi
xabatian tsuada kai uin pewabaini tsua

juti itidumaki, na en mai anu xaba chaxa jayawen taeadan.¹⁰ Jakia tsuada meshu medan biunma kaidan, juti itidubuki, eauma kai keskadan–¹¹itan,

–Nukun jaibu Lázaro ma uxaki.

Datekin en bestenwain kaii– nuku wa

¹²–Xanen Ibuun, ja juindukuin uxadan, mawama mainkiki. Kayamawe– nun wa¹³ Lázaro mawakidi Jesúsun nuku yuibia unanma uxa bestiakidi nun shinaniki.

¹⁴ Jaska nun shinain unantan xabakabi Jesúsun nuku yuikin:

–Lázarodan, ma mawashinaki.¹⁵ En jadimaken ishinken en benimaii. Jaskadan peki, matunadan, ana xabakabi en matu ikunwanmai kaidan. Eki sinatabiaibu anua Lázaro uinun bukanwen– nuku waya

¹⁶ jaskaya nun jawen 12 tsuma kushipaya betsa Tomás tsupibu baken nuku yuikin:

–Kawe. Jadia jabe mawadinun bukanwen– nuku waya

Jesúsdan, mawabu bestenwakin jiwemanikakiaki, na janchadan

¹⁷⁻¹⁹ jaska ninkatan Jesúsbe nun kaya Betania dapixun: “Uxa dabe inun dabe ka Lázaro maiwashinabuki”, akin nuku yuiabu Jerusalén chaima kilómetro dabe inun besti anua judio xanen ibubu ichapa bexun jatun pui mawashinken Marta inun María kaxaibu jatuwen nuikin daewakin jatu nese wai beabun²⁰ Jesús juai bana ninkatan Martan itanun ika kai Jesúski nukui kaya Maríandi jawa ninkama jiweten jiweken²¹⁻²² jaki nukuxun Martan Jesús yuikin:

–Xanen Ibuun, min nenukenan, en pui mawama ikeanshinaki. Jamapai shadabu min Dios ea akai ninkatan mia medabewakin mia axunmiski, en unanan– aka²³ Jesúsun yuikin:

–Min puidan, ana jiwxanikiki– aka²⁴ januxun Martan yuikin:

–Chanimi jabiaskaki. Badi jawen jeneaitian mawabu Diosun yuda dasibi bestenwanxanaitian ana jiwxanenai en unanaiin– ikaya

–januxun Jesúsun ana yuikin:

–Bestenwankin jiwemanikadan, jibia en eaki. Tsuabunda ea ikunwain mawabia ana jiwxankanikiki.²⁶ Jabu dasibi jiweyuxun ea ikunwain mawataskama ixankanikiki. ¿Na en mia yuiaidan, min ikunwain?– aka

²⁷–Jeen, Xanen Ibuun, min Cristo Mesíaski. Jawen bake yudabube jau jiweyuxanun Diosun yubanidan, jibia min miaki, en unanan. En mia ikunwaiin– atan

Lázarowen taea Jesús kaxanikiaki, na janchadan

²⁸ janua Marta jawen jiwe anu chintunkidan jawen betsa María june yuikin:

–Nukun Yusinan ma juaki. Mia kenaikiki. Kayewe– aka

²⁹ Maríán ninkatan benikaini jawen betsa Martabe kainkainaya³⁰ jawen mae anu jikidiama jabianuadi Marta jaki nukuxu anuxun Jesúsun manaya³¹ judio xanen ibubun María daewai bea jawen jiweten jabe maniabun Maríán jawa jatu yuiama benikaini jawen betsabe jawaida buaibun jatu uintan shinain:

–Mishki tanpe anua kaxai kaikiki– ikin chibainbun

³² Jesúski nukutan juinti nishma ja naman danti ixun Maríán yuikin:

–Xanen Ibuun, min nenukenan, en pui mawama ikeanshinaki– atan³³ judio xanen ibubube María kaxai bis ikaibun Jesúsun jaskaibu uin jatuwen uke medan nuijaidai jatube kaxakatsis ikin³⁴ jatu yukakin:

–¿Jani man datanshinamen?– jatu wa

–Xanen Ibuun, uinun kawe– abainabu

³⁵ Jesús kaxakainaya³⁶ xanen ibubun uin yuinamei:

–Uinwen, bechipaidiaikikidan– akaibun
³⁷jakia xanen ibu betsabu yuinamediai:

–Juni bekun xuxawabiashina jau
 Lázaro mawayamanun xuxawati
 shadashina jawawen jaska watima
 damapaikiki– abainaibun

**Lázaro mawashina Jesúsun bestenwan
 ana jiwenikiaki, na janchadan**

³⁸Jesús jatube kai kaxakunkainaya
 ana nui pae tsekekidani kakin mishki
 tanpe medan datantan mishki ewapawen
 bepushinabu anu kematan

³⁹–Bepenkanwen– jatu wa nemakin
 Lázaron pui Martan yuikin:

–Xanen Ibuun, jamaki.

Meyamananwen. Ma xaba dabe inun
 dabe ka chapui pisi mayaikiki– aka

⁴⁰Jesúsun kemakin yuikin:

–Ewen dateyamawe. “Ikunwakin
 Diosun kushipa min uiaiin”, akin en mia
 dama yuibidanxudan, shinanwen– akaaya

⁴¹januxun mishki ewapawen
 bepushinabu bepenxunabu Jesúsun
 uintan naiudi teskanxun yuikin:

–Epaan, min ea ninkaiwen taexun en
 mia pepawai. ⁴²En mia yuka ninkatan
 min ea medabewakubainmiski. Min ea
 yununidan, na ebe mapubaunabun jau ea
 uinkin ikunwanunbun xabakabi en mia
 yukaii– itan, ⁴³jui kushipawen kenakin:

–Lázaroon, jadi dakama taxniyuwe!–
 akaaya ⁴⁴mawa tadiwen yabu kextu
 wakin sebikin utsi waxun jawen besudi
 beyabubiashinabu ana jiwei bestentan
 kainkidanaya Jesúsun jatu yunukin:

–Jawen yabu dapekanwen, jau
 kanunan– jatu wa dapeabu jaskai Lázaro
 ana bestentan jiweniki.

**Jesús achitan tenankatsi yubakanibukiaki,
 na janchadan**

(Mt 26.1-5; Mr 14.1-2; Lc 22.1-2)

⁴⁵Jatun bedubi Jesúsun jaska waiwen
 taexun judio xanen ibu ichapabu

Maríabe bexun Lázaro mawashina
 Jesúsun ana jiwemai uinkin: “Jesús
 Diosun bakeki”, ikin ikunwainbun
⁴⁶jakia xanen ibu betsabun jaska waxu
 ikunwankatsi ikama fariseobu anu
 buxun jaska Jesúsun axu jatuki chaniabu
⁴⁷janua Diosbe nukunabu janchaxunika
 xanen ibubu inun fariseobu Junta
 Suprema kena jatube ichatan Jesúski
 datei yuinamei:

–Ja juninan, jatu unanti wamakin
 dami tsuan jaska watiduma ichapa
 waiki. ¿Nun jaska watidumen?

⁴⁸Nun nemama nuku jenekin keyutan
 dasibibun ikunwain jaki chiti iki
 keyutidubuki. Jaskaibun romano xanen
 ibubun jatun soldadobu midima bexun
 nukun Templo inun nukunabuya nuku
 yamawaxankanikiki– ikaibun

⁴⁹jakia na jabia baditian Diosbe
 nukunabu janchaxunika xanen ibujaida
 Caifásin jatu ninkatan yuikin:

–Matunan, man jawa unanmaki.

⁵⁰Nukunabu jau paxkai sa
 iyamaxanunbun juni bestichai nukunabu
 mawaxunaya man pepakunkainxanai
 man jaska shinanmaki– jatu wanikiaki.

⁵¹Jaska yubakaibu shinanmakinan,
 ibubis Caifásin shinanma jakia na
 jabia baditian Diosbe nukunabu
 janchaxunika xanen ibujaidawen taexun:
 “Jesús judiobu mawaxuntiduki”, akin
 Diosun Caifás jatu yuimaniki. ⁵²Na
 jaska yunuidan, jabu bestikidi ikama
 jakia Diosun bakebu paxka jiwea
 akeakeabu jabun ikunwainbu dasibi
 ichawaxanun ika medabewai Jesús nuku
 mawaxunxanai ⁵³Caifásin jaska jatu
 yuiaiwen taexun judio xanen ibubun
 Jesús tenanun ika yubakai taenibukiaki.

⁵⁴Judio xanen ibubu jaki jaskaibu
 janua Jesús xabakabi ana niama jatu
 anua kainkaini mae betsa Efraín anu
 janu jiweabuma dapi nuku iyuxun uxá
 ichapakin Jesúsun nuku besti yusianyan

⁵⁵Pascua judiobu nawai besimisbutian ma kemaya nawai taediamma jatun beya chibain jau Dios ana jatuki sinatayamanun Dios daewai ibubis pepakatsi iki mae jatiubuma anua Jerusalén anu yudabu midima bexun ⁵⁶⁻⁵⁷Jesúsun yusiain ninkakatsi ikin benabaunaibun Diosbe nukunabu janchaxunika xanen ibubu inun fariseobun Jesús achitan bichinun, iwanan, jatu yunushinxun jatu yuikin:

—Jesús janiada bechitan nuku yuikanwen— ikaibuwen taea mae betsa betsapa anua beshianbu Templo jemaintin anua yuinamei:

—¿Jesúskidi jawa min shinain?
¿Juimenkain? ¿Juamadaka?—
ibaunbaunaibun

**Jesúsun tae pemaki Marían xeni
jukanikiaki, na janchadan**
(Mt 26.6-13; Mr 14.3-9)

12 ¹ja Pascua nawai besi ana 6 díá ma ika kemaibun Jerusalén dapi Betania anu nukube Jesús ka Jesúsun Lázaro bestenwainma ana jiweawen taexun ²jawen shinan chankankin jabun Jesús duawakin badi kaya piti midima nuku bawaxunabu tapu chanpa anu Lázaro inun jawen jaibuaibu Jesúsbe daka baxti ixun piaibun Martan piti betsa betsapa bebidan bebidanaya ³januxun Marían xeni jene ininipa jawen xankama 300 gramo kesua jawen kena nardo jas kadujaida bexun Jesúsun taeki jukakin tae peuka dasibi jiwe napua iki inin shiamayaya jawen bu chaipawen tede akaya ⁴nun jawen tsuma betsa Judas Iscarioten chipu Jesús jatu achimaxanaitun yuikin:

⁵—¿Jaskakin jatu inantan 300 xaba daya peiti biamamen? Ja peiwen nuitapaibu medabewati shadabin!— ibiai

⁶ja nuitapaibuwen nuiamadi jakia jatun nukun pei nukun kapankanki

nunmekabia eskadabe bi yumetsubiakunkaini ⁷Judasin jaska yuiai ninkatan Jesúsun yuikin:

—Ana jadi yuiyamawe, na eki tanaxun aduimaxun en mawa chaputima wakin bebunkidi duawakin ea puxaxúkidan.

⁸Nuitapaibu matube jiweabu man jatu duawapaketiduki. Jakia eadan, jawenchains man ea duawapaketidumaki— nuku wa

⁹janua Jesús Betania anu jua judio xanen ibubun ninkatan Jesús besti uinun ikama Lázaro bestenwainmadi jabe uinun ika beabun ¹⁰⁻¹¹jakia Lázaro ana bestenwainmawen taexun xanen ibu ichapabun jatu jenebain Jesúsun jancha ninkakin ikunwanun ika paxkabainaibuwen taea datei Diosbe nukunabu janchaxunika xanen ibubu yubakai:

—Lázaro dikabi tenantiki— ika yubakanibukiaki.

**Jerusalén maewan anu Jesús jikinikiaki,
na janchadan**

(Mt 21.1-11; Mr 11.1-11; Lc 19.28-40)

¹²⁻¹³Jesús uxashini bestenkaini Jerusalénki kemai juai banabitán Pascuatián nawai besi beshian yudabu midimabun Jesús kenwanbainkin xenpan pei mextexun sanan sanan axunkubainkin jancha kushipawen yuibainkin:

—Dios nukuwen nuikin nuku medabewamiski. Diosun kushipaya juai kenwanankanwen, nun Israelbun Xanen Ibu kayabikidan— iki jaki nukui buaibun

¹⁴⁻¹⁵januxun Diosun jancha yuixunikan yuikin:

“Jerusalén anuabuun, matun xanen ibu jawa keanma burro bake kamaki katsaumea juxanikiki.

Dateama uinxankanwen”, jatu watan kenenidan, jabiaskadai burro bake Jesúsun bechitan jaki katsaumekaini kai Jerusalén jikiaya

¹⁶januxun ja dukun Jesús jaskai nun jawen tsumabun nun jawa ninkakin pewama iniki. Jakia chipu Diosun Jesús bestenwainmaken shinankin jaska dasibi ikima ja kenenibu inun kenwankubidanshinabu shinankin atimas jakidi nun ninkaniki.

¹⁷Jabiatandi Lázaro mawashina Jesúsun kenakin bestenwain uninmabun yudan kaian jabu jatuki chanikin jatu yuibaunaibun
¹⁸jawen jatu unanmati dami wakin bestenwanshankidi ninkatan Jesúski nukutani beaibun ¹⁹fariseobun jabun ikunwanma uin yuinamei:

—Uinkanwen, nun jawawen ana jatu bepadanxun itimakidan. Dasibibun ikunwanbaini jaki dasikanikikidan-ikaibun

Griegonawabu Jesúsbe janchakatsis inibukiaki, na janchadan

²⁰judiobubetan nawabu xuku betsa griegobun Dios kenwain jatube besi nawai Jerusalén anu beshianbu ²¹Felipen mae Betsaida Galilea mai pakea anua griegonawabu jaki nukuxun yukakin:

—Xanen ibuun, nun Jesúsbe janchakatsis ikaii- akabu

²²jatu bashiyubaini kaxun Andrés yuitan ja dabe kaxun jaskaibu Jesús yuiabu ²³Jesús juxun jatu yuikin:

—Matun Juchi Kayabi Iyua Diosun jatu ea kenwanmakatsis ikaidan, ma kemaikiki, ikisdan. ²⁴Chanimá en matu yuiaii. Jexe mai medan banama jawa bimitidumaki. Jakia mai uke medan bana jawen nami chapui dami jukuin yumeten bimijaidamiski. Eadan, en jaska keskayuiaii. ²⁵Jamen tsuabunda jawen jiwea ibubis bechipai yaushidan, ibubis benuxankanikiki. Jakia tsuabuda jawen jiwea jawa yaushi nuiama ekidi ma shinan pewa ana jiwekuinxankanikiki, ikibi ikidan. ²⁶Tsuabunda ea duawakatsi

ikinan, jau ea chibankubainunbunwen. Januxun ea chibankin ea duawabudan, ebe jiwedixankanikiki. Jaskawen taexun tsuabuda en Epa Diosun jatu duawayá janu en jiwexanai anu ebe idiaxankanikiki, jabun ea duawamisbudan- iwanan,

Jaska wabu debuxanaikidi Jesúsun jatu yuiniaki, na janchadan

²⁷jaskai nun ninkaya Jesúsun jawen Epa yuikin:

—Ikis jawenchains juinti metexekei en punu nishmajaidaii. ¿Jawa yuipa?- itan —Epaan, na en yuda jatu mepamatán en paxanun ea nichinwen, akin en mia yuitidubia jakia jabiaskatanun ika en juai min ea yubaniki- atan ²⁸ana yuikin: —Epaan, ewen taexun dasibibun jau mia kenwanxanunbunwen- akaya janua nai anua Diosun jui taxnaiwen yuikin:

—En shinanwen min ma abiakubainaya ana jabiaskadi wakin en kena ana kushipa wakin miwen en ana jatu kenwanmakatsis ikaii- akaya ²⁹yudabu mapubaunxun ninkatan yuinamei:

—Tin ikainkainimenkain- ikaibun jatiditun yuidiakin:

—Diosun nai tsuma janchaimenkain- ikaibun

³⁰jaskaibu ninkatan Jesúsun jatu yuikin:

—Na jui taxnai man ninkaxudan, ea medabewanun ika jancha taxniamaki.

Jakia matu medabewanun ika jancha taxnixuki. ³¹Na jabatián yudabu

unanti wakin diablo Satanás yudabu dasibibuwén xanen ibumis mebintan en udenxanaii. ³²Mai anuxun ea binikin sanankin nichinmabun jaskawen

taexun dasibibu ninia keska wakin ea anu en jatu iwexanaii, jau ichapabun

ea ikunwanunbunán- iwanan, ³³jaskai cruzkia mawaxanai jatube nukuki

chanikin unanmaya ³⁴januxun mapubaunabu betsán yuikin:

-Diosun jancha kenenibu anua uinkin nun manakamisdan, “Mesías Cristo jua matube jiwepakexanikiki”, akin kenenibukenan jaskakin: “Nukun Juchi Kayabi Iyua Mesías binikin sanankin nichinxankanikiki”, ikin ɿmin jaska nuku yuixumen? ¿Jaskakenan, tsuamen, nukun Juchi Kayabi Iyuadan?– aka

³⁵Jesúsun ana jatu yuikin:

-Ana uxa eskadabesi Dioskidi unanmanika xaba keskadan, matube jiweyuikiki. Jaskayuaya na jancha ninkai jiweyukanwen. Jamen bin nukawa keskai ma en kaken tsuabunda unandiabuma meshun achia keskai janida baiwen kai bai unanma man mextantidubumaki. Unaindakanwen. ³⁶Ja xaba man ebe ketaxamekatsis ikidan, man xaba jayayuaki. Ja xaba man jaya ninkatan ea ikunwankanwen– jatu watan junetan nukube kainkainiki.

Judio xanen ibubu Diosun jancha jayabia Jesús dananibukiaki, na janchadan

³⁷Januxun jawen unanmati dami atimaska Jesúsun jatu uinmakin axunbiakubaina jawa ikunwanma inibuki. ³⁸Jaska wanunbadiaibukidi Diosun jancha yuixunika Isaásin yuikin:

“Yavé Diosuun, yudabu min kushipa min jatu uinmakubainmiski.

Jakia nukun jancha tsuan ikunwanbumaki”,

aniki. ³⁹⁻⁴⁰Jaska inun, Isaásin yuikin: “Jau uin pewayamanun bun inun jau shinan pewayamanun bun

Diosun jatun bedu bekun keska wakin jatun juinti kushi waikiki.

Jaskawen taexun Diosun yuikin: ‘Jatun shinan betsa watan ea ikunwainbu en jatu xuxawakeanaii’”,

akin Diosun jancha ikunwantidubumakidi Isaásin keneniki.

⁴¹Januxun Isaásin namai keskakin Jesúsun kushipa uintan jakidi chanikin jatu kenexuniki.

⁴²Isaásin jaska keneniken judio xanen ibu ichapabun Jesús ikunwainbun inun xanen ibujaida binuabu jatidibundi ikunwanbiai: “Jau nukun ichati anua taxnimakin nuku nichinyamaxanbun”, ika fariseobuki datekin yuda ichapabun Jesús ikunwainkidi xabakabi yuima iyunibukiaki, ⁴³Jesús shinanbiakin jawenabu kenwanmayukatsis ikin Dioskidi bexmas kenwankin dateyabi shinankinan.

Jesús danainbuwen taexun Diosun jatu kupixanikiaki, na janchadan

⁴⁴Januxun jancha kushipawen Jesúsun nuku yuikin:

-Tsuabunda ea ikunwankin ea besti ikunwanma jakia en Epa jatun ea yununidi ikunwankanikiki. ⁴⁵Jabiaskadi wakin ea uinkin jatun ea yununidi unandiakanikiki.

⁴⁶Yudabu mai anua jatu ikunwanm atan ika xaba keska en juniwen taea tsuabunda ea ikunwain meshu medan jadi jiweama keska ixankanikiki. ⁴⁷Jakia yudabu kupinun ika juama jatu medabewanun ika en juniwen taexun en jancha ninkabiakin tsuabunda chibanmaken ikis en jatu kupiamaki. ⁴⁸Jakia en jancha danankin bechipaiabuma jabuna kupiti ma jayaki. Xaba jawen jenea unantitian en janchawen taexun Diosun jabu jatu kupixanikiki.

⁴⁹Eanan, en shinanen en matu yusianmaki. Jakia Epa Diosun ea yununitun ea yunua yusinkin en matu yuimiski. ⁵⁰Ean en Epan jancha en unainan, jadan jiwea keyutima jayaki. Jaskawen taexun en matu yuiaii, jaska en Epan ea yunukin yuinidad– akin nuku xabakabi yuiniiki.

Jawen tsumabu Jesúsun jatu juchunikiaki, na janchadan

13

¹Pascua nawai meshukidi ixanaitian yudabu jenebaini

jawen Epa Diosbe ana dasi kaxanai ma kemai Jesúsun unain na mai anua jabun ikunwainbu bechipai jatuwen nuikunkaini jaska bestiwenma jakia nun jawenabuwen taea nuiyabis mawakin nuku uinmaniki.

²Januxun badi kaya meshu medan Jesúsbetan nun piaya jabatiandi Judas Iscarioten Jesús jatu achimaxanai diablo Satanásan Judas shinanmaya ³mai jdabi anua dasibi Epa Diosun Jesús xanen ibumakatsi yununi Dios anua juni ana jawendi chintun kainxanai Jesúsun unain ⁴nukubetan pibiai pia jetenan benikauan jawen sanpu tadi pekatan jawen datekede iti chaipa bitan chiabukukin tadankin mestenwantan ⁵januxun kencha ewapaki unpax juxketan nun jawen tsumabu nuku juchukin taewakin jawen datekede itiwen nuku jutekede akubauni ⁶Simón Pedroki kematan anun ikaya nemakin yuikin:

—Xanen Ibuun, min en yusinanki.
Jaska wakin min ea juchunun ika ikai?— aka

⁷—Ikis en matu akai min unanmaki.
Jakia chipu min unanxanaii— aka

⁸Pedron ana yuikin:

—Duawakin ea juchuwe, iwanan, en mia yunuamaki— aka

Jesúsun nemakin:

—En mia juchuamadan, min enabu kayabi itudumaki— aka

⁹Simón Pedron yuikin:

—Jaskakenan, Xanen Ibuun, ea juchu bestiama ea mechukin ea buchudiawaka

¹⁰Jesúsun kemakin:

—Tsuabuda dama nashitani juidan, jawen tae besti jau ana juchuki bestinunbunwen. Jaskadan, man ana detsismaki. Jaska keskai en janchawen taea besti man pepaki, mawaida dasibimadan— nuku watan ¹¹Judasin

jatu achimaxanai unankin jaska nuku yuiniki.

¹²Januxun nuku juchuxun jutekede akin menetan jawen datekede iti pekatan jawen sanpu tadi chaipa ana sawetan ana daka baxti ixun nukubetan pikin nuku ana yuikin:

—¿En dama matu axudan, shinankin man unain? ¹³Chanimá ea kenakin: “Yusinaan inun Xanen Ibuun”, akin man ea kenamisdan, jibia en eaki. ¹⁴Ea en matun Yusinan inun matun Xanen Ibubiatun en matu juchukin duawakin en matu uinmaxu keska wakin matudi duanamei juchukinain keskakubainxankanwen. ¹⁵Na ean eska wakinan, jabiaskadi wakin man axanunbun en matu bebunkidi uinmaxuki. ¹⁶Chanimá en matu yuiai ninkakanwen. Dayakapan jawen tsuma binuinsmaki. Jaska inun, tsuada yunua jawen yunua axunkin binuinsmadiki. ¹⁷Na jaska en matu yuiai tsuabunda ninkatan jawen jiwekin jabun aki benimakubainxankanikiki.

¹⁸Na jaska janchaidan, matu dasibikidi en janchamaki. Ean en matu katunixun en unaiin. Jamen ekidi Diosun jancha yuixunikatun ea dayuikin: “Ebetan pibiaikin ea detenun ixun shinainkiki”, ini keskai jaska ekidi kenenibu yuiaiwen taea chanima matu bestichaitun man ea jabiaskadi wakatsis ikaii. ¹⁹Ea en inidan, man ikunwanxanunbun jaska ea waxanaibu bebunkidi en matu banabimai chaniaii. ²⁰Chanimá tsuada en kenaya en yunua ka jabun jatun jancha ninkakin ikunwankin jatu duawakin eadi jabiaskadi wakin jatun ea yununidi jabiaskadi waxankanikiki— nuku wai

**Janubi jawen tsuma jawen kushipaya
betsan jatu achimai Jesúsun jatu
yuinikiaki, na janchadan**

(Mt 26.20-25; Mr 14.17-21; Lc 22.21-23)

²¹janua Jesús jawen juinti metexekei nishmajaidakin xabakabi ana nuku yuikin:

—Chanima jadatuda bestichaitun man ea jatu achimai kaii- nuku wa ²²nuku jawen tsumabu betsakidi janchai unanma e itan nun beisina akeakeaya ²³Jesúsun ea bechipajaidaiwen taea en pekachu Jesúus baxti ika dakaxun piai ²⁴Simón Pedro en beisa jawen metutiwen Jesús ea yukamakin:

—¿Tsukidi janchaimenkain? Yukawee- ea wa ²⁵dabekekauan texkitan Jesús yukakin:

—Xanen Ibuun, ¿tsuamen?— en wa ²⁶baxexendi Jesúsun ea besti yuikin:

—Misi pukuxun en inainan, jaki- ea watan misi bixun tewe inun yuchi mutsaki pukutan Simónen bake Judas Iscariote inan ²⁷piaya Satanás Judasin shinan medan ma jikiawen taexun Jesúsun Judas yuikin:

—Min jaska shinainan, jawaida aditanwen- aka ²⁸⁻³⁰ninkatan jawa yuiama jawaida kainkaini meshu medan janida Judas kaken jaska wakin Judas Jesúsun yunua kaken nukubetan pi unanbumabia betsan shinain yuinamei: “Judas pei mekenikadan, ‘Nawakin piti ana bitanwen’, akin Jesúsun yunuxuki”, iake iakeaibun betsandi shinankin: “Nuitapaibu peiwen jatu medabewatanwen”, akin Jesúsun yunuxuki”, iake iakediakin shinainbun

Yunua bena Jesúsun jatu bashixunbainkiaki, na janchadan

³¹⁻³²janua Judas kainkainken Jesúsun nuku yuikin:

—En jatun Juchi Kayabi Iyua en kushipa jayaki, jawen taexun natian Diosun ea jatu unanmaidan. Jaskawen taexun Diosun kushipa en jatu unanmai. En jatun Juchi Kayabi Iyua Diosun jatu unanmaikiki, ewenan. Jaskaken jau unanunbun manama jawaida akikiki- iwanan,

³³—En bake kayabibuun, ana jatixuinda en matube niamaki. Jakia uxa eskadabes

ka ea benakin man ea bechiamaxianaii. Jaska judio xanen ibubu en yuishina keskadan, en matudi yuiai ea ninkakanwen. Janu en kai anu man katidumaki. ³⁴Jaskawen taexun jawen yunuti jancha bena en matu bashixunkin yunubaianaii. Jaska matuwen en nuiai keskadan, jabiaskadiai matubus nui duanamepakediaxankanwen. Jaskai shinananain man nuibukuain ³⁵matu uinkin man jaskai en tsumabu kayabi dasibibun matu unankubainxankanikaniki- nuku waya

Pedro: En ja unanmaki, iki kaikidi Jesúsun yuinikiaki, na janchadan

(Mt 26.31-35; Mr 14.27-31; Lc 22.31-34)

³⁶januxun Simón Pedron Jesús yukakin:

—Xanen Ibuun, ¿min jani kai?— aka

—Janu en kai anudan, ikis min ea chibantidumaki. Jakia chipu min ea chibanxanaii— aka

³⁷Pedron ana yuikin:

—Xanen Ibuun, ¿jaskakin en mia chibantidumamen, ikisdan? Eadan, en mia mawaxuntiduki, miwenan— aka

³⁸Jesúsun Pedro ana yuikin:

—¿Chanima min ea mawaxuntidumen?— iwanan, —Jaskamajaidaki. Chanima en mia yuiai ninkawe. Penadiama takada keui taediamma eki dakekin: “Ja junidan, en ja unanmaki”, iki dabe inun bestiki eki dakekin min yui kaii— akin

Epa Dios anu jawen kati baidan, Jesúskiaki, na janchadan

14 ¹nukudi Jesúsun yuikin:
—Na jaska en chaniayadan, juinti metexei dateyamakanwen. Dios ikunwakin eadi ikunwankanwen. ²En Epa Diosun jiwe anu teke xaka ichapa jayaki. Jawen jiwe jaska jayamaken en matu yuama ikeanaii. Jaskaken janu jiwei man niti ikama ixanun en matu

pewaxuin kaxanaii.³Janu matudi ka en jiweai anu man idiatiduwen taea kaxun bebunkidi en matu pewaxuin kaxanaii. Ana juxun en matu iyuxanaii, janu nun jiwenunbunan– itan⁴–Matunan man unaiin, ja baiwen en kaidan– nuku waya

⁵Tomásin yukakin:

–Xanen Ibuun, janu min kaxanaidan, nun unanmaki. ¿Jaskatan jawen kati bai nun unanxanai?– aka

⁶Jesúsun kemakin:

–Jawen kati bai inun jawen chanima unanti inun jawen jiwekuintidan, jabia en eaki. Ea besti ikunwankin chibain Epa Dios anu man jikitidubuki.⁷Jaska inun, man ea unanti wakubainaidan, en Epa Diosdi man unankubainaii. Natian ea tapinkubainkin Epa Diosdi man unidiakubainaii– nuku waya

⁸ninkatan Felipen yukakin:

–Xanen Ibuun, Epa Diosdan nuku uinmawe. Uintan nun mia ana bikawamaki– aka

⁹–Felipeen, jatixun en matube

jiwebiakunkainai ¹⁰min ea unandiamamen? Chanima ea uinkin Epa Diosdi man uiain. ¿Jaskakin: “Epa Dios nuku uinmawe”, akin min ea yukai?¹⁰Epa Dios inun ea, nun dasiadan, ¹¹min shinammamen? En shinanen akin en matu yuismaki. Jakia Epa Dios ebe ketaxamexun ea yunukin jawen daya ea amamiski.¹¹Epa Dios inun ea nun dasiadan, ikunwankanwen. Jaska en jancha besti ninkatan man ikunwantidumadan, en dami matu unanti wamakin atimaska en amiswen taexun ikunwankanwen, nun dasiadan.¹²Chanima en matu yuiai ninkakanwen. Tsuabunda ea ikunwankin en jaska amis man adiakubainxanaii. Ja inun, en Epa Dios anu en kaxanaiwen taexun en kushipayabun ea medabewakin jatu ikunwanmakin dami atimaska ewapa wakin ea binuxankanikiki.¹³En

kenawen taexun tsuabunda jamapai Epa Dios man yuka en jawen baken en matu axunxanaii, en Epan kushipa matu uinmakinan.¹⁴Jamapai tibi en kenawen man ea yuka en matu axunxanaii– iwanan,

Diosun Yushin Pepa Jesúsun jatu yubanikiaki, na janchadan

¹⁵ana nuku yuikubainkin:

–Chanima man ea bechipaiaidan, jaska en matu yusinkin yunumis shinankin en jancha man chibankubainxanaii.¹⁶Man jaska wakubainaya en matu yukaxuna Medabenan Bena betsa Diosun matu anu yunuxanikiki, jau matube jiwei ikibi ipaxanunan.¹⁷Medabenan Benadan, jawen Yushin Chanima Unanmanikaki. Mai anu yudabun jawa unanbuman inun uianbuman Medabenan Bena ikunwankin jaibuwatidubumaki. Jakia natian matu dapi jiwea chipu matube uke medan jiwxenaiwen taexun Diosun Yushin Chanima Unanmanika man ma unaiin.

¹⁸Jaskawen taexun eanan, bashikin bake ibuuma keska wakin en matu jenebainamaki. Jakia ana matube iki en ana chintunkidanxanaii.¹⁹Mawaida jatixunda yudabun ea uianma ixankanikiki. Jakia matunan, man ana ea uinyuxanaii. Ja inun, en ana matu jiwxenaiwen taea matudi man jiwiakunkainxanaii.²⁰Ja xabatian jaskakain en Epaki en dasia man unanyan janua matuki ana nukui en matuki dasidiatan en matube nipakexanai man unanxanaii.²¹Jaskaken tsuabunda en yusian ninkakin chibankubaikin ea unanmai chanima ea bechipaikubai nxankanikiki. Jaska inun, tsuabunda ea bechipaiaibun en Epa Diosundi jatu bechipaaidiaxanikiki. Jaskaibu xabakabi en jatu unanmaxanaii, jabun chanima ea bechipaiaibudan– nuku waya

²²Judas betsan yukakin:

–Xanen Ibuun, čjaskakin yudabu dasibi uinmama min nuku besti ana uinmaxanai?– akaya

²³Jesúsun kemakin:

–Tsuabunda ea bechipaikinan, en yusian jancha chibankaničiki. En Epan jatu bechipaiaya ea inun en Epa jua nun jatuwen jiwxenaiii. ²⁴Jakia tsuabunda ea bechipaibumadan, en yusian jancha chibankbumaki. Na jancha en matu yusian man ninkakubainaider, enamaki. En Epa jatun ea yununitun janchaki. ²⁵Natian matube jiwxun en matu yusinyukubainaii. ²⁶Jakia jawen Yushin Pepa matun Mekenan Bena en kenaya en Epa Diosun yunua juxun jaska en matu yusinkubainmis dasibi en matu yuiai ana xabakabi matu shinankubainxanikiki.

²⁷En janchawen datei matun jointi nishmayamakanwen. Diosun unanuma jawen uke medanu unanumati en matu inaiin. Jaska yudabu jatun shinankubainmis ana jakia Dios anua daewanika kayabi unanuma en matuki bashiaii. ²⁸“Ka matu anu en ana juxanaii”, ikin en yuiai man ma ea ninkaxuki. Janua Epa Dios xanen ibun ea binuawen taea janu en kaxanaii. En Epa anu en kaxanai man ninkaiwen taea man benimakeanaii, chanima ea bechipai kayabidan. ²⁹Na eska bebunkidi en matu yuiai chipu ikai uinkin en matu jancha wai shinankin man ea ikunwanxanaii. ³⁰⁻³¹Jakia mai anu yudabu yununika diablo Satanás ma juaiwen taea ana jatixunda en matube janchamaki. Satanásan ea mei ewen kushipatidumabiaken jau shinankun ea jaska wayununwen, chanima Epa Dios bechipaikin jaska ea yunua en axunmis yudabu en jatu uinmai kaidan.

Jaskaki. Benidikanwen, nenua nun bununbunan– nuku wa

Jesúsdan, uva bana jawen taxu keskakiaki, na janchadan

15¹nun benibaunaibu nuku ana yuikin:

–Ana betsa matu yusinun ninkayukanwen. Eadan, en uva bana nia jawen taxu kayabiki. En Epadan, miban ibuan mekekin meudumiski.

²Jatidi mebi tibi bimi jayamaken mextexun putamiski. Jakia jawen mebi tibi bimiyamis ana bimijaida wakin jawen ibuan bumextekun pewamiski, jau ana katakutan bimijaidanunan. Ea ikunwainbu en Epa Diosun jabiaskadi waxanikiki. ³En jancha en matu yusiai man ikunwainwen taea man ma shinan betsa jaya man ma xunpinjaidaki.

⁴Jakia jawen taxu anua jawen mebi betsa meskea ana jaska bimitidumaki. Jabiaskadi wakin ea jenebainkin man Dios benimawatidumaki. Jaskaken en matu putama keska wakin eadi putayamaxankanwen. ⁵Eadan, en miban taxu keskaki. Matudan, man jawen mebi keskabuki. Ebe jaibunamekin bimi ichapaya keskakin man Dios benimawatiduki. Eauma man jawayatidumajaidaki. ⁶Ea jaibuwama ewen pechiadan, jawen mebi bimiuma mextetan putaima badin xana washina ichawaxun kua keska wakin Diosun chi anu jatu udenxanikiki.

⁷Janua matudan, ebe ketaxamexun en jancha shinankin unanjaidai jakimama chibankubainkin jawada bikatsis ikin man Dios yuka matu axunxanikiki. ⁸Jaskai duapanankin Diosun kushipa man jatu kenwanmaiden, bimi ichapayai keskakin chanima en tsumabu kayabi xabakabi man ixankanaii. ⁹Eanan en matu bechipaiaii, jaska en Epan ea bechipaikin akai

keska wakinan. Jaskawen taea ea putapakeyamaxankanwen, en nui man jayawen taeadan.¹⁰ Jawen jancha en chibanyan ea bechipaikin en Epan ea putaismaki. Jaska keskadi wakin en yunua jancha man chibanyan matu bechipaikin en matu putamadi ixanaii.

¹¹Shinan chankain man ebe benimajaidanunbun jawen benimati jancha en matu yuiaii.¹²⁻¹⁴Tsuada jawen jaibuaiwu en nuikin bechipaikin jatu medabewai mawaxunai tsuan jaskakin ana betsan binutidumaki. En jancha man chibankubainai man en jaibuki. Eskaki, en matu yunuaidan. En matuwen nuikin bechipaimiski. Jaska chibankin betsabuwen nui bechipa inamekubainxankanwen.¹⁵Jamen betsadan, jawen dayakidi jawen dayadubu xanen ibun jatu xabakabi tapinmaismaki. Jakia dasibi en Epan ea yuia en matu unanmaiwen taexun yunubiakin en dayadu wakin matu kenama en jaibuwakin en matu kenaii.¹⁶Man ea katuama ean en matu katuniki. Jaskawen taexun en matu yunuaii. Kaxun jatu yusinkin man bimi ichapa wai keska wakin en tsumabu jatu wakin jau chintunyamanunbun jatu kushipa wakubainxankanwen. Jaska wakin en kenayaxun Epa Dios jamapai tibi man yuka matu axunxanikiki.¹⁷Na jaska en matu yunuai keska wakinan, jabun ea ikunwain betsabube jatuwen nui bechipa inamekubainxankanwen– iwanan,

Yudabun Jesúس dananixun jawenabudi dananxanaibu jatu yuinikiaki, na janchadan

¹⁸⁻¹⁹ana betsa nuku yuikin:
–Jabun shinain keska man shinanyan ea ikunwanbuman matu bechipaikanaii. Jakia ikunwanbuma anua en matu katuni jabun shinain keska man ana shinannmawen

taexun ea dukun dananshinxun matudi danandiaxankanikiki.²⁰En matu yuixudan, shinaindakanwen: “Dayakapan jawen tsuma binuismaki”, akin en matu yuixuki. Jaskaken ea ichakawanixun jabibundi matudi ichakawaxankanikiki. Jakia betsabundi en jancha ninkanixun matun janchadi ninkakin adiaxankanikiki.²¹Jatun ea yununi jabun unanbumawen taexun na jaska tibi matu wakinan, man ea chibainbuwen taexun matu axankanikiki.²²En yusin juu janchamaken jabu na mai anu jiweabun ibubis shinain: “En pepaki”, itidububia eskatian ana jaska waxun jatun chakabu ibubis juntantidubumaki, mekeidan. ²³Jaska inun, ea danankinan, en Epa Diosdi danandiakanikiki. ²⁴Ja inun, jatu anuxun en jawa jatu jaska waxuanma chakabu shinanma ikeankanaii. Jakia tsuan jaska jatu anuxun jaska waxuinsmabiaken Diosun kushipa jatun bedubi en ma jatu uinmabia uinbiakin ea inun en Epa danankanikiki.²⁵Jaskaken Diosun jancha yuixunikan yuikin: ‘Jawamawen taexun ichakawakin ea dananibuki’, iwanan, kenen keska menekin ea danankanikiki.²⁶Januxun matudi danainbun en Epa anua mekenan betsa matu anu en yunua janua Yushin Chanima Unanmanika juxun ekidi matu unanmai ea janchaxunxanikiki.²⁷Ja inun, matudi en taxnikidanai anua tapin man ebe ikunkidanshinadan, man ekidi janchai chaninikabudiki– iwanan,

16 ¹ana betsa nuku yuikin:
–Chipu jabun matu ichakawabu man ekidi jakimama shinan betsa wama man chintunyamaxanun bebunkidi en matu yuiai ninkaidakanwen.
²Janu ichati jiwe anuxun matu danankin nichinkin nukunabu matuki dakemaxankanikiki. Ja inun, betsabun shinain: “Nun Dios medabewaii”,

ikin tsuabuda matu betsa betsapa detekin ³en Epa Dios unanma eadi unanbumawen taexun matu jawa unanma ichakawaxankanikiki. ⁴Matu jaska waibuaibu en matu yuini matu shinanmai buaibuwen taexun bebunkidi en matu yuiaii.

**Diosun Yushin Pepatun axanai Jesúsun
jatu unanmanikiaki, na janchadan**

–Matube bebunkidi nibiaxun jaska xabakabi en matu yuiaama iyuni. ⁵⁻⁶Jakia natianan, jatun ea yununi anu en samama kaiwen taexun ikis en matu yuixuki. En matu yuia ninkatan matumebi shinain juinti nishmaxun: “¿Jani min kaxanai?” man ea wamaki. ⁷Jakia chanima en matu yuiai ninkakanwen. En matu kaxuanmakenan, Mekenan Bena matu anu jutidumaki. Jakia kaxun Mekenan Bena matu anu en yunuxanaii. Jaskawen taea en kayadan, matudan, man pepakunkainxanaii. ⁸Ja Mekenan Bena juxunan, yudabu mai anuabu xabakabi Dioskidi chakabuwamisbu inun, jabun Dioskidi chakabuwama pepa wamisbuma inun, tsuabuda Diosun unanti watan kupixanai jatu unanmaxanikiki. ⁹¿Tsuabumen, Dioskidi chakabumisbudan? Jabun ea ikunwanbumadan. ¹⁰¿Tsuamen, Dioskidi chakabu jayamadan? En eaki, en Epa anu en kaken man ana ea uianma ixanaidan. ¹¹¿Tsua axanimenkain, Diosun unanti waxun kupikinan? Na yudabu mai jidabi anu maniabu jatu xanen ibuxunmis ma unanti wanixun kupixanikiki.

¹²Ana jancha ichapa en matu yusinkubainpanan jati man tsuma keyutidumaki. ¹³Jakia chipu Yushin Chanima Unanmanika juxun chanima dasibi matu yusinkin mextanmaxanikiki. Jawen shinanen janchama jakia ekidi dasibi ninkatan jawada ixanaidi matu

xabakabi unanmaxanikiki. ¹⁴Ja Yushin Chanima Unanmanika jamebi juama en kushipa bitan matu unanmakin inankin matu kushipa waxanikiki. ¹⁵Dasibi en Epa jayadan, enadiki. Jaskawen taea: “Yushin Chanima Unanmanika ena bitan matu unanmaxanikiki”, akin en matu yuixuki– iwanan,

¹⁶–Jaskaida jatixuinda ka en jadi i iyamaki. Jakia samamajaida nun ana uinanxankanaii– nuku wa

**Ana punu nukama man benimajaidaxanaii,
jatu wanikiaki, na janchadan**

¹⁷mawa ana bestenxanaikidi janchai nun unanma yuinamei:

–¿Jawa nuku yuikatsi ikimenkain? “Ana eskadabes ea uianma janunkain ana uxa eskadabes kaya man ea ana uinxanaii”, ikai inun: “Dios anu en kaxanaiwen taeidan”, ikin ¹⁸“Ana uxa eskadabesdan”, ¹⁹¿jawamen? Jadakidi daki yui ikikika!– nun ike ikeaya

¹⁹nun yukapaia unankin nuku yuikin:

–En janchawen taea man yuinameaidan, ²⁰chanima en matu yuiaii. En mawaken ea manui kaxai man juinti nishmaken jabun ea ikunwanbuma benimajaidaxankanikiki. Jakia matudan, en mawaken matun juinti nui jenetan man benimajaidaxanaii. ²¹Jaska inun, ainbu tuya bake kainkatsi punu nukai shinan chankainsmaki. Jakia kaintan: “Peki”, ika benimai isin jakimamisbuki. ²²Jabiaskadia ikis man punu nukaki. Jakia en ana juaya man benimajaidaya matun benima pae tsuan matu mebintidubumaki.

²³Jabiatiandi ea uinkin man ea jawa yukama ixanaii. Jakia en Epa Dios man yuka ewen taexun matu medabewaxanikiki. ²⁴Ea ikunwakin taewabianixun en kenawen taexun man Dios yukadiamajaidaki. Na jabiatian

en kenawen taexun Dios yukakin taewadikanwen. Jaska wakin man yuka matu axuan man benimaxanaii- iwanan,

Jatu ichakawaibu Jesúsun jatu maemaxanaikidi jawen tsumabu yuinkikiaki, na janchadan

²⁵januxun ana nuku yusinkin:
-Jancha junea miyuiwen en matu yusinkubidanshinaki. Jakia ana jancha juneawen yusianma janu xabakabi en matu unanmaxanai ma kemaikiki. Jaskakainshinxun en Epa Dioskidi janu xabakabi kayabi en matuki chanixanaii. ²⁶Jabiatandi Dios en ana matu yukaxunama ixanaii. Janu matumebi ibubis en kenawen taexun man yukakubainxanaii, ²⁷en Epa Dios matuwen nuikin bechipaiawi en taexunan. Dios anua en juni ikunwankin man ea bechipaiawi taexun Epa Dios matuwen nuikin matu bechipaidiaikiki. ²⁸Jamen en Epa Diosun besuudia kainkidani na mai anu yudabube jiwenun ika en juni jaska ea yununi menetan natian ana jawendi kakin na yudabu en jenebainaii- nuku waya

²⁹januxun jawen tsuma betsan yuikin:
-Chanimna na jabiatian xabakabi nuku yui ana miyui jancha juneawen min janchamaki. ³⁰Janunkain chanimna mikidi nun unaiin. Nun mia yukadiama unankin nukun shinan min unain inun jamapai tibi min unainwen taexun Dios anua min junidan, nun ikunwaiin. Jaskawen taea min Diosun bake kayabiken tsuan nun ana mia yukai bika teneamaki- aka

³¹jaska waya Jesúsun nuku ana yuikin:
-¿Natian janu man ma ea ikunwain?
³²Man ea jaska wabiaj janu man datei paxaidan, ma kemakanikiki. Uindakanwen, janu dasibi sa ikin man bestibu ea dapaxkabainkin man ea jenebiabaina eadan, en emestimaki. En

Epa ebe ketaxamexun ea jeneamaki.

³³Ea jaibuwai eki dasia man dateama unanuma jiwxanun na jancha en matu yuixuki. Mai anuxun ea ikunwanbuman matu ichakawadiaibun dateyamaxankanwen, en ma jatu maemakin binuniwen taeandan- nuku watan

Jesúsun jawen tsumabu Diosun kushipa jatu yukaxunikiaki, na janchadan

17 ¹janua naiudi teskanxun uinkin nuku ninkamakin yuikin:
-Epaan, janu min ea yubanidan, januki. En min bake mawai medabewakin ewen min kushipa jatu uinmawe, jatu en mia kenwanmaxanunan. ²Mai jidabi anua jawen yudabu dasibi yunuti kushipa min bake min ea inaniwen min jatu katuni en jatu jiwekuinmaxanaii. ³Min mia besti Dioski, chanimadan. Jesucristo Mesías min yununidan, en ea bestiki. Nuku unantan na jiwekuinyanwen jiwxankanikiki, ikibi ikidan.

⁴Yudabu anu en mia dayaxunun min ea nichini mia axunkin keyukin mia duawakin en mia jatu kenwanmakubainshinaki. ⁵Epaan, eskatianan, mai nun damiwadiama min besuunbia en xanen ibui taeaitian en chaxakapa jawendua jayani keska jabias ea inanxanwen.

⁶Yudabu dasibi anua jatu katuxun min ea yunua min Dios kushipa dasibi binu keyua nukipakidi en mia jatu unanmakubainshinaki. Jaska inun, min katuxun min ea jatu inanidan, min jancha ninkamisbuki. ⁷⁻⁸Min jancha min ea yununi ma en jatu yusianki. Jaskawen taexun dasibi en jancha minadan, ma tapianbuki. Chanimna min ea yunua mianua en juni unankin ikunwan chakayamakanikiki. Jaskawen taexun min kushipa inun min yusinti mianua juai unankanikiki.

⁹⁻¹⁰Jamen enabudan, en mibe jatu janchaxunaii. Jakia ea ikunwanbumakidi en mibe jatu janchaxunamaki. Ja inun, mina watan min ea yununidan, jadan minabuki. Jaskawen taea dasibi enadan, minaki. Janua minadan, enadiki. En kushipa jatu medanua uinxankanikiki.

¹¹Natianan, ma mia anu en mibe iki kaii. Na mai anu en ana jatube jiwekunkainamaki. Jakia enabudan, na mai anu jatube jiweyukubainkanikiki. Jaskawen taexun Epa medibi pepa bestituun, min kena kushipawen ea jatu mekexunxanwen, ja kena kushipa min ea inaniwenan, nun paxkama keskadiai jau jabudi paxkamadi idiakubainxanunbunan. ¹²Na enabudan, mai anua jatube jiwxexun min kena kushipa min ea inaniwen chakabu nemakin en jatu mekekubidanshinaki, jawa jatu benuamadan. Judas besti jaska jakidi kenenibu keska aki ma benuni iki kaxuki.

¹³Mianu kakatsi en benimajaidaii. En jatu putabaindiama jau jabun ea ninkakin jabias en benimai keskai jau idianunbun en mibe janchaii. ¹⁴Mikidi en jaibuaibu en jatu yusianyan jabun shinan betsa wai pepaibu jabun ea dananmisbun ea jatube dananmisbuki, nun yudabun shinan keska jayamakenan.

¹⁵Jabiaskabiaken: “Ikunwanbuma anua jatu dapaxkamabainwen”, iwanan, en mia yukamaki. Jakia jau diablo Satanásan jatu padanyamaxanun jatu nemaxunkin mekexanwen. ¹⁶Ja inun, na mai anua Dios ikunwanbuma en jatu keskamawen taea ea ikunwainbudi jatube jiwebia jabu keskamadiki.

¹⁷Min jancha chanima kayabiki. Ja chanima janchawen min medibiki. Min jancha jaskawen taexun jatu medibi wawe, jabun min jancha chanima chibankanaibudan. ¹⁸Jaska inun, na mai anu mia unanbuma anu min ea yununi

keska wakin en jaibuaibu jabiaskadi wakin na mai anuadi en jatu yunudiaii, jau mikidi jatu yusinkubainxanunbunan. ¹⁹Jatuwen taea ea dukun iki en jatu medibixunxanaii. Jaskawen taea chanima jabudi jau min jancha chanima kayabiwen medibidianunbunan, jawa kanetimadan.

²⁰Na en jaibuaibu besti shinankin jabukidi besti en mia yukaxunamaki. Jakia jabun jatun jancha kakape ninkatan ea ikunwanxanaibudi en mia jatu yukaxunaii, min jabudi mekekubainxanunan. ²¹Jaskai mia inun ea dasia nun bestichai keska jiwea jabudi nukuki dasiabu jabiaskadi wakin min jatu medabewaxanun en mia jatu yukaxunaii. Min jatu jaska wa jabu xukuxun ea ikunwainbu mai jidabi anu min ea yununi unantidubuki. ²²Jaska mia inun ea dasinixun nun jabiaskas shinanmis keska wakin enabu jabiaskadi min jatu shinanmaxanun, iwanan, min kushipa min ea yununi en ma jatu yunuaki. ²³Mia inun ea nun dasiniken jabubedi en dasiaya jabu yuda bestichai keska jau iyanunbun en mia jatu yukaxunaii. Jaskaibu mai jidabi anuabun jatu uinkin min ea yununi inun jaska wakin min ea bechipaimis jabudi min bechipaidiaidan, jabun unantidubuki-iwanan,

²⁴Epaan, mai damiwakin taewadiama min ea bechipaikin ea chaxakapa jawenduawakin taewani min jabiaskadi ea wai jau ebe jiwekin uinxanunbun jabu min ea yununi ebe jatu jiwemaxanwen-iwanan,

²⁵Epaan, min kaneismaki. Mai jidabi anu yuda jiweabun mia unanbumabiaken ean, en mia unaiin. Na ebe mapuabun min ea yununi unangkanikiki. ²⁶Jaska inun, mikidi min kushipa binu keyua en jatu unanmapakeiwen taexun ana mikidi en jatu unanmakin

jeneyamaxanun min ea bechipaimis
keskai jau jabudi bechipainamei
jeneama iyanunbunwen, nuikipaidan.
Jaska jayabuwen taea ea en jatu anua
kainkainama iyanaii– itan

**Jesús achitanun ika bunibukiaki,
na janchadan**

(Mt 26.47-56; Mr 14.43-50; Lc 22.47-53)

18 ¹Diosbe nuku janchaxuni
menetan januxun nuku
kainmabainkin paxku debu jawen kena
Cedrón Jesúsn nuku pukemabaini
janu miban xukua mishkiwenkenenibu
anu ukemedan nun jabe jikiken ²janu
Jesúsbe nun ichakunkainmis anu
jabianu nun ana ichaken janu Judasin
unanjaidai ³jadi jatu iyui Diosbe
nukunabu janchaxuni xanen ibubu
inun fariseobubetan jatu yunuabu
jatidi Templo mekenikabu inun romano
soldadobu xuku betsa Judasin jatu iyua
jatun detetiya mesebaini bin dekutan
chaxa dakabainaibun ⁴Jesús achi beaibu
dasibi ma unainwen taea nuku bebun
Jesús nitan jatu yukakin:

–¿Man tsua benai bekanai?– jatu wa

⁵jabun achi beaibun betsan Jesús
kemakin:

–Jesús Nazaret anuadan– akaya

Jesúsun ana yuikin:

–Jabia en eaki– jatu waya Judasin jatu
achimai kai jawaidakain ma jabe niken
⁶jaskai Jesús janchai ninkatan chixtekidi
xekibaini di ikaibun ⁷Jesúsun ana jatu
yukakin:

–¿Tsuadaka man benai bei ikanai?–
jatu wa ana jabiaskadi jabun yuikin:

–Jesús Nazaret anuadan– akaibun

⁸–“Jabia en eaki”, akin en ma matu
yuixuki. Man ea besti benaiwen taexun
en jaibuaibu jatu meyamakanwen, jau
bununbunan– jatu wa

⁹bebunkidi Jesúsun yuikin: “Epaan,
min ea yununi en tsua jatu benuamaki”,

akin Jesúsun yuixuwen taexun: “En
jaibuaibu meyamakanwen”, akin
Jesúsun jatu nemaniki. ¹⁰Januxun
Simón Pedron jawen nupe chaipa sitan
Diosbe nukunabu janchaxuni xanen
ibujaidatun tsuma Malco mapexpaíkin
maebain pabinki yusiudia paxteaya
¹¹nemakin Jesúsun Pedro yuikin:

–Ana jatu meama min nupe ana jawendi
usunwen. En Epan jaska ea yununi
jabiaskadi wakin ea yumanwankanikiki.
Ea yaushiyamawe– aka

**Anásin jiwe anua Jesúski Pedro dakei
padanananikiaki, na janchadan**

(Mt 26.57-58, 69-70;
Mr 14.53-54, 66-68; Lc 22.54-57)

¹²januxun jatun xanen ibu
capitánbetan romano soldadobu inun
Templo mekenikabun Jesús achixun
menextan ¹³iyukin ja dukun jatun
xanen ibu Anásin jiwe anu iyuabun
jawen dais Caifás na badi bestichai
Diosbe nukunabu janchaxuni xanen
ibujaidatun ¹⁴bebunkidi judiobu jatu
yuikin: “Nukunabu jau paxkai sa
iyamaxanunbun juni bestichai nukunabu
mawaxunaya man pepakunkainxanaii”,
akin jatu yuimanudan,

¹⁵Jesús iyuaibun Simón Pedro
inun ean june chipu kakin nun Jesús
chibankubaini xanen ibu Anásin enabun
ea unainbuwen taea janu ichamisbu
dintu anu Jesúsbe en jikiaya ¹⁶jakia
Pedro unanbumawen taexun nemakin
niti akabu jikiama bai kexa Pedro niken
janua jemaintin kene janu jikiti xui
anu ana kaxun xui mekenika ainbu
yukaxuntan Pedro en bichiaya ¹⁷xui
mekenika ainbu Pedro yukakin:

–Ja junin tsuma betsadan, ejabia min
miamen?– aka

–Eadan, en jamaki– akaya

¹⁸janua ma matsu beaya janu
dayamisbu inun Templo mekemisbun

jemaintin chi keti watan yui
mapubaunabu jatube nashui ika Pedrodi
yuaya

**Diosbe jatu janchaxunika xanen
ibujaidatun Jesús yukanikiaki, na
janchadan**
(Mt 26.59-66; Mr 14.55-64; Lc 22.66-71)

¹⁹januxun Diosbe nukunabu
janchaxunika xanen ibujaida
ikunkainima ma taxnima anu Anásin
jiwe anu bichiabu jawen tsumabukidi
inun jawen yusiankidi Jesús yuka taewa

²⁰Jesúsun kemakin:
–Ninkaibun en janchakunkainmiski.
Janu ichati jiwe tibi inun Templo
jemaintin anuxun nukunabu ichamisbu
anuxun xabakabi dasibibun bedubi en
jatu yusinmiski, june jatu yusianmadan.
²¹Ea yukama jabun en jancha
ninkamisbu jatu yukawe. Jawada en jatu
yusinmis unanjaidakanikiki– ikaya ²²jadi
Jesúsun kemaya Templo mekenika betsa
Jesús dapi nixun meken pechiudi kepais
akin yuikin:

–Nukun xanen ibujaida jaska
yuiyamawe– aka

²³Jesúsun yuikin:
–En yui chakayadan, ea unanmawe.
Jakia en pe yuibiaya ċjaskakin e iskaun
min ea deteai?– aka ²⁴janchawen
binutiduma unantan Anásin jatu yunua
Jesús menexekea jabiaska Diosbe
nukunabu janchaxunikajaida binua
Caifás anudi iyuabun

**Ana: Jesús en unanmaki, ika Pedron jatu
padanikiaki, na janchadan**

(Mt 26.71-75; Mr 14.69-72; Lc 22.58-62)

²⁵ja jaska waibun Pedro jatube chin
yui nashui ika yuaya betsabun yukakin:
–¿Min jamamen, ja junin tsuma
betsadan?– abaunabu

Pedron jatu padankin yuikin:
–En jamaki. En eamabin!– jatu wa

²⁶januxun xanen ibujaida binuatin
tsuma betsa Pedron patsanka
jawenabundi Pedro yukakin:

–¿Miban xuku anuxunan, Jesúsbedan,
en mia uianma ikidanxumen?– aka

²⁷Pedron ana jadi padankin:
–En jamaki– itanayas jawaida
jabiatandi takada keui taeaya

**Pilato anu Jesús iyunibukiaki, na
janchadan**

(Mt 27.1-2, 11-14; Mr 15.1-5; Lc 23.1-5)

²⁸januxun Caifásin Jesús yukakin
keyutan penaya romano xanen ibu
Pilaton jiwe ewapa anu Jesús jau
iyutanunbun romano soldadobu
yunuaya judio xanen ibubun shinain:
“Nawan jemaintin anu jikia Moisin
nuku yusiniwen taea nawan detsiswen
chakabutan ana Pascua nawai besikin
en pitidumaki”, iki pepai nawayukatsi
jikiabuma ²⁹jaskaibun jatun beya
unantan jatu anu Pilato kaintan jatu
jancha wakin yukakin:

–Na juninan, ċjawa chakabu ashian
man jakidi yuiae?– jatu wa

³⁰–Juni chakabumakenan, mianu nun
iweama ikeanaii. Unanti watan nuku
kupixunwen– akabu

³¹Pilatondi jatu yuikin:

–Iyuxun jaska matun xenipabun matu
yusinpauni keska wakin matumebi
unanti watan kupitankanwen– jatu wa
judio xanen ibubun yuikin:

–Nun tenanpanan min nuku
nemamiski. Jau tenanunbun mian besti
min yunutiduki– akaya

³²jaska wakin tenanxanaibu Jesúsun
nuku yuishinadan, unanmabia jabiaskadi
jatu amaya ³³ninkatan jawen kene
medan ana jikixun Pilaton Jesús
kenaxun yukakin:

–¿Miadan, min judio xanen ibubu binu
keyuamen?– aka

³⁴Jesúsundi yukakin:

–¿Mimebi min ea yukai? ¿Juni betsan mia ekidi yunuadaka min ea yukai ikai?– aka

³⁵e itan Pilaton yuikin:

–Eadan, en judiomaki, jaska min ea yuipananan. Minabu judiobu inun min xanen ibubu Diosbe janchanikabun mia ea inankanxuki. ¿Min jawa chakabu meshinamen?– aka

³⁶kemakin:

–Eadan, en Xanen Ibu kayabiki. Mia yuinun ninkawe. Nenua junibu xanen ibumisbu keskai en xanen ibuamaki. Jakia en kushipadan,na nenu mai anua yudabun shinain jiweabu keskamaki. Jakia na, mai anua en xanen ibuya judiobun ea achixun mia anu ea iweyamanunbun en tsumabu ewen taea nemakanai jatube detenamekeankanxuki. Jaskaken eadan, en Xanen Ibu kayabiki, nenuamadan. En jawa chakabu jayamaki– aka

³⁷januxun Pilaton ana yuikin:

–Jaskakenan, chanima min xanen ibu kayabida– aka

Jesúsun ana yuikin:

–Min jaska jadi yuaidan, en Xanen Ibu kayabiki. Jaskanun ika yudabube jiwei en taxnikidaniki, jatu chanima kayabi mextanmaidan. Tsuabunda chanima jancha bechipaikin en jancha ninkamisbu– aka

³⁸romano xanen ibu Pilaton yuikin:

–Chanima janchadan, ¿jawamen?– itan

Jesús jau mastanunbun Pilaton jatu yununiaki, na janchadan
(Mt 27.15-31; Mr 15.6-20; Lc 23.13-25)

jaska wa janu judio xanen ibubun manaibu anu ana kainkidan Pilaton jatu yuikin:

–Ja juni en unanti waxudan, jawa chakabu jayamaki. ³⁹Pascuatian badi tibi juni bestichai jawa wama en matu nichinxunmis keska wakin, ¿judio

xanen ibu kayabi Jesús jawa wama matu nichinxunpa?– jatu wa

⁴⁰dasibibun jui kushipawen yunukin:

–Ja nuku axuanma ja juni betsá Barrabás yumetsubiaken nuku ja kainmaxunwen– akaibun

19 ¹Pilaton ninkawanxun jatu yunua bichi kushatiwen Jesús kusha kusha atan ²kaxe wakin romano soldadobun nishi muxaya maiti waxun Jesús maimaxun xanen ibun bemakia tadi tashijaida sawematan ³bestibu Jesúsun besuudi nixun kaxe wakin yuikin:

–Judio xanen ibu kayabidan, min miaki– iwanan, jawen besuki bepaistantanaibun

⁴Pilato ana kaintan judio xanen ibubu yuikin:

–Jesúsun jawa jatun chakabu wama ishian en matu unanmakin kainmai uinkanwen– jatu waya

⁵muxa maiti inun tadi pauti tashipa meshu duakabi sawemabu jawen besu jimin iduma Jesús kainkidanaya Pilaton tenankatsi ikama ana jatu yuikin:

–Na juni man iwexudan, uinkanwen– jatu wa

⁶uinkin Diosbe nukunabu janchaxunika xanen ibubu inun Templo mekenikabun jui kushipawen Pilato yuikin:

–Cruzki mastawé! Cruzki mastawé!– akeakeabu

jaska waxun atidubuma unanbiakin Pilaton jatu kaxe wakin ana yuikin:

–Jawa chakabu jayamaki. Matunmebi iyuxun aditankanwen– jatu wa

⁷Diosbe nukunabu janchaxunika xanen ibubun yuikin:

–Chani chakai: “En Diosun bakeki”, imiski. Diosun jancha Mosésin nuku kenexuni nun jayaki. Jaskawen taexun Dios yuankin kanemiswen taea nun yunuaiwen taeandan, jau mawanunwen– aka

⁸jaska yuiaibu ninkatan Pilato ana datekin ⁹jawen kene medan ana chintuanbain Jesús iyuxun yukakin:
 -¿Min janiamen?– aka Jesúsun ana jawa yuiamaken
¹⁰jaki sinatakin Pilaton ana yuikin:
 -¿Min ea ana jancha wamamen?
 En kushipawen jawa wama en mia nichintidu inun en kushipawendi en mia jatu mastamatidu, ¿min unanmamen?– aka
¹¹jaska yuiai ninkatan atimas Jesúsun kemakin:
 -Diosun dasibi damiwanitun mia kushipa yunuama ekidi min kushipa jayama ikeanaii. Jaskaken jabun ea achixun mianu yunuxun ea nichianbunan, jabun chakabudan, mina binuabuki, Dios sinatamakinan– aka
¹²jaska wa ninkatan Pilato taxnikidan Jesús jawa wama nichinun ikaya judio xanen ibubun jui kushipawen Pilato ana yuikin:
 -Tsuada xanen ibu kayabi ikatsis ikin min xanen ibu kayabi César danankin jawen kushipa mebinpai imiski. Jawa wama Jesús min nichiainan, min Césarn jaibumaki– akubainaibun
¹³⁻¹⁴janu Pascua meshukidi ixanaitian ma badi manananbi kaya jaskaibu Pilaton ninkatan Jesús taxnimabidan mishki buyakin kedad wanibu jawen kena hebreo janchawen kenakin Gabatá januxun yunuti anu tsauxun kaxe janchawen judio xanen ibubun jatu yuikin:
 -Nadan, matun xanen ibu kayabiki– jatu wa
¹⁵jaki sinatakin jancha kushipawen yuikin:
 -Tenandiwe! Tenandiwe, cruzki jatu mastanmatanan!– ikubainaibun Pilaton ana jatu yukakin:
 -¿Jaskakin matun xanen ibu kayabi jatu mastamapa?– jatu wa

Diosbe nukunabu janchaxunika xanen ibubun yuikin:

-Nukudan, nun xanen ibu betsa jayamaki! César besti nukun xanen ibu kayabiki. Jatu mastamadiwe!– akabu ¹⁶jatun janchawen taexun Jesús jatu mastamakin romano xanen ibu Pilaton jawen soldadobu yunua iyuaibun

**Cruzki Jesús mastanibukiaki,
 na janchadan**

(Mt 27.32-44; Mr 15.21-32; Lc 23.26-43)

¹⁷januxun jaki mastakatsi cruz Jesús iamatan xadamabainkin Jerusalén uke medanua kainmabainkin ja mati jawen kena Buxka Xau Mati anu mapematan, hebreo janchawenan, Gólgota anudan, ¹⁸⁻²⁰januxun jawen tadi pekaxun cruzki mastaxun: “Nazaret anua Jesús judiobun xanen ibu kayabiki”, iwanan, Pilaton jancha dabe inun besti ji bexa sapaki hebreo janchawen inun, griego janchawen, inun romano jancha latinwen kenetan jatu buma Jesúsun buxka mamaki cruzki ja mamaki mastaxun netanbu romano soldado betsabundi juni yumetsu dabedi mastaxun betsa yusudi nichinxun betsa yusmaudi nichintan Jesús namakis wabu Jerusalén dapikea bukin Pilaton jancha Jesúsun buxka mamaki netan judio ichapabun uinbainbainkin ²¹jaska wabu uinbain Diosbe nukunabu janchaxunika xanen ibubu Pilato anu buxun yuikin:

-Jadi min kenexun jatu netanmatidumaki: “Judiobun xanen ibujaidaki”, akinan. Jakia jaska ibubis yuimis keska jatu kene betsa waxunwen, eska wakinan: “Eadan, en judiobun xanen ibu kayabiki”, imiskididan– akabu ²²Pilaton jatu nemakin:

-Jawada en ma keneadan, jau jabiaska kene nenunwen– jatu wa

²³cruzki Jesús nichinxun soldado dabe inun dabetan Jesúsun tadi tibi

jabu tibibun paxkatan jakia jawen
sanpu chaipa jidabi kexemawen taea
²⁴yuinamei:

–Paxkakin chakabuwayamanankanwen.
¿Tsuau bimenkain? jawen beyusti
jexe putakin tsadin tsadin akin
putanankanwen– iwanan, jaska
bebunkidi Diosun jancha anu kenekin:
“En tadi paxkakin en sanpu bikin jawen
beyusti putaxankanikiki”, akin yuini
unanmabia jaska kenenibu soldadobun
jabiaskadi wanibuki.

²⁵Jaska waibun Jesús mastabu dapi
jawen ewa inun, jawen ewa betsa
Cleofásin ain María inun, María
Magdalena inun, ea nun nia ²⁶⁻²⁷jawen
ewa inun ea uinkin ekidi Jesúsun yuakin:

–Ewaan, ja mia dapi niadan,
min bakewawe– iwanan, ea
bechipaijaidamisxun eadi yuakin: –Baa,
ikis en ibu min ewa ea waxunwen. Ea
uindaxunkubainxanwen– ea wa en jiwe
anu iyuimaxun en medabewapauniki.

Jaskatan Jesús mawanikiaki, na janchadan

(Mt 27.45-56; Mr 15.33-41; Lc 23.44-49)

²⁸Jesúsun jaska nuku yuitan dasibi
jawen Epa Diosbe yubakani keyuai unain
Diosun jancha anu jaska jakidi kenen
menei Jesúsun jui kushipawen yuakin:

–Ma unpax manui en tetsusinaki– ikai
²⁹ninkatan jabun kenpuki uva vino
muka mata tsaua jaki tsinitiki pu atan
tawaki ustanaxun Jesúsun kexa anu
sananaxunabu ³⁰tsu akin keyutan jui
kushipawen Jesúsun yuakin:

–Dasibi en ma keyuaki– itan bekua
tinian mawakin jawen Yushin ibu anu
nichiniki.

Jashinwen Jesús pishipe akin chachinikiaki, na janchadan

³¹Janua judio xanen ibubu yuinamei:
“Meshukidi sábado janu medibijaida

Pascua nawatitianki. Cruzki jatun yuda
mapuabu sábadotian nun jenetidumaki,
Dios jau nukuki sinatayamaxanunan.

Jatun yuda jau jawaida butenunbun
Pilato yununun bukanwen”, ika
buxun Pilato yuakin: “Cruz anua
jatun yuda jawaida butetiki. Jau
jawaida mawanunbun jatun kishi jau
kishtekenunbun jatu yunuwe”, akabu
³²Pilaton jabiaskadi shinankin jatu
yunua soldadobu buxun ja dukun
juni yumetsu dabe Jesúsbe mastabu
kishtekedabetaen ³³janua Jesúski
kemaxun ma mawa uintan jawen kishi
tekeabuma ³⁴jabiaskabiaken soldado
betsan jashinwen Jesús pishipe akabu
janua jakimamadi jimi jawen jene jusia
jabaya ³⁵⁻³⁷jakia bebunkidi Diosun
jancha kenen anu yuakin: “Jawen xau
tekeama ixankanikiki”, anibu inun, kene
betsa anuxun yuakin: “Tsuada chachiabu
jawenabun uinxankanikiki’, iwanan,
kenenibudan, unanmabia jabiaskadi
keneni menekin adianibuki. Matundi
man ikunwanxanunbun jawada ibubis en
uini en matu yuiaii. En uiniwen taea en
jancha chanimaki.

Jesús jawaida maiwanibukiaki, na janchadan

(Mt 27.57-61; Mr 15.42-47; Lc 23.50-56)

³⁸Januxun juni betsa José jawen
mae Arimatea judio xanen ibubuki
datekin june Jesús ikunwanshinatun
Jesús mawa unandiai jakia natian
ana dateama Jesúsun yuda maiwakin
janatanun ika kaxun Pilato ea akin
yuka jawen yuda yunua José jawen
tsumabube kaxun Jesúsun yuda cruz
anua butexunabu ³⁹ja dikabi meshu
medan Jesúsbe janchatanya
Nicodemon jawen tsumabubetan
30 kilo mirra inun áloe intini teipa
jusia bea José jawen tsumabube
kaxun ⁴⁰jaska judiobun yuda mawa

maiwakin pewamisbu keska wakin Jesúsun yuda dapuxyabi yabukubainkin initi teipawen dapuxkubainkin tadi juxupawen yabukin keyutan⁴¹⁻⁴²badi jiki ma juindukunti kemaya jin jin ikin janu Jesús mastakanxu dapi miban xukua naman janu yuda mawa datanti mishki tanpe kini bena waimabu janu yuda mawa datandiabuma anu jawaida ja medan janakin mistutan mishki ewapa beputiwen beputan inun bunibukiaki.

**Jesús bestenkaina benanibukiaki,
na janchadan**

(Mt 28.1-10; Mr 16.1-8; Lc 24.1-12)

20 ¹Janua Jesús mawashina ana besteni matu yuinun ninkakanwen. Juindukuntitian Jesúsun yuda mishki tanpe medan dakaken uxa dabea penai taei penadiama meshuken domingotian taeaya Jesús maiwakin janashinabu anua jatube María Magdalena kakin tanpe bepemana uintan Jesúsun yuda jayama uinbidani ²Pedro inun ea anu kushi chakayamakidan nuku yuikin:

–Nukun Xanen Ibu yuda janidaki nuku buanbuki. Janida datanbu nun unanmaki– nuku wa

³ninkatan Jesús maiwashinabu anu Pedrobe kai ⁴kushidabekainkin ea dukun binukain tanpeki ⁵kemaxun dankukain tanpe medan uinkin jawen yabushinabu besti daka bechitan en jikidiamaken ⁶ea ichun chipu Simón Pedro jui ja dukundi jikixun jawen yabushinabu uinkin ⁷jawen buyabushinabu sebi pewaxun ja kachu datan uindiaya ⁸⁻⁹janua eadi jikixun jawen yuda yama uintan: “Mesías Cristo mawa ana bestenxanikiki”, iwanan, Diosun jancha una medan kenebianibu nun ninka pewadiamabia: “En Xanen Ibu Jesús ma bestenkainamenkain”, ikin ikunwankin en shinaniki. ¹⁰Jaskakain uintani nun

ana chintunkidaniki, janu nun jiwe anudan.

**María Magdalena Jesú nukui
taenikiaki, na janchadan**
(Mr 16.9-11)

¹¹Jakia María Magdalena katani ana chintunkidan jua mishki tanpe kexa nia kaxai jeneama nixun ana uinun ika dankukain tanpe medan uinkin ¹²nai tsuma dabe tadi juxupa sawea janu Jesús datanshinabu anu jadidi bupinshinabukidi betsa tsaua jadidi taxkunwanshinabukidi betsa tsaudia jatu bechitanaya ¹³januxun nai tsuma dabetañ yukakin:

–Ainbuun, ¿jaskai min kaxai?– akabu
–En Xanen Ibu yuda janidaki ea buanbuki. Janida datanbu en unanma benai en kaxai ikaii– jatu watan

¹⁴nasaukekauan uinbiakin tsua nia dabanan unanma Jesús bechia ¹⁵januxun Jesúsundi yukakin:

–Ainbuun, ¿jaskai e iskaun janu jua min kaxai ikai? ¿Tsua min benai ikai?– aka

miban taudumis ikai dabanan Marían shinankin yuikin:

–En Xanen Ibu yuda buxun jani min ea datananxumenkain ea yuiwe, en buaidan– aka

¹⁶Jesúsun yuikin:

–Maríaan– aka

jawaida dabeketan benimajaidakin hebreo janchawen yuikin:

–Rabuni!– akin nukun janchawen kenakinan: –En Yusinaan– iwanan, ikuwa

¹⁷Jesúsun nemakin:

–En Epa anu kadiama uatian en matube jiwemis keskai en ana matube itidumaki. Ea tsumakin ea bashiyamawewiwanan, –En betsabu anu kaxun en mia yuixu jatu yuiditanwen. Matu medabewai en Epa anu dasinun ika en kaxanaii. En Epadan, jabia matun

Epadiki. En Dios mekenikadan, jibia matun Dios mekenikadiki– aka

¹⁸María Magdalena kaxun Xanen Ibu Jesús ana jiwea uintanxu jadi Jesúsun axu nun jawen tsumabu nuku yuia nun ninkaken

Jesús bestenkidan jawen tsumabu uinmanikiaki, na janchadan

(Mt 28.16-20; Mr 16.14-18; Lc 24.36-49)

¹⁹jabias domingo meshu medan Tomás nukubemaken jiwe medan ichatan judio xanen ibubuki datekin beputi nun bexekin keyuken Jesús jikikain damitushitan nuku nashui ika nixun nuku jancha wakin:

–¿Jaska man unanumamen? Ma en juai dateyamakanwen– nuku watan

²⁰januxun nuku jaska watan jawen meken xui inun jawen jashi xui nuku uinmaya nukun Xanen Ibu ana uin nun benimajaidaya ²¹ana nuku yuikin:

–¿Jaska man unanumamen? En matu juxuanki. Datetima kushipa en matu bashixunaii. Jaska inun, jaska en Epa Diosun ea nichinkin yununi keska wakin en matu nichinkin yunudiaii– iwanan, ²²⁻²³kushipa wakin nukukidi kunchunkain kushu atan nuku yuikin:

–Yushin Pepa jayadikanwen. Jaskatan tsuabuda Dioskidi jabu chakabu jaya man jakimawaken Diosundi jatun chakabu jatu buaxunxanikiki. Jakia jatun chakabu man jakimawamaken Diosundi jatun chakabu jatu buaxunama ixanikiki– nuku watan janidaki ana dami kainken

Tomásin Jesús uintan besti ikunwanikiaki, na janchadan

²⁴⁻²⁵Jesúsun 12 tsuma kushipaya betsa Tomás tsupibu bakeken jawen kenamisbu nun xukua anu Jesús jua nun uinshinken jabiatiandi nukube ikama ishinken meshukidi juai betsan Tomás nun yuikin:

–Nukun Xanen Ibu jiwea nun uinshinaii– nun akeakea nuku ikunwanma yuikin:
–Jawen meken anu mastashinabu xui en uianma jabianudi en metuti en mistuama chachishinabu jawen jashi xui en mekenwen en mekin mistuama Jesús ana jiwea en ikunwantidumaki– nuku washinken

²⁶ana 8 día kaya Tomásbe ichaxun ana nun xui bepuken keyuken Jesús ana jikitán nuku bebun damia nashui ika nixun yuikin:

–¿Jaska man unanumamen? Ana en juai ewen dateyamakanwen– iwanan,

²⁷Tomás jabis yuikin:

–Iksis ea uindiwe. En meken xui mewe. Meken sananbáin en jashi xui mistudiyuwe. Ana ikunwanbuma keskama en jiwea ea ikunwanwen– aka

²⁸uintans damapaikin Tomásin yuikin:

–Chanima min en Xanen Ibusi, en mekenan yushin Diosdan!– aka

²⁹–Ea uintans min ea ikunwaiin. Jakia jabun ea uianma en jashi xui uianmabia ea ikunwanxanaibudan, Diosun jatu duajaida waya benimakubainxankanikiki– akai nun ninkaya ana jabiskadai damikainiki.

³⁰⁻³¹Chanima ana jawen unanti dami ichapa Jesúsun nukun bedubi abiakubainiken dasibi en matu kenexunamaki. Jakia dasibi man uianmabia en jancha keneai uinkin ninkakin unantan: “Jesús Mesías Cristoki, Diosun bake kayabidan”, akin Jesúswen taea man jiwei ikibi ixanai man ikunwanxanunbun en matu kenexunaii.

Jawen tsumabuki ana Jesús nukunikiaki, na janchadan

21 ¹Jerusalén anua Jesúsun nuku bechimai janchashina ana Galilea Ianenwan jawen kena

betsa Tiberias Ianenwan kexa anu nun jawen tsumabu nun ka Jesúsun eska wakin nuku uinmani matu yuinun ninkakanwen.² Galilea anu nun ka Simón Pedro inun, Tomás ‘Tsupibu bakeen’, akin nun kenamis inun, Natanael jawen mae Caná Galilea anua inun, nun Zebedeo bakebu ea inun en betsa Santiago inun, ana Jesúsun tsuma dabe betsa nun icha mapuabun³ Simón Pedron nuku yuikin:

–En baka nexei kaii– ikaya

–Nun mibe kaii– abaini jabe kai jawen xaxu ewapawen nanetan jabe kaxun jawen jisin ewapa puntebiashinkin nun jawa baka biamajaida ishianyan⁴ ma penakidanaya Jesús ian kexa nia uinbiakin tsua nia dabanan nun unanmaken⁵ jui kushipawen Jesúsun nuku yukakin:

–Bakebuun, ¿bakadan, man jayamen?– nuku wa

nukun kemakin:

–Nun jawa biamajaidaki– nun wa

⁶–Ja xaxu yusiudi jisin ana puntekanwen, jaudixun man biaidan– nuku wa jaska nuku yunuxudi nun puntebauna ninibidankin baka dasibi nuku nexema jaska waxun xaxun nun nanetimaken⁷ en ea Jesúsun bechipajaidamistun Pedro yuikin:

–Nukun Xanen Ibu daki ikiki– en wa Simón Pedro jawaida ninkatan tadi pekaxun jisin punteshinai jawaida saweakin kedun atan ishchui pukutan nunakainaya⁸ jakia 100 metro besti xaxuwen kakin jisin baka mata xadabaini nun jawen tsuma betsabu keti itan⁹ xaxu anua butukainkin chi dekenen besti baka xuiai inun misi mania nun uiyanan¹⁰ januxun Jesúsun nuku yunukin:

–Ja baka man bixudan, nedí eskadabe bekanwen– nuku waya¹¹ janua Simón Pedro kakain xaxun inatan jisinman

baka ichapa bia ninikin xadabidankin mashin mapema 153 jati baka ewapabu nanea jisin baxnekeamaken¹²⁻¹³ Jesúsun ana nuku yuikin:

–Piyui bekanwen– nuku wa nuku baka nexemaxunwen taea: “Nukun Xanen Ibu”, ikin unantan: “¿Min tsuamen?” iwanan, nun yukama misi inun baka xuiá bixun nuku inan keyutan¹⁴ jaskai mawashina ana bestenkainshinxun Jesús nukuki dabe inun bestiki nukukin nuku uinmaniki.

**Jesúsun: ¿Min ea bechipaiai? iwanan,
Pedro yukanikiaki, na janchadan**

¹⁵ Januxun pikin nun meneaya Jesúsun Simón Pedro yukakin:

–Juanen bake Simóneen, ea ninkawe.

Nabun ea bechipaiaibun miandi ea bechipaikin jatu binunun, ixun, min yuishinadan, ¿jabiskas min shinain?– aka

–Xanen Ibuun, en mia bechipaaidan, min unaiin– aka

–Jabiskadi wakin enabu chaxuwan bake keskabu jatu ea mekexunkubainxanwen– iwanan,

¹⁶ ana Pedro yukakin:

–Juanen bake Simóneen, ¿min ea bechipai kayai?– aka

–Jaa, en mia bechipaiaidan, min ea unaiin– aka

–Jabiskadi wakin ea ikunwainbu chaxuwan keskabu ea jatu mekexunkubainxanwen– iwanan,

¹⁷ ana jawen jenekin Pedro yukakin:

–Juanen bake Simóneen, ¿min ea bechipaijaidai?– aka

dabe inun bestiki jabias yukaiwen taea Pedro juinti nishmai punu nukatan bechipaiaiwen taexun yuikin:

–Xanen Ibuun, en shinan dasibi unankin en mia bechipaijaidaidan, min unaiin– aka

–Jabiskadi wakin enabu chaxuwan keska jatu yusinkin jatu ea

mekexuindakubainxanwen– iwanan,
¹⁸⁻¹⁹ Jesúsun Pedro ana yuikin:
 –Chanima en mia yuiai ninkawe.
 Bedunan kushipakin tadi sawetan
 janida kaidan, min ma itishadashinaki.
 Jakia min anibu meshan dakaken
 juni betsan mia tadi sawemakin
 janu min kakatsi ikamabiaken mia
 iyuxankanikiki. Jabiaskabiaken ea
 ninkatan ea chibankakewi, ikisdan–
 akin jaskatan Pedro mawakin Dios jatu
 kenwanmaxanai jau ninka pewanun
 Jesúsun yuiai nun ninkaniki.

**Pedron Jesúus Juankidi
 yukanikiaki, na janchadan**

²⁰⁻²¹ Jesúsun jancha ninka
 keyutan dabekekaun ea Jesúsun
 bechipaijaidakubainmis badi kaya pi
 dakaxun en yukakin:
 –Xanen Ibuun, ɿtsuan mia akimenkain,
 jatu achimakinan?– en washina jawen
 pechiudia en juai Pedro dabekekaun ea
 uinkin Jesúsun yukakin:
 – Xanen Ibuun, ja junidan, ɿjaska
 wadiaxankanimenkain?– aka

²² Jesúsun kemakin:

–Xanen ibui en ana judiamakenan Juan
 jiwea mawamas ixanai keska en shinain
 jawen dabanan iyamawe. Mianan, jaska
 en mia yunumis besti akubainkin ea
 chibankakexanwen –akin Jesúsun Pedro
 yuiniki.

²³ Jaska bestibianiken ikunwainbu
 ekidi yuinamei: “Jawen tsuma Juan
 Jesúsun bechipaijaidanidan, mawamas
 ixanikiki”, ikin ekidi kaka akeakenibuki.
 Jakia: “Mawama ixanikiki”, akin
 Jesúsun ekidi yuiama jakia: “Xanen
 ibui en ana judiamaken Juan jiwea
 mawamas ixanai keska en shinain jawen
 dabanan iyamawe”, akin Jesúsun Pedro
 yubianikenan.

²⁴⁻²⁵ Ana midima Jesúsun akubaini
 dasibi nun kene keyuadan, jati una
 mai jidabi anuxun meketidubumaki.
 Jakia Dioskidi Jesúsun nuku unanmai
 uinkin ninkakin dasibi en tapiniwen
 taexun en jancha chanimawen
 ean ibubis en matu kenexunxudan,
 jatixuki.

Juan

JESÚSUN KUSHIPAYABUN JASKA WAKUBAINIBUKIAKI

HECHOS

Diosun Yushin Pepa
Jesúsun jawen tsumabu jatu
yubabainikiaki, na janchadan

1 ¹En jaibu pepa Teófiloon, ja dukun una en mia kenexun bumaimadan, ja dukun Jesúsun jatu yusinkin axunkin taewabidanimadan, jaska dasibi jakidi en mia kenexun bumaimaki. ²Nai anu kadiama Yushin Pepaki dasia nixun jawen tsumabu kushipayabu yusinkin jau jaska katuxun chanima akubainxanunbun jatu yunuyabis xaba betsatian nai anu inakainikiaki. ³Janua ma mawabiashina besteinmaxun jawen yuda kayabi ana xabakabi jatu kayatiwamakin jau unantijaidawanunbun xaba 40 díá jatu uinmakin jaskai Dios nuku xanen ibuxunxanaikidi jatu jancha wakubainikiaki.

⁴Janua Jesús jawen kushipayabube niyuxun jau Jerusalén anua kainbainyamayuxanunbun jatu nemakin yuikin:

–Jaska Epa Diosun matu yubani en matu yuishinan dan, jau matu inankin yunuxanun nenua kaianma jabianuxuns manayuxankanwen.

⁵Chanima Juanen jenewen dukun jatu nashimakubaibainyamaki. Jakia eanan, jabiaskadi wakin samama

duakabi Diosun Yushin Pepawen en matu nashimaxanaii, matu unanti wamakinan– jatu waya

Diosun nai anu Jesús aniai jawen tsumabun uinibukiaki, na janchadan ⁶januxun jatube ichabu betsan Jesús yukakin:
–Xanen Ibuun, čna jabiatianan, nawabu nichintan nukunabu Israelbu ana jatu pewakin kushipa wai min jatun xanen ibui taei kai?– akabu

⁷Jesúsun jatu kemakin:
–Jatianda ibubis jawen kushipawen Epa Diosun jaska waxanaidan, matunamaki, man unantidubumadan. Jatun besti unainkiki. ⁸Jaska man jawen unantidudan, jawen Yushin Pepa matu anu juaya jawen kushipa bitan Jerusalén anuxun inun Judea mai pakea inun Samaria mai pakea ja dabe jidabi anuxun inun chajaida mai kesua anu jiwebaunabu anu bukubaunkin ekidi man jatuki chanikunkainyuxanaii– jatu wai ⁹ninkakin uiainbun Jesús jaskabiamma nai anu Diosun ainikin duntanbainai nai kuin bekin bepukin juneaya ana uianbumaken ¹⁰Jesús jaska kainkin jatu jenebainai uin naiudi teskanxun uinkin jenediabumaken juni dabe sanpu juxupa sawea damia jatu be bun nitushitan ¹¹jatu yuikin:

—Galilea anuabuun, ¿jaskakin man naiudi uiain? Na jabias Jesús matu anua nai anu Diosun ainiaidan, jaskakainai man dama uinxu keskadiai ana jabias kadiakidanxanikiki, jaudiadidan— jatu wabu

Jesúsun tsuma kushipaya betsa wakin Matías katunibukiaki, na janchadan

¹²janua Olivos Mati anua Jesúsun tsuma kushipayabu Jerusalén anu ana chintunbidani kilómetro bestichai jatixun yununi besti anu juindukuntitian katani ¹³jaskabidani ja mae anu jikitan janu ikabu jiwe keyatapa dintu medan mapekenibukiaki, Pedron, Juanan, Santiagodan, Andrésdan, Felipedan, Tomásdan, Bartolomédan, Mateodan, Alfeon bake Santiagodan, Simón Celote jatun nawabu nichinkatsis imisdan, Santiagon bake Judasdan. ¹⁴Jabu jaskabidanima ja dintu anu ichai Jesúsun betsabu inun, jawen ewa María inun, ainbuaibu jabun ikunwainbu jatube ichaxun xaba tibi jau Diosun jatu medabewanun yukakubainibukiaki.

¹⁵Ja xaba tibi jaskakubainkin xaba betsatian 120 ikunwainbu jatube icha maniabu Pedron jatu yuinun ika benitan jatu yuikin:

¹⁶—En betsabu inun en puibuun, jaska bebunkidi Judaskidi Diosun Yushin Pepatun David yuia kenenidan, jabias Judasin akin meneimaki. Jaska wanikidi akin chanima jatun jatu iyuxun Jesús jatu achimaimaki. ¹⁷Jamen Judasdan, ja dukun Jesúsun nukube katuxun nukube daya inandiayamaki— ikimaki. ¹⁸Jaska Judasin chakabu shinankin jawen Xanen Ibu jatu achimashina ja pei pakabu jawen chakabuwen taexun bishianwen taexun juni betsan bai tude bitan janua Judas ibubis ikidan, manaundia maikidi besukidan tin iki pupexekei puku jadas iki keyutan mawanikiaki. ¹⁹Jerusalén

anu jiweabun ninkatan ja bai kenakin: “Hacéldamaki”, akin kenakinan, jatun janchawen yuiadan: “Jimi baiki”, anibu kenamisbuki. ²⁰Chanima Salmos una medan Judaskidi Davidin bebunkidi yuikin:

‘Jawen mae jenebainaya ana tsua janu jiweama ixanikiki’, ani inun:

‘Jawen daya jenebaina juni betsan jau ibu waxanunwen’, aniki.

²¹—Jaska Davidin kenenikidi shinanankanwen. Nukubetan Jesús chibanmisbun na junibu nun jatube paxkaisma Xanen Ibu Jesús nun chibaintian nukube ikubidanshinabu nun jayaki. ²²Juanen Jesús nashimai uintan ikunwanbidanibu inun nai anu Jesús inai jabun uinshinabu jau jabu betsabu nukuki dasitan jadi jau jaska Jesús mawa bestenkainima jau nukube jakidi chanikunkainxanun betsabu katunankanwen— Pedron jatu watan ²³januxun juni dabe José Barsabás jawen kena betsabu Justo inun Matías katután ²⁴jabun eska Dios jatu yukaxunkin:

—Xanen Ibu Diosuun, dasibibun shinan min unainwen taexun na juni dabe pepa jadatuda min katuai nuku uinmawen, ²⁵jau Judasin jawen chakabuwen taexun jawen kushipa daya benutan janu nuitapai kaken jau jawen daya kushipa betsabu binunan— atan ²⁶unankatsis ikin jawen unantiwen katukatsi unanti watan putabu Matías unanti wabu kaianyan ja katuabu Jesúsun 11 tsuma kushipayabuki Matías dasitan jatube ikunkainikiaki.

Diosun Yushin Pepa jatu anu junikiaki, na janchadan

2 ¹Janua ana betsatian judiobu Pentecostés nawai besiaibun Jesús ikunwainbu dasibi janus ichabun ²jawaidea

nai anua jawen bana niwe kushipa bei
danka imis keska xunku ibidani janu
maniabu anu kedun kedun ikin³ jaskakin
Jesús ikunwainbu tibi chi jede keska
xawa akeakei jatu mamaki madatamea ji
ibauni jatuki jikia akeakeaya⁴ jaskakin
dasibi jatu achimakin keyuaya jaska
janchatidubumabiaken nawa betsa
betsapabun jancha tibiwen Diosun Yushin
Pepatun yuimakin jatu janchamakin
taewaya

⁵mai pakea betsa betsapa anua
judiobu Jerusalén anu jiwei benibu
jiweabun jabu pepakin Diosun jancha
chibankin menekin jeneisbuma
⁶jawen bana ninkabidani janu midima
ichaxun ikunwainbu anu jancha betsa
betsapawen janchabaunaibun jadakidi
shinantima jatu wa akeakeabu juni
tibitun mai kesua anua jabun janchawen
janchaibu ninkai jaskawen janchaisbuma
ninkai⁷ jaskakainmaibu ninkai e iki teku
iake iakei janchanamebaunkin yuikin:

—Nadan, ¿Galilea anuabumamen, na
jaska dasibi janchabaunkanaidan?

⁸Nukun jancha tibiwen
janchabaunaibubin! ¿Nun ninkai? ¿Jaskai
ja junibu jaska janchakanimenkain? ⁹Na
nun nukubudan, Partia anuabu inun,
Media anubu inun, Elam anuabu inun,
Mesopotamia anuabu inun, Judea anuabu
inun, Capadocia anuabu inun, Ponto
anuabu inun, mai pakea Asia anuabu inun,
¹⁰Frigia anuabu inun, Panfilia anubu
inun, Egipto anuabu inun, Libia mai pakea
Cirene dapi anuabu inun, Roma anuabu
inun, ¹¹betsa judio kainibu inun, betsabun
judiobun beya chibanmisbu inun, Creta
anuabu inun, Arabia anuabu beimabu
nukun jancha tibiwen Diosun kushipawen
e imatikidi yuiaibu nun jatu ninkai— iake
iakeabun

¹²Jaskaiibu jatu ninkatan dasibi
jadakidi shinantima e iki keyutan yuka
iki:

—Na eska chanii janchaibudan,
çjawamen?— ikaibun

¹³jakia juni betsabun jawa shinanmadi
jatu kaxe wakin ikaibukidi jatu yuikin:

—Paean daki janchai ikanikika!—
ikaibun

**Pedron jatu tapinmai
janchanikiaki, na janchadan**

¹⁴janua Jesúsun 11 tsuma kushipaya
betsabube Pedron jatun jancha ninkai
benia nixun jui kushipawen jatu yuikin:

—Judiobu inun dasibi Jerusalén
anu jiweabuun, eska en matu yuia
ninka peidawakanwen, jaska man
ninkai janchaidan. ¹⁵Na yudabudan,
paeanbumaki, jaska man shinankin
ikunwain keskamadan. Jaskai e iskaun
badi keyadiamabiaken 9:00 badi
paentidubumaki. ¹⁶Jakia natian jaska
taxniai ninkakin man uiainan, jaska
bebunkidi Dios yubakanixun akikiki.
Jawen jancha yuixunika Joel Diosun jatu
yuimakin:

¹⁷Dios chanii:

‘Ma badi jawen jenei kaya en Yushin
Pepa yudabu anu en jatu yunua
jatuki dasiken matun juni bakebu
inun matun ainbu bakebun ekidi
yusiaibun
bedunanbu uxa keskaxun
dami betsa betsapa uiainbun
anibubu uxa ekidi
namadiaxankanikiki.

¹⁸Jabatiandi en tsumabu junibu inun
ainbu en Yushin en jatu inan
ekidi yusinbaunxankanikiki.

¹⁹Jaska inun, nai anua jawen e imai
kushipa wakin
mai anuadi dami betsa betsapadi en
waxanaii.

Jimi jabamakinan, chi wakinan,
basnun bai kua jawen kuin keska
wakin
en jatu uinmaxanaii.

- ²⁰ En bake kushipajaidai chaxakapai
xanen ibui jua kemadiamaken
xaba betsa betsapaxanikiki.
Ja jaskaitian badi ana chaxama
meshu wakin inun uxe ana
chaxamadi jimi keska ixanikiki.
- ²¹ Januxun tsuabunda: En Xanen Ibu
Yavé Dios kushipaki, ikin
ea yuiaibu jabu besti paxakin jatun
jiwea ikibi ika bixankanikiki',
aka Joelin yusintan nuku kenexuniki,
iwanan, Pedron ana jatu yuikin:
²²—Israelbuun, en matu yuiai
ea ninkakanwen. Matunan, man
unanzaidaii. Jesús Nazaret anua jua
Diosun kushipa watan jawen e imati
inun jawen unanti wamakin dami
itimaska tsuan atiduma wamakin
jawen kushipa matu uinmakin Diosun
ama akeakekin xabakabi matu
uinmakubainimaki. ²³ Jaska yubakani
Diosun ja juniwen abainai shinamma
jaska wai bextenun, iwanan, matun
jawen bake danankin jaki yubakatan
jatu achimatan tenanmanun, iwanan,
juni chakabu man jatu mastamaimaki.
²⁴ Jakia mawabiaken Jesús Diosun ana
bestenwainmaki, mawamamistun isin
tenemakin bashitidubia jawen jiwea
yabutiduma binumakinan. ²⁵ Jamen
xanen ibujaida Davidin Jesús iki kaikidi
yuikin:
‘En xanen ibun ea mekekin
en yusiudi jawen kushipawen ea
medabewai en uinkubainaya
jawa tsuan ea maematan
binuntidumaki.
- ²⁶ Jaskawen taea juinti shinan
chankain benimai nawakin
kenwankin jeneama
en jiwea dasibiwen ikunwain jawa
dateama en ikunkainxanaii.
- ²⁷ Mawabu janu dasibi bumisbu anu ka
min medibi min tsumapan yuda
maiwati tanpe anu

jau dakai chapuyamaxanun min
nemaxanaii.

²⁸ Jaska watan janu jiwekuin kati bai
ea unanmatan
mia anu jiwemakin min ea
benimawakubainxanaii',
akin nuku kenexuniki– iwanan, ana
Pedron jatu yuikin:
²⁹—En betsabu inun en puibuun, nukun
xenipabu kayabi Davidkidi chanima
xabakabi matu yuinun ea ninkakanwen.
David mawa janu maiwakin jawen yuda
jananibu nun uinmiski. ³⁰ Jabias David
Diosun jancha yuixunika jawen yudakidi
jamebi janchama jakia jawen baba
betsa kaindiamakidi Diosun yubakin
xanen ibujaida ixanai unanmakin
yuimaniki. ³¹ Diosun jancha yuixunika
David bebunkidi Diosun shinanmakin
Mesfaskidi janchamakin jatu yuimakin:
“Mesías Cristo mawa jawen yuda
chapuama inun mawabu anu jawen
yuda bashiama ana bestenwanxanikiki”,
ika jakidi janchaniki. ³² Jamen Diosun
jaskakidi janchamanidan, ja Jesús
mawa bestenwanshina chanima
ibubis dasibibun nun uinkubainshina
nun unankanaii. ³³ Januxun ana
bestenwantan Dios jau jabe xanen ibunun,
iwanan, jawen yusiudi tsautant jaska
yubakani jawen Yushin Pepa jawen Epan
Jesús inan jatun nuku inan akeakekin
nuku kushipa waikiki, na jabia ninkakin
man uiainan. ³⁴ Jaska inun, Davidkidima
tsuada nai anu kaxanaikidi jabias Davidin
jamebi yuikin:
‘Diosun en xanen ibu yuikin: En
yusiudi tsauyuwe.

³⁵ Janu miki sinataibu en mia
yamawaxundiama
ebe xanen ibukin manayuwe',
aka jatu yusintan nuku kenexuniki–
iwanan,

³⁶—Israelbu dasibibuun, chanima matu
xabakabi shinanmanun ea ninkakanwen.

Ja jabias Jesús cruz anu man jatu mastamaimadan, Diosun bestenwantan nukun Xanen Ibu kayabi nuku waxuinmaki, jawen Mesías Cristodan– jatu wa

³⁷janu jatube ichabun ninkai
ćjaskatimen? ika jatun juinti nishmajaidai bika tenekin shinankin Pedro inun Jesúsun tsuma kushipayá betsabu jatu yukakin:

–Betsabuun, ćjaskatan nun
jaskatidumen?– jatu wabu

³⁸Pedron jatu kemakin:

–Dios man chibankatsis ikaidan, matun chakabu jenetan matun shinan betsa watan Dios anu bedikanwen. Jaska watan man Jesucristo ikunwainwen taexun jawen kenawen matu tibi nun matu nashimaya matun chakabu buatan jawen Yushin Pepa Diosun matu inan man bixanaidan.

³⁹Nukuna bestimaki. Jaska Dios yubakani ma akikiki. Matu dasibibu inun matun bakebu inun chajaida manibaunabu nukun Xanen Ibu Dios jaska matukidi yubakaidan, dasibi matukidi iniki. Jaskawen taexun jatida jawenabu wakin katukin kenakatsis ikikiki– iwanan,

⁴⁰ana jancha ichapawen Jesús mekenankidi xabakabi yusin pewatan Pedron jatu yusinkin yuikin:

–Ja yudabu jiwe chakabu anua paxadikanwen– jatu wa

⁴¹januxun ja xabatian jawen jancha ninkakin ikunwankin shinan betsa waibu 3,000 yudabu nashimabu jati ana jatubetan ikunwain jatuki dasinibukiaki. ⁴²Januxun Jesúsun kushipayabun jatu yusiaiabu jabun jatun yusian tapinkin chintuanma jawada jatun jamapai paxkai medabenain inun, ichaxun jatubetan Jesús jatu mawaxunima shinankin misi pikin inun, jabubetan Dios kushipa yukakubainibukiaki.

Jabun dukun ikunwantan eskai jiwekubainibukiaki, na janchadan

⁴³Jabatiandi Jesúsun tsuma kushipayabun Diosun jatuwen dami

atimaska ichapa akin jawen unanmati betsa betsapa akaibun dasibi Jerusalén anu jiweabu e iki jabaa ikubainaibun ⁴⁴ikunwainbu dasibi paxkama medabenain jatun jamapai yaushiamá inananankin ⁴⁵betsabu mabuyabu inun baiyabun jawen pei bikatsi juni betsabu inantan jawen pei bitan ikunwainbu nuitapaibu jawa jayama pei jatu paxkaxunkin medabewakubainibukiaki. ⁴⁶Janua xaba tibi Templo jemaintin anuxun kushipa yukakin jiwe anuxundi ichaxun jawa chintuanma shinan chankabetanan jatubetan pikin Jesús jatu mawaxunima shinanmati misi pikin ⁴⁷Dios kenwainbun dasibibun jatukidi pe shinankubainaibun xaba tibi betsabun Jesús ikunwain yuda kaian ichai jatuki dasiaibu Diosun jawenabu jatu wakin kenakubainikiaki, jabu jiwei mekekatsi ikaibudan.

Juni chantu jabiaska kaini Pedron beniniaki, na janchadan

3 ¹Janua xaba betsatian ma 3:00 badiken judiobun Dios yukamisbutian Pedro inun Juan Templo anu buaibun ²jabianudi juni betsa chantu kainitun jau jatu pei ea anun, iwanan, xaba tibi Templo jemaintin mishki kene jikiti xui jawen kena Hermosa, nukun janchawen yuia Jawendua anu jawenabun iyuxun tsautantanmisbu ³Pedro inun Juan jikinun ika buaibun juni chantun jatu uinkin yukakin:

–Ewen nuikin ea pei inankanwen– jatu wa ⁴jabun uinkin dais keyutan Pedron yuikin:

–Nedi nuku uinwen– aka

⁵“Ea pei inankaniki”, ixun bedi ikama jatu uiyanan ⁶januxun Pedron ana yuikin:

–En peiumaki. Jakia en ja jayadan, en mia inain. Diosun kushipa en jayawen

taexun en mia xuxawatiduki. Jesucristo Nazaret anuatun kena kushipawen taea benitan nidiwe- atan

⁷Pedron jawen meken yusiudiawen metsunxun benia jawen tae inun jawen jupukxu jawaida mestein jukushitan ⁸janua ja juni chantuni beni ishchui ti itan ni taekaini Pedro inun Juanbe Templo jemaintin anu jikikaini ishchui ti ti ikainkin Dios kenwankin taewabainaya ⁹dasibibun uiainbun nikainkin Dios kenwanbainai ¹⁰jabun uin e iki datekin ¹¹jaskai jaskaxumen? ikin: –Ja junin jatun Templo jemaintin jikiti xui jawen kena Jawendua anu tsauxun pei jatu ea amis ma xuxa unain jabia ikikiki- ikaibun

**Badi utati jawen kena Salomón
anuxun Jesúskidi Pedron xabakabi
jatu yusinikiaki, na janchadan**

¹¹ja juni chantu kaini ma xuxawabu Pedro inun Juan jatu dapaxkama jatube niken dasibi yudabu kushibidan uin e ibidan ibidani Templo jemaintin kexa janu badi utati jawen kena Salomón anu jatuki dasi ichabidanbidanaibu: ¹²jaskaibun Pedron jatu uinkin yuikin: –Israelbuun, ¹³¿jaskai nuku uin man e ikanai? ¹⁴Na juni nun xuxawaxu benitan nia uinkin nukun kushipawen nun axu man shinainmenkain? ¹⁵Dios keskakin nun juni pepajaidawen taexun nun xuxawaxu man daka shinain? ¹⁶Nun jaskamaki. Matu yuinun ninkakanwen. Jabias nukun xenipabu Abraham inun, Isaac inun, Jacobun Dios kenwanpaunibun na juni ma xuxawaxuki. Ja inun, jawen bake bechipajaidakin Diosun nukuwen taexun kenjaidawabiamiken danankin matubu jaki sinatakin achixun nawu xanen ibujaida anu man iyua januxun Pilaton shinan pewatan tenankatsi ikama nichinpanan man

nemaimaki. ¹⁷Januxun matundi Pilato yukakin Jesús juni pepatun jawa chakabuwaisma jau taxnimaman Pilato yunuama ja juni chakabu besti medabewakin man yuka matu jawa waxuanma nichinxunimaki. ¹⁸Jaska wakin jatun nuku jiwekuinmaxanai man jatu tenanmabia mawa Diosun ana nuku bestenwanxuinma nukubun uinkubainimaxun nun unai.

¹⁹Jaskawen taexun Jesús ikunwankin jawen kushipawen na juni man uinmis jawen yuda jidabi kushipa wakin nun ma xuxawaxuki, jaska dasibitun man uiainan- iwanan, ana jatu yuikin:

²⁰–Enabuun, Jesús ikunwankatsi ikama jawen kushipa unankin kayati wakin tapindiamabia matun xanen ibububetan ja juni unanma man tenainma chanima en unai. ²¹Ja man jaska waimakididan, bebunkidi Diosun jawen jancha yuixunika dasibibu jakidi chanikin nukunabu yuikin: “Jawen Mesíasdan, nuitkapatan mawaxanikiki”, anidan, jaska yuini keska wakin Diosun ma jatu menemaimaki.

²²Jaska shinanma Dios man chibankatsis ikaidan, matun chakabu jenetan matun shinan betsa watan Dios anu bedikanwen, jau matun chakabu matu buaxununan. ²³Diosun matu jawen daewakin pepawakin benimawakatsis ikin jawen bake Mesías Cristo bebunkidi katutan matu yubaniki, jau man jaki dasixanunbunan.

²⁴Janua natianan, Jesúsdan, naiudi kayuimaki. Jaudixun Diosun mai anuabu jawen jatu pewamakin keyumakin manakamayuikiki, jaska jawen jancha yuixunika medibibu jiwxun nuku kenexunpaunibu keska wamayukinan.

²⁵Janua Moisésdi jakidi nukun xenipabu jatu yuidiakin: “Jawen jancha yuixunika ea keska matu anua matun Yavé Diosun kainmaxanikiki. Jaska matu yunuai

ninkatan chibankubainxankanwen.

²³Jakia jawenabu bababun tsuabunda Diosun jancha yuixuniaka Mesías ninkakatsi ikabuma Diosun kupikin jatu yamawaxanikiki, ana jawenabuma wakinan”, aniki.

²⁴Moisés besti jaska jakidi chaniama jakia jawen jancha yuixuniaka tibi Diosun jatu yuimakin Samuelwen taewakin jaska Diosun jawen bake yunuxanaikidi yusiin jabudi chanikubainbuki. ²⁵Jaska inun, matu jenekatsi ikama Diosun jawen jancha yuixunikabu janchamai jabuwen Dios matuki yubakaniki. Jaskawen taexun matun xenipabu Diosun yubai nukun xenipabu Abrahame Dios janchakin matu jeneama inunbadiaikidi yuikin: “Min baba betsawen taexun min bababu inun dasibi nawa betsawen yuipabu xukua tibibu en jatu pepawadiayanaii”, aniki. ²⁶Jaskawen taexun Diosun jawen bake bestenwainmaxun man jawenabu dukun matukidi pe shinankin matu duawakin taewaikiki, matun chakabu jenetan man shinan betsawen wanunbunan- jatu wai

Judio xanen ibubun Pedro inun Juan yukanibukiaki, na janchadan

4 ¹Pedro inun Juanen yuda ichapabu jatu yusinkin menediabumaken Diosbe jawenabu janchaxunikabu inun, Templo mekemisbu xanen ibu inun, saduceobu bexun ²Pedro inun Juanen yudabu yusinkin Jesús mawa ana bestenkainima jatu unanmai ninkatan jatuki sinatabain ³jatu achixun ma badi kaya bichiti jiwe anu jatu bichitan: “Meshukidi besti jatu yukatiki”, ibainaibun ⁴ja jaska butian ichapabun jabun Pedron jancha ninkakin kakapewen taexun Jesús ikunwakin taewaibu jatu tanakin ainbu tanama junibu besti 5,000 tananibukiaki.

⁵Janua uxashini Jerusalén anu judio xanen ibubu inun, mae xanen ibubu inun,

Diosun jancha kenenibu yusinanamisbu Jerusalén anu ichabun ⁶jabianudi judio xanen ibujaida binua Anás inun, Caifás inun, Juan inun, Alejandro inun, Diosbe jawenabu janchaxunikabu xanen ibubun enabu dasibi jatibu ichaxun ⁷Pedro inun Juan jau iwenunbun jatu yunua iweabu jatu namakis nichintan yukakin:

—¿Tsuau kushipawen inun tsuan kenawen na juni man xuxawashinamen?— jatu wabu

⁸Diosun Yushin Pepatun Pedro kushipa wa jatu kemakin:

—En xanen ibubuun, ⁹juni nuitkaapai isin teneai pewakin nun xuxawashinakidi tapinkatsi ikin man nuku yukai ikaii. ¹⁰Jaskakenan, matu inun dasibi Israelbun man ninkaya matu shinanmanun ninkakanwen. Jabias Jesucristo Nazaret anua jaki sinatakin jiki man jatu mastama mawa Diosun ana bestenwainma ikunwakin jawen kushipa bestiwen na juni dasibibun man uiain nun xuxawashinaki. ¹¹Jesús Diosun jaska keska waimakidi matu xabakabi wanun ea ninkakanwen. Man jiwe wanikabun mishki dananbiaibun jabias mishki keska Diosun bixun dexun makedex wakin kene jawen mestenwakin akawaimaki, ja jabias Jesúsdan. ¹²Ja inun, jawa tsua betsawen nun meketi jayamakiaki. Mai jidabi anuxun jawa juni betsawen Diosun jawen nuku mekekin paxawati jayamadikiaki- jatu wa

¹³janua Pedro inun Juan jawa dateama kushipai xanen ibubun uianbun bedubi Jesúskidi xabakabi jatu yusiaibnu xanen ibubun ninkatan ja junibu unanepabuma inun escuela anuxun jawa tapinsbumabia pewen jatu jancha waibuwen taea unain e itan jakia Jesús jatube nixun jatu yusinkubainima shinantan ¹⁴ja juni xuxawashinabu jatube niawen taea jaska waxun jatu jaska watima naxukukin

¹⁵januxun janu ichabu anua jatun
mekenikabu jatu nichimatan jabu besti
yubakai yuinamea akeakekin ¹⁶yuikin:

—Na Jerusalén anu jiweabun dami
atimaska wakin xuxawashinabu
dasibibun unankanikiki. ¿Nun jatu jaska
wai, na juni dabeledan? “Jabun akamaki”,
ikin nun jatu padanmatidumaki. ¹⁷Jakia
na jaska Jesúskidi chanikubainaibudan,
dasibibu jau ana jatu ninkamakin
ikunwanmayamanunbun jatu bextekin
nesewanankanwen, jau unudi ana
Jesúskidi tsua yusintaskayamaxanunbu
nan– itan

¹⁸januxun ana jatu kenaxun jatu
yunukin:

—Jesúskidi ana janchakin jawen
kenawen jatu yusinyamaxankanwen–
jatu wabu ¹⁹Pedro inun Juanen jatu
ninkasama jatu kemakin:

—Dasibi nun amis Diosun unainwen
taea ¿jadatu chibain pemen? ¿Matun
jancha ninkaimenkain? ¿Diosun jancha
ninkaidaka? Jaskaken matumebi unanti
wakanwen. ²⁰Eskawen taea nun ikai
matu yuinun ninkakanwen. Jawada
uinkin nun ninkakubidanima jakimama
jatu yusinkin nun jenetidumaki– jatu
wabu ²¹jaska xuxawashinabuwen taexun
yudan kaianen Dios kenwainbu xanen
ibubun uinkin jabuwen datekin jawa
chakabuwama ishianbu jaska waxun
jatu kupidima jancha kushipa bestiwen
ana jatu nematan nichinbukiaki. ²²Ja
juni chantu kaini ma 40 badi binubiaken
kaya wakin damiwakin akawanbukiaki.

Jesús ikunwainbu jatu
mesewaibu datetima kushipa
yukanibukiaki, na janchadan

²³Janua Pedro inun Juan jatu jawa
wama jatu kainmabu kainbain jatun
jaibuaibuki nukutushitan jatube ichatan
dasibi Diosbe jawenabu janchaxunika
xanen ibubu inun mae xanen ibubun jatu

jaska wakanxu jatuki chaniaibu ²⁴jaska
jatu wakanxukidi ninkatan dasibibun
Dios kenwakin yukakin:

—Nukun Epa Diosuun, nai inun, mai
inun ianenwan, inun dasibi janu jiweabu
min damiwani nun unaaiin. ²⁵Jaska inun,
min Yushin Pepawen min tsuma nukun
xenipabu xanen ibujaida David yuimakin:
‘¿Jaskai jamenmens jawa shinanma
ja yudabu yubaka besumai
jaskai jamen ja iki
janchanwankanimenkain, jawa
shinanmadan?

²⁶Mai kesua anua inun mae tibi anua
xanen ibubu kushipabu icha
yubakai
Xanen Ibu Dios inun jawen
Katua Mesías danain jaki
sinataxankanikiki’,

iki janchanidan,

²⁷—Chanima na jabiatian xanen ibu
Herodes Antipas inun Poncio Pilato na
mae anu nawa betsabube inun Israelbube
icha min tsuma Jesús medibi min katuni
Mesías min yununi min kenwanmis
jaki sinatakanikiki. ²⁸Jaska dasibi
bebunkidi min jakidi yubakani jau jaska
wai bununbun min yuinidan, chanima
jaska keskadán, jabunan, ma akimabuki.
²⁹Nukun Xanen Ibuun, natianan, jabun
nuku mese mesewaibu min uiain.

Jaskawen taexun nun min tsumabu jawa
datea min baken kakape nun xabakabi
chanikunkaunun nuku yunuwe. ³⁰Min
kushipa paewen isin teneaibu xuxawakin
dami atimaska tsuan atiduma min
tsuma medibi Jesús min waniwen jawen
kushipawen nuku amakin nuku jatu
uinmakubainwen– akin

³¹Diosbe janchai meneaibus
jabiatandi janu ichabu anu pacha
sakuaya Diosun Yushin Pepatun jatu
dasibi achikin kushipa wakin keyua
januxun ana dateama Diosun kakape
jawenabu jatu yuikubainbukiaki.

**Ikunwainbun jatun mabu paxkatan
jawen jiwenibukiaki, na janchadan**

³²Jabun Jesús ikunwainbu midimabun jatun shinan jabiaskas shinanwen shinain jabun mabu tibi yui: “Ena bestiki”, ikama jakia dasibibun mekubainibukiaki. ³³Januxun Jesúsun kushipayabun jaska Xanen Ibu Jesús bestenkainima jawen kushipa unankin jatuki chanikubainaibu ikunwainbu dasibi Diosun jatu duajaidawakubainaya ³⁴jabu baiyabu inun jiweyabun jabu jawa nuitkaabuman juni betsa inantan jawen taexun pei bitan ja pei ³⁵jau jatu inanunbun Jesúsun kushipayabu jatu inankubainaibu ja betsabu jawa jayama jau jawen binunbun bestibu tibi jatu paxkaxunkubainibukiaki. ³⁶Jaskanibu betsakidi mia yuinun ninkawe. Janua Levín baba betsa natukan Chipre anua kaini jawen kena Josén jatubetan ikunwanyan Jesúsun kushipayabun kena betsa wakin Bernabé wanibukiaki, nukun janchawen kenadan: “Shinan chankanwanika bakeki”, akinan. ³⁷Ja junin jawen bai jaya juni betsa inantan jawen taexun pei bitan bexun Jesúsun kushipayabu jatu inaniikiaki, jawen jau ikunwainbu betsabu jatu medabewanun bunan.

**Ananías inun jawen ain Safiran
Diosun Yushin Pepa padanpai
inibukiaki, na janchadan**

5 ¹Ja jaska butian juni betsa jawen kena Ananías inun jawen ain Safiran jatun bai juni betsa inantan jawen taexun pei bitan ²jawen ainbe yubakatan paxkaxun dabukun jawena wakin adutan jatidi Jesúsun kushipayabu anu buxun inanyan ³januxun Pedron yuikin:

—Ananíasiin, min bai inantan pei bitan paxkaxun dabukun adutan ⁴jaskakin

Satanásan mia chakabuwamaya nuku yui Diosun Yushin Pepaki min chani chakai? ⁴Min bai min jatu inandiamina minayuxuki. Ja inun, pei mia inanbu minadiayuxuki. Jakia min pei min paxkaxun nuku inankin min nuku padainan, min nuku akamaki. Min Dios padanun ika ikaii. ¿Jawai eiskidan min jaskatushiai?—aka

⁵Ananías jaska yuiai ninkatan tin itan mawaya jaskai ninkatan dasibibu dateaibun ⁶janua bedunan dabe juxun jawen yuda yabutan buxun maiwai buabun

⁷jakimamadi 3 hora binuaya Ananíasin ainin jaskaxu ninkadiama jatun jiwe anu jikiaya ⁸Pedron yukakin:

—Matun bai inantan ⁹jati pei besti man bixu min benen ea inanxumen?—aka

Safiran kemakin:

—Jeen, jabiati besti jawen kaduki—akaya

⁹Pedron yuikin:

—¹⁰Jaskai Diosun Yushin Pepa padankatsis iki man yubakadabekanxumen? Min bene padananainwen taea ma mawa maiwatani bekanikiki. Min miadi mawaya mia maiwadiai bukanikiki—akaya

¹⁰jabiatandi jawaida jadi mawai Pedron tae naman di ikaya janua ja jawen bene maiwatani bedunan dabe jikiton jawen ain ma mawadia bechitan jawen yuda jadi buxun jawen bene dapi maiwadianibukiaki. ¹¹Janua ikunwainbu ichapabu inun dasibibun jaskaxu kakaibu ninkatan date paepanibukiaki.

**Tsuan jaska watiduma wakin Jesúsun
kushipayabun jaikaimas isin teneaibu
jatu xuxawanibukiaki, na janchadan**

¹²Diosun jawen kushipa jatu yunua Jesúsun kushipayabun yudan kaian medabewakin dami atimaska jaikaimas

betsa betsapa akaibun jatu bana ninkatan jatube ichai bebidanabun janu Templo jemaintin anu janu badi kuaya utamisbu jawen kena Salomón anu ikunwainbu betsabu jatuki dasi ichakubainibukiaki. ¹³Janua jatiditun jatun yusian ninkai ichakatsi ikabumabia jakia dasibibun ikunwainbukidi pe shinan bestikubainibukiaki. ¹⁴Jaskabiaibun ana midimabun jatubetan jatun Xanen Ibu ikunwain juni ichapa inun ainbu ichapa jatuki dasikubainaibun ¹⁵janua betsadan, tsuabunda jatunabu isin teneaibu jawen dakaniki iwexun bai kexa janu Pedro juai anu shinankin jau ja kauankin jawen yuda baka utawen jau xuxawaxunun isin teneaibu janakubainabu Pedro janu kakin ja isin teneaibu bestibu jatu xuxawakubainaya ¹⁶janua ja dikabi janu Jerusalén dapi jiwebaunabun jatun yudabu isin teneaibu inun yushin chakabun betsapawen jatu nuitapawamis jabu Jesúsun kushipayabu anu jatu iwediabidanbidanaibu dasibibun ea akaibu jabudi jatu xuxawakin keyudianibukiaki.

Jesúsun kushipayabun jau ana yusinyamanun bun xanen ibubun ana jatu nemapai inibukiaki, na janchadan

¹⁷Ja jatu jaska waibutian Diosbe jawenabu janchaxunika xanen ibujaida inun saduceo jabun chibanmisbu jabanuxundi Jesúsun kushipayabu jatu uin jatun kushipawen kemubiai jatuki sinatakin ¹⁸Templo mekenikabu jatu yunua achitan jatun mae meketi jiwe medan jatu bichiabun ¹⁹januxun meshu medan Diosun nai tsuma juxun jabun mekeabu jatu unanmamatian bichiti jiwe beputi bepentan jatu kainmatain yuikin:

²⁰—Nenua en matu kainma buxunan, ja Templo jemaintin anu jikitian januxun Diosun kakape jiwekuinmati jancha dasibi jatu yusinditankanwen— jatu wa

²¹jaska jatu yuia ninkabain penaya Templo jemaintin anu buxun jatu yusinkin taewaibun
jabatiandi ma kainbainabu unanmabia Diosbe jawenabu janchaxunika xanen ibujaida jawenabube ichatan Israelbu xanen ibu betsabu Junta Suprema dasibi jatu ichawaxun jatun meketi jiwe anua Jesúsun kushipayabu jatu bichishinabu jau itanunbun jatun mekenikabu yunuabu ²²buxun meketi jiwe anu jikixun ma kainbainabu jawa jatuki nukuama benatan chintunbain ja kaka jatu ²³yuikin:

—Janu meketi jiwe anu nun jikia beputi tibi bepu pe policiabun pe mekeabu uintan jatu iwenun, ixun jawen jikiti beputi bepentan ana tsua ja medan jayama nun uintanaii— jatu wabu

²⁴jatu jaska yuiabu ninkatan Templo mekenikabu xanen ibu inun Diosbe jawenabu janchaxunika xanen ibubu yuka iki: “¿Jaskashinabumen?” iki jawa shinantima yuinameaibun ²⁵ja jaskaibutian jaskadapananbun juni betsan jatu uinbidan jikixun jatu yuikin:

—Ja junibu man jatu bichishinadan, un unu Templo jemaintin anuxun ma jatu yusinkanikiki— jatu wa

²⁶janua mekenika xanen ibu jawen tsumabube buxun ana jatu itanun ika kaxun yudan kaianki datei: “Nuku mankanwen tsaka tsaka akana”, ika jawa jatu meama ²⁷Junta Suprema anu jatu iwexun jatu bebun nichintushiabu Diosbe jawenabu janchaxunika xanen ibujaidadatun jatu yuikin:

²⁸—Ja juni akimabukidi man jatu yusiaibun nun matu nemajaidabiashina nukun jancha jawa ninkama ćjaskakin Jerusalén anuabu jatu ichawakin man ja junikidi yusinkin jeneamamen? Jaska wakin ja juni nukukidi yuikin: “Man jatu tenanmaimaki”, akin man nuku jawen taexun yuankin man nuku jatu dake wamakubainaii— ikaibun

²⁹jaskaibun Pedro inun Jesúsun kushipaya betsabun jatu kemakin:

–Jaska Diosun shinain nun chibanun nuku yunumis nun akatsis ikaai. Junibun yunuawen taea nun bexteketidubumaki-iki ³⁰ana jancha chichibainkin yuikin: –Jesús cruzki man jatu mastamaxun jatu tenanmabia ja jabias Dios nukun xenipabun kenwanpaunibu jabiatundi tenanbu nuku bestenwanxuinmaki.

³¹Diosun jaska watan nai anu ainitan jawen yusiudi nuku tsauxxunimaken ja nukun mekenan inun nukun yusinan nun ma jayaki. Jaskawen taea nun Israelbu xukua tibi tsuabunda nukun chakabu jenetan Dios anu chintuin nun shinan betsabu nuku jawenabu wakin Diosun nukun chakabu buatan ana shinanmaki. ³²Na jaskadan, Diosun jaska waima nukun besti nun unaiin. Ja dikabi Diosun Yushin Pepatun unandiaikiki, jaska jabun nun chibainbu Diosun nuku inainmadan– jatu wabu

³³jatu jaska waibu ninkatan jatu bechipaiama jatuki sinatajaidakin jatu detekatsis ikaibun ³⁴janua jabianudi Diosun jancha kenenibu yusinanamnis juni betsa fariseo dasibibun ninkakin jakidi pe shinanmisbu jawen kena Gamaliel jatube xanen ibubu janu ichabu anudi jatube tsaua benikaun policiabun jau Jesúsun kushipayabu jatu kainmayununbun jatu yunua iyuabun ³⁵januxun Gamalielin jabube xanen ibubu jatu yuikin:

–Israelbuun, na junibu kupikatsis ikin man jaska waidan, shinankin uindakanwen. ³⁶Eskaki, matu yuinun ninkakanwen. Juni betsa Teudas xanen ibunun, ixun jatu binunun ikin nukunabu padanyan 400 junibun jawen jancha ninkakin chibain jaki xukuabu soldadobun achixun ja juni deteabun jabun chibainbu datei dasibi paxai sa iki keyunibukiaki, janu bextekei keyuidan.

³⁷Janua chipu César Auguston jawenabu jau jatu tananunbun yunua tanaabitian juni betsa Galilea anua Judas xanen ibudianun, ika Romanobu nemanun ika mentsisipakaunkin jatu yusianyan ichapabun jawen jancha ninkakin chibainbun ja Judasdi soldadobun achixun tenandiaibun dasibi jabun chibainbu paxai sa iki keyudianbukiaki.

³⁸Jaskawen taexun matu shinanmakin yuinun ninkakanwen. Ja junibudan, jatu meyamayukanwen. Jabun jatun yusian ibubis ikaibudan, jamen jawama binuxanikiki. ³⁹Jakia Diosun jatu yunua ikaibudan, man jawa jatu nematidumaki. Chanima jabun Diosun jancha kayabi yusainbu jatu nemakin man binutidumaki. Dios nemanun ika man jaskatidumaki. Jaskaken shinankin uindakanwen– jatu wa jawen yusian chibainkin pe ninkatan:

⁴⁰–Peki– iakeaketan Jesúsun kushipayabu jatu ana kenaxun ichakawakin ji sidiwen jatu kusha kusha ama bestitan ana jau Jesúskidi jatu yusinyamaxanunbun ja akin jatu nemajaida bestitan jatu nichinkin jeneabu ⁴¹xanen ibubun besuudia Jesúsun kushipayabu kainbaini yuinamei: “Jawen bake Jesucriston kakapekidi nun yusianyan Diosun jawen nuku unanti watan nuku duawakatsi jatu yunua jabuwen datei nun bextekenun nuku akaniki”, iki benimabaini bushinxun ⁴²jatu yusinkin jawa jeneama Templo jemaintin anuxun inun jiwe betsa betsapa anuxun xaba betsa tukuma Mesías Jesucristokidi kaka pepakidi jatu tapinmakubainibukiaki.

Siete medabewanikabu katunibukiaki, na janchadan

6 ¹Ja badi jaskaibutiandi midimabun ana ikunwain jatuki dasii ichakubainaibun jabianudi judiobubia

jatun jancha griego janchawen besti janchamisbun ja jatubetandi ikunwain judiobuns jancha hebreowen besti jabu janchamisbu jatube ja ikin yuikin:

—Dasibibun nun Jesús matubetan ikunwanbiaibun xaba tibi nuku pimakin nukun ainbu beneuma enaumabu piti nexexunkinan, man jatu paxka pewaxunabumaki. Matunabu hebreobu besti piti ichapa jatu nexexun inankin nukunabu griego janchawen nun janchamis ja nukun ainbu beneumabu piti eskadabes nexexun jatu inankin man jatu nuitapawakubainaii. Jaskadan, chakabuki—ikaibun ²jaskaibu jatu yuiabu ninkatan ja 12 Jesúsun kushipayabun dasibi ikunwainbu jatu ichawaxun jatu yuikin:

—Nukun nun matu piti paxkaxunkin mekexuna bestidan, nukunadan, pemaki. Ja dikabi matu jaska besti wakin Diosun jancha yusinkin nun jenea pemediki. ³Jaskakenan, en betsabu inun en puibuun, jau juni betsabun piti matu paxkaxunkin inankin pewakubainunbun 7 juni shinanyan inun unanepabu Diosun Yushin Pepatun kushipayabu jau jabun matu paxka pewaxununbun benakin katuxun ja daya jatu yunukanwen. ⁴Jakia nukubunan, Diosbe janchakin jeneama januxun jawen jancha pepa matu inun betsabu yusinkin nun jenetidumaki—jatu wabu

⁵jaska jatu yuiabu ninkatan dasibitun jabias shinanwantan januxun jatu katukin juni shinanyan inun unanepabu Diosun Yushin Pepatun kushipayabu katukin jati anibukiaki. Esteban inun, Felipe inun, Prócoro inun, Nicanor inun, Timón inun, Pármenas inun, nawa betsa Antioquía maewan anu jiwexun judiobun beya tapini Nicolás jati jatu katubain ⁶Jesúsun kushipayabu anu jatu iyuabu januxun jatu unanti wakin mamepixun Dios jatu yukaxunkin jatun medabewanikabu jatu wanibukiaki.

⁷Januxun Diosun jancha Jesúskidi kakape jatu yusinpakekubainaibun jatun jancha ninkakin Jerusalén anuxun ikunwain ichai pakubainaibun ja jaskaibun jabiatiaundi Diosbe jawenabu janchaxuni ka ichapabundi Jesús ikunwandianibukiaki.

Esteban jawamajaidabiaken achixun xanen ibubu anu iyunibukiaki, na janchadan

⁸Esteban Diosun duawakin kushipa paeya wakin pepawanikidi mia yuinun ninkawe. Jawenabun bedubi Estebanen dami tsuan atiduma atimaska wakin jatu uinmakubainaya ⁹janua ichati jiwe jawen kena “Esclavo Tsumawanibu Ana Tsumauma” janu betsabu ichamisbu inun, juni betsadi mae Cirene anuabu inun, maewan Alejandría anuabu inun, Cilicia mai pakea anuabu inun, mai pakea Asia anuabu jabu Estebanbe ja iki yuinameaya ¹⁰Diosun Yushin Pepatun Esteban unanepa wakubainaiwen taexun tsuan Esteban maemakin janchawen binuntidubumaken ¹¹jawawen jaska watima jaki yubakatan jabu betsabu juni betsabu pakakin yuikin:

—Nukun xanen ibubu padankin eska jatu yuitankanwen: “Ja Jesúskidi yusinmis Estebanen jancha chakabu yuikin Moisés inun Dios dayuikin yuainkiki”, atankanwen—jatu wa ¹²jatu jaska wabu buxun juni ichapabu yuikin mae xanen ibubu inun Diosun jancha kenenibu yusinanamisbuki chani chakakin jabu jatu sinatamabun yudan kaian ja iki bedukui itimaskabainkin januxun Esteban achitanxun xanen ibubu dasibi Junta Suprema anu iyuxun ¹³januxun jau Estebankidi chani chakatanunbun padan jancha katutan juni betsabu jatu padanmakin yuimakin:

—Na juninan, nukun Templokidi inun Moisin nuku yusini janchakidi yuain janchai jeneama nun ninkaii. ¹⁴“Jesús

Nazaret anuatuun Templo yamawatan nukun beya betsa betsapa Moisin nuku yusini betsa waxanikiki”, ikai nun ninkadiakubainaii– jatu wabu

¹⁵janua xanen ibubuns Junta Suprema anu tsauxun Esteban nia uinkin jawan ikama jawen besu xabakabijaida Diosun nai tsuman besu keska beisnibukiaki.

Jatun xenipabukidi Estebanen xanen ibubu jatu ana shinamanikiaki, na janchadan

7 ¹Jaska uintan januxun Diosbe jawenabu janchaxunika xanen ibu binuatuun Esteban yukakin:

–Na jaska mikidi yuiaibudan, ¿chanimamen?– aka
²ninkaibun Estebanen jatun yukai kemakin:

–En xanen ibubu inun enabuun, matu yuinun ninkakanwen. Mesopotamia mai pakea anu nukun xenipabu Abraham Harán maewan anu kadiama bebunkidi nukun Epa Dios kushipa pepatun yubakin unanmakin janu jiwxanai anu ³yunukin yuikin: “Min mai inun minabu jenebaini mai bena en mia uinmaxanai anu jadi kaxanwen”, aka ⁴janua Abraham kainkainkin Caldea jenebaini Harán anu kainma dakayuken janua jawen epa ma mawaiaken januxun na jibia mai man janu jiwea anu Diosun Abraham iwexun ⁵janu jawen mae ibubis bitan janu jiwepaketedumabiaken Abraham bebunkidi yubakin bakeyadiabiaiken jau janu jawen bababu janu jiwxanunbun jatu inanti jatuki tanamanikiaki, Abraham mawaken jawen bababu patan ibu wakin jau bixanunbun yubakinan. ⁶⁻⁷Januxun ana yubakin: “Mai kesua betsa anu min bababu jatube jiwei buimabu jadixun nawabun jabun esclavo dayadu jatu waxun 400 año jatu dayamakin jatu ichakawakubainaibu atimas en jatu kupiaya min bababu jadia kainbidani

bexun na mai en mia yubai anu jiwxun ea kenwankubainxankanikiki”, ayamaxun januxun Abraham jawen yubaka shinamati wakin Diosun yunukin: “Dasibi minabun juni bake tibi kaian jawen jina kubichi mextekin bikubainxanwen”, aka ⁸jabe janchakin ninkayamaxun jawen juni bake Isaac kaian 8 día xabatian jawen jina kubichi binikiaki, jaska yubani taewakinan. Janua jawen bake Isaac bakeyatandi jawen bake Jacob bidianikiaki. Janua Jacob, jawen kena betsa Israel, jawen 12 juni bakebu kaian jabiaskadi wakin jatu bidaikubainikiaki. Ja 12 juni bakebu jabu tibi anua nun jibia jawen bababuki.

⁹Janua ja nukun xenipabu Israelin juni bake betsa José jawen betsabun danain jaki sinatakin jau tsuma wabain Egípto mai pakea anu iyutanunbun jawen taexun pei bikin nawa betsabu inanbu iyuyamabu jadixun Diosun duawakin José medabewaya ¹⁰jabu anuxun bika tenebiaya Diosun nemakin unanepa wakin Egípto xanen ibujaida Faraón bechipaimaya jawen xanen ibu betsa wamakin José xanen ibu wakin jawen mai jidabi inun jawen jiwe jawendua ewapa mekei jau dasibi xanen ibuxunun yununiki.

¹¹Janua Egípto anua José xanen ibuaya Egípto mai pakea anu inun Canaán mai pakea anu dasibi ana yunu beneamaken Israelin bakebu nukun xenipabu nuitapai jawa pitibumaken ¹²janua Egípto anu xekiwan jaya chaniaibu Israelin ninkatan jau jawen bakebun nukun xenipabun jadi buxun jau piti bikin taewatanunbun jatu yunua butanibukiaki. ¹³Ana ja kachu betsatian buni chakayamakin ana piti bitanun ika buabun januxun José jatu unanmakin jancha wakin yuikin: “En matun betsa Joséki”, akin jatu unanmaya Egípto xanen ibu Faraón ninkatan: “¿José jawa nawamen?” itan

shinanshinken ¹⁴chipu betsatian José xanen ibuwen taexun jau jawen epa inun dasibi jawenabu jau ixuntanunbun jatu yunua jawenabu 75 ixuntankin Egipto anu iwenibukiaki. ¹⁵⁻¹⁶Jaskawen taea Jacob, jawen kena betsа Israel, Egipto anu kaima jiwea janua mawa janu maiwati tanpe Hamorin bakebun jawen juchi Abraham peiwen inanibu Siquem anu jawen yuda buxun maiwanibukiaki. Israelin bakebu inun jawen baba ichapabudi Egipto anuadi mawakubainibukiaki– iwanan,

¹⁷Estebanen judio xanen ibubu jatu yuikubainkin ana yuikin:

–Abrahamnen bababu, Israelbudan, Canaán anu ana jatu chintunmakatsi Diosun yubani ja baditian ma jatu taxnimabainkatsi iki kemaya Israelbu Egipto anu jiwea pai ichai midimakubainaibun ¹⁸janua Egiptonawa xanen ibu bena Faraón ikimaxun jaska wakin Josén Faraónen enabu jatu medabewakubaini unanma ¹⁹ja xanen ibu Faraón benatun nukun xenipabu padankin jatu ichakawakin jatun juni bake dama kaiainbu jau tenanunbun jatu yunukin jatu putamakubainaya ²⁰ja jatu jaska waibutian Moisés kaian jawenduajaida pishtaken bechipaijaidakin jawen ibubun jiwe anuxun june ewa wakin uxe dabe inun besti junexun yumewai ²¹ana jaska waxun junetima datekin jau mawanun jene kexa basi anu chichanki jene jikitima wakin buiwen pepuxtan nanetan nuntantan xununbidana Egipto xanen ibun ainbu baken bechixun nexewanimaxun jawen bake keska wakin yumewakin ²²jaska wabainimaxun Egiptonawa unanepatun Moisés yusinkin unanepawakin tapinmakubainabu janchapai juni kushipakin jaska yunuabu jatu axunkubainikiaki.

²³Ma janu Moisés 40 badiyatun jawenabu Israelbu shinankin uinbaunun

ika baii kaxun ²⁴januxun Egiptonawan Israelbu betsа ichakawakin kushai uinkin jawenabu medabewanun ika kaxun nemakin jatun ichakawai tenanxuniaki. ²⁵Januxun Moisin shinankin: “En kushipaiwen Diosun ea medabewaya enabu Israelbu

jatu medabewakin Egipto anua jatu paxawatan unanuma en jatu jiwemaxanaii”, ibiaya jakidi jaska jawenabun shinanma inibukiaki.

²⁶Janua meshukidi betsatian Moisés ana kaxun jawenabu Israelbu dabe ana detenameaibuki nukutan daewakin jatu nemanun ikain jatu yuikin: “Matu dabe man yuda betsamaki. ¿Jaskai man detenamei ikanai?” jatu wa ²⁷ja jatun jawenabu deteaitun Moisés tu akin xututan yuikin: “Min nuku uinun ɏtsuan mia xanen ibu wakin nukun pewanika mia washinamen, nuku anudan?

²⁸¿Egiptonawa deteshinxun min eadi jabiaskadi wanun ika ikai, tenankinan?” aka ²⁹jaska wa ninkatan datei chai kai Moisés paxai mae betsа Madián nawabu anu jadi kani jadia nawa keskai jiwxun ainbu bitan juni bake dabe wanikiaki.

³⁰Jadi madianawabu anu 40 año Moisés ma jatube jiwea binukainaya Mati Sinaí janu tsua jiweabumanu Moisés kaxun uiyanan ji maxu kui menui keskai jede ji ji ikai anu Diosun nai tsuma nia

³¹uin e itan namai keskakin xabakabi ana uin pewanun ika kemai ja dapi kaya

Diosun yuikin: ³²“Eadan, en matun xenipabun mekenika Dioski, Abraham inun, Isaac inun, Jacobun mekenika

Diosdan”, akai ninkai Moisés datei

saki saki ikin jadi uinkatsi ikamaken

³³januxun Yavé Diosun ana yuikin: “Na min nia anu en nidiaki. Jaskawen taea

na mae medibi meseki. Min bichi tae pekayuwe”, aka jutsekexunaya ³⁴ana

yuikin: “Enabu Egipto anuxun bika tene chakayamai sain iki kaxai jawawen

jaskatima ikaibu chanima xabakabi en uinmis jatu medabewanun ika en butuxuki. Uinwen. Jaskawen taexun Egípto anu jadi en mia yunukatsis ikaii”, akin Diosun Moisés yuiniaki.

³⁵Uatian ja jabias Moisés danankin jawenabun yuikin: “Min nuku uinun čtsuan mia xanen ibu wakin nukun pewanika mia washinamen, nuku anudan?” abianibu jabias Moisés xanen ibu wakin jatun medabenan wakin jawenabu medabewamaktsi ja nai tsuma ji maxu kui menui keska jede ji ji ikai anua janchamakin Diosun Moisés yununiaki. ³⁶Diosun Moisés jaska waimaken Moisin nukun xenipabu Egípto anua jatu kainmabainkatsi ikin egiptonawabu anuxun jatu dami betsa betsapa waxuntan janua jatu iyukin ja Ianenwan Tashipa jau pukebainunbun damiwakin jene bai wakin jatu paxkaxuntan janu tsua jiweabuma anu nukun xenipabu Egípto anua jatu iyumaxun 40 año dami betsa betsapa jatu unanti wamakeatanikiaki, Moisin jatu taxnimabainixunan. ³⁷Januxun jabias Moisin Israelbu jatu yuikin: “Jawen jancha en matu yusinun Diosun ea katuni keska wakin jabia matunabu anuadi Dios yuixunika betsa kushipa ea keska matu anu yunuxanikiki”, anikiaki. ³⁸Jaska inun, janu tsua jiweabuma anu ja jabias Moisin nukun xenipabu jatu ichawabainimaxun janua ka Mati Sinaí anua Diosun nai tsumabe janchakin jaska jiwea kayabi nun bixanai Diosun jancha ninkatani nukun xenipabukidi chanikidankidanikiaki, Moisésdan.

³⁹Jaska jatu yusinkin unanmabiakubaina nukun xenipabun chibankatsi ikama Egípto anu ana chintunkatsis ikin Moisés danankin ⁴⁰jawen betsa Aarón yuikin: “Egípto anua nuku iwebiaima Moisés Mati Sinaí anu kaima ana juamaki. Jaskaima

nun unanmaki. Jaskakenan, yushin betsa dami wakin ja kenwanti nuku axunwen, jau jatun nuku yunukin iyukubainxanunan”, akabu ⁴¹januxun mane damiwakin ina awa bake itsa jatu waxunshina kenwakin chaxuwan bake detexun kua keyui jatunmebi jatun mekenen ashianwen taea jaki besikin duawai benimajaidanibuki. ⁴²Jaskaibuwen taea Dios Israelbuki sinatakin nai anua bishi besti jau kenwanunbun ja jatuwen nuiai bextenibukiaki. Jaskakubidanibukidi jawen jancha yuixunika Amós Diosun janchamakin yuima:

‘Israelbuun,
janu tsua jiweabuma anu 40 año
jiwexun
ina awa inun chaxuwan bake
detexun kua keyubiakin eadan,
ea kenwakin man jawa ea inankin
ea kenwanma ikubidanibuki.

⁴³Eunbia jaskatimabiaken
yushin betsa jawen kena Moloc man
damiwaima kenwakin
jawen kenwanti tadi jiwe putakatsi
ikama
iaxun bekubidankin yushin betsa
jawen kena Refán kenwakin
jawen bishi kenwanti ibubis
damiwaimaxundi
jadi man kenwankubainibuki.
Jaska wakin man
chakabuwakubainibuwen taexun
matu kupinun, iwanan,
matun mai anua chajaida matu
nichinkin
nawabun mai kesua betsa Babilonia
anu en matu yunuxanaii’,
aka kenexuni.

⁴⁴Jakia janu tsua jiweabuma anu nukun xenipabu buaketankinan, Diosun jawen jatu yubakin shinanmati tadi inun bichi jiwe jatu amaima jayanibuki, jaska Moisés Diosun uinmakin yunuima

keska jatu amaimadan.⁴⁵ Januxun nukun xenipabun ja tadi inun bichi jiwe mekekubainaibun Josué jatun xanen ibutan nawa betsa betsapabu jatube detenamemaya Diosun jatu medabewakin jatun mae tibi mebinkin jatu nichinmatan jatu ibu wamaya ja tadi inun bichi jiwe Diosun jatu amani pekaxun iatan bekubidanibukiaki. Jaskaibutian ja jiwe bebunxun Dios kenwankubainibukiaki. Jabias jiwe jayayuken David jatun xanen ibu idiauskunkainikiaki.⁴⁶ Janua David xanen ibukin Dios benimawakubainaiwen taexun ana duawanun, iwanan, Jacob jawen kena betsa Israel jawenabun Dioski nukuti kayabi mishki jiwe jawendua waxunxanun, iwanan, Davidin yukabia Diosun nemayuniaki.⁴⁷ Jakia Davidin bake Salomón xanen ibudiatan jatun Templo mishki jiwe Dios jatu amaxuniki,⁴⁸ janu junibun jiwe wabu anu ja Dios dasibi binu keyua jiwtidumabiakanan. Jabiaskadi Yavé Diosun jawen jancha yuixuniaka janchamakin:

⁴⁹⁻⁵⁰ ‘Nai anudan, en xanen ibui janu tsaua
inun en tae janu maiki en tapakea maiki paiaki.
Eanan, dasibi en damiwaniwen taexun ea juindukunmanun, iwanan,
časka waxun tsuan ea jawa jiwe waxuntidubumen?

Tsuan ea jawa jiwe waxuntidumaki’, aka kenexuniki– iwanan,

⁵¹ Esteban Junta Suprema ana jatu yuikubainkin:

–Dasibi kushipa Dios jaya mesebiaken matun xenipabu ipaunibu keskai matubudan, matun besu inun, matun juinti inun, matun pabinki kushiken Diosun Yushin Pepatun matu yusinbiakubainaya man ninkaisbumaki,

nawabun Dios unanbuma keskadan.

⁵² Jaska inun, Diosun Katua pepa juxanai Diosun jancha yuixunikabun bebunkidi jakidi chanibiakubainaibun jawa ninkakatsi ikama matun xenipabun jatu dasibi danankin jatu ichakawakin detekubainibuki, jatu tenankinan. Janua natian Diosun Katua juni jawa kaneisma jakidi matu yuinibu ma nuku anu juni shinanma nawabu achimatan man ja juni pepa Jesús jatu tenanmadiaimaki.⁵³ Diosun jancha jawen nai tsumabun nukun xenipabu yusini jaya tapinbiakin man chibainsbumaki– jatu wa

Esteban tenanbukiaki, na janchadan

⁵⁴ jaska shadabu jatukidi xanen ibubu chiteai ninkatan Estebanki sinata chakayamai bene bene iki xeta yenx yenx akaibun⁵⁵ jakia Diosun Yushin Pepatun Esteban medabewakin kushipa waya naiudi teskanxun uinkin Dios chaxa kushipajaida anu jawen yusiudi Jesús nia uintan

⁵⁶ dateama jatu ana yuikin:

–Uinkanwen. Teskantan nai bepemana anua Diosun yusiudi nukun Juchi Kayabi Iyua Jesús nia en uiiai– jatu waya

⁵⁷ jabun jawen jancha ana ninkakatsi ikama pabepukui keyubain jakidi kushi biski ibain achitan⁵⁸⁻⁵⁹ mae anua taxnimakin xadabain jabu Estebanki chani chakaibun ja dukuntun tsakanun itan jatun tadi chaipa pekatan juni betsa jawen kena Saulo mekematan ichapabubetan mankanwen tsaka tsaka akaibun Estebanen Jesús yuikin:

–Xanen ibu Jesúsuun, menan en yushin ea jadi bidiwe!– atan

⁶⁰ janua danti ika dakaxun bis ikin jui kushipawen ana yuikin:

–Xanen Ibuun, na ea chakabuwaibuwen taexun jatu kupiyamaxanwen– atan di iki mawanikiaki.

8 ¹Januxun Esteban jau tenanbun Saulon jabiaskadi shinanyan anibukiaki.

**Jesús ikunwainbu Saulon jatu
ichakawakubainikiaki, na janchadan**

Jabias xabatian Jerusalén anuxun Jesús ikunwainbu jabun ikunwanbuman jatuki sinatakin ichakawa chakayamakin taewaibun Judea mai pakea anu inun Samaria mai pakea anudi Jesús ikunwainbu dasibi paxai sa ibainaibun jabu Jesúsun kushipayabu besti kaianma inibukiaki.² Janua tsuabuda juni duapabu Estebanwen nui jaya kaxabetanan maiwanibukiaki.³ Ja jatu jaska waibutian Saulo jawen jaibuaibubetan Jesús ikunwainbu ichakawakin jatun jiwe tibi anu jikixun juni inun ainbu ichapa paxadiabuma jatu achixun kainmakin jatu xadabainbainkin bichiti jiwe medan jatu bichimakin jabun Jesús ikunwainbu jakimawanun, iwanan, Saulon Jesús ikunwainbu yamawakin keyupai inikiaki.

**Samaria anuxun kakape jatu
yusinibukiaki, na janchadan**

⁴ Janua jabu Jerusalén anua paxai kainbainimaxun janida mae tibi anu jikixun Diosun Mesías Cristo mekenan jawen kakapekidi jatu yuikubainaibun ⁵medabenan betsa Felipe mae ewapa betsa Samaria anu kaxun Mesías Cristokidi jatuki chanikin taewakin ⁶januxun jaska tsuan atiduma dami atimaska betsa betsapa jatu axuain uinkin ja yudabu ichaxun Felipen jancha dasibun ninkajaidaibun ⁷yushin chakabun yuda betsa betsapabu jatu nuitapawamis Felipen jatu xuxawakin kainma ja yushin chakabu bis iki taxnibainaibun jatu kaya wakin yuda betsabudi babunibu inun biyuxkinibu jatu kaya waya ⁸ja mae anuxun Felipen jatu jaska waxunai uin jawen shinan chankain benimajaidanibukiaki.

⁹Jamen betsadan, Felipen jatu yusin kadiamaken juni betsa Simón ja mae

Samaria anuxun jawen mukawen unankin jawen jatu xuun akin yudabu padain kein xanen ibukin jatu mesewamistun ¹⁰⁻¹¹badi ichapa jawen mukawen jatu padankubainaiwen taexun jakidi yuda dasibi xanen ibubu inun jatube jiweabu dasibibun chibankin kenwain jakidi yuinamekin:

-Simónan, Diosun kushipa ichapa jayaki- ikin jawen jancha ninkakin axunpakemisbun

¹²jakia Dios xanen ibuaikidi inun Jesucriston kakapekidi Felipen jatu yuiai ninkatan ana Simón ninkama juni ichapabu inun ainbu ichapabundi Jesús ikunwainbu Felipen jatu nashimaya ¹³januxun Simónen dikabi ikunwanyan nashima Felipebe kakunkaunkin jaska tsuan atiduma dami atimaska betsa betsapa akai uin Simón e ikunkainaya

¹⁴januxun jaska jabun Samaria anuxun Diosun kakape Jesúskidi jancha ikunwankin ma chibainbun jaska kakaibu Jerusalén anuxun ninkatan Jesúsun kushipayabun jau Pedro inun Juanen jatu medabewatanunbun jatu jadi nichianbu buabun ¹⁵⁻¹⁶tsuabunda Jesús ikunwainbu Felipen bebunkidi jawenabu unanti wamakin Xanen Ibu Jesúsun kenawen jatu nashimashina jabu betsa Diosun Yushin Pepatun jatu achidiamaken jaska jatu wabu bushinxun ja Samaria anuxun ikunwanshinabu jatukidi Pedro inun Juanen Dios jau jawen Yushin Pepa binunbun jatu yukaxuntan ¹⁷januxun jawen Yushin Pepa achimakin jatu mamepixun jatu yukaxunaya ja Yushin Pepatun jatu medabewai jatuki jikia akeakenikiaki.

¹⁸Januxun Jesúsun kushipayabun ikunwainbu jatu mamepiaya Diosun Yushin Pepa jatuki jikia Simónen uin: “Eandi ja kushipa peiwen binun”, iwanan, Pedro inun Juan ¹⁹yuikin:

–Na jaska kushipa eadi en jayanun ea inankanwen, man jatu akai keska wakin yuda betsabudi mamepixun Diosun Yushin Pepa en jatu jikimaxununan, na pei ichapa en matu inainan– jatu waya ²⁰januxun Pedron kemakin:

–Diosun kushipa inankuinki. Peiwen taexun min bikatsis ikaiwen taea min peiya janu chiwen ikunwanbuma Diosun jatu kupixanai anu min katiduki.²¹ Jaska inun, mianan, min shinan chakai Diosun unainwen taexun jawen kushipa min bitidumajaidaki.²²⁻²³ Ean jaska en mia unaiin. Jaska yushin chakabun muka min bini min jenediamaken mia medanxun ja min chakabun mia nexayuaki. Jakia shinan betsa watan min chakabu min putaya jau Diosun mia buaxunun min yuka min chakabu mia buaxuntidumenkain– aka

²⁴Simónen kemakin:

–Chanimá en kanejaidaxuki. Ea Dios yukaxunkanwen, jau jaska min ea yuiai keska wakin ea kupiyamaxanunan– iki jaska chaniaya jau Diosun jawen chakabu buaxunun yukaxuntan

²⁵jabianuxundi Diosun jancha yusinkin kakape Jesúskidi jatu yusin menetan Jerusalénkidi ana chintunbidankin mae betsa betsapa Samaria mai pakea anuxun Jesúskidi jatu yusinkubidani Jerusalénkidi chintunbaini bui jikinibukiaki.

Etiopianawa xanen ibu betsaki Felipe nukuxun yusinikiaki, na janchadan

²⁶⁻²⁸Ja jaska wawanshinabutian Diosun nai tsuma betsan Felipe yuukin yuukin:

–Benitan Jerusalén anua kai surkidi ja bai tanabaini Gazakidi kawen katanwen– aka

Felipe benitan kai janu tsua jiweabuma anu bai tanabainaya bai namaki Etiopianawa ainbu xanen ibujaidatun tsuma juni jawen pei mekexunikatun

Jerusalén anuxun Dios kenwantani jawen mae anu ana chintunkaini caballo dabetañ tadanbainaiki nawa ina tsauxun Diosun jancha Isaíasin kenen yuukubidanai bechitan uiyanan²⁹ Diosun Yushin Pepatun Felipe yuukin:

–Kakain jaki kemai nukutanwen– aka ³⁰jaska ninkatan jawaida kain jaki nukuaya Diosun jancha yuixunika Isaíasin kenen yuiai ninkakin Felipen yukakin:

–Ja kene min yuukubidanaidan, ¿min ninkai?– aka ³¹Etiopianawan ninkatan kemakin:

–Jaskatan tsuan ea jakidi yusin pewai en ninkatidumaki. ¿Mian min unainmenkain? Ebe inatan kakin ea tapinmabainwen– aka

–Peki– itan inatan jabe tsaukainaya ³²jabias kene yuixu Etiopianawan ana Felipe yuixunkin yuukin:

‘Chaxuwan detenikatun detenun, iwanan, iyumis keska wakin tsuan nemama iniki.

Ja inun, chaxuwan bake dani damexteabu chaxuwan jawan ikama pesmis keskai jawa yuialma iniki.

³³Januxun ichakawakin nuitkaapawabu jawa yuiamaken tsua jawen nuikin medabewamadi iniki.

Jaska wakin bakeuma tenanbu tsuan janixun jawen bababukidi jakidi janchatidubumaki, jaska wakin jawen jiwea mebinkin mai anua mexa keska wakinan’, akin yuixuntan ³⁴Felipe yukakin:

–¿Tsukidi ja Diosun jancha yuixunikatun kenenimen?

¿Ilibuskidimenkain? ¿Juni betsakididaka? Menan ea yuidiwe– aka ³⁵Felipen unanmakin Diosun jancha dama yuixudan, jawen yusin

taewakin kakape Jesúskidi Etiopianawa tapinmakin ninkamakubaina³⁶⁻³⁷ ma jatixunda ka ianki kemakin jaska Felipen dama yusinxu Etiopianawan yuikin:

–Uian. Ma min ea yuikubidanai en ikunwainwen taexun čana en jawamamen, na jene anu min ea nashimatidudan?– atan

³⁸jatun caballo tadanmabainai jau niti anun jawen tsuma yunua niti amaya butudabekain jenen pukutan Felipen xanen ibu nashimakin menetan ³⁹jene anua nexekedabebeidaanibun januxun Diosun Yushin Pepatun Felipe dami wabainkin yamawabainaya ja xanen ibun Felipe ana uianma jawen tadanbaintiki inatan ja kaikidi kai benimajaidakainaya⁴⁰janua Felipe Yushin Pepatun iyuxun mae betsa Azoto anu butea janua mae tibi anu jikiakeakekainkin Diosun Katua Jesús mekenankidi kakape jatu yuikubaini atimas maewan betsa Cesarea anu jikinikiaki.

**Jesúsun Saulo shinan betsa wamanikiaki,
na janchadan**
(Hch 22.6-16; 26.12-18)

9 ¹Janua jabatiandi Xanen Ibu Jesús ikunwainbuki pubenkin Saulon jatu ichakawakin tenankin jenediamma jaskawen taea Diosbe jawenabu janchaxunika xanen ibujaida jatu binua anu Saulo kaxun ²jaska shinain yuikin: “Damasco anu kaxun ja Bai Bena Jesúskidi jatu tapinmaibu juni inun ainbu achitan Jerusalén anu en jatu iwekatsis ikaii, nenu jatu bichinun, iwananan. Jaskaken min kushipaya kanun, iwanan, en mia yukai juuai. Ea kushipa wakin Damasco maewan anua janu nukunabu ichamisbu jiwe anu en kaken jau xanen ibubun ea medabewaxanunbun min kushipa jatu yunuwe, en buaidan”, aka: “Peki”, ixun

kenexuntan jaya yunua³janua Saulo jaska wa kai Damasco bai tanabaini ma kemaya nai anua bin kushipajaida pexekidan Saulo dachaxaya⁴janua Saulo main di ikaya jui taxnikin yuikin:

–Sauloon, Sauloon, čjaskakin min ea jatu ichakanwain?– aka

⁵Saulon dateyabi yukakin:

–Xanen ibuun, čmin tsua ikai?– aka januxun ja jui taxnaitun Saulo ana yuikin:

–Jabia ea ikunwainbu min ea jatu ichakanwainan, en eaki, Jesúsdan.

⁶Benikaini kai Damasco anu kaditanwen, jadixun min jaskakunkainxanai tsuanda mia yuixanikidan– aka

⁷ja junibu Saulobe buaibun jawen jui ninkabiai tsua uianma datejaidaibun ⁸janua Saulo main daka benikauan ma bepexebia jawa uintidumaken ja jabe buaibun metsunxun Damasco anu Saulo iyuabu ⁹jaskakainshina jadia ma xaba dabe inun besti kaya jawa uianma datekin Saulon jawa piama jawa nuxuamaken

¹⁰ja Damasco mae anu jiwexun Jesús ikunwain betsa jawen kena Ananías nama keskaiwen uiyanan Xanen Ibu Jesús juxun ja bebunxun kenakin yuikin:

–Ananíasiin– aka

kemakin:

–Xanen Ibuun, en nenuki. ¿Min jawa ea yuiai?– aka

¹¹Xanen Ibu Jesúsun yuikin:

–Benikaini kakin ja bai jawen kena Kayatapia anu kaxun Judasin jiwe anu jikitian janua juni betsa Tarso anua kaini jushian jawen kena Saulo yuka itanwen, Diosbe janchaikikan. ¹²Namai keskawen juni jawen kena Ananías jikitian mamepixun jau ana uin benawanun, medabewai ma uinxuki– aka

¹³Ananíasin ninkatan Jesús yuikin:

–Xanen Ibuun, Jerusalén anuxun minabu medibi min jatu wai ja junin

mia jatu ichakanwanmiskidi ichapabun jakidi janchakin chakabu ea yuimisbuki.
¹⁴Jatu jaska wakubaini Diosbe nukunabu janchaxunika xanen ibubun kushipaya beshianbukiaki. Nun jabun min kenawen taexun Dios yukaibu dasibi nukudi nenua achitan Jerusalén anu nuku iyuxun bichinun ika jushiankiaki– aka

¹⁵jaska yuibiaya Xanen Ibu Jesúsun ana yuikin:

–Jen iyamai dateama katanwen. Ja juni kaindiamma en katunitun ekidi chanikin nawa xukua betsa betsapabu jatu yusinkin inun, jatun xanen ibubu yusindiakin inun, Israelbudi ea jatu yusi ndiaxunkubainxanikiki, ¹⁶ea chibainwen taea jaskai nuitapakunkainxanai en unanmaxanaidán– aka

¹⁷ninkabaini Ananías kai janu Saulo ika anu jikikain mamepitanyuikin:

–Sauloon, Jesús ikunwain ma min nukun betsaki. Min bai tanabidanai jabias Xanen Ibu Jesús miki nukushinatun jau min bedu min ana uin pewanun inun jawen Yushin Pepatun jau mia achitan kushipa wanun mia anu Jesúsun ea yunuxuki– aka

¹⁸⁻¹⁹jakimamadi jawaida Saulon bedu anua baka xaka keska nidi ikaya ana uin pewatan benikain ma jatubetan Jesús ikunwanyan nashimatan iyuxun pimabu ana kushipatan uxa eskadabes Damasco anua ikunwainbube jiweyuniaki.

Damasco anuxun Saulon Jesúskidi yusin taenikiaki, na janchadan

²⁰Janu jatube jiweyuxun janu judiobu ichamisbu betsa betsapa anuxun Saulon jatu yusin taewakubaunkin:

–Jesúsdan, Diosun bake kayabiki– akin jatu yuikubainaya ²¹dasibibun ninkai e iki yuinamei:

–Na juninan, Jerusalén anuxun ikunwainbu jatu ichakawamisxun nenudi juxun nun jabun Jesúsun

kenawen taexun nun Dios yukaibu nukudi jabaskadi wakin nuku achixun Jerusalén anu Diosbe nukunabu janchaxunika xanen ibubu anu nuku iyunun ika jushianan, ḋja junidan, jamamen?– ikaibun

²²janua Saulo ana jawa dateama Diosun kushipawen xabakabi judiobu Damasco anu jiweabu jatu yusinkubainkin: “Jesús Diosun Katua Mesfaski”, akin Diosun jancha kenenibuwen jatu unanmakubainaya janua judiobun uin e iki jakidi jadakidi shinantima ikaibun

Judio xanen ibubun Saulo detepananbun paxanikiaki, na janchadan

²³uxa ichapa jatu yusinkubainaya judio xanen ibubu Sauloki sinatakin detekatsis iki jakidi janchai yubakashinabun ²⁴Saulon ninkatan unanyan janu kainkainai achinun ika yubakashinabu badidi inun meshu medan ja maewan mishki kenebaunibu jikiti xui anu manakakin kexeabun ²⁵janua jatun mae anu mishkiwen kenekin keyatapa wanibu janu uinti xui anu Saulon jabu jatu yusian Jesús ikunwain jaki chiti ikaibu betsabun meshu medan Saulo kuki ewapaki nanetan buteabu ja mae anua kainkaini paxanikiaki.

Saulo ana Jerusalén anu chintunkainikiaki, na janchadan

²⁶Janua paxai kai Jerusalén anu ana jikishina janixunda Jesús ikunwain betsabube ichanun ika dasipanan jaska jatu ichakawa chakayamakubainshinawen taea dasibibu jaki mesei ikunwanma ikai dabanan shinain: “Jesús ikunwanmabia Saulon nuku bepadantan anun ika ikimenkaintsa”, ika jaki dateaibun ²⁷jakidi mesebiaibun Bernabén Saulo

Jesúsun kushipayabu anu iyuxun jatu unanti wamakin yuixunkin:

–Ana jaki meseyamakanwen.
Damascokidi kakin nukun jaibu Saulon Xanen Ibu Jesús uin jabe janchaimaki. Januxun Jesús ikunwantan jawen kushipawen Damasco anuxun jawa dateama Jesúskidi jatu dasibi yusinbaunshinaki– jatu wakin jatu beya wamakin tapinmashinawen taea²⁸ janu jatu anu niti iyushina jaskai jiweyuxun Jerusalén anu Jesúsun kushipayabube jiwea jawa dateama nukun Xanen Ibukidi yusiin Saulo jatube janchakunkainkin²⁹ judiobu griego janchawen janchamisbube jatube janchai yuinamekin jatu yusianyan jawen yusian danain jaki sinatakin tenanun ika yubakaibun³⁰ jakidi jaska shinainbun ikunwainbu betsabun june ninkaxun Saulo medabewanun, iwanan, ianenwan kexa Cesarea anu iyushinxun jadixun jawen mae Tarso anu niwe xaxu ewapawen nichinkin yununibukiaki.

³¹ Ja jaskaibutian ikunwainbu Judea mai pakea anuabu inun, Galilea mai pakea anuabu inun, Samaria mai pakea anuabu ichakawakin ana tsuan jatu meabuma unanuma jawama jiwei janua ikunwainbu kushipai Dios kushipaki meseaibun jawen Yushin Pepatun jatu medabewaya ana ichapabun ikunwain midimabu jatuki dasikubaini jiwenibukiaki.

Pedron Eneas kaya wanikiaki, na janchadan

³² Januxun Pedron ikunwainbu jatuki bakin jatu yusin kakunkaunkin mae betsa Lida anu jiweabu anudi Diosun enabu medibi anu jatuki bai jikixun³³ janua juni betsa jawen kena Eneas jawen yuda babuniwen taea ma 8 año kabia benisma dakasa Pedron bechitan³⁴ yuikin:

–Eneasiin, Jesucriston mia kaya waikiki. Benitan ja min jaki dakamis pewadiwe– aka

jawaida Eneas benitan jawen yuda damestentan nikaunaya³⁵ ja mae dabe Lida inun Sarón anu jiweabun ja juni Pedron kaya washina uinkin Xanen Ibu Jesúskidi ninkakin dasibibun shinan betsa wanibukiaki.

Dorcas mawa Pedron bestenwanikiaki, na janchadan

³⁶ Ja badi jaskaitian mae betsa chaima Jope anuxun ainbu betsan Jesús ikunwain jawen kena Tabitá, griego janchawen jawen kena Dorcasdan, ainbu duapatun jawauma nuitapaibu jatuwen dabanan ikin jatu medabewakubainmis³⁷ e iskaun jawaida isin bitan mawaken jawen yuda dachuxun manaundi jiwe keyatapa dintu anu iabain mapemaxun datantanabun³⁸ ja mae udama Lida anuxun Pedron jatu yusiain Jope anuabun ikunwainbun ninkatan jau jabun ja yuixuntanunbun juni dabe nichinkin jatun jancha jatu yuikin:

–Pedro yuikinan, eska watankanwen: “Menaan, jawaidakiaki. Jope anu judiwe”, atankanwen– jatu wa buxun yuiabu

³⁹ janua Pedro iyuabu jatube kai jikitanaya janua Pedro ana uke medan iyukin janu yuda mawa datanbu anu jikimaibun ja ainbu beneuma nuitapaibus kexebauna kaxakin Dorcas jiwxun jatu tadi waxunmis Pedro uinmai ana kaxa chakayamaibun

⁴⁰ jatuwen nuikin dasibi jatu kainmatan danti ixun Dios yukaxuntan ainbu mawa beiskin yuikin:

–Tebitáan, benidikidanwen– aka bepexetan Pedro uintan tsauaya

⁴¹ Pedron metsunxun benitan januxun ainbu beneuma nuitapaibu inun ikunwainbu betsabu jatu kena bexun ma ainbu ana jiwema uiainbun⁴² dasibi

Jope maewan anu jiweabun Pedron jaska washina ninkashinxun ichapabun Xanen Ibu Jesúś ikunwanibukiaki.⁴³ Jatu jaska waxunshina janu jatun ina awa bichi payukin pewamis jawen kena Simónen jiwe anu jiweyuxun Pedron jatu yusinyu kubainikiaki.

Cornelion Pedro kena jawen jiwe anu kanikiaki, na janchadan

10 ¹Cesarea maewan anuxun Romano capitán jawen kena Cornelio inikidi mia yuinun ninkawe. Jawen 100 soldadobu xukuaya jatu kenamisbudan, Italiano wamisbu ²ja juni pepa enayamistun jawen jiwe anu jatube jiweabubetans Dios kenwankubainikiaki, januxun judiobu nuitapaibuwen nuikin medabewanun, iwanan, jatu pei inanxuni inun Diosbe janchai jeneismadan. ³Janua xaba betsatian ma badi kai 3:00 badi dakaken nama keska uiyanan Diosun nai tsuma betsa jawen dintu medan jikikainkin xabakabi Cornelio uinmabain yuikin:

—Cornelioon— aka

⁴jakidi besuxun uin datejaidakin yukakin:

—Xanen ibuun, ¿jawamen?— aka
januxun nai tsuman yuikin:

—Dios kenwakin min dayuimis inun jaska dasibi nuitapai jawa jayabuma min jatu medabewamis Diosun ninkatan ma miwen benimaikiki. Jaskawen taexun mia yuinun ninkawe. ⁵Ja mae Jope anu tsuada yunudiwe, jau Simón Pedro mia ixuntanunbunan. ⁶Ja Simón betsan jatun bichi pewakin pukumistun jiwe anu ianenwan kexa dati Simón Pedro jabe jiwea jaki nukui bukanikiki— abaini

⁷ja nai tsuma jabe janchatan kaken jawen tsuma dabe inun soldado betsan Dios kenjaidawadiakin Cornelion jancha ninkaxunmis jatu kenaxun ⁸dasibi jaska nai tsuman yuixu jatuki chanitan jatu nichian badi kabiaya Jopekidi bui

⁹janua bai puchinin uxashini ana bui ma Jope kemai ma badi manananbi jikidiama bui bai tanayubainaibun jabatiandi Pedro Diosbe janchanun ika mai bawa jiwe sapa xeni anu mapeketan ¹⁰bunikin pinun ika ibiaya jatun bawamistun dama pewaxunaya uxa nama keskakin Pedron uinkin ¹¹nai bepenmanakainai uiyanan tadi ewapa kexema ja dabe inun dabe dexun tibi dispiwen nexabauna mai anu Pedro bebun buteaya ¹²ja tadiki uke medan yuinaka tae dabe inun dabeya inun, main xadamisbu, inun peiyabu mata judiobun pisbuma Pedron uiyanan ¹³januxun nai anua jui taxnikin Pedro yuikin:

—Pedroon, benitan jadatuda ja yuinaka min uiain betsa detexun piwe— aka ninkatan

¹⁴Pedron nemakin yuikin:

—Xanen ibuun, ea jaska wayamawe. Nukun xenipabun beya chibankin yuinaka betsa betsapa atimapa jaska nun pitidumajaida Moisin nuku nemani en pismajaidaki— aka

¹⁵ana jawen jui taxnimakin yuikin:

—Diosun jawada dasibi na mia pewaxunxuwen taexun ana: “Diosun mia nemamis”, yuikin ana dananyamawe— atan ¹⁶ana dabeki jabiaskadi Pedro yuikin nemaya jawaida ja tadi ewapa nai anu ana jawendi ainibainaya ¹⁷Pedron dama jaska uinxuwen taea “¿Jaskada ea yui ixumen?” ika shinain jawen dabanan nuijaidaya janua Cornelio anua bea Simónen jiwe yuka ikubidani jawen jiwe anu kematan ¹⁸unanxubima yuka ikin:

—Na jiwe anudan, ¿Simón Pedro jiweamen?— ikaibun ¹⁹ja kenaibu ninkama Pedron jaska uinxu unanun ika shinan jenediamaken Diosun Yushin Pepatun yuikin:

—Uinwen. Juni dabe inun bestitun mia benakanikiki. ²⁰En jatu yunushinawen

taea benikain bututan jawawen nuiama jatube katanwen– aka

²¹Pedro bututan Cornelion jatu yunushina Pedron jatu yuikin:

–Ja man benaidan, en eaki. ¿Jawa wanun ixun man ea benai?– jatu wa

²²jabun Pedro yuikin:

–Nukun xanen ibu capitán jawen kena Cornelion nuku yunushina mia anu nun juxuki. Juni duapa pepatun Dios kenwandiamiski. Jaskawen taexun judiobu dasibibun bechipaikin jakidi pe shinamisbuki. Januxun jau min jancha ninkaxanun Diosun nai tsuma betsan yunua ninkashinxun jawen jiwe anu min kanun mia kenaikiki– akabu

²³jabianu Simónen jiwe anu Pedron jatu bashia janu jatube uxashini penaya Pedro jatube kaya ikunwainbu betsabu ja Jope anu jiweabun Pedro banawabainaibun

²⁴jatube kai ana bai puchinin uxashini bui ma Cesarea anu jikitan buaibun Cornelion jawenabus inun jawen jaibu jabe duanamemisbu jatu ixun jawen jiwe anu jatu ichawaxun jatubetan Pedro manaya ²⁵jawen jiwe anu Pedro jikinun ika kaya Cornelion itanun ika kainkain kenwain Cornelio ja bebun danti itan meopia dakaken ²⁶januxun Pedron nemakin metsuntan benikin yuikin:

–Eki jaskama benidiwe. En jawamaki, mia keskadi junidan– atan ²⁷janua jabe nia janchadabetan janua jawen jiweten bichibaina jawen dintu ewapa medan yuda ichapa janu ichabu anu jatuki nukutushitan ²⁸Pedron jatu yuikin:

–Nun judiobu nukun xenipabun beya chibain judiobumabe nun ichatidumajaida inun matun jiwe anu nun jikitidumajaidadi man unaiin. Nun jaskabiamisen en ana matu dananyamanun Diosun ea unanmakin yusinshinawen taexun ²⁹min ea kenashinken jawa matu ana

danain mesei teai niti ikama mia anu en juxuki. Jaskanun ixun min ea kenashinamenkain ea yuidiwe– aka

³⁰Cornelion kemakin:

–Ma xaba dabe inun dabetian ka na jabia baditiandi 3:00 badiken en jiwe anua samakekin en Dios kushipa ea akaya en besuudia Diosun nai tsuma betsa tadi juxupa chaxajaida sawea nixun ³¹ea yuikin: “Cornelioon, min Diosbe janchakin dayuimis inun jaska dasibi nuitapaibu min medabewamis Diosun uinkin shinankubainmisxun ma miwen benimaikiki. Jaskawen taexun mia yuinun ninkawe. ³²Ja mae Jope anu tsuada yunuwe, jau Simón Pedro mia ixuntanunan. Ja Simón betsan jatun bichi pukukin pewamistun jiwe anu ianenwan kexa dapi Simón Pedro jabe jiwea jaki nukui bukanikiki”, ea wa ³³jau mia itanunbun jawaida en jatu yunua bushinxun mia iweabu chanima nukuwen nuikin min nuku pewabidanxuki. Jaskawen taea natian Diosun nuku uiyanan jawen jancha ninkanun ika nun ma ichaki. Jawada min Diosun mia yunua min jatu yusinmis nukundi nun ninkakatsis ikai nuku yusindiwe– aka

**Cornelio inun jawenabu Pedron
jatu yusinikiaki, na janchadan**

³⁴januxun Cornelion jiwe anu ichabu Pedron jatu yusinkin taewakin yuikin:

–Natianan, chanima mai jidabi anu xukuabu tibi nuku damiwanidan, nun jabiaskas xabakabi ea ma uinmashinaki.

³⁵Na mai anu jiwebaunabu tsuabunda Dios ninkai jaki mesekin chibin pewaibu Diosun jawa jatu danainsma ea yusinshina na jabiatián en ma tapiaiin. ³⁶Jamen dasibibun Xanen Ibu Jesucristonan, Israelbu anu dukun jau jabu yusinun Diosun yununiki. Januxun tsuabunda jawen janchawen unanuma jiwidubukidi Jesús juxun jatu

yusinkubainyamaki.³⁷Januxun ja dukunan, Nashimanika Juanen Diosun jancha jatu yusianyan ninkatan jatun chakabu jenetan jawenabu unanti wamaibu Juanen jatu nashimakubainaya Jesúsun Galilea anuxundi yusin taewakin Judea mai pakea anu yusinkubaunaikidi kakaibu chanima man ninkayamaki.³⁸Januxun Jesús Nazaret anua jawen Yushin Pepatun kushipawen Diosun Jesús kushipajaidawa ja medanua medabenankunkainaya jabu diablo Satanásan ichakawakin isin betsa betsapa jatu tenemamis nuitkapaibu Jesúsun jatu xuxawakin pewakin jatu medabewakubainyama man unandiaii.³⁹Jaskadan, nukunan, ibubis nun uinkubidanyamaki. Janua Jerusalén anuxun inun mae betsa betsapa Judea mai pakea anuxun Jesúsun jaska wakubainai achixun cruzki mastaxun tenanyamabuki.⁴⁰Janua xaba dabe inun bestitian Diosun ana bestenwanshina janua Jesús nuku ana uinmakin⁴¹ana yuda ichapabu jatu uinmama jatibu Diosun bebunkidi ma nuku katuni besti ana nukuki nukutan nuku uinmayamaki, mawa ana bestenshinakidi nun jatukidi chanikubainxanunbunan. Ja Jesús mawa ana bestenkainshina jiweadan, ana jabetan pikin nun jabetan nuxukubainyamaki.⁴²Janua badi jawen jeneaitian jaska yuda dasibi mawabu tibi inun jiweabu tibi Jesús xanen ibukin jatu unanti waxanai nun jatu yusinkubainxanunbun Jesús jabitun nuku yunubainyamaki.⁴³Jaska inun, uatian jabias Jesúskidi Diosun jancha yuixunika dasibibun bebunkidi jatu yusinkin: “Diosun Mesías tsuabunda ikunwainbu jawen taexun jabun chakabu Diosun jatu buaxununbadikiki” – akin

**Judiobumabiabun jawen Yushin Pepa
Diosun jatu inandianikiaki, na janchadan**

⁴⁴Pedron jatu yusin janchai
jenediamaken janua ja jabun jawen

jancha ninkaibu anu Diosun Yushin Pepa jatuki jikiaya⁴⁵⁻⁴⁶nawan jancha betsa betsapa tsuan jatu yusindiamawen janchai taekin Dios kenwainbu ja ikunwainbu Jope anua Pedrobe bekanku jatu ninkai: “Jabaa! Jabu judiobumabiaken Diosun jatu jaska janchamakin jawen Yushin Pepa jabudi ma jatu inanxuki”, ikaibun⁴⁷judiobu jabe bekanku Pedron jatu yuikin:

–Na judiobuma jaskaibudan, “Na yudabu jatu nashimayamananwen”, iki nemai nun itidumaki. Nuku keskadi wakin Diosun jawen Yushin Pepa ma jatu inanxuki– itan,

⁴⁸dasibi Jesucristo jabun ikunwankanxu jau jawen kenawen taexun jatu nashimanunbun Pedron jatu yunua jatu nashimanibukiaki. Januxun Pedro ea akin jau uxa eskadabes jatube jiweyunun bashiyunibukiaki.

**Judiobuman ikunwanshinabukidi
Jerusalén anuxun Pedron jatu
yuiniaki, na janchadan**

11 ¹Janua nawan mae anuxun judiobumabiabun Jesúskidi Diosun jancha ninkatan ikunwanshinabun kakaibu Judea anuxun Jesúsun kushipayabu inun ikunwain betsabun ninkashinabun²janua Pedro Jerusalén anu chintunkidani jikishinken ikunwainbu betsa betsapabun judiobun beya bechipaijaidamisbu jaki ja ikin chitekin³yukakin:

–¿Jaskai judiobuma anu jatu uin kaxun min jatubetan pishianmen, nukun beya ana chibanna kanekinan?– akabu

⁴januxun Pedron jatu kemakin jaska iki taekainshina dasibi jatu yuikin:

⁵–Ja mae Jope anua Diosbe janchai uxu namai keskakin en uiyanan nai bepenmanaya tadi kexema ewapa dabe inun dabe dexun tibi disipiwen nexabauna ea anu buteaya⁶jabia tadiki

uke medan yuinaka tae dabe inun dabeya betsa piananbu inun, main xadamisbu inun, peiyabu mata judiobun pisbuma en uianyan ⁷januxun nai anua jui taxnikin ea yuikin: “Pedroon, benitan jadatuda ja yuinaka min uiain betsa detexun piwe”, ea waya ⁸ean kemakin: “Xanen ibuuun, ea jaska wayamawe. Nukun xenipabun beya chibankin yuinaka betsa betsapa atimapá jaska nun pitidumajaida Moisin nuku nemani en pismajaidaki”, en aka ⁹januxun nai anua jawen jui taxnikin ana ea jancha wakin shinan tapinmakin ea yuikin: “Diosun jawada dasibi na mia pewaxunxuwen taexun ana: ‘Diosun mia nemamis’ yuikin ana dananyamawe”, ea watan ¹⁰ana dabeki jabiaskadi ea yuikin nemaya ana jawendi naiudi ana ainikin buaya ¹¹en jaska uianyan juni dabe inun bestitun Cesarea anuxun jatu yunua beshinxun en janu ikanu ea benaibun ¹²januxun Diosun Yushin Pepatun ea yunua jawa teama en jatube kaya na 6 nukubetan Jesús ikunwainbu ebe mapuabu ebe budiatanshinabuki. Jatube kai nawan jiwe anu nun jikiaya ¹³januxun nawan nuku yuikin: “En jiwe anu en jiweken Diosun nai tsuma betsa juxun ea yuikin: ‘Ja mae Jope anu tsuada yunuwe, jau Simón Pedro mia ixuntanunan. ¹⁴Ja juni juxun kakape min jawen paxaxanai mia inun minabuya mia yusinxanikiki’, ea wa en mia kenashinaki”, ea waya ¹⁵januxun Jesúskidi kakape en jatu yusin taewaya Diosun Yushin Pepa ja dukun nuku anu juyama keskai jabu anudi juxun jatuki dasikin jatu achishinaki. ¹⁶Januxun jatu jaska waya jaska bebunkidi nukun Xanen Ibun nuku yuibaini en shinanshinaki: “Chانيا Nashimanika Juanen jenewen jatu nashimakubainshinaki. Jakia Diosun Yushin Pepatun matu nashima keska wakin matu kushipa waxanikiki”,

akin Jesúsun nuku yuibaini ikai en uinshinaki. ¹⁷Januxun nukun Xanen Ibu Jesucristo nun ikunwanyan jawen kushipa nuku inanyama keska wakin ja nawabundi ikunwainbu Diosun jabiaskadi waya ean jaska waxun Dios en nematiduma ishianki- jatu wa

¹⁸Diosun jatu jaska washina Jerusalén anua ikunwainbun ninkatan ana Pedro ja akama nesetan Dios kenwankin yuikin:

—Judiobuma dikabiwen nuikin jatu shinan betsa wamakin chanima Diosun jatu jiwekuian inandiaikiki, ikibi imakinan. Pejaidaki- anibukiaki.

Antioquía anuxun kaka pepa ninkakin ikunwanibukiaki, na janchadan

¹⁹Ja xabatian Esteban tenantan jabiatiandi dasibi Jesús ikunwainbudi jatu ichakawai bedukubaunaibuwen taea datei Fenicia mai pakea anu inun, Chipre natukan anu inun, Antioquía maewan anu paxai buimaxun judiobuma yusianma jatunabu judiobu besti Jesúskidi kakape jatu yusinabun ²⁰jakia ja jaskaibun ikunwain betsabu Chipre anuabu inun Cirene mai pakea anuabu Antioquía anu buxun griegobudi Diosun kakape Xanen Ibu Jesúskidi jatu yusindianibukiaki. ²¹Janua jabu Diosun Yushin Pepatun jatu kushipa waya jatun yusianwen taexun griegobu ichapabun jatun shinan xeni jeneten jiwea bena nukun Xanen Ibu Jesúskidi ikunwanibukiaki.

²²Janua Antioquía anuxun judiobuman ikunwainbukidi Jerusalén anuxun ikunwainbun jatu ninkatan Bernabén jau jatu medabewatanun yunuabu ²³Bernabé kai jikishinxun jabu Diosun jatu duawakin jatu kushipa wakin pepawai uin benimajaidakin jatu ana yusin pewakin jau dasibi jawa chakabuyabi jusiama nukun Xanen Ibu Jesús

ikunwain chintuanma chibankubainkin apakenunbun jatu yusian²⁴ Bernabé juni pepa duapa Jesús ikunjaidawamis Diosun Yushin Pepatun kushipa jayaken jawen yusian ninkai ichapabu nukun Xanen Ibuki dasikubainbukiaki.

²⁵ Jatu jaska watan tsube medabetima: “Jau Saulon ea medabewayunun”, ika Bernabé Tarso anu benai kashian ²⁶ Sauloki nukutan Antioquía anu iyui jabe jadi kaimaxun jatu yusinkin año bestichai nichinkin yuda ichapabu kaka pepa Jesucristokidi jatu yusinkubainaibun ja mae anuxun nawabun Jesús ikunwainbu jatukidi shinankin kenakin: “Nabudan, jabun Cristo chibainbuki”, iwanan, jatu kena taewanibukiaki, nawan janchawen kenakinan, “Cristiano”, jatu wakinan.

²⁷ Ja jaskaibutian Diosun jancha yuixunika betsabu Jerusalénkidia Antioquía anu buxun ²⁸ betsabu jawen kena Agabo ikunwainbu ichabu anu jatu yuinun ika benixun Diosun Yushin Pepatun medabewakin janchamaya bebunkidi jaskaxanai jatu yuikin: “Mai jidabi anu piti jayama dasibibu bunijaidaxankanikiki”, jatu wayama Roma maiwan anua Claudio xanen ibujaidaya jaska Agabon jatu bebunkidi yuiyama jaskanibukiaki. ²⁹ Jaskaibun Judea anuxun ikunwain nuitapaibu jatu medabewanun, ixun, yuinametan jatu pei ichawaxunkin pei ichipayabun ichapa inankin eskadabes jayabun eskadabes inankin jatu ichawaxuntan janua ³⁰ Judea anuxun ikunwainbu mekenikabu jau pei jatu jabun inantanunbun Antioquía anuxun ikunwainbu Bernabé inun Saulo katutan yununibukiaki.

Santiago tenantan Pedro Herodesin jatu bichimanikiaki, na janchadan

12 ¹Ja jaskaibu jabatiandi xanen ibu Herodesin ikunwainbu

betsabu jatu ichakawakin taewakin ²soldadobu jatu yunua Juanen betsa Santiago nupe chaipawen detekin tenanshinabun ³jaska waibu judio xanen ibubun uinkin bechipaishinabun Herodesin unantan judiobun misi xaxama besikin pimisbutian Pedrodi jatu achimaxun ⁴bichiti jiwe medan Jerusalén anu jatu bichimatan jabu tibibun jau mekekin kexebainunbun soldadobu 4 xuku tibi jabu 4 soldadobun jabuan jau mekenunbun jatu yunutan shinankin: “Judiobu Pascua nawai besi keyuaibun Pedro unanti waxun en jatu tenanxundianxanaii, judio xanen ibubu benimawakinan”, ishinken ⁵Pedro kene medan bichishinabu jatu kexe pejaidawamabun janua ikunwainbu jawen nuikin jau taxnimanan jakidi Diosbe janchakin yuka chakayamaxunkin jeneabumaken

Pedro bichiti jiwe anua jaskabiamawatan nai tsuman taxnimaniikiaki, na janchadan

⁶janua Pedro bichixun uxanshinkin penaya yudan kaianen bedubi uiainbun Herodesin Pedro unanti watan tenankatsi ikin manaya janua Pedro soldado dabebe mane dispi chiwetameyawen jabe menexekea mekeia jabe uxabun, janua dabeledi kini jawen beputi kexexun uinjaidaibun ⁷janua bichiti jiwe medan Diosun nai tsuma damii jikii chaxai xabakain bichiti dintu medan xaba wa nitan nai tsuman Pedro uxa bestenwakin tima tima aka bestein tekuitanai yuikin:

–Menaan, jawaida benidiwe– akaya ja Pedro mane dispi soldadobube menexekea jawaida jamebi chudekei nidi ikaya ⁸nai tsuman ana yuikin:

–Min nanexeketi sawetan min bichi tae sawediwe– aka

Pedron jaska waya nai tsuman ana yuikin:

–Min tadi bemakia peyabukutan ea chibandanwen– aka
 9jachun kakin chibambainkin shinain: “¿En jaskai? ¿En chanima ma bestean daka kai ikai? ¿Na ea nai tsuman eska waidan, en daka uxa namai ikai?”, ixun shinanbaini ¹⁰ja dukun soldado betsa dainbaini ana betsandi kexea ja kachu daindiabaini kai bichiti jiwe jawen jenea beputi anu mane beputi kushipawen bepuabuki kemaya jamebi bepenmanaya janua kainkaini taxnidabetan bai tanabainkin nai tsuman ja besti jenebaina ¹¹januxun Pedron shinan kayatiwakin unantan:

–Herodes inun judio xanen ibubun dasibi ea jaska wakatsi ikaibu nemanun, iwanan, chanima en Xanen Ibun jawen nai tsuma yunua juxun ea taxnimaxu shinankin en unaiin– itan,

¹²jaska shinanbaini Juan Marcosin ewa Marían jiwe anu ikunwain midimabu ichaxun Dios jakidi yukaxunaibu anu Pedro kaxun ¹³jiwe jemaintin kenenibu janu jikiti xui beputi tsan tsan akaya Marían tsuma ainbu jawen kena Rode:

–¿Tsua ikimenkain?– ika kainkain uin kaxun ¹⁴Pedron jui ninkatan benimajaidai bepenxunyuama kushikain uke medan jiwtan jikixun jatu yuikin:

–Pedroan, ua ma beputi kexa nia en ninkatanaii– jatu wa

¹⁵jawen jancha ikunwanma jabundi yuikin:

–Jamabiaken min jumei ikaii– akabu

–En chaninwain ikai dabanen man ikaii. Jaskamaki– ikaya

jabun ana yuikin:

–Jamaki. ¿Jatun mekea jawen nai tsuma min ninkatanamen ikai?– ikaibun

¹⁶Pedron jatu kenakin tsan tsan akin jeneamaken janua bepenxun bechitan uin e iki teku iki keyuaibun ¹⁷januxun jikitan jawen mekenen jatu nemakin jatu jancha nesematan jaska jawen Xanen

Ibuan bichiti jiwe anua taxnimakin Paxawaxu jatu yuitan ana yuikin:

–Jaskatan en kainxu Santiago inun ikunwainbu betsabu ea jatu yuixunxankanwen– jatu watan janua june kainkaini mae betsa anu iduyui kaken

¹⁸janua ma penai xabaya Pedro jaskatan kainkaina unanma bepxui bichiti jiwe anua soldado uinikabu jaskatima datejaidaibun ¹⁹januxun jawen soldadobu betsa Herodesin yunua benabaunkin Pedro bechiabumaken ja soldadobun Pedro mekeshinaibun Herodesin jatu yuka jawa yuitidubumaken jatun jancha bechipaimajaida ja jabun meke chakashina soldadobu kupikin jau tenanunbun soldado betsabudi yunutan janua Judea jenebaini kai Cesarea anu Herodes jiwei kanikiaki.

Jaskatan Herodes mawanikiaki, na janchadan

²⁰Janua Tiro anuabu inun Sidón anuabuki Herodes jatuki sinataya Tiro inun Sidón yudabun piti Herodesin maiwan anua bimisbuwen taexun xanen ibu Herodes daewakatsis iki jabe xanen ibu bexmas Herodes medabewamis Blasto anu bexun jau jatu medabewakin daewamaxanun jaibu watan yukashinabu ²¹janua xaba betsatian Herodesin jatu jancha wakatsi jatu kenashina bea xanen ibu betsabudi bedia icha maniabun jatu besuudi Herodesin ichati tadi jawenduajaida sawea januxun yunumis anu tsauxun jawen jancha jatu yuikin taewaya ²²januxun junibun jabun jawen jancha ninkakin bechipaikin unanxubima yuikin kenwankin:

–Na Herodes janchaidan, juni keskamaki. Dios betsa keskai janchaikiki– akaibun

²³Herodesin jaska waibu unankin ninkabiakin jatu jawa nemama jatundi

Dios kenwankatsi ikamawen taexun jawaida Diosun nai tsuman Herodes kupikin isin tenemaya nami xenan kaianen pia mawanikiaki.

²⁴Jaskashinken Diosun Mesías Cristo mekenankidi mae betsa betsapa tibi jiweabu anu jatu yuikubainaibun ninkakin ana ichapabun Jesú ikunwankubainaibun

²⁵janua Antioquía anua ja pei jatu ichawaxuntan buxun Jerusalén anu Jesú ikunwainbu mekenikabu jatu inantan jadixundi jatubetan Jesúskidi jatu yusinkubainkin keyutan chintunkidankin Juan Marcos Antioquía anu iwei Bernabé inun Saulo bunibukiaki.

Bernabé inun Saulo Diosun jatu yunua chai yusinkin taewai buaibu jatu nichinbukiaki, na janchadan

13 ¹Antioquía anuxun ikunwain ichaibu jabun jatu yusianan, eska jayanibukiaki, Diosun jancha mextanmanikabu inun jabun kakape Jesúskidi jancha yusinanannmisbu betsa betsapabudan. Jatun kenadan, Bernabé inun, Simón jawen kena betsa Meshupa inun, Cirene anua juni betsa Lucio inun, Galilea xanen ibu Herodesbe ewani Menahem inun, Saulo inibukiaki. ²Janua ana xaba betsatian jabu ichatan samakekin Dios kenwainbun Diosun Yushin Pepatun jatu yuikin:

—Bernabé inun Saulo daya betsa ma en jatu kenani en jatu yunukatsis ikaya jau dayatanunbun medibi jatu nichinkanwen— jatu wa

³januxun samakeyabi jau Diosun jatu mekekubainxanun jabun jatu yunuaibun yukaxuntan jau dayatanunbun medibi wakin mamepixun jatu nichianbu

Natukan Chipre anuxun Bernabé inun Saulon jatu yusinikiaki, na janchadan

⁴januxun Diosun Yushin Pepatun Bernabé inun Saulo Antioquía anua

nichinkin yunua jatun medabewanika Juan Marcos iyui ianenwan maikidi kexa anu mae betsa Seleucia anu jikitán natukan ewapa jawen kena Chipre anu kakatsi pakatan niwe xaxu ewapawen inatan besusi pupei kai ⁵mae betsa Salamina bai butuatun keti itan janu jikishinxun janu judiobu ichamisbu tibi anuxun Diosun Mesías Cristo mekenankidi jatu yusin taewatan jatu yusinkubauni ⁶janua natukan mae tibi anu Bernabé inun Saulo uin bukubaini atimas ja natukan xanen ibun mae jawen kena Pafos anu jikiabu janu judio betsa jawen kena Barjesús, jawen griego kenadan, Elimas, juni mukayai chani chakai: “Diosun jancha yuixunika nikapai en jawen kushipayaki”, ikin jatu padanmis ⁷janu romano xanen ibu Sergio Paulobe ja juni mukaya ja dayaxunmis jiweken ja xanen ibu unanepa shinan pepayatun Bernabé inun Saulokidi kakaibu ninkatan Diosun kakape Jesúskidi jancha ninkakatsis ikin jau jatu ixuntanunbun yunua jatu iweabu bexun ⁸januxun jatu yuikin taewaibun romano xanen ibun Jesú ikunwain nemanun ika juni mukayatun Bernabé inun Saulokidi janchai daketapakin jatu ja akaya ⁹jakia Saulo, jawen kena betsa Pablo, Diosun Yushin Pepatun kushipayatun bedi ikama beisjaidakin ¹⁰juni mukaya yuikin:

—Diablo Satanásan bakeen, padananain chani chakai dasibi pepaki min sinatamiski. ¹¹Jaskai Yavé Dioskidi chani chakai Dioskidi bai min nuku yuxtu wamakatsis ikai? ¹¹Min jaskaiwen taexun natian Yavé Diosun mia kupikin badi chaxa min uinyamanun mia bekunwanyuikiki— akaya

jawaida meshun bepuja jawa uianma janua: “¹²Tsuan ea metsunbainimenkain?” iki meshan atanikiaki, ma bekunwanan. ¹²Jaskai uintan inun Jesúskidi yusian pepa ma jatu ninkatan: “Jabaa!”, ikin

romano xanen ibu Sergio Paulon Xanen
Ibu Jesús ikunwanikiaki.

**Pablo inun Bernabé Antioquía
maewan Pisidia mai pakea anuxun
jatu yusinibukiaki, na janchadan**

¹³Janua Pablo jawen jaibuaibube
Pafos anua niwe xaxu ewapaki inabaini
ianenwan besusi pukei mai pakea betsa
Panfilia anu kai mae Perge anu keti iki
kai buaibun januxun Juan Marcosin
jatu jenebaini Jerusalén anu ana
chintunkidanaya ¹⁴janua Perge mae anu
niti ikama bui mai pakea betsa Pisidia
kapukebaini maewan betsa Antioquía
anu jikishinabun janua juindukunti
sábadotian janu judiobu ichamisbu anu
jikia jatube tsauabun ¹⁵januxun Moisin
keneni inun Diosun jancha yuixunikabun
kenenibu una anua yusinkin jatu yui
menetan jabun yusinmisbu xanen ibubun
Pablo inun Bernabé yuikin:

–En betsabuun, ¿man jawa nuku
yusintanun ika jushianmenkain? Yudabu
benimawakin ikis nuku yuidikanwen-
jatu wa

¹⁶janua Pablo benitan jau pesnunbun
jawan meken sanantan jatu yuikin:
–Israelbu inun dasibi nawabu jabu man
Diosun kushipaki mesemisbuun, matu
yuinun ninkakanwen. ¹⁷Jabias Yavé Diosun
nukun xenipabu katunixun jabiatundi
Egipto anu jatu iwenixun nawabu keska
jiwemakin jadixun jatu pajaidawa
janu jiwekubainaibun januxun jawen
kushipawendi nawabu nematan ja mai anua
jatu tsekabidankin ¹⁸janu tsua jiweabuma
anu jatu iweimaxun iake iakemakin 40
año nichinkin Dios bikawabiabu jawa
jatu dananma jatu mekekubainikiaki.

¹⁹Januxun mai pakea betsa Canaán anu
7 nawa xukua tibi jatu mebinmakin jatu
yamawamatana ja mai nukun xenipabu
ibuwani ²⁰ja jabu jaska wakubidankin 450
año nichiiin bikanibukiaki.

Jau jatu medabewayunun mekenikabu
besti wakin Diosun jabu yunukubainmis
jawen jenea Dios janchaxunika Samuelin
jatu mekediaya ²¹januxun jabuan jau
jatun mai jidabi mekenun juni jatun
xanen ibujaidawanun ika Dios ea
akaibun Benjamín baba Quisin bake
Saúl Diosun katuxun yunua xanen
ibukin 40 año nichianyan ²²januxun
Saúlon Dios ana pe chibanmawen
taexun ana Diosun medabewama jawen
kushipa mebintan januxun Jesén bake
David jau ja mai jidabi xanen ibunun,
iwanan, kenwankin Diosun yuikin:
“Davidin jaska en akatsi ikai akin ea
benimawamistun en jancha chibankin
jatun Israelbu pe mekekubainxanikiki”,
jatu waniki. ²³Jaska yubakanixun
Davidin bababu anua betsan Israelbu
dasibi jau jatu medabewakin jatun
chakabu buaxuntan mekexanun- iwanan
–yuini natian Diosun Jesús yunuyamaki.

²⁴Janua Jesúsun jatu yusindiamaken
Nashimanika Juanen ja dukuntun
jawen kaka pepakidi Israelbu jatu
yusinkin yuikin: “Matun shinan betsa
watan Dioskidi man chakabumis
jenedikanwen. Man jaskaya en matu
nashimaxanaii”, jatu wakubaini ²⁵ma
jawan daya menei kauankin Juanen
ana jatu yuikin: “Ja matun medabenan
Diosun yunuxanai yuinibudan, ¿en,
eamen man ea shinain? En jamaki. Jakia
xanen ibu kushipajaidatun ea binuan
chipu juxanikiki. Jaskawen taea eadan,
jawen tsumapan jawen daya axunmis
keska wakin en jawen jawaumajaidatun
ean medabewakin en duawatidumaki,
jawen bichi tae mexpun tsitauxun en
pekaxuntidumadan”, jatu waniki.

²⁶Abrahamnen bababu enabu inun
dasibi nawabu man Diosun kushipaki
datemisbuun, nukun chakabuwen taexun
jau Diosun nuku kupiyamaxanun jawen
bakekidi kakape nukunaki. Matu yuinun

ninkakanwen. ²⁷Juindukunti sábado tibitian janu ichamisbu anuxun Diosun jancha yuixunikabun kenenibu jatu yuimisbu inun jabuan jatu yuibiamisbun jawa tapianma Jerusalén anuabu inun jatun xanen ibubun shinankin jawa unanma Jesús jau tenanunbun, iwanan, dananibuki, jaska jawen jancha yuixunikabun bebunkidi yuini keska wakin menekinan. ²⁸Januxun jawawen taexun tenantidubumabia jaska watima jau tenanunbun romano xanen ibu Pilato yunuabu ²⁹Pilaton jawen soldadobu yunua jaska bebunkidi jakidi kenenibu keska wakin cruzki mastaxun tenanbu januxun jawen yuda butetan buxun maiwanibuki. ³⁰Jakia Jesús tenanshinabu Diosun ana jiwemakin bestenwanken ³¹Jesús Galilea anua kaya Jerusalén anu jabe buimabu jatu uinmai xaba ichapa jawenchains Jesús jatuki nukukidankidanaiwen taea ma jiwea unantan jabuan natian Jesúskidi yudabu jatu yusinkubainkanikiki.

³²Na jabias kaka pepa beshinxun nun matu yuiaidan, Diosun nukun xenipabu yubanidan, ³³nuku ma axuinmaki, nun jawen bababu anudan. Jaska bebunkidi jawen shinanmati wakin xanen ibujaida bena Diosun katua tibi jau xanen ibui taenun jawenabun yunua jawen tsauti anu ainikubainibuki. Jaska keskadi wakin Diosun jawen bake kayabi katua juni Salmos 2 anua yuiai keska wakin yuikin: “Min en bakedan, natian en jiwea mia inankin en mia yunuaii”, anidan, nuku ma axuinmaki. ³⁴Diosun ma bebunkidi yui chaniniwen taexun jawen yuda chaputimawakin ana bestenwaniki. Jaska bebunkidi jawen janchawen pewakin yuikin: “Jawa kaneama David en yubani keska chanima en matu waxanaii”. ³⁵Jaska inun, Davidin Salmos kene betsa anudi man jaya yuikin: “Mai anua jau jawen yuda chapuyamanun

min tsuma pepa bechipajaidakin min jeneama ixanaili”, abiani ³⁶chanima Diosun David yunua xanen ibukin jawenabu medabewakubaini atimas mawa maiwabu jawen xenipabuki nukutan jawen yuda beniama chapuni natian man unaiin. ³⁷Jakia Jesús mawa Diosun bestenwantan jawen yuda ana jawa chaputimawaniki-iwanan, ³⁸⁻³⁹-Enabuun, Moisin nuku kenexuniwen nukun chakabu buakin nukun shinan shadabu pewatidumaki. Jakia Jesúswen taexun Diosun jau matun chakabu matu buaxunxanun unankin ja chibankanwen. Januxun tsuabunda Jesús jabun ikunwainbu Diosun jatun chakabu buaxunkin jatu pepawakin keyuxanikiki. ⁴⁰Jaska Diosun jancha yuixunikabun kenenibu keskai ibubis matun chakabuwen man Dios kupimatiduki. Uindakanwen, jaska kenenibu keska wakin:

⁴¹ ‘Matunan, uindakanwen.
Diosun atimaska betsa betsapa akubainikidi matuki chanibiaibun ninkabiakin
danain Dioski kaxeí xechakakin man ikunwankatsi ikamaki’,
atan nuku kenexunibuki- jatu watan

⁴²janua janu judiobu ichamisbu jiwe anuxun jatu jancha menetan Pablo inun Bernabé jatube kainbainaibun Pablón jancha ana ninkakatsis ikin yudabun yukakin: “Juindukunti sábado betsatián janu nun ichamis anuxun jabiasmaki nuku ana yusinxanwen”, akaibun ⁴³januxun judiobu ichapabu inun nawabun judiobun beya chibannmis ichapabundi Jesúskidi kakape jancha ikunwankin Pablo inun Bernabé ninkakubainaibu chintuanma jau pepawen Dios benimawakubainxanunbun jatu yusinbukiaki.

⁴⁴Janua ana sábado betsatián Jesúskidi kaka pepa jancha ninkanun ika ja

maewan anua keyu bebiai jatidi niti ikabun jabu beabun kakape nukun Xanen Ibukidi ninkaibun⁴⁵ janua judio xanen ibubun jaskaibu uinkatsi ikama Pablón jatu jaska wai bechipaiama jaki sinatakin ja ichabu xabakabi jatu ja akin: "Chani chakakin matu padainkiki", ikaibun⁴⁶ janua Pablo inun Bernabé jawa dateama dasibibun ninkaibun judio xanen ibubu jaskaibu jatu kemakin:

—Diosun kakape jawen bakekidi man judiobu dukun nun matu yusin taewanun Diosun nuku yunukin nichinbiaimaken nun matu yusiaiñ nukun yusian danankin jawen pepai jiweibi jiweti man bikakatsi ikabumaki. Man jaskaya matu jenebain nawabu judiobuma anu nun jatu yusin kaii.⁴⁷ Jamen bebunkidi nukukidi Yavé Diosun Isaías janchamakin yuini ninkakanwen:

'Nawa betsa betsapa chajaida jiweakeakeabu jaskai jiwekuintidubu min jatu yusinkubaunxanun mia yunukin en mia bin keska waii, jau min jancha xabakabi mai jidabi anuxun ninkaxanunbunan', akaya Isaíasin ninkatan nuku kenexuni— jatu wa

⁴⁸januxun jatu jaska wai ninkatan judiobuman ninkai shinan chankain benimakin yuikin:

—Diosun kakape pejaidaki— ikaibu dasibi jabu Diosun katuxun jiwekuian jatu inanxanai jabuan Jesús ikunwanibukiaki.⁴⁹ Jaskabiaibun Diosun jancha nukun Xanen Ibukidi ja mai pakea anu nati ikin jatu yusinkubainaibun⁵⁰ Pablo inun Bernabén jancha judio xanen ibubun danankin jau jatu nichinunbun, iwanan, ainbuaiibu pepa inun juni xanen ibubu jatunabubetan chani chakakin jatu sinamataman januxun Pablo inun Bernabé jatun mai pakea anua jatu

putamaibun⁵¹ jatu jaska wabu Pablo inun Bernabén jau jawa unanma jabiaskasi jiwekubainxanunbun jatu unanti wakin Antioquía anuabuki jatun bichi tae pekatan jatuki mai mishpu tabaini mae betsa jawen kena Iconio anu bunibukiaki.⁵² Jakia jabun Jesús ikunwainbu Antioquía anuabu Diosun Yushin Pepatun jatu medabewaya benimajaidakubainbukiaki.

Pablo inun Bernabé Iconio anuxun jatu yusinibukiaki, na janchadan

14 ¹Iconio anu Pablo inun Bernabé bushian janu judiobu ichamisbu anu jatube jikitan Jesús mekenan bestikidi xabakabi jaska ninkaisbuma jatu pe yusinkin mextanmaibun judiobu ichapabu inun judiobuma ichapabundi ninkakin ikunwainbun² januxun ja judio betsabun jatun jancha danankin nawabuki chani chakakin Jesús ikunwainbuki shinan chakakin jatukidi chakabu yuibaunaibun³ jatu jaska wabiabu Jesúsin kushipayabu Pablo inun Bernabé jabube xaba ichapa jiweyuxun nukun Xanen Ibuki chiti itan jawa dateama Jesúskidi chani chakama jawen janchawen jatu axunkin jaska Dios nukipakidi chanikin jatu unanmaya, januxun Diosun jatu medabewakin kushipa wakin dami atimaska betsa betsapa jatu axunkin uinmaya⁴Iconio anu jiweabu yudabu paxkatan jatiditun judiobun jancha ninkakin Jesúsin kushipayabu Pablo inun Bernabé danainbun betsabu jatiditundi jabun jatu ninkakin ikunwainbun⁵janua nawabu inun judiobu mae xanen ibubube jatube yubakatan nuitkapayabu ichakawakin mankanwen jatu tsakanun ikaibu⁶januxun Pablo inun Bernabén banabitán paxai mae Listra inun Derbe inun mae betsa betsapa Licaonia mai pakea anu buxun⁷jadixundi Diosun

jancha kakape jawen bake Jesúskidi jatu yusindiaibun

Listra anuxun mankanwen Pablo tsakanibukiaki, na janchadan

⁸ja mae Listra anu juni betsa tae dabe chakabu jabiaska kaini jawa jaska nisma tsauxun ⁹Pablón yusiain ninkajaidaya: “Ja junin ikunwanyan en kaya watiduki”, ikin jawen shinan uinjaidatan ¹⁰Pablón jui kushipawen yuikin:

–Ja min tae min jabiaska kainidan, benidiwe– aka

ja juni daxka iki ishchutan ti itan nikaunaya ¹¹yudan kaianen Pablón jaska wai uinkin kenwain jatun Licaonia jancha kushipawen yuinamei:

–Nai anua na yushin dabe junikidan nuku anu damitan butushinabuki.

Pejaidaki– ikin

¹²Bernabé metukin yuikin:

–Jadan, nukun mekenika yushin Zeuski– akin Pablo metudiakin:

–Ja jatun nuku jancha waidan, nukun mekenika yushin Hermeski– akaibun ¹³ja Zeusbe jawenabu janchaxunikatun jawen kenwanti jiwe mae jikiti anua ina awa bene dabe juawen dauwabu bexun jawenabubetan Pablo inun Bernabé ja yushin dabe kenwankin benimawanun, iwanan, detetan kuakin jawen kenwanun ikaibun ¹⁴jaska waxunaibu uinkin tapintan ja Jesúsun kushipaya dabetan yudabu jatu kenwanmakatsi ikama jatun tadi ushnitan yudabu nashui ikain nemakin jui kushipawen griegon janchawen jatu yuikin:

¹⁵–Junibuun, ¿jawakin man nuku jaska wai? Nuku jaska wayamakanwen. Nukudan, matu keskadi nun jabias juniki. Ja yushin dabe man kenwanmistun matu jawa waxuntidumaki. Jaskawen taexun man kenwanmis jenetan Dios jiweatun nai inun, mai jidabi inun, ianenwan dasibi inun, janu jiweabu

dasibi damiwani matun shinan betsa watan man kenwankubainxanun bun jakidi jawen bakekidi kakape matu yusintanun ika nun jushianki. ¹⁶U unu badi betsatian mai jidabi anu yuda betsa betsapabun jatun shinanens jawada chibankubainaibu Diosun jatu beduwens uinyukubainbiakin ¹⁷jawa matu jeneama jaska pepawamiswen xabakabi naiudia ui matu imaxunkin miban man banaima matu pe benemaxunkin man piaibu matu yaniwamakin betsa betsapawen matu benimawakubainmiski. Jaskawen taexun Dios jiwea besti kenwankubainkanwen– iwanan, ¹⁸jatu jaska wabia ninkamas ina awa bene detexun yushin dabe benimawati kuaxunyupananbun betsa betsa wakin jatu bexteaibun

¹⁹ja jatu jaska waibun judiobu Antioquía anua inun Iconio anuabu bexun Pablo inun Bernabékidi chani chakakin yudabu padankin jatu shinan betsa wamatán jatu itimaska wamabaunkin Pablo besti bechixun mankanwen tsaka tsaka akabu Pablo di ikaya: “Ma mawaki”, ixun chaka udenmisbu anu xadabain udentanabu dakaken ²⁰janua ikunwainbu ichaxun Pablo kebaunxun uiainbun Pablo bestein benitan june ja mae anu jikia jabianu uxashini janua bestentan Bernabébé mae betsa Derbe anu kaxun

²¹jadixundi Diosun jancha jawen bakekidi kakape jatu yusian januxun Derbe anuxun jatun jancha bechipaikin ichapabun ninkakin ikunwainbun jadia chintunkidani Listra inun, Iconio inun, Antioquía anu bekubidankin ²²mae tibi anuxun jau jabun jatu yusinxanun bun ikunwainbu yusinkin jatu mestenwankin yuikin:

–Eskaki, ninkakanwen. Dios xanen ibuaiki nun dasixanaibu nuku ichak awakubainxankanikiki. Jabiaskaki.

Jabiaskabiaken jawa datei chintuanma Jesús ikunwanpakexankanwen– akin menetan ²³janu ikunwainbu ichamisbu tibi anua mekenikabu jatu katutan jatube samakekin Dios dayuikin jabun Jesús ikunwainbu jau nukun Xanen Ibu Jesúsun jatu medabewakubainxanun Pablo inun Bernabén kushipa jatu yukaxunkubidanibukiaki.

**Pablo inun Bernabé maewan
Antioquía mai pakea Siria anu ana
chintunbidanibukiaki, na janchadan**

²⁴Janua bei mai pakea betsa Pisidia kapukebidani mai pakea betsa Panfilia anu jikishinxun ²⁵januxun mae betsa Perge anuxun Jesúskidi kakape jatu yusintan janua mae betsa Atalía anu jikishina ²⁶janua Antioquía anuxun jau yusintanunbun Dios jatuwen nuiay anu jadi jatu yunuimabu anu bukubaunkin Jesúskidi jatu yusinkubauntani menebidani janua niwe xaxuki nanetan Antioquía anu chintunbidani ²⁷keti itan mapekeshinabun januxundi Jesú ikunwainbube ichaxun bukubauni jaskatanshinabu inun jabu judiobuman jau jabundi Jesú ikunwanunbun natian Diosun jatu kenaya xabakabi jaska jatu yusinkubauntanshinabu dasibi jatuki chanitan ²⁸jabianu jatube bashikuyuima Pablo inun Bernabé uxe ichapa ikunwainbu jatu yusiin jiweyuaiun

**Yusian betsa betsapa jusiaibu pewai
Jerusalén anu Jesúsun kushipayabu
ichanibukiaki, na janchadan**

15 ¹jabiatiandi jabun Jesú ikunwain judiobu betsa Moisin yusian chibankin bechipajaidamisbu Judea anua Antioquía anu bushinxun Jesú ikunwainbu jabundi jatu yusinkin: “Judiobuman tsuabunda man nukubetan Jesú ikunwainbuden, Moisin nuku yununi beya jabun jina kubichi

biabumadan, Diosun jatu meketidumaki”, iki jatukidi janchaibun ²januxun Pablo inun Bernabén jaska jatu yusainbu danain jatube yuinamei ja ichakayamai itimaskaibun jaska bechipaiama atimas ikunwainbu ichatan Pablo inun Bernabé inun ikunwain betsabu katuxun jau jaska yusian jusiaibu pewakin Jesúsun kushipayaya betsabu inun mekenikabu Jerusalén anuabubetan pewai jau jatube janchatanunbun jatu yunukin ³nichianbu bui Fenicia mai pakea inun Samaria mai pakeakidi bukin judiobuman jaska jatun shinan chakabu jenetan Jesú chibanshinabukidi jatuki chanikubainaibun mae tibi anuxun ikunwainbun jaska washinabukidi jabun kaka ninkai benima chakayamakubainaibun

⁴janua Pablo inun Bernabé inun jatube buaibu Jerusalén anu jikiabu Jesúsun kushipayabu inun, mekenikabu inun, dasibi Jesú ikunwainbu betsabun jatu i pewatan jatube ichabu Diosun jatu medabewaya judiobuma Jesúskidi jatu yusianyan jabundi ikunwankubainshinabukidi Pablo inun Bernabébe jatuki chaniaibun ⁵jatu jaska yuiaibun judio xuku betsa fariseobun Moisin jancha chibanjaidabiamisbun ma jatidibun Jesú ikunwankin chibainbu betsa benikauan jatu yuikin:

–Man jaskakidi jatu yuaidan, nawabu Jesú man jatu ikunwanmaibudan, jaska Diosun Abraham yununi keska jau jatun jina kubichi binunbun jatu yunukanwen. Ja inun, Moisin nukun xenipabu yununi beya jau chibandanunbun jatu yunudiakubainkanwen– jatu wa

⁶jaskai ninkatan ja beyakidi jatu jusimapaiabu ja unanepabu Jesúsun kushipayabu inun mekenikabu besti pewanun ika ana ichatan ⁷jaikaimas shinan betsa betsapaibu Simón Pedron jatu ninka keyutan atimas jadi benitan jatu yuikin:

-En betsabu inun en puibuun,
 Diosun kakape jawen bake Jesúskidi
 judiobumandi jau ikunwanunbun matu
 anua Diosun ea katuxun ea yunuxun
 ea jatu yusinmayama man unaiin.
⁸Ja romano xanen ibu Cornelion jiwe
 anuxun en jatu yusianyan jabun Jesús
 ikunwainbu Diosun dasibi nukun shinan
 unanmistun ja judiobumadi jawenabu
 wakin ikunwanmakin nuku keskadi
 wakin kushipa wakin jawen Yushin
 Pepa jatu inankin jatu achimayamaki.
⁹Nukunan, nun Jesús ikunwainbu
 Diosun nukun juinti pepawamis keska
 wakin jabundi Jesús ikunwainbu Diosun
 jawa jatu dananma jawa nuku paxkakin
 betsa wama jabiaskas shinan jatube nuku
 waikiki. ¹⁰Jaskawen taexun ja Moisin
 nukun xenipabu yusini beya jabun
 chibantiduma ipaunibuki. Jabiaskadi
 nun Israelbun nun chibantidubumadiki.
¹¹Jaskakkin Diosun jatu jaska wamabiaken
 matu Dios keskakin judiobuman Jesús
 ikunwainbu man jatu yunuai? Jatu jaska
 wayamakanwen. ¹¹Natian nuku inun
 jabukidi shinananankanwen. Nukubun
 nun ikunwain mekea jayadan, jawama
 jamenjaida nun ikanaii. Jaska keskadi
 wakin jabu judiobumadi jabias nun ikai
 keskadi wakin nukun Xanen Ibu Jesúsun
 jabu duawaikiki, jawen pepawenan– jatu
 wa

¹²janua dasibibun jaska ninkai
 pes nesei keyutan ana jawa yui
 janchabumaken januxun Bernabé
 inun Pablo Diosun jatu medabewaya
 judiobuma anuxun dami atimaska
 betsa betsapa jatu uinmakubainimakidi
 jatu yuikin ¹³meneaya Jesúsun betsa
 Santiagon ichabu jantsidi jatu yuikin:
 -En betsabu inun en puibuun, eandi
 matu yuinun ninkakanwen. ¹⁴Jesús
 ikunwainbu Diosun jawenabu jatu
 wadiakin medabewani jau nukube
 ikubainxanunbun jaska bebunkidi

tatesmakin Diosun judiobumadi
 katuyama Simónen ma nuku yuixuki.
¹⁵Eanan, jabiaskadi bebunkidi Diosun
 jancha yuixunikabunkenenibu en jaska
 shinaiin, Diosun jancha jaska yuiaidan:
¹⁶'Israelbu kupitan ana juxun
 David xanen ibu ini keska wakin
 jawen baba betsa medabewakin
 kushipa wakin
 ja jiwe di ini keskabu en ana jatu
 benixanaii.
¹⁷En jatu jaska waya nawa xukuabu
 tibibu inun
 tsuabunda en Yavé Diosun kenayabun
 ea yukai jabun ea benatidubuki.
¹⁸Jaska bebunkidijaida en Yavé Dios
 janchakin jatu yubaidan,
 chanima en jatu axununbadiaii',
 ikai ninkatan nuku kenexuniki– iwanan
¹⁹–Jaskawen taexun nun shinanunbun
 matu yuinun ninkakanwen. Judiobuman
 jatun shinan chakabu jenetan Jesús
 ikunwankin Dios chibainbu jaska nun
 judiobu nukun beya chibain nun jiwemis
 yunukin jatu bikawayamanankanwen.
²⁰⁻²¹Jakia badi ichapa ma jadi judiobu
 judiobuman mae tibi anuxun juindukunti
 titibitan jaska Moisin jatu kenexuni jatu
 yusin jatube beyamisbuwen taexun jau
 judiobuman judiobu jawaida jau bedabin
 dabeyamanunbun na besti nemakin
 jatu kenexunankanwen, eska besti jatu
 bextekinan. Yushin dami betsa kenwankin
 nami inanmisbu jau piyamanunbun
 inun, jabu ainyankinan, jaska Moisin jatu
 nemani jau chibanunbun inun, yuinaka
 tenexabu mawa jau piyamanun inun,
 yuinaka jimi jau ayamanunbun jaska besti
 jatu nemakin kenexun judiobuma dasibi
 anu buamanankanwen– jatu wa

Judiobuma yusinkin jatu bikawaiubukidi
 jatu kene buamanibukiaki, na janchadan
²²januxun Jesúsun kushipayabu inun
 mekenikabu inun ikunwain dasibibun

Santiagon jancha ninkakin bechipaitan Antioquía anu Pablo inun Bernabébe jau butanunbun jabubetan ikunwainbu anua juni dabe unanepa Judas jawen kena betsa Barsabás inun Silas katutan

²³jatu bumakatsi jatu kenexunkin: “Nun Jesúsun kushipayabu inun mekenikabu nun matubetan ikunwainbunan, nun matu kene bumai uinkin ninkaxankanwen. Judiobuma man Antioquía maewan anu jiweabu inun, Siria inun, Cilicia mai pakea anu jiweabun nukubetan Jesús man ikunwainbu nun matu shinaiin.

²⁴Jaskaken nenuadi nukunabu nun jatu yunuamabia buimaxun jatun beyakidi matu yusinkin matu itimaska waibu nun ninkashinaki.

²⁵Jaskawen taexun nukun nun matu medabewanun ixun jabias shinan ichawatan nukubun nun shinan peken jau jabundi jaskakidi matu medabewaxanunbun ixun nuku anuadi juni dabe katutan nukun jaibu Bernabé inun Pablone nun jabube nichiaiin.

²⁶Nukun jaibu Bernabé inun Pablone jatun jiwea yaushiamma bikajaida mesebiaken nukun Xanen Ibu Jesucristo dayaxunkin yusinkubainmis man unaini.

²⁷Jabu nun matu anu yunuai jaska nun matukidi shinain Judas inun Silas jikitau matu xabakabi yusin pewaxankanikiki. ²⁸Jakia jaska man judiobumandi Jesús ikunwain unanuma man jiwenunbun Diosun Yushin Pepatun nuku shinanmaya ana nukun beyakidi jawa betsa matu yunuama na besti nun matu nemai ninkakanwen, man judiobube bedabinandabeyama nunbunan. ²⁹Yushin dami betsa kenwankin nami inanmisbu

ana piyamakubainxankanwen.

Ja inun, yuinaka tenexabu piyamadiaxankanwen. Ja inun, yuinaka jimi ayamadiaxankanwen. Ja inun, ainyankinan, jaska Moisin nuku nemani ja chibandiak ubainxankanwen. Jaska besti man mekeadan, jawa chakabuma man pe besti jiwexankanaii. Jau Diosun matu pe mekekubainunwen”,

jatu waxuntan

³⁰jabu butanunbun keneya jatu nichinkin yunu pewabu Antioquía anu jikishinxun ikunwainbu ichawaxun kene jatu inanbu

³¹januxun ikunwainbun ja kene bitan yuui jatuwen nuikin jatu daewaibu ninkai benimaibun

³²Jesúsun kushipayakin Judas inun Silasin Diosun jancha pe jatu metxtamamiswen taexun ikunwainbu jatu medabewakin jatu benimawayu ikunwainbun jabun jancha bechipajaidaibun ³³januxun jau jatu yusinyununbun uxe ichapama bashimaxun ma buaibun ja jabun jatu yunuimabu anu jabu jiwei peabu jau jatu yuitanunbun, iwanan, unanuma jau butanunbun jatu nichian buaibun

³⁴⁻³⁵janua Pablo inun Bernabé Antioquía anua ana kama niti iki bashikuyuimaxun ikunwainbu betsabubetan kakape Jesúskidi yudan kaian jatu yusinpakekubainbukiaki.

Pablo Bernabébe kunyan idabetan paxkabainbukiaki, na janchadan

³⁶Janua Antioquía anu uxa ichapa Pablo jiweyukin Bernabéki chanikin:

–Janu Jesúskidi nun yusinkubauntanima anu ikunwainbu jaskadamenkain ana jatu uinkubainanwen– aka

³⁷Bernabén kemakin:

–Kakinan, ¿Juan Marcos nun ana iyutidumen?– aka

³⁸bebunkidi jatubetan yusin ka Panfilia anuxun jatu xunubidankin jenebidanimawen taexun Pablo ana iyukatsi ikamaken

³⁹janua jawen taea iyunun ika jabe kunyan idabetan paxkai jenenamedabetan Bernabén Marcos iyui Chipre anu niwe xaxuwen inatan kaya ⁴⁰jaska wabainaya Pablo jawena medibis shinantan Silas iyukatsis ikin katutan ikunwainbuki chaniaya jabun yuikin:

—Man jaska kainaidan, peki. Man jatu yusin kaya nukun Xanen Ibu matuwen nuikin jau matu medabewakubainunwen— akin jatu nichinkin yunuabu janua kainbaini main bui ⁴¹Siria inun Cilicia mai pakea kapukekubainkin Jesús ikunwainbu ichati jiwe tibi anuxun jatu yusinkin jatu benimawakubauni kai

**Pablo inun Silas buaibube Timoteo
jatube kanikiaki, na janchadan**

16 ¹janua Pablo inun Silas kakunkainkin Derbe inun Listra ja mae dabe anu yusin Listra anua Jesús ikunwain betsa jawen kena Timoteoki nukunibukiaki. Jawen ewa judio ainbun Jesús ikunwanyan jawen epa griegonawan Jesús ikunwanmaken ²janua ikunwainbu Listra inun Iconio anuxun Timoteon Jesús ikunwain pe jiwekunkainmiskidi chaniaibun ³Pablon ninkatan jau ea medabewai ebe kanun, ixun jawen epa judiomabiaken jawen ewa judiowen taexun jau judiobun Timoteo dananyamaxanunbun jawen bedabintidubuken jatun beya chibankin jawen jina kubichi Pablon jatu mextemaniaki.

⁴Janua bukubainkin judiobu inun judiobuman Jesús ikunwainbu mae tibi anua jau jatun beyakidi yusiin bikanameyamakubainunbun Jesúsun

kushipayabu inun mekenikabu Jerusalén anuxun jatu nemakin kenexunimabu jatu yusin chanikubainaibun ⁵janua ikunwainbun jaska ninkatan jatun shinan pewakin mestenwankubainaibun yuda betsabundi Jesús ikunwain xaba tibi ana ichapabu jatuki dasikubainaibun

**Pablo uxa namaya Macedonia
anu jau kanun juni betsan
kenanikiaki, na janchadan**

⁶mai pakea betsa Asia anu Pablo inun, Silas inun, Timoteo Jesúskidi jatu yusin jadi bunun ikaibun Diosun Yushin Pepatun jatu nemaya mai pakea dabe Frigia inun Galacia anuabu jatu yusiin kapukebauni ⁷mai pakea betsa Misia kemai Bitinia mai pakea betsa anu jikinun ixun shinanyan Jesúsun Yushinin jatu ana nemaken ⁸janua Misia kapukei bai chai tanabaini mae betsa ianenwan kexa anu bei butubidani Tróade anu jikiabun ⁹jabianudi en Lucas en jatuki nukuken meshu medan Pablo uxa namaya juni betsya Macedonia anua damia nixun Pablo yuikin: “Macedonia anudi juxun nuku medabewayuwe”, ikai ¹⁰ninkatan bestenxun ja namapan uinxu nuku yuiaya Macedonia anuxun Jesúskidi kakape nun jatu yusin kanun Diosun nuku yunuai unantant nukun mabu pewashintan

**Filipos mae anuxun Pablo inun Silasin
jatu yusinibukiaki, na janchadan**

¹¹janua Tróade anua penaya niwe xaxu ibu peiwen pakatan nanekaini natukan jawen kena Samotracia anu kayanbis kai pukei janu keti itan janu uxashini ana bestenkaini meshukidi jabias xaxuwendi pukei mai pakea betsa Macedonia anu mae betsa Neápolis anu jiki keti itan ¹²janua mananan mapekekaini romano mae ewapa mae tibi binua chaima Filipos anu nun jikishina jawa wadiama

janu uxa eskadabestan ¹³janu judiobu ichamisbu jiwe jayamaken sábado juindukuntitian mae anua kainkaini jene kexaxun Dios kenwakin januxun Dios kushipa yukamisbu anu kai ainbus ichamisbuki nukutushitan jatube tsauxun Diosun Katua Jesús mekenankidi nun jatu yusinkin taewaibun ¹⁴ja ainbuabu icha betsan Dios kenwanmis jawen kena Lidia mae betsaa Tiatira anua junixun tadi pepa bixun tashi jushinipa wamis nukun Xanen Ibum medabewakin ninka pewamakin jawen shinan betsaa wamaya Pablom janchawen Jesús Lidian ikunwanyan ¹⁵januxun jabubetan jawen jiwtanxun ikunwainbuwen taexun unantan nun jatu nashimakin keyua Lidian nuku yuikin:

—Chanima nukun Xanen Ibu Jesús en ikunwain man ea shinainan, en jiwe anu iyui bekanwen— akin nuku ea akin ana nuku ena wanun ikaya

—Peki— itan jadi ka nun jabe jiweyuniki.

¹⁶Janua xaba betsatian janu Diosbe janchamisbu anu ana Diosbe janchanun ika nun kaya chipash yushinin bebunkidi unanmamisken ja chipash juni betsabun tsumapan jatu unanxunkin jawen tsumabu pei midima jatu bixumisken chaima jaki nukutan nun dainbainaya ¹⁷nuku chibanbainkin metubainkin mapuabu dasibi unanxubima jui kushipawen jatu yuikin:

—Ja junibudan, Dios kushipa dasibi binua jawen tsumabun ja dayaxunkanikiki. Janu kupiaitian tsuanda matu nemaxuntidu jawen chanima paxati bai matu unanmakanikiki— akin ¹⁸xaba tibi jawenchains bestikima nukukidi yui janchakunkainaya Pablom jaska ninkai ma bika tenexun dabeketan ja chipashki yushin jikini yuikin:

—Jesucriston kushipawen en mia yunuai ja chipash anua kaindiwe— aka

jaska was ja yushinin jawaida jenebainaya

¹⁹ana ja chipash yushinyankin pei ana jatu bixuntiduma jawen tsumabun ana jawawen jaskatima unantan Pablo inun Silaski sinatakin achibainkin jatun mae namakis jemaintin anu jatun xanen ibubu be bun iyukin xadabain ²⁰januxun xanen ibu yununikabun besuudi jatu nichintan yuikin:

—Na judiobunan, nukun mae anuxun yusinkin jadakidi shinantimawakin dasibibu nuku itimaska wakanikiki.

²¹Jatun beya jaska jiwe misbu nuku yusia inbu nun romanobun nun chibanbaintidumbumaki, jaska nuku yusinun ika ikaibudan— jatu waya

²²januxun yudan kaian mapubaunabundi jaska ninkai sinatai jabundi jatu chiteaibun jatukidi jaska buwen taexun jatun xanen ibu yununikabun jau jatun tadi pekatan ji sidiwen jau jatu kusha kusha anun bun jatu yunuabu ²³jabun jatu kusha kusha achakayamat an bichiti jiwe anu jatu bichimatan mekenikatun uin pewakin jau mekejaidanun yunubidanabu ²⁴ninkatan ana dintu uke medanajaida Pablo inun Silas mistuxun jau jaska paxayamanun bun ji xui dabeyawen jatun tae bitaux adabeta mekeken

²⁵ja jaska wabu jabias meshu yamenapun Dios dayuikin Pablo inun Silasin jawen kenwanti Dioskidi nawaibun ja jabu dukun jatu bichimabun jatu ninkaibun ²⁶jaskabiama e iskaun jawaida pacha sakui mishki bichiti jiwe wanibu takax takax akaya ja jaska waya beputi tibi jamebi bepenmanai keyuaya juni tibi mane dispiwen menexekeabu jamebi chudekei nidi iki keyuaya ²⁷janua mekenika bestenkauan beputi tibi ma bepenmana uintan shinain: “E jee! Min jaskati kemain. Dasibi ma kainbaini paxabubin! Ibubisbin en mawai!”,

itan jawen nupe chaipa sitan ibubis tenukuyupanan²⁸jawaida Pablo n jui kushipawen yuikin:

—Mimebi ibubis chakabuyamawe. Nuku dasibi nun jani kamaki— ikaya

²⁹januxun jawen tsumabu bin yukatan Pablo inun Silaski datei saki saki iki kushikain kenwain jatu naman danti itan³⁰januxun kainmatain jatu yukakin:

—Xanen ibubuun, janu kupiaitian en Dios daewakatsis ikaii. ¿Jaskapa, jau ea mekexanunan?— jatu wa

³¹januxun jabun kemakin:

—Xanen Ibu Jesús ikunwanwen. Mia inun min jiwe anu mibe jiweabubetans man jaska waya Diosun matu mekekubainxanikiki, kupiamadan— jatu waya

³²jawaida bichiti jiwe mekenika inun dasibi jabe jiweabu nukun Xanen Ibu mekenankidi jatu yusain³³ninkatan meshubiaken jatu kushshinabu su ika jene jabaibu jawaida unpaxwen jatu chukatan januxun jabe jiweabubetans Jesús mekenan ikunwankantuwen taexun Pablo inun Silasin jatu nashimabu³⁴janua jabe jiweabubetan Dios ikunwanbaini benimajaidabainkin jatun jiwe anu jatu iyuxun jatu pimashinaibun

³⁵janua penaya xanen ibu yununikabun jatun tsumabu jatu jancha bumakin yuikin:

—Ja juni dabe achiabu man jatu bichishinabudan, ana jatu jawa wama jau kainunbun yuitankanwen— akabu buxun bichiti jiwe mekenika yuabu³⁶januxun Pablo yuikin:

—En matu jawa wama kainmanun xanen ibubun ea yunukanxukiaki. Jaskaken unanuma budikanwen— jatu waya

³⁷jakia Pablo kaintan xanen ibun tsumabu yuikin:

—Nuku dabe romano documento nun jayabiaken chanima nuku jawa yuka

pewama e iskaun juni dasibibun bedubi nuku kusha kusha matu amatan nuku bichishinabuki. ¿Ikis natiandi junedi nuku kainmakatsis ikanimenkain? Jaskamaki, jau jabun ibubis nuku kainmai benunbun jatu yuitankanwen— jatu wa

³⁸janua jatun tsumabu buxun jaska Pablo jatu yuia ninkabain jatun xanen ibubu yuiabu ninkatan:

—Romano documentoyabudaka— iki datei³⁹jaska jatukidi ninkabidani bexun daewakin jawen bichiti jiwe anua kainmatain nichinkin Pablo inun Silas yuikin:

—Matu jaska wakin nun kaneshinaki. Nukun chakabu shinanma unanuma budikanwen, nukun mae jenebainidan— jatu wa⁴⁰bichiti jiwe anua taxnibaini bui Lidian jiweten jikia bayukin januxun ikunwainbu jatu shinan chankanwantan Pablo inun Silas buaibun Timoteo jatube kaya jakia ea Lucas jabianu en bashikuyuniki.

**Pablo inun Silas Tesalónica
anuxun jatu yusianyan janua
itimaskanibukiaki, na janchadan**

17 ¹Filipos anua Timoteo iyui Pablo inun Silas chipekebaini bui mae Anfípolis anu uxashini ana bui mae Apolonia anu ana uxadiakaini janua bui mae betsa Tesalónica anu jikishina janu judiobu ichamisbu jiwe jayawen taea²Pablo ma jaskamis beyawen taea janu sábadotian semana dabe inun besti Pablo judiobube ichaxun Mesíaskidi Diosun jancha yuixunikabun kenenibu betsa betsapa yuiaibube jatube yuinamekin:

—Diosunan, jawen Mesíasdan, jau mawayuxanun yununik. Mawatan ana bestenxanikiki, akin jakidi kenenibudan— akin Pablo jatu yusin pewatan ana jatu yuikin:

—Ja Jesúskidi matu yui en chanikunkainaidan, Diosun Katua Mesías Cristoki— jatu wa

⁴januxun judiobu jatiditun inun griegonawabun Dios kenwanmisbu ichapabu inun ainbuaibu pepa jakidi pe shinanmisbu midimabundi Jesús ikunwankin Pablo inun Silaski dasiaibun ⁵jakia judio xanen ibu betsabu jabun ikunwankatsi ikama Pablo inun Silasin jatu binuaiwen taexun jatuki sinatakin juni chakabu chikishbu jatu ichawatan jatu pei inantan yuda dasibibubetan jau jatu itimaska wabain Pablo inun Silas achixun mae xanen ibubu jau inanunbun jatu yunuabu jaskai bedukubainkin jatu mesewakin datebainkin dasibi itimaskakain Jasónen jiwe anu ja junibun Pablo inun Silas bena akeakebaini ja jiwe anu jikitan ⁶jatu bechiama Jasón inun ikunwain betsabu besti achibain mae xanen ibubu anu xadabainkin jatu iyuxun jancha kushipawen ja akin chitekin:

Ja juni Pablo inun Silasinan, romano mai jidabi anu buaketankin jatun yusianwen jatu itimaska wakubaunkin nenudi beshinxun jabiaskadi wai ⁷Jasónen jiwe anu jatu ishiankiaki. Jabun nukunabu yusinkin Jesús jatun xanen ibu benakidi yusinkin nukun xanen ibu romano Césarn nemati jancha dananti wakin binumakanikiki. Chakabujaidaki- jatu wakin ⁸yudan kaian inun mae xanen ibubu jaska jatu yuiaibu ninkatan jamenmens daketapakin Jesús ikunwainbuki jatu sinatajaidamaibun ⁹ninkatan jau june kainbainyamaxanunbun jawen yubakati pei ichapa Jasón inun ikunwainbu betsabuna bianyxun chipu ana jatu ninkakatsi jatu jawa wama jeneyuabu

Berea anuxun Pablo inun Silasin jatu yusiaín ninkanibukiaki, na janchadan

¹⁰jaskaibun jawaida meshu medan jau junebaintanunbun ikunwainbun Pablo inun Silas inun Timoteo mae

betsa Berea anu jau paxanunbun jatu nichianbu bui Berea anu jikishina janua janu judio ichamisbu jiwe anu jikitan ¹¹Diosun Mesías Jesús mekenankidi jatu yusianbu Tesalónica anua judiobu keskama Berea anu judiobu pepabun ninkakatsis ikin: “¹²Pablón jancha chanimenkain? ¹³Chanimamenkain?” ikin Diosun jancha kenenibu xaba betsak tukama tibi ichaxun tapinkatsis ikin bechipaikin uinkubainaibun ¹⁴jaska wakin judio ichapabu inun griegonawabu junibu inun ainbuaibu pepabu jatukidi pe shinanmisbundi jabun Jesús ikunwainbun ¹⁵jatu jaska wamaya Berea anuxun Diosun Mesías kakapekidi Pablón jatu yusiaín judiobu Tesalónica anuabun ninkakin unantant jawaídabidani bexun Pablobiki chani chakabaunkin Berea anu jiweabu jatu shinan betsak wamakin yudabu jatu itimaska wai bedukubaunaibun ¹⁶jaska ninkatan ikunwainbun medabewakin jawaida jau Pablo paxanun ianenwan kexa anu iyuabun jakia jatu anu Silas inun Timoteo bashikuabun ¹⁷janua ikunwain betsabudi Pablobi niwe xaxuwen bui maewan betsak Atenas anu chajaida iyuxun nichintanabu Pablón jatu yuikin:

—Silas inun Timoteo jau jawaídabidani jau eki nukudi benunbun ea jatu yuixuntankanwen— jatu wa chintubainaibun

Atenas maewan anuxun Pablón jatu yusinikiaki, na janchadan

¹⁶janua Pablo Atenas anuxun Silas inun Timoteo manakin ja maewan anu dami yushin wanibu ichapa kenwanmisbu uinkubauni jatuwen nui bika tenejaidai ¹⁷jaskawen taea judiobu inun griegonawa bestibu jabun Dios kenwanmisbu jatun ichati jiwe anua xaba tibi jikitan Diosun Mesías Jesúskidi

jatube yuinamei janchakunkaini inun mae jemaintin ewapa anuxundi dasibi maniabu jabiaskasdi Jesúskidi jatu yui jatube janchanamediakunkainaya¹⁸ janua juni betsa unanepabu epicúreobun yuikin: "Tsuawen nuiama jawada min bechipaiai besti aki pe jiwekunkaintiki", ikin shinanmisbu inun juni betsa unanepabudi estoicobun yuikin: "Jawawen benimama, jawen yudawen nuiama pe jiwekunkaintiki", ikin shinanmisbu Pablo yuinamei kemanamediaibun jabu betsan chitekin yuikin:

—Na chikish janchanwainan, ¿jadakidi janchai ikimenkain?— ikaya betsan yuikin:

—Pablona, eska yui ikikiaki. Diosun Mesías Jesúskidi inun yudabu dasibi mawa ana bestenxanaibukidi chanidan-ikaya jaskakenan

—¿Mekenika yushin betsa betsapa nun jawa unandibumakidi jawen nuku benimawanun ika ikidaka?— ikaibun

¹⁹Jaska wabainkin Mati Areópago anu janu unanepabu ichamisbu anu Pablo iyuxun yukakin:

—Nun tapinun ja yusian bera min beshianan, nuku unanmadiwe.
²⁰Jaskakidi chanikin min nuku bepxuma kayaidan, nun tapinkatsis ikai nuku yuidiwe, ¿jaskada kayakidi yuia min yui ikimenkainan?

²¹Jaska jabu yuka ikidan, Atenas anu jiweabu inun nawa betsa janu jatube jiweyuabu tsuanda yusian bera beabu yuiaibu ninkakatsis imisbukan

²²yusinan unanepabu ichaxun kebaunabu namakis Pablo bera nixun jatu yuikin:

—Atenas anua junibuun, chanima jancha matu yuinun ninkakanwen. Yushin betsa betsapaki mesekin man kenwankubainmis en matu uiaiin.
²³Januxun man yushin dami betsa

betsapa tibi duawakin kenwanmis anu ja chi tapu betsakia uinbaunkin betsa jawen kene nea: "Yushin tsuan ja unanmaki", ika netani en uinshinaki. Jaska jawen kena unandiamabia man kenwanmisdan, jawen kenadan, Yavé Dioski. Jaskakidi matuki chanitanun ika en jushianki. Ea ninkakanwen.

²⁴Yavé Diosunan, mai jidabi inun dasibi nun janu jiweabu Diosun damiwanidan, dasibi jawenaski. Ja nai anua inun mai anua dasibi mekei xanen ibuaya junibun jaska wakin duawanun, iwanan, jatun shinanen templo jawen kenwanti jiwe waxunabu anu besti jiweamakiaki. ²⁵Ja inun, dasibibu Diosun nuku jiwemaxun juinsinamamis inun jamapai tibi nuku inankin medabewakubainmiswen taexun jawada yudabun Dios axuntidubumajaidakiaki.

²⁶Shinankanwen, eskakidan. Na mai jidabi anu nun janu jiwebaunxanunbun Diosun juni bestichai dukun Adán dami watan jawen taexun dasibi nawa betsa betsapa pawanikiaki. Na nenu mai anu jatianda inun janida nun jiwxanunbun ma janu tibi nuku mae pewaxuni anu nun jatianda inun janida nun jiwxanunbun ma janu tibi nuku mae pewaxuni anu nun ikabuki, na jabia mae anu nun jiweabudan, ²⁷⁻²⁸Dios benai yudabun jaki nukutidubudan. Chanima Dios nuku tibi anu benantamabiaken Dioskidi tapinun ika jawa chai kama nun janubi jaki nukutidubuki. Matunabu unanepa miyui jawendua unainbun yuikin: "Nukudan, nun diosun bakebuki", anikiaki. Chanima jaska yuini keska nun jabia Diosunabuki. Jaskawen taea Dioswen nun jiweabu inun nun jawen jamapaiyaibu inun nun jayabuki. ²⁹Nun jaskai Diosunabukin nun jaska shinantidubumabiaken junibun shinan chakakin Dios jaska keska dabanen jatun shinanwen jabun dios wakin oro

inun plata inun mishki dami wamisbuki.
³⁰U unu badi betsatian yuda betsa
 betsapabun jawa unanbumaken Diosun
 jatu beduwens uinyukubainiki. Jakia
 natian ana jaska wama mai jidabi anu
 jiwebaunabun jau jatun shinan betsa
 watan jakidi jau shinanunbun Diosun
 jatu yunuikiki. ³¹Juni betsa katuxun
 yudabu anu yununi mawa bestenwankin
 yudabu dasibi jawen kushipa jatu
 uinmaniki. Jaskawen taexun ja xaba ma
 Diosun katuni anu ja juni katuniwen
 taexun yuda dasibi mai jidabi anu
 jiwebaunabu jatu unanti waakeakekin
 keyutan Diosun jawa kaneama jatu
 kupixanikikiki- jatu wa

³²mawa ana bestentidubukidi ninkatan
 betsabun kaxe waibun januxun betsabun
 kaxe wama yuikin:

-Nun ma jaska ninkaxuki. Betsatian
 nun ana mia ninkatiduki- akaibun
³³januxun Pablón jatu jenebaini kaya
³⁴janua yuda eskadabesbun chibanbaini
 jaki dasixun ana ninka pewatan Jesús
 ikunwanibukiaki, Areópago anua
 unanepa yununika betsa jawen kena
 Dionisio inun, ainbu betsa jawen kena
 Dámarisdan, ja inun, ana jatidabunan.

**Corinto maewan anuxun Pablón
 jatu yusinikiaki, na janchadan**

18 ¹Janua chipu Pablo Atenas
 anua kainkaini kai maewan
 betsa Corinto anu jikitán ²judío betsa
 Ponto anua kaini jawen kena Áquila
 inun jawen ain Priscila dama duakabi
 Roma anua jau judiobu kainbainunbun
 romano xanen ibujaida Claudiún jatu
 kainma beimabu janu Pablo jatuki bai
 ka jadi ka jatuki nukunikiaki. ³Ja Áquila
 jawen ainbetanan, jabias daya Pablón
 amisdi akin tadi jiwe wamisbukan
 jaskawen taea jatube dayanun ika jatu
 anu bashikuima Pablo jiwea ⁴janua
 sábado juindukunti tibitian janu judiobu

ichamisbu jiwe anuxun Jesúskidi jatu
 yusinkin jatu tapinmakin ikunwanmai
 judiobu inun griegonawabube Pablo
 janchanamekunkainaya ⁵janua mai
 pakea betsa Macedonia anua Silas inun
 Timoteo jaki nukui ma beshianbun
 januxun jawen daya jenei datan Pablón
 Jesúskidi besti judiobu jatu yusinjaida
 bestiyunun ixun ana daya kayabi akama
 jatu yuikin:

-Chanima Diosun Mesías nukun Xanen
 Ibu nun manakubainmisbuden, Jesúskidi-
 akin jatu unanmai ⁶ninkatan judiobu
 ichapabun ikunwankatsi ikama danain
 jabi aki jaki xechakai ja ibaunaibun
 Pablón jatu jenebainkatsis ikin Diosun
 jancha danain jau jabiaskasi jiwenunbun
 jabu unanti wakin jawen tadi anua mai
 kudu datakakin jatu yuikin:

-Diosun Mesíaskidi en matu yusian
 ninkama matumebi ibubis matun
 chakabuwen man benu kayabiai.
 Jaskawen taexun ea akama matu besti
 Diosun kupixanikiki. Jaskaken judiobu
 ana yusianma natian unudi judiobuma
 besti en yusinkubainiai- jatu watan

⁷janua judiobun ichati jiwe anua
 kainkaini janu judiobu ichamisbu jiwe
 dapi juni betsan Dios kenwanmis jawen
 kena Ticio Juston jiwe anu jikishinxun
 Pablón jatu yusinkubainaya ⁸janu
 judiobu ichamisbu jiwe jatun mekeá
 xanen ibu jawen kena Crispón jabube
 jiweabubetans nukun Xanen Ibu
 ikunwanibuki. Ja dikabi Corinto anuxun
 ichapabundi Pablón jancha kakape yuiai
 ninkatan Jesús ikunwandiaibun jau
 jatu nashimanunbun ikunwain betsabu
 Pablón yunua jatu nashimanibuki.
⁹Janua meshu betsatian Pablo uxa
 namaya Jesúsun yuikin:

-Datei jancha neseama ekidi en
 kakape yusinkin jeneyamawe. ¹⁰Na
 jibia maewan anuxun yuda ichapabu en
 katuaiwen taexun jawa miki sinatakin

tsuan mia chakabu watidumaki, en mia putamakidan– akima¹¹janu Corinto anu niti ikimaxun januxun año bestichai ana betsa namakis nichiiin Pablon Diosun Mesías Jesúskidi jatu yusinkubainaya

¹²janua ja mai pakea Acaya anu jatun romano xanen ibu Galión jatu xanen ibuxunaya judio xanen ibubun Pablo ja akin chitenun ixun achixun januxun Galión tsauxun jatu unanti wamis anu Pablo iyuxun¹³judiobun ichati jiwe mekenika xanen ibu Sóstenes chitekin romano xanen ibu yuikin:

–Na juninan, Moisin jancha nukun xenipabu yusini ana jatu chibanmama jaska wakin jau Dios kenwanun bun yusian benawen na juni kauankin nukunabu yusin chakaiki– akaya

¹⁴judio xanen ibubu nemanun ika Pablo janchayupanan xanen ibu Galiónen jatu kemakin:

–Judiobuun, na jaska man ea jakidi yuiaidan, na junin jawada chakabu washina kasmai juni deteshinken en matu ninkakeanaii.¹⁵ Jakia kena betsa betsapa inun, matun xenipabun yusini jancha inun, jancha bena matu yusiainwen nuikin en pevakatsi ikamaki. Matunmebi man jaska akatsis ikai pewadikanwen– jatu watan

¹⁶jawen soldadobu jatu nichinmaya¹⁷janua yudabu ichaxun judiobun ichati jiwe mekenika xanen ibu Sóstenes achixun romano xanen ibun bedubi mekenen detaibun Galiónen uinbiakin jau shinanxun anun bun jatu jawa nemamaken

**Antioquía anu chintunkidanima
ana jatu yusin Pablo
kakunkainikiaki, na janchadan**

¹⁸janua ana uxá ichapa jatu yusin bashikuima Corinto anua Pablo kakatsi Diosun jau jatu mekekubainyanun ikunwainbu Dios kushipa jatu

yukaxuntan Priscila inun Áquilabe main kai mae betsa Cencreas ianenwan kexa anu jikitán Corinto anua kai Pablon Diosun jau ea mekekubainun, iwanan, jaska jabe yubakaima ma meneshina Pablon Dios benimawakin kenwain jawen bu chai washina maxtekei mankutan janua niwe xaxu ewapawen inatan Siria mai pakeakidi jadidi bui ianenwan pukebaini¹⁹Éfeso maewan anu keti itan jabianu Áquila inun Priscila bashibaini janu judiobu ichamisbu jiwe anu Pablo ja mesti kaxun Jesúskidi yusiin jatube janchanameaya²⁰jabun ea akin:

–Jabianu bashikuxun nuku yusinyuwe– akin yukabu ninkatan janu niti ikatsi ikama jatu nematan²¹Pablon jatu yuikin:

–Jerusalén anu jatube besiyutanun ika en kayuái. Jakia Diosun ea ana yunua matuki en ana bayutiduki– iwanan, jatu yuibaini niwe xaxu ewapawen Éfeso anua Pablo inakaini²²Cesarea anu keti itan janua butukaini main kai mananan mapeketan Jerusalén anuabu ikunwainbuki nukukunantan jatu banabimatan janua ana chintuin Antioquía anu main kai jikishina²³jatuki dasishina semana eskadabes ikunwainbube jiwetan ana jawendi taxnikaini kakunkaunkin ikunwainbu mai pakea dabe Galacia inun Frigia mae tibi anuabu jatu shinan chankanwankubainkin jatu yusian akeakeaya

**Éfeso inun Corinto anuxun Apolosin
jatu yusinikiaki, na janchadan**

²⁴ja jaskaitian judio betsa maewan Alejandría Egipto mai pakea anua kaini jawen kena Apolos Éfeso anu jushinxun Diosun jancha kenenibu unanjaidakin xabakabi jancha pepa jawenduawen jatu yusin pevakin²⁵Jesús mekenankidi unanmaimabu ikunwankin jaska Juanen

besti jatu nashimani ja besti unankin jawa dateama benima paenwen yusinkin jaska Jesús jiwekunkaini mawa ana besteni xabakabi jatu yusianyan²⁶janu judiobu ichamisbu jiwe anuxun Priscila inun Áquilan Apolosin jatu yusiaín ninkaxun tadi ja besti paxkabain iyuxun jaska Jesúsun kenawen taexun Jesús ikunwainbu jatu nashimamisbu inun jaska chibainbu Diosun jatu jiwekuinmamiskidi ana xabakabi Apolos yusianbu ninkatan²⁷janua mai pakea betsa Acaya anu jawen mae ewapa Corinto anu Apolos kanun ika pukekatsis ikaya jabianuxundi ikunwainbun jau Apolos jatu anu jikiai i pewatan jau Apolos medabewaxanunbun Efeso anuxun ikunwainbun kenexun jaya yunuabu niwe xaxu ewapawen pukekaini Corinto anu jikishina januxun jabun Jesús ikunwainbu jatu medabejaidawanikiaki, Diosun jatu duawaiwen taexunan.²⁸Jabu judiobun Jesúsun ikunwanbuma jamakidi yuiaibu Diosun jancha kenenibuwen jatu yusinkin: "Diosun Mesías Xanen Ibu man manajaidamisdan, Jesúski", akin dasibi ichabu besuubixun judio xanen ibubun jatu yusinmis ana nemakin danantidubuma jatu wanikiaki, jatu xabakabi unanmakinan.

Éfeso anuxun Pablón jatu yusinikiaki, na janchadan

19¹Apolosin Corinto anuxun jatu yusianyan janua Pablodi mati matipa anu kapukei Asia mai pakea anu kakunkaini Éfeso anu jikitán ikunwainbuki nukuxun²jatu yukakin:

–Janu man Jesús ikunwankin taewaidan, ċjawen Yushin Pepatunan, ma matu achitan matuki jikimamen?– jatu wa jabun yuikin:

–Diosun Yushin Pepakidi tsuan jakidi jawa yusinkin nuku ninkamadiamaki– akabu

³januxun Pablón ana jatu yukakin:

–Jaskatan ċtsuan yununi kushipawen matu nashimabu man ikimamen?– jatu wa jabun kemakin:

–Jaska Nashimanika Juanen jatu nashimakin yusiniwen taexunan– akabu

⁴Pablón ana jatu yuikin:

–Juanen jatu nashimakin jau jatun chakabu jenekin jatun shinan betsa watan jau Dios anu benunbun aniki. Januxun jatu ana yuikin:

"Kushipajaida ea kachu chipu juikiki. Ikunwanxankanwen", jatu wakubainikiaki. Ja kushipadan, Jesúski– jatu wa⁵jatu jaska wa ninkatan:

–Jaskakenan, Xanen Ibu Jesúsun kena kushipawen ea nashimawe– akabu jawenabu dasibi jatu unanti wamakin Xanen Ibu Jesúsun kenawen taexun Pablón jatu nashimatan⁶⁻⁷jatu jaska watan ja 12 junibuki jatuki mamepikunkaunaya Diosun Yushin Pepa jatuki butuakeakeaya janua jabu tibiki nawan jancha betsa betsapawen janchaisbumabiaken jatun janchawen Diosun jancha jatu yuimakin metxanmanikiaki.

⁸Januxun uxe dabe inun besti nichiiñ janu judiobu ichamisbu jiwe anu jikitantani dateama xabakabi jatube janchanamekin jawen Mesías Jesús nukun mekenanwen taea Dios xanen ibuxanaikidi Pablón jatu ikunwanmakatsis ikunkainaya⁹janua judiobu jatidi juinti kushikin Jesús mekenan Bai Bena ikunwankatsi ikama dasibibun ninkaibun jancha chakabukin chakabu yuiaibuwen taea janua Pablo ana jatube ichama jatu jenebainkin ikunwainbu tadi jatu iyuxun Tiranon escuela anuxun jatu ichawaxun Jesúskidi yusiin xaba tibi jatube janchanamekunkainkin¹⁰año dabe nichianyan ja mai pakea Asia anu jiweabu dasibi judiobu inun judiobuman

Xanen Ibu Jesús mekenankidi yusia in ninkakubainaibun ¹¹januxun Diosun Pablo medabewaya dami tsuan atiduma betsa betsapa waya ¹²Pablo Diosun kushipa jaya unankin jawen tadi tuaxwen bunexekeshina inun jawen dayati tadi sawexun pekashina buxun isin teneaibu jawen jatu dakukin jawen tadiwen betsabu xuxawakin betsabu anuadi yushin chakabubu kainmakin kaya wapakeaibun

¹³januxun judiobu betsabun pei binun ixun bai namakixun Diosun jancha kenenibuwen yushin chakabu kainmakubainmisbu Pablón akai keskadi wanun, iwanan, Xanen Ibu Jesúsun kena kushipawen yushin chakabu yunukin: “Jesúsun kena kushipawen Pablón amis keskadi wakin en matu yunuai kaindikanwen!” jatu wakubainaibun

¹⁴jatidi xukuabu betsabu Diosbe jawenabu janchaxunika xanen ibu Escevan 7 juni bake mukayabun jaska wakin yuda betsabu anua yushin chakabu kainmabiamisbuwen taea ana kushipanun, iwanan, Xanen Ibu Jesúsun kenawen kainmakin yunukin:

—Jaska Pablón amis keska wakin en mia yuiái Jesúsun kushipawen taea kainwen— akin ¹⁵abiamisbu betsatian yushin betsabu kainmapananbun yushin chakabun jatu kemakin:

—Diosun Katua Jesúsun kushipawen en dateái. Pablókidi en unandíái. Jamen matudan, íman tsuabu iki ikai? ¿Tsuan kushipa man jayamen?— jatu wa

¹⁶ja jatu jaska watan juni yushin chakabuyatun jatu detekin yushin chakabun kushipawen jatu ichakajaidawakin jatu nuitapawaya tadiuma jimi jabai jiwe anua chintu kushibainabu ¹⁷Éfeso anuabu dasibi judiobu inun judiobuman ninkatan datejaidakin Xanen Ibu Jesúsun kena kushipa unain itsakin: “Nun jamen datan

akeaketidumaki”, ikin Jesúsun kena pawanibukiaki.

¹⁸Janu ikunwainbu ichabu anua betsabu benixun jaska wakin chakabuwakubainima jatuki xabakabi chanikubainaibun ¹⁹betsabu jabu mukayakin unanmisbun Jesús chibanun, iwanan, jawen mukayakin unanti una bexun dasibibun besudi manchinxun tanakin jawen pei kadu 50,000 plata pei jexe tanaxun jawen nuiama kuakin keyunibukiaki. ²⁰Jaska waibun Xanen Ibu Jesúsun kaka pepa inun jawen kushipakidi betsabun jatu unanmakin dasibibu jatu ninkamakin keyukin nati anibuki.

²¹Januxun Pablón shinankin yuikin: —Macedonia inun Acaya mai pakea anu kaxun ikunwainbu ana uinkubauntani Jerusalén anu ana en kaxanaii. Jadi kaxun jatu uintani Roma anuabudi Diosun ea yunuaiwen taea en jatu uin kakatsis idiaii— itan ²²janua jau bebunkidi Macedonia anu bununbun jawen medabewanika dabe Timoteo inun Erasto yunitan ana uxa eskadabesi Pablo Asia mai pakea anu bashikuyuaya

Éfeso anuabu itimaskanibukiaki, na janchadan

²³⁻²⁴ja jatu jaska wakin Jesúsun Bai Benakidi jatu unanmaibun janua plata mane juxupa dami wanika jawen kena Demetrión yushin jawen kena Artemisa jawen kenwanti jiwe dami mishtin wamistun jabe dayaibun pei ichapa bimisbuwen taexun Demetrión Pablón yusian bera bechipaiama yudabu Éfeso anuabu jatu itimaska wakin ²⁵jabu jabias keskadi dayamisbu jatu ichawaxun yuikin:

—Ebe dayamisbuun, jaska nukukidi chakabu yuiábu matu yuinun ea ninkaidakanwen. Nukun dayawen pepai nun jiwmisbu man unaiin. ²⁶Ja yusinan

Pablón jatu yuikin: "Mekenén junin damiwadan, yushin kushipa diosmaki", akin yudabu jabun bimisbu nuku putamakanikiki. Nenu nukun maewan Éfeso anu bestima jakia Asia jidabi anuxun jatu yusinkubaunai ninkakin jatu jaska wai man unaiin.²⁷ Jaskadan, meseki. Nun damiwai dayakin nun jawen pei bimisbu nuku mexteabu nun ana jawa jayatidumaki, danainbuwen taeandan. Jaska bestimadan, nuku medabewamis yushin dami ainbu nai anua kauani Artemisa inun jawen kenwanti templodan, jabu Asia anu jiweabu inun mai jidabi anudi jiweabundi ikis bechipaikin kenwanmisbuki. Jakia Pablón jancha ninkakin Artemisa ana kenwanma jawen kenwanti jiwe benukin dananxankanikiki, Pablón yusian besti ninkakinan- jatu wa

²⁸jatu jaska wa ninkatan Pabloki sinatakin bis iki sai ikin jui kushipawen yuikin:

—Éfeso anu nukun yushin Artemisa pepajaidaki!— ikin yui jeneabumaken

²⁹jaskaibu yudan kaianen ninkatan Efeso maewan jidabi anua dasibi itimaskai bedukua akeakebaunkin Macedonia anua Pabble beimabu Gayo inun Aristarco achibainkin janu dasibi icha tsaumisbu anu jatu xadabainkin iyuabu³⁰janua dasibi ma ichabu anu Pablo nashui ikain jatu jancha wai kapanan ikunwainbun jadi nichianma nemabu³¹ja dikabi Asia mai pakea xanen ibubu Pablón jaibuaibun jatun jancha bumakin: —Mesekanikiki. Jau juyamanunwen— akin Pablo jabuan nemadiabu³²janua ma ichabu itimaskajaidakin jancha kushipa betsa betsapa yui bis iki shan shanki iki itimaskaiabun ichapabu jawa unanma bea ichabu yuka ikin:

—¿Jaskai nun icha ikanai?— ikaibun³³jakia jadatutunda ichabu jau

judiobukidi jawa chakabu jayama jau jatu unanmakin daewanun judio xanen ibu betsa Alejandro ichabu anua yunukin xutubain jatu bebun nichianbu jau pesnunbun jawen meken jatu sananxuna³⁴jakia Alejandro judio uinkin jatunabuma unantan danankin jawen jancha ninkakatsi ikama jancha kushipawen bis ikin yuikin:

—Éfeso anu nukun yushin Artemisa pepajaidaki!— ikin yui yane jeneama 2 hora jabias jancha kushipawen yuaibun³⁵atimas jatun mae xanen ibu betsa jatun jatu kenexunmistun jatu nesewaxun yuikin:

—Éfeso anua enabuun, matu yuinun ea ninkakanwen. Nukun yushin Artemisa jawen dami nai anua kauani inun jawen kenwanti templo jawendua nun mekejaidamis mai jidabi anuabun unan keyukanikiki.³⁶ Jaska chanimawen taea pestan shinan pewama man jaskatidumaki. Uindakanwen.³⁷ Na juni dabe man iweatunan, nukun yushin Artemisa kenwanti templokidi jawa atimapá wai inun jawa jakidi chakabu yuiabumaki.³⁸ Jakia Demetron jabe dayamisubetan chitekin jatu ja akatsi ikinan, na jatu jaska waibu nukun xanen ibu yununikabu ichaxun jatun jancha ninkaxun jabubetan unanti watidubuki, jaska jabuan amiskididan.

³⁹Jakia matun jawada betsa man pewakatsis ikaidan, nukun maewan xanen ibu yununikabube ichaxun jawada man bechipalama man yuka jatubetan man pewadiatidubuki, jatube ichaxunan.⁴⁰ Jamen jaskawen taeama icha man itimaskajaidaibu natian jaskakidi man pewama romano xanen ibubun matu ja atidubuki. Matu jaska waibun nemakin nun jawa matukidi yuitidumaki. Ana jaska janchayamakanwen—⁴¹jatu watan jatu nichinikiaki.

Macedonia inun Grecia mai pakea anuxun Pablón yusinkin jatu shinan chankanwanikiaki, na janchadan

20 ¹Éfeso anua itimaskabai ma jeneabun januxun Pablón ikunwainbu jatu yusin pewanun ixun jatu ichawaxun jatun shinan mestenwamatan Dios jatu yukaxuntan Éfeso anua kainkaini Macedonia mai pakea anu kashian ²januxun jatu uinkubaunkin ikunwainbu yusin jatube janchakin jatu benimawakin shinan chankanwakin keyutan, janua juni betsa betsapa jatu iyui atimas Grecia mai pakea anu Corinto dapi jikitan ³janu jatuki nukutan jiweyukin uxe dabe inun besti nichintan jadidi Siria mai pakea anu kanun ika yubakatan niwe xaxu ewapaki inai kapanan januxun judiobun Pablo detekatsi yubakashinabu Pablón bana ninkatan shinan betsa watan ana Macedoniakidi mananan jawendi ana chintunkaini main kaya ⁴jaska kainai jabun chibancainai Berea anua Pirron bake Sópatro inun, Tesalónica anua Aristarco inun Segundo inun, Derbe anua Gayo inun, Timoteo inun, Asia mai pakea anua Tíquico inun Trófimo jabe bui ⁵jatidi bebunkidi pukexun mae betsa Tróade anuxun nuku manaibun ⁶januxun judiobun misi xaxama pi besi nawai nun jatube iyuaya janua Filipos anua Pabló en kai niwe xaxu ewapawen pukei xaba 5 día binutan keti itan Tróade anu jatuki ana nukutan 7 día ikunwainbuki bai nun janu iyuniki.

Tróade anuxun Pablón jatu yusinikiaki, na janchadan

⁷Jabianuadi domingo meshu medan jaska nuku yunubaini Jesús nuku mawaxuni shinanmati misi tunkexun pikatsi ikunwainbubes nun icha meshukidi kanun ixun Pablón nuku

yusin yamenapun jancha jenediamaken ⁸jadi dintu ewapa jiwe keyatapa manaundi anu bin ichapa jadi jaya, jadixun dekuabu anu nuku ichawaken ⁹jiwe kene kexa tapa dabe inun besti uinti xui anu bedunan jawen kena Eutico tsauxun Pablón yusin chaipawai ninkai uxá tenei janua uxachakayama manaundia kauani tin ikaya beninun ika jawaida butukidan ma mawa bechiabu ¹⁰jakia Pablo butudiakidan jaki beukain teikutan ikunwainbu jatu yuikin:

—Jawen dateyamakanwen, jiweakidan-jatu wa ana jiwea uiainbun

¹¹Pablo ana nukube inakain Jesús nuku mawaxuni shinanmati misi tunkexun nuku pimatan ana nuku yusin nukube janchashini ma xabaya jancha menetan nun kaya ¹²bedunan kauana ana jiwea iyui dasibi benimajaidai inun buaibun

Tróade anua Mileto anu Pablo kanikiaki, na janchadan

¹³janua Pablón nuku dukun nuku nichian niwe xaxuwen kai Aso mae anu bebunkidi nun kanun Pablón nuku yunutan janua nuku yuikin:

—Xaxun buantankanwen, en kapakeaidan, jadia ea ibainkaxunannuku wa niwe xaxu ewapawen kai ¹⁴ma Aso anu Pablo kapakea jadia nukuki xaxun inakaini Mitilene anu keti ika janu uxashini ¹⁵ana kai natukan jawen kena Quío kema xaxun uxadiashini ana kai natukan betsa jawen kena Samos anu keti ika uxashini janua bestenkaini Mileto chaimaken janu jikitan ¹⁶Jerusalén anu Pentecostés xekiwan bimi betsa ja dukun kanimistian judiobu besi nawamisbutian jatube besinun ika jin jin ikin Asia anu uxá ichapai ana bashikukatsi ikamawen taea Éfeso anu Pablo kama Mileto anu niti ixun manakin

Éfeso anuabu mekenikabuki Pablo jawen jenei jatuki chaniniaki, na janchadan

¹⁷Éfeso anua ikunwainbu mekenikabu jau Mileto anu bea jau jabe janchai benunbun Pablón jawen jancha jatu kenexun bumaken ¹⁸uinbidani Mileto anu mekenikabu beabu Pablón jatu yuikin:

—Matun mae pakea Asia anu en matu anu jiki taeyama jaska en jiwekunkainmis man unaiin. ¹⁹Eadan, matu anuxun en shinanen shinain chikishi jawa keanma en Xanen Ibu Jesúsun ea yununi duawai ninkabumabiaken matuya kaxai beun jene jabakin judiobun ea ichakawabiabu matu anuxun bikajaida tenei en Jesús dayaxunkunkainyamaki. ²⁰Ea jaska wabiabu dasibibun besuudia inun matun jiwe betsya betsapa anuxun matu yusinkin matu medabewanun, iwanan, jawa meseki dakeama en matu yusin jeneama iniki. ²¹Jaska inun, Dioskidi chakabumisbun jau shinan betsya watan nukun Xanen Ibu Jesús inun Dioskidi shinan betsya watan man ikunwanunbun judiobu inun judiobuma en matu yusinkaidaniki. ²²Jakia eskatian Diosun Yushin Pepatun Jerusalén anu ea yunu chakayamaiwen taea jadi en uin kaii. En jadi jikia dasibibu jaskadada eki tanabu en unanmaki. ²³Jakia mae tibi anu en ka Diosun Yushin Pepatun bebunkidi ea jatu unanmakin bichiti jiwe anu ea bichixanaibu inun betsya betsapawen ea bika tenemaxanaibu ea yuimisbuki. Ja besti en unaiin. ²⁴Jabiaskabiaken eadan, en jiweawen nui yaushiamma en daya Jesúsun ea yununiwen taexun Dios yudabuwen nuikin jaska wakin jawenabu jatu wakatsis ikaikidi punu nukama benimai jeneama en jatu yusinkin keyukatsis ikunkainaii.

²⁵Jaska inun, Dios xanen ibuaikidi en matu yusinkubaunyama

tsuan man ea ana uianma ixanai en matu yuiaii. ²⁶⁻²⁷Jaskaken ikis matu yuunun ninkakanwen. Dasibi Diosun yudabu yubani jawa juneama xabakabi en matuki chanimiswen taexun tsuanda jabun danankin Jesús ikunwanmabumawen taexun Diosun ea kupiama ixanikiki. ²⁸Jaskaken ibubis mekekin Diosun Yushin Pepatun matu katua medabewakin ikunwainbu mekekubainxankanwen. Diosunabu jatu wakatsi ikin jawen bake yunua mawaxunkin jawen jimiwen jawenawakin medibi jatu wani jatu putama jatu uindaxunxankanwen.

²⁹—Jamen betsadan, en ma kainkainiken kaman inu puben keskabu bexun chaxuwan xukua yamawamis keska wakin ikunwainbu chaxuwan keska achixun tenankin yamawanun ika imisbu keska bexankanikiki. ³⁰Matu ibubis matu anua janubi benitan xanen ibutan: “Ea chibankanwen”, ixun matu padankin matu chani yusinxankanikiki. ³¹Jaskawen taexun badi dabe inun besti matube jiweyxun man kaneai tibi en matu metxtamakubainkin matu yusinkubainkin badidi inun meshu medan matuya kaxabetanan en matu jaska wani jakimayamakanwen. Eskatianan, janun ibubis bedu mestenwandikanwen.

³²—En betsabu inun en puibuu, en matu jancha wai ma jatixun en matu keyuai ninkakanwen. Natian Dios en matu yukaxunaii. Jawen jancha pepa nuimis man unanyan jaska dasibi yubakani Dios matuwen dayakin jawen kushipawen matu amaxanikiki, man jawenabu medibi ewai unanepanunbunan— itan

³³—Daketapakin ibubis matun pei inun matun mabu matu bianun ika kemuama ³⁴jakia jaskama ea en jatube dayai jawa jatu bika tenemama jaska ea inun jabun

jamapai jayama bikatsis ikin mekenen dayakin en bikubainima man nuku unaiin.³⁵ Jaska inun, nukun Xanen Ibu Jesúsun nuku yusinkin yuikin: “Tsuada nuitapakin jawada bi benimamisbuki. Jakia tsuanda nuitapaibu medabewakin inain benimachakayamamisbuki”, jatu wani shinain: “Chikishama dayakin nuitapaibu medabewakubainxankanw en”, akin en matu yusinkubainmiski-iwanan,

³⁶jatu yusin menetan Pablo danti ikaya jabe danti iki keyuabu jau Diosun jatu mekekubainxanun Pablón jatu yukaxuntan meneaya³⁷janua dasibitun teikutan jaya kaxabetanan Pablo tantsu atan: ³⁸“Ana man ea uianma ixanaii”, ikin jatu yuixuwen taea jawen nuichakayamai ana benimama punu nukatan jabiaskabia nichinun ika ianenwan kexa anu xaxu anu Pablo iyuabun

**Jerusalénkidi Pablo
kanikiaki, na janchadan**

21 ¹januxun Jesúsun ikunwainbu jatu jenebaini niwe xaxu ewapaki nun ana nanekaini natukan betsa jawen kena Cos anu kayanbis besusi nun pukea janu uxashini ana kai natukan betsa jawen kena Rodas anu uxadiakaini janua ana kai mae betsa Pátara anu jikixun ²niwe xaxu ewapa betsa Feniciakidi kanun ika nexea bechitan jawendi kanun, ika jaki maekin jawen ibu pakatan jatube nun ana kai ³ana patanbainkatsi ikama besusi pukei natukan ewapa jawen kena Chipre yusiudi dainbaini mai kesua Siria anu patankubauni Tiro anu jatum mabu apakatsis iki janu jikikaun keti iken ⁴janua ikunwainbuki nukutan janu mapekeyushina semana bestichai jatuki nun bayuaya Diosun Yushin Pepatun bebunkidi ikunwainbu yuia jabuan Pablo yuikin: “Jerusalén

anu kayamayuwe”, akin keyuabu ⁵janua 7 dia ma keyuaya: “En ma kaii”, nun jatu wa nuku nichinun ika jatun mae anua jabun ikunwain junibu inun jatun ainbuaibu inun jatun bakebuya dasibibun nuku chibabidan ianenwan kexa anu bea mashin nukube danti itan nukubetan Dios kushipa yukatan ⁶nuku jaska waxuntan nun kai penun nuku nichinkin nuku xaxun ainitan janua jabu jatun jiwekidi chintubainaibun

⁷janua Tiro anua kai mae betsa Tolemaida anu keti itan ja xaxuwen nun juai jenetan ikunwainbu nun jatu bechima benimakin nuku yukabu jatuki bayui janu uxashini ⁸janua meshukidi Pablóbe bestenkaini ana kai Cesarea anu jikitán Jerusalén anuxun ja ⁷medabewanikabu wakin jatu katunibu betsa jawen kena Felípen Diosun jancha jatu yuikubaunmistun jiwe anu jikitán jaki bai nun janu iyuken ⁹jawen ainbu bake dabe inun dabe beneyadiabuman Diosun jancha jatu yuidiakubainaibun ¹⁰janua xaba eskadabes kaya Judea mai pakea anua taxnikidani Diosun jancha jatu yuidiakubainmis jawen kena Agabo jua jikia ¹¹nuku uintanun ika juxun Pablón nanexeketi bitan jawen tae inun jawen meken ibubis menextan yuikin:

–Diosun Yushin Pepatun ea yuishina matu yuinun ninkakanwen. Na en akai keska wakin Jerusalén anuxun na nanexeketi ibu judiobun achixun neatan romanonawabu anu inanxankanikiki-nuku wa

¹²ninkatan Jerusalén anu jau ana jadi kayamanun nuku inun Cesarea anuabun nun nemakin bashibiakubaina ¹³Pablón nuku kemakin:

–¿Jaskai ewen taea kaxakin man ea juinti nishmawakanai? Jesúsun ikunwankin en chibamiswen taea Jerusalén anuxun ea achixun neaxanaibuwen en dateamaki. Jakia en

Jesús dayaxunkunkainmiswen taea en jadia mawadiaxuntiduki– nuku wa

¹⁴jaska waxun jawen shinan betsa wamatima jau jaskadatanun nema jetenan yuikin:

–Nukun Xanen Ibun shinanen iwe– nun wa

¹⁵jabe kanun ixun nukun mabu pewatan Jerusalénkidi kakunkaini nun mapekeaya ¹⁶Cesarea anua ikunwainbu jatidi nukube bushinxun juni betsa Chipre anua kaini jawen kena Mnasón ma badi ichapa Jesús ikunwanpakemistun jiwe Jerusalén anu nun jabe iyunun nuku jadi iyukin

Pablo Santiagoki banikiaki, na janchadan

¹⁷janua Jerusalén anu jikitan Mnasónen jiwe anu nuku iyuabu ikunwainbu nukuwen benimabidan nuku iabu ¹⁸janu uxashini Jesúsun betsa Santiago nun jaki bai ka jabianudi dasibi mekenikabu nun jatuki nukua ¹⁹jatube yuka itan janubi Pablón jatu jancha wakin jaska Diosun medabewakin dayamakin jamapai betsa tibi judiobuma anuxun Jesús jatu ikunwanmakubainai binumakubainshina jatuki chaniai ²⁰ninkabaikin januxun Dios kenwantan jabu betsan Pablo yuikin:

–Nukun betsaan, mia yuinun ninkawe. Nukunabu judiobu midimabun Jesús ma ikunwanbiakin jawen nemati inun jawen yunuti Moisin nukun xenipabu yusini meke pewaxun jenekatsi ikama chibankakemisbun ²¹min akaikidi mia yuankin yuikin: “Nukunabu nawabube jiwea Pablón jatu yusinkin Moisin yusini jau ana chibanyamanunbu inun jatun bakebu jau jatun jina kubichi ana mexteyamanunbu jatu yusinkin yunumiskiaki”, ibidan ibidanmisbuki, mikidi chani bexun yuikinan. ²²Natian min ma jua ninkatan yudabu miki sinatakin mia danantidubuki. Jaska

mia uiainbun jawawen nun mia jaska watidumaki. ²³Min jaska wakin jatu daewanun mia yuinun ninkawe. Nukun betsabu 4 juni Diosbe yubakaima ma keyui kemai na jibia tsauabuki.

²⁴Jaskaken mia jatube kaxun Templo anu jatube pepakin Diosbe nukunabu janchaxunikabun nukun beya chibankin jau Dios ana matuki sinatayamanun Dios yubaimabu jatu pakaxuntan jabun bu jatu maxtemakin mankuamaxanwen. Min jatu jaska waxunken judiobun Jesús ikunwankin dasibibun uinkin Diosun jancha Moisin yusini kaneama min chibamnis inun jamenmens mikidi chani chakamisbu unanxankanikiki. ²⁵Jaska inun, judiobuman Jesús ikunwainbukidi jau nukun beya chibanyamanunbu nun ma jatu bebunkidi kenexunimaki, shinan besti watan eska wakinan: “Yushin dami betsa kenwankin nami inanmisbu piyamaxankanwen. Ja inun, jimi ayamaxankanwen. Ja inun, yuinaka tenexabu piyamaxankanwen. Ja inun, ainyankin jaska Moisin nuku nemakin kenexuni chibankankanwen, jau nukunabu bedabindabeyamanunbunan”, nun jatu waniki– aki Santiago jancha meneaya jawen jiwe anua kainkaini Mnasón jiwe anu nun ka

Templo jemaintin anuxun Pablo tenanun, iwanan, achinibukiaki, na janchadan

²⁶janua uxashini bestenkain Pablón ja 4 junibu iyui jatube pepanun, iwanan, Templo jemaintin anu kaxun jaska Diosbe jawenabu janchaxunikabube janchanamei pepatikidi jatube yubakaxu taewaibun janua ja 4 yubakaimabu jabu meneaitian ja 4 juni tibitun jawen inankuin betsa betsapa bui Diosbe jawenabu janchaxunikabu anu bestibu buxuanbu Pablón jatu banabima

²⁷ma 7 xaba keyui kaya Templo jemaintin anu Pablo nikaunai Asia

mai pakea anua judiobu beshinxun
bechitan yudabu jatu itimaska wanun
ixun pubenkain Pablo achitan²⁸jancha
kushipawen jatu yuikin:

–Israelbuun, nuku medabewai
bekanwen. Na juninan, mae tibi
anuxun yudabu jatu yusin chakakin
nukukidi inun, Moisin yusinikidi inun,
na nukun Templokidi jau shinan betsa
wanunbun jatu yuikubaunmiski. Ja
dikabi nukun Templo anu griegobu jatu
iwexun nukun Templo medibi ma jatu
atimapá wamaikiki– ikinan,²⁹jaska
yuidan, ja dukun Éfeso anua judiobuma
griegonawa jawen kena Trófimobe Pablo
Jerusalén bai tanabidanai uinshinxun ja
juni Templo anu iyua dabanen madias
shinankin kaneidan.

³⁰Januxun yudan kaian itimaskai
kushibidan Templo jemaintin kene
medibi anua Pablo achitan xabakan
kainmakin xadabainaibun Templo
xui beputi mekenikabun jawaida
beputaibun³¹jaska Jerusalén anuxun
Pablo tenanun, iwanan, kusha kusha
akin ma tenain buanaibu maewan jidabi
itimaskaibun romano soldadobu xanen
ibun jaskaibu banabimabu ninkatan
³²jawaida jawen soldadobu inun soldado
xanen ibu bexmasbu jatu ichawatan
jatube kushikain ja yudan kaian icha
itimaskaibu anu maputushitan jatu
uianbun Pablo kusha kusha akaibu jatu
mepanmatushitan³³januxun soldado
xanen ibu Pabloki kematan jawen
soldadobu yunua jaki nidi iki keyutan
mane dispi chiwetameya dabewen
menexkin junexaibun xanen ibun jatu
yukakin:

–Nadan, ḷtsuamen? ḷJawa matu
chakabuwaimenkain?– jatu wa³⁴jabun
jawa unanmabia unanumas jancha betsa
betsapa yuia akeakekin jawa tapinmakin
pewabuma jawen soldadobu jatu
yunukin:

–Janu nukun mishki jiwe kushipa anu
iyukanwen– jatu wa iyuabun³⁵yudabu
mesebainaibun Pablo soldadobun iaxun
tapaitiwen mapemabainaibun³⁶yudan
kaian jaki sinatai jachun bukin jui
kushipawen yuikubainkin:

–Tenankanwen! Tenankanwen!–
ikubainaibun

Jawa chakabumakidi Pablón jatu yuinikiaki, na janchadan

³⁷januxun soldadobu janu mekei
jiwemisbu mishki jiwe anu Pablo bichi
buaibun griego janchawen Pablón
romano xanen ibu yukakin:

–¿Eska en mibe janchatidumen?– aka
xanen ibun kemakin yuikin:

–¿Aa, min griegon janchayadaka?

³⁸Jaskakenan, miadan, egiptonawa
betsa xanen ibukin nukun mae nuku
mebinun ika jawen 4,000 junibu puben
chachinanbu janu tsua jiweabumanu jatu
iyutanimadan, min ja dabanenbin en
ikai– aka

³⁹Pablón kemakin:

–En jamaki. Eadan, en judiobin. Mai
pakea betsa Cilicia anu mae kushipa
Tarso anua en kainiki. Ea jaska wama ja
yudabu en jancha wayuia ea jeneyuwe–
aka

⁴⁰xanen ibun janii:

–Iwe– akin jeneyua
mishki tapaiti kexa nixun jawen
mekan menexekedabea sanantan jatu
nemakin pes wakin keyua mapuabun
judion jancha hebreowen Pablón
xabakabi jatu yuikin:

22 ¹–En betsabu inun en epabuun,
jaska en chakabuma ekidi matu
yuinun ea ninkakanwen– jatu wa²jabun
jancha hebreowen jatu yuia ninkai ana
jawa banama ninkaibun Pablón jatu
yuikin:

³–Eadan, en judiodiki. Mai pakea
betsa Cilicia anu mae ewapa Tarso

anua en kainbiani na Jerusalén anu ea iwenixun na jabianuxun ea yumewanibuki. Jaska Diosun jancha Moisin nukun xenipabu yusini Gamalielin ea yusin pejaidawakubainai tapinixun en Dios dayaxunkatsis ikunkainai, na jabiatián man Dios dayaxunai keskadiaidan.⁴ Uatianan, Dios dayaxunun, iwanan, tsuabunda Bai Bena Jesúskidi ikunwainbu jatu tenanun, iwanan, junibu inun ainbuaibu achixun bichiti jiwe anu jatu yunukin en jatu ichakajaida wakin en jatu nuitapa waniki.⁵ En jatu jaska waya Damascokidiadi Jesús ikunwainbu benabaunkin achitan nenu iwetan en jatu kupixanun ea kushipa wakin Diosbe nukunabu janchaxunika xanen ibujaida inun nukun mekenikabun Damasco anu xanen ibubukidi ea kenexun ea inantan jadi ea nichinibuki. Na jabiabu Diosbe nukunabu janchaxunika xanen ibujaida inun nukun mekenikabun ea yununibun en jaska akubaini unankin matu yuitidubuki.

⁶ Janua ea kushipa wakin kene ea inanbu bui jaya kai Damasco bai tanabaini ma en kemaya badi manananbi nai anua bin chaxa kushipajaida pexekidan ea dachaxaya⁷ en main di ika dakaxun ninkaya jui taxnikin ea yuikin: “Sauloon, Sauloon, ¿jaskakin min ea ichakawakubainai?” ea wa⁸ eandi yukakin: “Xanen ibuun, ¿min tsua iki ikai?” en wa januxun ea ana yuikin: “Jabia ea ikunwainbu min jatu ichakawakubainaidan, en Jesús Nazaret anuaki”, ea waya⁹ ja junibu ebe bukin bin chaxai uinbiai jawen jancha ninkabumaken¹⁰ eandi yukakin: “Xanen Ibuun, ¿jaskapa?” en aka en Xanen Ibun ea yuikin: “Benikaini kai Damasco anu kaditanwen, jadixun min jaskakunkainxanai tsuanda mia yuixanikikidan”, ea akaya¹¹ ja bin

chaxapan ea bedu nuka wakin ea meshu bepua en ma bepexebia en uianmaken en jaibuaibun metsunxun Damasco anu ea iyunibuki.

¹² Janu en jikishinken juni betsa jawen kena Ananíasin Moisin jancha pe chibannis judio betsabun janu jiwexun kenwanmisbu¹³ Ananíasin ea medabewatanun ika jua ea dapi nixun yuikin: “Sauloon, Jesús ikunwain ma min nukun betsaki. Ana min beduwen uin bena wadiwe”, ea waya samama en bedu kayatiwatan en ja uianyan¹⁴ ana ea yuikin: “Ja nukun Dios nukun xenipabun kenwanpaunibu jabiaturtundu mia katunixun mia unankin jau jawen shinanwen jawen bake pepa Jesús min uinun jawen juiwen mia jancha washinaki.¹⁵ Jaskawen taexun mianan, jawada uinkin min ninkashina yudabu mai jidabi anu jiweabu min jatuki chanikunkainxanai”, iwanan,¹⁶ “Jaskakenan, ana jatixunda manama min Dioskidi chakabukunkainmis jau mia buaxunun Jesúsken awen taexun en mia nashimai kanun benidiwe”, ea waniki.

¹⁷ Janua Jerusalén anu en ana chintunkidanshina Diosbe janchanun ika Templo jemaintin anu ka en jabe janchainia namai keskakin¹⁸ Jesús en uianyan ea yuikin: “Nenuxun min ekidi jatu yusianyan mia ninkama ixankanikiki. Jaskaken menan jawaida Jerusalén anua taxnidikaintanwen”, ea wa¹⁹ ean yuikin: “Xanen Ibuun, janu ichamisbu jiwe tibi anuxun mia ikunwainbu achixun bichiti jiwe anu jatu bichimaxun jatu kupikin en jatu kusha kusha amakubainshina dasibitun ea unankanikiki.²⁰ Ja inun, min jancha yuixunika Esteban mankanwen tsaka tsaka akaibu uinkin jabun akai keska shinankin jatun tadi en jatu mekexunshinaki”, ea wa²¹ en Xanen Ibun ea nemakin: “Chajajida

yudabu betsa betsapa judiobuma anu en mia yunuaii. Jadi kaditanxanwen!" ea waniki- jatu wai

Pablo romano documentoya jatu unanmanikiaki, na janchadan

²²ja judiobu ichabun jatixun besti Pablom jancha ninkaxuntan ana judiobumakidi ninkakatsi ikama jakidi sinatakin unanxubima yuikin:

-Ja junidan, nun ana jiwea uinkatsi ikamaki! Tenankin yamawadikanwen!- iki

²³jeneama keketikubainkin jaki sinatai naxuku paepakin jatun peyabukumisbu tadi pekatan mai bekush bekush akin kudu sa sa akaibun ²⁴jaskadawen taea dasibibu jaki sinataibu unankatsis ikin romano xanen ibu comandanten soldadobu yunukin:

-Nukun meketi jiwe uke medan mistuyukanwen. Jadixun jaskai jaki sinatai biski ikanimenkain jau nuku yuinun bichi kushatiwen kusha kusha akin chanimakanwen- jatu wa ²⁵bichixun jawen nea pekatan januxun kushakatsi pewaibun janua xanen ibu bexmas capitán ja dapi nia Pablom yukakin:

-Romano juni documentoyabiakenan, ḷunanti wadiama man kusha kusha atidumen? Ja dikabi jawa chakabu washina unanmadi man adiatidumen? Jaska man yunuai? Eadan, en matun documentoyakidan- aka

²⁶jaska wa capitánen ninkabain jawen xanen ibu comandante anu ka jaki chanikin yuikin:

-Ja junidan, romano documentoyakiaki. Chanimamenkain, yuktanwen- aka

²⁷xanen ibu comandante kaxun Pablo yukakin:

-¿Chانيا min romano documento jayamen? Ea yuidiwe- aka

Pablom kemakin:

-Jawaikika! En jayabin!- aka
²⁸januxun xanen ibu comandante

Pablo yuikin:

-Ena bikinan, pei ichapawen pakatan en biniki- aka

Pablom ana yuikin:

-Enadan, jaskamaki. Romano en kaian jawa pakama en documento ea inanibuki- ikai

²⁹ninkatan datei kushatiyabun jenebainaibun jatu neamaxunwen taea romano xanen ibu comandante datebetanan Pablo jawa wama duawakin jau pe mekenunbun jawen soldadobu yunubaina

**Junta Suprema judio xanen ibubuki
Pablo chaninikiaki, na janchadan**

³⁰janua xanen ibu comandanten uxashini penaya jaskaya Pablo chiteshinabumenkain, iwanan, tapinjaidakatsis ikin mane dispi chiwetameyawen nexashinabu comandanten jawen soldado jatu pekamatian Diosbe jawenabu janchaxunika xanen ibubu inun Junta Suprema dasibi jatu ichawatan Pablo kainmabain jatu anu iyuxun jatun besuudi nichian

23 ¹Junta Suprema ichabu dasibi xabakabi beiskin Pablom jatu yuikin:

-En betsabuun, matu yuinun ninkakanwen. En jawa Dioski chakabu nima natian Dioski dateama unanuma en jiweaki, Diosun ea unanyanan- jatu waya

²ja dapi niabun jau betsan kepais atanun Diosbe jawenabu janchaxunika xanen ibujaida Ananíasin jatu yunua betsan kepais aka ³sinatakin Pablom kemakin:

-Bemakis min bepadamebiaya min juinti chakabu unantan Diosun mia

kupikin mia kepais adiaxanikiki. Min jadi tsauxun Diosun jancha kenenibuwen ea unanti wabiakin jau ea kepais anunbun jatu yunui na jibia Diosun jancha min kaneaii– aka

⁴ja dapi mapuabun jawaida nemakin yuikin:

–Diosbe nukunabu janchaxunika xanen ibujaidaki dateama min jaki sinataii– akabu

⁵Pablón yuikin:

–En betsabuun, Diosbe nukunabu janchaxunika xanen ibujaidama dabanan en unanma ikaii. “Matunabu xanen ibukidi jancha chakabutimaki”, ibianiken en kanexuki– itan

⁶xanen ibubu ichabu Junta Suprema anu jatidi saduceobu inun jatidi fariseobu Pablón unankin jui kushipawen jatu yuikin:

–En betsabuun, eadan, en fariseoki. En epa inun en xenipabu fariseobu idianibuki. Mawa ana jiwxananaibu ikunwankin en manaya ea unanti wakin man daka ea danain ikai– jatu wa

⁷⁻⁸“Mawa ana besteanbuma ixanai inun Diosun nai tsuma inun yushin jayamaki”, ikin saduceobun yuimisbun janua fariseobu jaskama: “Mawabu ana bestenxanai inun Diosun nai tsuma inun yushin jayaki”, akin yuimisbukén Pablón ja jamebi jaskakidi jatu jancha wai ninkatan fariseobu inun saduceobu ja iki janubi kemanamei ja ichabu anua paxkaibun ⁹jaskaibun unanxubima dasibibun yui kemanamei keketikubaunaibun janua Diosun jancha kenenibu yusinanannisbu fariseobu betsa benitan fariseobu janchaxunun, iwanan, jatu yuikin:

–Na juninan, jawa chakabuwamaki. Yushin kasmai nai tsuma jabe janchai daki ishianki– jatu waibun

¹⁰pubenjaidai kemanamei jancha bedukuaibuwen taexun Pablo yaushikin

ninia akeakekin paxka paxka akana ika datekin romano soldado comandanten jau i benunbun jawen soldadobu yunua ichabu anua Pablo iyuxun jawen meketi jiwe kushipa anu soldadobun ana bichiabun

¹¹uxashini ana meshu betsatian Pablo anu nukun Xanen Ibu juxun yuikin:

–Pabloon, dateama benimawe. Na Jerusalén anuxun ekidi ikunwankin min jatu yuishina keskadi wakin Roma anuxun jabiaskadi ekidi jatu yuiditanxanwen– awani kaken

Pablo tenankatsi yubakanibukiaki, na janchadan

¹²⁻¹³janua penaya judiobu ichapajaida 40 binua icha Pablo tenankatsi yubakai yuinamei:

–Pablo tenanun ika tenandiamá ana nun jawa piama inun nun jawa nuxuama ixanaii. Jakia adiamá jawada nun piken Diosun jau nuku kupixanunwen– iki jaskakidi shinain janchabaini ¹⁴buxun Diosbe jawenabu janchaxunika xanen ibubu inun xanen ibu bexmasbu anu buxun betsan jatu yuikin:

–Nukubunan, Pablo tenanun ika nun jakidi yubakaxuki. Adiamá ana nun jawa pitiduma inun nun jawa nuxutiduma nun yubakaxuki. Jakia tenandiamá jawada nun piken Diosun jau nuku kupixanunwen, iki 40 junibu binua jaskakidi shinain nun janchakanxuki. ¹⁵Jaskaken dasibibun man ana unanti pejaida wakin Pablo jau ana iwenunbun bepadantán romano soldado xanen ibu comandante yukakanwen. Januxun iweaibun janu man ichamisbu anu jikidiama nun tenanxanaii– iwanan –Nun yubakakanxu nun ma peki– ikaibu ¹⁶Pablón puin juni baken jaskaibu ninkabaini jawaida kain soldadobun meketi jiwe anu kaxun jaska yubakakanxu Pablo yuia ¹⁷romano

soldado xanen ibu bexmas capitán betsa kenaxun Pablón yuikin:

—Min xanen ibu comandante jau jawada ninkaxukidi banabimanun na bedunan iyutanwen— aka

¹⁸janua jawen xanen ibu comandante anu capitánen bedunan iyuxun yuikin:

—Jawa daki jau mia yuinun na bedunan mianu en iwenun ja Pablo nun bichishinatun ea yunuxuki— aka

¹⁹romano comandanten metsunxun tadi bedunan ja besti iyuxun yukakin:

—¿Jawa min ea yuinun ika ikai?— aka ²⁰bedunantun yuikin:

—Pablo ana yukanun, iwanan, mia bepadantan meshukidi jabu Junta Suprema anu min Pablo jatu iyuxunxanun mia yukai bekatsi ma xanen ibubu yubakakanxuki. ²¹Jakia 40 junibu binuatun Pablo tenankatsi yubakakanxun junexun manakanikiaki. Tenandiamma ana jawa piama inun jawa nuxuama iyukanikiaki. Tenandiamma jawada piaibun Diosun jatu kupixanikiaki. Jaskakanxu mian besti: “Peki”, min jatu wanun mia yukai bekanikiaki. Jatun jancha ikunwanyamaxanwen— aka

²²comandanten ninkatan bedunan yuikin:

—Jaska min ea yuixu tsua kakawayamatawanwen— axun nichian bedunan kaya

Jatun xanen ibu Félix anu Pablo yununiaki, na janchadan

²³januxun romano comandanten jawen capitán dabe jatu kena beabu yunukin:

—200 soldadobu main buaibu inun, 70 caballoki katsaumea buaibu inun, janua 200di jatun jashia buaibu ichawakin jatu pewakanwen. Meshu medan 9:00 badiken Cesarea anu nichintankanwen, ²⁴nukun xanen ibu Félix anu iyukinan. Medibi caballo betsaki katsaunxun

Pablo jawama meke pewaxun piskumatankanwen— jatu wa kakatsi soldadobun pewaibun ²⁵jau keneyabi butanunbun comandanten kenexunkin:

²⁶“En ea comandante Claudio Lisiasin min en xanen ibu pepajaida Félix, en mia jancha bumai uindaxanwen. ²⁷Ja juni jawen kena Pablo jaki sinatakin judiobun achipakebaun tenanpananbun romano documento jayaken tapintan jatu nemanun ika en soldadobube kaxun en jatu mepanmashinaki. ²⁸Januxun jaskai jaki sinatakin ja akanimenkain tapinun ixun dasibi judio xanen ibubu Junta Suprema ichabu anu iyuxun ²⁹jatun xenipabun yusini Pablón betsa wamis jaki sinatakin chitekin kunyan akaibu en ninkashinaki. Jakia jawa chakabu jayamawen taexun jaska ja juni tenantima inun jaska bichiti jiwe medan bichitimaken en jatu nemashinaki. ³⁰Jakia tenanun ika jaki yubakaibu ninkatan ja juni jawaida mia anu en yunua iyukaniki. Mian mekeyuwe. Jabu jaki sinataibu judiobu buxun jau jadixun chitenunbun mia anu en jatu yunudiaxanai, jau jabun chiteai miandi min ninkaxanunan. En xanen ibu pepajaida Félix, jatiski, en janchadan”,

axun jatu bumaya

³¹jaska wakin soldadobu yunua meshu medan Pablo iyushinkin mae betsa jawen kena Antípatris anu bichiabun

³²jadia jatuki pena soldadobu meshukidi main beshianbu ana Jerusalén anu chintunbidanaibun jatidi soldadobu caballowen bushianbun Pablo jabun iyukubaini ³³Cesarea anu jikitán Félix anu iyuxun kene inankin Pablo yunuabu ³⁴kene uinxun Félixin Pablo yukakin:

–¿Min janiamen?– aka
 Pablón yuikin:
 –Cilicia anua en kainiki– ikai
³⁵ninkatan Félixin yuikin:
 –Min jaskaya jabun mia chiteshina
 beaibutian jatubetan en mia
 ninkaxanaii– atan jawa wama Herodesin
 jiwe itamama anuxun jau Pablo
 mekeyununbun jatu yunushinken

Jawa chakabuwama ishiankidi Pablón
 Félix yuiniaki, na janchadan

24 ¹janua ma 5 día binukainaya
 Diosbe jawenabu janchaxunika
 xanen ibujaida jawen kena Ananías
 maewan Cesarea anu kakin judio
 mekenika betsabu inun juni unanepa pe
 jatu janchaxunika jawen kena Tértulo
 Jerusalén anua jatube kai jikitán Pablo
 chitenun ika xanen ibu Félixin besuudi
 ichabun ²Pablo iweabu Tértulon jakidi
 chitekin taewakin xanen ibu Félix
 yuikin:

–Nukun xanen ibuun, min pejaidaki.
 Dasibi pewai duapai unanepai min
 xanen ibuaya miwen taea unanuma
 nukun mai pakea anu nun pe
 jiwekunkainmiski. ³Min nuku jaska
 waiwen taea shinan chankankin
 enabun mia kenwankubaunmisbuki,
 min nukun xanen ibu duapajaidadan.
 Ean en mia jabiaskadi waii, Felixiin.
⁴Jatixuinda jancha chakayamakin
 mia bikawama eskadabes en mia yuiai
 ea ninkayuwe. ⁵Na juni Pabloden,
 chanimajaida jakidi pemajaida nun
 uiaiin. Jesús Nazaret anuatuun yusian
 chibainbu jatu bebunxunkin mai jidabi
 anua judiobu manibaunabu bikawakin
 jatu yusin chakakin paxkakin jatu
 itimaska wakubainmiskiaki. ⁶Jaska
 besti wama nukun Temploki meseama
 nuku chakabuwanshinaki. Jaska waya
 nukunabun achiabu nukun xenipabun
 beya chibankin unanti watan nun

kupipanan ⁷soldado comandante
 Lisias jawen soldadobube kaxun jawen
 kushipawen taexun nuku mebinshinxun
⁸nenu mia anuxun nun chitenun
 nuku yunushinaki. Januxun min mian
 Pablo yukaxun jaska en mia yuixu
 chanimamenkain min unantiduki– akaya

⁹ninkatan ja judio xanen ibubu jatube
 ichabun Tértulon jancha bechipaikin
 Félix yuikin:

–Chanima jabiaskaki– akaibun
¹⁰januxun jau Pablondi jatu jancha
 wanun xanen ibu Félixin yunukin
 tewexuna januxun Pablón xanen ibu
 Félix yuikin:

–Badi ichapa xanen ibukin enabu min
 pe jatu mekekubainmis unain benimakin
 jaska en jawa chakabuwaísma jamen
 ea chiteaibu jatun jancha nemakin
 en mia tapinmai ninkawe. ¹¹Dios
 kenwantanun ika ma 12 día Jerusalén
 anu en jikishinaki, jaska chanima mia
 yuka ikin min unantiduki. ¹²Januxun
 Templo anua inun janu ichati jiwe anua
 inun janida janchai nixun yudabu en
 jatu itimakawai tsua en jaska wai ea
 jawa ninkabuma ishianbuki. ¹³Jaskawen
 taexun ja junibun mia jaskakidi
 yuiaibuwen taexun jatun jancha kayabi
 jawa jayamaki. ¹⁴Jakia jaskakidi
 ekidi mia yuiaibuden, xabakabi mia
 yuinun ninkawe. Jesúsun Bai Bena nun
 chibanyan: “Dioskidi kanekanikiki”,
 iwanan, nuku aki ikanikiki,
 jaskamabiakenan. Jesús ikunwankin
 nukun xenipabun Dios kenwanpauni en
 duawapakemiski, Moisin yusini inun
 Diosun jancha yuixunika betsabundi
 kenenibu dasibidi ikunwankinan.

¹⁵Jaska wakin yuda pepabu inun
 chakabubu kupikatsi Diosun jatu ana
 bestenwanxanai ikunwankin en manaii.
 Jabiaskadi na judiobu nukube ichabun
 jabiaskadi manadiakanikiki. ¹⁶Jaskawen
 taexun Dioski inun junibuki en shinan

chakaismaki, jaskai jiwei pepanun ixunan.

¹⁷Jaska inun, betsadan, badi ichapa mai jidabi mae tibi kakunkauntani enabu inankuin jatu bexuin inun Dios kenwakin chaxuhan jatu kuamatanun ika en ana chintunkidanshinaki.

¹⁸Januxun nukukidi Dios pepa shinanmatan Templo jemaintin anuxun chaxuhan en inankuiyanyan eki jawa juni ichabuma inun tsua itimaskabumaken Asia anua judio betsabu eki nukuxun ea jabun itimaska wakin taewashinabuki. ¹⁹Ea jabun jaska washinabu ja Asia anuabu jabu betidubuki, mia bebun xabakabi nixun ea chiteidan, en jaskashinken eki sinatai ishianbumenkainan. ²⁰Beabumaken nukun xanen ibubu Junta Suprema ichaxun ea unanti wakin jawada en chakabuwamis ea tapinshinxun na xanen ibubun mia jaska yuikeankanaii. ²¹Jakia Junta Suprema xanen ibun jatun besuudi nixun jancha kushipawen jatu yuikin: “Mawabu ana bestenxanaibu en ikunwainwen taexun natian man ea unanti waii”, akin Jerusalén anuxun en jatu yuishinawen taea eki sinatai ikanimenkain. Jatu yukawe– aka

²²Jesúsun Bai Benakidi unanjaidakin Pablo yuiai ninkatan judiobu manamakin Félixin jatu yuikin:

–Jatiada comandante Lisias Jerusalén anua juaya en ana matu unantijaidawaxunxanai, matunaki. Manayukanwen– jatu waya

²³janua jawen jaibuaibun Pablo duawakin jau pimayuxanunbun jawa jatu nemama jau Pablo jawa wama mekeyununbun romano capitán jatu yunushinxun

²⁴januxun xaba betsaki chipu jawen ain judio ainbu jawen kena Drusila iyui Félixin ana Pablo ninkakatsi jatu kenama Pablo iweabu Jesucristo ikunwainkidi

jatu yuikin ²⁵jiwea pepatikidi inun ibubis pe meketikidi inun dasibi chakabu Diosun kupixanaikidi Pablón jatu jancha wakin yusiai ninkai datekin Félixin nichinkin yuikin:

–Kayuwe, shinanxun ana en daya jayamatian ana mia ninkakatsis ikin en mia ana kenaxanaidaan– atan ²⁶Felixin Pablokidi shinan betsawidan: “En jawa wama nichinxanun pei ichapa jau ea inanxanunwen”, ikin Félixin Pablo jawenchains kenai jabe janchabiakunkainkin ²⁷jawen jancha ninkabiakin judio xanen ibubu daewakatsis ikin Pablo jawa nichianma ma badi dabe ka janua Félix jawen daya menetan kainkainaya Roma anua xanen ibu betsawen kena Porcio Festo Cesarea anu xanen ibui taeniki.

Jawa chakabuwama iyamakidi Pablo Festo yuinikiaki, na janchadan

25 ¹Janua xanen ibui Cesarea anu Festo jikishinxun xaba dabe inun besti ma binuaya Jerusalénkidi baii kayushinken ²jadixun Diosbe jawenabu janchaxunika xanen ibubu inun judio xanen ibu betsabu yubakabain Festo anu buxun Pablo chakabuwakatsi padankin:

–Jaskai min ma nenuki. Nuku pewaxunkin Pablo miandi min nuku unanti waxunkatsi čnenu Jerusalén anu jau itanunbun min jatu yunutidumen?– akabu, jaskadan, eska Pablokidi yubakabain bai tanabidanai nun tenanunbun ika inibukiaki. ⁴Jakia Feston jatu nemakin yuikin:

–Cesarea anuxun Pablo ma pe mekexun uinkanikiki. Jaskaken uxa eskadabestan en ana chintunkainaya ⁵man jaska ea yuiaidan, matun xanen ibubu Cesarea anu ebe buxun ja junin jawada chakabuwayama chitekin unantidubuki– jatu washina

⁶Jerusalén anuxun 8 día kasmai 10 día daki nichintan Cesarea anu ana

chintunkaini jikishina janua meshukidi januxun xanen ibui tsauxun unanti wamisbu anu jadi Festo tsautan jau Pablo itanunbun jatu yunua ⁷iweabu Jerusalén anua beshian judio xanen ibubun kebaunxun jawen yusian betsa betsapakidi Pablo chitebiakin jawen jaska watima kayakidi Festo yuiaibun ⁸januxun jantsedi Pablón jawa chakabuwama ikimakidi unanmakin Festo yuikin:

—En jawa chakabu jayamakidi ena mia yuinun ninkawe. Diosun nukun xenipabu yusini chibankin en kaneama inun Jerusalén anuxun Templo en jawa chakabuwama inun romano xanen ibujaida Césarki en jawa jakidi chakabu yuismadiki— ikaya

⁹janua judio xanen ibubun jau Festokidi pe shinanunbun, iwanan, Pablo yukakin:

—¿Jerusalén anudan, min kakatsis ikai, jadixun min jaskayama jau en mia unanti waxanunan?— aka

¹⁰Pablón kemakin:

—Jaskamaki. Juni betsa tibi mian min unanti wanun romano xanen ibujaida Césarn min jabiaska watanun mia yunuimaki. Jaskaken na jabiatian min ea unanti watiduki. Jaskaken enabu judiobu en jawa chakabuwama iyama en mia tapinmaxuki. ¹¹En jawada chakabuwayamawen taexun jau ea tenanunbun en jatu jawa nemama ikeanaii. Jakia mia padainbun jau ea tenanunbun min xanen ibun jancha kanekin min ea jatu yunutidumaki. Jaskawen taexun maiwan kesua xanen ibujaida Césarn jau ea unanti waxanun Roma anu ea yunuxanwen— aka

¹²januxun unanepa medabenanbube Festo janchatan Pablo yuikin:

—Peki. Césarn jau mia unanti waxanun min ea yukaxuki. Jadi en mia yunuxanaii— ashian jiweyuken

Pablokidi Feston Agripa yuinikiaki, na janchadan

¹³chipu xaba eskadabes kaken romanobube xanen ibumis judion xanen ibu Agripa jawen pui Berenicebe Cesarea anu xanen ibu bena Festo uinkin jancha wakin benimawanun ika jaki bai bushian ¹⁴jabe jiweyuabun Feston Pablokidi Agripa jadi banabimakin:

—Nenu juni betsa mekexun Félix eki jenebainshinaki. Mia yuinun ninkawe.

¹⁵Nenua Jerusalén anu en ka Diosbe jawenabu janchaxunika xanen ibubu inun jabun mekenikabun chakabu jakidi yuitan ja en kupinun jaki sinatakin ea yunuabu ¹⁶jakia ean jatu kemakin: “Nun romanobunan, nukun yunua kushipawenan, e iskaun detenunbun nun jaska beyamaki. Jakia jau detenunbun yunukinan, ja jaki kayai jadatuda chakabu ja dabe unanti wadabetan nun jatu nematiduki, ja ikaibudan”, akin en jatu washina ¹⁷en jatu jaska wabidana ea chibandanbidashinabu manakatsi ikama meshukidi januxun nun jatu unanti wamis anu tsauxun ja juni en jatu yunua iweabu ¹⁸jabu beshianbu benixun jaska jakidi kayakin jawa jatun chakabu tibi waima jaskakidi chiteaibu dabanan jaska en shinainkidi jawa yuiabuma ¹⁹jakia jaska judiobun jiwea beya kenwanmisbu jatu maewamai inun juni betsa Jesús mawabiani ana jiweaki, akin Pablón jatu yuimis besti jakidi chiteaibu en ninkaimaki. ²⁰Jaska jakidi yuiaibun jawawen en jaska watima ea unantimaska kaya wabu shinantan Pablo yukakin: “Jerusalén anuxun ana jadixun jatubetan en mia unanti wai kaxanun ejadi min kakatsis ikai?” en wa ²¹januxun jatun ea akin: “Jamaki. Xanen ibujaida Césarn jau ea unanti waxanun Roma anu ea yunuxanwen”, ishinken jadi ea yukashinanu yunukatsi jau bichixun meke bestiyununbun en jatu yunushinaki— aka

²²januxun Agripan Festo yuikin:

–Ja junidan, eandi en ninkakatsis ikaai– aka

Feston kemakin:

–Peki. Meshukidi mintsidi min ninkatiduki– aka

²³janua uxashini meshukidi jatun tadi pepa sawea jawenduabidanaibu jatu kenwanbidankin tepe dewe mawabainaibun xanen ibu Agripa jawen pui Berenicebe inun romano soldado xanen ibubu inun Cesarea anua xanen ibu bexmasbu januxun unanti wamis dintu anu jikibaina maniabun Feston jatu yunua Pablo iweabun ²⁴januxun Feston jatu yuikin:

–Xanen ibu Agripa inun nukube ichabuun, na junikidi matu yuinun ninkakanwen. Jerusalén anuxun inun nenuxundi judio ichapabun jakidi chakabu kayakin ea tenanmanun ika biski ikubainshinabuki.

²⁵Jakia jaska jakidi yuibiaibun ean en ninkashinadan, jaskawen dabanan en tenantiduma shinantan en jaskada wayupanan Jamebi ea yukakin: “Jau matun xanen ibu kaya Césarn Roma anuxun jau ea unanti waxanun ea jadi yunuwe”, ea washina jadi yunukatsi en shinanshina en yunuxanaii. ²⁶Jakia jawada chakabuwayamakidi tapin pewamabia xanen ibujaida César anu ja junikidi en jawa kenexun bumatima en shinaii. Jaskawen taexun jawa chakabuwayamamenkain, Agripan, natian min besuudi en nichianki, jau miandi min ea unanti waxununan, jaskakidi kenetan en bumakatsis ikaidan.

²⁷Jamen jawa jawen chakabukidi unanma en yunua: “Jabitiduma benibin!” ixun ekidi shinantiduki– akaya

Pablon ikunwainbu ichakawabiaya
Jesúsun katunikidi Agripa yui
chaninikiaki, na janchadan

26 ¹januxun Agripan Pablo yuikin:
–Jani min jawa
chakabuismakidi nuku yuiwe– aka

–Peki– iwanan, jatu meken

sananaxuntan Pablon jatu yuikin:

²–Xanen ibujaida Agripaan, jaska ekidi kayaibukidi mia bebun nixun en jaskakunkainmis en mia jancha wainwen taea en benimaii, na jaska judio xanen ibubu ekidi chakabu chani chakakin eki kayaibudan. En jaska jayamaki. ³Mianan, dasibi judiobun beya unankin jaska betsa betsapa shinain nun ja idabemis min unanjaidaiwen taexun chanima en jancha min ninkatiduki. En jancha tenexun ea ninkayuwe.

⁴Dasibi judiobun ea unan keyukanikiki, en jatube jiwekunkaunidan, en mae anuabu inun janua en yumeni Jerusalén anuabunan. ⁵Ja dikabi en bedunantun Moisin nukun xenipabu yusini jabuns shinan paxkama chibanzaidakin nun mekejaidamis en fariseo ikunkaini ea uinkubainixun mia yuitidubumenkain. Jakia ekidi shinain janchatidubumamenkain. ⁶Jaskawen taexun en jaskadaken daki ea unanti watan kupikatsi jaska nukun xenipabu Diosun yubani ikunwankin en manai ea aki ikanikiki. Januxun mawabu ana jatu bestenwain kai Diosun nukun xenipabu yubani en ikunwainwen taexun ea kupikatsis ikanikiki. ⁷Israelin bakebu 12 xukuabu tibitun jaska uinkatsi manakin badidi inun meshu medan Dios kenwankin duawakubainmisbu keska wakin jaska manakabu keskadi eandi en ikunwainwen taexun jaska bestiwen taexun jabun ea chitei kayanamei ikanikiki– iwanan, ichabudi uinbaunkin ana jatu yuikin:

⁸–¿Jaskakin man ikunwanbumamen, matubunan, mawabu Diosun ana jatu bestenwanxanaidan?– iwanan

⁹–Eanan, chanima jaskakidi shinan pewadiamadan, en jatu ayuniki, jatu yamawakatsis ikinan, Jesús Nazaret anua ikunwainbuki sinataidan. ¹⁰Na

jaska akinan, Jerusalén anuxun en aniki, Diosbe nukunabu janchaxunika xanen ibubun jatu kushipawen ea yunuabudan. Jesús ikunwainbu ichapa achixun bichiti jiwe medan en jatu mistukubainiki. Januxun jatu tenainbun ean jatu nemama jabiaskadi shinankin pesxun en jatu uins bestikubainiki.

¹¹Jatu jaska wakinan, jawa betsa tukama janu ichamisbu jiwe tibi anuxun Jesús ikunwainbu jau jenenun bun jatu ichakawa chakayamakin bextejaidakatsis iki en jatuki bene bene ikin jawa jatu jenekatsi ikama judiobuman mae anudi paxaibu jabiadia jatuki sinatajaidakin jatu achinun, iwanan, en jatu kachibankubainiki.

¹²Diosbe nukunabu janchaxunika xanen ibubun jaska nun akai keska nun anun ea jatun kushipaya wakin yunuabu Damasco bai tanabaini ma en kemaya ¹³bai puchinin ma badi manananbibiaken kakin en uiyanan naiudia bin kushipajaida badi binuatun ea inun en jaibuaibu nuku dachaxaya ¹⁴janua dasibi main nun di ikaya nukunabun jancha hebreowen tsuanda ea yuikin: “Sauloon, Sauloon, ¿jaskakin min ea ichakawakubainai? Mimebi min chakabuiaii, tsuki ikama ibubis muxaki iki ikasidan”, ea wa ¹⁵eandi yukakin: “Xanen ibuun, ¿min tsua iki ikai?” en wa januxun ea yuikin: “Jabia ea ikunwainbu min jatu ichakawakubainaidan, en Jesúski.

¹⁶Benidiwe, en mia anu juxukidan. Mia katutan jaska min ekidi dayakunkaini chanikunkainxanun en mia uinmaxu inun chipu betsa en mia uinmaxanaidan.

¹⁷Ena mia watan judiobu anu inun judiobuma anu janu en mia yunuai anu min ka en mia mekepakexanaii, mia chakabuwatidubumadan. ¹⁸Jabu anu en mia yunuax kaxun jatu shinan betsa wamakin jau unainsmapakin

Satanás ana chibanyamanun bun en Epa Diosun jancha min jatu yusinkubaunun judiobuma betsa betsapabu anu en mia yunuaii. Jadixun jatu bedu bepexa keska watan ana meshu medan kama keska jakia binwen kai keskaibu min jatu waya jatiditun ea ikunwainbun jatun chakabu en jatu buaxunaya Diosun jatu jiwekuinmaxanikiki, jawa jatu kupiamadan, jawenabu medibi wakinan”, ea waniki.

¹⁹Xanen ibujaida Agripa, jaska nun uinsma nai anua namai keska en uinshina chibanixun en chibankubainmiski, shinan betsa wamadan. ²⁰Jadixun Damasco anuxun dukun kakape jatu yusin taewatan chipu Jerusalén anuxun yusindiatan Judea mai pakea jidabi anuabu judiobu inun judiobuma en jatu yusinkin: “Shinan betsa wakanwen”, en jatu wa tsuanda shinan betsa watan Diosun bake ikunwankin jatumbebi jatum jiwea bena jayakin uinkubainimabuki, en jatu unanmakubainadan. ²¹En jatu jaska wamiswen taexun Templo anuxun judiobun ea achixun ea tenanun ika iyamabuki. ²²Jaskaken Diosun ea medabewaya jawa shinan betsa wama xanen ibubu inun xanen ibuma jatuki chani Moisés inun Diosun jancha yuixunika betsabun jaska bebunkidi kenenibu ixanai ²³yuikin: “Mesíasdan, nuitapatan mawai kaikiki. Janua ja dukun mawa bestenkaina ja dukun nuku bebunxuni kaikiki. Jaskashinxun nun judiobu inun judiobuma jawen paxati bai xaba kayabi ibubis Mesías chani kaikiki”, inibu jabiaskadi jaskakidi en jatu yusinkubainmiski– akaya

Xanen ibujaida Agripa Pablo Jesús ikunwanmakeanikiaki, na janchadan

²⁴Pablon jaska jawen jiweakidi yuiai ninkai romano xanen ibu Festo e itan unanxubima yuikin:

–Pabloon, min patapaki. Kene ichapa unain min unainsmapakunkainaii– aka
25Pablon kemakin:

–Xanen ibu pepajaida Festoon, en unainsmapakidi janchamaki. Chania xabakabi jancha kayabi besti en matu yuiaii. **26**Jaskadan, ja xanen ibu Agripan Diosun jancha unainwen taexun dateama jaskakidi janchakin en yui ikaii. Jaska ean en jakidi shinanan, unan keyudiaikiki. Chania Jesús jawa juneama jabiaskadiai jiwekunkainiki– iwanan, **27**Agripakidi besuxun yuikin: –Xanen ibu Agripaan, ¿Diosun jancha yuixunikabun keneni jaskakidi en mia yuaidan, min ikunwain? En shinanan, min ikunwaii– aka

28Agripan kemakin:

–Min shinanan, ¿min jawaida ea Cristo chibankatsis ikai?– aka

29Pablon ana yuikin:

–Jawaida kasmai chipu kasmai mia inun dasibibun natian jabun ea ninkaibu en ikunwain keskakin man Jesús jaibu wadianun Diosun jau matu kenadianunwen, jakia na en ika keskai mane dispiwen matu tsuan menexamadan– jatu wa

30januxun jatu jaska wai ninkatan judio xanen ibu Agripa inun romano xanen ibu Festo inun Berenice inun xanen ibu betsabu jatube tsuaa **31**tadi medibi benibain jamaudia Pablokidi jabu janchanamekin yuikin:

–Ja juninan, jawa chakabuwaismawen taexun tenantima inun bichiti medan bichitimaki– ikaibun

32januxun Agripan Festo yuikin:

–Ja juni jawawama min nichintidubia jamebi: “Jau Césarn ea unanti waxanun”, ikin mia yukashinadan, jadi nichinyuxanwen– akabu

Roma anu Feston Pablo
 yununiaki, na janchadan

27 **1**januxun romano maiwan kesua Italia maewan Roma anu

xanen ibu dasibi binuatun jau Pablo unanti wanun jadi nuku nichinkatsi shinanshinxun jau nuku iyunun capitán Julio soldado jawen xukua ewapa kena César Augustonadan, Pablo inun jabu bichimisbu betsabu jatu Feston inankin yunukin:

–Roma anu iyukin jatu mekejaidaku baintankanwen– aka **2**mae Adramitio anua niwe xaxu ewapa Asia anu kaiwen jaki nuku naneabu mai pakea Macedonia mae betsabu Tesalónica anua nukun jaibu Aristarco nukube kaya ianenwan kexa patankubaini **3**janu uxashini kai mae betsabu Sidón anu nun keti ikaya capitán Julion Pablo duawakin jeneyua januxun Jesús ikunwainbu jawen jaibuaibuki jau jatuki bayutanunbun, iwanan, nemama kaken bechitan pimakin duawashianbu **4**janua Sidón anua bestenkaini kai natukan ewapa jawen kena Chipre nun kapanan niwe beaiwen taea dunkebaini **5**mai pakea dabe Cilicia inun Panfilia besuudi ianenwan dunkebaini kai atimas mai pakea betsabu Licia anu jawen mae betsabu Mira anu nun jikia ja xaxu nun jawen kai jenetan

6janua maei niwe xaxu ewapa Italiakidi kai romano soldadobu capitán Julion benabaunkin betsabu Alejandría anua kai bechitan ana jawen kakatsi jaki inatan nun kai **7**unanxubidajaida kakunkaini uxakunkaini ianenwan patankubaini daya chakayamakubaini mae betsabu Cnido besusi niwen nuku niti aka nuku jaska wa yusmaudi natukan betsabu Creta dunkebauni mae betsabu Salmona natukan kesua binubaini **8**niwen nuku kamama texkitan unanxubida kai bikajaidakunkainkin natukan Creta kexa patankubaini atimas mae betsabu Lasea dapi jawen kena Buenos Puertos anu nuku keti akabu nun jikiken

9niwe pepa manakubaini uxa ichapakunkaini jawaida kainama

judiobu samakemisbutian ma binuken ui pakei taei niwewan bei meseaya jaskawen taexun bebunkidi jatu nemakin Pablón yuikin:

¹⁰–Junibuun, jaska en shinain matu yuinun ninkakanwen. Ean en uiainan, ninkamas nun kaya niwe mesejaida bekin nuku xaxu bichia matun xekiwan inun nukun mabu dasibi xaxuyabi benui keyutiduki. Nukudi jasai nukun jiwea nun benudiatiduki. Buyamayunankanwen– jatu wa

¹¹januxun jatun xaxu bumis inun xaxu ibu niti ikatsi ikama capitán Julion jabu besti ninkaniki, Pablón jancha ninkamadan. ¹²–Nenu Buenos Puertos bai butua chakabuki. Jaskanuxun nun matsi binutidumaki– ikaya dasibun jabiaskasdi shinain: –Jaskakenan, nenua buidan, Creta natukanu Fenice mae anu bunankanwen, janu bai butua peki, noroestekidi inun sudoestekidi uiankidi janu bashikutan nun ui binuyununbunan– ikaibun

Niwewanen jamakidi jatu iyuniaki, na janchadan

¹³janua ana bunun ixun shinantan buaibun niwe kushipama duakabi surkidia pe xunku ikaya:

–Peki. Eskawen nun katiduki, jawa bikamadan– ika ana kai taei natukan Creta jawen kexa jawama nun patankubainaya ¹⁴janua jawaida natukankidia niwe meshupa kushipa bekin ian namakis nukun xaxu nuku tu akubainaya ¹⁵jaska waxun ana tsitsunwantun ana ja kaikidi butima niwewanen chishtekidi buaiwen taexun xaxu jawen tuenbainti jeneabu niwen besti xaxu bini bini abainaya ¹⁶janua natukan jatiuma jawen kena Cauda junea jaudi niwe xunku ikamaudi dunkebainkin jawen jasai paxati xaxu pishta danexekea kai nuitkaatan

dayajaidatan mapemakin nun nanea: ¹⁷“Nukun xaxu ewapa mushitiduki”, iwanan, xaxu ibu dayaxunmisbun dispi kushipawen xaxu dawexekubainkin keyutan nespa jawen kena Sirte anu texke itiduki ika datekin ja xaxu dakedexkain bichai jau jaki teanun, iwanan, ji keku pukuabu jatun mestenwanken niwen tu abainmis tadi ewapadi jawen ji maxkenanyanbi pekaxun butekin nun peka niwewanen xaxu tu akubainaya ¹⁸janua ana penaya niwewan ana kushipa bekin xaxu dabe dabe achakayamaya xaxu nadabeketiduen datekin xaxu xanka duakabi wanun ixun ja mabu buaibu jatidi ian medan datekin pukukin taewaibun ¹⁹janua uxa dabeshina ana penaya niwewan maindiamaken ja niwen jawen tu abainmis tadi ewapa inun jawen chibu inun jawen nabe inun maxkenan dasibi dispiyabi xaxu anua jatubetan mekenen dasibitun xutukin ian medan nun pukuabu ²⁰januxun niwen nuku ichakawakubainaya meshu tibi bishi uianma inun xaba tibi badi uianmadi: “Nun peamaki, janiada jasakin nukun jiwea nun benui kaii”, ikaibun

²¹natian datekin jawa piabuma ikubainaibun janua Pablo jatu nashui ika benikaun jatu yuikin:

–Junibuun, en jancha ninkantan Creta anu man bashikushianan, bika chakabu man meama ikeanaii. ²²Jaskabiaya punu nukayamakanwen. Natianan, xaxu besti benuaya nuku dasibi nun mawama ixanaii. Matu yuinun ninkakanwen. ²³Meshu medan en Dios ja en dayaxunmis ea mekemistun jawen nai tsuma yunua juxun ²⁴ea yuikin: –Pabloon, dateyamawe. Romano xanen ibujaida min uin kanun Diosun mia medabewakin ja dasibi xaxun mibe buaibu miwen taexun jatu

tenanma en jatu paxa waxanaii– akin ea yuixuki.²⁵ Junibuun, ana punu nukama benimakanwen. Eanan, en Dios ikunwanyan jaska ea yubaxu axanai en ja shinaiin, nun jaskai kai jawen nai tsuman ea yuixudan.²⁶ Jakia natukan betsa anu nuku teawai kaikiaki– jatu wa

²⁷janua Creta anua buimabu ma 2 semana kaya meshu betsation ianenwan dexun betsa jawen kena Adriático anu niwen nuku xutukubaunaya ianenwan buspu tsaubainkin nuku dabe dabe akubainaya xaxu ibu dayaxunmistun unanxubida bana ninkatan shinain: “Nun ma mai kemaii”, ixun²⁸ jawen nua meti dispiwen mea 36 metro tanatan ana ja kachu xekekainaya ana mekin 27 metro tanadiatan²⁹ mishkiki keti ikin tsakai kaya datekin jawen xaxu tsumakin mai betanti xankama dabe inun dabe xaxu chixukidi pukuabu niti iken jau Diosun penaya uinmakin jatu medabewanun manai manishinaibun³⁰ xaxu pishta butetan paxanun, iwanan, xaxun dayamisbun jatu padain xaxu debukidia jawen mai betanti betsadi pukui itsai padananantan paxai bupananbun³¹ jakia jaskaibukidi unankin capitán Julio inun soldadobu Pablón jatu yuikin:

–Jabun xaxu ibu dayaxunmisbu jabu besti paxaibunan, matudan, man jaskatan paxatidubumaki. Jatu nemakanwen– jatu wa

³²jawen bupananbun capitán datekin jawen soldadobu yunua ja dispiwen xaxu pishta nexabu mexteabu ianen pukukainaya

³³ma pena kemaya jau pinunbun Pablón shinankin jatu yunukin:

–Menan dasibitun jawada pidikanwen, man jaskai ikai ma semana dabe kabia uxa tenekin uinkubainkin man jawa piama en matu uiainan.³⁴ Jaskaken en matu yunuaii. Punu nukama man paxakatsis ikaidan, pidikanwen. Man

nuitapabiai man jawa chakabui benuama ixankanaii. En jancha en matu yuiai jakimayamakanwen– jatu waxun

³⁵jaska jatu yuitan Pablón misi bixun dasibibun besuudia dakeama Dios kenwantan misi tunkexun pikin taewayá

³⁶januxun unanxubida benimabaun jabundi piaibun³⁷ja xaxuwen nun jawen kaidan, nukubudan, 276 yuda nun iniki.³⁸ Januxun yaniwatan xaxu ana xankawakin xekiwan putakin texe washinabu ana jawen jenekin pukukin keyuabun

Xaxu ewapa jawen buaibu dabekeea jaxka jaxka inikiaki, na janchadan

³⁹janua penaya uinbaunkin xaxu ibu jabu dayaxunmisbubetan janida kexa betsaudi janu unanbuma anu buabu jawa unanma jakia jawen dexun anu mashi uintan:

–Mashiudi nun teai katidumenkain. Jaudi bunankanwen– jatu wa⁴⁰ jabun jabiaskadi shinankin jawen tsitsunti jaiman nea pekaxun xaxu debu anu ja niwen tu abainmis tadi pishta ana puntetan ian anu jenekin jawen mai betanti dispi jaki nexea mexteabu mashikidi tu iki nunukaini kemai taeaya⁴¹ jakia jene janus kushibidanai anu uke medan mashi tsakai janu uianma texke ika ana jadakidi katima jene kushipai buspu tsaubidankin xaxu chixu tsaka tsaka akin jaxka jaxka akin taewayá⁴² juni bichiyamabu nunai jau paxai junebainyamanunbun yubakatan soldadobun jatu detekatsis ikaibun

⁴³jakia Pablo jatu mekemakatsis ikin soldado capitán Julion jatu nematan nunanikabu jabu dukun jau pukubain mashin mapekenunbun jatu yunua

⁴⁴nuna unanbumadi ja kachu xaxu nabe inun xaxu tuax ikaiwen jau bununbun dasibi nuku yunua jaskai dasibi nun nunubaini mashi metsatan nun

mapekebidanbidani keyuniki, paxai tsua jasamadan.

Natukan Malta anu Pablo niti iyuniaki, na janchadan

28 ¹Janu dasibi jasama mashin nun mapekei keyuken natukan jawen kena “Maltaki”, ikin nuku yuiabu nun ninkaya ²ja uian nuku aka xunsa nun matsu teneaya janu yuda betsa jiweabu dasibi nukuwen nuikin nuku duawakin kadu ichapa kuaxun nun yui bununbun nuku kenabu ³jadi kaxun Pablom metax ichawaxun chi anu manchinkin kuaya metax anua chi kuai anu xana mebidani dunu pianan taxnikidan ishchukidan jawen mekenki pikin mukua dunuken ⁴ja janua yudabun jawen meken anu dunu dunua uin jawen datei yuinamekin:

—Na junidan, pubenkin yuda betsa tenainmamenkain. Ianenwan anua paxabiaxuken dunu yunukin nukun mekenika yushin pepatun jiwea inanma kupikikidan- ikaibun

⁵jakia jawaida Pablom jawen meken meishkukin chi anu dunu putatan jawa meama kayaken ⁶januxun dasibibun shinankin: “Mexaxatan jawaida mawaimenkain”, ixun manajaidabiaibun jawama kayaken jaskaya shinan betsa watan jabun yuikin:

—Ja junidan, yushin kushipamenkain, dunun pibia isin teneama kayabin!—akaibun

⁷janua jabia ianenwan kexa chaima natukan xanen ibu jawen kena Publio jawen mae ewapa kesuakea anua juxun nuku iwankin mapemashinxun ³ xaba jawen jiwetanxun nuku pimakin pewakin nuku duajaidawayu ⁸jatu jaska waitian Publion epa yuna inun chixu tenei dakaken Pablo yuiabu uin kaxun jau medabewanun Diosun kushipa yukaxuntan jau xuxanun jaki mepitan mea jawaida maianyan ⁹natukan Malta

anuxun ninkakin keyubauni jau eadi xuxawanun ika isin teneaibu bebidan bebidanaibu jatu xuxawai uxe dabe inun besti Malta anu nun jiweyuni.

Roma anu Pablo jikinikiaki, na janchadan

¹⁰⁻¹¹Malta anuxun nuku duajaidawaibun ui inun niwe chakabu mainkunkainaya niwe xaxu ewapa betsa Alejandría anuadi romano yushin ji dami dabe jatun kena Cástor inun Pólux xaxu jawen debukidi netanibu ma niwe pepa taeaya ja xaxuwen ana nun inai taekainaya nun jaya katanun tadi inun piti nuku inankuintan nuku jaya nichianbu

¹²janua jawen pukei kainkaini natukan ewapa Sicilia anu mae betsa Siracusa anu jikitan janua 3 díá xaba nun manayuaya ¹³janua ana kakin ianenwan patankubaini Italia mai pakea anu mae betsa Regio anu jikidiatan uxashini surkidia niwe pepa ana bei taeaya ana kai uxa dabetan janida jawen mabu mapemakatsi mae betsa Pozzuoli anu jikixun xaxu anua bututan ¹⁴janua Jesús ikunwainbuki nun nukua nuku pimayuaibun semana bestichai jatuki nun bayua januxun Romakidi main soldadobun nuku iyukin taewaibun ¹⁵Roma anuxun ikunwainbun nun juai bana ninkatan bai puchinin nukuki nukukatsi beaibun janua inanananmisbu jawen kena Apio anu nun jatuki nukua nukube ana bui chintubainaiibun mae betsa jawen kena Tres Tabernas anu ikunwainbu betsa beaibukidi nun jatuki nukudia jaibu ichapabu uin Pablo benimai shinan chankankin Dios kenajidawayu ¹⁶ana kai maewan Roma anu nun jikia juni bichinibu betsabu romano xanen ibubun jau jatu ana bichinumbun jatun soldadobu yunutan jakia Pablo jaska wama jau tadi medibi jiwe betsa anu soldado bestichai jabe

menexekedabetañ jau mekekubainxanun yunuabu

Pablon Roma anuxun jatu yusinkubainikiaki, na janchadan

¹⁷Jikishina uxa dabe inun besti binukainaya Roma anu judio xanen ibubu jiweabu jau jabe ichai benunbun Pablon jatu kena bea ma ichabu jatu yuikin:

—Enabuun, ekidi matu yuinun ninkakanwen. Nukunabuki inun nukun xenipabun beya en jawa wama kayabiaken Jerusalén anuxun ea achixun romanobun jau ea bichinunbun ea jatu meshui akimabu ¹⁸ea unanti watan jabun ea ninka jaska tenantimaken ea nichinpananbun ¹⁹nukunabu xanen ibubun ea betsa betsapawaibun enabube yuananain kayanamekatsi ikama jau nenuxun romano xanen ibujaida Césarn ea unanti waxanun Festo en yukayamaki. ²⁰Jaskawen taexun man ea uin ebe janchai benunbun en matu kenashinaki. Nun Israelitabun ja Diosun nuku yubani nun manakaibuwen taexun jaskadawen dabanan ea mane dispi chiwetameyawen soldadobe ea menexshinabumenkain, man eki nukuyununan—jatu wa

²¹ja ichabu betsan Pablo yuikin:

—Judea anuxun mikidi kene nuku bemabumaki. Ja inun, nukunabu jukin mikidi jawa chakabu nuku yuiabumadiki. ²²Na jaska Yusian bera min ikunwain mae tibi anuxun bechipaiama dananmisbu nun ninkabiamis jaskada min shinain nun ninkakatsi ikai—aka

²³jawatianda ana ichaxanaibu xaba katutan: —Janu nuku axanwen—abainshinabu judio ichapabu janu Pablo jiwe anu ichai beabu Dios xanen ibuaikidi yusinkubainkin Moisés inun Diosun jancha yuixunika betsabundi kenenibuwen Diosun Mesías Jesúskidi Pablon jatu ikunwanmakatsis ikin badi chai jatu tanamakin jatu yusinbaiaya

²⁴jaska Pablon jatu yusian jatiditun ikunwainbun jatidi betsabundi danankin ikunwanbumaken ²⁵jaskakidi shinanma jatunmebi itimaskatan inun bui beni taebainaibun Pablon eskakidi jatu yuikin:

—Xabakabi matun xenipabukidi Diosun Yushin Pepatun janchamakin Isaías yuimakin:

²⁶‘Kakain ja yudabu yuiditanwen.

Jabun jancha ichapa
ninkabiakubainmisbu jawa
unanma ixankanikiki.

Ichapa uinbiakubainmisbu jawa
uanma ixankanikiki.

²⁷Jau uinyamanunbun jatun bedu
bekua keskabuki.

Jau ninkayamanunbun jatun pabinki
pabepukua keskabuki.

Na yudabu buxka kushibun jawa
tapinkatsis ikabumaki.

Jau en jatu medabewakin
xuxawapanan ea danain
ea anu bekatsis ikabumaki’,

aka matun xenipabu yusintan Isaías nuku kenexuniki. ²⁸Jaskaken nukunabu ninkabumaken natian unudi Diosun judiobuma jatu mekekatsis ikai jau

jabun ninkanunbun janudi buxun jatu yusinxankanikiki, jawa niti ikamadan. Jaskanikidi matundi shinankanwen—jatu

²⁹Pablon jaska jatu yusian ninkabiatan jabe kemanamebaini inun buaibun

³⁰jiwe inanyuimabu pakakubainkin januxun badi dabe nichiijanu jaki bai buaibu dasibi jaska jabe janchakatsis iki buaibu jatu i pewakubainiki. ³¹Tsuan jawa nemama Dios xanen ibuxanaikidi xabakabi jatu yusinkin Diosun Mesías Jesucristo mekenankidi Pablon jatu yusinparekubainiki, tsuan jawa bika tenemamadan.

Teófiloon, jatiski, Jesúskidi jawen tsuma kushipayabu dayakubainibukidi janchadan.

Lucas

ROMA ANUABU PABLON JATU KENE BUMANIKIAKI

ROMANOS

Pablón jatukidi shinanikiaki, na janchadan

1 ¹Man Jesucristo ikunwainbu Roma anuabu en Pablo jawen tsumapan čman jaskadamenkain? ixun en matu kene bumai uindakanwen. Jawen kakape en chania akeakexanun jabistun jawen kushipaya ea wakin Diosun ea medibi watan ea yununiki. ²Bebunkidijaida ja dukun Diosun jancha medibi kenenibu anu jawen bakewen yubakanikidi jawen jancha yuixunikabu Diosun jatu kenemani nun unaiin. ³Jaska nukun Xanen Ibu kushipajaida, Diosun bake Jesucristodan, juni kayabi judiobun xenipabu Davidin baba kainxanaikidi Diosun jancha yuixunikabun kenenibu jayaki. ⁴Janua Jesús tenanbu mawashina jawen Yushin Pepabetan jawen kushipawen Diosun bestenwantan: “Nadan, en bake kushipajaida dasibi binuaki”, akin Jesucristokidi nuku xabakabi unanmaniki.

⁵ Jaskawen taexun Jesucristo en ikunwaniwen ea duawakin Jesúsun kushipaya Diosun ea waniken yuda betsa betsapa titibun jau jabundi Jesucristo ninkatan chibankin kenwanxanunbun jawen daya axunkin en jatu tapinmakubaunaii. ⁶⁻⁷Jadi man Roma anua jiweabun Jesucristo man ikunwainbudan, matu dikabiwen Dios

nuikin katunixun jawenabu medibi matu waikiki. Man jaska jiweabuwen taexun nukun Epa Dios inun nukun Xanen Ibu Jesucriston duawakin jau unanuma matu jiwemakubainunbunwen.

**Jesucristo ikunwainbu Pablón
shinankin jatuwen taexun Dios
kenwankubainikiaki, na janchadan**

⁸Ja dukun matu yuinun ninkakanwen. Jaska wakin man Jesucristo ikunwankin pe chibankubainaibu mae betsa betsapa tibi anuxun matukidi chanimisbuwen taexun Jesucristobe janchakin matu dasibikidi dayuikin en medabenan Dios en kenwankubainmiski. ⁹Jaska inun, Dios besti duawanun, iwanan, jawen bakewen nukun chakabu Diosun nuku buaxunkatsis ikai jawen bakekidi dasibi en kushipawen jatuki chanikunkauni matu jakimama matu ea axunkin Dios en yukakubainmis Diosun unainkiki. ¹⁰Jaska inun, matuki en bakatsi ikai jau Diosun jawen shinanen ea bexpawaxunxanun janu matuki ea bamakatsis ikin ea yunuxanai Diosbe janchakin matukidi en ea akubainaii. ¹¹En shinanan, matu uin kaxun en matu yusinkatsis ikaii, jau Jesús ikunjaidawai man kushipakubainunbunan. ¹²Jaska en matu yuiaidan, nun Jesús chibainbu nuku dasibi medabenamei nun juinti kushipanametidubuki, matubu inun eadan.

¹³En betsabu inun en puibuun, jaska judiobuma mae betsaa betsapa anu jiweabu en jatu yusimis keska wakin matukididi shinain man Roma anuxun Jesús ikunwainbu ana matu ikunjaidawamakin inun betsabun ikunwandiabuma Jesús jatu ikunwanmanun ika man Roma anu jiweabu en matu yusin kakatsis ikaii. Matu uinun ika en yubakabiakunkainaya jamapai betsaa betsapatun ea teawa matu anu en kadiamaki. ¹⁴Yuda betsabu tibidan, griegonawabu inun, griegobuma, unanepabu inun, unanepabuma Diosun ea yusinmakatsi ea yununiki. ¹⁵Jaska en shinainwen taea man Roma anu jiweabu anudi Jesúskidi kakape matu yusiin kakatsis iki en matukidi bepexea en shinan chankan chakayamaii.

Diosun kakapedan, kushipakiaki, na janchadan

¹⁶Tsuabunda Diosun kakape ninkatan ikunwainbu Diosun jabun chakabu buakin ana shinanma jawen kushipa paewen jawenabu jatu wamisxun mekepakexanikiki. Jaskawen taea ja dukun judio jatidibun ikunwankin taewanibuki. Januxun ja kachu judiobuma betsabundi ikunwandiakanikiki. Jaskaken Diosun kakape Jesucristokidi yuikin datan akin jawa jawen dakeama en jatu yusinkubainaai. ¹⁷Jaska inun, jawen jancha yuixunitatun Diosun kakapekidi kenkin yuikin: "Tsuabunda Diosun jancha ikunwankin chibainwen taea pepai jiwexankanikiki", aniki. Jaskawen taexun jawen bakekidi kakape Diosun jawen jatu mekekin jatun chakabu buanixun ja besti ikunwainbu jatu paxawaxanikiki.

Dios chibankatsi ikabuma ana Diosun jatu mekeamakiaki, na janchadan

¹⁸Yuda jidabi jiwebaunabu jatun chakabuwen chakabukubainkin jancha chanimawen jiwekatsi ikabumawen

taexun betsabun ikunwantidubun jau ninkayamanunbun chanima jancha junekin nemamisbuki. Jabun jatu nemamisbu Dios nai anu jiwea jatuki sinatakin natian jatu kupikin jabu tenemaikiki. ¹⁹Jawada Dioskidi unantidubu jabu Diosun unanmakin jamebi jatu uinmamiski. ²⁰Januxun Dios tsuan uintidubumabia Diosun mai damiwani anua jaska niti akama jawen kushipa inun jaska watanda dasibi pewa akeakekubainmis Diosun yudabu uinmaya jawada damiwani uinkin dasibibun Dioskidi xabakabi unantidubuwen taea tsuabuda Dioski meseama yuikin: "Dioskidi tsuan ea yusianmaki", iki chani chaka bestikanikiki. ²¹Januxun yuda ichapabun Dioskidi tapinbianixun jawen jancha danankin duawama inun kenwanma inibuki. Jakia jaki pechitan jatun shinanen besti chakabu shinain unainsmapakin ana chanima jancha tapintidubuma ikubainibuki. ²²⁻²³Ja Epa Dios kushipajaida mawatiduma ana kenwanma jabun shinan kushitan ja dami uintidukenwankatsi ikin juni mawatidu betsabun dami waibu tsuabunda ja dami bitan kenwainbu betsabun peiyabu dami waibu bitan kenwainbu betsabun yuinaka pitti inun pitima tae dabe inun dabeya dami waibu bitan kenwainbu betsabun nutawen xadaibu dami waibu bitan kenwankin jaska shadabu besti kenwankubainun ikin Dios danankin yuikin: "En unanepaki", ibiai unainsmapabu ipaunibukiaki.

²⁴Jaskawen taexun yudabun jaska shinain aki jiwekatsis ikaibu jawaki ana dakeama jau jabun yuda mekeama chakabukubainunbun jabun shinan chakabu inun jawada chakabuwakatsis imisbu akeakeaibu ana nemama ana jatu mekeama jatuki pechitan

Diosun jatu jenea jaska jiwenibukiaki.
25 Yuda betsabun Dioskidi jancha kayabi danantan chani jancha ikunwankin chibankin Dios kayabi ana shinanma jawada Diosun damiwani besti uinkin kenwankubainbukiaki. Jakia nun ikunwainbunan, nukun mekenika Dios jatu nuku damiwani kenwankubainankanwen. Jaskakidan.

26-27 Jaska chakabu besti shinankubainaibuwen taexun Diosun jatu jenekinan, yudabu ana bechipainamekayabima jatu chakabuki dakeama daketapaibu jatu uinkin anikiaki. Jawadawen yuda pepabu dakeaibu ana dakeama ainbuai bun junibu chutamakatsis ikama jakia jabe ainbu betsabe chutanamei itsai menamei ibunananbu, inun junibudi ainbuwen ana kemukin chutakatsi ikama jabe juni betsawen kemui jabe chutanameaibuwen taexun jau jaskai besti jiwekubainun bun Diosun jatu ana nemama jenekiaki. Jaska jiwei dakeisbumawen taexun jatu yuda isin betsawen tenemakin Diosun jatu kupikin taewaniki. **28** Jabun Dioskidi shinan chanima kayabi ana shinankatsi ikama ikubainaibuwen taexun jatu juintinin shinan chakaibu jaska bechiapai jiweaibu Diosun jabu ana nemamaki. **29** Eska tibi matawaibuwen taexunan, jawen atimapabudan, chutanamechakaibudan, yaushiaibudan, ja pewen jiweama chakabuwen jiweaidan, betsabu jatu jawada jayawen jatuki sinataibudan, yuda betsabu tenainbudan, detenameaibudan, chani chakabaunaibudan, bepadameaibudan, yuananaainbudan, jaskai jiweabuki. **30** Ja inun, xechakai jancha chakabumisbuden, jabun Dios danankin bechipaisbumadan, jawen nuibiabu benunun ikin tsua ninkaismadan, jamapai atidukidi keainbudan, chakabu betsabu betsapa

benawaidan, jaskakin jatu ibuan jancha danankin ninkaisbumadiki. **31** Jaska inun, jancha chanima ninkakatsi ikamadan, janchabiatan aisbumadan, tsuawen niusbumadan, tsua medabenanma jiwemisbuki. **32** Ja inun, jaskai jiwea jau jawen besti mawanunbunwen, Dios ibianiken jaska unanjaidabai ana jawaki meseama jabias chakabuwakubainkin betsabun jabias akaibu uin benimakubainmisbuki, jabu juni chakabu tibidan.

**Yuda dasibibu unantan Diosun chanima
jatu kupixanikiaki, na janchadan**

2 **1** Jaska chakabu tibiwen yuda betsabu ikai tsuanda uintant shinankin ja akin chitenun ixun man amis kasmai man atidudan, jabias chakabu man jaya matumebi man daketapatidubuki. Jabiaska tibi jabubetan man abiamiswen taeadan, jaskawen taexun xanen ibu bebunxun matu chiteaibu man jawa nematidubumaki. **2** Jamen tsuabunda chakabuwakubainmisbu kaneama Diosun unanti watan jatu kupixanai nun unaiin. **3** Jamen matunan, tsuabunda chakabuwadiaibu uinkin man jatu kunyan akatsis imisbuden, matundi jabiaskadi chakabu man adiamiswen taexun unantan Diosun matu kupixanai: “En paxatiduki”, ikin shinanyamakubainkanwen. **4** Jakia Dios pepajaida man dananbiaya matun chakabu tanabiakubainkin jau ana ja shinanma Diosun buanun tsuabuda jakidi kakin shinan betsabu watan man yukaxanun bun matu shinain matuwen nuikin jatianda man jakidi yukaxanai jin jin ikama Diosun manakubainikiki. **5** Jaska inun, man jatiditun chakabu betsabu betsapa akin jenekatsi ikama Dios shinanma chakabu ibubis matsan akeakebainkin Dios

sinatamamisbuwen taexun yudabu dasibi unanti waxanaitian ana manama Diosun matu kupixanikiki.⁶ Jaska yudabu tibi jiwestun amisbuwen taexun Diosun jatu kupia akeakeaxanai matu yuunun ninkaidakanwen.⁷ Diosun jau nuku kenwanxanun jiwekuinkatsi nun jatiditun jawen jancha chibankin jeneama pepawakubainaibu pepawen manakukin mekekin nai anu Jesúsbe Diosun nuku jiwekuinmaxanikiki, ikibi imakanan, nun jabu jaska jiwekatsi benamisbuden.⁸ Jamen yuda betsa pubein sinatai ja idabenamekin Diosun jancha chanima danankin ja chibana chakabu betsa betsapa wakubainmisbu jabuki Dios sinatakin kupixanikiki.⁹ Jaska wakin Diosun jatu isin tenemakin nuitkaajida wakin keyuxanikiki, ja dukun jabu judiobun chakabu wamisbu kopi taewatan januxun jabu judiobuman chakabu wadiamisbu kupikinan.¹⁰ Jakia man jatidi pe jiwmisbu kenwankin niti akama unanuma Diosun matu jabe jiwekuinmaxanikiki, ja dukun judiobu manakutan januxun judiobuma jatu manakudiakanan.¹¹ Januxun Diosun jatu xabakabi unanti wakinan, yudabu chakabu inun pepabu dasibi uinmixun jabias shinanwen besti jatu unanti wakin kanetidumaki.

**Dasibi yunuti unainbu inun
unanbuma Diosun jatu unanti
waxanikiaki, na janchadan**

¹²Dasibibun Diosun yunuti inun jawen nemati jancha Moisin keneni jaska jayama dabanen unanma chakabuwakubainaibu jawen yunuti inun jawen nemati jancha jaska yununi Diosun shinanma jatu kupixanikiki. Jamen betsabun Diosun yunuti inun jawen nemati unanbiakin chibana chakabuwakubainaibu jawen yunuti inun jawen nemati jancha shinankin

Diosun jatudi kupixanikiki.¹³ Ja inun, tsuabunda jawen jancha ninka bestikin Dios benimawatidubumaki, jawa chibanmadan. Jakia tsuabunda jawen jancha yununi ninkatan jabias chibankubainmisbu jatuwen benimakin jatun chakabu ana shinanma Diosun jatukidi pe shinanxanikiki.¹⁴⁻¹⁵ Tsuabuda jatun shinan chakabu wakatsi ikama Diosun Moisés yusinmani keska jatun juanti medan ja kene nea keskaxun jatu unanmaya chanima jawa jatun shinan medan jawa chakabu jayabuma jatu unanmamiski, jaska neatun jatun shinan ibubis chakabuaibu jatu ja akin inun jatu nemakin unanmakinan. Jaskawen taea judiobuma Diosun Moisés yusinmani kene jayamabia jatun beyawen jawada chakabu unanmisbu inun jawada pepa amisbu jaska Diosun Moisés yusinmani unain keskakin chibankubainmisbuden, jabu jatunmebi jatun yunuti inun jatun nemati jaya keskabuki.¹⁶ Jaskawen taea janu badi jawen jeneaitian Diosun Jesucristowen taexun jaska judiobu inun judiobuma jawada chakabu inun pepa june akubainmisbu dasibi jatu unanti wakin keyuxanikiki. Na jaska waxanaikidi jawen kaka pepa jawen meketi Jesucristokidi en jatuki chanikunkainai.

**Jawen yunuti inun jawen
nemati Diosun Moisés judiobu
yusinmanikiaki, na janchadan**

¹⁷Man judiobu kenmis matu yuunun ninkakanwen. Chanima Diosun matu katuxun jawen jancha Moisés matu kenemaxuni jaki chiti ika matun Dioswen man kenmiski.¹⁸ Jawada Diosun bechipaiai unankin jawen jancha man unainwen taexun jaska janchan matu yusian tapinkin man pe katukubaintidubuki.¹⁹ Januxun matunan, yuda betsan juni bekun iyumis

keska wakin yuda betsabun Dioskidi unandiabuma yusinkin man jatu tapinmatidu man shinandiaii.²⁰ Jaska inun, jawen yunuti inun jawen nemati Diosun Moisés yusini man jayawen taexun dasibi jancha kayatapia unankin jabun shinan benua inun jabu juinti babubu man jatu tapinmatidubudi man shinandiaii.²¹ Jakia jaskabia yuda betsabu yusinkin mextanmabiai ḷjaskai matumebi man yusinanaismamen? Jaska inun, yuda betsabu yumetsukidi jatu yusinkin chitebiai ḷjaskai ibubis jatu bepadantan man yumetsudiamismen?

²² Jaska inun, junibu jawen ainmabe jau chutanameyamanunbun, ainbuabudi jawen benemabe jau chutanameyamanunbun, iwanan, nemakin jatu yusinbiamis ḷjaskakin kanekin man jabiaskadi akin chakabuwamismen? Jaska inun, yushin dami betsabu kenwanma man dananajaidabiamis dami itsa jawen kenwanti templo anu mabu beabu mania yuda betsan bitan jawen pei binun itan inananain man yumeatumiski.

²³ Jaska wakin Diosun yunuti inun jawen nemati janchawen kenbiai jawada Diosun bechipaiai akama ikunkainkin matun shinan man tapiskuamawen taexun yuda betsabu Dioskidi man jatu dananmamiski.²⁴ Jaska Diosun jancha yuixunikatun kenekin yuikin: “Man jaska jiweniswen taea judiobuma Dioski meseama en jen imakin man jatu kaxe paepawamaii”, jaska kenen i keska jabias kanekin man jatu amakubainaii.

²⁵ Jaska inun, dasibi jawada Diosun Moisés judiobun xenipabu jatu yusinmani jabun chibankin yuikin: “Jawada Diosun bechipaiai dasibi nun chibankubainaii”, ikin matun jina kubichi man mexteaidan, ja chanima man pewaai. Jakia jabun matun jina kubichi mextebiatan jawada Diosun

judiobun xenipabu yusini jabun man chibankin matun jina kubichi jamen mextekeyabia man jawenabu kayabimaki, man jawen jancha chibankinwae taeidan.²⁶ Jaska inun, jawada Diosun bechipaiai judiobuman pe chibankubainkin jawen yunuti jaya keska jabu jatun jina kubichi mextekeumabia Diosunabu kayabi jatu wamiski, jina kubichi mextekeya keska wakinan.²⁷ Jaska inun, jawada Diosun yusini man judiobu jayabiabun ja ninkabiakin chibankin man kaneabun januxun judiobuman jatun jina kubichi mextekeumabia Diosun yusini jaya keskakin jawada Diosun bechipaiai chibankubainmisxun matu binujaidatan matu jabun unanti waxanikiki.²⁸ Jaska inun, judiobun beya chibain jawen jiwekin jabun bakebu jatun jina kubichi mexte bestimisbu judio kayabi itidubumaki, bemakis bestidan.²⁹ Jakia judiobu kayabitunan, uke medan jawen shinanwen Dios chibankinmisbuki. Diosun Yushin Pepawen jatu kaya wakin pewakubainmiski, jawenabu kayabi wakinan, bemakis besti jawen yunuti chibankin jatun jina kubichi mextekeea bestiwenmadan. Tsuanda jaskabudan, Diosun jatu uke medan unainkiki, bemakis junibun uiain keskamadan.

3 ¹Jaskawen taexun judio jatiditun ea yukakin: “Dasibi Diosun yusini judiobun nun unankin chibankinwae taexun Dios benimawakin ḷjudiobuma nun jatu binuamen?” ea wamisbuki. ²Xabakabi matu yuunin ninkakanwen. Chanima ja dukun man judiobu jawen jancha Dios man axuntidu matuki chiti iniki. Matu jaska wani pejaidaki. ³Ana jabiaskadi jadatutunda ea yukakin yuikin: “Judiobu betsabun Diosun jancha ana chibankinwae danainbuwen taexun, ḷjawada Diosun nun judiobu nuku yubani betsabu waxanikenkain, nuku danankinan?” ea wabu: ⁴“Jaska man

shinantidubumajaidaki”, akin en jatu yuimiskidi matu yuinun ninkakanwen. Dasibi yudabu jawada yuii yubakatan chani chakabiamisbun Diosun jawen jancha kayabi matu yubaniwen taexun Dios chani chakakin betsa waismadiki. Jaskawen taexun Diosun jancha yuixunika Davidin Dios dayuikin:

“Diosuun, tsuanda min pepawen
jancha kaneama mikidi yuimisdan,
min jawa kaneisma unanxankanikiki.
Miki ja ibiamisbu
min jatu binu keyuxanaii,
janu yudabun mia unanti waitianan”,
itan keneniki.

⁵Yuda betsan shinan chakai janchatidu keska matu shinanmanun ninkakanwen. Yuda betsan ea yukakin: “Nun chakabu betsa betsapa wamiswen taexun Diosun jawen yubakawen nukuwen nuibiai ɢjaskai Dios pepama ikaskin nuku kupimismen? Jaskakenan Diosdan, chakabudaka”, ikaya ⁶en Pablom kemakin: “Jaskatidumajaidaki. Diosun yudabu kupikinan, kanetidumaki. Jaskawen taexun Dios pepa bestiwen taexun yuda dasibi mai jidabi anu maniabu jatu unantan jabun chakabu inun jabun pepawen jatu kupikin keyuxanikiki”, aka ⁷ana yuichakakin: “Jaskakenan, nun chakabuwaya jaska Diosun pe bestiwakubainmisdan, yuda betsabu nun jatu unanmaya jabun Dios kenwanmisbuwen taexun ɢjaskakin nun chakabuwakubainaiwen Diosun nuku kupixanimenkain? ⁸Jau yuda betsabun Dios kenwanunbun nukubunan, chakabuwadiaku bainankanwen”, ikaibu jadi shinan chakakin yuiaibulen taea Dios jatuki sinatakin chanima jatu kupixanikiki. Jakia nuku yuain: “Pablo inun jawen jaibuaibun jaska yusinmisbuki”, iki jabu jaskakinan, Diosun kupiti ibubis bi yupukunankanikiki.

Tsuabu pepamakiaki, na janchadan

⁹Jaskakenkain nukubu judiobunan, ¹⁰Dios benimawakin jabu judiobuma

nun binuamen? Nun jaskamajaidaki. Chakabuwakin nun judiobu inun matu judiobuman nun jamapai kemu paewen chakabukin nuku dasibibun jatu uinmachakakin nun kanemisbuki, chakabun nuku tsumawen taedan.

¹⁰⁻¹²Ja jaskakidi jatunabukidi Diosun jancha yuixunikatun jabukidi yuikin:

“Mai jidabi anu yuda bestichaitun
Dios jaibu wanun ixun benamis
jayamaki,
tsua nun bestichai kaneisma pepa
jayamadan.

Tsua unanepamaki. Tsuan Dioskidi tapinkatsi ikamaki. Dasibibu bai chakabuwen buidan, chakabui atimapai jiweabuki. Tsuan pepajaida aki jiweamaki. Tsua yuda bestichai pepa nun bechitidumaki.

¹³ Yuda mawa pukintan bepuama
janamisbu keska
jawen tepun pisi maiyai keskaki,
jawen jana padananain chani
matadan.

Jawen kexawen dunun pae adua
keskaki.

¹⁴ Jawen jaxpawen yupukunain kunyan
imiski.

¹⁵ Jawen taewen kushikainkin yuda
betsa detekin
jimi chada chada imamiski.

¹⁶ Janida niake niakekin
pubenkin nuitapawakin jawada
yamawamiski.

¹⁷ Jani unanuma kati bai tapia
jayamaki.

¹⁸ Diosun uinbiaya jawen bedubi
dateismaki”,

jatu jaska watan kenenibuki.

¹⁹ Jaskaken Moisés inun Diosun jancha yuixunikabun yusini unanjaidabianibu: “Man pepaki”, akin Diosun jatu jaskakidi shinankin yuiamaki. Jakia jaska yuda dasibi mai jidabi anuabun

chakabuwakin nun kanemis nuku unanti waxanai dasibibu Dios bebunua nun jawa janchatidumaki. ²⁰Diosun jancha kenenibu tapinmisxun: “Eanan, en jawa kaneismaki”, ikin yui Dios unanti wamai pepatidubumaki. Jakia jaska Diosun jancha kenenibudan, jaska jawen nun chakabuwakubainmis dasibibun nun jawen besti unantidubuki.

Jesús nun ikunwainwen taexun Diosun nuku pepawamiskiaki, na janchadan

²¹⁻²²Eска wakin Diosun yudabu pepawamis xabakabi jatu uinmani matu yusinun ninkakanwen. Judiobu inun judiobumadan, tsuabunda Jesucristo ikunwain nukun chakabu jatun nuku buaxuniken: “Jaska Diosun bebunkidi yubani tsuabunda nun ikunwainbu besti chakabu jayama pepabuki”, ikin Diosun nukukidi pe shinamiski. Jaskakidi Diosun jancha Moisin kenenin inun Diosun jancha yuixunikabun kenenibudan, jabiaska daben shinan jakidi kenenibu kaneama ini uintidubuki. ²³Ja inun, yuda dasibibun chakabuwakubainmisbuwen taea jaskatan ibubis Dios pepaki nun tsua kematidubumaki, kanei jiwei peisbumawen taeadan. ²⁴⁻²⁵Dios nun jawa waxunkin daewatidumabiaken Dios duapatun jawen pepa jatu uinmakin jawen bake jawa yaushiamma jamen inankuinkin Diosun Cristo jatu nuku tenanmaxunkin jawen jimi jabawanidan, Jesucriston nukun kupiti biniwen taexun tsuabunda man Cristo ikunwain jawen nukun chakabu buati waniki. Jaska shinankin tsuabunda nukun chakabu nun buamakatsis iki jaki chaniaya chanima Dios pepa kaneismatun nuku unanmakin nun jawen bake ikunwainwen taexun besti nukun chakabu buaxuntiduki. Cristo mawakin nukun chakabu besti nukuna

buaxunama jakia uatian jiwxun ikunwanibudi jatun chakabu jatu buaxundianiki. ²⁶Nukuwen nuikin jin jin ikama nuku manamiswen taexun na jabiatian jaska Dios pepa bestitun matudi pepa wakin nuku unanmakin tsuabunda Jesús ikunwainbu bedu mestenwanmakin natian Diosun nuku unanmadiakubainikiki.

²⁷⁻²⁸Jaskaken nuku jaska wakubainai ninkakanwen. Diosun nuku pepawaidan, jawen yunuti inun jawen nemati nun chibankubainmiswen taeama jakia Criston nukun kupiti biniwen taea tsuabunda nun ja ikunwain jaskai pe ikasi jiwea nun kenmis Diosun shinanma jawen pepawen besti nuku jawenduawamis nun unaiin. Jabiaskadi Diosun yunuti inun jawen nemati nun chibankubaini ibubis pepakin nun binutidumaken jakia jaska Jesucristo nun ikunwainwen taexun Diosun nuku pepawamiski. Jaskaken jawada pepa ibubis nun amis shinain ana nun kentidubumaki.

²⁹⁻³⁰Ja inun, ḷnukun mekenika Diosdan, judiobuna bestimen? ḷJaskawen taea yuda dasibi xukua betsa betsapa jiwebaunabu jatu mekeismamen? Jaskamaki. Chanima dasibi Jesús ikunwainbu nuku mekemiski, judiobu inun jancha betsa betsapa tibiyadan. Nukun mekenika Dios bestichai jayaki. ³¹Jaskaken tsuabunda Jesús ikunwantan jawen yunuti inun jawen nemati betsa wakin nun maewamaki. Jabiawen nun matu yusinkubaini. Jakia ja kene jatu yusini unankin jaska Diosun nuku pe jiwemakatsis ikai xabakabi ninkakin nun mestenwaiin, jadi Diosun jancha jaya betsa wamadan.

Diosun yuba jancha Abrahamnen ikunwanikidi yusinikiaki, na janchadan

4 ¹⁻³Diosun jancha yuixunikatun nukun xenipabu Abrahamkidi kenen eska yuiaki. Diosun jancha

Abrahamnen ikunwaniwen taexun Diosun shinankin: "Abraham juni pepaki", akinan, Abrahamnen Dios ikunwankubainai anikidi matu yuinun ninkakanwen. Abrahamkidi Diosun shinankin: "Abraham pepai jiwekunkainaiwen taea juni pepaki", ikaya Abraham ibubis kenkeaniki. Jakia pepai jiwekunkainaiwen taearma jakia jawen janchawen Diosun yubai ninkakin tapintan ja besti Abrahamnen chibankubainiwen taexun Diosun Abrahamkidi pe unanti wakin shinaniki.

⁴Jaska inun, tsuabunda yuda betsa dayaxunabu jatun daya pei inankuin keska jamen inanma jakia jatu dayamatan dibixun pakakin inanmisbuki. ⁵Jamen tsuabunda Dios duawanun, iwanan, jatun juinti medan Dios ikunwainbu Diosun jatun aka pepawen jatu pepa wama jakia jatuwen nuikin yudabun jatu shinan betsa wawen taexun jatu shinan chakabu jatu buaxuntan: "Ja yuda pepabuki", akin jaskawen Diosun jatukidi shinankubainmiski. ⁶Jaska pepa inun chakabu yudabun amisbukidi tanama jaska Diosun bechipaiai aki pepakin Dios unanti wamamisbukidi Davidin ibubis unankin shinain janchai:

⁷"Tsuabuda jatu chakabu Diosun ma jatu buaxuntan
ana shinanmaken shinan
chankanmisbuki.

⁸Tsuada jawen chakabu Xanen Ibu
Diosun ana jakidi shinanmaken
ja yuda benimadiamiski",
iniki, Davidan.

⁹Na Davidin eska kenekinan,
çjudiobun jatu beya chibankin
jatu jina kubichi mextemisbukidi
besti animen? ¿Jabu judiobuma
dikabiki akama inidaka? Matu yuinun
ninkakanwen. Abrahamnen Diosun
jancha ninkatan ikunwankubainaiwen

taexun Diosun unanti watan yuikin: "Juni pepaki", anikidi kenekin en matu shinanmaxuki. ¹⁰Jakia çjatian Diosun Abraham jakidi pepa shinanimen? ¿Jawen jina kubichi ma mexteken animen? ¿Mextediamabiaken anidaka? Ana matu shinanmanun ninkakanwen. Jawen jina kubichi mextediamama Dios ikunwankubainaiwen taexun Diosun Abrahamkidi pe shinaniki. ¹¹Januxun Abrahamnen Diosun jancha ikunwainwen taexun unanti wakin jawen shinanmati wakin jawen jina kubichi mextenibuki, jaska ikai tsuabunda xabakabi jau unanunbunan. Diosun jaska waniken dasibibun Diosun jancha ikunwainbu Abraham jatun epa ikunkaintiwaniki, jabun jatun jina kubichi mextemisu inun jabun mexteabumadan. Jaska tibibu Diosun jatudi unanti wakin: "Yuda pepabuki", jatu waxanikiki. ¹²Jaska inun, jaska Abrahamnen jawen jina kubichi mextediamama Dios ikunwankubaini keska wakin judiobu inun judiobuma jadatubunda Dios ikunwainbuwen taea ja ini keskabu jabu dikabi jatu xenipabuki.

Diosun Abraham yubanikidi Pablo jatu yusinikiaki, na janchadan

¹³Jaska inun, jawen yunuti inun jawen nemati Diosun Moisés kenemadiama Diosun jancha Abrahamnen ikunwankubainaya Diosun Abrahamkidi shinankin: "Juni pepaki", aniwen taea jatiditun ja keskakin jawen bababun Diosun jancha ikunwankubainaibu mai jidabi jatu ibu wamakin yunuxanun, iwanan, Diosun Abraham jatukidi yubaniki. ¹⁴Ja dukun jawen yunuti inun jawen nemati jancha Diosun Moisés yusinmanikenan, ja besti chibankin jaska Diosun Abraham yubani bi bestitidubudan, jabun Jesús nun ikunwainbu jamen ikeanaii. Ja inun,

jaska Diosun Abraham yubani jawa kushipa pema idiakeanaii.¹⁵ Jamen jawen yunuti inun jawen nemati jancha Diosun Moisés yusinmani kaneaibu jatuki Dios sinatakin kupimiski. Jakia janu yunuti inun nemati jancha jayamaken jawawen taexun tsua kupitudumaki.

¹⁶ Jawada Diosun bechipaiai Abrahamnen ikunwankin ani keska wakin Diosun jawen jancha man ikunwainan, jawen jancha benutima wakin nuku mestenwanxuniki, jawa pakama jawen inankuin ikunwankin nun bixanunbunan. Ja Diosun Abraham yubani shinankin tsuabunda jawen yunuti inun jawen nemati nun chibankin Jesú nun ikunwainbu inun, tsuabunda Moisin jancha chibanma Abrahamnen ikunwani keskakin man ikunwainbu mai jidabi nuku yunuxanaidan, Diosun Abrahamwen nuku dasibi yubaxuniki, dasibi ikunwainbun xenipabu wakinan.¹⁷ Jaska inun, ja Abrahamnen ikunwankubainai Diosun yudabu mawa bestenwantidu inun jawen shinanen jawada shadabu dami jayadiama damiwamistun Abraham yuikin: "Yudabu betsa betsapabun jatun xenipabu en mia waii", iniken Moisin jakidi keneniki.

¹⁸ Jaska Abraham inun jawen ain Sara anua besti jatun juni bake kayabi inun jawen bababu midima tsuan tanatiduma jayatan yuda betsa betsapa xanen ibuxanaibu bebunkidi Diosun yubani anibujaidakin jaska shinanma Diosun jancha ninkatan manakakin jawa dateama Diosun jaska waxunxanai ikunwankin shinankubainikiaki.

¹⁹ Anibujaida 100 badi kemai mawatidubia inun bakewatidumabia jawen nuiama inun, jawen ain Sara yuxabujaida ma mawa kemadiaitun bake bitiduma jawen nuiamadi

Abraham jawen shinan babuama Diosun jawen juni bakekidi yubani ikunwankubainkin jawada Diosun axunxanai jawa jakimama mestenxun uinkin kenwankubainiki.²⁰ Diosun Abraham yubani axunxanai jawa shinan betsa betsapa wama inun, shinan dabeama manakin ana ikunjajidawakin Dios kenwankubainiki.²¹ Jaska Dios kushipatun yubanixun uinmaxanai Abrahamnen shinankubainai²² jaskai Diosun uinkin shinankin: "Abrahamnen ea ikunwainan, juni pepaki", anikiaki.

²³ Jaskawen taexun Diosun Abrahamkidi jatu kenemakinan, jakidi besti shinankin akama jakia yuda betsabukidi²⁴ inun nukukididi shinankin axuniki, jatu kenemakinan. Jabiatundi nukun Xanen Ibu Jesú bestenwani ja shinanwen nun ikunwanyan Diosun jawenabu nuku wamiski.²⁵ Jau nukun chakabu nuku buaxuni nukun Xanen Ibu mawanun Diosun yunua mawashina ana bestenwaniki, jau jawen taexun yuda pepabu nuku wakubainxanunan.

Jesús ikunwainbu Diosun jawen jaibuaibu nuku wamiskiaki, na janchadan

5 ¹ Jawen jancha nun ikunwainwen taexun Diosun nuku pepa wakin shinankubainikiki. Nukun Xanen Ibu Jesucriston Diosbe nuku jaibunamemaya unanuma jiwei nun benimakunkainaii.² Janua jaskawen nun benimaibudan, chintuanma Jesucristo ikunwain Diosbe jaibunamei nun jiweabuki, ikisdan. Ja inun, na jabiatian bestima jakia betsatiandi Diosbe jiwei jawen kushipaki nukutan nun jawenduaxanaii, ikibi ikidan.³ Jaska bestimaki. Natian Cristo nun ikunwainwen taexun jamapai mei nun bika teneaiwendi Diosun jawen kushipa nuku uinmakubainaien jawen shinan chankain nun chintuanma nun kushipakunkainai nun unaiin.

⁴Diosun nuku kushipa wakinan, jaska shinain keska nun akaibu nukukidi pe shinainkiki. Januxun Diosun kushipa nun jayawen taea jaska nuku yubani manaidan, nun benutiduma nun shinankubainaii. ⁵Jaska nun manakatidu Dios nukuwen nuimis nuku unanmakin jawen Yushin Pepa nuku inan jawen taexun Dios ikunwakin chibankubainkin jaska nuku yubani manai jamen nun manakamaki. Jaska shadabuwen taexun jamapai bika nun teneaidan, jawen taexun Dios nun kenwankubainaii.

⁶Yuda dasibbu Diosun nuku kupinun ikunkainaya jaska ibubis paxai nun meketidubumaken jatianda janu Diosun Cristo yunua taxnitan yudabun Dioskidi shinanma chakabukubainmisbu jatun chakabu dasibi Criston jatu bua keyuxunun ika debuniki. ⁷Tsua jaskadiai yuda betsawen taea jawen nuikin jawen kupiti bixuin: “Ea awe”, ikidan, tsuan jaska shinantidumaki. Jakia yuda betsya pekunkainai jawa kaneisma tenanun, iwanan, ichakawaibu tsuandi jawen kupiti bixuin mawaxutidumadiki. Yuda betsabu medabewakubaunmis nuikipa tenanun, iwanan, ichakawaibu jawen kupiti bi yuda betsya jawen dabanan iki madiastun bixuin mawatidudaka. ⁸Jaska keska binumakin Dios dasibibuwen nuikin nuku bechipaiai nuku unanmanidan, dasibbu nun chakabu jusia jiwebiaken ja shinanma Diosun Cristo yunua taxnitan nukun kupiti nuku bixuin ja besti nuku mawaxuniki. ⁹Cristo mawakin nukun kupiti ma nuku bixunken Diosun nukukidi yuikin: “Man ana chakabu jayamaki”, iniwen taea Cristo Xanen Ibjajaidai janu jawen jenei yudabu kupinun ika juxanaitian Dios nukuki sinatabiamis jawen kupiti nun jawa ana jayamajaida ixanaii, Cristo nukuwen jiwekunkainkin nuku

paxawamiskenan. ¹⁰Jaska inun, Dios dasibi yudabuki sinataya nun jabe jaibunamediamabiaken jawen Epa daewakin nukun kupiti nuku bixuin Cristo nuku mawaxunkin nukun chakabu bua keyukin ana shinantima watan pepa keskabu nuku waniki. Jawen bake jiwekunkainkin chانيا nuku mekexanikiki, nun ma Diosun jaibaibukenan. ¹¹Natian nukun Xanen Ibu Jesucriston jawen Epa Dios jatun nuku jaibu wamakin daewamani unanuma jiwekin chانيا jawen taexun benimakin Dios nun kenwankubainaii.

Adán inun Cristokidikiaki, na janchadan

¹²Mai anua ja juni bestichai ja dukun Diosun damiwaxun nemabiabaina ninkama chakabu jikimakin tateskin taewaken jawen taea jau mawaxanun Adán anibuai Diosun kupikin nemama inikiaki. Jaska waniken yudabu dasibi Adán keskadiai Dios ninkama kanemisbuwen taea anibui inun yuxabui mawadiakubainmisbuki, Adán ini chibainan. ¹³Ja chakabudan, ma yudabu anu mai anu jaya inikiaki. Jawen yunuti inun jawen nemati Diosun yunukin jayawadiamabia ja yudabu chakabuaibu jatun chakabu shinankin Diosun jatu kupikubainikiaki. ¹⁴Jaskaken Diosun Adán damiwaxun jadi jiwemani anua inun janu Moisés jiwenitian Moisin Diosun jancha yudabu yusinkin taewadiama jawen yunua keskawen chakabui yudabu ibubis mawakubainibukiaki, Adán keskakin Dios ninkama inun chakabu betsya betsapa wakubainidan.

Ja dukun juni Adán Diosun damiwaniki. Jatun chakabuwaniken janua juni betsya pepa Adán binua ja kachu jau juxanun Diosun yubani juxun jatun jiweti bai bena nuku waxuniki. ¹⁵Ja Adánen chakabu taxnimaniwen

taeadan, Diosun jawen aka nuku unanmaidan, jaskasmaki. Ja juni bestichaitun chakabuwaniwen taea jaska keskadiai ja chibain ichapabu mawakubainibuki. Januxun Diosun jawen aka betsa nuku inankuinkin juni bestichai Jesucristowendi ichapa binumaniken taexun ichapabudi pewakin jatu medabewaikiki, jawenabu jatu wakinan¹⁶ Ja inun, Diosun nuku inankuini inun jaska Adánen chakabuwani ja dabe jaskas dabemaki. Juni bestichaitun chakabuwaniwen taea dasibi yuda betsabudi chakabukubainmisbuki. Jaskawen taexun yuda dasibibu jatu kupixanai Dios dibiabu keska manakanikiki. Jabiaskabiaken jatidi yudabu chakabubiakubainaibu Diosun jatu duawakin tsuabunda jawen bake Cristo besti ikunwainbu jabu kupiama: “Jawa chakabu jayama pepabuki”, iwanan, jatukidi pe shinamiski.

¹⁷Janua Adán juni bestichaitun kanekin chakabuwaniwen taea jabiaskadiai yuda dasibi mawadiakubainmisbuden, chanimaki. Jakia Dios nukipatun Jesucristo juni bestichai nuku jamen inankuini jabun nun ikunwainbu duawakin Diosun nuku pepabu waya jawada Jesucriston nuku axunkin binumaniken taexun jiwea bena bitan ja juni betsa Cristonan, dasibibudi medabewakin jatu binumaxuniki.

¹⁸Jaskaken juni bestichai Adánen chakabuwanidan, jawen taea jatun kupitiwen jau mawakubainxanunbun yuda dasibibu Diosun jatu yupuniki. Jabiaskadi wakin juni bestichai jawa kaneismatun nukun kupiti nuku bixundiai mawaniwen taexun yuda dasibibun nun ja ikunwainbu Diosun nuku pepawatan jabe niti akama nuku jiwekuinmaxanikiki. ¹⁹Jaska inun, juni bestichai Adánenan, Diosun

nemati chibanma iniki. Jabiaskadiai yuda dasibibu Adán ini keskabuwen taexun: “Yuda dasibi chakabukin jabias chibankanikiki”, iwanan, Diosun jatukidi pe shinainskabi. Jakia juni bestichaidi Jesucristonan, jawada Diosun yunua chibankubainiwen taexun yudabu ichapabundi Cristo chibainbu jatu medabewakubainai pepabun chibankanikiki.

²⁰Janua jaskai yudabu chakabu bestiwen jiwei mesei atimapajaidakubainaibus Diosun jawen yunuti inun jawen nemati nukun xenipabu Moisés yusinmakinan, ana jatun chakabu ewawati waniki. Janua chakabui pikubiaibus Dios jatuwen nuikin jatun chakabu binumakin jawen pepajaida jatu unanti wamakin jatu duawaniki. ²¹Chakabu jikinixun ja xanen ibukin yudabu tenankubainmiski. Jaska keskadiai Dios xanen ibukinan, jawen nuikipawen jawen bake Jesucristowen taexun jawenabu nuku wakin: “Ja enabudan, pepabuki”, ikin nuku jiwekuinmaikiki.

Jesús ikunwain nun nashiadan, nun jabe mawa keskakiaki, na janchadan

6 ¹Janua yudabu chakabuwakin Diosun yusian chibankubainabumawenan, nukunan ja shinamka yuikin jatun Dios pepabia kemain jau ana xabakabi jawen duapajaida nuku uinmanun nukubunan, ¿chakabuwakin jeneyamakubainankanpa? ²ikin jaskakidi shinain janchatimajaidaki. Jakia tsuada ma mawa maiwabu ana chakabuwatidubuma keskakin Satanásan padanti jancha chibanma dasibi nun Jesucristo chibainbus nukun chakabu jenetan nun ana chakabuwen jiwekuinaintidubumaki. ³Jaska inun, Jesucristo nun ikunwankubainaya yuda

betsan nuku nashimabudan, Jesúski nun dasia jabe mawani keska Diosun nukukidi pe shinamnis ɿmatunan, man unanmamen? ⁴Ja inun, nuku nashimabudan, Cristobe nun mawa keska nuku jabe maiwanibu keskaken nukun shinan chakabu putai nun jiwei benaxanun jawen Epa kushipatun Jesucristo bestenwani keska wakin jiwea bera betsajaidawakin nuku bestenwan keska wamiski.

⁵Nuku nashimabu Cristoki dasia nun jabe mawani keska ana Cristo besteni keskaidan, jiwea benawan nun jawen jiwekunkainai. ⁶Ja dukun nun jawen jiwechakani xeni Cristobe cruzki netantan nun jabe mawani keskaki. Nun jaskaya nukun shinan xeni Diosun nuku betsawamaken chakabun nuku bexetan jawen tsumawakin ana nuku yunutidumaki. ⁷Janua tsuada mawakenan, ana jaskatan xanen ibukin chakabun tsumawatan yunutidumaki. ⁸Nukubudan, Cristobe nun ma mawani keskawen taea chanima dateama nun jabe ana jiwekuinkunkainxanai nun unaiin. ⁹Ja inun, Cristo mawatan ana besteni ana mawatiduma nun unandiaii. Ja yushin padanananmistun ana tenankin maemakin ana binutidumajaidaki. ¹⁰Ja inun, Cristo bestiwai mawakin dasibun chakabu betsawaspa binu keyuniki. Natian jawen jiweawen Dios besti duawanun ika jabe jiwekunkainikiki. ¹¹Jaskawen taea matundi shinan bera wai mawa keskatan dasibi chakabu jenebaini Jesucristoki dasitan Dios benimawanun ika jaskakidi besti shinain jiwekubainkanwen.

¹²Jaskaken matun shinan chakabu kemuwen jau matu tsumaxun jamapai betsawaspa chakabuwen jau ana matu niniyamanun nemakubainkanwen, ana ja uin man kemuai chibanmadan.

¹³Jaska inun, matun yuda ana chakabu tsumawamayamakanwen, ja jamapaiwen nukun yuda jawen chakabu watimakidan. Eska wakinan, matun shinan pe mekekin matun yuda jidabi Dios inankin mekemadiakubainkanwen. Ja inun, yudabu mawatan ana bestean keskatan matun yuda pe mekekin matun jiwea Dios inantan pepaxunkubainkanwen, matun yuda jidabiwen Dios duawakinan. Jawa kaneama ja bebuxun pepakin akubainkanwen. ¹⁴Man Cristo ikunwanyan Diosun matu pepawaiwen taexun chakabun matu ana bexetan tsumatidumaki. Jaska inun, Dios duawanun, iwanan, jawen yunuti inun jawen nemati Diosun Moisés yusiniwen matu ana mekeamaki. Jakia Dios duapatun matu ma mekeikiki, man jawen daya akaibudan.

Chakabu jenebain pepatikiaki, na janchadan

¹⁵¿Jaskai jadidi janchamisbumen?, eska yuidan: "Jaskakenan, Diosun nukun xenipabu jawen jancha yusinitun nuku ana tsumama jakia jawen bake nun ikunwainwen taexun nuku duawakin nukun chakabu buaxanaidai, nun chakabuwaidean, jawamaki. Jamapai chakabu betsawaspa anankanwen", iki man yuinanmemisdan, jaskatimajaidaki. Matu yusinun ninkakanwen. ¹⁶Yuda betsawaspa betsawaspa tsumawamakin inan januxun jawen xanen ibu ja besti jau dayaxunkin jawen yunua besti axunmisdan, man unaiin. Jakia jabiaskadi wakin matun chakabun matu tsumawaken jaskai ja chakabu chibain man jawen mawa kayabi man benuxanai. Jakia jaska binumakin Dios man ninkakin chibain jawen jaibuabu matu wakin jiwekuinmakin jawenabu matu waxanikiki. ¹⁷⁻¹⁸Ja dukun chakabun

matu tsumawakin taewaniki. Januxun Diosun matu medabewaya nun matu yusinkubaina ninka pewatan matun juinti jidabiwen nun matu yusiai man ikunwaniki. Natian ana chakabu dayaxunama janua kainkain Dios dayaxunkin pe besti man axunkubainaii. Matu man jaskai ninkai juinti shinan chankankin Dios en kenjaidawakubainaii.

¹⁹ Ja inun, dasibi man tapin keyudiamaken matu xabakabi yusinkin jancha bikamawen matu yusinun ninkakanwen. Jawada chakabu pepama Diosun dananmis betsa betsapa anun ika jawen kemui matun yudawen chakabu idumai man atimapakunkainiki. Jakia jabiaskadi wakin matun yuda Dios inantan pepakin Dios dayaxunkubainkanwen, jawenduai pepakinan. Jaska wakin matun chakabu putai tadi medibi paxkatan man pe besti jiwekunkainxanaii, Diosunabuidan.

²⁰ Jaska inun, chakabun matu tsuma wayukenan Diosun jaska bechipaiai shinanma man jiwekunkainiki. ²¹ ¿Jawen jaskati man ikunkainimamen? Ja chakabun yudabu jatu debuwamis jawen benuti bai man chibankubainimadan, natian shinan betsa watan man jawen dakeaii. ²² Jakia chakabun matu tsuma wapauni man ma jeneima jakia natianan, bai pepa bechitan jawama Dios besti man dayaxunkunkainkatsis ikaii. Jaskaken na jaska pepa Dios man dayaxunaidan, jiwekuian pepa man ichawaii, natian man jawen medibi jiwekunkainai inun atimas jawen jenekin jiwekuianwen jawen manakukin Diosun matu inanxanikiki. ²³ Jaskaken tsuabunda chakabuwakubainmisbu jatun kupiditan, Diosun meketi jayama mawa kayabi bixankanikiki. Jakia nukun Xanen Ibu Jesucristo nun ikunwain nun jaki dasiken jawen taexun Diosun nukun jiwekuinti pepa inan nukun Xanen Ibube dasitan nun jabe jiwei ikibi ixanaii.

Jawen yunuti inun jawen nemati xenin ana nuku tsumamakiaki, na janchadan

7 ¹En betsabu inun en puibuun, Diosun yunuti inun jawen nemati man unanjaiddaii. Jaskawen taexun ja Diosun yununiwen xanen ibubun yunukin nemakin jatu mekekinan, jabu mawabu akama jakia jiweyuabu besti yudabu yunutidu man unandiaii. ²Jaska ainbu beneyakidi miyuiwen matu xabakabi yusinun ninkakanwen. Diosun nuku yunukan: “Tsuabuda beneyabu jawen bene jiweyuken jau jabe besti jiweyukubainunbunwen”, nuku waniki. Jaskaken ma jawen bene mawaken ainbu ana tsuan tsumamaken bene betsa jayakatsis iki beneyatiduki, Diosun ana nemamadan. ³Jaska inun, jawen bene mawadiama ja ainbu juni betsabe uinanain atiyai chakabumisbuki. Jakia tsuada jawen bene ma mawaken janu juni betsabe xabakabi ana jiwekatsi ikai jawa chakabumaki.

⁴Man ebetan Jesús chibainbu, en betsabu inun en puibuun, matudan, man jaska keskaki. Matu yuinun ninkakanwen. Diosun bake mawa ana bestenwani jaki dasi man jabe mawani keskabudiki, ana jawen yunuti inun nematiwen matu tsumamadan. Jakia jawenabukin jamapai Diosun bechipaiai jawen daya axunkin man benimawa bestikatsis ikaii. ⁵Janua nun jiwei taeaitianan, jawen chakabu unanti Diosun jawen yunuti inun jawen nemati yununiki. Ja shinankin nun tapinbiaya chakabu betsa betsapa nuku anua kemutaxniaiwen nun chakabupauniki, jaska jawen jiwe tima chakabu mawa kayabiti besti bidan. ⁶Jakia ma nun Cristo ikunwainbu nun ma jabe mawa keskaken ja dukun Moisés Diosun jawen yunuti inun nemati kenemaniwen nuku ana yunuamaki. Jakia natian ana kene xeni

ana paema nun chibannaken Yushin
Pepa kushipatun besti nuku yusinkin
nuku pe mekekubainikiki, bai bena nuku
chibannakinan.

**Chakabun yudabu padanmiskiaki,
na janchadan**

⁷Jaskaken nun shinankin yuaidan:
“Diosun yunuti inun jawen nemati
éjawan chakabukin dananmatimen?”
Jaskamaki. Jaska Diosun Moisés
jawan yunuti inun jawen nemati
kenemabianiken jawen yusian en
ninkaima chakabu jakidi en tapianma
ikeaniki. Jakia Diosun nukun xenipabu
yusinkin: “Jawada yuda betsana
shinain jawen kemuyamakanwen”, ini
ja en tapianma jawen kemuti chakabu
en unanma ikeaniki, kemu Diosun
nemabianikenan. ⁸Nukun shinan
chakabu kainkinan, nuku eska wamiski.
Ibubis nukun shinanen shinain jawada
taxniai uin shinan chankakin kemukin
ibubis nukun yudan yunuaiwen
benimakin nun chakabuwamiski.
Jaskaken jawen yunuti inun jawen
nemati jayamaken chakabu jamen jawen
kushipa jayama mawa keska ikeanaii.
⁹Jaska inun, Diosun yunuti inun jawen
nemati en tapindiamma en jiwei pea keska
en ikunkainiki, jaska wakin Diosun ea
kupixanai unandiamadan. Jakia jawen
yusian en ma tapiyanen en shinan
chakabun ea jiwemachakaxun yunumis
jatun tenankin ea benui kai en unaniki.
¹⁰Jaskaken ja yununi pepatun ea jiwea
inain dabanen en ikai en jawen tenan
mea keska en uiniki. ¹¹Janua Diosun
bemakis jawen jancha yununiwen
chakabun ea bepadantan ea kanemaniki.
Ja Diosun yununi pe dabanen en ikai
jatun ea tenan kayabi waniki.

¹²Jaskaken Diosun jancha
kenenibudan, jadan, medibidiki. Ja inun,
jawan yunuti inun jawen nematidan,

medibi jawen kanetima pepa bestiki.
¹³Ja yusian pepa jawenduabiatunan, ea
mawa kayabi anu iyuaidan, épemen?
Jaskamajaidaki. Ja en chakabu amisdan,
jaska chanima xabakabi kayabi en
chakabu taxnikin chakabun ea padankin
yabutan ea kanemakin jatun ea
tenan keska waniki. Chanima jawada
Diosun bechipaiama nemani aki nun
chakabumisdan, jadan, pemajaidaki.
Chakabudan, Diosunamaki. Jaskadan,
dananmiski.

**Jamebi Pablon chakabu maematiduma
iniakiaki, na janchadan**

¹⁴Dios anua yunuti yusian pepa
Moisin jatu yusinbianiken Criston
kushipa shinanma babukin Diosun
jancha en chibannaki. En jaskaya
chakabun ea achikin tsumaxun ea
yabumiski. ¹⁵Jaskaken jawada pepa
besti en akatsi ikai akama jawada ja
danankin en bechipaiamabia ja en
bechipaiai akin itsa wakin babutan
en amiski. En jaska akeakemisdan, en
unanmajaidaki. ¹⁶Jaska inun, chakabu
en akatsi ikamabia Jesúsun kushipa
jakimakin en akaya jaska Diosun yunuti
inun jawen nemati jiwea pepa besti
yusinmiswen: “Yusian peki”, iwanan, en
shinankubaini, en chakabuwen dabin
tenekin shinainan. ¹⁷Jaskawen taexun
ean en akamabia en shinan chakabun ea
tsumayuxun jawada pepa jakimawatan
ewen jiwexun ea amamiski, chakabu
amakubainikan. ¹⁸Ja inun, Yushin
Pepatun kushipa shinanma jawada
pe en akatsi ikai emebi en shinan
kushipawen taexun en akaidan, babuki.
Jaska en yuaidan, eskaki. Jawada pepa
anun ixun emebi en shinanen en ja
bechipaiai en atidumaki. ¹⁹Jaskawen
taexun jawada pe besti en akatsi ikai
ja akama ja chakabu en dananmis en
pe akaitun besumiski, natian e iki en

jawen dakeaidan. ²⁰Jaskaken en juinti medan chakabu jiweken jawada en bechipaima en akaidan, ean en akama jakia en juinti chakabun shinanmakin ea chakabuwamamiski.

²¹En pe bestibiakatsis ibiaya chakabu betsa betsapa ewen jiwea ja taxniai uinkin en shinan pema en uinkubainaii.

²²En shinan uke medanwenan, Diosun yunua besti bechipaikin en akatsi ikunkainaii. ²³Jaskabiaken en akubainai uin chakabun ea bexetan ea tsumawatan en shinan kayabi nematan ea jenekatsi ikamaken jaska Jesú en dayaxunai en pe besti shinantiduma xabakabi en unankubainaii.

²⁴⁻²⁵Jaskawen taexun ekidi matu shinanmanun ea ninkakanwen. Eadan, en pemajaidaki. Iubis en jiweawen Diosun yununi en tapinkin jawen jancha chibain en peai dabanan en imisdan, jaskamajaidaki. En shinan babu chakabun ea yunumiski. Ea en pe jiweismadan, tsuan en yudawen ja Diosun yununi en chibanbiaya chakabun tsumatan en jiwea ea benumakin ea tenainan, tsuan ea medabewatidumbiaken nukun Xanen Ibu Jesucriston ea medabewakin en chakabu ea buaxuniwen taexun Dios besti jawen taexun en kenwankubainaii.

Diosun Yushin Pepa nuku medan jiwexun nuku mekemiskiaki, na janchadan

8 ¹Jaskaken natian nun jabu jiwexun Jesucristo ikunwainbu nun ma jaki dasiabun nukun chakabuwen taexun Diosun nuku dasibi kupiama ikanikiki, nun ma jawenabukenan. ²Jesucristo man ikunwainwen taexun Diosun yunua benawen jawen Yushin Pepatun matu ma mekeikiki. Jaskawen taexun matu tibitun matun shinan chakabu taxnimatan man ma shinan betsabunan, jaskawen taexun Satanásan jatun mawa

kayabi anu matu yunukatsis ikai Yushin Pepatun nematan matu mekexanikiki, jiwekuinmakinan. ³Diosun Moisés yunukin jawen jancha kenemanidan, yudabu jatun shinan babuwen taexun jaska waxun chibantidubumaken jaska bebunkidi yubani yudabu babubu jau jatun chakabu jatu buaxuni mawayunun, iwanan, jawen bake yuda babu nukuna keska bimatan Diosun yununiki. Jesú jaskakidanixun jawen mawa kayabimati Satanásan kushipa mebinkin Diosun baken maemaniki. ⁴Jaska Diosun Moisés jawen jancha yununi nukubun nun jawa chibankin menetiduma shinankin Diosun jawen bake jatun jau meneyunun yununiki. Nuku jaska waniwen taexun ana jaska yudabu chakabun bechipaiai jiweis akama jakia jaska Yushin Pepatun nuku yunuai chibain nun jiwekunkaintiduki.

⁵Tsuabuda jiwexun chakabu tibi iubis shinain jiwei jawen nuikin jenekatsi ikama ja besti chibanmisbuki, Dioski sinatakin jawen yusian chibanma inun jawen jamapai chibantidubumadan. Jakia jawada Diosun Yushin Pepatun nuku amakatsis ikai tsuabuda jaska ikatsis ikai bechipaikin jaskanun ixun Yushin Pepa chibandiakubainmisbuki. ⁶Jaska inun, jawada chakabun nuku amakatsis ikai nukun juinti babukin tsuabunda ja besti chibankubainmisbukan, jawen mawatan Diosbe jiweama ixankanikiki. Jakia tsuabunda Diosun Yushin Pepatun bai chibain unanumati jawen nun jiwenun ikai ja besti shinainbu nuku duawakin jawama unanuma nukun jiwea nuku inankubainikiki. ⁷Ja inun, tsuabunda Dios shinanma jawada jatunmebi jatun shinanens akatsis ikaibu jaska chibanmisbu Diosun jatu shinanma inun Dioskidi shinanbumadiki, jaki pechiabudan. Jabunan, Diosun

yusian chibana inun jawen yunuua axuntidubumadiki. ⁸Jaskawen taexun tsuabunda jatun kemu pae chakabun jatu mekemisbu jabun Dios kenwakin benimawatidubumadiki.

⁹Jakia natianan, Diosun Yushin Pepa man jaya matuki dasixun matu mekeaya chakabuki pechitan man ana ja chibana maki. Jamen tsuabuda Jesùsun Yushin Pepa jayama jaki dasiama Cristonabumaki. ¹⁰Jakia Cristo matube dasikenan, Yushin Pepa matube jiweaki. Chakabun benukin nuku tenantidubiaken ja juni Dios nukuwen nuikin nuku pewaniki, jawenawakinan. ¹¹Janua Diosun jawen bake Jesucristo mawa bestenwanitun man mawa matudi bestenwanxanikiki, jiwea bena matu inankinan. Diosun Yushin man jayawen taexun matun yuda mawatan chapui keyubiamisken ja Yushin matuki dasiatun matu ana jiwemaxanikiki, nai anudan.

¹²⁻¹³Jaskaken, en betsabu inun en puibuun, jawada Diosun bechipaiai tsuabunda man shinamma jawada matumebi man akatsis ikai man akubainaiwen taea Dios matuwen nuiama man mawa kayabixanaii. Jakia Diosun Yushin Pepatun matu medabewaya jadatutunda ja chakabu man jeneai matu tenaxuna man janunkain shinan kayabiwen man jiwekubainxankananaii. Jaskaken tsuabunda Jesùs chibain ana nukun shinan chakabu babuwens ikama natian jaska Diosun nuku jiwemakatsis ikai jaska bechipaikin yunuai chibantiki.

¹⁴Ja inun, tsuabuda Diosun Yushin Pepatun medabewakin pe nimamisdan, jabudan, Diosun bakebuki. ¹⁵Matudan, ja yushin jatun matu date pae inanmis ja yushin ana matu inankin yabumama jakia Diosun Yushin Pepatun jawen bakebu matu wamamis matu inaniki.

Ja Yushin Pepatun nuku janchamakin: “Epaan, En Epa nuikipatuun”, akin kenamakin nuku yuimamiski, ¹⁶jaska wamakin nukun yushinki dasi nanetan nun Diosun bakebu xabakabi nuku unanmakinan. ¹⁷Jaskaken Cristoki nun ma dasiabuwen taea nun ma Diosun bakebuki. Jaska inun, yuda betsabun jawada bika nuku tenemaibu Criston tenekubaini keska wakin jawa yuimama nun tenekubainaii. Jaskawen taea naiudi jawa ana bika teneama nun jabe jiwexanaii.

Dasibi Diosun damiwanin jawen benimati uinxanun ixun jabundi manakanikiaki, na janchadan

¹⁸Jaska inun, natian Jesùs nun ikunwainbu jamapai bikawen bedubi tenei nun nuitapayuaibudan, Diosbe nun jiwexanai betsajaida nun ixanaii. Na jiwexun nun teneai inun, na bika nun tenekubainai chipu jawama keska ixanikiki. ¹⁹Mai jidabiki dasibi jabu Diosun damiwan: “¿Jadatu jawen bakebu kayabimenkain?” ixun xabakabi uinkatsis ikin jin jin ichakayamakin manakaniki. ²⁰Jatianda jaskaxanai unanma mai jidabi anu Diosun damiwan bika tenei itimaskakanikiki. Jaskaidan, jatun chakabuwen ikabumaki. Jakia jaska Diosun shinani jabu damiwanibu unanmaken jaska Dios yubakani keska jatu axunxanikiki. Dasibi mai jidabi Diosun jatu damiwan ²¹Diosun kupikubainkin jau keyukin yamawaxanun manakaniki. Diosun jawen bakebu duawakin mai jidabidi duawaxanaiwen taexun dasibi damiwan benimaxankanikiki, mibanan, yuinakadan, bishidan, yudabudan, dasibi betsa betsapadan. ²²Jaska inun, dasibi Diosun jatu damiwan chakabuwen taea jamapai betsa betsapa tenekubainkanikiki, jawada

isin teneai jau Diosun medabewakin jatu nemaxunxanun manakayuidan, jaska ainbu bake kainkatsi isin betsabu tenei tsekeden imis keskaidan.²³ Jabu bestima nuku dikabidan, nun Diosun bakebunan, jawen Yushin Pepawen jaska Diosun nuku duawaxanai jawen unanti wati yubani nun jaya jawen bake kaya keska wakin yuda bera nuku inanxanai bixanun ika jawada jawen bakebu yubabaini Diosun nuku inanxanai juinti detsupe ixun bika tenekin nun manayuaii.²⁴ Jaska nun manaiwen taea nun ma mekea jayaki. Na bika nun uiainwenan, nun jawen mekeamaki. Jakia nun uindiamu nun ja manakai jiwea jaki nukui nun jawen mekexankanaii, jawada ja Diosun nuku yubanidan.²⁵ Jabiaskabiaken jawada Diosun mae nai anu kaxun nun uindiamu nun jawen nuiama Diosun jancha ikunbestiwakin shinan mestenwantan nun manayukubainaii.

²⁶ Jaska inun, nukun juinti babuwen taexun Diosbe janchakin nun jawa yuitidumabiaken jawen Yushin Pepatun nuku medabewamiski. Jadi Diosbe janchati unanma: “Jadakidi ea akin Dios jawa yukaxanpa?” ikin nun shinanyan jawen Yushin Pepa Diosbe janchakin nuku yukaxunmiski, jaska nun yuitidumawen nuku ea axunkinan.²⁷ Jaska inun, nun Jesús ikunwainbu Diosun nukun juinti unainkiki. Ja dikabi jawen Yushin Pepatun unankin Dios ea akin jabias nun shinain dasi watan nuku yukaxunkubainmiski.

Jamapai chakabu Diosun nuku binumaxanikiaki, na janchadan

²⁸ Jaskaken matu yusinkubainun ninkakanwen. Jabu Diosun bechipaikin kenakin katuni jawen bake Jesús pepa keskai jau ixaunbun Diosun bebunkidi jatu shinanixun medabewakin jamapai

chakabu jatu binumakubainmiski.

²⁹ Janua Diosun bake iyua nukun Juchi Kayabi Iyua Jesucristo ja dukun iniki. Janua jawen betsabu midima ixanaibu bebunkidi Diosun unankin kaindiabuma Jesucristo keskakin nun ja chibanxanunbun bebunkidi Diosun unaniki.³⁰ Jaska inun, tsuabuda Diosun bebunkidi jatu kabekin katuni Jesúswen taexun chakabuuma wakin pewatan jawada Diosun jawen bake Jesucristo yunutan ani keska wakin jabudi duawakin Jesucristobe jatu xanen ibuwaxanikiki.

³¹ Jaskaken Diosun jaska shadabu nuku axuniwen taexun jadatubunda chakabuwakin nuku tenemaibu jabu jawauma keskabuki, Dios kushipajaidatun nuku mekekin binujaidawen taeandan.³² Jaska inun, jawen bake jawa yaushitaskama yunua taxnitan mawakin nukubu nukun chakabu nuku buaxuniwen taexun nun jabu Jesucristoki dasiabu jawen taexun nuku duawakin jamapai tibi jawen bakewen nuku axuninxun Diosun nuku axunkubainikiki.³³ Diosun ma nuku katuninxun ma nuku pepawabianiken Dios bebunxun tsuan nuku ja akin nuku chitetidumaki.³⁴ Jaska inun, Jesucristo debutan jaska bestiama ana jiwei bestenkain nai anu Diosun yusiudi tsauinxun Jesucristo jabe xanen ibukin Dios nuku ea axunbiaya tsua betsa kushipatun Criston nuku pewaxuni nematidumaki.³⁵ Jaska inun, Jesucriston matu bechipai matuwen nuiaya tsuan matu paxkatidumaki. Na eska shadabunan, na dasibi nuku jatun bika tenemamistun inun, nuitkapaiwen inun, tadiumawen inun, pitiumawen inun, nuku bikawaibuwen inun, nuku ichakawaibuwen inun, nuku dedaibuwen inun, mesewatan nuku tenanbiaibun Jesucristo nukuwen nuikin

nuku duawai jabun nuku mesewakin dapaxkamatidubumaki.³⁶ Jaskakidi Diosun jancha yuixunikatun kenekin:

“Epaan, nun mia
chibankubainmiswen taexun
badi tibi nuku ichakawakin
tenankatsis ikubainkanikiki.
Chaxuhan samama detekatsis
imisbu keska wakin
nukudi ichakawakanikiki”,
aniki, Davidin yuikinan.

³⁷ Jakia jamapai chakabu betsa betsapa jadatutunda nuku bikawabiaya Jesucriston nuku bechipaiaiwen taexun jamapai chakabu tibi nun binujaidakubainaii.³⁸ Jaska inun, Dios nukuwen nuimiswen taexun en matu yuiai ninkakanwen. Dios nukuwen nuikin nuku bechipaiaidan, jawa eska shadabun nuku dapaxkamatidubumaki. Eska tibiwenan, mawawen inun, tsuabuda jiwechakabia bun Dios nukuwen nuikunkainaya Satanásan nai tsumabu inun yushin betsabun Dios nukuwen nuikunkainai jabun nematidubumadiki. Ja inun, natian inun uatian ixanai Dios nukuwen nuiai jabun nuku dapaxka matidubumajaidadiki.³⁹ Jaska inun, jawada kushipabu manaundixun inun naman uke medan mai medanxun inun, jabu Diosun jatu damiwanibun jaska shadabun nuku dapaxkamatidubumaki. Nukun Xanen Ibu Jesucristo Dios jawen nuiai jawa dapaxkamama ini nuku uinmanixun nukudi bechipaikin jawen nuiwen nuku jawa dapaxkamadi ixanikiki.

**Israelbu kayabidan, Diosunabukiaki,
na janchadan**

9 ¹Jesucristo ean en ikunwainwen taea jaki dasixun ikunkin chanima jancha en matu yuiaii. Yushin Pepatun en shinan mestenwanxun ea yuimai en jawa matu padain chani chakamaki.

²Eskaki, matu yuinun ea ninkakanwen. Enabu judiobuwen jatuwen nuijaidai juinti nishma punu nuka en jatuwen kaxakatsis ikunkainaii.³ Jaskaken enabu Israelbun jau Cristo ikunwanun bun jatu medabewanun ika ean eska en jatukidi shinankubainaii. Ea kayabis Diosun jau jatuwen ea kupinun ika jatuwen taea Cristo dapaxkatan jaskatan enabu kayabi en jatu medabewatidu daka ixun jatukidi en shinankubainaii, jau enabun Cristo ikunwanun bunan. ⁴Enabu Israelbudan, nukun xenipabu anua Diosun ana jatu ibu wakin jawen bakebu keska watan jatube jiwekin jawen kushipa jatu uinmai jawenduai jatu bebunga chaxajaidakunkainikiaki. Jatu jaska wakin Diosun jawen yunuti inun jawen nemati Moisés yusinmakin jau ichaxun Dios ken kayabi wakubainun bun jatu yusinkin Mesíaskidi jatu yubani jaska manakakin jau chibankubainun bun betsa betsapakidi jatube Dios yubakakunkainikiaki.⁵ Jabiadi nukun xenipabu Israelbu anua Mesías Cristo yuda kayabitan taxniniki. Nukun mekenika Diosun dasibibu mekei xanen ibujaidamisan, kenwankin jeneyamakubainankan wen. Jaskakidan.

⁶ Jaska Dios Israelbu jatu yubanidan, Diosun jawa betsa wama jawen jancha kushipa jawa benuamaki. Jaskabia Diosun jatu yubani ikunwankin ja Israelin baba ichapabun chibanbumawen taea jabu Israelbu kayabi itidubumaki.

⁷ Jaska inun, Diosun Abraham yuikin:

“Jaska en mia yubaidan, Isaac wen taea min bababu kayabi besti inunbadixankanikiki”, aniven taea dasibi jabun chibanbuma Abrahamnen bababu jawen bababu kayabi itidubumadiki.⁸ Eska jakidi janchani nuku shinanmaikiki. Diosun bakebu yuikinan, jabu jawen xenipabu Abraham inun jawen bake Isaac shinanma jakia

jabu jatu yubani jawen yubakani jancha jaska tsuabunda ikunwankin shinankin jakimama axunkubainaibu Abrahamnen bakebu itidubuki. ⁹Ja jaska waxanaikidi Diosun yubakin yuikinan: “Chanima ana badi betsation chintunkidan en matu medabewaya min ain kayabi Saraki min bake wa juni bake kainxanikiki”, aniki.

¹⁰⁻¹²Jaska bestimaki. Betsa Diosun anidan, eska waniki. Jawenabu Diosun katukin jawada pepa inun jawada chakabu yudabun akubainmis shinanma jakia jadatubuda Diosun jawenabu wakatsi ikai besti shinankin jatu katumis man xabakabi unanunbun nukun xenipabu Isaacun bakebukidi matu shinanmanun ninkakanwen. Rebeca tsupibu bake wakin Isaacun nanemaima kaindiama jawa pepa inun jawa chakabuwadiabumaken bebunkidi Diosun Rebeca yuikinan: “Min bake dabe kaintan ja ja kachu Jacob kaiantun jawen betsja ja dukun kaian Esaú tsuma waxanikiki, xanen ibukinan”, aniki.

¹³Januxun chipu ana Isaacun bakebukidi Israelin baba Yavé Diosun yuikinan: “Jacob besti bechipaikin Esaú en dananiki”, akin Diosun jatukidi yuiai Malaquíasin keneniki.

Tsuanda Diosun shinan yunutidumakiaki, na janchadan

¹⁴⁻¹⁵Jaska inun, Diosun Moisés yuikinan: “Jadatudawen en nuikatsis ikai jatuwen nuikin jadatuda en duawakatsis ikai en jatu duawakubainmiski”, ikin jadatuda dukun kaini shinanma ja dabetan juinti unankin bestichai katukin ¿Diosun kanenimenkain, pepa wamadan? Jaskamaki. Jawen shinanan besti akubainiki. ¹⁶Yudabu jatun shinanwen jaska bechipaikin jawada ibubis binun ika jin ikai Diosun jadi shinainsmaki. Jakia tsuabudawen nuikin Diosun jamebi jatu katumiski. ¹⁷Jaska inun, chipu

Diosun xanen ibu Faraón kupikatsi shinanbiakin yuikin: “Faraónen, en kushipa miwen jatu unanmakatsis ikin mia katukin dasibi Egipto nawabun xanen ibu en mia waniki, jau miwen taexun en kushipa inun en kena mai jidabi anu jiweabun jau unanxanunbun”, ikin jakidi Diosun Moisés janchamai Moisin ninkatan jakidi ¹⁸kenenidan, yuda betsabu Faraón ani keska wakin jabu ja keskabuwen nuiama Diosun jatu besu kushi wakin juinti ninkaisma wakatsis ikin jatu jaska wamiski. Janua jadatudawen Dios nuikatsis iki jatuwen nuimiski, bechipaikinan.

¹⁹Dioskidi man shinain: “Jawada Diosun nuku amakatsi ikai tsuabunda jawen shinan nun bextetidumaki, jaki kayakinan.” ²⁰Ja inun, matunan, jaskakin Diosun jamapai wamis jawen shinan unanmabia ¿jaska jawada wamiskidi chitekin man yukatidumen? Na keskaidan, mai kenti janchakin mai mabu dami wanika yukakin yuikin: “¿Jaskakin min ea jaska waimamen?” itidumaki. ²¹Jakia jaska ainbun mai mabu wakin jabias mai kenti dabe wakatsi ikin betsja jaki jamapai wati shumu jawendua medibi wakin inun betsja kenti kayabi jawendua bexmas dasibituna jatu waxunmis tsuan nematidumaki. Jaska keskadi wakin Diosun jatu akeakemiski.

²²Jaska yudabun jatun chakabuwen Dios danainbu Dios jatuki sinatakin mawa kayabiwen jatu kupixanai inun, ja besti kushipajaida Diosun yudabu unanmakatsi ikin jaska jawen kushipawen jawaida akama tenexun manayukubainikiki. ²³Jabatiandi bebunkidi Diosun nuku duawakatsis ikin jawen kushipa nuku uinmanun ixun nuku tibi nuku katukin shinamisdan, nun ma jawenabu nuku unanmaikiki. ²⁴Jaska tibi nukukidi akinan, nun

judiobu bestima judiobumadi Dios jatuwen nuikin jatu duawakatsi ikin bebunkidi jaska tibi nuku dasibi katuniki.²⁵ Jaska nawabuwendi Dios nuikin jatu chakabu buatan jawenabu wakatsis ikin jaska waxanaikidi jaska kene jaya Diosun Oseas yuia kenekin:

“Nawa betsabu en jatu katuama ibiani jatukidi yuikin:
‘Enabuki’, akin en jatu katutan kenaxanaii.
Jatukidi shinankin en jatu bechipaama ibiani janu ana jatu dananma jatu bechipaikin jatukidi yuikin:
‘En ma jatu bechipaiai enabuki’, akin en jatu kenaxanaii”,

iniki, Diosdan.²⁶ Ja inun, jabianuxuns ana jatu yuikin:

“Matudan, man enabuma ibiani jakia en matu katuken:
‘Man Dios jiweatun bakebu’, matu kenaxankanikiki”,

aka ninkatan Oseasin kenexuniki.²⁷⁻²⁸ Jaska inun, Israelbukidi Isaásin yuikin: “Unanxubida akama jaska jawen janchawen yubakani jawaida menekin axanikiki, mai jidabi anu jiwebaunabu jatu chakabuwen Diosun jatu kupikinan. Januxun Israelbu midimajaida mashitibiabun eskadabes Diosun jawenabu watan jabu mekepakexanikiki”,²⁹ iwanan, Diosun jatu kupidama Isaásin ana yuikin:

“Nukun Epa Dios kushipajaidatun nukunabu Israelbu kupikin texe wama inidan, nun jayamadi ikeanaii,
jaska Sodoma maewan anuabu inun Gomorra maewan anuabu
Diosun jatu kupikin yamawani keskadan”,
itan Isaásindi keneniki.

³⁰ Jaskaken Diosun yunuti judiobuman chibankin Diosun paxati benamabia

jabun Jesucristo jatu shinanen besti ikunwainbu jatu chakabu Diosun ma jatu buaxuntan ana jatukidi chakabu shinanma ikunkainikiki.³¹ Jamen Israelbu ikidan, jabu Diosun yunuti inun jawen nemati Moisés jawenabu yununiwen jatu chakabu jatu buaxuntan pewatidubu dabanen jaska shinankin Jesucristo ikunwanbumawen taexun Diosun jatu chakabu buaxuntidumaki.³² Jaskaidan, ējaskai inibumen? Jabun ikunwanti pepa jayabumawen taeandan. Eskaki, matu yuinun ninkakanwen. Bai namaki mishki daka nun uianma kai jaki juti itan ja mishki tsakabain nun tin itiduki. Jabiaska keskadiai Diosun yunuti inun jawen nemati judiobun chibankubainai pebiaken jaska shinanma jatunmebi jatu shinanens jiwekin Mesíaskidi jancha danain mishkiki juti ika keskanibuki.

³³ Na jabias yusian Mesíaskidi Diosun jawen jancha yuixunika Isaías yuimakin:

“Uian. En jaska yubakani en kushipa mishki keska Jerusalén anu en nichinxanaii,
jaki juti iki ichapabu tsakabainbaini tin ikubainxankanikiki,
ikunwanmadan.

Jakia tsuabunda jawen jancha ikunwankin chibainbu en jatu jawa dake wama ixanaii”,
aka ninkatan jadi kenedianiki.

**Israelbu Diosun jatu katubiani
jawen kakape chibana
inibukiaki, na janchadan**

10 ¹ Jaska inun, en betsabu inun en puibuun, enabu Israelbu jatukidi ean shinain jabuwen nuikin Dios en jatu yukaxunkubainmiski, jau Diosun kupiti mese binukin Jesucristo chibankin ikunwainbu jau Diosun jatu mekexanunan. ² Israelbun Dios duawakin

dayaxunkatsi imisbuwen taexun en jatu kenwantiduki. Jakia jaskai pepabiai jawen jancha kayabi unankin chibankma kanemisu ean en unaiin.³ Jakia jaska Diosun nuku pepawamis ja chibankin ikunwanma jatun shinan besti chibain kein ibubis pepai bepadamei xabakabi kenmisbuki, Diosun besti tsuada ma pewaxun jakidi pe besti yuitidu unanmadan.⁴ Jaska inun, jawen yunuti inun jawen nemati jancha besti chibankin Dios benimawaipaibu nuku dasibun nun atidumaken ja yusini Cristoki jikia jatun xabakabi betsa wakin nukun chakabu buai mawakin ja yununi ana jawen jiwtima wakin Cristo besti nun ja ikunwainbu jau Diosun nuku pepawaxanun Dios benimawai Cristo nuku ixuniki, Diosun jancha Moisin jatu yusini chibain ibubis pepai ana nun jaskayamaxanunbunan.

⁵ Jakia jaska Diosun yunuti inun jawen nemati chibain pepawen jiwtidubukidi Moisin yusinkin: "Tsuabunda jawada Diosun yusini chibankubainkin kaneama Dios benimawai jawen yusianwen taea jiwxankanikiki", iwanan, jatu kenexuniki. ⁶ Jaskaken tsuabunda shinan betsa waxun Jesús ikunwankatsis ikin yuikin: "Nai anu mapeketan jau nuku mekeyunun Mesías Cristo jaudia nekedidi butekin i bunankanwen", iwanan, jau jaska shinankin yuiyamakubainunbunwen. ⁷ Jaska inun, betsadan, betsandi shinan betsawen yuikin: "Janu mawabu bumisbu anu kaxun jau nuku mekeyunun Cristo nedidi mawabu anua xabakan taxnimai bunankanwen", iwanan, jau jaska shinankin yuiyamadianunbunwen.

⁸ Jakia jaska Diosun jancha nun chibantidukidi jawen jancha yuixunikatun yuikin: "Diosun yusian man jayaki, matun jointi medan man jakidi shinanmis inun, matun kexawen

jakidi man janchamisdan", iniki. Jabias kaka nukundi yusiin nun jawen janchadiakunkainaii.⁹ Jaskaken jawada jawen bakekidi jawen jancha yuixunika Diosun nuku kenemaxuni jadatubunda chibankin xabakabi dateama yuikin: "Jesucristo en Xanen Ibuki", iwanan, jaska Jesúس mawa Diosun ana bestenwani ikun kayabi waibu jawenabu watan niti akama Diosun jabu matu mekekubainxanikiki, jiwekuinmakinan.¹⁰ Januxun Jesúس chibankin matun jointi medan ikunwankin shinain Diosun matu ma pepawaya dateama jaska xabakabi taxnimakin yuikin: "Chanima kayabi Jesucriston en chakabu buaniwen taea en Xanen Ibuki", ikaibu Diosun matu jawenabu wakin niti akama jabe matu jiwmadiaxanikiki.

¹¹ Jaska inun, Diosun jancha yuixunika Isaín kenekin: "Tsuabunda Mesíasin jancha ikunwankin chibainbu en jatu jawa dake wama ixanaii", aniven taexun¹² judiobu inun judiobumadan, tsuabunda Mesías ikunwain nukun chakabu jatun nuku buaxunkin betsa tibiwen nuku axuinsmaki. Jabias Xanen Ibu Diosun jatun dasibi meke keyua inanana chakaisma kenwankin man ea akubainaibu jawa yaushiamat duawakin inankubainmiski.¹³ Ja inun, Diosun jancha yuixunika Joelin jaskakididi yuikin: "Jadatubunda jawen mekenika ikunwankin ea akin: 'Yavé Diosun, en chakabu buatan mina ea wawe, mekekinan'", ikaibu Diosun dananma jatu mekekubainxanikiki.¹⁴ Jaskakenkain jau Diosun jatu mekekubainun jabun Cristo ikunwandiabumanan, jaskatan Cristo ea atidubumaki. Ja inun, tsuabunda Cristokidi yusianbu jawa ninkadiabuman jawen kakape ikunwantidubumadiki. Ja inun, jatu yusindiabumanuxun Cristokidi jawa tapintidubumadiki.¹⁵ Ja inun, Diosun jancha yusinanbu jabu anu Diosun

jatu yunuama kakape Cristokidi jatu yusintidubumaki. Jaskaken Dios yuixunkin jawen jancha yuixunikatun jaskakidi kenekin: “Diosun kakape yusinmisbu jikishinxun Diosun kakape jatu yusiai ninkai ja jushianwen taea benimai shinan chankankankanikiki”, iniki.

¹⁶Jaskabianiken Isaíasin yuikin: “Xanen Ibu Yavé Jiweatuun, midimabu mikidi nun jatu yusian nukun jancha ninkatan danankanikiki”, itan keneni keskai nukundi midimabu Diosun kakape Cristokidi nun jatu yusian ninkabiakin ikunwanbumadiki. ¹⁷Jaskakidi Diosun jancha yusinmisbun Jesucristokidi kakape yusinkubainaibu besti jancha pepa jawendua ninka pewatan yudabun Cristo chibankin ikunwantidubuki, jatun janchawenen.

¹⁸Jawada Diosun jancha yuixunika Davidin kenekin yusini matu ana yusinun ninkakanwen.

“Yudabu mai jidabi anu manibaunabu Diosun jancha yusinmisbun jabun jatu yusian ma jabun ninka keyuabuki”, iniwen taexun Israelbun dasibi ma ninkakin keyunibu nun unaiin. ¹⁹Jaska inun, emebi ana yuka iki Israelbuman Mesías chibankin Israelbu binuxanaikidi kenekin Moisin Diosun jancha ja dukun yuikin:

“Israelbuma jabu enabuma ibianibun matun Mesías ikunwankin chibain ma enabuwen taea man jatuwen kemuxanaii. Jakia matu Israelbu man enabu ibiani matu jabuwen kemumakin jabu unainsmapakidi man shinanbiamisken en matu jaki sinatamaxanaii”, iniki. ²⁰Janua badi ichapa kaken jancha kushipawen yuda betsabukidi Diosun Isaías yuimakin:

“Tsuanbunda ea benabuma jaska en jatuwen nuimis

jatu xabakabi en uinmaya jabun ea ikunwanxankananikiki. Jabun ea benamabia eki nukuxankananikiki. Eki jawa yuka ikabumabiaken en kushipa en jatu uinmaxanaii”, iwanan, ²¹Israelbukidi yuimakin: “Juanti kushitan jatun besuwen dakeama ea ninkaisbumawen nuikin en jatu medabewapaibia ea ninkabumaki”, aka keneniki.

Diosun jawenabu wakatsi ikin Israelbu bebunkidi jatu katunikiaki, na janchadan

11 ¹Nukun xenipabu katukin jawenabu jatu wanixun nuku danainsmaki, chanimadan. Jaskawen taea eadan, en xenipabu kayabidan, Abrahamki. Janua jawen baba betsa Israel en xenipabudiki. Ja jawen bake betsa Benjamín anua en jabiadiki. Jaska Diosun nuku yubani shinankin Jesucristo en ikunwainwen taexun ea dananma en chakabu buanixun ma ea mekeikiki, jaska Israel tibi anuabun tsuabunda Jesucristo ikunwainbu jatumekexanai keska wakinan.

²Bebunkidijaida Israelbu jabu katukatsis ikin Diosun katunixun nuku dananma imiskidi matu xabakabi yusinkin jawen jancha yuixunika pepa Elíaskidi en matu yuiai ninkakanwen. Bababukidi jawada Elías Dioski ja ikin jaki chania jawen jancha yuixunika betsan kenexunkin: ³“Yavé Dios Jiweatuun, min jancha yuixunikabu tenankin keyutan januxun mishki chi tapu sa akin keyutan ean besti en mia ikunwain ea tenandiabuma ma ea tenankatsis idiakanikiki”, ⁴aka Diosun Elías yuikin: “Dateyamawe. Min mimestimaki. Bababu betsa jabu en jatu mekea 7,000 jayabuki, jabun ea chibain chintuanbuma ja yushin betsa Baal dami ja naman danti itan jabun

kenwanbumadan”, akin Elías yuiniki. ⁵Jaskawen taea na jabiatandi Israelbu ana jatidama jatuwen nuikin Diosun jawen duapawen jawenabu wakatsi ma nukudi katuniki, jau Jesús jabun nun ikunwanxanunbunan. ⁶Na jaska nun jabun chibainan, jawen yunuti inun jawen nemati chibain nukunmebi nun pepaiwen taeama jakia jawen pepawen nukuwen nuikin Diosun nuku kenakin nuku katukubainikiki, jau jabun Jesús nun ikunwanunbunan. Jaska nuku wamadan, Diosun pepa jayama ikeanai.

⁷Jaskaken Israelbu pepatidubu midimabun tapinpaibiabu kanei juinti kushikin unanbuma Diosun jancha jawen jiwekainti biama inibuki. Jaskabiaibun jatidi Diosun katuabun jabun jatun jiwea binibuki. ⁸Jaska Dios ninkama juinti kushibukidi Diosun jancha yuixunikatun kenekin: “Jatun pabinki pata keska jatu wakin jatun bedu bekun keska jatu wakin jatun shinan Diosun bexekin jatun jaska waniwen taea natiandi jabun jawen yusian chibantidubuma ikubainkanikiki”, jaska yuini keskaidan. ⁹Jaska inun, ana Dios chibarbuma ixanaikidi Davidin yuikin:

“Jamapai piti betsaa betsapaa jaya jawen besti beyusi unainsmapai jadakidi paxai kaintidubumaki, nawatikis ikabu jau Diosun jatu kupinunwen.

¹⁰Ja inun, jau jawa ana uinyamanunbun Diosun jau jatu bexux wanunwen. Ja inun, jamapai bika tenei dayakin xankamajaida ia kakui tininkunkaini jau ana tenejaidakubainunbunwen”, iniki.

Jabu Israelbumabiaken Jesús ikunwainbuwen taexun Diosun jawenabu jatu wakubainikiaki, na janchadan

¹¹Janua man shinanan, Israelbu Jesús danainbun ¿Diosun jatu jene

keyunimen? ana ikunwantidubumadan. Jaskamajaidaki. Jakia Israelbu jawenabubia jabun Jesús danainbun januxun Diosun jabu Israelbuma jawen kakape Jesucristowen jatu mekekin taewaniki, jatu jaska wa Jesucristo Israelbuman ikunwainbu uin jau jatuwen kemukin Israelbundi ana shinan betsaa watan jabun mekenan Jesucristo jau ikunwandianxanunbunan.

¹²Jaskaken jawada Diosun bechipaiai Israelbun danankin betsaa betsapa wabiaibun ja jabu Israelbuman jawen bake Jesucristo dananma jabun bechipaikin Diosun kakape Cristokidi ninkatan jabun akai Israelbun shinain chanima jabuwen taexun Israeliin baba midimabundi jawen jancha ikunwain bepexexankanikiki, Diosun jatu ana duajaidawakin ibu wayadan.

¹³⁻¹⁴Man ebetan Jesús ikunwain Israelbumaan, en eskaki, matu yuinun ninkakanwen. Jau Israelbuma betsaa betsapabu anu en jatu yusinkubaunxanun Diosun jancha yuixunika jawen kushipaya Jesúsun ea waxun ea nichiniwen taea en jawen daya pe jaya axuin en benimakunkainaii. Jaskaken matu yusinkubaunkin jaska Jesucristo man ikunwainbu enabu Israelbu jatu ikunwanmakatsis ikin jaska man ikunwain jawenduai benimaibun jawen jatu kemumakin jatidibudi jatun shinan en betsaa wamakatsis ikunkainaii, jau Diosun jatu mekediaxanunan.

¹⁵Jaska enabu Israelbuman Jesucristo danainbuwen taexun yudabu mai jidabi anu manibaunxun Diosun kakape jabun Jesucristokidi ikunwanbaunaibuwen taexun enabun ikunwankin taewadiakin jatun chakabu jenei jaki pechitan yuda mawa ana bestean keskai jiwe kuian bidiai benimaxankanikiki. ¹⁶Jaska inun, misi kapamanai ma bai keyua ja dukun tude Dios inankatsi ikin paxkabu medibi

inantiken jabias ja misi kapamanadia jabiaskadi jidabi medibidiki. Jaska keskadi ji tapun betsa yumei ja Dios ibu wamakin medibi wa jawen punyandi Diosunamiski, medibidan. Jaska keskai Abraham inun, Isaac inun, Jacob jabu medibi pepabuweng taea jabun bababudi medibi ixankanikiki.

¹⁷Nun judiobudan, olivo ji kayabi keskabuki. Jakia jawen punyan babu betsa mextetan olivo mebi betsa kushipa jaki tsamintan nea dasibi jabias tachanua jawen xuku jawen namibe jusitan jabias yumemis keska Abrahamnen bababu Diosun jatu watan Israelin baba betsabun Dios chibankin ikunwanbuma Diosun olivo punyan mextea keska wakin jatu danantan matudi Diosun jawenabu wakin Abraham matun xenipabu keska matu wadia akeakekikiki. Jaskaken Dios jawenabu Israelbuwen nuikin jatu duawakubainxanai Diosun Abraham yubani keska wakin man Israelbuma matubudi Abrahamnen bababu keska watan matuwen nuikin matu duawaikiki, olivo kushipaki tsamian jaki nea keskawakinan.

¹⁸⁻¹⁹Janua tsuabuda janchai: “Eadan, en Israelin babamabia Diosun jawenabu ea wakaksis ikaiwen taexun jaki ea dasiwanun, iwanan, Israelbu danantan jawenabu ea waniki”, iki matumebi kenkin shinan chakai jatukidi enjen iyamakanwen. Jakia man tacha ibumabia man jawen punyan besti man jaki neaki, jawen tachan matu jiwemaidan. Diosun besti jawenabu matu waiwen taea keanma Dios besti shinankin duawakin kenjaidawakubainkanwen.

²⁰Eskawen taexun jatu mextea keska wanidan, matu yuinun ninkakanwen. Jabunan, Diosun jancha ikunwanbumawen taexun jatu jeneniki. Jakia matubu madiastun man

ikunwainbudan, jawenabu matu waikiki. Jaskawen taea jawen keanma Dios bestiki mesekubainkanwen. ²¹Chanimba Diosun Israelbu dukun katubianixun jatu dananiki. Man jabu keskadiken matu jabiaskadi wakin danantiduki. Shinaindakubainkanwen. ²²Uinkanwen, Diosdan, nuikipa jawenduaki. Jaskabia jawen yunua mesten binumaismaki. Jabu chintuainbu danankin jatu kupimixun matu man Israelbumabiaken matuwen nuikin duawakin jawenabu matu wa akeakekubainkiki. Jakia jaska ji punyan babu mextexun putamisbu keska wakin matundi jawen shinan chibanma man chintuainbu Diosun matu danantan matu kupidaxanikiki. ²³Jaska inun, Israelbu jadatubunda jatun shinan chakabu jenetan chintunkidan ana ikunwankatsis ikaibu ana Abrahamnen bababu kayabi wakin Diosun ana jawenabu jatu waxanikiki, jiki ana netan keska wakinan. ²⁴Jamen man judiobuman badi ichapa Dios man dananbiakubainaya atimas Dios matuwen nuiaya jawen kakape Jesucristokidi nun matu yusianyan shinan betsa watan man ikunwainbundi ana jabiaskadi wakin Israelin baba kayabibun shinan betsa wadiatan ichapabun ana chintunkidan chanima Jesús ikunwandaxankanikiki, bebunkidi Diosun jatu katunibunan.

**Israelbu Jesucristowen taexun
atimas ikunwainbu Diosun jatu
mekexanikiaki, na janchadan**

²⁵En betsabu inun en puibuun, Diosun kushipawen unanepai jawen man kenyamaxanunbun jawada Diosun matu axunkatsis ikai jaska jawen yubaka junea janchani man unan keyuxanunbun matu yuinun ninkakanwen. Jaskai Israelbu juinti kushikin ichapabun Jesús ikunwanbumaki. Jaskaken Israelbuma jatida Diosun meketan januxun

ichapabu Diosun Israelbu jabu ana mekediaxanikiki.

²⁶Jabu jaskabaunaibun Israelbu midimabun ikunwandaibu
Diosun jawenabu jatu watan jatu mekediaxanikiki. Jaska wai kaikidi: jawen jancha yuixunikatun kenekin:

“Matun mekenan Mesías Israelin baba Jerusalén anua kaintan Jacobun bababu jatun shinan chakabu betsa wamakin

²⁷jaska ea Dios en jatukidi yubakani jabun chakabu buatan en ana shinanma ixanaii,
jatun mekenan Mesías jukenan”,

iniki.

²⁸⁻²⁹Januxun tsuabuda Diosun katutan jabuwen nuikin duawamis inun jawada jatuki tanani jawen shinan Diosun betsa waismawen taexun Abraham inun Isaac inun Jacob jatu katuni jabun bababun kakape Cristokidi danainbu Dios jatuki sinatayuikiki. Jaskawen taea ja jatu maebaun matu jawenabu wadiayuikiki. Jaskabia jatun xenipabun ikunwanibu jakimama jatuwen nuikin Diosun Israelbu jeneama jatu shinandiaikiki.

³⁰Uatian jawa Jesucristokidi unanma Dios man ninkama iyupaunibuki, matubunan. Jabiaska keskadiai natian Israelbun Jesucristokidi shinankin Dios ninkabumadiki, man ini keskakinan. Jaskaken Dios natian matuwen nuikiki. ³¹Jaska inun, natian jawen nuiwen Diosun matu jawen duapa uinmakin matu duawaikiki. Jabiaska keskadi wakin ja Israelbu jatuwendu nuidiaxanikiki. ³²Dasibi yudabu chakabubiaken Diosdan, dasibiwen nuikin janu jawen nui jatu xabakabi uinmakatsis ikikiki, tsuada Israelbu inun tsuada Israelbumakidi jawa shinanmadan.

³³Jaskaken nukun Epa Diosdan, jawa yupaismaki. Dasibi ninkai inun

shinain unanepajaidaki. Ja inun, jaska wakatsis ikin Diosun shinankin jamapai akubainmisdan, jawen akadan, nun jaska waxun tapintidumajaidaki. ³⁴Ja inun, jaskadada Diosun shinanmis jawen jancha yuixunikatun kenekin: “Diosun shinanan, tsuan ninkatidumaki. Ja inun, Diosun jadakidida shinanyan tsuan medabewakin xabakabi ana jaska waxun yusintidumaki”, ³⁵iwanan, ana yusinkin: “Jamapai betsa betsapa tsuanda Dios axunbiatan jawen dayawen taexun duawakin jau eadi inanxanun, iwanan, jaska shinantimajaidaki, menan akinan”, iniki. ³⁶Jaskaken betsa tukama tibi Diosun damiwanidan, jawenaski. Jawen kushipawen dasibibu maniabuki. Dasibibu ja jiweabuwen Dios benimakunkainxanun, iwanan, jabu tibi damiwaniki. Jaskaken kenwakin jeneyamakubainankanwen, Diosdan. Jaskakidan.

Jiwea benawen jiwei medabenam ekunkaintikiaki, na janchadan

12 ¹En betsabu inun en puibuun, nukuwen dabanan ikin Diosun nuku duawakubainmiswen taexun jawada shinankin bechipaiai natian man axunkubainun bun xabakabi en shinain matu yununun ninkakanwen. Jaska Dios kenwakin yuinaka detetan menukin inankin apaunibu keskama jakia natian matun jiweawen Dios duawanun, iwanan, medibi paxkai pepatan Dios matun yuda inankuian keska wakin jawen kemutapai benimawakubainkanwen. Jaska wakinan, chanima kayabi man Dios kenwaiin. ²Jaska jabun ikunwanbuma natian mai anu jiwe bestixun jamapai tibi akin shinanmisbu keskakin ana shinanma jakia shinan betsa watan jaska Diosun matu jiwemakatsi ikai jaska bechipaiai besti tapinkubainkanwen. Eska jiweidan, jaska Diosun bechipaimis

man tapinkubainxanaii, pepakinan, Dios benimawai kemu tapakinan, kanei jawa chintuanmadan.

³Jaskaken Dios ewen nuikin ea duawakin jawen jancha yuixunika kushipa ea waniwen taexun matu yusinun ea ninkakanwen. Jaska matu tibibu Diosun duawakin matu ikunwanma akeakea shinankin unantant matumebi shinan chakakin yuikin: “En juni pepaken Diosun ea katuniki”, iwanan, shinain ibubis kenjaidayama kubainkanwen, betsabube janchaidan.

⁴Jaska inun, nukun yuda jidabi ja pabu tibi nebauna daya betsa tibi jayaki, jaskasmadan. ⁵Jaska keskadi nun yuda ichapabubia Cristoki dasia nun yuda bestichai keskaki, nun jabun Cristo dayaxunai pabu betsa tibibia nun jabias yuda bestichai keskabuki.

⁶Nun jaskawen taexun nuku tibi jawen dayati kushipa nuku inamiski, jaska nuku tibi nuku inankatsis ikin inankinan. Jaskaken Diosun jawen jancha yuixunika jadatuda matu katua ikunaidawai jawen kushipa jayakin xabakabi jawen kakape jatu yusiin janchakubainkanwen.

⁷Jaska inun, tsuabuda jawen medabenanti kushipa jatu inanken jau jabias medabenanti kushipawen ikunwain betsabu jau jatu uinmakin medabewakubainunbunwen. Jaska inun, tsuabuda Diosun jancha yusinan kushipa inankin ikunwainbu kushipa wakin jatu yusinkin jau tapinmakubainunbunwen.

⁸Jaska inun, tsuabuda Dios anua shinan chankanwen jatu chibanmatidu kushipa bitan ikunwainbu betsabu medabewakin jau Jesucristo jatu chibanmakubainunbunwen. Jaska inun, tsuanda jawada bitan medabenankatsis imisbudan, yaushiamma jau jatu inankin uinmakubainunbunwen. Jaska inun, tsuabuda ikunwainbu betsabu medabewakin meketidu kushipa

wakin jaya wabudan, kaneama jau uindakubainunbunwen. Jaska inun, tsuabuda yuda betsa nuitkapaibuwen nuimis kushipa jaya shinan chankanwen jau jatu medabewadiakubainunbunwen.

**Jesús chibain jaskai
jiwetikiaki, na janchadan**

⁹En betsabu inun en puibuun, yuda betsabuwen nui bechipaikin tsua padanma chanima kayabi uinmakin jatu medabewakubainkanwen. Jaska inun, jawada pe besti beya wakin jawada chakabu akama jenekin danankubainkanwen. ¹⁰Ja inun, matun betsa kayabi keska wakin ikunwainbu betsabu jawada pepa man amis shinanma jakia ikunwainbu betsabube medabenamekin jabube nuinamei duanamekubainkanwen.

¹¹Ja inun, jawada nukun Xanen Ibun bechipaiai dayaxunkin ibubis chikishama jamapai tibi shinankin juintinin shinain benima paewen axunkubainkanwen.

¹²Ja inun, Diosun matu yubani jawa betsa wama ixanai unankin man manaiwen taea benimai jiwekubainkanwen. Ja inun, matu ichakawaibu bika tenei chintuanma mestenkubainkanwen. Jaskakin Diosbe janchakin jamapai tibikiyu yukai jeneyamakubainkanwen.

¹³Ja inun, matubetan ikunwain betsabu mabu yupaibu jawada man jaya paxkaxunkin jatu medabewakubainkanwen. Ja inun, ikunwain betsabu janiada matuki bai beabu matun jiwe anu ixun pimatan jatu uxankubainxankanwen.

¹⁴Ja inun, tsuanda matu ichakawaibu jabiaskadi ana shinanma jatukidi pe besti yuikin jatu jancha wakubainkanwen. Jaska wakin pepakidi Dios jatu yukaxunkubainkanwen,

chakabukidi yupukin Dios jatu
yukaxunamadan.

¹⁵ Ja inun, tsuada juinti benimai shinan chankainbube jabiaskadiai jatubedi benimai shinan chankankubainkanwen. Ja inun, tsuada bika teneai juinti nishma punu nukaken jabiaskadi jabetan shinandiakubainkanwen.

¹⁶ Ja inun, man jatubetan ikunwain jabube jiweadan, jatube ja ikama duanamei unanuma jiwekubainkanwen. Matunmebi keanmadan, jabun jawada jatun jamapai shinanma jakia jabu shinan pepa jaya keinsbumabe jaibunatekubainkanwen. Tsuanda shinain: “Ea besti unanepakin en pewamiski”, ikin jatu mesewakin dakewayamakubainkanwen.

¹⁷ Ja inun, yuda betsabun matu ichakawabu ana jatube manakunany amakubainkanwen. Ja inun, jawada pepa yuda betsabun bechipaikin matu yunuabu chibankin man jaskadi akaidan, jatu bebunxun xabakabi axunkin uinmakubainkanwen. ¹⁸ Ja inun, yuda betsabu duawanun, iwanan, dasibi pepa man akubaintidubu besti aki jatube unanuma jiwei pekatsis man ikaidan, dasibibu daewakubainkanwen.

¹⁹ En betsabu inun en puibuun, matuwen nuikin matu yuinun ea ninkakanwen. Yavé Diosun jatu yuikin: “Tsuanda matu chakabuwai ibubis en jatu kupixanai”, ikaya nuku kenexuniki. Jaskawen taea tsuanda matu chakabuwakin ichakawayadan, jau Diosun jatu kupixanun ibubis jatu kupiama teneyukubainkanwen. ²⁰ Jakia Davidin bake Salomón unanepatun jatu yusinkin: “Matuki pubenbiamisbu jabu buniabu jatu pimakubainkanwen. Ja inun, unpax manudiaibu amadiakanwen. Man jatu jaska waidan, pepa besti man jatu axunkubainkatsis ikai uin dakei besu xanabidi ixankanikiki”,

anikidi jabiaskadi shinankin chibandiakubainkanwen. ²¹ Ja inun, jau chakabun matu maemakin binuyamanun jaskawen taea matunan, pepawakin chakabu binumakubainkanwen.

**Matun gobierno xanen
ibubudan, Diosun katumisen
ninkakubaintikiaki, na janchadan**

13 ¹En betsabu inun en puibuun, unanuma nun jiwenunbun jaska juni kushipabu matun xanen ibubu man ninkakubainunbun matu yusinun ninkakanwen. Jaska Diosun amis jabun unanbumabiaken dasibi xanen ibu betsa betsapa mai anua katuxun Diosun jawen kushipawen jatu yunukin mistukubainmiski. Jaskawen taexun jatun yusian chibankin jatun yunuti inun jatun nemati dasibibun ninkakin jau chibankubainunbunwen. ² Ja inun, Diosun jawen shinanen tsuada katukin kushipa wakin yunukin jatu xanen ibu wabiaken tsuabunda jabun jatun xanen ibu yunua danankin chibankatsi ikabumawen taexun jatun xanen ibun jatu kupimaxanikiki. ³ Janua yuda kushipabu matun xanen ibubu Diosun jatu wadan, jau jabu man pepaibu jawen matu datekin mesewati akamaki. Jakia jabun chakabu akin jabun jancha chibankuma jaskaibuwen taexun nemakin jatu jabu kupikatsi amiski. Jaskawen taea man dateyabi jiwekatsi ikamadan, jatun yunuti inun jatun nemati jancha ninkai pe jiwekin chibankubainkanwen. Januxun xanen ibun chanima man jawa chakabuma unankin jawa chakabu matukidi shinantidubumaki. ⁴ Jaska inun, man chakabukubainaibun matun shinan man betsa wanunbun yudabu Diosun jatu katua matun chakabuwen jabuan Dios matu kupixunxanai unain gobiernon jatu yunuaibuki mesei jatuki datekanwen.

Jamen ikabumaki. Jaska kenu chaipa sawea mapuabudan, jatun dau bestimaki. Jakia chakabuaibu jatuki tanadan, kaxemaki, jabun chakabuaibudan.⁵ Ja inun, jau Diosun matu kupiyamaxanun, iwanan, matun gobieno xanen ibubu Diosun matu chibankatsis ikaiwen taexun jatu kushipa wakin matun xanen ibu wa jabun yunuti inun jatun nemati ninkatan man chibainan, matu kupiai nemati bestimaki. Jakia jaska Diosun bechipaiai akaibu ninkakin man shinantidubki.⁶ Ja inun, matun gobieno xanen ibu Diosun katuatun matu mekekin Dios dayaxunaibuwen taexun matun xanen ibubun jawen medabewati pei jawada matun daya pei man biai matu yukaibu xabakabi inankin jatu pakakubainkanwen, yuda dasibibun pei ichawaxun jatunmebi jatun jawada jamapai biti pei bixun adutan pei texewen jau yuda dasibibu medabewakubainunbunan.

⁷Ja inun, jaska tibi gobieno xanen ibun daya jaya tibi axunkubainkanwen. Jawen medabewati pei jawada mabu bikin inun mae betsa anu piskumakin xanen ibu jau impuesto pakanunbunwen. Xanen ibu duawai jau jaki mesenunbunwen. Ja inun, Xanen ibubukidi shinan chakama shinan pewakubainkanwen.

Duapai inun nuikipatikiaki, na janchadan

⁸Jaska inun, yuda betsabu dibitan jawaida jatu paka keyukubainkanwen. Jaska keskadi shinankanwen. Matube jiweabuwen nui medabenain man jatu dibia inain keskai duanamekubainkanwen. Jaska wakin jatukidi jaska shinankin ja Diosun yununi chibankin matun akin menekin ma kaneamaki.⁹ Jaska inun, yuda betsawen nuikin jatu medabewakin Diosun yunuti inun jawen nemati dasibi

man chibandiakubainaii. Eskaki, matu yusinun ninkaidakanwen. Diosun jawen nemati yuikin: "Juni ainyanbia ainbu betsabe chutanametimaki. Ainbu beneyabia juni betsabe chutanametimadiki. Mimebi pubenkin yuda betsa kupikin tenantimaki. Tsuanda jamapai yumetsutimaki. Tsuada jamapai mabu jawendua jaya kemutapa bechitan jawen kemutaskayamaxankanwen". Ana jancha juneama xabakabi uinmatidan, Diosun yunuti binu keyuadan, eska yuini: "Mimebi nui min mekeai keskakin yuda betsa mibe jiweawen nuikin mekekin jatu shinaindakubainkanwen", aniki, Moisinan.¹⁰ Jaskaken tsuabuda jatube jiweabuwen nuimisdan, jabudan, jawa chakabuma jatuwen nuikin dasibi Diosun yunuti inun jawen nemati chibankubainkanikiki, jawa kaneamadan.

Jesús ma jua kemajaidakiaki, na janchadan

¹¹Jaska inun, Jesucristo chibankin taewakin Diosbe nun jiwxenai jawen jancha ninkakin nun unanidan, ma ana chaima kemaiwen taea ana jatixunda jaki chikishama yuda betsa betsapabuwen nuikin jawada Diosun bechipaiai menan jawaida tapin jawen mekedikanwen, uatian nun jiweshina keska jaskas shinanmadan.¹² Jaska inun, ana badi ichapama mai anu nun jiweyuaiwen taea jamapai chakabu ewakainaya menan bestentan shinandikanwen. Nai anu Diosbe nun jiwxenai ma kemaiwen taexun chakabu jenedikanwen. Eska keskakinan, soldadobu tsakanamenun ika jawen mane tadi kushipa sawemis keskakin Diosun kushipa bitan jawa dateama Satanás nemakubainankanwen.¹³ Jaska inun, jawada chakabu june ana akama

nukun jiwea xabakabi jatu uinmai pe besti jiwenankanwen, eska tibi ana akamadan, piti pepa kemutapa ichawatan pichakayamamadan. Jaska inun, ana paenyamanankanwen. Kemui ana chutanamebaunyam anankanwen. Jamapai chakabu bechipai kemui jawenchains jakidibis ayamakubainankanwen. Ja inun, jawadakidi ana chitenamei ja iyamanankanwen. Ja inun, jawada yuda betsa jaya uin jaki sinayamadiakubai nankanwen.¹⁴ Ana jaska chakabu tibi shinankin akama nukun Xanen Ibu Jesucristoki dasitan jawen kushipawen kushipakin jawen bai kaya tapia besti chibankubainankanwen, pepaidan.

Nun jabubetan Jesús chibainbu yuantomakiaki, na janchadan

14 ¹⁻² Jesú chibainbu nun betsa betsapabuken Diosun nukukidi shinamis matu yusinun ninkakanwen, eskakididan. Jesucristo jabun man chibainbu betsabu ma juinti kushipa jaya shinankin dasibi piti betsa betsapa man pimiski. Janua betsabudi jabun tapin taewaibu juinti babu mestendiabuman nami pisbumaki. Jaskawen taexun tsuada ja yudan ikunwankin taewai jaibu wakin jawada pimis inun jawada pismakidi yuinamei jabe ja idabeama uindakubainkanwen.³ Ja inun, jadatubunda jamapai piti betsa betsapa dananma pimisbun ikunwain betsabundi piti betsa danainbu jatu ja akin dake wayamadiakubainkanwen. Jaska inun, jabiaskadi wakin yuda betsabun jamapai betsa betsapa pimisbu jadatubunda piti betsa danainbu jatu ja akin dakewa diayamakubainkanwen, Diosun jawa jatu danainsmawen taexunan.⁴ Ja inun, jabu xanen ibukin jatu yunuai tibibun jawen dayadu tibi ja akin pewamis inun kenwanmiskenan, tsuada ibumabia

madiastun man jatu ja atidumaki. Jabiaskadi wakin nukun Xanen Ibu Jesucriston jamebi jawen dayadubu jatu kushipa wakin jawen bai kayatapia jatu chibanmakin jatu pewakubainmiski. Jaska jatu yunuai shinankin jau axuin jiwekubainunbunan.

⁵ Jaska inun, betsakididan, Jesús chibainbu betsabunan, semana tibi jadatuda xaba medibi watan janu ichaxun Dios kenwanun ika ikubainmisbuki. Jakia ikunwainbu betsabun xaba tibi kasmai meshu medan tibi ichaxun Dios kenwanmisbuki, xaba medibi tibi jabiasbiakenan. Jaska wakinan, jawatianda xaba betsatian ichatan ikunwain titbitun Dios kenwakin kaneabumaki. Jaska shadabu wakin man ikunwain unantan dakeyamakubainkanwen.

⁶ Ja inun, jadatuda xaba betsa medibi watan janu nukun Xanen Ibu kenwakin Dios duawakatsis ikin jau janu akubainunbunwen. Ja inun, tsuabunda nami inun jamapai piti betsa betsapa dananma pimisbun Dios duawanun, iwanan, jau kenwantan pikubainunbunwen. Ja inun, tsuabunda yunu besti pimisbunan, Dios duawanun, iwanan, kenwantan jau jaskas pidiakubainunbunwen.

⁷ Janua nukubu tibidan, ana ibubis nun jiweamaki. Ja inun, nun ibubisdi mawama ixankanaii.⁸ Jakia nukun Xanen Ibuki ma nun dasiadan, nun ja jiwexunaii. Ja inun, mawaidan, nukun Xanen Ibu duawakatsis iki nun mawaxanaii. Natian nun jiweyuabu inun nun mawaxanaibudan, ma nukun Xanen Ibuki nun dasia nun ma jaskadan, nun jawen yudaki.⁹ Jaskawen taea Cristo mawatan ana bestenidan, chanima dasibitun xanen ibunun ika iniki, natian nun jiweabuna inun jabu mawabunadan.

¹⁰⁻¹² Januxun Diosun yuikin:

“En jancha chanima matu yuinun ninkakanwen.
 Yuda dasibbu unantan en jatu kupiaya danti itan ea kenwankin jaska ea besti kushipajaidatun en jatu kupiaya ea yuia akeakexankanikiki”, aka jawen jancha yuixunikatunkeneniki. Jaskawen taexun tsuabunda Jesús chibain betsabu jatukidi nun jatu yuainbu inun tsuabunda Jesús chibain betsabu nun jatu dananmisbu nun jaska jatukidi janchamis Dios bebun nia nun jaki chaniaya nuku tibi unanti wa akeakexanaiwen taea nukubetan Jesús ikunwainbu ana jatu yuankin dananyamakubainankanwen, nukunmebidan.

Jawada piti tibi chakabumabiaken ikunwain betsa babu kanematidukena pitimakiaki, na janchadan

¹³ Jaska inun, tsuanda Cristo ikunwainkidi jatube ana yuanan anyamakubainkanwen. Ja inun, nun jatu uinmachaka jau jaska shinain ana nukukidi jancha chakabu yuiyamanun bun jamapai piti tibiwen jabun ikunwain betsa jatu babu watidu inun jamapai piti tibiwen jatu kanematidu ana meama jenekubainkanwen. ¹⁴ Jamen ean en Xanen Ibu Jesús en ikunwain en jaki dasiawen taea en shinanan, jamapai piti tibidan, jamebi jawa chakabumaki. Jakia tsuanda jawen shinan mekei jaska shinankin pikatsi ikamadan, jau meyamakubainun bunwen. Chanima jawenadan, chakabuki. ¹⁵ Jaskaken Jesús man chibainbu betsabunan, jawada ja piti pisbuma pikin man jatu ichakawaidan, ja piti ana meama jatuwen nuikin ana jawen kein kemuama jenedikanwen. Man

jaska wamaken ja ikunwain betsabu Cristo jatu mawaxunbianiken juinti babubu chintuin piti pishta bestiwen benutidubuki. ¹⁶ Jaskaken jawada piti shadabu man pimis Diosun matu nemamabiaken Jesúsunabu betsabun ja piti dananmisbu jau matukidi jancha chakabukin yuanyamakubainun bun ja piti pebiaken jatu uinmakin ana piyamakubainkanwen. ¹⁷ Dios xanen ibuai nun ikunwainbuden, jawada nun pikatsis ikai inun, jawada nuxuti nun akatsis ikai shinain jawen nuitimaki. Jakia nukuwen Dios xanen ibuaidan, jawen Yushin Pepatun jaska bechipaiai nuku kanemakatsi ikama inun, nuku unanuma jiwemai inun, nuku shinan chankanwakin benimawakin nuku jiwemaikiki. ¹⁸ Ma jaska jiwekin Cristo duawakin jawen Epa Dios benimawaya yudabundi matu uinkin kenwantidubuki.

¹⁹ Jaskaken jawa chakabu ana piama medabenamekin ana jatu kushipa wakin unanuma jiweti benakubainankanwen.

²⁰ Jaska wakin Diosun daya man benuama ixanaii, piti nun pimis shinain ja ikamadan. Chanima dasibi piti pepa bestibiaken jawada pitiven Jesúsunabu chintunmatidu jadan, chakabuki.

²¹ Ana ja meyamakubainkanwen, nami betsa pikinan. Ja inun, jamapai jene paepa akin Jesús chibainbu betsabu man jatu kanematidudan, ana meyamakubainkanwen. ²² Jaskaken nami piaibukidi inun jamapai nuxuti aka paentidubukidi jaska Diosun matu nemakin yusian jaska man shinain tsuabuda yuiyama jaska Diosun matu yusian besti chibankin shinankubainkanwen. Tsuanda Diosun kushipa jaya yudabun nematiki meseama dasibi jawen yudawen jamebi mekei jawa bika teneama benimakunkainmiski. ²³ Jakia tsuanda pitikidi shinankin: “Nami en ana pihamaki”, ibiakin pikin

kanekanikiki. Jamen betsan piamadan, jatun shinan kushipa watidubuki. Jamen jaskama jatun shinan babu jayabia pidan, kanei Dioskidi chakabukanikiki.

Matunmebi besti nuiama Jesús chibankin betsabuwen nuikin jatu duawatikiaki, na janchadan

15 ¹Ikunwain betsabu juinti babuaibu jaska Diosun nuku jatu medabewamakubainkatsi ikaikidi matu yuinun ninkakanwen. Cristo jabun ikunwainbu juinti babuaibu jau kushipadianunbun nun ma nuku dukun jaska jayai nun juinti kushipamis jaska shinankin jatukidi pechiama jatuwen nuikin jatu jakimama jatu medabewakubainankanwen, nukun besti jaska nun shinain keska nun iyamanunbunan. ²Ja inun, nun ikunwain dasibibunan, nuku dapi jiwebaunabuwen nuikin jamapai tibiwen jatu medabewakin jatu ikunwanmadiak ubainankanwen. ³Eksa shinanankanwen. Cristo jamebi jaska ikatsis ikaikidi shinankin katuama iniki. Jakia jaska bebunkidi Diosun jancha jakidi kenenibu menei ikunkainiki. Jaska Diosun jancha yuixunika Davidin kenekin: “Epaan, mia danankin ea ichakawabu en mia tenejaidaxunaii”, ini keskakin Criston menekin teneniki. ⁴Jaska dasibi Diosun jancha yuixunikatun bebunkidi kenenibudan, jaska ja kenen i tapinkin shinain nun jawen jiwekubainxanunbun nuku axunibuki. Jaskawen taea ja Diosun jancha uinkin tapin nun chintuanma nuku medabewaya jawen taea benimai nun jiweibi jiwxanai nuku manakamaikiki. ⁵Jaskaken Dios matuwen nuikin matu medabewaya jaska matu jiwemakatsis ikai jawen nui pepa jau matu uinmakubainunwen, jaska Jesucristo jiweni keska matu chibanmakinan. ⁶Diosun matu jaska

waya matudi dasibibu medabenamekin nukun Xanen Ibu Jesucriston Epa Dios dasibibun jabiaskas shinankin jau kenwandiakubainunbunwen.

Israelbuma jawenabu Diosun jatu wakatsis inikiaki, na janchadan

⁷Januxun jaska Criston matu jaibu wani keska wakin ikunwain betsabube jaibunamekin jatu beyawakubainkanwen, jaskai man pekunkainaya jau dasibibun Dios kenwankubainunbunan. ⁸Jaska bebunkidi nukun xenipabu Diosun yubaniwen taea jaska Dios chani chakaisma jaska yubai janchani jaska shadabu Dios yubakani menei Cristo nun Israelbu anu taxniniki, duawakin nuku medabewanun ikadan. ⁹Jaska nukukidi bestima man Israelbumawendi taea Cristo taxnidianiki. Jaskakidaniwen taexun man Israelbuman Dios duapajaida man kenwandiakubaintidubuki. Jaska bebunkidi Diosun jancha yuixunika David jadidi nawai kenekin:

“Jaskawen taexun nawa xukua betsa tibibun mia kenwainbun jatubetan mia shinankin kenwakin jui kushipawen nawati pepawen en mia kenwankubainxanaii”, iyamaken ¹⁰ana jawen jancha yuixunika betsa Moisin yuikin:

“Nawa xukua tibibuun, Diosun Israelbu katunibe jatube benimakubainxankanwen”, iyamaken ¹¹ana betsandi yuikin:

“Nawa xukua tibi man manibaunabuun, nukun medabenan jiweibi jiwea kenwankubainxankanwen”, iyamaken ¹²jaskakididi Isaíasin yuikin: “Davidin epa Jesén baba kaintan nawa xukua tibibu mekei jatun xanen ibuaya jawen taea jabudi Diosunabui jaki chiti ikin manaxankanikiki”,

iniki.

¹³Jaska jakidi kenenibu keska wakin man Jesús ikunwainbu Diosun jawen Yushin Pepatun kushipawen unanuma matu jiwemakin benimawaya jawa chikishama jawen matu duawaxanai pepa manakakubainkanwen.

**Jesúsun kushipa jaya Pablo
dayanikiaki, na janchadan**

¹⁴En betsabu inun en puibuun, yuda betsabuwen nuikin man jatu medabewamis inun, Diosun yusian man unanajaidai inun, matubetan ikunwain betsabube man pe yusinanamis en jawa chakabu matukidi yuitiduma en unaiin.

¹⁵Jakia matu kenexun bumakinan, chanima kayabi jawada jawen yusian betsa kanei man jakimayamanunbun, iwanan, matu ana shinamanun, iwanan, en jancha kushipawen kenexunkin en matu yuiiaii. Jaska Diosun ea duawakin jawen kakape yuixunika ea yunukin

¹⁶man Israelbuman jawama man Jesucristo ikunwanxanunbun ea jawen kenwanika betsa Diosun ea nichinkin jawen kakape jawen bake Jesúskidi en matu yusinbaunun man Israelbuma anu ea yununiki. Jaskawen taea man Israelbumadi Diosun Yushin Pepatun matu medibi wa jawa chakabuma inankuin pepa keska Dios be bun matu nichintan Dios en matu uinmakatsis ikaii.

¹⁷Jaskaken Jesucriston daya en bini en axunmiswen taea jaska Diosun ea yununi chintuanma en akubainmiswen taea chani chakama en kentiduki. ¹⁸Jaska kakape bui ea janchaidan, jamapai shadabukidi en janchai kaismaki. Cristokidi besti man Israelbuman man Dios chibanunbun matu yusin en kamiski. Jaska jatu yusin taewakinan, jancha bestiwenma jatu axunkin uinmakin ¹⁹Diosun Yushin

Pepatun kushipawen jawada atimaska yudabun atidubuma dami betsa betsapa jaskabiamawakin ea wama en akeakeaya jawen taea kushipakin kakape Jesucristokidi jatu yusinkinan, jaska Israelbuma betsa betsapabudi en jatu chibannmakubainima besti en matu yuiiaii. Januxun taewakinan, Jerusalén maewan anuxun en taewashina mae tibi iake iaketankaini jadi mai pakea betsa Iliria anu en chintuntanyamaki.

²⁰Jatu yusin kaidan, januxun tsuan Jesucristokidi jatu yusindiabumanu besti en kakunkaunkatsis imiski, januxun Jesucristokidi kakape yusinan betsan ma jatu yusinma anu nashui iki kamadan.

²¹Diosun kakape Jesucristokidi man ninkaxanaibukidi Diosun jancha yuixunika Isaíasin kenekin:

“Nukun mekenankidi tsuan jatu banabimadiabumanuxun jaska shinainsbuma damas ninkaxankanikiki.

Ja inun, jabun jakidi jawa ninkadiabuman tapindiaxankanikiki”, ini keskai en ikunkainaii.

**Roma anu Pablo jatuki bai kakatsi jatu
banabimanikiaki, na janchadan**

²²Jaska matukidi bai kanun ika jawenchains en shinambiakubaini jaska Diosun ea amai aki yusinkubauni matu anu en kadiamaki. ²³Jakia badi betsation jaska en shinanyama mae tibi anuxun ma en jatu yusin keyuawen taea natian ana en matukidi shinaii,

²⁴samama en matu uin kakatsis ikaidan. Jadi kaidan, España mai pakea anu kakatsi man Roma anuabu janu dukun matube uinanain benimatan jabianua eskadabes matube medabenantan janua unudi en kaya matundi matun jawadawen man ea medabewa España anu en katidu en shinaii. ²⁵Jakia

natianan, Jesús ikunwainbu Jerusalén anuabu jatu medabewakin jatu pei ichawaxunshinabu jatu buxuin en kayuaii,²⁶ eska jatu waxunshinabu en jatu buxuainan. Jabubetan nun Jesús ikunwainbu Macedonia mai pakea anuxun inun Acaya mai pakea anuxun jatu medabewakatsis ikin jatukidi yubakatan jatun pei ichawatan Jesucristo ikunwainbu nuitapaibu Jerusalén anuabu inankin jabun ea yunushinabu en jatu buxunyukatsis ikaii.²⁷ Ja inun, jaska jatukidi shinan pewatan chanima jatu axunshinabuki. Eska shinankinan, jawada jawen katuabu Israelbu Diosun jatu yubani jatu inankin Israelbumadi inankubainaiwen taexun Israelbuman jawada pepa Israelbu jatube manakunankin Macedonia anuabu inun Acaya anuabun jabuan jabu mabuyabun jatun jamapai biti pei yaushiabuma paxkaxun Jerusalén anu nuitapaibu duawakin jatu inankatsi jatu manakamabuki.²⁸ Jaskaken jatun pei ichawaimabu ja dukun Jerusalén anuabu en jatu pei bumayuui. Jaska wakin jatu pewaxuntan janua España anu jatu yusin kai matu dainbaini en matuki bayuxanaii.²⁹ Chanima en jaska shinain keska en matuki nukuayadan, jaska Jesucriston jawen duapawen nuku duawamiswen en matube benimakatsis ikaii.

³⁰ En betsabu inun en puibuun, nukun Xanen Ibu Jesucristowen ja Diosun Yushin Pepan betsabuwen nuiti nuku inanmis jaskawen taea man ea jakimayamanen en matu ea akaii, en daya bikakidi man ea Dios yukaxunkubainunbunan.³¹ Jaska inun, jabun Dios danainbu Judea mai pakea anuabun jau ea meyamakubainxanunbun ea yukaxunkin Jesucristo ikunwainbu Jerusalén anuxun jau ja pei jatu ichawaxuinmabu

danandiayamaxanunbun Dios jatu yukaxuindaxankanwen.³² Jaska Diosun ea yunuaya matu anu kai jikitán janua benimai en juindukunyuxanun jaskakidi Dios ea yukadiaxunxankanwen.³³ Diosun jau matu unanuma jiwanman jaska en matukidi shinaiin, jaskakidan.

Pablon jawen jaibuaibu anu jawen jancha jatu bumanikiaki, na janchadan

16 ¹Cincreas mae anuxun ainbu dayadun ja ikunwainbu medabewamis jawen kena Febe Roma anu kaya jakidi en matu yuiai,² jikiai ikin jaska Jesúsunabu man duawamis keska wakin Febe itan jamapai tibi jayama inankin medabewaxankanwen, ea inun nun ikunwainbu betsa betsapabuwen nuikin nuku medabewakubainmis kaikidán.

³⁻⁴ Jaska inun, Prisca inun jawen bene Áquilan ebetan Jesucristokidi yusinmisbu en jatu shinanmiski. Yudabun ea ichakawaibu jabun ea medabewai ea mawaxunkeanibu inun ewen taea jaskanibu bestima nukube ichamisbu Israelbumadi jatubetan nun jatu kenwankubainmisbu Diosun jau jatu duawanun en jancha ea jatu yuixunxankanwen.⁵ Ja inun, jabetan Jesús chibain jatun jiwe anu ichamisbudi jabiaskadi en jancha ea jatu yuixundiayamaxanunbun. Ja dikabi Asia mai pakea anuxun ja dukun Cristo en ikunwanmani en jaibujaida Epénetodi en jancha ea yuixundiayamaxanunbun.⁶ Ja inun, Maríán matu dayajaidaxunkunkainaidi en jancha ea yuixundiayamaxanunbun.⁷ Ja inun, enabu Andrónico inun Junias jabube ea bichinibudan, en ikunwandiamaken jabun dukun ikunwanbin jaskawen taexun dasibi Jesucriston kushipaya yununikabun jatu unankin jatukidi shinankin kenwanmisbudi en jancha ea jatu yuixunxankanwen.

⁸Jaska inun, en jabetan en Xanen Ibu dayaxummis en jaibujaida jabe en bechipainamemis Ampliato Diosun jau duawanun en jancha ea yuixundiaxankanwen. ⁹Ja inun, Urbanon ebetan Jesucristo dayaxummis inun en jaibujaida Estaquis xunska en jancha ea yuixunxankanwen. ¹⁰Ja inun, Jesucristo dayaxuni bika betsap mebiai chintuinsma Apeles en jancha ea yuixundiaxankanwen. Ja inun, Aristóbulo jawenabube jiweabu jabudi en jancha ea jatu yuixundiaxankanwen. ¹¹Ja inun, enabu Herodión xunska ea yuixundiaxankanwen. Ja inun, jawenabubetan Jesús chibainbu Narcisobe jiweabu en janchadi ea yuixundiaxankanwen. ¹²Ja inun, ja ainbu dabeta nukun Xanen Ibu dayaxunkubainmisbu Trifena inun Trifosadi en janchadi ea jatu yuixunxankanwen. Ja inun, ainbu betsap nukun jaibujaida Pérsiden nukun Xanen Ibu dayaxunkunkainmis ea yuixundiaxankanwen. ¹³Ja inun, Dios pejaida dayaxummis unan keyuaibu Rufo inun jawen ewa en ibu keskadi en jancha ea yuixundiaxankanwen. ¹⁴Ja inun, Asíncrito inun, Flegonte inun, Hermes inun, Patrobas inun, Hermas inun, Jesúsunabu betsabu jatube ichamisbu Diosun jau jatudi duawanun en jancha ea jatu yuixundiaxankanwen. ¹⁵Ja inun, Filólogo inun, Julia inun, juni betsap Nero jawen puibe inun, Olimpas inun, Jesús chibainbu dasibibu jatube ichamisbu en jancha ea jatu yuixundiaxankanwen.

¹⁶Jaska inun, Jesús chibainbu dasibibu tibi jatuki nukutan jatu dananma yuka iki jatube ikukunankubainxankanwen. Jaska inun, na nenu jiweabu Jesucristo chibainbu ichati jiwe tibi anuabun jabun janchadi matu bumakanikiki, Diosun jau matu dasibibu duawakubainunan.

Roma anuabu Pablon ninkatan jatu kenwanikiaki, na janchadan

¹⁷En betsabu inun en puibus, jaskaibu man uinunbun en matu yunui. Yusinan betsabun jabun matu padankin nun jaska matu yusinmis betsap wakin matu shinan betsamakin matu paxkatidubuki. Uindakanwen. Jaska nun matu yusian man ninkamis keskamaken jatu danankin jatun yusian ana ninkama ana jatube ichayamakubainkanwen. ¹⁸Jaska jabu padananankin nukun Xanen Ibu dayaxunaibudan, jamen ikaniki. Jaska jabun shinain besti bechipaikin jatun jancha jawendua chenxwen besti jatuh jancha wakin yuda betsabu Cristokidi kakape unanjaidadiama bepadankanikiaki. Jaskaken jatuki kemama dunkekubainkanwen. ¹⁹Esa matukidi dasibibu pe chaniaibu en matu ninkamiski. Jaska man Dios dayaxunaidan, jawada Diosun bechipaiai unantan man amis inun, jawada Diosun danankin bechipaiai unandiakin man shinan jusiama akeakemis matun shinan unain en matuwen dateama jaska matukidi shinain en benimaii. ²⁰Man jaskai jiweawen taexun nukun Epa Diosun nuku unanuma jiwemamistun matu medabewaya man Satanás chitekin ja aka jawaida babutan matu mae anua kainkainxanikiki. Man jaska waya nukun Xanen Ibu Jesucriston jawen pepawen jau matu unanuma jiwemakubainunwen.

²¹Ja inun, Diosun jau matu duawanun Timoteo ebe dayamistun jawen jancha matu yunudiaikiki. Enabu Lucio inun, Jasón inun Sosípatron jatun jancha matu yunudiaikiki.

²²Ea Tercion Pablon jancha en matu kenexunaitun nukun Xanen Ibu Jesús en ikunwandiaiwen taexun en janchadi en matu yunudiaii.

²³Ja inun, nenu Corinto anuxun ikunwainbu Gayon jiwe anu ichamisbu inun jawen jiwe anu ea jiwematuin jawen jancha matudi yunudiaikiki. Ja inun, na maewan jidabi pei mekemis Eraston jawen jancha matu yunudiaikiki, Jesúsunabu Cuarton xunskatunan.

²⁴Nukun Xanen Ibu Jesucriston matu medabewakin jau matu dasibi duawakubainxanunwen. Jaskakidan.

**Roma anuxun jabun Jesús ikunwainbukidi
Dios kenwanikiaki, na janchadan**

²⁵Nukun Epa Diosun matu bechipaikin jawen kakape Jesucristokidi datan akin en yusinmis man ikunwambiaibuwen taexun Epa Diosun matu

chintunmatiduma ja kenwanankanwen. Mai jidabi damiwadiama na jaskakidi Diosun nuku mekei kai badi ichapa junekin tsuabuda yanedi unanmama ibiakunkaini ²⁶natian ja jancha jakidi jatu kenemakin xabakabi wama ini jaska Dios ikibi initun yununi chanima natian yudabu xukua tibibun ninkatan tapin keyutidubu wani ma nun unaiin, jau Diosun jancha ikunwankin chibanxanunbunan.

²⁷Dios ja besti unanepajaida kenwankubainankanwen, niti ikamadan, jawen bake Jesucristowen taexunan. Jaskakidan.

Jatiski, en janchadan.
Pablo

CORINTO ANUABU JA DUKUN PABLON JATU KENE BUMANIKIAKI

1 CORINTIOS

Pablon jatukidi shinanikiaki, na janchadan

1 ¹Jesucriston kushipayawakin Diosun ea shinankin ea katuniken Cristowen taea nukun betsa Sóstenesbetan en Pablon en matu kene bumakin taewaii. ²Diosun katua Corinto maewanu man jiweabu Jesucristo matu mawaxunkin medibi wakin matu pepawaniwen taexun Diosun jatudi katua nukun Xanen Ibu Jesucristo jabun chibamisbu dasibibubetan man ikunwainbu ichamisbu tibi anu en matu kene bumai uinbaunxankanwen. ³Nukun Epa Dios inun nukun Xanen Ibu Jesucriston jau matu unanuma jiwemakin pewakin duawakubainunbunwen.

Jawada Diosun jatu

**axunmiswen taexun Pablon Dios
kenwankubainikiaki, na janchadan**

⁴Man Jesucristo chibainbuwen taexun Diosun matu pepawakin duawayen Epa Diosbe janchakin en matuwen kenwankubainmiski. ⁵⁻⁶Ja inun, Cristokidi nun matu yusintani man ma ikunwankin chibankubainaya Diosun xabakabi matu unanmakin pe janchamakin jakidi matu tapinmakin jawen pepawen Diosun matu duajaidawakubainikiki. ⁷Jaskaken man Dios ikunwainbun jamapai jawen aka

tibi Diosun matu inankubainai jayatan man axunkubainmiswen taea nukun Xanen Ibu Jesucristo naiudia ana butuai man uinxanai man manakubainaii. ⁸Jaskawen taexun Diosun jawa jeneama matu kushipa wakubaini Cristo ana juaya jawa chakabu matukidi yuitidubuma ixankanikiki. ⁹Ja inun, Diosun bake nukun Xanen Ibu Jesucristobe man jiwekubainxanunbun Diosun matu katunitun duawakin jawa matu jakimakin jenebainama ixanikiki, jaska yubakani amis betsa wakin kaneismawen taeadan.

**Ikunwain shinan tibiawi
paxkatimakiaki, na janchadan**

¹⁰En betsabu inun en puibuun, nukun Xanen Ibu Jesucriston kushipawen en matu yunuai ninkakanwen. Matunmebi paxkanameama shinan betsa betsapa wama unanuma Jesús ikunwainbube jiwekubainkanwen. ¹¹Man shinan chakai ja ikin ana unanuma jiweama man shinananain paxkanameaibu Cloen enabun ea banabimashinawen taexun en betsabuun, en matu yuiaii. ¹²Matu tibikidi ea yuikin: “Nukun betsabu ja idabekin yuikin: ‘Eanan, Pablon nuku yusinmis besti ikunwankin en chibankubainaii’, ikaya betsadi: ‘Eanan, Apolosin nuku yusinmis besti ikunwankin

en chibankubainaii”, ikaya betsadi: ‘Eanan, Pedron nuku yusinmis besti ikunwankin en chibankubainaii’, ikaya betsadi: ‘Eanan, Criston nuku yusini besti ikunwankin en chibankubainaii’, ikin jaska yuikubainkanikiki”, ea washinabuki.

¹³ Ea jaska wabu, Jabaa! ¿Cristodan, nun jaska watan paxkatidubumen? Nun jaska waxun paxkatidubumajaidaki. Man ja ikunwanunbun cruzkia ea Pablo en matu mawaxunama iniki. Ja inun, en Pablo man ea ikunwainwen taexun en kushipawen matu nashimabumadiki.

¹⁴ Jaskaken juni betsabudi en nashimamawen taexun tsuabunda yuikin: “Pablón ea nashimani jawada Pablón besti yusiaín en chibaíi”, itidubumawen taexun Dios en kenwaiiin. Eska unankin matun maewan Corinto anuxun Crispo inun Gayo besti en nashimaniki.

¹⁵ Jaskawen taexun: “Pablo en chibanyan jawen kushipawen ea nashimaimaki”, ikin tsuan yuitidubumaki. ¹⁶ Jamen betsadan, en jakimadan, Estéfanásbe jiweabu en jatu nashimadianiki. Yuda betsa en nashimani en ana shinantidumaki.

¹⁷ Jamen ea yunukin: “Ea ikunwantan jatun chakabu jenekatsis ikaibu nashimakubainwen”, iwanan, Criston ea yunuama iniki. Jakia ea yunukin: “Ekidi kakape besti datan akin jatu yusinkubainwen”, akin ea nichiniki. Matu yusin kaxun yusinan betsabu jancha jawendua besti janchamisbu keskakin eadi matu anu kaxun Cristo kenwanma man ea kenwanunbun en matu yusinidan, jamen Cristo cruzkia nukuwen taea mawanidan, jawen kushipa jakimawakin jamen en matu yusinkeaniki.

Cristodan, yudabun jawen unanepati inun jawen kushipatidubukiaki, na janchadan

¹⁸ Yudabun chakabu buanun ika cruz anua Cristo mawatan ana besteni ikunwain nun jawenabuwen taexun

nun jabu Diosun jawen kushipawen nuku mekexanai nun ma unanyan, jaska shinanma yuda betsabun yuikin: “Nuku tatima yuimisbudan!”, jabun Jesúz jaibuwakatsi ikama nukun yusian dananmisbuwen taea jabu mawa kayabi tenexankanikiki. ¹⁹Jaskaken ja yudabukidi yuikin jawen jancha yuixuni ka Isaías Diosun yuikin:

“Jabu unanepabu unainsmapa keska wakin,
dasibi tapinkin kaneisbuma
unandiamama keskabu en jatu
waxanaii,

jawadawen unanepamis jawauma
keska wakinan. Manayuwe”,
aka nuku kenexuni. ²⁰Jaska inun, yuda betsabu unanepabia bun Diosun jatu binumiski. Betsabundi Diosun nemati inun jawen yunuti yusinanbamis bun Diosun jatu binudiamiski. Betsabudi yuda betsabe ja idabekin binubiamisken Diosun unankin dasibibu binumiski. Jaskaken Diosun dasibi unanjaidakin jaska yudabun shinantidu binukin unainsmapabu keska jatu wamiski.

²¹ Jaska inun, yuda betsa betsapa unanepabiakin Dios unanbumaken nukun Epa Diosun dasibi unanjaidakin kakape nuku jatu yusinmaya ichapabun danankin: “Tatima ikanikiki!”, ibiaibun nun matu yusianyan Cristo man ikunwainbu jawenabu Diosun matu waniki, niti akamadan. Jaskakin man shinan betsa watan ikunwanyan matuwen Dios benimakunkainikiki.

²²⁻²³ Jaska inun, dami itimaska besti judiobun uintan besti ikunwantidubuwen taexun Mesías Cristo yumetsu keska mawakin jatun nukun chakabu buani nun yusinmis danankin jabun shinankin: “Jaskai e iskidan nukun Xanen Ibu jua mawakeanamaki”, akin yuimisbuki. Ja inun, ikunwandiamma judiobuman dasibi unankatsis imisbuwen taexun jabun

shinankin: “Diosun bake cruz anua mawashina ana besteni tatinabun besti ikunwantidubuki”, iwanan, yuimisbuki. Jaskabiaibun nukun chakabu buakin jawenabu nuku wai cruz anu yumetsu imis keskai Cristo nuku mawaxunikidi nun yusinkubainaii, jatuki e iki dakeamadan.²⁴ Jaskaken na kakape Mesías Cristokidi betsabun dananbiaibun nun judiobu inun nun judiobuma Diosun nuku katuniwen taexun Diosun jawen kushipa Cristo yunukin jabia keskadi wakin dasibi unanjaidaman ja besti shinankin nun ikunwaiin.²⁵ Diosun jaska wamis ninkama betsabun kanekin yuikin: “Diosdan, tatinaki, unainsmapadan, kushipa jayamadan”, amisbuki. Jakia dasibi unanjaidakin Diosun yudabu dasibi binumiski. Jawada yudabun ikunwanma dananmisbudan, Diosun jawen kushipa nuku uinmanmiski, nun babubiakenan. Jaskai Dios kushipajaidakin yudabun kushipa binumiski.

Tsuabuda Diosun katuni ibubis kentidubumakiaki, na janchadan

²⁶En betsabu inun en puibuun, Diosun matu katukin eska matu wakubainmisdan, ninkakanwen. Unanepabu eskadabes besti katukin kushipabudi eskadabes besti katukin xanen ibubudi eskadabes besti katudiakin yununikabun enabu eskadabesdi matu katua akeakeaniki, jaska yudabun matu uinkin kenwanmis katuamadan. Jaska wakin Diosun nuku katumis jakimama shinankubainkanwen.²⁷⁻²⁹ Jaskaken tsuabuda: “En juni pepawen taexun Diosun ea katuniki”, iwanan, shinanyamakubainkanwen. Unanepabu jawauma wakin dakewanun, iwanan, Diosun ja matu tatima waibu matu katumiski. Kushipabu jawauma wakin dakewanun, iwanan, tsuabuda

babubu jabu jakidi pechitan yuankin: “Mitanumabuki”, jatuki imisbu Diosun matu katukubaindiaikiki. Tsuabuda yudabun matu danankin pe shinainsbumadan, Diosun matu katukubainmiski. Dasibibu binunun, iwanan, tsuabuda yudabu jaki pechitan shinainsbumadan, Diosun matu katudiamiski. Jaskaken nukunmebi nun pepaumabiaken Diosun matu katuniwen taea nukun pepakidi Dios yui tsua jamebi jawa kentidubumaki.³⁰ Jaska wakin matu katukin Jesúski matu dasiwakin Diosun jamebi matu katuniki. Jaskaken Jesucristonan, jawen shinanwen nuku unanepa wamiski. Ja inun, jabiatundi nukun chakabu buakin Dios nuku daewaxunmiski. Ja dikabi nuku medibi wakubainmiski. Ja inun, jabiatundi nukun chakabu buatan Satanás anua nuku mebikaninaniki.³¹ Nuku jaska wanunbadiaikidi bebunkidi Jeremíasin kenen i ninkaidakanwen: “Tsuabunda kenwain jamebi keanma nukun Yavé Dios besti jau kenwankubainunbunwen”, iniki.

Jesucristo cruzkia nuku mawaxuni kakape Pablon jatu yusinkubainikiaki, na janchadan

2 ¹En betsabu inun en puibuun, matun maewan Corinto anu jikitan jancha jawendua kemu paewen matu yusin keanma Diosun kakape uatian junebianiken xabakabi jakidi besti en matu yusinkubainiki.² Jesucristo cruzkia mawakin jawada nuku axuni man ninkakin ikunwanunbun ana jamapai miyui tibi betsa betsapakidi shinankatsi ikama Jesucristo bestikidi jas shinankin yusiin en matube jiwekunkainiki.³ Janua en Jesúsun kushipayaya matu anu kaimaxun jaska bebunkidi kenkin kanekatsi ikama babua dateyabi juinti xudubiaxun en matu yusinyukubainiki.

⁴⁻⁵Janua yusinan betsan jancha jawendua yuiaya ja ninkatan jatun jancha bechipaikin ichapabun jawaida chibantidubuki. Jakia ea matu anu kaxun yusiin janchaidan, unanepa janchamis keskawen en matu yusianma iniki. Jamen jaskama Diosun Yushin Pepa inun Diosun kushipa bestiwen ea amakin matu medabewamaya jaska yudabu unanepakin yusinmisbu keskamawen en matu ikunwanmani man unaiin.

**Diosun jawen shinan juneni jawen
Yushin Pepatun nuku inan jawen nuku
unanmanikiaki, na janchadan**

⁶Jaskaken man unanepabun Jesús ikunwantan ma pe tapinkin man mestenwain ja unanepa janchawen jaska wakin nun matu jaska yusianan, jawa chakabumaki. Jakia na mai anua jaska xanen ibukin unanepabun ibubis jatun shinanen amisbu keskama inun jabu xanen ibu kushipakin yunubaunmisbu keska jaska kushipa shinanwen nun matu yusinsmaki. Jatun kushipa inun jatun unanepa keyuaya nukuna Diosun nuku inankubainai keyuismaki.

⁷Jaska mai damiwadiama Diosun jawen unanepati jawen shinan juneyunixun nuku matu yusinmaidan, eskaki, ninkakanwen. Chania Diosun jawen bakewen taexun nuku jawenabu wakatsi nukuki tana yubakaniki. Jaskawen taea nukubudi jatuki dasitan nun jatu keskadi ipakexanaii, jawendua kushipa chaxakapa buidan. ⁸Na jaska xanen ibubun Diosun jatu unanmadan, jaska shinankin nukun Xanen Ibu mastama ikeanibuki. Jakia jawa xabakabi shinanbumawen taexun nukun Xanen Ibu kushipa duapa cruzki nuku mastaxunkin shinanma kanekin itsa wanibuki. ⁹Jaskakidi Diosun jancha yuixunika Isaásin yuikin: Isaásin Diosunabu kenexunkin:

“Jawada tsuan uinsma inun, jawada tsuan ninkaisma inun, jawada tsuan shinantiduma bebunkidi jabu Diosun bechipaikin ma jatu pewaxuniki”,

aniki. ¹⁰Nukun Epa Diosun nuku jaska wanunbadiai nun tapintidubumabiaken jawen Yushin Pepatun nuku tapinmaniki. Ja jawen Yushin Pepatunan, dasibi unankin Diosun shinain yubakanidi unan keyudiaikiki.

¹¹Yuda bentsan shinan juinti anuadon, tsuan nun jawa unantidubumaki. Jakia unankinan, jamebi jawen yushinin unaikiki. Jaska keskadi Diosun Yushinin Dios anua unan keyudiaikiki.

¹²Yudabun jabun ikunwanbuman yushin nun bihamaki. Jakia Diosun jawen Yushin nuku inani jatun Dios anua jawen duapa nuku inankin nuku tapinmaikiki.

¹³Nukunmebi jancha tapin unanepanixun nun matu akama jakia nuku janchaidan, jaska Diosun Yushin Pepatun nuku yusinmiswen nun matu amiski, jaska matu mextamakinan. Diosun Yushin Pepatun shinan inun jawen jancha besti nun matu yusinkubainai.

¹⁴Jaskawen taea jabu Yushin Kayabi jayamadan, Diosun Yushin Pepatun Jesúskidi chaniai dananmisbuki, tatinakin jakidi shinankatsi ikamadan. Jaska inun, jaska Diosun Yushin Pepatun bechipaiai jatun shinan unanti wai ninkatidubumadiki.

¹⁵Tsuabuda Yushin Pepa jayatunan, chakabu inun pepa unantidubuki. Jamen ja Yushin jayamatunan, Yushin Pepa jayabu unanti watidubumaki, chakabu inun pepa waidan. ¹⁶Na jaskakidi Diosun jancha yuixunika Isaásin yuikin: “Diosun shinan tsuan unanmajaidaki. Ja inun, tsuan Dios yusintidumadiki”, abianiken nukubudan, nun ma Criston shinan jayaken jawen Yushin Pepatun nuku yusinkubaimiski.

**Dios dayaxunkin jawen kakape
yusinibukiaki, na janchadan**

3 ¹En betsabu inun en puibuun, en matube jiweyukin jabun Jesús ikunwankin jawen Yushin Pepa ninkakubainmisbu man jatu keskamaken matu yusinkin dama ikunwankin matun shinan mestendiamma man bakeishta keskabuken unanxubida Cristokidi en matu unanmakubainiki. ²Bakeishta pimakin piti kushi memayuama chuchu dukun jatu beyawamamisbu keska wakin matu tapinmakin unanxubida nun matu yusinkubainiki. Jaska wakinan, ³jaskadawen taexun nun matu animen? Man jawa nami kushi pia unandiamma keskabuki. Na jabiatanan, man jabiaskaski, jawa piti kushi pitidubuma keskabudan. ³Man kushipai beyadiama jabias matun jiwea keska shinain man babuwen taea ikunwain betsabube ja iki jatu dabain binunananun ika inun betska kemutapaya ja shinain sinai ikunwanbuma keska shinain man jiweabukiaki. ⁴Jaska jancha akeakekin yuikin: “Eanan, Pablón nuku yusinmis ikunwankin ja besti en chibankubainaii”, ikaya betsadi iki: “Eanan, Apolosin nuku yusinmis ikunwankin ja besti en chibankubainaii”, ikeakei ikunwanbuma jiwemisbu keskai man betska betsapaikiaki. ⁵Nun jaskadawen taexun ⁶man nukukidi shinain ikai? ⁷Tsuamen, Apolosdan? ⁸Tsuamen, Pabloden? ⁹Man jaska nukukidi shinainan? Nuku dabedan, nun Jesúsun dayadu bestiki. Jaskawen taexun jawen daya nun axuanyan nukuwen taexun man ikunwaniki, jaska nukun Xanen Ibun nuku yununiwenan. ⁶Nun Diosun tsuma dabe bestiki. Nuku ana kenwanyamakubainkanwen. Ea dukun matu anu kaxun en matu yunu banakin akawaniki. Januxun Apolosdi kaxun en

banatanyama matu miban nashimakin akawayamaki. Nukun dayawen nun matu jaska wabiaya jakia Diosun ja miban ewawakin kushipa wamis keska wakin ja bestitun matun shinan betska wamakin ewawakubainikiki. ⁷Matu yusinkin matun juintiki Diosun kakape en bana keska watanima miban nashima keska wakin Apolosin chanima matu medabewatanimaki. Jamen nuku dabedan, nun jawamaki. Jawen kakape matun juinti anu Diosun besti ewawakin yumewamiski. Jaskaken ja daya nun amisdan, nukunamaki. Epa Diosun daya bestiken ja besti kenwankubainkanwen. ⁸⁻⁹Jamen matudan, Diosun jawen kakape jexe banamis keska man jawen baiki. Jakia nukudan, nun bai anu dayai keskakin nuku dasibibun nun Dios medabewakubainaii. Betsabun kakape banai inun betsabun nashimabiaya jamapai daya nuku yunua dasibibun nun pe akubainaiwen taexun Diosun nuku pakakin manakuxanikiki, nukun daya tibi pepawenan.

Junibun jiwe wamis keska wakin Diosun matu wakatsis ikin ¹⁰ea dukun Diosun ea katutan duawakin jiwe wanika unanepa keska ea waken jiwe tekeismawakin ja dukun xantu ewapa watan pukinbaunkin jaki tsamabidankatsi mishki ewapa en datanbaunkin itsa waniki, matukidi kakape yusinkin taewakinan. En jaska waniken jiwe benibaunmisbu keska wakin juni betsan matu yusinpakeikiki. Jiwe pepawai dayamisbu keska wakin juni tibitun matu ana yusinkin kanemama jau matu pejaidawakubainunbunwen. ¹¹Ja inun, ma en mishki buya pewabianiken ana yusinan betska juxun ana betska wakin taewatidumaki. Jaska keskadi wakin Jesucristokidi en matu yusin taewanikidi tsuan yusian benawen

matu yusinkin ana betsa watidumadiki. ¹²Na mishki en bebuyakin taewani anu tsuanda jiwe wakin menenun ixun oro mane kasmai plata mane kasmai mishki jawen daya kaduwen amisbu keskadan, jabun Jesucristo ikunwantan jawen jiwekin matu yusiaiinbu jatun jiwea keskaki. Jamen juni betsabundi jabias mishki mamaki jiwewanun ixun ji tabla tuax kasmai jepe kasmai tawa akaibu keskadan, jabun Jesucristo ikunwanbiatan jaska Jesúsun bechipaiai keska jiweama jatun jiwea ji tabla tuax inun jepe inun tawa besti keskabuki.

¹³Nai anua nukun Xanen Ibjajida Jesús jukidan jaska jawen yusian chibain nun jiwemis nuku tibi xabakabi nuku unanti waxanikiki. Janu nuku unanti waitianan, nukun jiwea inun nun jawen taea nun dayamis chiwen nuku unanti waxanikiki. ¹⁴Tsuada jiwe kushipa chin menuisma keska jiwemisbudan, jawa chin menuismawen taea jatun manakuti pepa bixankanikiki. ¹⁵Jakia tsuanda jiwea kushipa akama jawen jiwea ji tuax inun tawa inun xenpan besti keskawen taexun chin menukin yamawaxanikiki. Jaska jiwe menuai anua jawen yuda besti paxabiatan nai anu Jesucristobe jiweai bitan jawa manakuti jayama jabe besti jiwxankanikiki.

¹⁶Jaskawen taexunan, ɿmatunan, man unanmamen? Man ikunwainbu Dios matubeken man jawen jiwe keskawen taea Diosun Yushin Pepa matuki dasia jiweaki. ¹⁷Tsuanda ja Diosun jiwe chakabu wakin nuitkaapawamis ja yudadi Diosundi nuitkaapawadianaxanikiki. Jakia ja Diosun jiwe medibi pepadan, jabia man matuki, jiwe keskadan.

¹⁸Betsa betsapabu man unanepakatsis ikaii. Jakia jaska unanepabun ibubis shinankin kanemis Diosun bechipaismaki. Man ibubis kein unanepaibudan, matun shinan danantan

ana kenkin jaska shinanma chintuntan jaska Diosun bechipaiai keskai unanepa kayabikubainkanwen. ¹⁹Na mai anu jiwea unanepaibudan, Diosun jatu danankin unainsmapabukidi jatu shinanmiski. Jabiaskadi shinankin en xenipabu Jobun yuikin: “Unanepabun betsa padantau binunun ikaibu Dios unanepa kayabitun jatu bextekin jawauma jatu wamiski”, jatu waya juni betsan kenexuniki. ²⁰Januxun Davidin yuidiakin: “Jaska unanepabun shinanmis unankin danankin: ‘Jawa unanbumaki’, iwanan, Diosun unanmiski”, iwanan, keneniki. Jaskaken ibubis padanananyamakanwen.

²¹⁻²²Jaskawen taea nun yudabu nun matun yusinan bestibiaken daketapakin nuku kenwain junibun tsumabu nuku wayamakanwen. Jamen Dios jawa yaushlama nukun nun matu medabewanun, iwanan, en Pablo inun, Apolos inun, Pedro inun, juni yusinanbu tibi nuku yununiki. Ja inun, man jiwea inun man mawabu inun na jabiatian inun badi betsa u unuatian dasibi inun mai jidabi Diosun matu yununi man jawen jiweadan, matunaki. ²³Dasibi matu ibuwamabiani, na jaska dasibi man jiweadan, man Cristonaki. Ja inun, Cristodan, Diosunaki, jawen bake kayabidan. Jaskawen taexun Epa Diosun jancha shinankin nuku nun yuda bestibiaken ana nukukidi janchakin nuku kenwanyamakanwen, nukun Xanen Ibu besti kenwankinan.

*Jesúsun kushipayabu dayanibu danain
eskai jiwenibukiaki, na janchadan*

4 ¹Nukudan, nun eska bestiki nuku shinankanwen. Criston daya axuin nun jawen medabewanika bestiki. Jaskawen taexun nukun shinan benawatan nuku yununiwen taexun Diosun jawenabu matu

wakatsis ikin jawen kakape yubakani junekubidani ma xabakabi nuku matu yusinmakubainikiki. ²Tsuada xanen ibu betsan jau jawen daya axunun yunuadán, jawen jancha ninkatan chibankin jau uinmakubainunwen, kaneamadan.

³Man ea danan duakabiaiwen taea jaska bestikidi en shinanyan matun besti man ea atiduki, jaska man yuda ichapabubetan ea unanti wakatsi ikaidan. Emebidan, jaskatan en shinan emebi en unanti watidumaki. ⁴Jaska man ekidi shinanbiaya en jaska jiwxun shinanmis en chakabu amismenkain, en pemismenkain, jaska shadabun ea bika tenemamaki. Ean en shinanan, Diosun en chakabu buatan ea pewani jatun besti ea unanti waxanikiki. ⁵Janu unantiwati idiamabiaken matumebi nuku tibi unanti wakin ja akin nuku chiteyamakubainkanwen. Janu nukun Xanen Ibu juaitian mananankanwen. Jatun besti dasibi june nun amis xabakabi taxnimaxanikiki, na jaska juinti medan nun jaya nuku bepenxun uinmakinan. Januxun Diosun nukun daya unankin betsa kenjaidawakin betsa bexmas kenwakin ikunwainbu tibi Diosun kenwan akeakexanikiki, manakukinan.

⁶En betsabu inun en puibuun, Diosun jancha jakimama yusinan betsa ichakawama jau betsadi kenwanyamanunbun matu kene bumakin en Pablo inun Apolos jaska nun jiweimiskidi besti en matu kenexunaii, jau nun imis keskai nuku mawai man jiwekubainunbunan. Jaska Diosun jancha kenenibu besti shinankin matumebi akama yusian betsawen ja kenenibu binumayamakanwen, tapinkinan.

⁷Matunmebi shinan chakakin: “Ikunwainbu betsabu nun jatu binuaki”, ikin man kaneaii. Man tsua binuamawen taea jaskayamakubainkanwen.

⁸Jaska inun, matun shinankin: “Dasibi unain jamapai Diosun jawenabu inanmis jaya nun ma xanen ibubuki”, iwanan, ea Pablo inun Apolos man nuku ana shinanma jaskayadan, chanima kayabi matumebi man xanen ibu mentsisisipa kayabiayadan, ana nuitapama nun daka matube xanen ibuxanti.

⁹Nukun nun shinanan, nun Jesúsun kushipayabiabudan, Diosunan jawen jenekin nuku nexa daka januxun nuku tenankatsis ikinan, dasibun nuku uinkin danainbuwen taea nun atimapaki, Diosun nai tsumabu inun yudabun bedubidan. ¹⁰Nukudan, ?man jaskada nukukidi shinain? Cristowen taea nun tatinmakenan, jakia matudan, Cristowen taea man unanepakiaki. Jamen nukudan, nun babuki. Jakia matudan, man kushipakiaki. Nukudan, nuku ichakawakanikiki, nukuki meseamadan. Jakia matudan, matu kenwain matuki mesemisbukiaki. ¹¹Na jabia eskatianan, jawa nun pe jiwediamaki, eska teneidan. Nun bunimiski. Nun unpax manumiski. Nun tadi chuka sawea nimiski. Ja inun, yuda betsabun nuku ichakawamisbuki. Medibi jiwe jayama nun jiwemiski.

¹²Jaska tenebiai nukun mekenen dayai nun jeneismaki, babuamadan. Nuku yupukin xuun abiaibun nukun jatu kemakinan, pewen besti nun jatukidi xuun amiski. Nuku ichakawakin bika tenemabiaibun nun jawa yuiama tenemiski. ¹³Jamapai chakabu nukukidi yuibiaibun unanxubida jancha pewen nun jatu kemamiski. Chaka inun jawada chapuai yudabun putamisbu keska wakin nuku dananmisbuki. Na jabiatian nukun jeneabuma nun ninkakubainaii.

¹⁴Na eska matu kenexun bumaidan, matu dakewanun ixun en matu akamaki. Jakia matu yusin pewai man en bakebu kayabi matuwen nuikin bechipaiai keska wakin en matu akaii. ¹⁵Natian

matun yusinan 10,000tun Cristokidi matu yusinbiaya ean dukun Jesús mekeakidi en matu yusintaniwen taea ea dukun en matun epa kayabi keskaki. Ea jakimayamakanwen.¹⁶ Jaskawen taea en matu yunuai en aka ea chibankanwen.

¹⁷ Man jaska shinanun Timoteon ebeton Cristo chibain en bake keska chintuinsma jau matu medabewanun matu anu en nichiaiin. Ja en bechipaimistun nukun Xanen Ibu ikunwankin chibankin jawen yunuti inun jawen nemati axunkubainkin ikunwainbu ichati tibi anuxun jaska en yusinkubauni keska xabakabi Timoteon matu yusin kaikiki. Ninkaidaxankanwen.¹⁸ Matu anu en kama dabanen shinain matumebi patapai xanen ibui man Jameen keaiin.¹⁹ Jamen nukun Xanen Ibun ea yunua matu anu jikitan ibubis keainbu unankin jatun jancha danankin jatun kushipa en unanxanaii, jaska man jancha unain ikimenkainan.²⁰ Janua matu anua Dios xanen ibuaidan, janchawen besti man jatu uinmatidumaki. Jakia matun jiwea Diosun ma betsa waken jawen kushipa man ma jaya uintidubuki.²¹ ¿Jaskada en matu wai kaxanai, man bechipai? ¿Kaxun jiyaxun daka en matu kipi kaxanti? ¿En daki matu medabewakin duawai unanxubida janchai kaxanti? Jaskaken ewen dateama pe jiwekubainkanwen.

**Juni betsan jawen aniwa
ainwankin ikunwainbu dasibi jatu
chakabuwanikiaki, na janchadan**

5 ¹Ikunwain betsan matu anuxun chakabujaidawai jadi matu anua kaka juai nun ninkaidan: “Ikunwain betsan jawen ibuan ain mebinkin ainwainmaki”, ikaibun jabaa! ²Ikunwanbiai jawai man jaska jiweamen? Man mesejaidaii.

Tsuabuda ikunwanbumabiadan, jaskai jiweabu nun ninkaismaki.² Matu anua jaskabiaya matumebi man jawen keaiin, ja juni ja akin juinti nishmawamadan. Jawa yuiana man jabe jiwea ichakunkainaidan, jaska ja junin matu waidan, nichintiki. Nematan taxnimadikanwen.³ Natian jadi en yuda en matubemabia en shinanwen en matu anu keskaxun unantan man jaskai jiwea ja juni jawen aniwabe jiwea en matu yunuai ninkakanwen.⁴ En matu anu keskaken Jesúś ikunwain matubus ichatan nukun Xanen Ibu Jesucriston jawen kushipa matu inanyan⁵ jau Diosun Yushin Pepatun ana mekeyamanun ja junin chakabuwaima kupikin Satanás yunukin inankanwen, Satanásan jawen yuda jau jawada tenemanunan. Jaska waniken nukun Xanen Ibu Jesúś jukin jau jawen yushin mekei kanunan.

⁶ Man eska keskaki. Matu yuinun ninkakanwen. Misi wamisbu man unaiin. “Misi wakin jawen xaxa wati eskadabes kapan xaxai ewapamiski”. Jaska keskai jawada chakabu ja junin matu anuxun akin matu daunkin akawabia unanbiai pepai man keaiin, jaskatimabiakenan.⁷ Jamen Diosun nai tsuma debuwanikatun judiobun bakebu dunkebaini Egiptonawabun juni bake iyuabu tenantian shinain Pascua nawakin xaxa wati dasibi judiobun putatan xaxa watiuma misi waxun chaxuwan bake detetan pi nawakubainmisbuki. Jamen nukudan, chanima nun xaxa wati bena keskaki. Jaskawen taea Cristo chaxuwan detenibu keskai nuku mawaxunkin nukun chakabu nun jenexanubun nuku ixuniki. Man ma shinan betsawidan, jamapai chakabu man jayadi jenedikanwen. Jaska waxun xaxa wati misi xaxa wamisbu keskawen matun shinan chakabun matu ana

chakabuwatidumaki. ⁸Jawada chakabu man amis jenetan ana ichakanikama duapakin jancha kayabi yuikin jawada Jesúsun nuku axuni shinain nawakubainkanwen.

⁹Ja inun, badi betsation kenewen matu yuikin: "Jabu dakeisma chutanamebauni itimaskaibu jatube mapuyamakanwen", akin en matu yusinma ana jadidi matu yusinun ninkakanwen.

¹⁰Matu kene bumakin ikunwanbuma chutanamebaunmisbukidi en keneama inun yuda betsa jamapai jayanun ika kemuaibu inun yuda betsa padantan yumetsumisbu inun dami yushin itsa bitan kenwanmisbu jadi en matu kenexunama ikimaki, jaska tibi manibaunabu tsuan man dasibi dainbaintidubumakenan. Ja ikunwanbuma keska man ana jiweyamanunbun jaska en matu kenexunimaki. ¹¹Jakia jatidi man eska jayabuwen taexun en matu yui ikai ninkakanwen. Tsuabuda janchai: "En Jesús ikunwain en matun betsaki", ibiai jaska jiweama chakabui chutanamebauni inun mabu tibiwen kemui inun yushin dami betsa bitan kenwainbu inun yupukunainbu inun paein jeneisbuma inun betsa padantan yumetsumisbu ja jaskai bepadamemisbudan, ana jatubetan piama dainkubainkanwen, ana jatube mapuamadan. ¹²⁻¹³Jaska ikunwanbuma ikaibudan, jaska nukun dayamaki, nun jatu unanti wapananan. Diosun besti ikunwanbuma jatu unanxun kupixanikiki. Jakia nukun dayadan, Jesús ikunwainbu nuku inun matun man atiduki, unanti watan jatu kupikin pewakinan. Jaskaken ja juni jawen ibuan ainbe jiwea chakabuken matube ichai menan nemakin taxnimadikanwen.

Ikunwain dabe ja iki kyanameaibu ikunwanbumanu jatu pewakin iyutimakiaki, na janchadan

6 ¹Min jabetan ikunwain betsan mia chakabuwaya jaki sinatai min kyanameai jau matu dabe pewanun ējaskai ikunwainbu anu kama ikunwanbuma anu man kamismen? Jaskatimaki. ²Cristo ana juaya man ikunwainbun jabetan yuda dasibi man unanti waxanaidan, ēman unanmamen? Man jatu jaska waxanaiwen taexun natiandi ikunwain dabe sinatai jawada kyanameaibu jau medabewanunbun ikunwanbuma anu jatu yunuama matumebi ja dabe pewakin ēman unanti watidumamen? Matunmebi unankin man pewatiduki. ³Diosun nai tsumabun jawada chakabuwanibu nun jatu unanti waxanaiwen taexun Jesús ikunwainbu ja ikaibu chanima natian nun unanti wadiatiduki, jatu daewakin pewakinan. ⁴Jaska ikunwanbuman shinanmis man dananmiswen taexun man ja ikaibu jau matu unanti wakin medabewanun ana ikunwanbuma anu kai jatuki ana chiti iyamakubainkanwen. ⁵⁻⁶Ja inun, Jesús ikunwainbu ja ikaibu jau ikunwanbuman unanti wanunbun man yunumisbuwen taexun en matu dakewaii, jaskatimabiakenan. Matubudan, ēmatu anua unanepa betsa man jayamamen, jaska matu pewatidan? Man jayadiki.

⁷Ikunwain betsan mia chakabuwaya ikunwanbuma anu man pewanun ika kakin matumebi jaskakainkin chakabujaidakin man kanekubainai. Mia chakabuwiaya ana jabebis manakunama tenekubainwen, jau ja besti inunan. Ikunwain betsan min jawada yumetsubiashinken ja shinanma ibubis bextekikanwen, ana jabebis yumetsuamadan. Man jaskaidan, peki. ⁸Jakia matudan, man jaskamaki.

Matubetan Jesúus ikunwainbu janubi ichakawakin jatu bepadantan jatun jamapai bi man yumetsukunkainaii.

⁹Tsuanda Diosun jancha ninkama chakabukubainmisbu nai anu Diosbe jiweama ixanaidan, man unaiin. Jaskaken man ikunwan kayabidiamakidi ibubis bepadamei padanananyamakanwen, man eska jusia jiweawen taeadan. Ja betsa betsapabu chutakin chutabaumisbu inun, yushin damiwakin ja itsa betsa wabu bitan kenwanmisbu inun, juni ainyanbia ainbu betsa jawen ainma chutamisbu inun, ainbu beneyabia jawen benemabe chutanamemisbu inun, juni ainbu ikasi chutanamemisbu inun, ainbu dabe menamei chutanamei itsamisbu inun, jabu chakabui bextekeisbumadan, Diosbe jiweama ixankanikiki. ¹⁰Ja inun, yumetsumisbu inun, jawada betsana uin kemujaidamisbu inun, paenmisbu inun, yupukunamisbu inun, yuda betsa padantan yumetsumisbu jabudi bextekeabumadi nai anu Diosbe jiweama ixankanikiki. ¹¹Matudan, betsabu ja ikaibu keska jiwebiakunkainkin Jesucristo man ikunwainbu nukun Xanen Ibu Jesucriston kushipa inun Diosun Yushin Pepatun kushipawen matu shinan betsa wamaya ikunwain betsan matu nashimabu matun chakabu detsis daxkia keska wakin medibi jabias besu keska wakin Diosun Yushin Pepatun matu pepawaniki.

Nukun yudadan, Cristonakiaki, na janchadan

¹²Jawada Diosun nema keyuama ini en atidubia jawanda medabewakin en juinti ea kushipa wama en jeneaii. Jawada Diosun nemama en atidubia jawanda ea beyawatan ea yabutidudan, en jenediaii. Jesúsun ea yunua besti en axunkubainkatsis ikaii.

¹³Jamen betsadan, piti pikin yaniwai nun jiwenun Diosun piti nuku waxuniki. Ja inun, nukun jatudan, jaki piti nanekin nun yaniwa jiwenun nukun jatu nuku waxuniki. Jabiaskabiaken betsatianan, piti inun nukun jatu ja dabe yama waxanikiki. Jaska inun, nukun yudadan, eskaki. Ninkakanwen. Nukun yudawenan, jawen jamapai betsabetspabube chutanametima Diosun nuku waniki. Jakia nukun Xanen Ibu Jesúsunaki, nukun yudadan. Na nukun yudawen nukun Xanen Ibu nun dayaxuntiduki. ¹⁴Ja inun, nun mawa nukun yuda chaputima bestima jakia jaska nukun Xanen Ibu mawa Diosun bestenwanixun jawen kushipawendi nuku bestenwandianxanikiki.

¹⁵⁻¹⁶Diosun Moisés yuia kenekin: “Juni jawen ainbe jiweadian, yuda bestichai keskatiki”, akin jaska keneniwen taexun tsuabunda ainbu betsa ati wai jabe yuda bestichai keskakin jawena wamiski. Jakia nun Criston enabubia nukun yuda jabe nexebia jenetan ana nukun yuda betsa ibu wamakin nexenun ika atibe nexeidan, ana jaskakubainyamakanwen. ¹⁷Jaskawen taea nukun Xanen Ibube nukun yushin nun nexea jawen shinan nun jayadan, jabe pe jiwekubainankanwen.

¹⁸⁻²⁰Cristo nuku mawaxunaya pakasaka watan Diosun nuku ibu wakin Jesúsun yuda nuku waniki. Jawen Yushin Pepa nuku inan nukube dasia jiweawen taexun nukun yudadan, ana nukunamaki. Jaskaken nukun yuda medibi pe mekekin jawen Dios kenwanankanwen. Jamapai chakabu nun amis Diosun bechipaiamabiaken jakia ibubis nukunmebi chakabu aki nun chutanameaidan, nukun yuda ibubis nun chakabuwaii. Janua ainbu min ainma chutakin min yuda detsis keska wakin Diosun Yushinin jiwe man

chakabuwaii, detsis keska wakinan. Jaskaken tsuabunda ainbu min ainma chutanun, iwanan, ja shinan jenetan ana jadi mapuyamakubainkanwen.

**Juni inun ainbu biakanantikidi Pablon
jatu yusinikiaki, na janchadan**

7 ¹Ea kene bemakin jawada man ea yukaima matu yuinun ninkakanwen. Junin ainbu bikatsi ikama inun chutakatsi ikamadan, jaska peki. ²Jamen dasibibu chutanamekatsi ikidan, juni tibi jau medibi ainyanunbunwen. Jabiaskadiai ainbu tibidi jau medibi beneyadianunbunwen. Jamen man jaskabumadan, atimapu jiwei man chakabuskubaintidubuki. ³Jaskakatsi ikama ainbube biakanantanan junin jawen jina yaushiamma inun ainbundi jawen xebi yaushiamadi jau chutanamekubainunbunwen. ⁴Ainbun xebidan, jawenabia jawen benenaki. Janua junin jinadan, jawen ainenaki. Jaskaken yaushidabeama jau jabe chutanamekubainunbunwen. ⁵Jaskaken jabu dabe janchanamei petan matun mabu yaushiamma man chutanametidubuki. Janua man Dios kenwain Diosbe man yubakatan man jabe janchayukatsis ikai ana menameyuama man itiduki. Janua keyutan ana man chutanametidubuki. Jamen man yubakai peama xaba ichapa kaya Satanásan matu padankin kanemakin matu chakabu watiduki, betsawen kemumakinan.

⁶Na jaska matu yusinkinan: “Ainyankanwen, benayakanwen”, iwanan, yunuama inun en matu nemamadiki. ⁷Eadan, aiunma jiwea en ainyankatsi ikamaki. Tsuabuda ea keska jiweitidubudan, jaska peki. Jamen Diosun juni tibi jaskas nukun aka nuku inanma betsa tibi nun ja dayaxunun nuku inamiski, yunukinan.

**Jau jaskai jiwenunbun Pablon
jatu yusinikiaki, na janchadan**

⁸Tsuada ainyandiamma inun, jawen bene ma mawaima inun, jawen ain ma mawaimaken jaska ana shinanma jiwekatsis ikaibudan, jaska man pe meaidan, jabiaska jiwekubainkanwen, ea en jiwea keskaidan. ⁹Ainyan inun beneya peken jau biakanankubainunbunwen. Jamen tsuabuda ainbuwen kemukin man shinan jeneama chutakatsis ikaidan, jau ainbu bikubainunbunwen. Ainbudi jau beneyadianunbunwen.

¹⁰En shinananma nukun Xanen Ibun ea yusiniwen en matu yunuaii, enawenmadan. Man ma biakanani jiweabukidi matu yusinun ninkakanwen. Ainbuabuun, matun bene jenebainyamakanwen. ¹¹Jamen ikunwandabebiae man jawawenda taea man ma jenenameyuadan, shinan betsa watan man ana jaki nukutidu inun man jaki nukukatsi ikama ana beneyayamakanwen. Junibuun, matun ain sinayukainkenan, ja shinankin jene kayabiyamakubainkanwen.

¹²Jaska tibi man ainyan inun beneya man jiweabu matu shinankin jaska nukun Xanen Ibun yunuama ibianiken jaska matu tibikidi ean shinankin en matu yunuai ea ninkakanwen. Jesús ikunwandiamma betsa ainyanbu inun betsa beneyabukidi eska jiwekanwen. Min ainen ikunwanmabia mibe jiwxun mia medabewakatsi ikaidan, nichinkin jeneyamakanwen. ¹³Ja inun, min benen ikunwanmabia mibe jiwxun mia medabewakatsi ikaidan, nichinkin jeneyamadiakanwen. ¹⁴Jaska inun, min benen ikunwanmabiaken min ma jabe biakananiwen taexun Diosun mia dananma jakia min ikunwainwen taexun min benen ikunwantiduken duawaikiki. Jabiaskadi wakin min ainen

ikunwanmabiaken Diosun dananma jakia min ikunwainwen taexun min ainen ikunwantiduken duawadiaikiki. Juni inun ainbun Jesús ikunwanbuman bake yumediabumadan, medibi pepatidubumaki. Jakia junin Jesús ikunwain kasmai ainbun ikunwain kasmai ja dabe bakeya jatun bake yumediamadan, Dios jatuwen nuiaya jabun baken ikunwantiduki, Diosun duawaiwen taexunan.¹⁵⁻¹⁶ Ainbuaiyuun, min benewen min nuibiyaya mia jenekatsis ikaidan, jaska watan min paxamatidudan, tsuan unanmaki. Junibuun, min ainen mia jenebainkatsis ikaya min jawen nuikin jaska watan min paxamatidudan, tsuan unanmadiki. Jaskawen taexun junin ikunwanyan jawen ainen jabetan ikunwankatsi ikama jamapai shadanun ika kayadan, junin jawa yuiamaken jau ainbu kanunwen. Jabiaskadiai ainbun ikunwanyan jawen benendi jabetan ikunwankatsi ikama jamapai shadanun ika kayadan, ainbun jawa yuiamaken jau juni kanunwen. Ikunwanma ma jaskakainken Diosun matu nemamabia ja man ikunwainwen taexun matu unanuma jiwemakatsis ikikiki.

¹⁷Mae tibi anuxun ikunwainbu janu ichamisbu tibi anu kakunkaunkin jaska en yusinmis jabiaskadi matu yuinun ninkakanwen. Jaska bebunkidi man jaska beyawen jiwea nukun Xanen Ibun matu jiwemaxanun, iwanan, Diosun matu tibi katukin kenaniki, jaska Diosun jawen shinanen jaska matun jiwea matu betsawamani jawa ana shinanma jau man Jesús chiban bestikubainunan.¹⁸ Ja inun, judiobu kaintan Jesús ikunwakin judiobun beya jau dananyamakubainunbunwen. Judiobuma kaintan Jesús ikunwakin judiobun beya jau chibandiayamak ubainunbunwen.¹⁹ Judiobun beya

chibankin nun jina kubichi mextemis inun judiobun beya chibankinmadan, nun jaskai jiwekin Dios benimawatidumaki. Jakia Diosun jancha besti chibankin nun Dios benimawatidubuki.²⁰ Jadatuda jiwea chibain min jawen jiwekatsis ikai anua Diosun matu tibi katunidan, ja beyawen Dios jiwxunkubainkanwen.²¹ Ja inun, Diosun matu katudiamia junin matu esclavo dayadu waken jawen bika teneyamawe. Jakia min tsumapan mia ana bikatsi ikama kasmai ibubis peiwen min paka mia nichianyan benimadi kainxanwen.²² Jaska juni betsan esclavo dayadu man ibianiken nukun Xanen Ibun matu katuxun matun chakabu buakin matu jaibuwaiwen taea esclavobia Jesús man ikunwainwen taea man yudan esclavoma keskaki. Jakia min tsuan esclavo dayadumabia Jesúsun mia katutan yunuawen taea matun shinanwen man jawen esclavo dayaduki, Cristonadan.²³ Jesucristo matu mawaxunkin matun chakabu matu buaxunaya Diosun ibuwakin jawena matu wakin biniwen taexun ana juni betsan matu esclavo wai keska wakin shinan betsya matu yusinbudan, danankanwen, man Cristonawen taeadan.²⁴ Esclavo inun esclavoma man ebetan ikunwainbuun, man jaskadada jiwea Diosun matu katuni jawa jaskatan man betsatidumaki. Jabiaskas ikubainkanwen, man Dios chibainbudan.

**Jau jaskai jiwenunbun Pablo
jatu yusinikiaki, na janchadan**

²⁵Jamen betsadan, beneyadiabumakidi man ea yukaima jaskakidi nukun Xanen Ibun ea yunuamabia ewen dabanan ikin ea duawa jawen kushipawen yununikai en chintuanmawen taexun matukidi jaska en shinain matu yusinun ninkaidakanwen.²⁶ En shinanan, natian nun jiweatianan, nun bika

teneaii. Jaskawen taea jaskadada man bestibu jiweadan, jabiaskayukanwen. ²⁷Tsuada man ainyanan, matun ain nichinyamakanwen. Tsuada man aiunma ainbu benayamakanwen. ²⁸Jamen man ainyandiamma ainyainan, jawa chakabumaki. Ainbu beneyadiama beneyadiidan, jawa chakabumadiki. Jaskabia man janu biakanaitianan, man bika tenetidu en matu nematidubia jaska man ikatsis ikai ibubis katukin shinankanwen.

²⁹En betsabu inun en puibuun, ma badi keyui kemaya ainyankin matun ainkidi besti shinanma nukun Xanen Ibu shinankubainkanwen. ³⁰Minabu mawaken juinti nishma man kaxamisdan, jadan keyumiski. Jaska besti shinanma benima keyuismadan, nukun Xanen Ibu anu bestiki, jaska shinankanwen. Jamen betsadan, beyusi man shinan chankanbiamisdan, ja dikabi keyumiski. Ja inun, betsabu man mabu ichapayabia ja shinanma Jesús dasibi mabu ibudi jakimayamakubainkanwen. ³¹Jaskadada na mai anu dayakin mabu jayai inun mabu jayama man jaskai jiweadan, ana jaska tibiwen benimayamakubainkanwen. Jatiada nukun Xanen Ibu Jesús juaitian na jaska nun jaya tibi dasibi yamawaxanikiki. Jaska shinankanwen.

³²Jaskawen taea man ana bika tenei itimaskayamanun bun en matu yuiai ninkakanwen. Tsuabuda aiunmabun jawen Xanen Ibu Jesús dayaxunkin ja besti chibankin benimawatiduki. ³³⁻³⁴Jamen ainyanbun jawen ain medabewakin jamapai tibi akin jawen Xanen Ibu inun jawen ain dikabi benimawatiduki. Jaska inun, beneyabun jawen bene medabewakin jamapai tibi akin jawen Xanen Ibu inun jawen bene dikabi benimawatiduki, ja dabetun jaska wakinan. Jakia ainbu ewa ana

beneumatun inun chipash beneyadiama jawen Xanen Ibu Jesús besti dayaxuni jasnun ika jawen yudawen inun jawen juantiwen benimatidubuki. ³⁵Nemakin matun jiwea bextekin ana bikawakin itimaska wakatsi ikama jau man unanuma jiwenun bun matu medabewa bestikatsis ikin nukun Xanen Ibu besti matu duawamanun ixun jaska en shinain en matu yuiai.

³⁶Tsuanda bebunkidi jatun ainbu bake ja juni bimakatsi yubaima ma ja dabetan Jesús ikunwainbu ma pekenan, bechipainamedabeidan, ma ainyain inun beneyatidubuki, jawa chakabuwamadan. ³⁷Jakia betsadan, tsuanda jatun juni baken ainbu shinankin bitidubia ibubis jaska shinanmadan, jawen shinan mestenwantan Jesús besti dayaxunun ikaidan, jau ainyanyamanun wen. Jaska shinain, peki. ³⁸Janua ja jatu yubaimabube ainyain inun beneyai biakanantaran medabenainan, pediki. Jakia aiunma jiwea inun beneuma jiweadan, pejaidatiduki, en jancha chibainan.

³⁹Jamen ainbun ikunwain jawen bene jiweken dapaxkama jabe jau jiwenun wen. Jawen bene mawaya ana beneuma keska jiwea beneyakatsis iki ikunwain betsa benewatiduki. ⁴⁰Jamen ainbu jawen bene mawaken ana bene betsa bikatsi ikama ikunwan besti benimai jiwtetiduki. Jaska Diosun Yushin Pepatun ea shinanmaya jaska shinankin en matu yusiaiin.

**Dami kenwanti betsa medibi watan
nami inanmisbukidi Pablón jatu
yusiniaki, na janchadan**

8 ¹En betsabu inun en puibuun, man ea kene bemakin ja yuinaka detexun dami yushin nami inantan pikin matu pimakatsis ikaibukidi man ea yukaima matu yuinun ea

ninkakanwen. Ja nami dami yushin kenwakin inanmisbu pidan, jawa chakabumaki. Chanima jaskabiaken jakia ikunwainbu betsa babubu ja nami pikin man jatu uinma ana babutidubuki, pi man keainwen taeadan, jaskakin tsua kushipawakin man jatu medabewatidumaki, man nui jayamadan.

²Tsuanda jaska tibi aki: “En unan keyuaii”, man ibiaidan, jaskai unanepati kayabi man unan keyudiamaki. ³Jamen tsuabunda Dios bechipaikin duawakin jawen yunuti akaibudan, jadan, Diosun jatu unainkiki.

⁴Yushin dami kenwanti betsa kenwakin jawen kenwanti nami inananainbu bitan man piaibudan, jaskadan nun unandiaii. Jawen kenwanti yushin dami jiwea jayama inun jawa kushipa jayamajaidaki. Jakia nukun mekenika Dios bestichai jiwea nun unaiin. ⁵Jesús ikunwanbuman yushin kushipa betsa betsapa nai anua inun mai anua jayakiaki, iwanan, jabun shinankin kenwanmisbuki. Kanekin dios ichapa inun yushin xanen ibu ichapa shinankin ikunwanmisbuki. ⁶Jamen nukubun ikunwankinan, nukun Epa Dios bestitun dasibi bawani inun nuku jatun damiwani nun jawen jiweaki. Ja inun, Xanen Ibu bestichai nun jayaki, Jesucristodan. Jawen taexundi Jesúsun jawen Epa Diosbetan dasibi damiwakin keyuniwen nun jiweiaki, nukubudan.

**Ikunwain babubuwen nuikin
medabewatikidi Pablón jatu
yusinikiaki, na janchadan**

⁷⁻⁸Chanima jaska tibi nukun Epa Diosun dami wani tsuan tapin keyuamaki. Jaskawen taea Jesús man ma ikunwanbiai betsabun yushin dami betsa jawen kenwanti namikidi piaibu ninkakin xabakabi man unandiabumaki. Yushin dami betsa kenwakin jawen

kenwanti piti pikin: “Nukun yushin dami betsa nun duawaii”, iwanan, apaunibu ana shinankin jamapai nami nun piaiwen taexun Dios nun duawatidumaki, iwanan, pikin nukunmebi pepama inun piama nun pepamadiki. Yushin dami betsa kenwakin man ma beyawanidan, jatiditun matubetan Jesús ikunwakin yushin dami betsa jawen kenwanti nami pikin jaska jawen kushipa yukapaunibu jakimama shinain juinti babukubainkanikiki.

⁹Jamen yushin dami betsa jawen kenwanti nami jawa jayama unankin jawa dateama pikin ikunwain betsabu juinti xubu man jatu uinma matu uintan chintunkin kanetidubuki. Matu yusinun ninkakanwen. ¹⁰Yushin dami betsa kenwanti jiwe anuxun man ikunwainbu kushipabun piaya ikunwain betsa babubun matu uinkin jaska yushin dami betsa kenwakin jenebianixun man ana jawen kushipakidi shinain dabanen jabundi jawen kushipatikidi pinun ixun shinantidubuki. ¹¹Jaskaken matunan, matun shinanwen besti unanepabiakin yushin dami betsa jawen kenwanti nami pikin ikunwain juinti xubu jabudi Jesucristo jatu mawaxunbianiken man jatu benutiduki. ¹²Jaska wakin Cristonabu juinti babubu jatun shinan chakabuwamakin man Cristo chakabuwadiaii. ¹³Jaskakenan, eanan, ja nami betsa pikin en betsabu en kanematidu shinankinan, ana jatu kanemakatsi ikama ja nami en ana metidumajaidaki, jatu chakabuwakatsi ikamadan.

**Pablo Jesúsun kushipayatun jatu
yusinkubainaya jabun dibibiaken jabuna
jawada biama inikiaki, na janchadan**

9 ¹Jamen enakididi matu yuinun ninkakanwen. Damasco baiwen en kai Jesús janu eki nukutan ea

uinmashinxun nukun Xanen Ibun jawen tsuma kushipaya betsa ea wakin ea yununiwen taexun tsuan ea yunuamawen taea jaska matu anu en dayai kaxun nukun Xanen Ibun daya en matu uinmakin Diosun kaka pepa matu yusinkubaunkin man Corinto anuabu Jesúس en matu ikunwanmaniwen taexun en Jesúsun kushipaya betsabu keska jabias daya en jayabiaken matun man ea danantidubumaki. ²Mae betsa anuabun ea unanti watan: “Jadan, Jesúsun kushipaya betsamaki”, akin ea dananbiaibun matunan, en matu yusian nukun Xanen Ibu ikunwantan man jaki dasiniwen taexun en Jesúsun kushipaya chanima man unaiin. ³“¿Jaskakin Pablón nukun medabe bismamen?” iki ekidi janchaibu eska en jatuki chanimis matu yuinun ninkakanwen. ⁴Ea inun Bernabén nun matu yusinkubainkin matu anua piti inun nuxuti nun bitudubia nun matu ea aismaki. Jakia nun Jesúsun kushipayabuwen taea nukudi nun jaska ea itiduki. ⁵Jesúsun kushipaya betsabu inun, nukun Xanen Ibun betsabu inun, Pedron yusinbaunkin jatun ain iyumisbu keska wakin nukundi ainbu nukubetan ikunwainbu nun iyudiatiduki. Nun jatu jaska wabainaya Jesúsun nuku yununiwen taexun jatuna bidiatidubuki. ⁶Matu anu jaska Jesúsun kushipayabu betsa jaskabainaibu piti inankin tadi inankin janu jiweyununbun dintu betsa inankin man jatu medabewabiamis ¿ea inun Bernabé jaska wama nuku besti man nuku medabewamatidumamen? ⁷Jakia soldadobu detenamei bukin ibubis jatun jamapai pakaisbumaki. Ja inun, uva bai anu dayakin jabun ja uva bimi pimisbuki. Ja inun, ina chaxu mekekubainmisbun jawen chuchu tsinitan amisbuki.

⁸Jaska wakin yuda betsa betsapabu dayakin jatun jamapai bimisbu besti

shinankin en matu yuiamaki. Jakia jawada Diosun nuku yusini matu yuinun ninkakanwen. ⁹Moisin kenekin: “Min jemaintin anuxun min ina awan jawen taewen min xekiwan pema pema akin mia xemexunaya dispiwen kunexyamakanwen, jau pinunan”, aniki. Na ina awakidi kenenidan, jaska keska shinanti wakin ¹⁰Dios nukuwendi nuiti Moisés jaska kenemaniki. Jakia mai pukinxun yunu banabu yunu ewatan kaniai tsekaxun betsa pimisbu keska wakin xekiwan xemenikatun xekiwan xemetan jatidi bumisbu keskai Dios dayaxuni nun nuitapayamanunbun medabewakin man nuku pakanunbun ina awakidi Diosun Moisés nun jawen dayakapabu nukukidi kenemaniki.

¹¹Jaskaken ana betsa matu yuinun ninkakanwen. Bai bana keska wakin Diosun jancha Jesúskidi nun matu yusinkubainaya nuku manakukin jawada man jaya piti kasmai tadi kasmai jiwe kasmai pei betsa man nuku dibiaki.

¹²Yaushiamá yusinan betsabu man pakamiski. Nukun dukun Jesucristokidi nun matu yusiain man ikunwainmawen taexun ichapa man nuku dibipakemiski. Na jaskakidi nun matu jaska wa matun yuikin: “Nuku yusinmisxun nukun pei bikin nuku pakamakin taewaikiki”, iwanan, nukukidi man shinan chakayamanunbun jawada man nuku dibia jawen nuiama Criston kakape besti man chibanunbun jawada man nuku dibia matu yukama nun jabiaska jiwekunkainaii.

¹³Ja inun, Templo anuxun ja jabu dayanikabun yuda betsabun inankuin Dios inainbu ja nami menuxunkin jamapai betsa betsapa wakin jabianuxundi jatidi kuakin jatidi bikin jatun piti dasibi bixun jawenabu jatu pimamisbu man unaiin. ¹⁴Jaska jabun amis keska wakin tsuabunda

Jesúskidi kakape yusinkubainmisbun jabun jatun piti inun tadi inun pei man jatu inankubaintidubu nukun Xanen Ibum jabias jawen tsumabu jatu yununiki, jau betsabudi jabiawendi jiwekubainxanunbunan. Jaska keska shinankubainkanwen.

¹⁵Na jaska tibi yunuti jayabiaken ja shinankin en matu jawa ea aismaki. Jaska inun, kene matu bumakin: "Matun jawada ea inankanwen", en matu wakin yukamaki. Jaska en matu yuiai keska wakin ekidi shinan chakakin: "Pablo pakakin taewanankanwen", iwanan, shinanyamaxankanwen. Man ea pakaisma keska besti ikubainkanwen. En matu yusianyan man ea jawa inainsma benimajaidai en keaui. En jaskakunkainaidan, en bechipajaidadaii. Matu bedabinwankatsi ikama en jawaida mawakatsis ikaii.

Eskaki, matu yuinun ninkakanwen. ¹⁶Diosun ea katukin Jesúsun kushipaya ea wa jawen kakape yusinbauni en jawen kenun ea yunuama iniki. Jakia en shinanen akidan, en kentiduki. Jakia jaskama jawen kushipawen ea yunu yunu aka en akubainaii, enamawen taexunan. En yusianmaken Dios eki sinatai ewen benimama ixanikiki. ¹⁷En shinanen Diosun kakape yusinbaunun, iwanan, emebi en akin taewaniwen taexun man ea dibikeanaii. Jakia en jaska en shinan medibi en akama Diosun ea kenatan ea chai putani ja en dayaxunxanun ea katukin nichiniken jaskakin matun jamapai tibi biantibiaken en tsua matu yukaismaki. ¹⁸Matun man ea jaska waismaken tsuan ea pakama Diosun daya en akubainaya jaska en matu yusinmis Jesúsun kushipaya betsabu pakakin yusinan betsabu pakadiakin man ea pakaismaken jawen benimawatiwen Diosun ea manakumiski, ea shinan chankawanwankinan.

¹⁹En tsuan esclavo dayadumabia ichapabu Jesú jatu ikunwanmanun ika dasibibun esclavo dayadu jikini keskakin yuda tibi en jatu dayaxunkunkainaii.

²⁰Jakia pepanun, iwanan, Moisin yunuti inun jawen nemati en unanbiai ana jatun ea tsumamabiaken judiobu Jesú ikunwanmanun ika jatube dasitan jaska Moisin yunuti inun nemati chibamisbu jatu yabuni jenemanun ika jatu keska en jiweyumiski. ²¹Diosun yusian dananma Jesucriston yusian jeneama chibankubainkin judiobuma jabun Moisin yusian chibankubainkin judiobuma Jesú ikunwanmanun ika jatube jiwea jatun beya keska chibain en jatube jiwediamiski. ²²⁻²³Ja inun, Jesú ikunwankatsis ibiai ikunwain kayabi idiamma babubu medabewai kushipa wakatsi iki jatube jiweyumiski. Ja inun, Jesú ikunwankatsis ibiai ikunwain kayabi idiamma babubu medabewai kushipa wakatsi iki jatube jiweyumiski. ²⁴Jamen matubudan, beyusi ichapa kushibaini jawaidabainaibu bestichaitun jatu binutan maemamis man unaui. Ja bestichaitun jatu binukin keyutan jawada pe bimis keska wakin Jesú ikunwantan duawakin ninkajaidai chintuanma ja besti chibankubainkanwen, jaska keskai matu tibi man pe jiweawen taexun jau Diosun matun pepawen taexun matu manakuxanunan.

²⁵Beyuskin betsabu binutan ni pei maiti jawenduabia chapuxanai binun ika jamebi jawen yuda kushipa wakin

jamapai piti tibi chakabuwamis piama jatun yuda pe mekemisbu keska wakin Diosun jawenabu manakuti jawa chapuisma matu inankin matu jiwekuinmaxanaiwen taexun matun shinan pe mekediakubainkanwen.²⁶Ean en shinanan, kushikainkin en binukatsis ikai keskaki. Beyus betsai detenamekin betsa maemanun, iwanan, tsuanda mekenen kaneama detenamemisbu keska wakin ean Jesúz chibankubainkin²⁷jamapai chakabu en jayadi jenekin en juinti kushipa keska wakin en yuda en mekejaidaii, betsabu Jesucristo ikunwanmatan en manakuti pepa en benuyamaxanunan. Jesucristo besti chibain man pe jiweawen taexun matudi pepawen Diosun matu manakuxanikiki.

Yushin dami betsa Jesúz ikunwainbun kenwantimakiaki, na janchadan

10 ¹En betsabu inun en puibuun, judiobun xenipabukidi jaska Diosun jatu wani man jakimayamaxanunbun matu shinanmanun ninkakanwen. Egipto anua kainbainaibun Diosun en xenipabu iyukin chi kuin puei maya kai anu butukaini jatube kai Ian Tashipa nuajaidabiaken jawen kushipawen jene paxkakin bai watan dasibi jatu pukemanikiaki. ²Janua Diosun jatu yunua kuin pueaiwen inun, Ian Tashipa pukeaibuwen ja dabewen taea dasibibu Moiséski jau chiti inunbun Diosun jatu nashimbainikiaki. ³Jaska inun, janu piti jayamaken nai anua piti Diosun jatu inankubaina dasibibun pidiakubainbukiaki. ⁴Ja inun, en xenipabun unpax manujaidaibun jabiatundi mishki anua unpax tuexun jatu amani jatube kakin dasibibu unpax pepa amadiakubainikiaki, ja Yushin kushipa Cristo yuda kayabi jayadiama mishkiki damitan jatu amakinan. ⁵Jaska

wakin Diosun nai anua pitiven inun unpaxwen jatu duawabia jawen jancha ninkabumawen taexun eskadabes pepabu dananmabia ichapabuki sinatakin janu jiweabumanu jatu ima atanbaunaya Egípto anua kainibu juni ewabus debui keyukubainbukiaki.

⁶Na jaska dasibi Diosun jatu akubidanidan, jau chakabuwen nun kemuyamanunbun Diosun nuku yusinkin jaska jamapai chakabuwen en xenipabu kemui janu jiweabumanua debunibu nukundi xabakabi nun jawen unanxanunbun jatu akubainikiaki. ⁷Januxun Moisin kenekin: “Oro ina awa bake damiwabu ja dami uin tsauxun pi inun mabex aki benibaun beyuskin ja dami kenwanibuki”, jatuki keneniki. Jaska judiobun dami betsa waxun kenwanibu keskadan, matundi ana jaska jusiayamadiakubainkanwen. ⁸Jaska inun, Israelbu ainbu jatun ainmabe chutanameaibun Diosun jatu kupiaya xaba bestichaitian 23,000 debunibukiaki. Jatu keskakin ainbu nukun ain kayabima ana metaskayamakubainankanwen.

⁹Ja inun, jatiditun Moisés ja akin Dios unanti wakin yuikin: “¿Jaskakin min nenu nuku iweima ikai?” iwanan, yuikin: “Piti jayamaki. Unpax jayamaki. Ja inun, piti nai anuadán, nismaki”, iwanan, Dios unanti waibun dunu midima Diosun jatu pima debunibukiaki. Jaskanibu keskakin nukundi Cristo unanti wayamanankanwen, mesekidan. ¹⁰Ja inun, jatiditun Moisés inun Aarón june jaki ja ikin yuainbuwen taexun nai tsuma Diosun jatu tenanmanikiaki. Jaskanibu keskakin Diosdi xabakabi jaki ja ikin yuanyamakubainankanwen.

¹¹En xenipabu chakabukubidanaibu Diosun jaskaibu jatu kupinikidi jau jabiaskadi nun iyamaxanunbun bebunkidi jaska ikaibukidi Diosun jancha nuku kenexunibuki, nukudi

badi jawen jenei keyuaitian jiwea nun jaskadiayamaxanunbunan.¹²Jatu jaska waniwen taexun tsuabunda: “Jesús chibankin duawai en chintuanmaki”, iki keanma mestentan jau uindakubainunbunwen, chakabu tibi juayadan.¹³Tsuabunda jawada chakabu ma juni man mediama inun chakabujaidatun matu achima ana matu achimakatsis ikai nukun yuda babun nun tenetidumadan, shinankanwen. Jaskawen taexunan, min yuda babubiaken Dios putama jaki chiti ikubainkanwen, nuku babu watan jau nuku bika tenemakin jaska tsuan tenetiduma nun jaskatan binutidumaki. Matu jaska tenemabiaya jawen bashikuama Diosun jawendi jawen kushipa matu unanmakin matu jawen taxnimakin matu binumaxanikiki, chakabu tenekin man binuaiwen taexunan.

Cristo kenwanmisbun yushin dami betsa jusikin kenwantimakiaki, na janchadan

¹⁴En betsabu inun en puibuun, Diosun jaskawen matu mekekatsis ikaiwen taea yushin dami betsa chakabuken kenwain ana jadi buyamakanwen, man ma Cristo jayadan.¹⁵Na eska matukidi jancha yuikinan, man juni unanepatan matumebi unantinantan man shinantidubu en matu yuiaii.¹⁶Nukun betsabube ichatan jatubetan medibi uva bimi jene watan akin Cristo nuku mawaxuni shinanmatidan, shinankin nun amiski, Dios kenwankinan. Ja inun, misi tunke tunke axun nuku mawaxunkin Cristo jawen yuda nuku inankuini ja misi jawen shinanmati nun pidiamiski.¹⁷Nun Jesús ikunwainbu nun yuda betsa betsapabia dasibibun ja misi nun pimisbuwen taeandan, Jesús nuku mawaxuni shinain nun jabias yudabuki.

¹⁸Israelbukidi matu yuinun ninkaidakanwen. Jabun jawen

chakabuwen taexun kenwanti piti Dios inanbu nami texe Templo anu dayanikabun buxun pimisbudan, jibia dabetañ Dios kenwankanikiki, na jabun inainbu inun Templo anu dayamisbunan.¹⁹Jakia yushin dami betsa kenwainan, dami jawauma inun jawen kenwanti piti jawauma nun unaiin, nukubunan. Jakia jabun shinanan ja yushin dami kenwainbudan, unanma jaska shinainbudan, jayaki.²⁰Eskaki. Matu yuinun ninkakanwen. Dios ikunwanbuman yushin dami betsa jawen kenwanti piti yushin chakabu inankin Epa Dios inanbumaki. Jaskawen taexun yushin chakabu kenwainbubetan jawen kenwanti piti piama jatubetan kenwandiayamakanwen.²¹Ja inun, Dios kenwankin Jesús nuku mawaxuni shinanmati nuxuti akatsis ikin yushin dami betsa jawen kenwanti nuxuti inainbu ayamakanwen. Jesúsun yuda shinanmati misi pikatsis ikin yushin dami betsa jawen kenwanti inainbu piyamadiakanwen. Jaska inun, ma Dios kenwanbiai ana jusikain yushin dami betsa kenwantimajaidaki, chakabu idumai keskaidan.²²Ja inun, cyushin dami betsa kenwankin Dios daka man sinatamanun, iwanan, aki ikai? ¿Matun kushipawenan, man Dios binuamen? Jaska yushin dami betsa kenwankin man jusia akeakeaidan, ana jaska tibi akin Dios sinatamayamakanwen.

Ikunwain betsabuwen nuikin jatu medabewakubaintikiaki, na janchadan

²³Tsuanda jamapai tibi atidudan, tsuan jatu nemamaki. Jaskadan, chanimaki. Jaskabia nuku medabewatidumaki. Jaska shadabudan, en jeneaui. Dasibi tsuan nuku nemama nun atidubia ikunwainbu dasibi medabewamadan, jenediatiki.²⁴Jamen jamapai pepa bikin ja dukun matuna binun ika ana jatu maemai

nashui ikama jakia yuda betsabu dukuntun jau katuyununbun pes ikama manakubainkanwen.

²⁵⁻²⁶Jaska inun, betsadan, mai dasibi Diosunaki. Ja inun, dasibi betsa betsapa mai anua damiwanidan, jawenadiki. Jaskaken nami inanmisbu jiwe anua nami bi yuka iki: “Nadan, ḷyushin dami betsa jawen kenwanti namimen?” iwanan, tapinkin tsua yukai meseama bitan pikubainkanwen. ²⁷Jamen ikunwanbuman matu jaibuwatan pimakatsi ikin matu iabu man kakatsi ikai namikidi yuka ikama jaska jatun piti matu kainmaxuna shinan chakama jatubetan man pitidubuki. ²⁸Jakia betsan mia bebunkidi yuikin: “Na namidan, yushin dami betsa jawen kenwanti namiki”, matu waya jawen juinti babu ana babu wakatsi ikama jawen nuikin ja nami piyamakanwen. ²⁹⁻³⁰Yushin dami betsa jawen kenwanti tsuabunda man nami piadan, matumebi man chakabumaki. Jaskabiakin ikunwain betsa juinti babuwen nuikin ja nami jatu medabewakin man pitiduma en matu yuiaii. Jaskadada Diosun ea nemamaken en pitiduki. Jakia yuda betsa en uinmachakaiwen taexun ena pemaki. Dios kenwantan jamapai tibi en pibia pebiaken jabu jatu mesewakatsi ikama dasibiwen Dios duawanun, iwanan, en ana jaska tibi meamaki. ³¹Jamapai pikin nuxuti akin jamapai betsa betsapa akinan, Dios duawanun, iwanan, akubainkanwen. ³²Jaska jamapai tibi akin jawada danainbu jatun bedubi akin jatu uinmachakayamakanwen, judiobu kasmai judiobuma kasmai ikunwain betsabu jiweabudan. ³³Jamen ea en shinanan ikidan, dasibibu medabewanun ika emebi jaska en shinain benama dasibi jatu kenwanmakin Jesús jatu ikunwanmanun ika jawada danainbu jenekin jaska dasibibu jiweabu en jatu medabewakuba inaii.

11 ¹Jaska Cristo jiweni ean en mawai jiwemis keskai matundi en jiwemis ea mawai jiwekin eadi chibankubainkanwen.

Ainbauibu ichati jiwe anua jaskatikiaki, na janchadan

²En matu yusintani jabi chibain man chintuanmawen taexun benimakin en matu kenwaiin. ³Jaskabia Diosun jancha ninkai ichatan Dios kenwakin jaska ainbauibu jau ikubainunbun matu yuinun ninkakanwen. Ja dukunan, Criston junibu mekekin yunumiski. Junibundi jawen ain mekekin yunudiamisbuki. Jabiaskadi wakin Diosun Cristo mekekin yunudiamiski.

⁴Jakia juni betsan jatun maiti mabikama sawea Diosbe janchai kasmai Diosun jancha jatu yusinkinan, Cristo duawama ichakawaikiki. ⁵Jakia ainbu betsandi jawen buxka mayabukuama Diosbe janchai kasmai Diosun jancha jatu yusinkinan, jawen bene duawama ichakawadiaikiki, jawen bu maxtekei keyua mankua nia keskakinan.

⁶Jaskawen taea mayabukukatsi ikamadan, jau maxtekei keyununbunwen. Jamen man dakei maxtekei keyukatsi ikamadan, bachi tuax ewapawen mayabukukubainkanwen. ⁷Jamen junidan, jawawen jawen buxka mayabukutidubumaki, Diosun juni ja dukun damiwakin jawen kushipa unanti wati ja itsa Diosun juni waniwen taeadan. Jakia ainbordan, junibu itsa Diosun jatu waniki, jau jawen benen kushipayakin duawanunbunan. ⁸Ja dukun juni damiwatan janubi jawen pishi bitan ainbu damiwaniki. Ainbu anua jawen pishi bitan juni damiwama iniaki. ⁹Juni damiwakin ainbun jau benewanun, iwanan, damiwama iniki. Jakia ainbu damiwakinan, junin bitan jau ainwanxanun, iwanan,

damiwaxuniki.¹⁰ Jaskawen taexun junin jawen ain mekemiswen taexun ainbun Dios kenwakin jawen jancha xabakabi yuikin jatun buxka junekin tadi tuaxwen jau mayabukukubainunbunwen, jawen benen kushipa unanmati wakin duawaidan, jaska wakin Diosun nai tsumabun jatun Xanen Ibu duawamisbu jatu keska wakinan.¹¹ Jaskaken nun Jesús ikunwainbudan, junibus ainbuuma jiwedidubumaki. Ainbusdi junibuuma jiwedidubumadiki, ja dabe paxkatan jawawen jaskatidubumawen taeandan.¹² Jaskawen taexun shinankanwen. Chanima junin pishi bixun Diosun damiwakin ainbu wanikiaki. Jaska inun, jabias ainbu anuadi juni inun ainbu bake kainmisbuki. Jaska dabes dukun Diosun jatu damiwaniken taea yuda dasibi jiwebaunabuki.

¹³ Jamen betsadan, ainbu Diosbe janchaidan, ¿jawen buxka tadi tuaxwen mayabukua ma itimen? ¿Mayabukutan iti daka? Matunmebi shinankanwen.

¹⁴ Jaska inun, ainbu itsai junin bu chaipa waidan, jaska nukun jiwea nuku wabiani ibubis betsai daketapai bu chaipayai nun jawen daketidubuki.¹⁵ Jamen ainbuabudan, jatun bu chaipa wai jawenduakin jatun bu beneai mexteamo jau bu chaipanunbunwen, mayabukui keskaidan.¹⁶ Na yusianwen man ja ikatsis ikaidan, ja ikanwen. Jakia na jaska en matu yusianinan, jabias keskadi Jesús ikunwainbu ichamisbu tibi anuxundi jabiaskadi shinankin yusinkanikiki.

**Jesús nuku mawaxuni
jawen shinanmati piti pikin
chakabuwani bukiaki, na janchadan**

¹⁷ Na en matu kenexun bumaiwen matu ja akin chitenun ninkakanwen. Ikunwainbu betsabube ichatan pewama man jatu ichakawaiwen

taexun en matu kenwanmaki.¹⁸ Ja dukun matukidia juxun ea yuiabu en ninkaidan, man ikunwainbu ichaidan, man xukui paxkakanikiaki. Jaska chanima paxkatan man pewaidan, man jaskaiwen taexun eskadabes en matukidi ikunwaiin.¹⁹ Matunmebi paxkai man unantinankeakeaidan, jaskatimaki.²⁰⁻²¹ Ikunwainbu ichaxun pibiakin yuda betsabun bebunkidi jabun piti bexun paxkama jawaida keyuaibun ja jabu piti eskadabes jaya buniaibun janua betsabu paenkin jaska tibi wakin nukun Xanen Ibu nuku mawaxuni shinanmati piti pinun, iwanan, man jaska shinanbetanan akamaki, jaska watimabiakenan.²² Matun jiwe anu piti jayamaken ikaskin bebunkidi yaniwakatsi ikama ja piti bawabidan bexun dabukun jatu paxkaxunkin inankatsis ikama yaushikin jawaida keyukin ikunwainbu betsan piti eskadabes beabu jatu dakewakin Jesús ikunwainbu dabinwakin Jesús nuku mawaxuni shinanmati piti pinun ikaibu man jatu dakewaibu matukidi yui benimakin en matu kenwantidumaki.

**Jesús nuku mawaxuni jawen shinanmati
pitikidi Pablon jatu xabakabi yusini bikiaki,
na janchadan**

(Mt 26.26-29; Mr 14.22-25; Lc 22.14-20)

²³ Jesús nuku mawaxuni shinanmatikidi nukun Xanen Ibun ea yusini en matudi yusintani unanbiakin man akin pewamawen taea en matu kenwanmaki. Ana matu yuinun ninkakanwen. Jabias meshutiandi Judasin Jesús jatu achimakatsi ikaya jatubetan pikin Jesúsun misi bitan tsumaxun²⁴ Dios kenwantan misi namakis tunketan jawen kushipayabu inankin yuikin: “Nadan, en yudaki. Matuwen dabanen matu mawaxunkin en yuda en matu inanxanai keskaki. Pikanwen. Ea shinanbetanan jabiaskadi

akubainxankanwen”, iwanan,²⁵ misi inun chaxuhan bake nami jatubetan pitan kencha uva vino mata tsumaxun Dios kenwantan jatu yuikin: “Yuba benawakin en matu mawaxuni kai shinanmati inankin na uva vino en matu amaidan, mawakin en jimi en matu jabaxunxanai keskaki. Ikunwainbube ichaxun ea shinanbetanan jabiaskadi akubainxankanwen”, jatu wanikiaki.²⁶ Jesúus ana judiamaken jawen shinanmati misi pikin inun jawen shinanmati uva vino akin nukun Xanen Ibu nuku mawaxuni man jatu shinan benawamakubainxanaii, kaneamadan.

**Ikunwainbu tibi jaskatan nukun
Xanen Ibun yuda inun jawen
jimi atikiaki, na janchadan**

²⁷ Jaskaken tsuabunda Jesúus nuku mawaxuni shinanmati uva vino inun misi pikin jaska nukun Xanen Ibun shinanmati nuku waxuniki meseama jawen yuda inun jawen jimi achakai man ibubis atimapakubainkanaii.²⁸⁻²⁹ Matunmebi ibubis matun shinan pe unantan jawa chakabu jayama man pitiduki. Jamen chakabu pewadiamatunan, man piyutidumaki. Man jawadashina matun shinan man pewadiamadan, ¿jaskakin eistan Jesúus yuda jawen jaskakatsi man piai? Man shinanma jaki meseama piaiwen taexun Diosun matu kupixanikiki.³⁰ Ikunwainbun jaska kanemisbuwen taea matumebi betsa betsapa babui betsabudi isin betsa tenei betsabudi man debukubainkanaii.³¹ Nukun shinan ibubis pewai nun ma unanti waken nukun Xanen Ibun nuku kupima ixanikiki.³² Jakia nukun Xanen Ibun nukun yuda kupikinan, nuku jawen tapinmanun, iwanan, nuku akitiki. Nuku kupibitan ja Jesúus ikunwanbumabe nuku tenan kayabiama ixanikiki.

³³⁻³⁴ Jaskaken en betsabu inun en puibuun, ikunwainbu betsabubetan pikin Jesúus nuku mawaxuni shinanmati man pikatsis iki bunijaidakin matun jiwe anuxun bebunkidi pitan jatube ichakubainxankanwen. Januxun jatubetan pi matun betsabu manakin jawaida piyamakanwen. Man jaska wakin ana kaneamaken Diosun matu kupiama ixanikiki. Ana betsakidi man ea kenexunimadan, matun mae anu kaxun jaska man ikai pewakin en matu yusin kaxanaii.

**Diosun Yushin Pepatun jaska
jatu yuimatidukidi Pablon jatu
yusinikiaki, na janchadan**

12¹ En betsabu inun en puibuun, jaska Diosun Yushin Pepatun matu tibiki jikitan jawen aka kushipa tibi matu amamiskidi jau man tapin pewanunbun matu yuinun ninkakanwen.² Jesúus man ikunwandiama yushin chakabun ja dami betsa chakabu jiwea jayama inun jancha jayamatun jawa shinanma jaskati dabanan matu iyua man kenwankubainidan, jaskadan, man unaiin.³ Jamen betsadan, Diosun Yushin Pepa jayatun jawen jancha yuixunikan Jesúus yuputidumajaidaki. Ja inun, yuda betsandi chanima yuikin: “Jesucristo en Xanen Ibuki”, iwanan, yuitidumaki, Yushin Pepatun kushipawen medabewamawen taeadan. Jaskaki, shinaindakanwen.

**Diosun Yushin Pepatun jawen
kushipawen Diosun daya nuku ama
akeakemiskiaki, na janchadan**

⁴ Janua nun ikunwainbu tibi nun jawen kushipanamei inun nun medabenamenunbun Yushin Pepatun jawen kushipa betsa tibi nuku yunua akeakekin jabias Yushinin nuku yunumiski.⁵ Ja inun, medabenanti

betsa betsapa nuku akeakekinan, jabias Xanen Ibu Jesucriston nuku tibi nuku yunumiski. ⁶Epa Dios nun dayaxunaidan, jaska nuku tibitun jawen daya nun axuain betsap a nuku tibiwen kainmamiski. Jaska wakin jabias Epa Diosun nuku amakin jawen kushipawen nun jawenabu nuku tibi yunua akeakemiski. ⁷Diosun nuku yunukin chania xabakabi jawen Yushin Pepawen nuku tibi medabenanti shadawakin ikunwainbu dasibbu paxkatima wakin nuku yunua akeakemiski. ⁸Yushin Pepawen yuda bestibu tibi jawen kushipa yunukin Diosun shinanwen xabakabi jau janchanunbun unanepa kayabibu jatu wamiski. Jabias Yushinwen bestibu tibi xabakabi pe yusinti shadawakin ichapa unanjaidaibu yusinanbu jatu wadiamiski. ⁹Betsa jabias Yushinwen jawen kushipa yunukin jawa dateama shinan betsap a iku njaidawanikabu wakin betsap a isin teneaibu jatu kaya wakin xuxawanika wakinan, ¹⁰betsa jaska tsuan atiduma jawen kushipa unanmati dami betsap a wanikabu wakin betsap a jadatuda yushin chania chaniai inun jadatuda yushin chani chakai unantidubu jatu wakin betsap a jancha tapindiamawen janchatidubu wakin betsandi jabun jancha ninkatan matun janchawen jatu xabakabi maewaxunika wakin Diosun nuku tibi yunua akeakediamiski, ¹¹jaska tibi nuku wakin Diosun Yushin Pepatun jawen kushipawen Diosun daya nuku amakin jaska bechipaiai keska yuda tibi jawen kushipa yunua akeakekinan.

Jesús ikunwain dasibbudan, pabu tibi yuda keskakiaki, na janchadan

¹²Nukun yuda bestichaibia nukun pabu tibi tsamia akeakeadan, dasibidan, yuda bestichaiki. Jaska keskai nun

Cristo ikunwain betsapabia nun jawen yuda bestichai keskaki. Eskaki, matu yuinun ninkakanwen. ¹³Jabias kadi wakin nun jabun ikunwain tibi judiobu inun judiobuma inun, esclavo dayadu inun tsuan dayaduman nun Jesús ikunwanyan nuku duawakin jabias Yushin Pepa Diosun ma nuku inan akeakeken ikunwain betsabuki dasinun nun ikaya jenewen nuku nashimabu ja Yushinin nukun yuda bestichai keska wamiski.

¹⁴Jaska keskadan, nukun pabu paxka tibi jayamaki. Jakia pabu midima nun jayaki. Jaska matu yuinun ninkakanwen. ¹⁵Januxun nukun taen meken shinankin yuikin: “En mekenmawen taea en jawen yudamaki”, iwanan, yuibiaya dasibi ja yudaki tsamiaki. ¹⁶Ja inun, pabinkin bedu shinankin yuikin: “En bedumawen taea en jawen yudamaki”, iwanan, yuibiaya dasibi ja yudaki tsamidiaki. ¹⁷Yuda dasibi beduskenan, ċjawawen ninkatidubumen? Jaska inun, yuda dasibi pabinkiskenan, ċjawawen xetetidubumen? Yuda pabu tibi jawen daya jaya keska ikunwain tibi jawen daya jayadiki. ¹⁸Januxun nukun tibi Diosun katutan jaska bechipaiai keska wakin nun ja dayaxununbun jaska daya nuku yunua akeakemiski, yuda pabu tibi keska wakinan. ¹⁹Nukun pabu tibi nun bestichaiyadan, nun yudauma ikeanai. ²⁰Jakia chania nukun punyan inun nukun kishi inun nukun tae inun nukun buxka inun dasibi betsap a nukun jayadan, nun yuda bestichai jayaki.

²¹Ja inun, bedun meken yuikin: “En mia jayakatsi ikamaki”, atidumaki. Ja inun, buxkapandi tae yuikin: “En mia jayakatsi ikamaki”, atidumadiki.

²²Jaskadada dasibi ikunwainbu nun medabenamemis yusinkin nukun yuda kayabikidi yusinkin en matu ninkamaidan, ea ninkakanwen.

Jawada nukun yuda anu nebiaken nun shinainsmadan, nukun mentsis inun nukun beshpi inun nukun dekin inun nukun bu inun nukun dari ja tibi jayama nun bika tenei jiwedidubuki.²³ Jaska inun, dakekin jawada yuda betsabu nun uinmakatsi ikama yaushikin ja junenun ika tadi sawekin achimai nun jawenduamiski.²⁴ Jakia jawakida nukun yuda dakeama junekatsi ikama nun jawa bepuismaki. Jamen jawakida nukun yuda dakeai inun ibubis nun dakemis Diosun nuku achimakin jawendua nuku wamiski.²⁵ Jaska nukun yuda paxkaisma keskai ikunwainbu dasibi shinan betsa betsapa nun jayama jabiaskas nun shinainbu jabube duanamei ikunwain betsabu uinkin jatun jamapai tibi jayabumawen jatuwen nuikin nun medabenanunbun Diosun nuku katumakeakemiski.²⁶ Jaska inun, nukun pabu betsan jawada bika teneaya dasibi yuda isin tenemiski. Jaska keskadiai ikunwain betsabu jawada chakabu teneaya dasibun jabetan tenetidubuki. Ja inun, nukun pabu betsaki jawada jawendua nun sawemaya nukun yuda jidabi jawenduamiski. Jaska keskadiai ikunwain betsabu tsuanda kenwakin duawaibun dasibi jawen nun benimamiski.

²⁷Jamen matu dasibi man yuda betsabu tibibiaken Diosun Yushin Pepatun medibi tibi matu kushipa waya daya betsa betsapa Diosun matu yunua akeakeadan, man jabias Criston yuda keskabuki.²⁸ Jaska tibi nun jayanunbun Diosun jaska bechipaikin jawen daya tibi nuku yunukin ja dukun Jesúsun kushipayabu wakin ja kachu Diosun jancha kakape yuixunikabu wakin ja kachu yusinkin tapinmanikabu wakin janua ikunwain betsabu jabun tsuan atiduma dami wanikabu inun jabun isin teneaibu xuxawanikabu inun

jabun medabewanikabu inun xanen ibu keska wakin yununikabu wakin januxun jancha betsa tapindiamawen janchatidubu wakin jaska tibi nuku yunua akeakeniki.²⁹ Nun dasibi jaskabia ikunwainbu tibi nun dasibi Jesúsun tsuma kushipayabuma man unaiin. Ja inun, dasibibudi Diosun jancha kakape yuixunikabumaki. Ja inun, dasibibundi yusinkin tapinmabumadiki. Ja inun, jaska tsuan atiduma dami wai dasibibundi atidubumaki.³⁰ Ja inun, dasibibundi isin teneaibu xuxawabuma inun dasibibundi jancha betsa tapindiamawen janchabuma inun dasibibundi jatun jancha nukun janchawen yuda betsabu yuixuntidubumadiki. Man jaska jaya tibi man unaiin.³¹ Jaska tibi man jayawen taexun unankin matunabu medabewakubaini pe jiwekin jawen Yushin Pepatun kushipawen jawada pepa Diosun bechipajaidai jayakatsis ikin yukakubainkanwen.

Nuikipa kayabidan, eskakiaki, na janchadan

Man jaskai pepai jiwedidubiaken jatun ja binua en matu yuiai ninkakanwen.

13 ¹Jaska jawen pepai jiwekunkaintidan, eska shinantiki. Jamapai yuda betsabun jancha tibiwen en janchatidu inun Diosun nai tsumabun janchawen en janchatidubia en jawa nuikipama janchaidan, jawada mane kushakin tain tain amisbu keska inun mane dabe tsumaxun tsakama tsakama abainkin juiyawamisbu mimawati keskaki, jawauma jamen janchawan bestidan.² Jaska inun, en Diosun kakape xabakabi yuunikabia inun Diosun shinan en unanbiams inun jamapai betsa betsapa junea en unanjaidabiai inun Dios ikunjaidawakin mati en maewatidubia en nuikipama en jawamajaidaki.³ Jaska

inun, jamapai en jaya inantan jawen pei bitan ja nuitkapi yumainbu pimai inun, Jesucristo ikunwankin en jawen kakape yusinkubaunaya juni betsan ea achixun en ninkai ea kuabiabudan, en nuikipamaken Diosun ea jawawen manakuama ixanikiki.

⁴Nuikipa kayabi jayadan, eskaki. Ninkaidakanwen. Bika tenebiai pes ikama tenemisbuki. Ja inun, duapananmisbuki. Ja inun, jawada juni betsya jayawen nui kemuismaki. Ja inun, xanen ibubia: "Ea duawanwanwen", isbumaki. Ja inun, jawada pepa amisbukidi tsua yui jatunmebi keinsbumaki. ⁵Jaska inun, metukin yuda betsabu dakewama janchai pemisbuki. Ja inun, jatun shinanens besti ikatsi isbumaki. Ja inun, jawaida sinataisbumaki. Ja inun, jawada jakidi chakabuwaimabu ana jas shinainsbumaki. ⁶Ja inun, jawada wai chakabu akaibulen benimaisbumaki. Chanima jawada pepa besti taxniaya uin jawen benimamisbuki. ⁷Tsuabuda nui jayadan, bika tenemabiabu ana jatube kemanameama tene keyumiski. Ja inun, tsuabunda jatun jancha ikunwankatsi imisbuki, yui kaya keskakenan. Ja inun, jadatuda pepa kaiain manakubainmisbuki. Ja inun, jawada pepa tibi mei tenemisbuki.

⁸Yudabun Diosun jancha xabakabi yuimisbu Diosun jatujenemai inun, yuda betsabudi jancha tapindiamawen janchai Diosun jatujenemaxanai inun, jamapai shadabu unankin keyubiakubainshinabu jaska tibi Diosun yamawaxanikiki. Jakia Jesúswen taea nuikipabu betsawen nuikin medabewakin jeneisbuma jaska besti keyuama ixankanikiki. ⁹Natian Diosun jancha eskadabes tapintan nun unaipi. Jakia Dios janchaxunkin nun yusinbiai mawaida nun kati akin keyuamaki. Jadan, keyuxanikiki.

¹⁰Jaskaken Jesús jabi ma juken dasibi januxun ana juneamaken jakidi tapinkin nun unankin keyuxanaii.

¹¹Eskaki. Ninkaidakanwen. Bake mishtinbun pexeishta unankin jawen janchawen yuikin jawen shinan shinankin jawada bake mishtinbun unanmis eandi en unaniki. Jakia juni ewatan bakeishtan shinan jenetan juni ewan shinanen en shinanmiski. ¹²Jaska inun, ja mane chaxa beisiti keskawen uinkin nukun yuda pe bexmas nun uinmiski. Jabiaskadi Diosun shinan pexeishta nun unanmisen Jesús ana juaya jaska Diosun en juinti unanmiswen eadi Diosbe beisinandabekin en unan bexmas wamis en unan keyuxanaii.

¹³Ja inun, na shinan dabe inun besti keyuismaki, ikunwainan, yubakani dateama manatidan, nuikipa kayabidan. Na shinan dabe inun besti jatun binu keyuadan, nuikipa kayabiti bestiki.

Jancha jatuna tapindiamawen
janchaidan, eskatikiaki, na janchadan

14 ¹Ja dukun yuda betsabuwen duapai man nuitkapidu tapinkubainkin Diosun Yushin Pepatun kushipawen jawada Dios man dayaxunkatsis ikai yukakubainkanwen. Jakia Diosun Yushinin matu dayamai jau jawen jancha xabakabi Dios yuixunkin jawen yudabu yusinkubainkin jenetima yukakubainkanwen. ²Yushin Pepatun jancha matu inan man jawen janchaidan, Dios man yuiaii. Man jaskabiai jawen jancha matu anua taxniai junea tsuan man jawa ninka pewatidubumaki. ³Ja inun, tsuanda Diosun kakape Dios jatu yuixunkin jabun ja jancha ninkaiwen yuiaya ninkaidan, jawen jatu ja akin kushipawai inun, jawadawen dateai punu nukabu jatu benimawatidu inun daewakin jatu duawatidu yuiaya ninkamisbuki. ⁴Diosun jancha

xabakabi yuixunikabun ikunwainbu ichapa yusinkin jawen jatu kushipa watibiaken jancha tapindiamawen jawen janchamawen janchai ibubis besti shinan chakanmisbuki, tsuan ninkamabiakenan.

⁵Tsuabuda matun janchamawen Dios yuixuni man janchaya juni betsan matun janchawen jaska yuiai matu maewaxuanmadan, ja jancha taxniaiwen tsua medabewatidumaki. Jamen betsadan, matun janchamawen Diosun Yushin Pepatun matu janchamai peken matu dasibi man jaska janchai en bechipaiaii. Jakia Diosun jancha xabakabi yuixunkin ikunwainbu ichapa man kushipa wa pejaidaya Yushin Pepatun kushipawen ja dukun Diosun jancha yuixunti yukakubainkanwen.

⁶Janua en betsabu inun en puibuun, matu anu yusin kaxun jancha man ninkatidumawen matu yusinkin jawa en matu pe medabewatidumaki. Matu jaska wama jawada Diosun ea unanmai inun jawada chanima en unain en matu yuitiduma inun jawen jancha en matuki chanitiduma inun jawada yusian betsawen en matu medabewatiduma iniki.

⁷Ja inun, tepe dewe inun arpa jawen mimawati tapianmabia beyuskin mimawaiidan, jawa dunkemakin jawendua wai unantidubumaki, jawen jui kaiainan. ⁸Jaska inun, xanen ibun jabe sinatanamemis beaibun jau jawaida jawen soldadobu benunbun ichawakatsi juni betsa yunua jatu kenakin trompeta mawachakaya jaska ninkabiai soldadobu unantimas jawa ninkatan betidubumaki. ⁹Jabiska keskadiai matubu matun janchamawen xabakabi Jesúskidi man chanibiaya jawa matu ninkatidubumadiki, jawa man jatu yuiai dabanenan. Jaskaidan, jamen niwe besti taxnimai man janchakanaii. ¹⁰Mai jidabi anu jiwebaunabu jancha betsa betsapa

tibi jayabuki. Jaska inun, nawa betsabetsapabun jawena ninkatidubiaken ¹¹yuda betsabun ea janchawabiabu jatun janchawen jawada yuiai en ninkamaken: "Nawaki", ika eki dakeaibun eadi: "Nawaki", idiai eadi en jatuki dakemiski. ¹²Jadatuda matun aka pepawen Yushin Pepatun matu medabewatidudan, ja jayakanwen, ikunwain tibidan. Jaskawen taexun Dios man dayaxunkatsis ikin ja dukun ikunwainbu betsabu medabewashadakatsi man ikaidan, jawen kushipa yukakubainkanwen.

¹³Jaska inun, jancha matun janchamawen Yushinin matu janchamaidan, ichati jiwe anuxun yusiin janchakatsidan, bebunkidi Diosbe janchakubainkanwen, jau ibubis kasmai juni betsan matun jancha maewaxuntidu matu inanunan. ¹⁴En janchawenma jancha betsawen en Diosbe janchakin kenwanyan en yushinin ja kenwanbiaya en shinan unanepawen emebi en jawa ninkatidumaki. ¹⁵Jaskakenan, jaskaxanpa? En daka eskati. Dios kenwankin en yushinwen inun en shinanendi en akaii. Jaska inun, Dios kenwain nawai en yushinwen inun en shinanendi en idiai. ¹⁶Dios kenwankin matun yushin bestiwen man akayadan, yuda betsabu matube ichaxun matun jancha ninkamawen taexun matubetan Dios kenwanpaibia jawa yuitidubumaki. ¹⁷Ja inun, Dios kenwain jawenduabiaibun matube ichabun matubetan Dios kenwantidubumaki. ¹⁸Ja jancha en janchama en ja tapindiamawen janchakin matu dasibi en binuawen taexun en Dios kenwaiin, ¹⁹iwanan, ikunwain betsabube ichaxun ichapabu yusinun, iwanan, 10,000 ja jancha ea ninkabuma janchawen en yusinkatsi ikama jakia jancha xabakabi meken bestiti dasibibun ninkatidubu en yusinkatsis ikaii.

²⁰En betsabu inun en puibuun, matubunan, jaska bakeishtan jawa unanma shinanmis keska ana iyamakanwen. Jakia bake mishtinbu padananain chakabuwama imisbu keskai tsuabuda man ma ewadan, ana unainspama jaskakidi shinaindakubainkanwen. ²¹Israelbu Judea anuabukidi Diosun Isaías yuikin: “Junibun jatun janchama Judea anuabu en jatu janchamaya nawan janchawen ekidi yuiaibu jabun jatun jancha ninkabiatan eadi chibanma ixankanikiki”, aka keneniki. ²²Jaskaken Yushin Pepatun janchamaya tsuada jancha betsawen janchaidan, jaska yudabun atiduma amakin jatun janchawen ninkakin ikunwandiabuma jatun shinan e itidubuki, jaskawen shinain janchai unanmadan. Jakia Diosun jancha jatun janchawen yusinkinan, jabun ma ikunwainbu medabewatiduki. Ikunwanbuman ja jancha ninkai eskadabes medabewadiatiduki.

²³Jaskaken matu dasibi ichatan Yushin Pepatun kushipawen jancha betsa tibiwen dasibibu janchakin man yuibaunaibun yuda betsa jaska janchatiduma inun ikunwanbuma jikixun man janchai ninkakin unanmabia yuikin: “Jesucristo ikunwainbu jadi jaska janchatimawen janchakanikiki”, iwanan, matu yuikin danantidubuki. ²⁴Jakia Diosun matu medabewaya matun janchawen man xabakabi jatu yusianyan yudabu ikunwanbuma jikixun ninkakin jatun shinan chakabu unankin ikunwanun, iwanan, jaska jiwemisbu unantant matubetan ikunwankatsis ikin shinan betsa watidubuki. ²⁵Jatun shinan chakabu junea xabakabi wamakin Diosun jatu unamaya ana jawawen jaskatima datei Dios kenwanun ika danti iki beutan yuikin: “Chanima Dios matuki dasia jiweaki”, ixankanikiki.

**Ikunwain ichaxun jaska
tibi akin jawendua wakin
pewatikiaki, na janchadan**

²⁶En betsabu inun en puibuun, jaska man ikunwainbu ichatan jawada Diosun matu amai medabenain kushipai man eskakubainun bun matu yuinun ninkakanwen. Diosun matu tibi unanepa waya juni betsan Dios kenwankatsi ikidan, nawakanwen. Ja inun, juni betsandi yusinkatsi ikinan, yusintidubuki. Betsadi Diosun jawada dama unanmaxu chanikatsi ikidan, chanitiduki. Betsadi jatun janchamawen janchakatsis ikidan, jau jawen janchamawen janchanunwen. Betsan ja jancha yuiaya xabakabi jawen jancha maewaxunkin yuixunkatsis ikaidan, jau jatu maewaxuni janchanunwen. Jabu tibi jancha akeakekin unanxubida ikunwainbu medabenain man kushipanamekubaintidubuki. ²⁷Jakia Yushin Pepatun kushipawen matun janchamawen man janchakatsis ikaibudan, dabe kasmai dabe inun bestitun dukun man yuia akeakeaibu jabiatiandi juni betsya Yushin Pepatun kushipa jayatundi jau jatu maewakin xabakabi yuixunkubainun bun wen. ²⁸Jakia juni betsya Yushin kushipa jancha maewaxuntidu jayamaken jau tsuada Yushin Pepatun kushipa jancha betsawen janchai matu anu jayabia ichamisbu bebunga jau matu janchaxunyamanunwen. Jakia jamebi Dios kenwain janiada tsuan ninkama Diosbe janchatidubuki. ²⁹Jabiaskadi tibidi Dios yuixunikabun jawen jancha xabakabi yusiaiinbu yusinika dabe kasmai dabe inun bestitun jatun jawada yuitidubuki. Yusianyan yusinika betsabun ninkakin jawen jancha çjancha kayabimenkain? jau yukakin unankubainun bun wen. ³⁰Janua tsuada

juni betsaa matube icha tsauanua Diosun jawen jancha xabakabi taxnimakin yuimakatsi ikaya ja dukuntun yusinkin jau jawaida keyununwen, janua ja kachu betsandi jau anunwen.³¹ Jaska wakin matu tibitun inun dasibitun jawada Diosun matu yuimakatsis ikai jawen jancha jatu yusinkin man akaya jaska tibi dasibun matu anua tapiin benimakubaintidubuki.³²⁻³³ Man ichatan kenwainbu Dios unanuma jiweatun matu itimaska wakin jusimakatsi ikamawen taea man Diosun jawen jancha xabakabi yuixunmisbun matun kushipa meketan uinda jawen dayakubainkanwen.

Jaskai nun ichai beyamis tibi ikunwainbu ichatan³⁴ juni yusinanbun yusinkin keyuaya junibun ninkatan yuka ikeakeaibun ja ichabu anua ainbuaibudi yuka ikatsis ibiai jau janchayamanunbunwen. Jawen benen mekeawen taea ainbuaibu jau pes tsauanunbunwen, Diosun Moisés kenemakin jabiaskadi yununiwen taeadan.³⁵ Jawada yuka iti tenebai kaxun jawen jiwtexun besti jawen bene kasmai jawen epa inun jawen juchi jau yukakubainunbunwen.

³⁶Diosun kakape yusinkin taewakin matu anua dukun taxnimama inibu man unain. Ja inun, junibun yusinkin matu anu besti yusianma idianibuki. ³⁷Jaskaken tsuabunda shinankin: “Diosun Yushin Pepa jaya jawen jancha en xabakabi yuixuntiduki”, iwanan, en kene uinkin: “Nukun Xanen Ibun Pablo nuku yusinmaniwen taea yusian pepaki”, iwanan, unanxankanikiki.³⁸ Jakia tsuanda en yusian dananyan Jesúsun ja yusinandi danandiaxanikiki.

³⁹Jaskaken en betsabu inun en puibuun, tsuada Diosun Yushin Pepatun kushipawen jancha jawen janchama janchakatsis ikai jatu nesewakin nemayamakanwen. Jakia Dios yuixunkin

jawen jancha xabakabi jatu yusinkatsi ikinan, Dios yukakubainkanwen.

⁴⁰Janua ichatan Dios man kenwankatsis ikaidan, dasibi Diosun Yushin Pepatun kushipawen jawendua wakin jaska en matu yusinmis chibankin akubainkanwen.

Jesús mawashina Diosun bestenwan uinibukidi yusinikiaki, na janchadan

15 ¹⁻²En betsabu inun en puibuun, Diosun kakape Jesúskidi en matu yusianyan ninkakin shinan chakayamakin unanxubida bechipaikin Jesús man ikunwanixun chibankin shinankubaini chintuanma man kushipakunkainaya ja kakapewen Diosun matu mekeawen taea mestentan man jamen ikunwanma ini unankin matu ana yuinun ninkaidakanwen.³ Jaska dukun ean unankin tapinixun en matu yusintanidan, eskaki, ninkaidakanwen. Jaska Diosun jancha yuixunikabun kene tibiwen yuini keskai yusinkin: “Nukun chakabu buanun ika Mesías Cristo mawaxanikiki”, inibu jaska kenenibu meneni keska nun matu yusinkubaintaniki.⁴ Ja inun, Jesús mawa maiwabu xaba dabe inun besti kaya Diosun bestenwanikiaki, jaska bebunkidi Diosun jancha yuixunikabun jakidi kenenibu keskadiaidan.⁵ Jaska washinabu janua Simón Pedro, jawen kena betsaa Cefasdan, jaki dukun Jesús taxnitan uinmatan janua jawen kushipaya 12 junibu jatudi uinmadianikiaki.

⁶⁻⁷Januadi jawen betsaa Santiago jakidi nukutan Jesúsun kushipaya betsabudi jabukidi nukutan jatu uinmashinken janua jabun chibankin ikunwanmisbu midimajaida 500 binabutikidi Jesús jatuki nukutan uinmadianikiaki. Jatidi ma debua inun ichapa jiweiayuabuki.

⁸⁻⁹Januxun Jesús ikunwainbu ichakawakin en jatu mesewakin

itimaska wakubainaiwen taea en atimapá chakabubia Damascokidi en kaya jawen jenei eki nukui Jesús taxnitan ea uinmadianiki. En bake atimapá kaian kaunma jiwemis keska en ikaya jawen kushipaya betsa tsuabunda ea kenatidumabiaken en jawen tsuma betsabu kushipaya keska Jesúsun ea wani jatu keskabia en shinanan, en bexmaski.¹⁰ Eadan, chanima en jawen tsuma kushipaya betsaki. Jaska ea wakatsi Diosun ea duawakin ea katunixun jamen ea katuama jawen daya akin Jesúsun kushipaya betsa dasibbu en jatu binumakubainai. Jakia emebi dayama Diosun ea duawakin ea medabewaya en dayaxunkunkainai. ¹¹ Nun tsuabuda Jesúsun kushipaya betsabu inun ea nuku dasibun Diosun Jesúskidi kakape nun matu yusinkubainaya ea kasmai juni betsabu matuki chaniaibun man Jesús ikunwankin taewaniki.

Jesús bestenwani keska wakin ikunwainbu mawakubainaibu Diosun jatu bestenwandianxiaki, na janchadan

¹² Jamen betsadan, Cristo mawashina Diosun bestenwanikidi nun matu yusinbiamisken ɿjaskakin: “Mawabun yuda ana besteanma ixanikiki”, iwanan, jatiditun shinankin Corinto anuxun yuimisbumen? Man jaska shinainbu matu ana yusinun ninkaidakanwen. ¹³ Mawabu jawen yuda ana besteanma ixanaibunan, ɿCristodan, jawen yuda ana besteanma inidaka, man shinain? ¹⁴ Diosun Criston yuda ana bestenwanma inikenan, jaska Cristokidi jawen kakape nun yusinmisdan, jawama inun man Jesús chibainan, matun shinanwen man ikunwainan, jawamadi ikeanai. ¹⁵ Ja inun, Diosun Criston yuda bestenwani nun jawen kushipayabun matu yusinkin mawabu jatun yuda ana besteanbuma

ibiaxanaya jamen matuki chanii nukun janchawen matu padain nun chani chaka bestikunkainkeanai, Dios jaska yubakabianiken nukunmebi jawen jancha betsa wakin Dios dananmaidan. ¹⁶ Mawabun jabun yuda besteanma ixanaya Cristodi Diosun bestenwanma idiakeaniki. ¹⁷ Jaska inun, Cristo besteanma iniken man Cristo ikunwain jawamawen taexun matun chakabu tsuan buama man jabiaskas jiwekeankanai, jawa kushipa jayamawen taeadan. ¹⁸ Jaska inun, Cristo besteanma iniken Cristo ikunwainbu jamen mawatan benukeankanai. ¹⁹ Ja inun, na jiweawen besti Cristo ikunwankin nun manakaibudan, nun nuitapachakayamakeanai, jaska betsabun nuku danankin nukukidi shinantidubudan.

²⁰ Jancha chanima matu yuinun ninkaidakanwen. Cristo mawashina ja dukun Diosun bestenwaniwen taea yudabudi mawakubainaibu jawen taeadi bestein keyuxankanikiki. ²¹ Adánen chakabuwakin yudabu dasibi mawati baiwaxuniki. Jaska keskadiwakin Cristo mawa ana bestenixun jabiawendi taea yudabu dasibi mawa bestenxankanikiki. ²² Adán ini keskadiai yudabu dasibi mawaxankanikiki. Jakia Cristo bestentan ana jiweniken jaska keskadiai yudabu ikunwain ana bestentan jiwedioxankanikiki. ²³ Janua Cristo jawen yuda Diosun bestenwaniken ja jabun ikunwainbu jawenabu mawabu jaska Cristo ini keskai ana Cristo juaya dasibi jatun yuda Diosun bestenwankindi keyuxanikiki. ²⁴⁻²⁶ Janua dasibi pewakin keyunun ika Cristo Xanen Ibjajida juxun dasibi jatun kushipa tibi jatu mebinkin xanen ibu betsabu mitanumabu wakin dasibi yununika kushipabu yamawakin dasibi yushin yamawakin dasibi jawen

jaibuaibuma maemakin yamawakin keyutan atimas jawen yudabu mawamis keyu maematan Cristo ana Xanen Ibuama jenetan Epa Dios besti yunua ja bestitun dasibi mekei Xanen Ibuxanikiki.

²⁷⁻²⁸Dasibi Diosun damiwani Criston jatu maemamakin keyutan jaska jabe yubakai yuinameni jawen Epa Dioski xanen ibuama Epa Diosun ja damiwani mekekubainmixun yunua Criston jatu maemakin binumatan dasibi betsapajabetan damiwani Epa Diosun mekekin dasibibu binui ja besti xanen ibujaidaxanikiki, Epa Diosdan.

²⁹Jaska inun, betsadan, en jaska matu yusinsmabiaken yudabun ikunwain nashidiama debuabu jatidi yuda betsabun medabewanun ika nashixunmisbuki. Mawabu Diosun ana bestenwanma ibiaxanaya, ḷjaskai ja yuda mawa man jatu nashixunmisbumen, ana bestenxanai man ikunwanmabiadan?

³⁰Jaskabiaken Diosun kakape nun yusianyan chakabu mese tenei nun ikunkainaya mawa nun ana besteanma ibiaxanaya, ḷjaskakin jiwea bika badi tibi nun tenekubainkanai? ³¹En betsabu inun en puibuun, nukun Xanen Ibu Jesucristo man ikunwanyan chanima benimajaidakin jancha kayabi matu yui: “Badi tibi en mawakeankunkainai”, ika en chani chakamaki, jaska en ikunkainaandan. ³²Nun ana besteanma ixanaya en jamen jiweawen taea Éfeso anua pubenjaidabube jatube ja iki en shinanan besti ḷen jawa maemama ini man shinain? Chanima mawabu nun ana besteanma ixanayadan, jaska yudabun ikunwanbuma janchai: “Beyus bestikin pinankanwen, vino anankanwen, meshukidi mawatan nun jawa piama ana beyusama ixanaidan”, ikaibun nun jabiaskadi shinandiaekeanaii. ³³Jaska shinanbiakubainaibun jancha kayabi matu yuinun ninkaidakanwen. Jau

matu padanyamanunbun tsuabunda nukun yusian danankin man beya pepa chibanbiaya jamakidi shinanmakin matu chakabuwamakin jenemakatsis ikaibu ana jatube jaibunameyamakanwen.

³⁴Matu dakewanun, iwanan, na jaska en matu yuaii. Yudabu Diosun bestenwanxanai betsabun ikunwanma kanekanikiki. Matubu niti itan jatun jancha ana ninkai chakabuwama matun shinan bestenwantan pe besti Dioskidi shinankubainkanwen.

**Yuda mawakubainaibu bestein
jaskaxanaibukidi Pablon jatu
yusinikiaki, na janchadan**

³⁵Jamen tsuada yuka iki: “Jaskada ixankanimenkain, yuda mawabu Diosun bestenwanan?” iki: “Jatun yudadan, ḷjaskada jayaxankanimenkain?” ikin nuku yukamisbuki. ³⁶Jaska man yuka ikaidan, jawa unanmabia man ikaii. Jexe banakidi yusinkin jaska nukun yuda bestenxanai en matu ninkamatiduki. Eskaki, ninkaidakanwen. Yunu jexe bana jawen bimi chapuaya jawen jexe pexei jukuin betsai ana jiwemiski. ³⁷Janua xachiwan jexe bana jukuin jawen ji damii beneama jakia jawada jexe tibidan, xachiwan keskadan, jawen bimi damimisbuki.

³⁸Jexe tibi Diosun jaska benemanixun jaska tibi betsawama yumewamiski.

³⁹Ja inun, yuda dasibidan, betsawama jaskas nami jayamaki, juni kuin nami inun, yuinaka nami inun, peiyabu nami inun, baka namidan. ⁴⁰Jaska keskadi nai anua inun mai anua yuda jaska keskababes wama iniki. Ja inun, yuda besu naiudia jawendua wakin mai anuadi yuda besu jawendua betsawadianiki.

⁴¹Jaska inun, badi inun uxen chaxadan, jaskasmaki. Ja dikabi bishi dasibi jaskas chaxamadiki. Betsawama chaxajaida inun betsawemas chaxaya Diosun dasibi chaxamamiski.

⁴²Nukun yuda bestenwankin betsa waxanaidan, jabiaskadi tibi nuku waxanikiki. Mawa maiwabu yuda chapumiski. Jamen bestenwankin yuda bena chapuisma nuku tibi inanxanikiki, Diosun. ⁴³Mawabu jawen nami bechipaiama maiwakin putabiabu janua jawen yuda ana besteaintian yuda bena chapuisma bi bestenxankanikiki. Yuda mawa nami babu maiwabiabu Diosun chipu bestenwan jawen kushipa inan jayaxanikiki. ⁴⁴Yuda kayabi jimia mawa maiwabu ja yuda besteinan, Yushin Pepaya nun bestenxanaii. Yuda kayabi nun ma jayaken yuda bena jawen Yushin Pepatun jiwemaya nun jayaxanaii.

⁴⁵Diosun yunua Moisin kenekin: "Juni wakin taewakin Adán damiwanan Diosun jiwemaniki", aniki, Moisinan. Jamen Criston yuda Adán keskadi bia nuku mawaxunkin jiwekuian Diosbe niti ikama jawen Yushinwen jiwei nuku waxuniki. ⁴⁶Nuku damiwakin taewakinan, ja dukun yuda kayabi Diosun nuku waniki. Ja kachu Diosun nuku bestenwanyan jawen Yushin Pepatun yuda bena nuku inanxanikiki. ⁴⁷Ja dukun juni Adán wakin Diosun mai mishpu bixun jawen yuda damiwanikiaki. Jamen yuda Cristodan, nai anua jui juni kuin yuda bitan kainiki. ⁴⁸Mai mishpu bixun damiwakin Adánen yuda wani jabias nukun yuda mai mishpuken ja yuda nun mawabu chapui keyui nukun yuda ana jawendi mai mishpu besti ixanikiki. Jamen Cristo nai anua juni jabiaudidi kani keskai nukudi nai anu jabe jiwei kai nukun yuda Yushin Pepatun kushipa jaya yuda benaya nun jiwekuinxanaii, niti ikamadan. ⁴⁹Ja dukun mai anu jiwea Adán damiwanai jawen yuda keska nun jiwea Diosun nuku bestenwankin nuku betsa wa Criston yuda keska nun ixanaii. ⁵⁰En betsabu inun en puibuun, ana matu

yusinkubainun ninkaidakanwen. Nukun yuda kayabi chapumiswen taea jiwekuin niti ikama nun jawen itidumawen taea jabias yuda kuin nai anu Diosbe jiweditudmaki.

⁵¹Yubakatan Diosun jawen jancha juneni matu xabakabi yuinun eskaki, ninkakanwen. Jesús nun ikunwainbudson, mawaida jatida nun mawama ixankanaii. Jesús ana juaya nuku tibi betsa waxanikiki, yuda bena betsa nuku wakinan. ⁵²⁻⁵³Badi jawen jenei keyuaitian jawaida nun betsupe imis keskai Jesucristo juaya Diosun nai tsuman trompeta chaan akaya mawabu Diosun bestenwanyan yuda kayabi chapumistun jawada chapuisma bikin yuda bena ana mawatiduma biaya nuku nun jiweyuabu nuku dasibi dami wakin betsa wadixanikiki.

⁵⁴Jaskai kaikidi Dios yuixunika Isaíasin kenekin: "Ana tsua mawama iki kai Mesíasin mawa maemaxanikiki", ini xabakabi chanima ani nun unaiin.

⁵⁵Diosun jancha yuixunika betsa Oseasindi kenekin: "Diosbe jiwea niti ikamadan, nun mawamawen taea nun ana jawa tenetiduma ixanaii", ini man ninkadiatiduki. ⁵⁶Eskaki, matu yuinun ninkaidakanwen.

Chakabukunkaini chakabuwen mawai nun datemiski. Jaska inun, dasibi Diosun nemati inun jawen yunuti Moisés kenemani nun chibantidumawen taea shinan chakabun nuku achixun nuku chakabuwamakubainmiski.

⁵⁷Jaska binumakin nukun Xanen Ibu Jesucristo nuku mawaxunkin nukun chakabu buaniken mawai nun jawa ana dateama ixanaiwen taea Dios kenwankubainankanwen, benimawakinan.

⁵⁸Jaskaken en betsabu inun en puibuun, jawada nukun Xanen Ibu matu yunua jeneama akin man jamen

dayama man unainwen taea Jesús chibain chintuanma shinan betsa wama nukun Xanen Ibuki xukua pejaida dayakin apakekanwen.

Jaska watan Jerusalén anua ikunwainbu Pablon jatu medabewakatsi inikiaki, na janchadan

16 ¹Yunuti betsa matu yuinun ninkakanwen. Jesús ikunwainbu Jerusalén anuabu nuitapakanikiaki. Nun jatu medabewanunbun jaska ikunwainbu Galacia anuabu en jatu yunuyama keska wakin en matudi yuiai ninkakanwen.
²Matu anu en kadiama ea manama domingo tibi matun dayawen man pei biai ichapa man biaitun pei ichapa aduaya eskadabes man biaitun pei eskadabes adukin ea manakanwen. Man ma ichawashinken ³janua en kai jikiaya pei man ichawashina Jerusalén anu man bumakatsis ikin juni betsabu katutan en kene jatu bumaxanaiyabi ja medabewati pei man ichawashina jatu inain butidubuki. ⁴Jamen ean dikabi en jaska shinain en kayadan, jabu ebe butidubuki.

⁵Nenua kainkainidan, Macedonia mai pakea anu kakunkaini janua atimas Corinto anu en matu anu jikixanaii.
⁶⁻⁷Matu anu kabia en jin jin ikainkatsi ikamaki. Jamen nukun Xanen Ibun ea nemama uxe dabe kasmai ui debuaya matube jiwekatsi iki jawaida en kakatsi ikamaki. Januxun ea duawakin ea medabewakin jadakidida en kaya man ea nichinkin pewatidubuki.

⁸Ja Pentecostés jabatiandi ikunwainbu ichabuki Yushin Pepa jatuki butumi besiaibutian uxe junio keyuaya nenu Éfeso anu en jabianu bashikuxun jatu uinyuiai. ⁹Éfeso anuxun Jesúskidi kakape yuui en dayai ichapabun ea nemai eki sinatabiaibun Diosun jancha betsabu en yusinkubainaya ichapabundi ea ninkakanikiki.

¹⁰Nukun betsa Timoteo matu anu jatiada kaya nukun Xanen Ibun daya en axunmis keskadi akaiken taexun jikiae ixun duawaxankanwen. ¹¹Matubun tsuanda dananma duawakin jamapai tibi bikatsis ikai medabewakin inantan benimawakin unanuma jau ea anu junun nichinxankanwen, nenuxun ikunwain betsabubetan jatubetan en manaidan.

¹²Ea kene bemakin Apoloskidi man ea yukaima matu yuinun ninkakanwen. En yunubiakubaina natian matu anu kayutidumakiaki. Janu jatiada jawen shinanan kaxanikikidan.

Jatun jancha jatu bumanibukiaki, na janchadan

¹³Kushipai jawaki teama Jesús chibain chintuanma jamapai chakabu danain pepakubainkanwen, niti ikamadan.

¹⁴Jamapai tibi man akaidan, yuda betsabuwen nuikin jatu duawakin axunkubainkanwen.

¹⁵En betsabu inun en puibuun, Acaya mai pakea anuxun Estéfanas inun jabe jiweabun jabu dukuntun Jesús ikunwankin taewanibun ikunwainbu dasibiwu nuikin jatu medabewakubainmisbu man unaiin. ¹⁶Jabu keska ninkakin ikunwainbu betsabu nukun Xanen Ibu Jesúskidi kakape dayamisbu jatu ninkadiakin dasibi jatu medabewakubainkanwen.

¹⁷Man chai jiweken matumaki Estéfanas inun, Fortunato inun, Acaico ea anu beshinxun jawada man ea axuntiduma ea axuainbuwen taea en benimajaidaii. ¹⁸Jabun man ea axuntidu keska wakin ea anu beshinxun en juinti shinan chankawankin ea benimawakanikiki. Ikunwain betsabu jaska keskabu duawadiakubainkanwen.

Jawen kene Pablon keyuniaki, na janchadan

¹⁹Ikunwainbu Asia mae pakea anuxun matukidi pe shinankin jabun

jancha matu yunukanikiki. Ja inun, Aquila inun Prisca inun dasibibu jatun jiwe anu ichamisbun matukidi pe shinandiakin jabundi jatun jancha matu yunukanikiki. ²⁰Nenuxun ikunwain dasibibun jabun jancha matu yunudiakanikiki. Ikunwain betsaki nukutan jatube benimai yuka iki ikukunankubainkanwen.

²¹Kenekin keyukin en tsumapan ana ea axuanma en Pablon emebi en matu kene keyuxunaii.

²²Tsuabunda nukun Xanen Ibu bechipaimadan, jau Diosun yupununwen.

Nukun Xanen Ibu nun manai jawaida jau ana menan judinunwen.

²³Nukun Xanen Ibu Jesúsun jau jawen pepawen matu duawakubainunwen.

²⁴Matubetan en Jesucristo ikunwainwen taea matu shinain en matuwen nuikunkainaii.

Jatiski, en janchadan.
Pablo

CORINTO ANUABU PABLON JA KACHU JATU KENE BUMANIKIAKI

2 CORINTIOS

Pablón jatukidi shinanikiaki, na janchadan

1 ¹En Pablo Jesucriston kushipayawakin Diosun jawen shinanen ea katuniken nukubetan ikunwain nukun betsa Timoteobetan en Pablón en ana matu kene bumaii. Diosunabu Corinto maewan anuxun man ikunwainbu inun dasibi nukubetan Jesús chibainbu Acaya mai pakea anu manibaunabu en matu kene bumai uindaxankanwen, jaska man unanumamenkainan. ²Nukun Epa Dios inun nukun Xanen Ibu Jesucriston jau matu unanuma jiwemakin pewakin duawakubainunbunwen.

Ikunwainbu betsabu bika tenei juinti nishmabu jatuwen nuitkaaki, na janchadan

³Nukun Xanen Ibu Jesucriston Epa Dios, jabias nukun Epadi nukuwen nuikin nukun juinti punu nukai tsiuñ ikai nuku daewakin benimawakubainmisdan, kenjaida wakubainankanwen. ⁴Jamapai tibi mei nun bika teneaya Diosun nuku daewakin nuku benimawamiski. Nuku jaska wamiswen taexun Jesucristo ikunwain betsabu jawada mei bika tenei juinti nishmaibu Diosun ma nuku medabewamisken jatuwendí

nuikin nun jatu benimawadiatidubuki.
⁵Jaskaken jaska Cristo bikajaida jiwekin tenekubaini keska nun jawenabudi jawen taea dayadai bikabiaken nun jiweabudan, tsuabuda jabundi ikunwain dayaxunkin tenediaibu Cristo jau jatuwendi nuinun jabu juinti nishmabu binumakin jatu benimawakin shinan chankanwankubainankanwen. ⁶Ea inun Timoteo jamapaiwen nuku bika tenemaibun nukuwen taea nukukidi shinan chakai man juinti nishmama man Jesucristo ikunwanunbun nun tenekubainaii. Ja inun, Dios nukuwen nuikin nukun juinti tsiu ika nishmabiaken nuku benimawamisxun jaska matudi memaibu medabewati shada nun tenemiski. Jaskaken jawa dateama jabiaskadi matudi akaibu man tenediaidan, jawen kushipakubainkanwen, maemaidan. ⁷Jaska inun, nun imis keskai bika jiwekin man teneaibun jaska medabewai nukuwen nuikin nukun juinti nishma Criston nuku benimawamis keska wakin jabiadi matuwen nuikin matun juinti nishma benimawaxanai matukidi dateama nun manakubainaii.
⁸En betsabu inun en puibuun, eska Asia mae pakea namakis anuxun nun jatu yusiañinwen taexun jaska bikajaida nuku jiwemaibu nun tenekubainyama

matuki ana chaninun ninkakanwen. Jawada bika nukunmebi jaska nun tenetiduma inun nun binutiduma jamapai chakabu tibi tenei nukun jiwea ma benua keska ⁹shinain: "Natian daki nuku ma tenankanikiki", ikin jawada nukunmebi nun atiduma ibubis nun shinanbiaya Diosun nuku yusinkin jaska jatun mawabu bestenwanxanaitun nukun jamapai tibi nuku axuntidu nun ikunwantidubu Diosun nuku jaska binumakubainyamaki. ¹⁰Ja inun, nun mawapanan jaska Diosun nuku mekeyama keska wakin nuku axunkubainxanai jawa dateama ikunwankin nun manakubainai. ¹¹Nun jaskamisken nukukidi shinankin medabewakin Diosbe janchakin nuku yukaxunkubainkanwen. Ichapabun man nukukidi Dios yukakubainaibun Diosun nuku mekekin duawaya ichapabundi nukukidi ninkakin Dios kenjaidawatidubudiki.

**Jawawen jaskatima jawen
yuba betsa Pablon jatu
banabimanikiaki, na janchadan**

¹²Jamen nukukididan, jaska yudabun Dios unambuman shinain kenmis keskama jakia Diosun nuku shinan betsa wamatan juinti pepa nuku waniwen taexun jaska Diosun bechipaimis nuku shinanmaya tsua padanma duapa bestikunkaini matuwen nuijaidai nun kenkunkainai, matuwen taea chanima benimaidan. ¹³Matu kene bumakinan, jancha juneawen matu kenexunama jancha xabakabi man uinkin pe ninkatidubu besti nun matu kenexunkubainmiski. Ana man ninkakin pejaidawaken eandi matu ninkai en benimaxanai. ¹⁴Nukukidi man ninka bexmas waii. Jakia nukun Xanen Ibu Jesúus ana juaya man pepaibu matuwen kein nun benimaya nun matu yusin

pewamiswen taea inun nukuwendi taea benimakin man nuku kenwandianai en manakubainai.

¹⁵Jaskawen taea matuki chiti ikin jaska en shinaiin. Jaska matu anu kaxun matu uinkatsis ikin ja dukun en shinainma keska dabeki matuki bai kai ¹⁶Macedonia mai pakea anu jiweabu dukun uiantanbaini janua matuki bakin matu benimawatan janua chintunkidani jui matuki ana bakin ana en matu benimawaya janua Judea mai pakea anu jiweabu anu en kaya matundi man ea medabewatidu shinain: "En matuki bai kaxanai", matu watan en jaska matu kenexunimaki. ¹⁷Matu anu bai kanun ika chanima en yubakaimaki. Jaskawen taea en shinan dabewaisma man ekidi shinantidumaki. ¹⁸En shinan betsa betsapa en maewama Diosun unainkiki. Jaskawen taexun man nuku ana ja atidubumaki. ¹⁹Ea inun Timoteo inun Silvanonan, Diosun bake Jesucristokidi besti nun matu yusinmiski. Jawen bake Jesucristokidi yubakai janchani Diosun betsa waisma jaska menenixun betsa wama akubainmiski. ²⁰Ja inun, Dios yubakani jawen bakewen dasibi xabakabi kaka kainmaniki. Jaskaken yudabun Dios kenwanyan jabun jancha bechipaikin Criston kushipawen yuikin: "Jancha chanimaki. Jabiaskaki", ikin nun kenwanmisbuki. ²¹⁻²²Jaska inun, nuku dasibun Cristo nun chibainbudan, jawen kushipawen Diosun Yushin Pepawen unanti shadawatan jawenabu benutimawakin nuku ibuwaniki. Jaska wanixun nuku jeneama duawapakexanai mestenwain Dios yubakaniki. ²³Jaskaken matu dake tenemakatsi ikama jaskai man Corinto anuabu en kadiama jau nukun Epa Diosun matu xabakabi unanmanunwen, en chani chakama ea unainkikidan. ²⁴Ja inun, nukun Jesúskidi nun matu ikunwanmamisdan,

nukudan, nun ibumaki. Jesús ikunwain ibubis matun shinan ewai mestentan kushipai man benimakubainun bun matu medabe bestiwai nun matu dayaxunkun kainmiski.

2 ¹⁻⁴Jaska matukidi shinankin matun juinti punu nukawakin tsiu akatsi ikama jaska en matuwen nuijaidai man ea unanun bun, iwanan, matu shinankin kaxabetaan matu medabewanun, iwanan, en matu kene bumaimaki. Matu anu jikitushitan tsuabuda en matu juinti punu nukawakin tsiu akaya tsuan eadi benimawatidumaki, en matu punu nukawatushikenan. Janua man ma pewashinken ea benimawaya matudi ewen man benimaxanaii. Jaskaken natian matu anu en kakatsi iyuamaki.

Junin ikunwanbiai chakabuwayama ana jas shinanma jakimawatikiaki, na janchadan

⁵Ja junin kanekin ea punu nukawakin ea besti akama matu dasibibudi akima chanima man unaiin. ⁶⁻⁸Na besti en matu yuiai ninkakanwen. Jawen chakabuwen taexun man ja taxnimaima matube ana ichatiduma tenejadiakubainkin jatixun ma bika tenemaima jetenan ikunwain jau jeneyamanun matu man jawen nuiai jau unanun ana itan beyawakin daewadikanwen. Jakidi jawen chakabu ana shinanma jakimawakin matudi jakimadikanwen. ⁹Jaska inun, en matuki chiti itan jaska en matu yusinkubainmis ja chibankin man amis unanun, iwanan, matu kenexundi bumakin jakidi en matu jaska yunuimaki. ¹⁰⁻¹¹Jaska Satanásan nuku padankatsis ikai nun unanajaidaya jau nuku chakabun maemayamanun jawada ja junin akubainyama jakimakin jadi jakimawatan man ana shinanbumaken matun shinan pe unankin eadi jakimai

en ana shinanmadiki. Medabewakin en matu kushipa wakatsi ikai. Criston en shinan ea bebunxun unanyan jawada chakabu man jakimaimaken eandi ja junin chakabuwayama en ana jaska jakidi shinantidumadiki.

Diosun Cristoki nuku dasiwanat jamapai bika nuku binumamiskiaki, na janchadan

¹²Ja inun, Diosun kakape Cristokidi datan akin yusinkatsis iki Tróade maewan anu en jikiaya yuda ichapabu Diosun ea ninkamaya tsuabunda ea nemamabiaken ¹³Cristowen taea en betsa Titoki en nukudiamma inun matukidia jawa bana ninkadiama en juinti punu nuka kayaxun jatu yuikin: “En ma kaii”, itan Macedonia mai pakea anu Tito benai en kainkainimaki.

¹⁴Jakia Cristoki nun dasia nun jawenabuken jamapai bika Diosun nuku jabetan binumakubainmiski. Ja inun, nukuwen jawen kakape yudabu Cristokidi mae tibi anua yusinmakin nuku jatu unanmamiski. Nukubudan, nun nis jawendua keskabuki. Jaskawen taexun Epa Dios kenwanankanwen.

¹⁵Ja inun, jawen Epa benimawakin Criston jawen jiwea xeni ininipa keska inankubaini jaska keska yusinkin Epa Dios benimawakin yudabu anu nun bumiski, Cristokidi yudabu dasibi, betsabun Cristo ikunwainbu inun betsabun ninkabiakin ikunwanbuma benuxanaibu anudan. ¹⁶Jaska shinainbutunadan, nukun yusianan, ikunwanbuman nuku ninkamadan, atimapa yuda mawa pisi mayai keska xetekin aka wakanikiki, nuku danankinan. Jakia dasibibun nukun yusian ninkakin Cristo ikunwakin nukun yusian ininipa keska bechipaikin benukatsi ikama jaska niti ikama Diosbe jiwekuinxanaibu bikubainkanikiki. Jakia Cristokidi xabakabi yusian

mesekenan, ḷtsuabunda nun shinan chakai, ja jiweakididan? ¹⁷Jaska shinanbuma yusinan betsabu Diosun janchaki meseama kemukin pei besti binun, iwanan, bukubaunkin yusinmis keskama nukubudan, Diosun nuku yunukin jawen kushipa nuku inanken matu padanma jancha chanima nun matu yusianyan jawen janchawen taea nun Cristoki dasiabun chanima Diosun nuku pe uiannya Jesucristokidi nun yusinkubainmiski.

**Corinto anua ikunwainbu
uinkin Pablon jatu yusinmiskidi
unantidubukiaki, na janchadan**

3 ¹Na jaska en ana matu yuiaidan, ana nukunmebi nun kenkatsi ikamabia chanima besti en matu yuiae ninkakanwen. Tsuanda jatu yusintanun ika jukin jabun keneya bemisbuki. Jamen nuku ikidan, juni betsan keneya nun mapuisbumaki. Janua matun mae anuadi nun kaya jau medabewakin nuku ii pewaxanunbun matun keneya nun kaismadiki. ²Nun ma matu yusinmiswen taea matun shinan betsa watan matun jiwea betsa watan man ma pepa besti jiwea jatu uinmaidan, jaska nun matu yusinmis unaki kenea keskama nukun juintiki kene nea keska dasibun ja kene uian keska wakin matu uinrinki unankanikiki. ³Diosun jawen yunuti inun jawen nemati Moisés inankin mishkiki Diosun kenekin netani keska wakin natian xabakabi matu uinunbun nukun yusianwen Criston jawen Yushin Pepawen chinta tuxkutimawen matun juintiki kenea keska wakubainikiki. Jakia Dios jiweatun Yushinin matun shinan betsa wamakin matun yudaki jawen kene netan keska waikiki.

⁴⁻⁵Ja inun, nukunmebi nun ikai keskai nun kentiduma inun nukunmebi nun jawa atidumabia jawada dasibi nuku

amakin Diosun jawen kushipawen nuku amamiski. Na jaska en matu yusinmisdan, Cristowen taea Dios nun ikunwanpakeaui, nun ana chintuanmadan. ⁶Jesucristo mawaiwen Diosun jawen nuku yuba bena wai maewakinan, ana jakidi kenewen akama iniki. Jakia ja binumakin jawen Yushin Pepawen aniki. Jaskawen taexun tsuabuda Diosun jawen taexun nuku tapinma nun jawen dayadubu besti nuku wamiski. Jamen Moisés Diosun yusinkin jawen yunuti inun jawen nemati inankinan, tsuanda ja yuba meneamaken jawen jatu kupikatsi amaniki. Jakia Diosun Yushin Pepatunan, nuku jaska wama ja binumakin jawen yuba benawen nuku jiwea inankubainikiki, nun jabe jiwepakexanunbunan.

⁷Diosun jawen yunuti inun jawen nemati mishkiki kenexun Moisés inan jatu unanmakin yuikubainun ika mati anua Moisés butuken jawen besu chaxakidankidanai mainbiaya jawen datekin Israelbun Moisés beistidubuma iniaki. Jaska jatu wabiani dasibi Diosun yunuti inun jawen nemati Moisés inani tsuabunda chibantidubuma ja dayani kanemisbu Diosun jawendi jatu kupixanikiki, niti akama Diosuma mawa kayabi tenemakinan. ⁸Jakia jaska nukun chakabu Criston buakatsis inikidi Diosun Yushin Pepatun nuku yubakin jawada Diosun Moisés yusian yusin jawen besu chaxa chaxa iki kushipai chani pejaidabianiken jawen Yushin Pepatun jaska wani ana binumaikiki. ⁹Eskati wakin aniki, ana matu yuinun ninkakanwen. Jawada Diosun Moisés yusini pebiaken tsuanda: “Dasibi Moisin jancha en chibantidumaki”, ixun chakabuwaibu jawen taexun unantan jatu kupiti kaka waniki. Jaska jawada Moisés yuini kushipabiaken Diosun jawen bakewen taexun binumakin

Diosun nuku ma pepawaikiki.¹⁰ Jaska inun, jaska Diosun Moisés yusini pebia jawauma keska jawen yuba benawen binujaidaikiki.¹¹ Ja inun, jawada mishkiki Diosun Moisés kenexun inani jawen yuba pebia bextekei bexmasaya janua Cristowendi nuku ana yuba bera wani nun ma tapian pejaidakunkainxanikiki, niti ikama ikibi ikidan.

¹²⁻¹³ Eska Israelbun Moisin besu uinkin jawada chaxajaida maiin bexmasai jau uinyamanunbun Moisin tadi tuaxwen jawen besu junei bepukukunkaini keskama jaska nukundi nun ikunwainbu Cristo manakakin nukun jancha jakidi juneama jawa dateama xabakabi nun yusinkubainaii.¹⁴⁻¹⁶ Jaska Moisin jancha danankubidanaibu jatun juinti Diosun kushiwani keska wakin natian jabias yubani jancha betsabun danandiaibu jatun juinti Diosun kushiwadiamiski. Moisin jancha keneni yuiaibu jatu ninkamamakin bepukin junemiski. Tsuabunda Cristo danankin Moisin jancha ninkatidubumaki. Tsuabunda na jabiatian Dios kenwanun, iwanan, benakin Dios unankatsis ikaibu jancha xabakabiwen Diosun jatu ninkamamiski. Jaskaken Cristo ikunwanun ikaibu Diosun jatun juinti ana kushiwama inun Moisin jancha ana bepuama xabakabi tapinkin ninkatidubuki.¹⁷ Janua nukun Xanen Ibu inun jawen Yushin Pepatun jabiaskas shinainbun jawen Yushin Pepatun nuku mekeaya chakabun nuku ana tsumama inun peganun, iwanan, jawen yunuti inun jawen nemati Diosun Moisés yusiniwen nuku ana bikawatidumaki.¹⁸ Jaskaken dasibi nun Jesucristo ikunwainbudan, ja yusiniwen nukun besu inun nukun shinan nuku ana bepuamaki. Nukun Xanen Ibu nukun shinan nuku betsa wakubainaya jawen kushipawen ja itsa nuku wakubainikiki.

Unanxubida nukun jiwea betsa wakin nuku pewakubainikiki. Nuku jaska wakin nukun Xanen Ibu jawen Yushin Pepawen nukun jatu uinmakubainikiki.

**Jesucristokidi yusinkubauni
eskanibukiaki, na janchadan**

4 ¹Jaskaken Dios nukulen dabanan ikin jawen yuba benakidi nun yusinun ixun nuku yununiwen taea jawen babui punu nukai nun bextekeisbumaki.² Jakia jawa dakeama jawada junexun nun aisma inun, machupakin tsua nun padainsma inun, Diosun jancha jamakidi yuikin nun betsa waismaki. Nun jaska wamiswen taea jiwekin nun yusinmis Diosun unanyan jawen jancha nun matu xabakabi yusinkubainmiski, jau dasibibun nukun yusian ninkatan jatun shinan pewanunbunan.³ Cristokidi nun jatu yusiai ja jancha tsuanda ninkamadan, jancha bepukuaki. Jabu jatun chakabuwen benuxanaibun ninkatidubumaki.⁴ Tsuabunda jabun ikunwanbumadan, na mai anuxun jatun xanen ibu Satanásan jatu padankin jatun shinan nemakin bekun keska jatu wamiski. Jaskaken taexun Cristo, Dios itsa jiwea mekenika kushipa yudabu mawaxuntan jatun chakabu ana shinanma buakatsis ini ninkabiakin kaka pepa xabakabi ikunwantidubumaki.⁵⁻⁶ Jaska inun, mai damiwakin Diosun yuikin: "Mesu anua jau xabayununwen", anixun jabiatundi nukun juinti anu xaba pexani keska wakin Diosun Cristo nuku unanmaya jawen kaka pepa Cristokidi nun xabakabi matu unanmakubainikiki. Jaskaken yusinkin: "Jesucristo nukun Xanen Ibu kayabiki", ikin, "Jesucristo bechipaijaidakin nun matun dayadu bestiki", ikin xabakabi dasibibuki chani ibubis nun keinsmaki.

**Bika tenebiakin Pablón Dios
ikunwankubainikiaki, na janchadan**

⁷Ja inun, Diosun yusinkin jawen pepakidi nukun tapinmaya dasibi

kushipa Diosuna inun nukunmebi nun jawauma jau man unanunbun nukun yuda babujaida, mai shumu pusimis keskabianu jawen kakape nukun jointi medan nuku netantan jawen tsumabu Diosun nuku waniki.⁸⁻¹⁰ Jaska inun, Jesús anibu keska wakin nukudi ichakawakin tenankatsis ibiaibun jamapai bika betsa betsapa nuku waibu tenekin Jesucristo nukun Xanen Ibu jiweatun nukun medabewakubainai chintuanma dasibibu nun jatu uinmakubainaii. Jaska tibi Jesucriston nukun medabewamis matu yuinun ninkakanwen. Jamapai bika betsa betsapa nuku tenemakin jadakidi nukun paxatimawabiaibun nukun Xanen Ibuun bai nun manaka besumawamaki. Ja inun, nukun tenankatsis ibiaibun jatuwen datekin nukun Xanen Ibu nun jenebainsmaki. Nuku nemanun ixun kuxakin nukun di abiaibunan, jawen taexun nukun yamatidubumaki.¹¹ Natian nukudi jiweyuxun Jesús nun chibainwen taexun nukun tenankatsis ibiaibun Jesús ini keska jiweiakian nukun yudawen nun jaskaxunai dasibibu nun jatu uinmakubainaii.¹² Jaskaken xaba betsa nun matu mawabiaxunxanaya Jesucristokidi nun matu yusinmiswen taea niti ikama matudi benuama man jabe jiwepakexankanaii.

¹³ Jaskakidi Davidin kenekin: “Dios ikunwain jakidi en janchakunkainaii”, ini keskai nukubundi Dios ikunwandiai jawada nun ikunwain nun jakidi yui janchadiakunkainaii.¹⁴ Ja inun, Jesús mawa Diosun bestenwanixun nukudi bestenwankin matudi bestenwandiatan Diosun ibubis nukun jabis beismakin nukun iyuxanai unankin jawen jancha nukundi nun yusinkubainaii, jawa dateamadan.¹⁵ Jaska inun, Diosun matu pepawaya midimabun Jesucristo ikunwantan benimakin man Dios kenjaidawanunbun

jawada matuwen taea bika tenekin matu medabewanun ika nun ikunkainaii.

¹⁶⁻¹⁸ Jawada bika xabakabi mekin nun teneai jawaida keyuxanaiwen nuiama jaska Diosun mekekin niti akama nuku jabe jiwemaxanai uindiamabia shinankin nun uinkatsis ikaii, ikibi ika junea keskadan. Ja inun, natian na jiweawen nun jiweaidan, bikaishtha nun teneai jawama keskaki, jawaida jayabiatan keyumisdan. Jakia jaska jawen taea nun bika teneaidan, Diosun pewen kupikin nukun benimawa chakayamaxanaii akunjaida bikatsi nun manaii. Jaskaken nukun yuda ewanai babui mawabiaya badi tibi Diosun nukun jiwea tibi uke medanua benawakubainaya punu nukai nun chintuntidubumaki.

5 ¹Jaska inun, na mai anu nukun yudawen nun jiwea pean xubuwen nun jiweyua keskabukiaki, jatiada jawaida nun debuxanaidan. Jakia nai anu nukun jiwe nun janu jiwei kaxanaidan, Diosun ma nukun akibi axuniki, yudabun jiwe wamis keskamadan. ²Jaskaken na mai anu nukun jiwea chakabuwen nun nuitkaayuuaii. Janua chipu nai anu nukun jiwe pepa anu jiwei kakatsi iki nun manayukubainaii. ³Na nukun yuda mawa chapuken jawaida nun jawa saweama keska ixanai nun unaai. Jakia yuda bera chipu Criston nukun inanyan nun tadi bera saweakin akawaxanaii.

⁴Natian nun jiweadian, jawawen jaskatima nun bika teneyuaii. Mawatan nun chapukatsi ikamabia nun ma mawa kasmai nun jiweyuan, Jesúsun nai anu nukun aimitan jiwea bera inankin nukun yuda bera nukun inanxanai nun manaii.

⁵Diosun nukun jaki maewakatsi bebunkidi yubakatan jawen Yushin Pepa jawen unanti watan kanetima nukun inani jawen taexun nun bixanaidan, nun jayaki.

⁶Jaskawen taea nun benimakunkainaii. Na nukun yudawen nun jiwea nukun

Xanen Ibube benanta nun jiweyua nun unaein. ⁷Ja xabakabi nun uianmabia uke medan shinankin nun ikunwaiin. ⁸Na nukun yuda nun jenebainxanaii, nukun Xanen Ibube jiwei kakinan. Jawa dateama punu nukama nun jiweyukunkainaii. ⁹⁻¹⁰Ja inun, dasibi nukubudan, nun jamakidi kama nukun Xanen Ibujaida Cristo janu tsauxun unanti wamis anu jaki nukutan nuku tibibun jabis nun beisxankananaii. Nuku tibi unankin Criston nuku manakua akeakexanikiki, na yudawen jiwxun nun pepa amis inun nun chakabu amis unantan nuku tibi kupikinan. Jaskaken na mai anu nun jabe jiwediamma kasmai nun jabe jiwei kaxanaidan, nukun yudawen nukun Xanen Ibu nun benimawakatsi ikaii.

Criston Dios nuku daewaxunkin nuku jaibuwananikiaki, na janchadan

¹¹Jaskaken nukun Xanen Ibu kushipa meseki datekin jawen kaka pepakidi yudabun jau Jesús ikunwanunbun nun jatu yusinbaunai jaskai nun jiwenis Diosun nuku unanajaidaikiki. Jaskawen taexun jau man tapindianunbun pe jiwekin jancha chanima nun matu yusinmis unankin man shinantiduki. ¹²Jaska yudabun shinanmis keska shinain nukunmebi nun keanmaki. Jakia nukukidi janchakin nukukidi pe shinankin man nuku kenwantidubuki. Betsabun yuda bemakis uinkin unanti wamisbuki, jatun juinti jatu xabakabi uianmabiadan. Jaska nun yusinmis besti en matu yuiai ea ninkakanwen. ¹³Nun patapa unainsmapa keskabukiaki. Jakia bechipaikin nun Dios duawaiba yuda betsabun nuku uinkin jaska nun dayamis nukama yuikin: "Pablo inun jabetan yusinmisbu patapa unainsmapabuki", ikaibudan, jaskakin Dios nun duawamis yuda betsabun

unanbumaki. Jatuwen nuiyamakanwen. Ja inun, yuda betsabun nuku uimmissun nukukidi yuikin: "Xabakabi jatu yusinkanikiki", man imisbudan, matu medabewanun, iwanan, nun akubainaii. ¹⁴Cristo nuikipatun nun jawen kushipayabu nuku ma mestenwanixun nuku chixukubainikiki. Dasibibuwen taea juni bestichai nuku mawaxuni ikunwanixun nun unaein. Jabias kadiai jabun ikunwanxanaibu ichapabudi jabe mawanibu keskaki. ¹⁵Cristo mawaidan, dasibi jatu ixuniki. Jamen ikama jabu jiweabu ixuinan, jau ana jatunmebi jatun shinanen besti jiweyamanunbun jau ja jiwxunxanunbun jatu ixuniki, mawatan ana jatu bestenxunidan. ¹⁶Jaska inun, nukunan, jaska ikunwanbuman shinain janchamisbu keska nun ana jatun shinan keskamaki. Ja dukun Cristokidi shinankin: "Yuda kayabi bestiki", iwanan, nun shinanbiaya Diosun nuku ma betsa waken betsajaida Cristokidi nun ma shinaiin. ¹⁷Januxun tsuabunda Cristo ikunwain jaki nukui dasiayadan, jabun shinan xeni Diosun betsa waya jawada mekin chakabuwamis jetenan jatun Xanen Ibu Cristo chibanun ika yuda bera keskabuki.

¹⁸Na jaska Diosun daya tibidan, Cristo jamebi jawen Epa daewakin jawen jaibuiba nuku wamaniki. Jaskawen taea nun daenamei jaibunamenunbun nuku katunixun jawen kakape nuku yusinmakubaunmiski. ¹⁹Na jabias Diosun shinani en matu ana yuiai ea ninkakanwen. Cristowen yudabun chakabu ana shinantimawani Cristobe Dios dayakin yuda dasibibu jatu jaibuwakatsis ikin jabun Cristo unantan ikunwain jau unanuma jiwekubainxanunbun na chanima jancha nun jatu yusinkubainun nuku yununiki. ²⁰Jaskaken Criston kushipa nun jayawen taea nun jawen jancha

buxunikabuki. Nukuwen Dios janchai keskaya Cristo ea axunkin nun matu yukaxunmiski. Eskaki. Matu yuinun ninkakanwen. Nukuwen taexun Diosun jancha ikunwain Cristo matu mawaxuniwen Dios daewai jabe jaibunamekanwen.²¹ Jesucristo jawa chakabu meamajaidabiaken jakia nukun chakabuwen taexun chakabu memis keska wakin Diosun Cristo aniki. Nun Cristowen taea pepa keskabu Diosun nuku ana kupikatsi ikama: “En jaibuaibu chakabu jayama keskaki”, iwanan, Diosun nukukidi jaska shinannmiski. Jaskaken Cristo matu mawaxuniwen taea Diosbe jaibunamekubainkanwen.

6 ¹⁻² Ja dikabi yuda tibi Diosun yuikin: “En tsuada ninkakatsis ikaya min ea kenaya min jancha ninkatan ja xaba ikaitian en mia mekekin medabewaxanaii”, ikaya ninkatan Isaásasin keneniki. Jaska xabakabi en matu shinanmai ninkakanwen. Natianan, Diosun matu ninkakatsis ikikiki. Ja inun, natian matu mekekatsis idiaikiki. Jaskaken man Diosbe dayakin axunmis matu yununun ninkakanwen. Jamenmens Diosbe jaibunamei bepadameama ikun kayabi Diosun jawen pepa ma matu uinmaki. Dananyamakanwen. Jaskawen taea nukudan, nun Diosun daya axunkin medabewai dayaxunikabuki.

Jamapai bika Pablo tenemabiabu chintuanma xabakabi jatuki chaninikiaki, na janchadan

³Dios nun dayaxunaiwen taexun jau tsuabunda: “Man kaneaii”, iki jau nukukidi janchayamanun bun pe jiwekunkainkin nun tsua kanekin uinmachakaismaki. ⁴Jakia nun jaskai Diosun tsuma ikinan, eskawen nun matu uinmamiski. Jamapai bika nuku tenemaibu mei jawa jayama nuitapakin

nun jawa jatu kemama tenekubainmiski.

⁵Eска тиbi нуку wabu meidan, нуку unanbuman нуку kusha kusha akinan, нуку bichikinan, nukuki xukubidan jancha chakabuidan, daya kushipa meidan, uxा tenekin buni tenetan nun Dios dayaxunkunkainmiski.

⁶Jaska inun, nukun jiwea pepa kayabi nun jatu uinmaidan, tsua padanma inun, unanepai sinatama chanima nun ikun kayabi ikai Diosun Yushin Pepatun kushipaya nun Diosun tsumabu chanima nui kayabi nun jiwekunkainmiski. ⁷Ja inun, Diosun kushipa нуку medan nun jayawen taea kaka chanima nun yuimiski. Jabias Diosun kushipa pepawen unanmakin nun jatu achimamiski. Ja inun, jabiawendi jakidi chakabu yuibiaibun nun jatu nemamiski. ⁸En janu jaska wakin jatu medabewa bestiaitian yuda betsabun нуку kenwainbun jatiditun yuankin нуку kenwainsbumaki.

Ja inun, yuda betsabun nukukidi xechakaibun betsabun nukukidi pe yui janchamisbuki. Ja inun, yuda betsabun nukun yusian danain: “Machupaki”, нуку wabiaibun chanima yui besti nun janchakunkainmiski. ⁹Yuda ichapabun нуку uinsma akawabiaibun betsabun нуку unanjaidamisbuki. Danankin нуку debu wapaibiabu jabisakbia nun jiweyukunkainaii. Нуку ichakawabiakin jawa нуку tenandiabumaki. ¹⁰Ja inun, jabun нуку shinan nun punu nuka dabanen shinankanikiki, Cristo chibain nun shinanchankain nun benimabiakunkainaya nun jamen nia nuitapai keska shinanmisbuki, nun jatu tapinmai ichapa enayabiakenan. Nukubudan, nun jawa jayama keskabia dasibi Diosun нуку jaya wamiski.

¹¹Corinto anuxun ebetan ikunwainbuun, jancha matu bumai jawa juneama jancha xabakabi besti

nukun shinanen jawa texewama nun matu yuiaiwen taexun ¹²jaska man nukukidi shinanmis shinaindakanwen. Nun matuwen nuikin nun matu dananmabiaken matundi matun nui unimakin man nuku jawa waismaki. ¹³En matu yuiai ea ninkakanwen. Man en bake keskabu en matu waii: “Medabewai jaska en matuwen nuimis keskai duapai ewendi nuikanwen”, iwanan, en matu kenexunaii.

**Ikunwanbumabe ketaxametimakiaki,
na janchadan**

¹⁴Jaska matubun man ikunwainan, ja jabun ikunwanbumabe Diosun matu ana jatube ketaxamekatsi ikama shinanixun shinanmiskidi matu yuinun ninkaidakanwen. Jawada Diosuna pepadan, *¿ja* danain pepabe jusitudumen? *¿Xaba pebiaken mexun jaibuai xabatidumen?* ¹⁵Jabiaskadiai Cristo Satanásbe jaibunain pepatidumaki. Ikunwainbu betsadi ikunwanbumadi jatube jaibunain pepatidumaki. ¹⁶Januxun Dios kenwanti Templo, januxun yushin dami betsa ja medanxun kenwantidubumaki. Nukun yudadan, januxun Dios jiweya kenwanti Templo keskaki. Jaska Diosun jamebi ibubiskidi yuini ninkakanwen:

“Jabu anu jiwei jatube nikukaini ea en jatun mekenika Dios ikaya, jabudan, enabu ixankanikiki”,

¹⁷ikaya kene betsawen ana jabias janchawen Dios Yavén yuikin:

“Jabun ea danainbu anua

kainbainkin jenebainkin ana chakabu mei

atimapayamakanwen.

Man jaskakunkainaya matuwen benimakin en matu beyawaxanaii,

¹⁸matu jaska watan en bakebu matu wai

matun epa en ikunkainxanaii”.

Dios kushipa dasibi binuatu yuiai jawen jancha yuixunikabun ninkatan keneniki.

Jabiaskadi en matu yuiaii.

7 ¹En betsabu inun en puibuun, jaskaken Dios nukuki jawen pepa yubakani jawen jancha nun jayaki. Jaskawen taexun nukun yuda inun nukun yushin mekei Dioski mesekin ana jawada chakabun nuku atimapá watidu ana akama jenetan pepai jawenas ikubainankanwen. Jaskai nun jawama dasibi Diosunabu itidubuki.

**Pablon yunua chibankin axuainbu
benimajaidanikiaki, na janchadan**

²⁻⁴Man pe jiweabuwen taea matukidi ninkatan shinain jawa dateama matukidi xabakabi janchakin en matu kenwaiin. Jamapai bika nun tenedabebiai jaska man pe jiweabu ninkai en jointi benimajaidaii. Matun chakabu jenetan nuku keskakin Dios duawanun ika man jiweaya matuwen nuijaidai en matuki ana ja ikamaki. Jaskadan, ma bebunkidi en shinanwen en matukidi chanimaki, en matube jiwekatsi ikai inun en matube mawakatsis ikaidan. Janua nun tsua chakabuwaismabiaken yuda eskadabes matu anuxun nukukidi shinan chakakin: “Pablo inun jabetan yusinmisbun nukun jamapai biankin nuku nuitapawakin ichakawakin nuku padainmabuki”, ikaibu nun jatu jaska waismawen taexun jatu ikunwanyamakanwen. Jakia nun matu jaibuaibuwen taea matuwen nuijaidakin nun matu pe shinanmis keska wakin nukukididi pe shinankanwen.

⁵Macedonia mai pakea anua nun juai yuda ichapabun nuku yumanwankin nuku jaska wakubidanimabu matu yuinun ninkakanwen. Dios danankin nuku ichakawakin bikawakin nuku deteaibun jadakidi jaskatima date paepai

nun jani jaskatan juindukuntidumajaida ikimaki. ⁶Jakia jaska yuda babu punu nukabu Diosun benimawamistun nukun jaibu Tito nukuki nukumakin Diosun nuku benimawaimaki.

⁷Ja Tito jikitushikin nuku benimawai bestiwenma jakia jaska matube pe jiwetan matube jaskashina chaniai ninkai inun jaska ja juni jawen ibuan ainbe jiwea nichinmaxun ikis man ja juni medabewai inun, jaska man ea uinkatsis ikai Tito nukuki chaniaya en shinan chankain matuwen en tse ikunkainimaki.

⁸Januxun en kenewen en matu dakewakin juinti nishmawakin en matu tsiu akima en unaiin. Ja inun, matu jaska bumai eadi en juinti tsiun idiyuimaki. En matu jaska waima en ana jaskakidi matu shinanmaki.

⁹Januxun en matu jaska waya matun chakabu unantan shinan betsa watan jawada Diosun matu amakatsis ikai dateama man akimaki. Ja inun, matu ja abiakin nun jawa matu chakabuwama ikima man unaiin. Jakia nukun jancha ninkabiatan matun shinan man betsa wamakenan, Diosun matu kupikeanimaki. Jaskawen taea natian matuwen en benimaii. ¹⁰Tsuabunda ikunwankin nun chakabu wai unantan jenenun ikin shinan betsa wai nukun juinti nishmaya jau nukun chakabu nuku buaxunun Dios benakin nun ea akaya benimakin nukun chakabu ana shinanma nuku jakimawakin Diosun nuku buaxunmiski. Jakia jabun Cristo ikunwanbumanan, jatun chakabu unain punu nukabia jatun shinan betsa wama Diosun jatu medabewama mawa kayabi jayapakexanikiki. ¹¹Jakia matudan, matun chakabu jaska Diosun matu unanmaiwen matun juinti nishmabiatan pepanun, iwanan, en yusian chibain en jaska bechipaiai ea uinmai eki

mesekin ja junin chakabukin matu chakabuwaima jaska waima en matu shinanma matu datei jaki sinatatan pewai jawa kushi dakewakin man nemaimaki. Jaska en matu waima ja juni pewai man jawa jawen chakabu ana jabe jayama nun unaiin. ¹²Eskawen taexun en matu ja aniki. Ja juni jawen ibuan ainbe jiwea medabewanun, ikama inun junin jawen ain ma mebian medabewanun ikamadi jakia jaskama nukuwen nuikin jaska nukun yusian man chibankatsis ikai Diosun matun shinan unanmaya man unanunbun: “Man ichamis anua ja juni nichindikanwen”, iwanan, matu anu kene bumakin en matu jaskakidi shinankin bumayamaki.

¹³Jawaida en yunuti chibankin man akimaken ana juinti nishmama matuwen janunkain nun shinan chankaiin. Jaska bestiwenma Tito matube janchakin matun shinan pe unantan matuwen shinan chankandidan nukuki ana nukutan matukidi nukuki chaniaya jaska tibi matukidi ninkatan nun benimajaidakunkainaii. ¹⁴Jaska jancha chanima nun matu yuimis keska wakin Tito matu anu en nichindiamma matukidi kenwankin en kaneama ikimawen taea en jawa matuki chakabumaki. Jaskawen taea chanima jawada matukidi en yuima man jabiaskaki. Jaska en Tito yuima keska uinmakin man beyawaimawen taea nun matu kenjaidawaii. ¹⁵Ja inun, jaska eki inun en keneki mesekin Tito beyawakin man iakeakekin en kene en matu anu bumayama ninkatan en yunuti man chibannmis shinain matu uintanyamaxun Titon ana matu bechi pajaidakubainikiki. ¹⁶Man chintuinsmawen taea en matuwen benimajaidadiakunkainaii.

Jawada man jaya yaushima nuitkaapabu paxkaxunkubaintikiaki, na janchadan

8 ¹En betsabu inun en puibuun, Macedonia mai pakea anua

ichamisbu Diosun jawen nuiwen jau Jerusalén anuabu nuitapaibu jatu medabewanunbun, iwanan, Diosun jatu duawamaimakidi ana en matuki chaniaii.² Jatu bika tenemabia bun yumanbiakin jaska shinanma jatun juinti nishmama nuitapabiai benimakubainkin jawa yaushiama jatun pei ichawakin: "Eskadabes nun jayabun jawada nun jaya jatu inankin Jesús ikunwainbu Jerusalén anua medabewanankanwen", iwanan, ichapa ichawaimabuki, pei ichapa jayabu keskakinan.³ Jaska wakin jatun shinanen inankuinkin jawa yaushiama jati inantidumabia binumaibu ean en jatu uinma en matuki chaniaii.⁴ Nun jaska jatu yunuamabia nuku ea akin: "Nukundi nukun betsabu nun jatu medabewakatsis ikaii", ikin nuku yuikubainimabuki.⁵ "Jati bikanwen", ixun nun jatu manakamamabia jaska Diosun bechipaimis keska wakin jatun yudawen nukun Xanen Ibu dukun duawanun ikin nukudi ja kachu medabewaimabuki, jatun inankuinwenan.⁶ Jaskaken pei ichawakin Macedonia mai pakea anu ichamisbu anuxun Titon jatu taewamaima keska wakin matu anu kaxundi jau matu medabewati pepa man ichawashina jau matu ichawamakin pewai kaxanun Tito nun jaska yunushinaki.⁷ Matunan, ikunwankin betsabu man jatu binumiski, Criston kakape ikunwankin inun, Diosun jancha xabakabi unankin inun, xabakabi unanepakin inun, jamapai Dios man axuntidu akin inun, jaska medabewati nuku anua nui man tapinmiswen taea ikunwainbu betsa man jatukidi shinainan matu nukipa uinmakin Jerusalén anuabu nuitapaibu jatu medabejaidawakanwen, betsabun akima binumakinan.

⁸Jaska matu yuikin en matu yunuti mese waxunamaki. Jakia Macedonia

anuabun jatu axuinmabu keska wakin Jerusalén anua nuitapaibu ikunwainbuwen matudi man nuiai xabakabi dasibibu man uinmatidubuki, iwanan, en matu jaska shinanmai.⁹ Ja inun, nukun Xanen Ibu Jesucristo nai anua jawen Epa Diosbe jiwea jabe xanen ibujaidabia dasibi jawenabia jenebidan jawen pepawen matu pepawanun ika matuwen taea nuitapai matuwen nui mawaniki, jawen taea man nuitapama dasibi jaska yubakani man ibu waxanunan. Jaska matu waxuniwen taexun man jatu medabewatiduki.¹⁰ Jaska inun, na jaska medabenantikididan, ean jaska en matukidi shinain matu yuinun ea ninkakanwen. Jatu medabewakatsis ikin badi betsation matun pei ichawakin taewakin benimayabi man ayamaki.¹¹ Natian ana matun pei ichawakin jaska man jatu medabewakatsis iyama keska wakin benimai man yubakai taeyama keska jabias shinanwendi ana benimakin matun pei jaki dasiwakin ichawakin keyutan jatu inanxankanwen.¹² Januxun tsuabunda chanima kayabi yuda betsa medabewakatsis ikaibu Diosun jatun shinan nuima unankin jatuwen Dios benimamiski. Jawada jaya inun jawada jayama shinanma jakia jaska jawada pepa nun jaya nun inantidubu Diosun nukukidi shinanmiski.

¹³Jaska medabenantikidi en matuki chaniaidan, betsabu man medabewamatidu jidabi matun mesti man atidumaki. Chipu man nuitapatiduki. Jaskaken jawada man jayama idiaya jabias keskadi wakin matu manakutidubuki, iwanan, en matu yuiai.¹⁴ Natianan, Jerusalén anuabu ikunwainbu nuitapai piti eskadabes jayabuki. Jakia matudan, ichapa man jayaki. Jaskawen taexun chipu jabudi ichapa jayabun matudi eskadabes man

jayaken matu medabewatidubudiki. Jaskai man binunanantidubumaki, senenbukuinan.¹⁵ Jaska Moisin keneni ninkakanwen: “Nai anua dudu Diosun nidi akai jabun ichapa tupikin ichawaibun januxun betsabundi eskadabes tupikin ichawadiatan jabun ja piti pi jawa bika teneama ipaunibukiaki”. Jaska keska shinankanwen.

**Titobe buaubukidi Corinto anuabu Pablón
jatu banabimanikiaki, na janchadan**

¹⁶ Januxun matu medabewakatsi iki nun matuwen nuiai keskai Titodi jabias shinan jaya matuwen nuidiai kakatsis iki kaya benimakin Dios pepa wakin en kenwaaiin. Jau matu anu kanun nun nichian jawaida matu anu kaikiki.
¹⁷ Jabiaska shinanyan daki en yunua jawaida ea ninkatan jamebi matu medabewakatsis iki matu anu kaikiki.

¹⁸ Tito matu anu kaya nukun betsan Diosun kakape datan akin pe yusin jeneisma jakidi dasibibun pe uinkin yuimisbu Titobe nun ja nichindiaii.
¹⁹ Jaska inun, jau Jerusalén anu nukube kakin nukubetan ja inankuin pei buxanunbun, iwanan, Macedonia anuxun ikunwainbu ichaxun ja juni katuimabuki. Ja inun, nukunan, ikunwainbu betsabu nuitapaibu nun medabewakatsis ikai jabun nuku uinkin nukun Xanen Ibu nun duawai medabenain nun jaska bechipaiai nun jatu uinmakatsis ikaii, jaska daya beyaidan.²⁰⁻²¹ Yudabun nukukidi yuikin: “Ikunwainbu pei ichapa Jerusalén anuabu ichawaxunimabu jaska Pablón inun jabe buaibun bukin jaska waimabumen?” iki jau nukukidi shinan chakai ja iyamaxanunbun dasibi xabakabi pewakin jaska Dios inun yudabun nuku amakatsis ikai jatu uinmakin nun pewanunbun jawada yaushiaman jatu inankuinxanai

benuama adu pewatan nun jatu buxunxanaii.

²² Ja inun, betsadan, jabube en nichiainan, nukun betsabu ikunwain pepa ma kaya tapini chintuinsma jamapai betsabu betsapo pewanika ja dikabi man jaki chiti itidu en ja matu nichinxundiaii.

²³ Jamen Tito ebe dayakin ebetan matu medabewamis man unaein. Jamen ja nukun betsabu Macedonia anua ikunwainbun katuimabudan, jabe en jatu nichiainan, Criston kushipa jayabudi bukanikiki.²⁴ Jaskaken jabu ja ikunwainbun matu uianyan jaska man jatuwen chanima nuiai jatu uinmakin beyawaxankanwen. Man jatu jaska waya jaska wakin nun matukidi kenwankubainmis man jatu uinma kayabixanaii.

9 ¹⁻² Man Corinto maewan Acaya mai pakea anuabun ua badi betsatian nuitapaibu Jerusalén anuabu matun inankuin man jabun inankatsis ikai ninkatan dasibi Macedonia mai pakea anu manixun ikunwainbu man akai kaka ninkatan midimabun jabunadi bumakatsi idiaibuwen taexun matukidi kenwankin nuitapaibu man medabewati shinaniken en ana jaskakidi chanikin matu kenexunamaki.³⁻⁴ Jakia en matukidi kenwanbiamis dasibi matun pei man ichawaxun adudiamaken Macedonia anuabu ebe bukin man jaska adiama dama tapin keskakin jatu uinmai janis akin jau matu dakewakin eadi dakewakin chakabuwayamaxanunbun, iwanan, matu medabewakin nukunabu dabe inun besti matu anu bebunkidi en jatu nichiaiin.⁵ Jaskaken jaska matun pei man bebunkidi inankuinkatsi man yubayama keska wakin man jabun inandiamatun nuiama man inankin keyukanwen, matun yaushi jatu uinmamadan. Jawada man inantidu jawaida man inanunbun matu anu

nukunabu dabe inun besti jabun matu medabewaibunun bun dasibi bebunkidi jatun bedubi man pewakin keyunun bun en jatu nichiaiin.

**Jawa yaushiamma jatun inankuin
jau inanxanun bun jancha pewen
jatu yuinikiaki, na janchadan**

⁶Janua jaska junin eskadabes mibainmatun yunu ewai kaniai eskadabes tsekamis inun, junin midima mibainma jawen yunu ewai kaniai akunjaida tsekamisdan, jaska keska shinankanwen. ⁷Jaskaken yaushiamma jatu medabewakin nukun jawada benimayabi nun jatu inanyan Diosun bechipaimiswen taexun tsuan matu yunuamabia bestibu jaska man yubaima keska jatu medabewai yaushibetanan inun sinatabetanan inain shinanma jawada man paxkakatsi ikai jatu inankuin xankanwen. ⁸Ja inun, medabewakin jamapai betsa betsapa yuda betsabu axunkin matu jawada paxkaxun man jatu medabewaya Diosun matu duawakin akunjaida pawamakin matuna binumakin inankin matu axuntiduwen man duanametidubuki. ⁹Diosun jaska shinanmiskidi Davidin keneni matu yuinun ninkakanwen.

“Chikishama dayabiamis dasibi
jayamaken
Diosun jawen pepa keyuismawen
jatu duawakubainmiski”,

aniki. ¹⁰Jaska keska Diosun nukipabu jatun jawada inanmistun matudi matuna inanmisken yaushiamma paxkaxun man jatu inainbu ana akunjaida matu inankin binumakin Diosun matu medabewam akubainxanikiki. ¹¹Jaska inun, Diosun ichapa matu inanmisken paxkaxun matundi yuda betsabu man inainbu nun matu jaska yusinmiswen taexun yuda ichapabun Dios kenwanxankanikiki. ¹²⁻¹³Jawada Diosun matu amakatsi ikai

chibankin Cristo ma ikunwainwen jawen kakapewen matu betsa wa yuda betsabu xabakabi medabewakin man jatu uinmaxanaii. Ja inun, na man jatu medabewaxanai nukun betsabu Jerusalén anua jawa jayabumaken nun jatu buxuan bitan benimakin Dios kenjaidawaxankanikiki, matun pepawen taexunan. ¹⁴Ja inun, jaska bestiwama jaska duaajaidawakin matuwen Diosun jatu medabewai jabun unankin matu bechipaikin Dios matu yukaxunkubainxankanikiki. ¹⁵Jaska waxun nukun janchawen nun Dios pepawakin keyutidumaki. Jaska Diosun binumakin nuku dasibi duaajaidawakin jawen inankuinwen Diosun jawen bake nuku mawamaxuniwen jawenabu nuku waiwen taexun Dios kenjaidawakubaina nkanwen.

**Pablo yuanmisbu xabakabi jatu
unanmananiaki, na janchadan**

10 ¹⁻²Jaska bestibu man ekidi janchamis en Pablon en matu yuiai ea ninkaidakanwen. Matu anuxun betsabun yuikin: “Pablo nukube jiwea janchajaidaisma yunuama unanxubida nuku jancha wabiamis chaikexun nuku kenexunkin jancha kushipawen yunukin nuku ja amiski”, iwanan, man ea yuanbiamisbun jaska duapakin en shinanmis matu yuinun ninkaidakanwen. Jaska man yuibiaya jancha kushipawen en matu kunyan atidubia jaska duapakin unanxubida Criston yudabu yusinkubaini keska wakin jancha xankamawen yuikin matu kunyan akatsi ikama matu anu en ana kaken jabun ea xeninkamisbu en jatube janchakatsi ikamaki. Jatun shinan betsya wamakin jau ana jamakidi shinan chakayamanun bun jatu mextanmakanwen. ³Januxun tsuabunda nukun Xanen Ibu chibankatsi ikabuman

yuda betsabu padankin jawada ibubis akatsi ikai akin yuda betsabu binunun, iwanan, jatube sinataibube detenamei jatun mabu kushipa tibiwen jaki chiti itan detenamei jawen kushipai jiwemisbuki. Jakia jabu keskama⁴ nuku ikidan, jawada Diosun nuku amakatsis ikai akin Dios inun Cristo danainbu ja chakabuki chiti ika jawen kushipaibu binumai Diosun kushipawen jatu ja akin nun jatu nuitapawatiduki, detenameai keskakinan.⁵ Jaska inun, jaska Dios danain unanepabun shinanmis jawauma wakin Dios nun jatu unanmakatsis ikaii, jatun chakabu bexteketan shinan betsatan jau Cristo chibanunbunan.⁶ Cristokidi nun matu yusinbia man nuku chibanmakenan, nun matu kupikatsi ikamaki. Menan jawaida nuku ninkatan chibankin pewadikanwen. Man ma pewaken tsuabuda juinti kushibu nun kupixanaii.

⁷Jatiditun shinan chakakin yuikin: “Cristoki dasia nun jawenabuwen taea en unanjaidaii”, man ikaibunan, nukudan, nun jabias Cristoki dasia nun jawenabudiki, uinkin jau shinanunbuwen, xabakabi nun ikunwainan.⁸ En matu jawenchains jaska Criston jawen kushipa ea yununikidi jawa dakeama en chanimis jawen taexun matu bextekin chintunmakatsi ikama jakia jawen medabewakin nukun Xanen Ibu kushipawen ikunwanmakin en matu kushipa wakatsis ikunkainaii.⁹ Na kene en matu bumaiwenan, jawen taexun matu datenun, iwanan, en matu bumamaki.¹⁰ Jamen bestibun en kene uinchakakin yuikin: “Jancha bika inun kushipa kenexun nuku yunubiai Pablo nuku anu jiwea unanepa keskama juni babu jawen jancha jameain tsuan kenwantidumaki”, man imiski.¹¹ Jaska jadi bestibu yui man janchamisdan, nun chaikexun matukidi kenewen nun

matu yunumis keska wakin kaxun matu bebunxundi jabiska man imis jancha kushipawen nun matu xabakabi yui kaxanaii.

Yusinan betsa kenmisbu Pablon jatu chitenikiaki, na janchadan

¹²Jaska nun yusinmis yusinan betsabun jatun yusianwen matu nuku dananmakin putamakatsi ikanikiki, jaska jatunmebi yusinchakai kanei enjen iki atimapakinan. Ja binunanan keainbu keska nun jaska jayamaki.¹³ Janida kaxun jawen daya nun axunun jatixun besti Diosun tanaxun nuku yununi anu besti dayai nun kentiduki. Jakia janu nuku yunuama anu ibubis dayama jaskawen taea ja binumai nukubu nun keanmaki. Diosunan, jaska tibi janu kesua anu nun kanun nuku jenea nun kamiski. Jaskawen taea matu Corinto anuabu man ikunwandiabuma anu nuku yununiki.¹⁴ Jaskawen taea nuku dukun matu anu Diosun nuku yunua kaxun nukun dukun Diosun kakape Cristokidi datan akin nun matu yusin taewaniki. Jamen jadi Diosun nuku yunuama inidan, nukudan, jaskadada nun matube ikeanaii.¹⁵ Nukubudan, juni betsabu ma dayani anu jikitin nun kenkatsi ikamaki, nukun dayamawen taeadan. Jakia nuku ikidan, matube dayakin nun taewaniwen taea matun mae anuxun man nuku medabewaya ana ichapabu matu ikunwanmakin nun ewawakatsi ikai nun matu manaii.¹⁶ Jaskawen taea nuku kaidan, man nuku medabewaya Jesúskidi kakape bui man Corinto anuabu bestima jabu chai jiweabu anu tsuan jatu yusindiaman yusiin nun dayakatsis ikaii. Nun jaska dayakunkaina aidan, yusinan betsan yusianwen nun kenkatsi ikamaki.¹⁷ Jaskaken tsuada kenkinan, jau nukun Xanen Ibu besti

kenwankubainunbunwen. ¹⁸Janua ibubis jawen shinanan besti jamenmen keainan, Diosun bechipaama jume jumepamiski. Jakia tsuada ja nukun Xanen Ibukidi pe janchaidan, jakidi pe shinankin kenwanmiski.

Yusinan betsabun yusinmis Pablon dananikiaki, na janchadan

11 ¹Jaska janchai en patapamisdan, tenetan man ea ninkatidumenkain. Jaskakidi en matu yuiai ea ninkakanwen. ²Jaska matukidi shinain nui en matu yaushimisdan, ibubis en yudawen matu yaushiama jaska Diosun matu bechipaiai ea matu imamiski. Matu jaska wakatsi ikin jawenabun Cristo man jawa jeneyamaxanunbun en jaska matu yuiaii. Juni betsan jawen bake chipash tsuan pesediamma juni betsa yubamis keska wakin eandi Cristokidi matu yusinkinan, jawa chakabu jayama keska Cristo en matu beismakatsis ikin en matube yubakayamaki. ³⁻⁴Jesúskidi nun ma jaska matu yusinbianiken yusinan betsabu buxun matu padankin jaska Jesúskidi nun matu yusinsma Jesús betsa keska wakin matu yusiaibun jawaida jatun jancha jawendua bechipaikin man jatu ninkakubainmiski. Ja inun, nukubun Diosun Yushin Pepa matuki nun ma matu dasiwbaiyamaken yushin betsakidi matu yuiaibu man jawaida achimamiski. Ja inun, jaska kakape nun matu yuiaama ibiyamaken kaka betsa man jawaida chibainwen taea matuwen en dateaaii. Jaska Edén bai anuxun dunun Eva padani keska wakin jawada pepa Cristokidi man ma jayabia jenetan jabun chakabu chibain man jamakidi benuaibuwen en matuwen dateaaii. ⁵Jaska inun, ean en shinanan, jabu chipu kabiaxun jancha jawenduawen matu yusinkin ea binunkatsis ikaibudan,

jawa ea binutidumbajaidaki. ⁶Jabun matu padainbu unanepabu jabun jancha jawenduabiaken ea en jui kushipamabia nukun Epa Dios inun nukun Xanen Ibukidi tapinxun matu axunkubainkin en matu uinmamis keskawen jabun ea binutidumbajaidaki.

⁷Matu anu kayamaxun Diosun kakape datan akin matu yusinkin en jawada jayamabia pei inun mabu matu yukakin ⁸en matu chakabu wayamamen? En matu jaska wama iyamaki. ⁹Jamen matu anuxun matu yusinkin matu duawanun, iwanan, en jawen dayatidu mae betsa anuxun ikunwain betsabun pei jatu mebinkin akawatan jawen matu medabewai en dayayunun jatun pei ea inanibuki. ⁹Janua matu anu yusiin jiweyui kaxun en jawa jayamabia matu daketapa wakatsi ikama en shinanyan nukun betsabu Macedonia anuxun jaska en jayama en binun jatun pei ea bumayamabuki. Man ma ea jaska wayamawen taea matu anu ana en kakenan, man ea ayama keska besti ea wakubainxankanwen. ¹⁰Matu medabewakatsi iki matuwen nuikin matun pei en bisma yuikin jancha chanima besti en yuiai Criston unanyan jawada en yusinmis en jawen keain Acaya mai pakea anu maniabu tsuabunda en jancha nematidubuma ixankaniiki. ¹¹¿Jaskai jaska en janchai? ¿En matuwen nuiamawen taexun en yuiai? Jaskamajaidaki. En matuwen nuikin bechipaiaidai Diosun unainkiki. ¹²Diosun daya en amis keska jabun ea mawapaikin jau jawawenda kenyamanunbun jatu nemakin jaska matun pei bikin en matu ichakawaisma en jabiaska besti ikunkainxanaii. ¹³Jamen jabudan, Criston kushipayakatsis ibiai yusinan kayabibumaki. Nuku keskakatsis ibiai peiwen kemui padanananmisbuki.

¹⁴Jaska inun, Satanásandi nuku padanun, iwanan: “En Diosun tsumaki”, iwanan, nuku uinmaidan, jaska ¹⁵taxnixanai yuini jatuwen Satanás padananain dayaikiki, “Nun Diosun tsumabudiki”, ikidan. Jaskakin jabun nuku padanmisbu Diosun jatun chakabu unantan jawen jatu kupixanikiki.

**Pablón yusinbauni jawada
bika teneni jawen kein jatuki
chaninikiaki, na janchadan**

¹⁶Jaska en tatima keska ekidi shinankin tsuabunda man jaska shinamisken jaska man jabun shinamis en tatima ibubis en kentidu man ana ekidi shinanyamanun bun matu yui en jawen kein janchai ea ninkakanwen. ¹⁷Jaska nukun Xanen Ibun ea yunuamabia emebi en shinanen en janchaii. Tsuada jamebi kein janchai tatima ikasmis en unain en jaskakidi kein janchai eadi ninkakanwen.

¹⁸Jabu kein ibubis jatun unanepawen binunananmisbun eadi jaska keskadiai en imiskidi en keinmenkainan.

¹⁹Ja inun, matu unanepabia tatinabu janchai benimakin nemama man jatu ninkamiski. ²⁰Jaska inun, jabundi matu dayadu watan matu yunuabu man jatu dayaxunmiski. Matu padanbetanan, ichakawakin matun jawada matu biainbu man jatu inanmiski. Jabun matu tanpais akabu man tenemiski, jaskatimabiakenan. ²¹Jakia nukudan, ja dukun matu anu kai taeidan, nun babu kaintanyamaki, dakekin jaska yuitimabiaken en matu yuiaidan. Jakia natian betsabun jancha kushipawen matu jancha wamis keska wakin eandi natiandi en jancha tatima kushipawen en matu yuiaii.

²²Matu padanmisbun jabun xenipabukidi kenkin yuikin: “Nun hebreonawabu inun, nun Israelbu

inun, nun Abrahamnen bababuki”, ikin chanima yuiaibunan, eadi en jabiadiki.

²³Ja inun, jabun yuikin: “Nun Criston tsumabuki”, iki Cristo dayaxuna budan, en idiakunkainaii, Cristo dayaxunkin jatun daya binumajaidaidan. Man eki janchai man ea tatimawabianun ean en jatu binumiski. Ja inun, Diosun kakape en yusianyan ichapaki ea bichimisbuwen ean en jatu binujaidaki. Ja inun, jatikida ea kushanibu tsuabunda tanatidubumawen taexun en jatu binujaidaki. Ja inun, en mawakeankunkainiwen en jatu binujaidadiaki. En jaska tibi memis en matuki chaniaidan, ɿeadan, en tatimamen? En tatimamaki. ²⁴Diosun kakape Cristokidi en yusinbaunmiswen taexun ea nemapaikin janu ea akaibutian judio xanen ibubun meken bestitiki ea jatu kupimakin awa bichi kushatiwen jawenchains 39 tibiki ea jatu pekush pekush amakubainabu en mawakeankunkainyamaki. ²⁵Jaska inun, Cristokidi en yusinbaunmiswen taexun ea nemapaikin romano xanen ibubundi dabe inun bestitun ji kushatiwen ea jatu pekush pekush amayamabudiki. Jaska inun, ea tenanpaikin mankanwen ea tsaka tsaka akin ea shinan nemanibuki. Ja inun, Cristokidi en yusinkubaunaya niwe xaxu dabe inun besti jabu tibi chakabua akeakeaya en jasakeaniki. Ja xaxu betsa anua meshu bestichai inun xaba bestichai ian batapa anu xaxuuma nunai tsuan ea nexetima ji tuaxki mepia en nunukunkauniki. ²⁶Jaska inun, Jesúsun kakapekidi yusiin nun kakunkaunai jaska tibi mese en binukubainmis matu ana yuinun ninkakanwen. En jene pukei kaya jawaida bai mata bekin ea xaxu nadabea inun main pukei nua maexbain jasai en mawakeankunkainiki. Ja inun, main en kaya yumetsubundi ea mesewatan

en jamapai ea bianibuki. Ja inun, enabu inun enabuman ea ichakawakin ea date date akubainyamabuki. Ja inun, maewan tibi anuxun inun janu jiweabumanuxun junibun ea ichakawanunbun yuinaka piananbun ea pikeanyamaki. Ja inun, ianenwanu niwe xaxuwen en kaya niwewan mese bekin ea datekubainyamaki. Ja inun, nukubetan ikunwainbu jabun ikunwanchakaibun ea bikawakin ekidi chanichakubainyamabuki. ²⁷Ja inun, en dayachakayamakunkainmiski, bika betsaa betsapa tenebiakubainidan. Meshu betsaa tukama en uxu tenemiski. Ja inun, buni tenea inun unpax tenea piama en ikunkainmiski. Ja inun, matsu tadi jayama jawa dakukuti jayamadi en matsu tenekubainmiski.

²⁸Jaska tibi ena tenebiakin ja shinanma en betsabu mae tibi anuxun man ikunwainbuwen en matuwen nuijaidakunkainmiski, jaska tibi binuidan. ²⁹Yuda betsaa bika tenei babuaya jawen nuikin en jabetan teneai keskamiski. Ja inun, yuda betsaa ikunwainbu babu wakin chakabuwamaya tsuanda jatu chakabuwamaiwen en jatuki sinatajaidamiski. ³⁰En jawa jayama emebi en jaska kentidumabia jaska en babumiswen taea en keaiin. ³¹En jaska chani keanyan nukun Xanen Ibu Jesucriston Epa Diosun en jancha ninkakin chanima jancha besti en yuiai unainkiki, ja ikibi ini yudabun kenwankubainxanaibunan. ³²Cristo en ikunwankin taewabidanshina ea jaska wanibu ana matu yuinun ninkakanwen. Xanen ibujaida Aretasin Damasco maewan yunumistun jawen soldadobu ea achimanun, iwanan, ja mae jawen mishki kene xexekaian janu kainbainti tibi anuxun ea jatu achimakatsi iniki. ³³Jaska jatu wamabiaya ikunwainbu

betsabu en jaibuabun januxun uinti kene xui anu kukiki ea nanetan dispiwen kukiki duntantan ea janu buteabu ea achipanabun en paxakainiki.

**Jamapai tibi Diosun Pablo amanikidi
jatu yuinikiaki, na janchadan**

12 ¹Nama keskawen jawada nukun Xanen Ibun ea uinmani en matuki chanii jaskawen en kentidumabia ekidi matu unanmajaidakatsis ikin jawada nukun Xanen Ibuan ea xabakabi unanmani en matu yuiai ninkaidakanwen. ²⁻⁴Ma 14 badi kaken nai binua keyatapajaida anu Dios jiwemis pepenu en yuda kasmai en yushin besti Diosun ainitan ja jancha tsuan xabakabi yuitiduma Diosun ea yuiniki. Jaskada watan ea aininidan, en yuda kasmai en yushin besti ea uinmani Diosun besti unainwen taexun ean en matu yuitidumaki. ⁵Jaska en ini en jawen kentidubia en jawen jawa keanmaki. Jakia jaska babukin en tenemis bestikidi chanikin en yuitiduki, keinan, nukun Xanen Ibun ea medabewamiswen taeadan. ⁶Jaska inun, tatimabia en kein jawada Diosun ea axunmis yuikin jancha chanima en yuiaja jawada emebi en akai inun jawada emebi en yuiai besti ikunwankin jawada betsaa betsapa Diosun ea axunmis en ana matu yuikatsi ikamaki, man tsuan ekidi jaska shinankin yuitidubumakenan. ⁷Ja inun, jaska pepajaida en uiniwen taea kein en jawenduayamanun Diosun nemama Satanásan ea isin betsaa inankin ea muxa tekeea keska ea wani en teneai. Ja inun, jawanda ea isin tenemaima tenekin ⁸jau en Xanen Ibun ea xuxawanun, iwanan, dabe inun bestiki en ea aka ⁹dabe inun bestikidi ea yuikin: “Miwen nuikin en mia duawamisdan, jatiwen besti min benimatiduki. Isin tenei min babubia min ea dayaxunkunkainkin

en kushipa min unantiduki”, ea waniki. Jaskaken yuda babu jaya Criston kushipa jayakatsis iki jaska emebi en jawawatiduma en jawen kentiduki.

¹⁰Jaskaken babui Criston kushipawen en kushipatiduwen taea Cristo duawanun, ika en shinan chankanmiski, eska tibiwenan, en babuaiwen inun, eki sinataibuwen inun, en yumain jawaumawen inun, ea tenanun ixun ea ichakawaibuwenan, Cristowen dayai en bika tenekubainaiwenan. Janu en babujaidaitanan, Criston kushipa en mekubainmiski.

¹¹Jaska tatinai en keain en jawaumaki. Jakia man ea kenwanma danainbuwen taea ibubis kenkin en matu jaska yuiaii. Ja unanepabu padananankin bemakis matu uinmakin jaska ekidi jawauma matu yuimisbudan, jatun jawawen ea binutidubumaki. ¹²Ja inun, bika betsaa betsapaa mebiakin en tenekubainimaki. Jaska inun, matube jiwxun jaska dasibi Jesúsun kushipayabun amis keska wakin eadi jabiaskadi Diosun kushipa en jaya xabakabi matu uinmakin dami betsaa betsapaa en wakubainimaki, matun bedubidan. ¹³Ja inun, jaska ikunwainbu maniabu dasibi duawakin en yusinmis matudi axunkubainkin jatun pei en bibiamis matuna en matu yukama ikimaki. Matun pei man ea inankatsi ikama shinankin matu bikawakatsi ikama matun medabewati yukama en kaneimamenkain. Matube jiwxun matun jamapai medabewati biama matun juinti en nishmawaimamenkain. En jaskakin kaneimaken en chakabu ea jakimakanwen.

**Dabe inun bestiki Pablon
ana jatu uin kakatsi jatu
banabimanikiaki, na janchadan**

¹⁴Dabeki en matu yusintanima samama ana matuki banun ika

en kakatsis ikin en matukidi ana shinantanaii. Jakia jaska bakebu yumedibuman jatun jamapai shadabu jatun ibubu mekexuinsma jakia ibubun jatun jamapai jatun bakebu mekexunxun jatun jawada bixumis keskakin ean dukun Cristokidi en matu yusintani en matun ibuki. Matu jaska wakin en bakebu keska en matu aniven taexun matun jamapai en matu menkatsis ikamaki. Jakia man Cristoki dasiabun en yusian ikunwankin chibannmisbun man ekidi shinantiduki. Jaskawen taea Cristo besti man chibanunbun en matu ana yusin kakatsis ikaii. ¹⁵Matu anu jikitan matun ibu keskakin matuwen nuijaidakin matu medabewakatsis ikin en jawada bikin dasibi en pei putakin en keyuxanaii. Ja inun, matu bechipajaidakin en jeneama ibiakunkainaya ɿmatunan, man ea bechipai midinkin jenekubainxanai?

¹⁶Jabiaskabiaken matun pei biankin en matu daketapa waismabiaken ekidi tsuanda yuikin: “Nuku padankin nukun pei Pablon june biankubainmiski”, iwanan, jadatuda eki bepadamekin man ea yuanteduki. ¹⁷Yusinan betsabu en matu anu yunushinabunan, jabun matun pei ichawakin: “Ea bixuntankanwen”, iwanan, en jatu yunuamaki. ¹⁸Ja inun, Tito inun ikunwain betsaa matu anu en yunushinabunan, ɿpei matu biankin matu padanshinabumen? Jaskamaki. Jabu ebetan yusinmisbu keska shinainbun jabiaskadi yusinkin eandi en jatu yunumistun en matu padainsmadiki. Jabukidi chakabu shinanyamakanwen.

¹⁹Na eska en matu yuiaidan, jawada nun matubetan kaneima ɿen ibubis nemakanai ikimenkain? Jaska ekidi man shinan chakatidubumaki, en matu jaska waismabiakenan. Jakia nuku janchaidan, Diosun nuku unanti wakubainaya Cristoki dasitan nun jawenabun matu

medabewakatsis ikin matuwen nuikin jawada inun jaskada Diosun nuku amakatsis ikai xabakabi matu axunkin dasibi nun matu uinmamiski. Jaskaken en betsabu inun en puibuun, jawada nun matu yuiai chibankin matun jiwea pewatan Cristoki chiti itan kushipai ewadikubainkanwen.²⁰ Ja inun, tsuabunda en jancha man jabun danain man jaskadada en matu uin kaxanai inun, matundi jaskadada man ea uinxanai matuwen en dateaii, eska man jiweamenkain ikadan, man dananananbukauainwen inun, juni betsa ikaiwen uin man jatuki sinatamiswen inun, man pubeainwen inun, man ibubis kein binunananainwen inun, june man yuananainwen inun, man xabakabi chitenamemiswen inun, "Ean besti en jatu binuaki", man ikaiwen inun, man medabenameismawenan.

²¹ Jaska inun, matun maewan anu ana en kaken jabun chakabu betsa betsapa wakin kanekubainkin shinan betsa wadiabumawen taexun Diosun ea dakewanaxaiwen en dateaii. Uatian man chakabu jenediamma en matu uintanima keska ana jabiaskaswen man jiwea uin junti nishmajaida en matuya kaxatushitiduki, eska tibiaibu uinan, tsuabuda man jabun chakabu jenediamma jaikaimas chakabuwen jabun shinan chakaibu inun, juni dabe chutanameaibu inun, ainbudi yuda tibibube chutanameaibu inun, atimapakin jatun shinan benutan chakabu bestiwakubainaibuwenan. En betsabu inun en puibuun, en matu anu kadiamaken matu shinan betsa wai bebunkidi pepadikanwen.

Corinto anuabun jau jatunmebi unantinanunbun Pablom jatu yununiaki, na janchadan

13 ¹⁻⁴Yudabu mai jidabi anu mekenun ika Jesús babuyuniken junibun achixun cruzki netantan

tenainbu Jesúsun jatu nemamaken janua ma tenanbu Diosun jawen kushipawen ana bestenwaniki. Jaskaken nukun Xanen Ibu keska babuyui jawen kushipa Diosun nukuwen matu unanmamiswen taea niti ikama Cristobe nun jiwekuinkunkainxanai. Jabiaskabiaken Criston kushipawen en matu yunumismenkain man unankatsis ikaibu matu anu ana kaxun Criston jancha chanima kushipawen en matu ja atidu en matu uinmai kaxanai. En matu yusintani ana matu yusiin matube ana ka jiwea en yubakayama keska chai jiwebia matu dapixun en yuiai keska ana en matu banabimai ninkaidakanwen. Jadatubunda ikunwainbun chakabuwakin jatun junti ana pewadiabuma en ana jatuwen nuiama iki kaxanai. Eska Diosun yunua Moisin jatu yununiwen besti nun jatu unanti watiduki: "Tsuanda chakabuwai jawen jancha unankin yuda dabe kasmai dabe inun bestitun jakidi chanii pikuabun jabun jancha ikunwantidubuki", ini ja yusian chibain matun ichati anu ichaxun jabu chakabumenkain jaska unantinain chitenamei penamebukunkanwen.

⁵ Jaskaken matu anu en ana kadiamaken Jesucristo matuki dasia man jaska ikunwankin pewaimenkain. Matunmebi uinkin matu shinan uke medan unankanwen. Betsabun man ikunwainmenkain. Betsabun man daki ikunwanbumaki. Matunmebi ibubis unantinankanwen, jaska man kaneamamenkainan. ⁶Jamen nun jabun matu yusinmisdan, jawa chakabu wakin daka kanekin nun matu uinmachakai jawa chintuanma nun Jesús ikunwain man nuku unantidubuki. ⁷Nukukidi shinankin unanti wakin jatibunda nukun yusian man bechipaiamabiaken jaska nukukidi man shinain nun jawen nuiamaki. Jakia man pe besti

jiwenunbun nun matuwen nuikunkainaii. Jaska man jiweabu jau jawa chakabun matu achiyamanun Diosun kushipa nun matu yukaxunkubainaii.⁸ Jaska wakin chanima jancha nun danantidumaki. Jakia chanima janchawen xabakabi nun matu axuankeakemiski.⁹ Jaska inun, Diosun matun shinan kushipa waya jau niti ikama man pepaki nukununbun nun babubia benimakin Dios nun matu yuka jenexunama ikunkainaii.¹⁰ Jaskaken matu uin kaxun matu ja akin nishmawakin en matu ana babu wayamaxanun jakia medabewakin en matu kushipa wakubainxanun nukun Xanen Ibun jawen kushipa ea inaniwen matu yamawama man ikunwainbu en matu kushipa wakatsis ikaii. Jaskawen taea matu anu kadiama bebunkidi en jancha kenexun en matu bumaiwen taexun shinaindakanwen.

¹¹ En betsabu inun en puibuun, matu kenexunkin ma en keyuai ninkaidakanwen. Epa Diosun

duawakin medabewakin unanuma matu jiwemakatsi ikaya matun jointi benimakin jawada Diosun matun jiwea matu pewamakatsis ikai adikanwen. Ja inun, punu nuka pesbudan, jau medabenankin matu benimawanunbun Dios jatu yukaxunkanwen. Man jaskai jiweabu Diosun matu bechipaikin matu unanuma jiwemai matube jiwekunkainxanikiki.¹² Ja inun, nukunabu matuki nukuaibu Jesúsun kenawen yuka iki benimai ikukunankubainkanwen. Ja inun, ikunwainbu Macedonia anuabun jatun jancha matu bumadiakanikiki.

¹³ Nukun Xanen Ibu Jesucriston jawen pepawen jau matu duawakubainunwen. Ja inun, matuwen nuikin Diosun jau matu medabewakubainunwen. Ja inun, Diosun Yushin Pepatun jau dasibibu matu jaibunamemakubainunwen.

Jatiski, en janchadan.

Pablo

GÁLATAS ANUABU PABLON JATU KENE BUMANIKIAKI

GÁLATAS

Pablón jatukidi shinanikiaki, na janchadan

1 ¹Jesúsun tsuma kushipaya betsa eadán, en Pabloki. Jawa junibún jatun shinanen katuxun ea yunuama inibuki. Jakia katukinan, Jesús tenanbu jatun bestenwani jawen Epa Dios inun ja kayabis Jesúsun jamebi ea katunixun ea yunukubainmisbuki. ²Na nenu jiwxun dasibi nukun betsabu Jesús ikunwainbubetan jadi Galacia mai pakea mae tibi anu man dasibi nukun betsabu ichamisbu tibi anua en matu kene bumai uinkubaunxankanwen. ³En kene uintan man jaskaya man unanuma jiweaibun Epa Dios inun nukun Xanen Ibu Jesucristo matuwen nuikin jatun pepawen jau matu duawakubainunbunwen. ⁴Jaskaken nukun Epa Diosun jaska shinain keskawen nuku ikidan, natian jiweabun chakabujaida wakubainaibube jau nuku kupiyamaxanun jaskawen taea Jesucristo mawai jawen jiwea yaushiamá nukun chakabu buanun ika iniki. ⁵Jaskaken nukun Epa Dios kushipá jau kenwankubainunbunwen. Jaskakidan.

Dioskidi yusian meketi betsa jayamakiaki, na janchadan

⁶Cristo nuikipa pepawen taexun Diosun matu katukin unanmabianiwen

taea kanekin jawaida jenei yusian betsaki maekin man jadakidi ea shinantima kayawai e ikin en ninkaii. ⁷Chanimá en matu yuiaii. Yusian betsá naexuma kushipa jayama keskawen matu yusinkanikiki. Juni betsabu jumepakin matu padankin Criston matu mekeakidi kakape betsá wakin jabias janchawen matu yusianbumaki. Jatun yusian janchadan, jamen jaki bepadamekanikiki. ⁸Jaskaken tsuanda yusian betsá nun matu yusin taewani keskama bexun matu yusiaibudan, Diosun yupukin kupiti wani anu bunun ika ikanikiki. Jadatuda shinanma ea kasmai naiudia Diosun nai tsuma juá jatun janchawen chanichakayuadan, jawa jatu ninkayamakubainxankanwen n. ⁹Ja dukun en matu yuitani keska na jabiatian ana en matu yuáii: “Tsuabunda yusian betsá, jawada man ikunwani keskama, jabun matu yusinkin padankin matu betsá wakin ichakawaibudan, Diosun jatu yupukin jatu kupiti wani anun jau mexanunbunwen”, iwanan, en matu ana kenexunaii. ¹⁰Matunmebi shinan pewakanwen. ¿Tsua en benimawaimenkainan? Ea ikidan, yudabu en datan akin kenwanmakatsi ikamaki. Jakia Dios besti datan akin en jatu kenwanmakatsis ikaii, yudabun jau ea kenwanun jatu bechipaimaidan.

Jaska bechipaiaibu keska en jatubetan pewakeanaii. Jatubetan jaska akidan, en Criston tsuma ikeanamaki.

Pablo eska ibiani Jesúsun kushipayá inikiaki, na janchadan

¹¹En betsabu inun en puibuun, matunan, ninkaidakanwen. Diosun yusini Jesús mekenankidi kaka wakin datan akin en matu yuikubainidan, yudabun ea jawa tapinmama inibuki. ¹²Jakia junibun katutan ea yusianbumabiaken Jesucristo bestitun ibubis jawen meketi xabakabi ea unanmaniki. ¹³Jaskati dabanen en Israelin babawen taexun judiobun beya dasibi chibankubainkin Jesús ikunwainbu badi betsation en jatu ichakajaidawakin en jatu yamawakin keyukatsis ikai man ekidi ninkanibuki.

¹⁴Edan, tsua jaskamabiaken en xenipabun beya chibanjaidakin juni ewai unanepakin betsabu ea keskaru en jatu binujaidakubainiki. ¹⁵⁻¹⁶Jamen judiobumadi jau Diosun jatu kupiyamaxanun nukun mekenan Mesíaskidi ean en jatu yusinkubaunxanun en kaindiamabiaken bebunkidi Diosun ea katuniki. Janua jawen pepawen ewen nuikin ma en juni ewa ea unanmakin ana xabakabi ea katuxun jawen baken daya en axunkubainxanun ea kenaxun jawen bake ea unanmaniki. Januxun jawen medabewati jancha jau tsuanda ea yusinun yuda betsabu en jawa yukama iniki. ¹⁷Ja inun, Jerusalén anu dikabi Jesúsun kushipayabube dukun en janchai kayuama iniki. Jakia Damasco maewan este badi juaikidi Arabia mai pakea anu en katanima jadia Damasco anu en ana chintunkidaniki. ¹⁸En Jesucristo ikunwankin taewabainima jadixun 3 año nichintan Damasco anu chintunkidan Pedro uinun ika

Jerusalén anu en ka 15 xaba besti jaki bakin daewakin unanti wai en jabe jiweyuni. ¹⁹Jakia Jesúsun kushipayá betsabu uianma nukun Xanen Ibun betsabu Santiago besti en uindianiki. ²⁰Diosun en shinan chanima unanyan en matu kenexunkin yuiidan, chanimaki.

²¹Pedro uinshina janua kai mai pakea dabe Siria inun Cilicia anu en kaken ²²jakia Judea mai pakea anuxun ikunwainbu nukun puibu inun nukun betsabun ea uinsmabia ²³tsuanda ninkaxun jatu yuikin: “Pablón nuku ichakawakubainitun Jesúsun kakape yamawapaiaya Dios jawen nuikin jointi benawaima ikis jawen kakape dasibibu yusinkubaunikiaki”, iwanan, ekidi ninkakin ²⁴ewen taexun Dios kenwanku bainibukiaki.

Pablo Jesúsun kushipayá betsabu inikiaki, na janchadan

2 ¹Janua ma 14 año binukainaya chipu Jerusalén anu ana kakin Bernabébetan Tito en iyuniki. ²Jaskakaini kaidan, en shinanenma Diosun jaska ea unanmaya en kaniki. Jerusalén anu Jesúsun kushipayabu yununikabube jatube besti ichatan jaska jatumaki Jesúskidi kakape judiobumakidi kaxun en jatu yusintanmis en kanemismenkain ika datebetanan en jatuki chaniniki, jau ea ninkatan unanunbunan. ³Jaska en jancha dananma inun betsadan, Tito griegonawabiaken uinbiakin jau jawen jina kubichi mextenunbun jawa nuku yunuama idianibuki. ⁴⁻⁵Janua betsadan, nun ichanu nukun betsabu jatidi nukubetan ikunwain kayabibumadi june nuku unanti wanun ika jikia manixun ninkakin jawama Jesucristokidi ninkatan chibain ma mekei pepabiaibun janua jabun Moisin jatu yusini jatun beya nuku ana jusimakin chibanmanun ika

ikaibun jawa jatu ninkama binumakin ja Jesúskidi jancha chanimawen taea jawa beya tibiwen jusikin matukidi nuku kanemama inibuki, man jaska betsatan maetidubumakididan.

⁶Jesúsun tsumabu unanepabu jabu jatu ninkamisbu xanen ibubiabun jabun jawa jancha bena betsaa ea yuiama inibuki. Jakia chanima bemakis nun jatu uinkin shinankin kenwanbiamisken jaska Diosun bemakisa shinankin unanti waismaki. Jaska katukinan, jatun juinti uke medan uinmiswen taea jaskawen en nuiamaki. ⁷Jaskawen taea ja beya dabekidi nun unantinanibuki. Jaska Jesúskidi kakape nun jatu pe yusinunbun Diosun nuku yununiki, ea nichinkin yunukan. Judiobuma anu kaxun Jesús mekenankidi en jatu tapinmanun bebunkidi ea unanmaniki. Jabiaskadi wakin Jesúsun Pedrodi judiobu anu yunukin nichindianiki, jau jakididi jatu unanmakubainunan, jawen mekeakididan. Nun jaska dayamis nuku ninkakin nukun xanen ibubun nuku unanibuki. ⁸Diosun bake Jesúsun Pedro katuxun yunudianiki, jau jawen kushipayaxun jawenabu judiobu jau jatu yusinkubainxanunan. Jabiaskadi wakin Diosun bake Jesúsun eadi katutan jawen kushipayawaxun judiobuma anu eadi yununiki, jabudi en jatu yusindiakubaunxanunan. ⁹Jaskawen taexun en jawa pepamabiaken ewen nuikin Jesúsun ea katuxun ea yununi en jatuki chanikin mextanma ninkatan jabu dukun Jesúsun jatu katuni binuabu Santiago inun, Pedro inun, Juanen en jaskamis chanima unantan ea jaibuwakin nuku danama ea inun Bernabébe ea jabe metaka anibuki. Nuku jaska wakin jaibuwabu ea Bernabébe paxkakain judiobuma anu nun yusin kaya janua jabudi jawenabu judiobudi jatu yusinunbun jatube yubakatan

nun ana dayai kaniki. ¹⁰Eska besti nuku yununibuki, nuitapaibu nun jatu jakimayamanunbunan, ean ma en jabiaska wabiamisken ana nuku shinanmakinan.

Antioquía anuxun Pablon Pedro ja anikiaki, na janchadan

¹¹Janua Jerusalén anu nun ichashina menetan ana Antioquía maewankidi nun chintunkainima jiweken jabiatiandi Pedro nukuki bai kashinxun jatu yusinkin kaneaya en ja bebunxun ja ani matu yuinun ninkakanwen. ¹²Ja dukun Pedro kaxun judion beya unanbiakin Santiagon jaibuaibu bediabumaken Jesús ikunwainbu judiobumabetan pikubainaya jabun judiobun beya chibankin jenekatsi isbuma Jerusalén anua bei ma jikiabun jatuki mesekin jau jakidi chakabu shinanyamanunbun jatu bepadani ana ikunwainbu judiobumabetan Pedron piama jatu jeneyuniki. ¹³Januxun Jesús ikunwainbu judiobu betsa Antioquía maewan anuabun judiobumabetan piaibukidi pe shinani biakin jaska Pedron kanekin taewai keska wakin jabundi jabiaskadi wakin kanediakubainibuki, en jaibu Bernabé dikabidan. ¹⁴Jaska wakin Jesúsun yusian kayabi chibankin pewama kaneaibu ean uinkin Pedro jawen jaibuaibube nia jatu chitekin: “Pedroon, judiobia uatian judioma keskai min jatube nixun pikubainshinaki. ¿Jaskai natian jatu bepadani ana chintunkidan judiobun beya jau judioma min jatu uinmachakai? ¹⁵Nukuba na nenu mapuabudan, judiobumabun Diosun yunuti inun jawen nemati unanbuma keskama judiobu kaintan nun yumeniki.” ¹⁶Jabiaskabiaken Moisin yunuti inun jawen nemati chibainbuwen taeama tsuabunda Jesucristo ikunwainbuwen

taexun Diosun jatun chakabu buatan ana shinanma nun unaiin. Nukundi judiobun beya nun chibainwen taeama Jesús nun ikunwanyan nukun chakabu Diosun buaxun nuku ma pepawani nun unandiaii. Jesús jaibuwama judiobun beya besti chibainbun tsuabunda chakabuwai Diosun buaxunkin pepa waismaki.

¹⁷Jamen nuku ikidan, Moisin yusian chibain nun chakabu iyunibuki. Jaskawen taexun en mia yuiaidan, Cristonan, nuku chakabu amaismaki, chanimadan. Jaskaken nun pepakatsis ikin jatu unanti wamaidan, jau nuku unanti wanununbun Cristowen taea besti nun pepatidubuki. ¹⁸Ja inun, judiobun beya danankin jenebiantan ana chintunkidan en sera waidan, eadan, en chakabu ikeanaii. ¹⁹Jaskaken Moisin keneni chibanjaidabai eadan, jawen taeidan, en mawa keska iniki. Jaskawen taea Jesucristo mawaya en jabe cruzki dununi keskawen taea jatixunda en jiweawen Dios duawai en jiwexunyuaii. ²⁰Natian na en yudawen en jiweyuaidan, Diosun baken ea bechipai ewen taea mawanixun ea shinan betsa wamani ja ikunwain en jiweyuaii. Jaskawen taea eadan, en ana emebi yunui en jiweamaki. Jakia Cristo bestitun ea yunuai ewen jiweyuikiki. ²¹Jaska inun, Moisin keneni chibain en pepa bestiaya Cristo jamen nuku mawaxunkeaniki. Jakia natianan, en ana jaskamaki. Dios ewen nuiaya Criston ea mekeawen taexun en xenipabun beya jenetan Cristo besti en chibankubainaii”, akin en Pedro yusiniki, dasibitun ninkaibunan.

¿Jadatu yusian pemen? na janchadan

3 ¹Galacia anua unainsmapa tatimabuun, ¿tsuan matu dauinmenkain, padan paepa wakinan? Jesucriston matu pepawanun ika

cruzkia matu mawaxunikidi en matu unanmakubainbiaya juni betsabun jatun yusian sera matu yusinkin padankubainkanikiki. ²Jaskaken na besti matu yukanun: ¿Jaskadawen taexun Diosun Yushin Pepa man binimen, Moisin keneni chibankindaka? ¿En yusian Jesúskidi ikunwankindaka? ³Unainsmapajaidabuun, jaskakin Diosun Yushin Pepa bikin taewabiayama jakimatan ana pepanun, iwanaan, junibun beya man chibankubainkanaii, kanekin chakabuwaidan. ⁴Jamen Diosun kushipa man binimen? Man jaskayadan, en jadakidi shinantimaki. ⁵Diosun jawen Yushin Pepa matu inanxun jawada dami itimaska jawen kushipawen junibun atidubuma matu amakubainmisdan, ¿jadatu chibankin matu amamismen? ¿Moisin keneni man chibanmiswen taexundaka? Jaskamajaidaki. Uindakanwen. Diosun jancha ninkakin man ikunwainwen taexun besti jawen kushipawen matu amamiski.

Abraham pepakin ikunwaian Diosun:
Juni pepaki, anikiaki, na janchadan

⁶En xenipabu inikidi matu yuinun ninkakanwen. Abrahamnen Dios ninkatan ikunwainwen taexun Abrahamkidi janchakin Diosun yuikin: “Juni pepaki”, aniki. ⁷Jaskaken tsuabunda Dios ikunwankin Jesúz chibanmisbu Abrahamnen bababu kayabibiki. ⁸Janua judiobuma dikabibun jatun shinan betsa watan jatun chakabu jenetan Jesús ikunwanxanaibuwen taexun Diosun unankin jawen jancha yuixunika Diosun Yushin Pepatun Abraham kenemaxunkin yuikin: “Dios min ikunwainwen taexun yuda xukua tibibu dasibibun jawen bake ikunwainbu jiwekuinmakin Diosun miwen taexun jatun duawaxanikiki”, aniki. ⁹Jaskaken Abrahamnen ikunwanyan Diosun duawani keska wakin tsuabunda

jawen bake ikunwainbu Diosun duawadiamiski, jiwekuinmakinan.

¹⁰Januxun Diosun janchakidi jawenabu Moisin yuikin: "Jawen yunuti inun jawen nemati en matu kenexunai tsuabunda dasibi chibanzaidabumaken Diosun jatu yupukin pe jiwemama iyanikiki", jaska watan jatu kenexuniwen taea chibanzabia jatunmebi pepapaikin jawen yunuti inun jawen nemati chibanzaikin pewabumaken Dios jatuki sinatamakin yupuxanikiki. ¹¹Jaska inun: "Ikunwain pepabu jiwekuinxankanikiki", iwanan, Diosun jawen jancha yuixunika kenemaniwen taexun jawen yunuti inun jawen nemati besti chibankin Dios daewatidubumaki, nun unanan.

¹²Jawen yunuti inun jawen nemati Diosun Moisés inani chibainan, jawen jiwea kayabi Dios anua bitimaki. Jakia Moisin yuikanan: "Tsuanda Diosun yunuti inun jawen nemati chibankubaini ja yusian janchawen kaneama jawen jiwxanikiki." ¹³Diosun jawen yunuti inun jawen nemati yunukanan, jawen yupukunkatsi aniki. Jatun nukun chakabuwen nuku yupubiaya Criston nuku mexpamanun ika nukun chakabu kupiti bi nuku mawaxuniki. Jaskai kaikidi bebunkidi Moisin yuikin: "Tsuada jatun chakabuwen taexun tenankin jiki netanbu mawaya Dios jawen nuiama yupumiski", iniki. ¹⁴Jaskawen taexun jaska Diosun Abraham duawakin pepa yubani Jesucristowen taexun judiobumandi man ikunwanyan Diosun Abraham yubaniwen taexun jawen Yushin Pepa Diosun ma matu inani dasibi man ma jayaki.

**Jaska Diosun Moisés yununi inun
Abraham yubani Pablón jaska
jatu yuinikiaki, na janchadan**

¹⁵En betsabu inun en puibuun, jaska yudabu yubakai shinain janchamisbu

keska matu yuinun ninkaidakanwen. Yudabu yubakanametan shinanma tsuan jenetiduma inun tsuan betsa watidumaki. ¹⁶Na jaska en xenipabu Abraham Diosun yubakinan, jawen baba bestichaikidi aniki. Jakidi kenekin jawen bababu ichapakidi yubakai janchama jakia ja jaska jawen baba bestichaikidi yui yubakaidan, Jesucristokidi iniki, nukubun ja nun ikunwanxanunbun nuku anu juxanai yubakinan. ¹⁷Janua ma ana 430 badi kaya jawen yusian Moisés yuibia dasibi Diosun Abraham bebunkidi yubani maewamakin chipu Moisés jawa betsa wamama iniki. Jaskaken jawada Diosun Abraham yubani jawa betsa wama axunkubainxanikiki. ¹⁸Jaska inun, Moisin yusian chibain nun pepaya jawada Diosun Abraham yubani man jawama ikeanai. Natianan, jaskamaki. Diosun Abraham yubanidan, tsuan betsa watidumaki.

¹⁹Jaskaken jaska Diosun jancha Moisés yununidan, matu yuinun ninkakanwen. Kanekin jaska jabun chakabu waibukidi jau xabakabi unanunbun Diosun jawen yunuti inun jawen nemati Diosun jawen nai tsumabu Moisés yuimakubainiki. Jaska bebunkidi Abraham jawen baba betsakidi Diosun yubani judiamaken jau Moisin yusian chibankubainunbun yudabu jatu yusinkubainibuki. Diosun nai tsumabun jawen yunuti Moisés yuimabiakubainxanai ²⁰ja dukun Dios Abraham yubakain ibubis Dios bestitun anikiaki, tsua janchaxunamadan.

**Diosun Moisés yusinidan,
Cristowen taea nuku ana jawen
mekeamakiaki, na janchadan**

²¹Ja dukun Abraham Diosun yubani inun ana ja kachu Moisés yusinmanidan, ejaska ja dukun Abraham yuini Diosun betsa wakin nematidumen? Jaskamaki.

Dios daewakin jawen nemati inun jawen yunuti jancha pe chibankubainkin tsuabunda jiwekuian bikeankanai.

²²Diosun jancha Moisin keneni uinkin dasibibun chakabuwakubainaibukidi ibubis unanbiai pe jiwestidubumaken jaska Diosun jatu yubani Jesucristo ikunwanmisbun besti jiwea kayabi bixankanikiki.

²³Nun ja ikunwanxanai judiamaken Diosun Moisés yusian keneniwen jawen nuku bichikin akawaxun nuku tea wayuniki, jawen taexun Jesucristo manakakin nun jawen unanti wayununbunan. ²⁴Jaska inun, Cristokidi unankin ikunwankin nun chibainbu nukun chakabu buatan jau pepabu keska Diosun nuku waxanun, iwanan, jawen yunuti inun jawen nematiwen nuku mekeyukubainiki. ²⁵Jakia natian nun Jesús ikunwainbu jabias yunuti inun nematiwen nuku ana tsumamaken ²⁶dasibi man Jesucristo ikunwain man ma Diosun bakebuken jatun besti matu mekekubainikiki. ²⁷Jaska inun, man Cristo ikunwankin jatu unanti wamanun ikaya matu nashimabu man tadi sawemis keska wakin Cristoki dasikin man ma tadi sawekein akawaniki. ²⁸Jaskai man yuda bestichai keskaki. Judiobu kasmai judiobuma inun, tsumayabu kasmai tsumabuuma inun, junibu kasmai ainbauiba shinanma jakia man Jesucristo ikunwainbu besti dasibi man yuda bestichai keska man jaki dasia shinankubainkanwen. ²⁹Man Cristonabudan, jibia man Abrahamnen bababu dikabiwen taea jaska Diosun Abraham yubaniwen matudi jawenabui man jiwea kayabi jayadiaxanai.

Nun ana dayadu esclavo keskama nun ma Diosun bake kayabibukiaki, na janchadan

4 ¹⁻²Na miyuiwen en matu yusinkatsis ikaii. Juni betsa juni bakeya jawen

ibu mawakin jamapai shadabu jaya jawen bake jenexunbainmisbuki. Jakia jawen bake ewadiama jawenabun yumewaibun juni betsan jawen epan mabu mekexunuabu jawen epan mabu inun dasibi jawen jamapai shadabu jamebi jawen baken ibuwaitian jawen epan janu yuini kemadiama ja jawen bake ewatan jawen mabubia ibubis jawena wadiamawen taea dayadu esclavo nuitapai keskai jiweyumisbuki.

³Jaskaken nukudi bake mishtinbun shinan keska nun ewadiama keska junibun yusianwen inun jatun beyawen nuku mekenibuki. ⁴⁻⁵Dios yubakakin janu jawen bake yunutiwani menekin Diosun jawen bake yunua jua ainbukia kaintan Moisin yusiniwen yumetan jatun Moisin yusini chibankin ja yudabu jawen mekeaiu jatun kupiti nuku bixuanyan chanima kayabi Diosun bakebu benimai nun pepaxanunbun jawen bake xabakabi dami watan taxnimaniki. ⁶Jaska inun, nun ma Diosun bakebukenan, Diosun jawen baken Yushin nukun juinti medan yunua Dios jatun nuku kenamakin: “En Epa nukipatuun”, nuku amamiski. ⁷Man jaskaya ana Moisin yusianwen man dayadu esclavo keskama ikis man Diosun bake kayabiki. Jaska inun, Diosun duawakin jawen bakebu wakin jiwea kayabi matu inankuinxanikiki.

Pablo ikunwainbuwen
nuinikiaki, na janchadan

⁸Uatian Dios kayabi unandlama matun mekenan dami yushin betsa betsapa kenwain jatun esclavo tsuma man inibuki, jaskatimabiakanen. ⁹Jakia natian Dios man unain bestima Diosundi duawakin matu unandiaikiki. Jaska unanbiakin ana chintunkidan jawanda matu pepawatidubuma chibain [¿]man ana jatun dayadu esclavo ikatsis ikimenkain? ¹⁰Jawen pepanun, iwanan, Moisin yusian

chibain judiobun besi betsa betsapa man imiski, janu nawatitian inun, uxe benatian inun, uitian inun, baditian inun, badi benatianan.¹¹ ¿Man jaskawen taea jamen dayakin en matu medabewama ikimamenkain? ika en dateaii.

¹²En betsabu inun en puibuun, matu Jesús ikunwanmakin taewamai judiobun beya chibanma matun beya chibain en matube jiweyuniki. Ea ninkakanwen. Natian en jiwemis keskadiai jiwekubainkanwen, en matubetan jawa chakabu waismawen taeadan.¹³ Jaskaken matu yusinkin en taewaitian isin chakabun ea achia en nuitapaya¹⁴ en yuda en isin tenei atimapakin matu unanti wamabia man ea jawa dananma Diosun nai tsuma keska wai ewen benimai Jesucristo kayabi keska wakin man ea duawaimaki.¹⁵ Januxun matun bedu en matu ea akaya ea medabewanun, iwanan, matun bedu tsekaxun man ea inankeanimabuki. Ea jaska wai man benimakubainimawen taexun *čjaskai* man ana jaskamamen?¹⁶ Jancha chanima en matu xabakabi yuiaiwen taeadan *čjawai* en ana matun jaibumamen, natian man eki sinatakunkainaaidan?

¹⁷Jaskakin Jesús ikunwain machupabu juinti chakabuyabun judiobun beya matu chibanmakatsis ikin tadi matu paxkanun, iwanan, matu jawenawakin jabun yusian besti matu chibanmakin jawen tsumabu matu wakatsis ikanikiki.¹⁸ Jakia ichapabu medabewakin man jatu pe mekeaubudan, jaskadan, pejaidaki, en matube jiwexun en matu yusian shinankin man amis keska bestima jeneama jatu axunkubaikanwen.

¹⁹En bake keskabuun, *čjaskakin* man ana ea bika tenemai? Cristo matu ikunwanmakin en matu medabewaya man ea ani keska wakin man ana ea bika tenemai, ainbu bake kain isin temenis

keska ea wakinan.²⁰ Jaskadada man shinain ikai en matu unanmaki. Jamen natian ea kayabis en jadidan, jaska en shinain jancha pewen en matu yui kapanan en katidumaki.

Agar inun Sarakidi unantikiaki, na janchadan

²¹ Moisin yunuti inun jawen nemati man bemakis chibanmisbuun, ¿Moisin yusian man ninkaisbumamen?²²⁻²³ Jakia Moisin keneni uinkin ja Abrahamnen juni bake Ismael inun Isaackidi nun uinmis matu yuinun ninkaidakanwen. Abrahamnen ain Sara jau Sara dayaxunkunkainun peiwen Agar bikin jawen dayadu esclavo wabianixun janubi ainwandiatan jaki Abrahamnen bakewa jawen bake Ismael jawen yubakati jayama kainikiaki. Jakia Abrahamnen jawen ain Sara peiwen biama ain kayabi wani Diosun medabewaya Sara yuxabujaidabiaken jawen bake Isaac jaki bakewaima kaindianikiaki, jaska Diosun Abraham bebunkidi yubani meneidan.²⁴⁻²⁵ Abrahamnen ain betsya esclavo Agardan, jaskakidi yuiadan, ja ainbu esclavo Mati Sinai Arabia mai pakea anu keskaki. Ja mati anuxun Diosun Moisés yusinkin jawen yunuti inun jawen nemati inanikiaki, jau kenexanunan. Jabun ninkatan yubakai: “Ja Diosun yunuti inun jawen nemati nun chibanzanaii”, iki Israelbu Diosbe yubakai janchanibukiaki. Januxun Agar esclavo ini keskakin jabun ja yunuti inun nemati Moisin keneni chibanmisbudan, esclavo keskabuki. Jerusalén anu jiwebiabu Mati Sinai jatun ewa keskaki.²⁶ Jakia nukubudan, nun Diosun bake kayabibuwen taea Jerusalén nai anua nukun ewa keskaki. Diosun nuku mekeawen taea nun esclavon bakemaki.²⁷⁻²⁸ En betsabu inun en puibuun, matubudan, Diosun Isaac yubani man

ja keskabuki, Diosun bake kayabudan, man jawen yuba jayabudiki. Jaska inun, Diosun jancha yuixunika Isaíasin yuikin:

“Bake bisma man nuitkaabiai baba
jayakin
ainbun bake bimis man
binumaxanaii.

Jaskaken jabun man bake bitiduma
benimajaidakubainkanwen.

Bake bi isinmisbu keskai man isin
teneisma man unaaiin.

Ja inun, betsadan, beneyabia matun
benen matu jenebaina
bake ichapa bikin ja beneyabu man
jatu binumadiaxanaii,
bakeyakinan. Jaska shinankanwen”,
atan keneniki. ²⁹Jakia jawen esclavon
baken Diosun yubakin bake inani
Isaac Ismaelin ichakawani keska
wakin natiandi Diosun Yushin Pepatun
daya nun akai Moisin yusian bemakis
chibainbun nukuki sinatakin nuku ibu
wakin esclavo wanun, iwanan, nuku
ichakawadiakanikiki. ³⁰Jakia jawada
Saran Abraham yuini Moisin nuku
kenexuni matu yuinun ninkakanwen:
“Isaac besti en bakeken min dayadu
esclavon bake en bakebe ewatan
nun mawaya jau nukun mabu biama
ixanun menan Agar inun Ismael jatu
nichindiwe”, akin Saran Abraham
yunukin yuini. ³¹Jaskaken natian
en betsabu inun en puibuun, Moisin
yusianwen jawanda nuku ibu wakin
amamisdan, jawen esclavo keska
ana iyamakanwen. Jakia esclavo
keskama Abraham jawen bake kayabi
yubani keska ikubainkanwen, tsuan
tsumamadan.

**Jesús besti chibain
chintuntimakiaki, na janchadan**

5 ¹Jaska inun, Moisin nemati
inun jawen yunuti nun ana
chibanyamanunbun Criston nuku

kainmaniki, Moisin yusian chibain nun
ana jatun esclavo iyamanunan. Matu
jaska nemaniken Jesús besti chibain
ana shinan betsa wama judiobun
yusian danain ana jatun dayadu esclavo
iyamakubainkanwen.

²Jaskaken jawada en Pablon en
matu yuiai ninkaidakanwen. Ja dukun
judiobun jatun beya matu chibanmakin
matun jina kubichi matu mextematan
januxun Jesús matu ikunwanmaibudan,
jamen Cristo nuku mawaxuni man jamen
ikunwankanaii. ³Ana matu xabakabi
yuinun ea ninkakanwen. Tsuabuda
judiobun jatun beya matu chibanmanun,
iwanan, Moisin yusiniwen matu
ninkamas kemumakin matun jina
kubichi matu mextemaibudan, jaska
Moisin yununi inun nemani man jawen
pepakatsis ikaidan, jatubetan jaska besti
menekin chibankubainkanwen.

⁴Jaska Moisin yusian chibain pepanun
ika chintunkidan Dios matuwen
nuini pepa danain Cristo jenei man
jawenabumaki. ⁵Janua nukunan,
Jesúski dasitan nun ikunwainwen
taexun Diosun Yushin Pepatun nuku
medabewaya Dios kaneismatun nukun
chakabu nuku buaxuniwen pepai nun
jabe jiwekuinxanai jawa teama nun
manayukubainaii. ⁶Jaska inun, Jesús
ikunwakin jina kubichi mexteaibu
inun mexteabuma jamen ikanikiki.
Jakia Jesucristo ja besti ikunwain nui
benimai nun jaki chiti ikubainaibu
besti nun jawenabuki. ⁷Jaskaken jancha
kayabi man ninkajaidakubainaya
čpadankin tsuabun ja jancha chanima
man chibanyamanunbun matu
nemakubainkanimenkain? ⁸Jabun matu
padainbun jatun yusianan, Diosunamaki.
Diosun matu katunitun jaska jancha
matu yusinsmaki. ⁹Jakia misi wakin
jawen xaxa wati eskadabes kapan aka
xaxai keskai tsuabunda chani jancha

eskadabes shinankin chibankin ja kachu chani jancha midima chibankankanikiki, Jesúskidi ana shinanmadan.¹⁰ Jaska yunukin en matu kenexunai uintan jabiaskadi man ikunwandiakubainxanai Dios en ikunwaiin. Jamen tsuabuda mapuxun matu shinan betsa wamakin jabuan matu itimaska waibudan, Diosun jatu unantantupixanikiki.

¹¹ Man en betsabu inun en puibuun, junibu dasibibun jau jatun jina kubichi mextenunbun en jatu yusinmiswen taexun ea ichakawama ikeankanaii. Jakia ean yusinkinan, Jesús juni chakabu keska cruzkia mawani en jatu yusianmaken ea dananbumadi ikeankanaii.¹² Jaskaken judiobun beya chibankin juni betsabun jina kubichi matu binun, iwanan, yusin mapuxun matu bikawaibudan, jatun jina jidabi jau mexte keyudianunbunwen.

¹³ En betsabu inun en puibuun, man judiobun beyauma jawama man jiwekubainunbun Diosun matu katuniki. Jaskai jiwekin matun yuda meke chakabuwama nukunabube duanamei jatube nui medabenamékubainkanwen.¹⁴ Ja inun, Diosun jawen nemati inun jawen yunuti Moisin nuku yusinmakin ichawani matu yuinun ninkaidakanwen: “Mimebi min nuimis keskawen juni betsa nuitapai jawaumawen nuikin jatu medabewakubainkanwen”, iwanan, Diosun Moisés kenema nukun xenipabu nuku yusinxuniki.¹⁵ Jakia yuinaka jawen betsabe keyunamekin tenan keyumis keskakin, matudan, ikunwain betsabube man binunkatsis iki yuanganain matudi man bextekei yamatidubuki. Pe mekekin uindakubainkanwen.

Diosun Yushin Pepatun nuku mekekubainmiskiaki, na janchadan

¹⁶ Eska en matu yusinmis ana matu yuinun ninkakanwen. Jawada Diosun

Yushin Pepatun matu yusian ninkatan jaskai besti pepai jiwekubainkanwen. Jamen jaska shinan chakakin matun yudan jaska bechipaiai matu amanun, iwanan, yunuaiwen matumebi chakabukin shinanyamakubainkanwen.¹⁷ Jakia jawada chakabu man bechipaiai Diosun Yushin Pepatun dananmiski.

Jaska inun, jawada jawen Yushin Pepatun bechipaiai chakabundi danandiamiski. Ja dabe binunananinbun matudi pepapaikin jadatuda man jeneama man kanemiski, ibubisdan.¹⁸ Jakia Diosun Yushin Pepatun besti ma matu mekeaya Moisin yunuti inun jawen nematiwen Diosun matu ana jawen mekeamaki.

¹⁹ Jaska inun, jexe chakabu banabu chakabu jukunmis keskai tsuabuda chakabun jatu mekea jabun akin xabakabi chakabuwakubainaibu jatu uintidubuki, jatun kemu chakabuwen ainbuabube inun junibube chutanamekinan, atimapta betsa betsapa beya wakinan.²⁰ Jaska inun, yushin chakabu kenwankin jawen kushipawen daunanankinan, yudabu janchaibu jatu nemakinan, kunyan ikidan, jawenabuwen nuiamadan, jawada betsa jayawen taexun jatu binunkatsis ikin danankinan, yuda betsabuki jawaida sinatakinan, jatuki ja ikin jatu sa akin keyukinan, ibubis jawada pepa bikin shinan betsa betsapa wai jiweabuki.²¹ Jaska inun, jawada tsuada betsa jaya binun, iwanan, jawen kemuidan, beyuskin nuxuti paepa aki paeinan, pikejaida bestinun ika yushin betsa kenwain nawakin jamapai chakabu betsa betsapa wamisbu janu Jesús juaitian ja yuda jaskabu jabe buama ixankanikiki. Jaskaken bebunkidi badi betsation en matu yusinkin yuima: “Jamapai chakabu betsa betsapa akaibu dunkekubainkanwen”, iwanan, jabiaskadi en ana matu yunuaii.

²²Jamen betsadan, jexe pepa banabu pepa jukunmis keskai tsuabuda Diosun Yushin Pepatun mekexun amakin jatu pe jiwemabainaidan, eska xabakabi jatu anua taxnimiski, bechipainamei jawenabuwen nuidan, benimakin Dios kenwainan, unanuma jiwea tsuki sinatamadan, jin jin ikama jawada teneamadan, jatu chikishwabu kunyan akamadan, jatu duawaidan, yaushiamma jawada pepa jatu inankubainidan, jawada yubakaxun kaneama akidan, ²³babutan janchaisma inun xechakaismadan, jamebi jawen yuda pemekemisdan. Man jaskakunkainaiwen taexun Moisin yusianwen tsuan matu jawa nematidubumaki. ²⁴Jakia Jesucristo cruzki mastabu mawani keska wakin nun Jesús ikunwainbu nukun chakabu ichawatan Jesúsbe cruzki nuku mastaxunibu keskaki, ana chakabu nun meyamanunan. ²⁵Jaska inun, natian Diosun Yushin Pepatun nuku jiwemaiwen taexun jawada ja bestitun nuku yunukin amai ninkatan jiwekubainankanwen.

²⁶Jaskaken nukubudan, ibubis keanma betsa binunkatsis ikama jawada yuda betsan bimiswen kemuama inun jawen nuiama jiwekubainankanwen.

Medabenankunkaintikiaki, na janchadan

6 ¹En betsabu inun en puibuun, nukunabun jamapai chakabuwakin kaneabi uintan matun man ikunwainwen taexun pewakin jatu medabewakin jancha pepawen unanxubida jatu yusinkubainkanwen. Jakia matundi chakabuwakin man kaneyamanunbun, Diosun Yushin Pepatun matu mekeaya ibubis mekediakubainkanwen. ²Jaska inun, matunabun xankama iabidanaibu man jatu medabewamis keska wakin tsuabunda jawada bika teneaibu

inun tsuabunda kaneabi jatu medabewadiakubainkanwen. Jatu jaska wai jaska Criston nuku yusinkubaini keska axunkin jawen jancha man menexunxanaii.

³Jaskaken tsuanda jatu medabewamis shinain jawen pepakidi janchamisbudan, kanei kein ibubis padanananmisbuki.

⁴Jakia jatiditun kenkin kanekatsi ikama pepa akubainmis unankin yuikin: “En pepaki”, iwanan, yuda betsa binumanun ixun shinantimaki. ⁵Jakia tsuanda jabun bika betsa betsapa man tenebiaidan, jas shinanma tenekubainkanwen. Jabiaskas nun jaya Diosun unainkiki.

⁶Jaska inun, tsuabunda matun yusinan Diosun jancha matu yusiainbu man jabu ninkaibun matun jawada man jaya, piti inun mabu inun peidan, ja paxkatan matun yusinan juni jatu inankubainkanwen, medabewakinan.

⁷Jaskaken chanima jancha matu yuinun ninkaidakanwen. Jamapai wakin Dios nun padantidumaki.

Jawada nun amiswen taexun Diosun kaneama nuku kupixanikiki.

⁸Tsuabunda ibubis chakabu shinankin kanemisbu Jesús ana juaitian Diosun kupikin mawahachakamakin jatu isin tenemajaidaxanikiki. Jakia tsuabunda Diosun Yushin Pepa ninkakin kanebiatian jawen yusian chibankin jeneabumaken Jesús ana juaitian Diosun jatu jiwekuinmaxanikiki, ikibi imakanin. ⁹Jaskaken pepakunkainkin jeneyamanankanwen. Jatiada Diosun janu kupaitian medabenankin pepawakubainkin nun jeneamaken Diosun duawakin pepawendi nuku kupixanikiki. ¹⁰Jaskawan taexun jawada nun jayawen dasibi nukubetan ikunwainbu nuitapaibu jatu medabewakubainankanwen, ja kachu betsabudi ikunwandiabuma jatu medabewadiakinan.

**Jawen jenekin jancha jatu kenekin
keyuxunikiaki, na janchadan**

¹¹Jawen keneti mebintan ibubis matu kenexunkin kene ewapabuwendi en akai uinkanwen.

¹²Ji cruzkia mawakin nukun chakabu Criston buaniki jaska jadi janchakatsi ikama ja yusinanain padananainbun jau judiobun jatu dakewakin danankin jatu bika tenemayamanunbun ixun jau jatukidi pe shinanunbun, iwanan, ninkamas matudi jina kubichi mextekatsis ikanikiki. Jatu uindakanwen.

¹³Jaska inun, Moisin nemati inun jawen yunuti jabun chibankin keyuamabia matun jina kubichi ninkamas matu bitan matuwen taea besti ibubis kenkatsis ikanikiki. ¹⁴⁻¹⁵Janua tsuabunda jau Diosun ea duawanun, iwanan, jatun jina kubichi mextekinan jamen akanikiki. Jaska inun, tsuabunda mexteaman jamendi ikanikiki. Jakia nukudan, Dios duawanun ika shinan betsa watan besti Dios nun benimawakubainaii.

Jesús ea mawaxuniwen taexun shinan benawatan: “Mabu ichapa besti binun”, iwanan, ana en shinanmaken chakabun ea ana achiamadiki. Jaskaken keanma nukun Xanen Ibu Jesucristo ji cruzkia mawaxun jawada ea axunikidi besti yuikubainkin Dios en kenwaiin. En jawauma iniwen taea en jawa kentidumaki. Jakia Jesúswen taea besti en kentiduki. ¹⁶Jaska en matu yuiai keska shinan betsa watan Jesús besti ikunwain man jawen dasibi jiweaibu chanima man Diosunabu kayabiki. Janua Dios matuwen nuikin jau unanuma matu jiwemadiakubainunwen.

¹⁷Jesúski dasinxun jakidi en yusinkubainaya ea ichakawakin detekin ea baka kextuwa akeakenibuwen taexun en yusian ea yuankin ana ea bikawayamakanwen. ¹⁸En betsabu inun en puibuun, nukun Xanen Ibu Jesucriston jau matu duawakubainunwen.

Jatiski, en janchadan.

Pablo

ÉFESO ANUABU PABLON JATU KENE BUMANIKIAKI

EFESIOS

Pablón jatukidi shinanikiaki, na janchadan

1 ¹Ea en Pabloden, Diosun jawen shinanen Jesucriston jawen kushipaya ea wakin ea katuniwen taexun tsuabuda Éfeso maewan anuabu Diosun jawenabu medibi matu wani man jabun ikunwain Jesucristobe ketaxamei man jaki dasia shinankin en jancha en matu bumai uindakanwen. ²Nukun Epa Dios inun nukun Xanen Ibu Jesucriston jau matu unanuma jiwemakin pewakin duawapakekubainunbunwen.

Diosun Jesúswen nuku duawakubainikiaki, na janchadan

³Nukun Xanen Ibu Jesucriston Epa Dios kenwankubainankanwen, Diosun bake Cristo nun ikunwainbuwen taexun naiudixun jawen pepawen nuku manakukin Diosun jawen bakewen jamapai tibi pepa nun uiain inun nun uianma jawen shinan chankanmati yushin nuku inankubainaiwen taexunan. ⁴Diosun Cristowen taexun nuku katununbadikatsi mai damiwadiama jaska shinaniki. Jaskaken jawen besuudi nun chakabuma pe besti nia nuku uinunbadikatsi iniki. Nuku bechipai nukuwen nuikin ⁵nuku mebikinanxun jawenabu nuku waxanun, iwanan, bebunkidi Jesucristowen jawen bakebu

nuku wakatsi jawen duapawen nuku katuniki, jawen shinan nuku inan nun ikunwanxanunbunan. ⁶Jaska nuku wakinan, Dios duapajaida nun jawen kenwanpakexanunbun nuku jaska waniki, jawen bake bechipainiwen nukudi jawen duawanun ixunan. ⁷Jaskaken Jesús mawakin jawen jimi jabaniwen taexun Dios nuku daewaxunkin nukun chakabu ana shinanma buaniki, jawen shinan duapa nun jaya tsuan bextetiduma jawen taexun nuku mekekinan. ⁸Diosun nuku jaska wakinan, dasibi binuatun nuku unanepa wakin jaska nuku pe ninkanika wakin jawa yaushiamma Diosun nuku axuniki. ⁹Cristowen nukun chakabu buakatsi badi ichapa jawen shinan Diosun junenixun jawen duapawen ma xabakabi nuku taxnimaxuniki, nuku unanmakinan. ¹⁰Diosun janu menenunbadikatsi jaska bebunkidi yubakani kaneama aniki. Jaskawen taexun Diosun Cristo xanen ibuwani jamekemakin keyuxun yunumakatsi dasibi nai anua inun mai anua jaki dasiwanan tsumamaxanikiki, Diosun jatu ichawanunbadiaitianan.

¹¹Jaska wanunbadikatsi Diosun bebunkidi Cristowen nun judiobu dukun nuku katuniki, jaska Diosun jamebi

shinain keskawen nuku duawayanun nun jawenabu ipakexanunbunan.¹² Diosun nuku dukun katukinan, ja dukun nukun shinanwen Cristo nun manaxanunbun nukukidi shinanmati waniki, jaskawen taexun dasibibun jawen kushipa pepa nun kenwankubainxanunbunan.¹³ Cristowen taea man judiobuma dikabitun jawen jancha chanima Diosun bake Jesús mekenankidi kakape ninkatan ikunwainbu jawen nuku tibi unanti wati yubanixun jawen Yushin Pepa nuku inantan ja dabe jawenabu nuku inun matu wadianiki.¹⁴ Diosun jawen Yushin Pepa matu inankin jaska bebunkidi matu yubakin nai anu jabe matu jiwemakatsi matuki tanani jawen unanti man ma jayaki, jawen Yushin Pepadan. Jaskaken jawatianda nuku menexunkin jawenabu nuku wanixun nuku xabakabi bepenxun uinmaxanaiwen taexun dasibibun Diosun kushipa pepa kenwankubainankanwen.

Jau Dios unanjaidanunbun
ikunwainbukidi Diosun kushipa Pablo

jatu yukaxuniaki, na janchadan

¹⁵ Jaskaken nukun Xanen Ibu Jesús man ikunwain inun man dasibi Jesúsunabu medibibu man jawenabu man nuinameaibu ean jaska en matukidi shinaiin.¹⁶ Jawa matukidi jakimama Dios dayuikin matu yukaxunkin jeneama matuwen taexun Dios en kenwankubainmiski.¹⁷ Jaska inun, nukun Xanen Ibu Jesucriston Epa Dios nun kenwanmis en matu yukaxunmiski, jau jawen Yushinin ana matu ninkamakin unanepawakin matu medanxun jau chanima kayabi Dios matu unanjaidamanunan.¹⁸ Dios matu yukaxunkinan, Diosun jau matun shinan junemawatan xabakabi ninkamakin manakamanun inun, jau

tsuabuda jawenabu kayabi katutan jawen pepawen duajaidawakin matu unanmaxanun en matu yukaxunmiski.¹⁹ Ja dikabi Dios matu yukaxunkin jaska jawen kushipa binu keyua keyuisma nun ikunwainbu nuku medabewamis man unanunbun Dios en matu yukaxundiakubainaii. Ja kushipa Dios jamebi jayadan, jaska dasibi watidu jaya nuku unanmakin²⁰ Cristo mawabiaken Dios kushipajaidatun ana bestenwantan nai anu jawen yusiudi tsamaniki.²¹ Jawen bake kushipajaida ja kaya watan januxun xanen ibu kushipabu inun bexmasbu dasibi maemamatian, na jabiatian inun betsation idiamadan, dasibibu Diosun Jesús jawen kushipawen jatu²² babu watan mekemaniki, jamapai betsaa betsapadan. Januxun Diosun Cristo ja ikunwainbu jawen xanen ibujaida jatu waxuniki, ja jatun buxka wakinan.²³ Nun Cristo ikunwainbu dasibidan, nun Criston yudaki. Jawada nuku medabewatidu nun yuka jawa yaushiamma nuku inanmiski, jamapai shadabu dasibi tsumakin mekexunan.

**Diosun Cristowen nuku jawenabu
wamiskiaki, na janchadan**

2 ¹Uatian matu jiweadan, chakabu betsa betsapa aki Diosuma paxka mawawen datei man jiwenibuki,²na mai anuxun yuda chakabubun akai chibain yushin chakabu xanen ibun xaba natukan anu nixun jawen shinanen jatu yunuaitun jabun benimawai keskai shinankin Dios ninkakin chibannmadan.³ Jaskawen taea uatian nukubu nun jiwea jabiaskasdi nun iyunibuki, nukun shinanen chakabu bechipaikin chibain jiwea kemu pae tibi nukun yudan yunuai shinain ja axunkin meneidan. Jaskawen taea jawen nuiti nukukidi nun jayamaken chanima Diosun nuku kuptidu nun inibuki,

betsabun ikunwanma ikaibu keskaidan.

⁴Jakia Dios nui jeneisma nukuwen nuichakayamakin nuku duajaidawakin ⁵nukun chakabun nuku bexea nun mawa keskabiaken Cristo Diosun yunua juni mawa ana bestenwantan jawen taexun nuku jiwea inaniki. Jawen pepawen taexun Diosun matun chakabu buaniken januxun matun man ma mekeia biaki. ⁶Jaskakinan, nun Jesucristo ikunwankin chibain ana mawabu keskama jaki jabe dasia nun ma besteni keska mai anu nun jiweyuabu nai anu ja dapi nun ma tsaua keskabuki. ⁷Jaska wanunbadikatsi jawen pepa nuku unanmakatsi ikinan, Jesucristowen taea nukuwen nui kai nuku axuniki. ⁸Jiwekuan bikinan, nun jawawen ibubis nukun kupiti bi paxatidumabiaken Jesús nuku mawaxuni nun ja ikunwankubainaiwen taexun Dios pepajaidatun nuku duawakin nuku inani ikunwain nun ma mekeaki. ⁹Jaska nuku waya jawada pepa tibi aki nun imiswen ja shinain nun kentidumaki. ¹⁰Diosun jaska nukukidi shinankin jatun nuku damiwakinan, jawen bake Jesucristoki dasitan jawenabun jawen daya pepa inun jawen baii pepa chibankin axuin nun jiweyukubainxanunbun Diosun bebunkidi nuku katukin pewaniki.

Jesúsunan, yuda xukua bestichai wanun ika junikiaki, na janchadan

¹¹Jaskaken man judiobuma ja judiobun jatun jina kubichi mextemisbu matukidi janchakin: “Dios yubakani jayama jabun jatun jina kubichi mexteabumadan, nukunabumaki”, iki ibubiskidi janchakin: “Diosun yubani chibankin nukun jina kubichi nun mextemis nun Diosunabuki”, iki janchadiakanikiki.

¹²Uatian matu jiweadan, Cristouma inun, Israelbube danananain inun, jawa Diosun jatu yubakin matu yubama iniki. Jaska man jiwea iyuniki,

shinankanwen. Jaskawen taea Dios unanma inun jawa manakati pepa jayama na mai anu man jiwepauniki.

¹³Uatian Dioski man kematiduma iniki. Jakia natian Jesucristo mawakin jawen jimi jabawaniwen natian chai man ibiani man ma ja dapiki. ¹⁴Cristodan, ja besti nukun unanuma jiwemanikaki. Ja Cristonan, nun judiobu inun man judiobuma jabias jawenabu wakatsi ikin jaskawen taea nun danananain paxka jiwemisbu ja kene Templo anua jawen kenekin kebenibu keska jawen yudawen ja kene kebenibu keska yamawakin ana shinantima waniki, nun ana sinatana meyamaxanunbunan. ¹⁵Diosun Moisés yunua jawen jancha kenekin jawen yunuti inun jawen nemati jaska chibain nun danananandabei jiwxun shinain nun ibiakubainmisbu ana nuku jaska jiwemakatsi ikama natian yuda xuku dabe wama jawenabu bestichai keska nuku waniki, yuda bena nuku wakinan, nun judiobu inun man judiobumadan. Jaska wakin nuku unanuma jiweiwaniki.

¹⁶Cristo jamebi jaska nuku dasi wakatsi meneidan, nun ja xuku dabe sinatai nun danananandabei jiwmis Cristo cruzkia mawakin Dios nukuki sinatai nuku ja dabe daewaxuniki, nun judiobu inun man judiobumadan. Nuku jaska wakin nuku yuda bestichai keska waniki.

¹⁷Criston jawen kaka pepa bei jukinan, unanumati beniki, man judiobuma man chajaida Diosuma jiweabukidi inun nun judiobun Dioskidi chaima unanbiakin nun ikunwainsma nuku yusin pewakin medabewaidan. ¹⁸Natian Cristowen taexun judiobu inun judiobumandi jabias Yushin Pepawen Dios beyawai nun jaki kematidubuki. ¹⁹Jaska inun, uatian Dioskidi unanma jadidi man shinanma ibiani natian jaska Diosun nuku yubani ikunwain nun jayabu matubudi man Diosbe jaibunametidubuki, jaska

judiobun Jesús ikunwain keskai man ma Diosun enabudiki.²⁰ Jaskaken man ikunwainbu dasibidan, man mishki jiwe keskabuki. Jabu dukuntun mishki jiwe wakatsi bepxukin buyamisbu keskadan, Jesúsun kushipayabu inun jawen jancha yuixunikabun yusinkin Jesucristokidi besti akaibu chanima Cristo jamebi jawen mestenwanti kayabiki, mishki ewapa madatanxun tsaminkin mestenwanmisbu keskadan.²¹ Jabu dasibitun nun Cristo ikunwainbudan, mishki jiwe wakin benibainmisbu keskaki. Mishki tibi tsamabainmisbu keska wakin nukun Xanen Ibuki yuda betsa betsapabube jusia akeakekainkin Templo medibi nun jiwe wa akeakekanaii.²² Ja dikabi matudan, Diosun Yushin Pepa man jaya Cristokidi dasiadan, man jawen kenwanti Templo keska Dios matube jiweikiki.

Diosun jawen yubaka pepa juneni Pablon jatu xabakabi yuinikiaki, na janchadan

3 ¹Jesúsun ea yunua man judiobuma Jesucristokidi en matu yusianyan matuwen taexun en jawamabiaken nenu ea nichinmaxun mekeyuabuki.² Jakia Dios matuwen nuikin jawen kakape ea matu yusinmaimadan, jaskakidi en ikaidan, man daka unain.³ Jaskaken jawen shinan junea Jesucristokidi ea xabakabi unanmani eskadabes en dama matu kenexunxu⁴ uinkin jawada Diosun shinan junea Cristokidi en ikai shinain: “Chanimaki”, man itidubuki.⁵ Uatian nun jawa unanma inibuki. Jakia natian Jesúsun kushipaya medibibu inun jawen jancha yuixunikabu jabu jawen Yushin Pepawen Diosun xabakabi ma jatu unanmayamaki.⁶ Uatian Dios yubakakin junenidan, xabakabi matu yuinun ninkakanwen. Yudabu betsa betsapa tsuabunda Jesucristokidi kakape ninkakin ikunwainbu Diosun

jiwekuian jatu inankatsi ma jatu kenaikiki, jabias yuda inun jabias yubani Israelbube jawenabu axanai keska wakinan.⁷ Ja jaska waniwen taea Dios duapa ewen nuikin jawen kaka pepa en yusinkubaunun ea yununiki, jaska wakin jawen kushipajaida ea uinmakinan.

⁸ Jamen en ikaidan, Cristo chibainbu medanua en bexmasjaida jawamabiaken jaskadaki watan Diosun ea benimawakin duawakin jau jawen bake Cristokidi jawen pepa betsa betsapa jayawen nuku pejaida mekekubaintidu matu judiobumaki en chanikunkainxanun ea katutan nichiniki.⁹ Dios dasibi damiwanitun jawen shinan medibi badi ichapa junenitun en matu dasibi unanmanun jaska xabakabi wakatsis ikin Diosun matu anu ea yununiki.¹⁰ Jau jaska Dios besti unanepatun unan keyuai yushin kushipabu inun nai tsumabu nai anuxun jaska Diosun juneni natian juni chakabubun jawen bake ikunwainbun Diosun jatu unanmakin jatu binumaikiki.¹¹ Januxun mai damiwadiama Dios ikibi ini yubakani anunbadiai akinan, nukun Xanen Ibu Jesucristowen nuku axuniki.¹² Criston nuku jaska waxuniken jawa ana dateama jaki chiti itan ikunwain kematan nun yukatidubuki.¹³ Jaskaken kakape en yusinkubaunmiswen taexun ea bichiabu matu medabewanun ika matuwen taea nuitapai en bika teneaii. Jakia ekidi shinain punu nukama benima bestikubainkanwen, ewen taexun Diosun matu duawaiwen taeadan.

**Cristo ikunwainbu jau
chintunyamanunbun Pablon Dios jatu
yukaxunkubainikiaki, na janchadan**

¹⁴ Jaskawen taea man judiobumakidi nukun Epa Dios bebun danti itan en matu kushipa yukaxunmiski,¹⁵ jatun dasibi jawenabu nai anua inun mai anua ma jatun kena jaya mekeadian.¹⁶ Dios

matu yukaxunkinan, jau jawen shinan ewapa keyuisma matu anu yunukin jawen Yushin Pepawen matu kushipa wakin jau matu mestenwanmakubainun en matu axunkubainmiski.¹⁷ Ja dikabi Cristo matube jiwea man jayadan, jawen nui kayabiwen matu mestenwanma man jawen ikunwainan, ja matun juinti medan shinankin jau man chibankubainun bun en matu yukaxundiamiski.¹⁸ Eskaki, matu yuinun ninkakanwen, Criston nui kayabidan. Jaxpajaida inun, chaipajaida inun, keyatapajaida inun, uke medan bismajaida keska tibi Criston nui man tapintidubuki, man ja ikunwainbunan.¹⁹ Jaska jawen nui man unainan, pexeishta besti jawen nui unankin jaska jawen nui betsa betsapa mexti akin man jawa tanatidubumaki. Diosun jawen kushipa pepa jaska tsuan bikin nun keyutidubumakidi man unanumbun en matu yukaxundiamiski.²⁰ Jaska inun, jamapai nun yukamis inun jamapai betsa betsapa nun shinandiamma inun nun yukadiama jawen kushipajaidawen Diosun nuku axuntiduwen taexun niti ikama kenwanankanwen.²¹ Jesucristo nun chibainbu ikunwain betسابetan Dios kenwakin jeneama duawakubainankanwen, niti ikamadan. Jaskakidan.

**Jesúsunabus mekei putanametimakidi
jatu yusinikiaki, na janchadan**

4 ¹Nenu eska en bika tenei jiweyxun meaidan, nukun Xanen Ibun ea yununi en akubainaiwen taexun ea achitan ea mekeimaxun ea jeneabumaken jau man ikunwainbu Diosun matu kenani jiwei pepai jaskakin man unankubainun bun en matu yunuai shinaindakubainkanwen.² Eskaidan, bebukaini keanma betsa binuanma inun, duapai betsbu bechipai

inun, jin jin ikin jawada bebunkidi anun ika jawaida sinama ikunwain betsabube nui uinanan tenexun uindakubainkanwen.³ Ja Yushin Pepatun matu dasi waiwen taea unanuma jiwei ikunwain dasibibube putanameama jaskas jiwekubainkanwen.⁴ Matudan, jabias yuda matu wakatsis ikin Diosun matu kenanixun jabias Yushin Pepa matu inantan jawen kushipawen jabias jiwekuian matu manakamaikiki, Jesús man ikunwainbuden.⁵ Jaskawen taea nun Xanen Ibu bestichai jayaki. Ja inun, ja besti nun ikunwain inun jawen besti shinan betsatan yuda betsbu unanti wamanun ika man nashia akeakemisbuki.⁶ Ja dikabi Dios bestichaidan, dasibi ikunwainbun Epaki. Dasibi jawenabu xanen ibuxunkin jawen kushipa dasibi matu uinmakubainikiki.

⁷Januxun nuku tibi duawakin jawen kushipa nun jayanun nuku inankatsis ikin Criston nuku tibi bechipaikin inanpakeikiki, ja kushipawen nun dayanumbunan.⁸ Jaska Jesús xanen ibukin jaki sinataibu binutan jawenabu pepa manakumiskidi Diosun jancha Davidin keneni yuikin:

“Jabu binukin maematan iyuniki. Jakia jabun chibanmisbu pepabu pepawen jatu manakumiski”, iniki.⁹ Na inakainikidi kenekin jaskadadakidi Davidin shinankin yuini matu yuinun ninkakanwen. Mesías Diosbe nai anu jiwea mai anu ja dukun butui taeniki.¹⁰ Ja dukun jabias butua ana jawendi inakaini nenuma nai binutan jaska juyama ana jawendi jawen kushipa jaki dasi keyuniki.¹¹ Ja jaska jamebi juyamaxun betsbu jawen kushipayabu jatu wakin betsbu jawen jancha yuixunikabu jatu wakin betsbu jakidi kakape chanikubaunikabu jatu wakin betsbu yusinanain mekenikabu jatu watan jatu yunu akeakebainiki.

¹²Jatu jaska wabainkin jawenabun jawen daya tibi jau axununbun jatu pewatan jatu yunubainiki, jau kushipanamei jaska Diosun bechipaiai jakidi ana tapin Criston yudai nun mestenepakubainunbunan. ¹³Jaskakunkaini dasibi putanameama ikunwainbuki dasitan Diosun bakekidi tapinkubainkin Cristo ikunjaidawai jawa shinan betsa wama Cristokidi unanepai dasibibu nun itidubuki. ¹⁴Jaskaken ana bake mishtinbun shinain keska ana jiweyamakubainankanwen. Eskaki, matu yuinun ninkakanwen. Juni betsa betsapabun bake mishtinbu bepadanabu jawaida ninkamisbuki. Nuku jabiaskadi wakin yuda betsa padananankin Diosun yusian kayabi chibanma yusian bena watan matu yusiaiinbu jatu ninkakin jatun jancha ikunwankin bake mishtinbun jamapai tibi chibain imis keskai ana iyamakubainankanwen. ¹⁵Jakia bechipainamekin jancha kayabi yui nukun Xanen Ibu Cristo keskai ewai jiweyukubainankanwen, Cristo nukun buxkaken jaki dasi tsamitan nun jawen yuda ewawaidan. ¹⁶Janua Cristo nukun Xanen Ibuwen taea dasibi ikunwainbnu nuku dasiwa nuinamekin, ikunwainbnu tibitun daya betsa Dios axuainbnu inun ikunwainbnu dasibi medabewakin Cristowen taexun nukunabu dasibi man jatu kushipa wakubainnai, nukun pabu tibi ewai nun kushipamis keskakinan.

**Jesús ikunwainbuden, jiwea bena
jayabukiaki, na janchadan**

¹⁷Nukun Xanen Ibun kenawen eska en matu yuikin yunuai ea ninkakanwen. Jabun Dios unanma benuabu ikaibu keskai ana jiweyamakanwen, jabun shinan chakabu benuawen jaska jiwea unanma jamakidi kane kanekanikikidan. ¹⁸Jabu meshu medan nia keskaxun shinan chakakin pe shinantidubuma

unainsmapabuki, jabudan, jawa benima pae Dios anua juaiwen benimama jaska jawa tapianma unainsmapa besti jabu juinti kushibudan. ¹⁹Ana jawa dakeama chakabu jamapai atimapu tibi jawen yuda inankin jawen kemujaidai juinti kushi jiweabuki, tsua ibubis e ikamadan. ²⁰Jakia matudan, Mesias Cristo ikunwankinan, jabu jiwemisbu keskakin man tapianma ini. ²¹Jaskawen taexun bebunkidi Diosun Katuakidi jawen kakape en matu yusinma jaskai ja jiwenikidi tapinkin man ninkaimadan, chanima Jesús anua ja besti yui kayaki. ²²Jaskawen taexun matubunan, matun jiwea xeni xabakabi yuikin chitedikanwen. Jaska uatian chakabui jiwekunkainkin chakabu betsa betsapawen kemukin ibubis padananain man ikunkainaidan, putai bextedikanwen. ²³Matun shinan bena watan jaska Diosun bechipaikin matu katumai besti shinankanwen. ²⁴Matun jiwea bena tadi bena sawea keskakin matun yushin bena wakin Diosun matu damiwani jawen Yushin keskadikanwen. Jaska chakabu paxkatan medibikunkaini jiwea pepaswen chanima jancha besti chibankubainxanaii.

**Jesús ikunwan kayabidan,
eskai mestentikidi Pablo
yusiniaki, na janchadan**

²⁵Eskatianan, nun Jesús ikunwainbuden, nun yuda bestichai keskaki. Jaskawen taea jawada yui man janchaidan, ana chani chakai padanananma matunabube xabakabi yuinamekubainkanwen.

²⁶Ja inun, matudan, tsuada man sinatamisdan, ana jawen chakabuyamakanwen. Tsukida sinatabiatan ana manai jatixuinda badi chai tanama uxadiama daenamekubainkanwen. ²⁷Man

jaskabumaken Satanásan matu padankin kanematiduki.

²⁸Ja inun, metimai man yumetsumisbudan, janun matun yumetsu jenetan shinan betsa watan janun matun mekenen daya shinanbaun jamapai tibi dayakin pawadikanwen. Januxun ja dabukun paxkaxun yuda nuitapaibu man jatu inantidubuki.

²⁹Jaska inun, ana jancha chakabu yuiama jancha pepawen besti janchakin matunabu ana kushipa wakin ikunjaidawamakin medabewakin jatu benimawakubainkanwen, jabun matu ninkaibudan. ³⁰Jaskaken jabe matu jiwemakatsis ikin Jamebi Diosun nai anu matu iyuxanun, iwanan, jawenabu wakin matu unanti wakatsi matu inani jawen Yushin Pepa ma jayadan, ana chakabukin jawen Yushin Pepa punu nukawayamakubainkanwen.

³¹Jaska inun, jadakidida matu chakabuwabu jas shinain man amua nimis, inun man pubenjaidamis inun, man sinatamis inun, man kunyan ichakayamamis inun, xeti ikama man ja imis inun, jamapai chakabu betsa betsapa matun jaxpa anua kainmisdan, matubunan, puta keyudikanwen. ³²Jakia matudan, man pepakatsis ikaidan, matunabuwen nui bestikubainkanwen. Jawada man jatube chakabumis daenametan duanameidan, matun chakabu jakimadabetan ana shinanma pepakubainkanwen, jaska Criston matun chakabu buaniken Diosun ana shinainsma keskaidan.

5 ¹Matubu man Diosun bakebu kayabi pepabunan, jaska Diosun bechipaiai jaska besti chibankin mawakubainkanwen. ²Jaska inun, Criston nuku bechipaikin Dios duawanun ika Diosun kupiti nuku bixuin mawai ininti jawendua keska puekin Dios benimawaniken jaska

Cristo nuku ixuni keskadiakin nukubetan ikunwainbu dasibube nui bechipainamei jiwekubainkanwen.

³Januxun ikunwanbuman jatu ati wakin jawa chakabuki dakeama yuikin jamapaiwen kemujaidakubaini jiwemisbuki. Jakia matubudan, ana jatu keska jiweama jaska ikunwain jiwti betsajaida jiwekin chutanamebaunmisbuki ana shinain janchama inun chakabu atimapati tibi ana shinain janchamadi inun kemu paekidi ana shinain janchama jaska Diosun jawenabu uinkatsi ikai keska besti chibain janchakubainkanwen.

⁴Ja dikabi nukun kexawen janchaidan, ana dakewati jancha chakabu yuiama inun, jancha jamapaiwen yuiama inun, jancha tsua medabewatimawen ana janchama jaska tibiwen jancha ana kainmama matun kexawenan, Dios besti kenwankubainkanwen. ⁵Ja inun, chanima tsuabuda jaska dakeama jamapai tibile chutanamebaunmisbu inun, jawada atimapati tibi amisbuden, Cristo inun Dios xanen ibuaya jatube jiweitidubumaki. Ja inun, tsuabuda jamapaiwen kemumisdan, dami yushin itsa waxun kenwanmisbu keskawen taea ja jaskamisbu Cristo inun Diosbe jiweitidubumadiki.

Cristo chibainbu ma xabaki pesea keska jiwekunkaintikiaki, na janchadan

⁶Tsuabunda matu bepadankin jamen matu yusinkin padainbudan, jatu ninkayamakanwen.

Tsuabunda Dios ninkama jawa medabewatimakidi yusinmisbuden, Diosun jatu kupichakayamaxanikiki. Uindakubainxankanwen. ⁷Ja inun, jawada chakabuwaiibube ana jatube dasiyamakubainkanwen. ⁸Ja inun, uatianan, nukun Xanen Ibu unankin ikunwandiamma chakabui meshu

medan ika keska man jiwenibuki. Jamen eskatianan, Cristo ikunwain jaki dasitan matun shinan maewatan man betsajaidawa man ma xabaki pesea keska jiweabuki. Jaska man ma tapian shinain pe jiwekubainkanwen.⁹ Ja xabapan nukun shinan betsa wamatan nuku tapinmai tsekekainkin mia imaidan, nuku duapamai inun, nuku kayatapimai inun, nuku chani chakatimawaikiki.¹⁰ Jawada Diosun bechipaiai unantan jeneama axunkin benimawakubainkanwen.¹¹ Tsuabuda meshu medan nia keskaxun chakabu shinantan matu amakatsis ikaibudan, jawa pe jayabumaki. Ana jatuki dasiamma matuin jatu dakewakin xabakan kainma keska wakin xabakabi pepakidi jatu yuikubainkanwen.¹² Jawada chakabujaida june ikaibu xabakabi yui daketiki.¹³ Jatun chakabukidi man jatu unanmaya jawada june chakabu betsa betsapawamisbu dasibubun xabakabi unantidubuki, ana jaska waxun junetimadan.¹⁴ Jaskaken jaska shinan betsa watidubu shinankin Dioskidi nawati yuikin:

“Chakabun matu tsumadan,
mepamadikanwen.
Man mawabiani janun
benidibidankanwen.
Matun chakabu man jeneaya
Mesías Criston jawen chaxawen
matu yusinkin matu
unanmaxanikiki”,

ikaki.

¹⁵ Jaskaken matun jiweadan, uindakanwen. Jawada man akai chibain pe bestikubainkanwen, unainsmapamadan, jakia unanepaidan.¹⁶ Natian chakabu betsa betsapa juaya menan manama matun jiwea pewadikanwen.¹⁷ Jaska inun, ana jawadawen unainsmapama jawada nukun Xanen Ibun matu amakatsis

ikai ninka pewatan jaska shinainkidi tapindikanwen.¹⁸ Jaska inun, man nuxuti pae shadabu beya wanidan, jawen kemui shinan chankain pe mekeama man chakabumisdan, ja jenetan natian Diosun Yushin Pepa bestiwen kemukin nuxukin akawakin mata wakin matun juinti benimai shinan chankankubainkanwen.¹⁹ Eska tibi bestiwen yuikin kenwankubainkanwen. Man jatubetan ikunwainbube Dioskidi nawati tibiwen nukun Xanen Ibu kenwain juinti jidabiwen benimawakubainkanwen.²⁰ Jawada man jaya inun jawada man jayama Epa Diosun dasibi nuku inanmis shinankin yuikin: “Jaska jamapai shadabu min ea inainwen taexun en mia kenwaii”, akubainkanwen, nukun Xanen Ibu Jesucriston kena kushipawen yuikinan.

Jaskai duanamekunkaintikiaki, na janchadan

²¹ Jaska inun, Cristokidi pe shinankin man duawakatsis ikaidan, ikunwainbu betsabube binunanankatsis ikama jatube yununananma ninkakanankubainkanwen.

²² Beneyabuun, matu yununun ninkakanwen. Nukun Xanen Ibun matu yunua ninkaxun man akai keska wakin matun benen matu yunua jabebis yununamei jen iyamama axunkubainkanwen.²³ Jaska inun, Cristo man ikunwainbuden, Cristodan, matun buxkaki. Matudan, man jawen pabuki. Matun buxka matun mekenikaki. Jabiaskadi man ainbu beneyabudan, matun benedan, matun buxkaki, jatun matu mekemisdan.²⁴ Jaskaken nun Cristo ikunwainbun jawen yunua tibi ninkaxun nun amis keska wakin matun benen jamapai mia yunua ninkaxun ainbu tibitun matun benedi ninkasama jau jatu axundiakubainnunbunwen.

²⁵Ainyanbuun, matudi yununun ninkakanwen. Cristo jabun ikunwanxanaibuwen nuikin bechipai jawen jiwea jatu inani keskai matudi matun ainwen nuikin padanma jatu bechipaijaidakubainkanwen. ²⁶Criston nuku jaska wakatsi ikin nun jawen ikunwainbu nuku mawaxunkin jawena medibi chakabuuma nun xunpinunbun jawen kakape nun ikunwainwen taexun nuku nashimamisbuki. ²⁷Cristo jabun nun ikunwainbu pepajaida jawa detsis neama jawa tadi chunpima ana jawa chakabu betsa tibi jayama nukun jiwea xeni jetenan pepa medibi besti jaska jatun besu uinkatsis ikikiki. ²⁸Jabiaskadai jawen bene jawen ainbe ketaxamexun bechipaidan, jawen yuda keskawen taea junibun jatun ainwen jau nuikubainunbunwen. Jaska shinankinan, jatunmebi jatun yudawen nui keskakin jatun ain bechipaikanikiki. ²⁹Tsuabunda jatun yuda dananma pimakin mekemis keska wakin jabiaskadi wakin Criston jawen ikunwainbu mekemiski, ³⁰jawen yudakenan. Nukubudan, ja yudakidan, nun jawen pabu tibiki.

³¹Jaskawen taea jaska juni inun jawen ain yuda bestichai keskatikidi Moisin kenekin yuikin: "Jaskawen taea junin jawen ibubu dapaxkabain jawen ainbe ketaxametan ja dabe jiwei ana yuda dabema yuda bestichai keskatiki", jatu waniki. ³²Ainyain inun beneyai yuda bestichai keska jiweadan, min tapintidudan, bikaki. Jakia jabiaskadai Cristo inun dasibi ja ikunwainbu jaki dasia jabiaskadiki, Cristoki nun jaki dasia nun yuda bestichai keskabudan. ³³Jabiaskadi wakin jaska juni tibitun jawen yuda ibubis mekemis keska wakin jau jawen ain pe mekekin duawakubainunbunwen. Jaska inun, jatun ainin jawen benen yunuaj jau ninkaxunkubainunbunwen.

6 ¹Bakebuun, matu yununun ninkakanwen. Matun ibubu ninkatan jawen yunua

axunkubainkanwen. Jaska wakin nukun Xanen Ibu benimawakin man kaneamaki. ²Ja dukun nuku yubakin Diosun yununidan, eska jayaki: "Matun epa inun matun ewa kenwankin duawakubainkanwen, ³na mai anu benimai badi ichapa pe jiweyukunkainkatsis ikidan", aniki.

⁴Bakeyabuun, matudi yununun ninkakanwen. Matun bakebu tapinmakin jau matuki datei sinatayamanunbun yunuchakayamakin nemajaidayamakanwen. Jakia jiwea tapinmakin Diosun jancha tapinmakin jawen yunuti jancha inun jawen nemati jancha unanmakin pe yusinkin jaska nukun Xanen Ibu bechipaimis keskawen jatu yumewakubainkanwen.

⁵Esclavo dayadubuun, matu yununun ninkakanwen. Matubunan, matun tsuma mai anuabuki datei dayai penun, iwanan, jatu duawakin jaska matu yunua ninkatan chibankubainkanwen. Jaskakinan, Cristo duawakin man akawaii. ⁶Jaskaken matun tsuma pe dayaxunkin duawaidan, jatun bedubi uiain bestiwenma jakia uianmadiken pe dayaxunkubainkanwen, Criston dayadukin jawada jawen Epa Diosun bechipaimis jaska shinain axunkinan. ⁷Jawada daya man akaidan, chikishbetanan akama nukun Xanen Ibu man duawai keska akubainkanwen, yudabu uinmakin axuanmadan.

⁸Tsuabuda esclavo inun esclavoma man dayamiswen taexun jadatuda man pe dayamis inun chikishi man dayamis matu tibi unanxun nukun Xanen Ibu matu manakuxanikiki.

⁹Yununikabuun, matudi yununun ninkakanwen. Jabias Xanen Ibu nai anuatun yuda dasibi unankin yununikabu inun matun tsumabudi jabiaska dabelswen nuikin matu kupimistun xanen ibu inun xanen

ibuma ja dabe jabias senen shinamiski. Jaskaken matun dayadubu pe mekekin ana jatu kunyan akama ana miki jatu datewama pewen besti jatu yunukubainkanwen.

**Ikunwainbu soldadobu keskai
kushipakunkaintikiaki, na janchadan**

¹⁰En betsabu inun en puibuun, nukun Xanen Ibun kushipa paepa man jayadan, jawen kushipai ewakanwen. ¹¹Diosun jawen mia mekeai nemati kushipa bikanwen. Ja jayatan man chintuanmaken diablo Satanásan matu padantidumaki. ¹²Na jaska nun jatube detenameaidan, yudabun kushipawen nun ikai keskamaki. Jakia yushin chakabubu inun jamapai xanen ibu chakabu na mai anua inun manaundi namakixun nuku kexebaunxun yunuaitun nuku achiabube nemai jeen iyamai nun jatube detenamei keskaii. ¹³Januxun romano soldadobukidi matu shinanmanun ninkakanwen. Detenamei bui tsakanamenikabu chintunkatsi ikama jawen meketi mabu kushipa tibi sawe keyutan detenamei bumisbuki. Jaska keskadiai matundi diablo Satanás nemai jeen iyamai unanepakatsi dasibi Diosun kushipa jayai keyutan matu bikawaibutian chintuanma maemai kushipakubainkanwen.

¹⁴Janua jancha chanima besti yuikin jawa dateama mestenwankanwen. Jaska wai nun pe jiweabu Diosun nuku mekekubainmiski. ¹⁵Matunan, Diosun jancha kakape unanuma jiwitikidi man yusin bukatsis ikaibudan, bebunkidi matun jiwea pewakubainkanwen. Jaska wakin man ma pewe jaska soldadobu detenamei bunun, iwanan, bebunkidi jawen bichi tae sawemis keska wakin kakape yuibaunkin Dioski sinataibu man maemaetidubuki. ¹⁶Jaska inun, Dios ikunjaidawakubainwen.

Nun jaskawayaya soldadobun jatun ji bexa tuduwen jatun yuda junemis keska wakin Dioski sinataibun jatun chakabuwen nuku binupaiabu nukun nun nematiduki. ¹⁷Diosun nukumekemisdan, soldadobun jawen mane maiti sawea jawen mekemisbu nukudi nun jaska keskaki, Dioski sinataibun jau nuku padanyamanunbunan. Jaska inun, Diosun jancha tapinjaidakubainkanwen. Jawen janchadan, nupe chaipa jawen detenameti keskaki. Jawen Yushin Pepatun nuku medabewaya ja Dioski sinataibu nun jawen nematiduki. ¹⁸Matubunan, Diosun Yushin Pepatun matu shinamaya Diosbe janchakin jatu yukaxunkin jatu ea axunkin jeneyamakubainkanwen. Jaskai jawa punu nukama inun babuama bedu mestenwantan jiwekubainkin ja dikabi Jesús ikunwainbu dasibibu Dios yukaxundiakubainkanwen. ¹⁹Eska en matu yukaii. Jau Diosun ea medabewakin jadi janchati ea inankin inun en jancha ea kushipa waya jaskawen taexun jaska Diosun uatian juneni xabakabi jawen bakekidi en jatukidi chanikunkainun ekididi Dios yukaxunkubainkanwen. ²⁰Jaska inun, Diosun ea katuxun jawen kushipaya janchaxunika ea wani en jawen kakape yusinbaunmiswen taexun jabun nenu ea iweimaxun ea bichikin akawaiambu nenuxun en bika tenebiakin jawa dateama nukun Xanen Ibuwidi janchai en chanikunkainun ea Dios yukaxunkanwen.

**Jawen jenea nuite janchakiaki,
na janchadan**

²¹En jaskadada jau matu anu kaxun ekidi matu unanmai chani kaxanun, iwanan, nukun Xanen Ibuwen taea nukun betsa Tíquicon, ikunwain chintuinsma jabiatundi nukun Xanen

Ibun daya axunkin nuku medabewamis matu anu en nichiaiin.²² Jaskawen taexun jaska matuki chanikin nenu ebe maniabu inun ekidi janchakin jau matu shinan chankanwain kanun nukun jaibu matu anu en nichiaiin.

²³Nukun Epa Dios inun nukun Xanen Ibu Jesucristo man jabun ikunwainbu jaska tibi jabu jaya matu inan

bikubainkanwen, ikunjaidawakinan, ikunwainbu betsabuwen nuikinan, unanuma jiwekunkainkinan.²⁴ Jaska inun, tsuabunda nukun Xanen Ibu Jesucristo bechipaikin betsa waisma jau Dios jatuwen nuikin duawakubainunwen.

Jatiski, en janchadan.

Pablo

FILIPOS ANUABU PABLON JATU KENE BUMANIKIAKI

FILIPENSES

Pablón jatukidi shinanikiaki, na janchadan

1 ¹En Pablo inun Timoteon,
Jesucriston tsumapan, man jabun
Jesucristo ikunwainbu Filipos anuabu
inun, jabun matu mekemisbu inun,
matu medabewamisbu man dasibi
Jesucristoki dasiabu nun matu kene
bumai uindakanwen. ²Nukun Epa Dios
inun nukun Xanen Ibu Jesucriston jau
matu unanuma jiwemakin pewakin matu
duawapakekubainunbunwen.

Pablo ikunwainbuwen nuikin Dios jatu
yukaxunkubainikiaki, na janchadan

³Jawenchains matukidi shinankin
matuwen taexun en Epa Dios en
kenwankubainmiski. ⁴Januxun jabe
janchai benimakin matu dasibikidi en matu
yukaxunkubainmiski. ⁵Diosun kakape
jawen bakekidi matu anu jiki taexun en
matu yusian ninkakin ikunwantan ebetan
chibankin ea medabewanixun jawa
jeneama natian man apakeaii. ⁶Ean en
matukidi shinanan, jaska Diosun jawen
daya matu anuxun taewanixun jaska
bechipaiai keska man ikunwain Jesúsun
matu jiwemakubainkin niti akama matu
pepa wakubainxanikiki, janu Jesucristo
chintunkidananitieran. ⁷Chima ean en
matukidi pe shinainan, matuwen nuikin
en matu bechipajaidaii. Matudi dasibi

man ewen nuiaya Diosun matuwen ea
duawaikiki. Natian ea bichimabu keska nia
xanen ibubu bebun jawa jatun yunutikidi en
janchaisma eska besti yui en chakabuisma
pekidi janchai Diosun kakape Jesucristokidi
jatu unanmakin jakidi xabakabi en
chanikunkainaya man ea medabewai
ebetan teneai keskakubainkanaii. ⁸Jaska
inun, matube dasibi jaibunain nun
pekubainibudan, Diosun nuku unainkiki,
Jesucriston nui duapa ea inan en matu
axuniwen taea matukidi en jakimaismaki.
⁹Dios yukakin matu ea axunkinan, jau
jawen nui ichapawen matu ewawakin jau
apakenunwen, jeneamadan. Jaska wakin
Diosun matu unanepa wakin ninkanika
jau matu wakubainun, iwanan, en matu
yukaxunmiski, ¹⁰jaska pepa besti bechipaiai
man katukubainunbunan. Jaskai jiwekin
matun jiwea xunpin jawa chakabuma
ewakaini jawa chakabuki juti ika keskama
nukun Xanen Ibu Cristo judiamaken
man pepa jiwekubaintidubuki. ¹¹Ja
dikabi matu man jatu bebxunaibunan,
Jesucristowen taexun jawada pepa man
akai tsuabunda uinkin Epa Dios duawakin
kenwanxankanikiki.

Pablón Jesucriston kakape
yusinkubainikiaki, na janchadan

¹²En betsabu inun en puibuun, en
bika betsabu betsapa teneai anu bebidan

bebidanaibu chanima kayabi jaska yuda betsa betsapabun Diosun kakape Jesucristokidi ninkabidanbidanmisbukidi matu yuinun ninkakanwen.¹³ Jaska Roma xanen ibun jatu binuantun jiwe ewapa jawendua anuabu soldadobun ea mekemisbu inun yuda betsa betsapabun ea uinkin janu ea pewayamabu anuxun Cristokidi kakape en jawen jancha chaniai dasibibun ea ninkamisbuki, ja meketi jiwe anu en jiwe anuxunan.¹⁴ Na ea nenu eska wayamabu ewen dateama ichapabun Cristo ikunwankin jawen kakapewen benimakin dateama junti kushitan nukun Xanen Ibuki chiti itan Diosun kakape jatu yusinkubaunkanikiki.

¹⁵ Juni betsa betsapabu jatun junti pepa jayabu Cristokidi yuda betsabu ikunwanmanun, iwanan, pe yusinkanikiki. Jakia jatiditun ea binunun ika eki sinatai kein paxkatan yusinanandiakanikiki.¹⁶ Chanima nenuxun Diosun bakekidi en pe yuikubainun Diosun ea nenu yunuyamaken jabu ewen nuikin ja Cristokidi daya en jenebidanima jabun ea medabewakin kakape datan akin jeneama yusinbaunkanikiki.¹⁷ Jakia jatiditun akinan, anikabia kenkin mestenwantan akama pepabiakin ea binunun ixun jabun jaska wakin ea ana bika tenemakubainkanikiki.¹⁸ Jaskaibuwen taeadan, eadan, en jatuwen nui en jatuki sinatamaki, shinan pepawen chaniaibu kasmai shinan pe midinwen Cristokidi kakape chaniaibudan. Jaskabaunkin ea benimawakanikiki.

En benima keyudiamadan,¹⁹ man ea Dios dayaxuniwen taea tsuki en dakeamaki, jatun ea mekeawen taeadan. Jaskaken tsuabunda bedubi jawa jakidi dakeama natian en jiweawen inun en mawaxunxanaiwen Cristo kushipajaida ewen dasibibu en

jatu uinmayukatsis ikaii. Jaskawen taexun Jesucriston Yushinin ea medabewakin ea kainmaxanai shinain en benimakunkainaii.²⁰ Jaska inun, Dios dayaxuni tsuki en dakeamaki, jatun ea mekeawen taeadan. Jaskaken tsuabunda bedubi jawa jakidi dakeama natian en jiweawen inun en mawaxunxanaiwen Cristo kushipajaida ewen dasibibu en jatu uinmayukatsis ikaii.²¹ Natian en jiweyuadan, Cristo en jiweyungunkainaii. Jakia jawen taea en mawadan, en nenu jiwe mis binuaki.²² Na en yudawen en jiweyukunkainkinan, jawen dayakin yudabu ichapa en jatu ikunwanmatiduki. Jaskaken ja dabe en katutidumajaidaki.²³ Ean ibubis jaska dabe en katuadan, bikajaidaki. En shinanan, mawatan en Cristobe ma jiwei kai pejaidaki, enadan.²⁴ Jamen betsadan, matu medabewayunun ika en jiweyuadan, peyuaki.²⁵ En jaska matukidi shinainwen taea jaska man Jesucristo chibainkidi matu medabewakin matu benimawakatsi iki en matube ana jiweyui katidu en shinaiin.²⁶ Matu anu ana jaska kainshinxun en matu yusianyan ewen taea benimai man tse ixanaii, Jesucristo kenjaidawaidan.

Jesucristo ikunwain bika tenetikidi Pablón jatu yusinikiaki, na janchadan

²⁷ Natian man jiweaidan, Diosun jawen bakekidi kakape unain jaska jiwekunkaintikidi benai na keska bestiwen jiwekubainkanwen. Jaska en matu uinkatsis ikai inun matu anu en kamaken matukidia matun kaka juai en matukidi ninkakatsis ikaii, jaska man chintuanma inun man ma dasi keyuxun bika tenebiai jeneama matun shinan kushipawen ikunwain man Jesucristo chibainbunan.²⁸ Jabu matuki sinataibuki e iki dateyamakubainkanwen. Jabu matuki jaskabiaibun man pe jiwekin jatu

uinmakubainmiswen taexun Diosun janu xabakabi jatu kupikin jabiatandi matu besti mekexanikiki. Diosun jaska wakin xabakabi jatu unanti wamaxanikiki.
²⁹Diosun jawen pepawen matu kenakin katuxun ikunwanmanidan, ja besti ikunwain pepa bestitimaki. Jabiaskadiai Cristowen bika mei nuitapadiatiki.
³⁰Jaskaken ea inun matudan, nun bika tenekanaii. Jaska uatian en ikai man uinidan, na jabiatandi Cristo dayaxunkin jamapai bika betsa betsapa en tenekubainai man ekidi ninkakubainaii.

**Ikunwainbu shinananain jiwestikidi
jatu yununikiaki, na janchadan**

2 ¹Criston jawen kushipa matu inankinan, jawen shinan chankankainti matu inaniki. Man nui jaya matun betsabu ja shinanwen matu yunua man jatu daewatiduki. Tsuada man Cristoki dasiadan, jabias Yushin man jaya ikunwain betsabuwen jatuya nui man kaxakunkaintidubuki. ²Jaska dasibi binunananma jabiaskas paxkama man jiweadian, jabias nui man jaya inun, jabias Yushin man jaya inun, jabias shinan man jaya ea ninkamakin ea benimawakubainkanwen. ³Na jaska jiwekainkinan, yudabu binunun iki keanma jakia babutan bestibu: “Ea dukun en bebui pepakainaii”, ikin shinanma: “Betsabundi ea maemai en jawamaki”, ikubainkanwen. ⁴Jaska inun, betsadan, jawada man akai inun man biaidan, matunas bestikidi shinankin man amis akama jakia ikunwain betsa xabakabi jatu uinmadiakin jawada akaibu jatu medabewakin axundiakubainkanwen.

**Jesús Dios keskabia jawen tsuma keska
jiwekainikiaki, na janchadan**

⁵Tsuabunda Jesucristokidi jaska man shinainan, jaska Criston shinankubaini keska betsabukidi shinaindakubainkanwen.

⁶ “Cristo Dios itsabia jaskas shinain keanma jiweniki.
⁷ Jawen kushipa bextekedin
jeneyubidan
nuku keskakin nukun yuda bitan na mai anua dasibibu medabewai jabun tsuma ikunkainikiaki.
⁸ Jamebi babutan jawen Epan yunua chibankubaini
mawanun ika ikunkaini cruzki dunua mawaniki.
⁹ Jaskawen taexun Diosun
kenjaidawakin jatu binu
keyumakin
kena kushipa pepa tsua jaska jayama Jesús inaniki,
¹⁰ jau ja Jesúsun kena ninkatan
dasibibu nai anua inun,
mai anua inun, januxun mawabun
yushin manamisbu anuxun
jabun kenwain danti itan
¹¹ dasibibun unankin:
‘Jesucristodan, chanima dasibibun
Xanen Ibu Yavéki’, ikin
Epa Dios kushipa
kenwanxankainiki’.

**Criston nuku jiwea inan jenetimakidi
Pablon yusinikiaki, na janchadan**

¹² En betsabu inun en puibuun, matuwen en nuiaya man en jancha chibanmis jeneama akubainkanwen, en matu uiyanan man amis keska inun, en matu uianma chajaida en jiwebiaken ea ninkakin chibandiakanan. Jawa kaneama uke medan jawada matun jiwea Cristona wamakin man inani Cristoki mesekin jeneama jawen mekepakekanwen. ¹³ Matun jiwea man ma Cristo inaniwen taexun shinan betsawen Diosun matu benimawakin jaska matuwen dayakin jawen shinan pepa taxnimaya jaska bechipaiai keska matu amakin medabewaya xabakabi axunkubainkanwen.

¹⁴Man ma jaskadan, ana tsuabuda nantakeabuki ninkabumabiaken matun jancha jamen ja ikin chakawama inun ana ja idabeama pe jiwekubainkanwen.

¹⁵Man jaskai jiwea matu tibi man chakabuma inun man kaneisma jaska Diosun bakebui ja yuda chakabubu inun atimapabu anua meshu nea keskama man jatube jiweadan, bishin kushipa chaxai jawen unanbainti keskakin ¹⁶matubunan, Diosun kakape jiweakidi jancha jatu unanmakubainkanwen. Man jaskaya ea en matu anu jamen dayai kama iniwen taea ea matuwen kein en tse iki en benimaxanaii, janu Cristo ana juaitianan. ¹⁷En jiwea en matu inani keska wakin en matu ikunwanmaniki. Matundi ikunwankin matun jiwea man Dios inankuinyaiin. Jaskawen taea en jiwea yaushlama mawakinan, jau man ikunwankin jeneyamanun en jiwea Dios en matu inankuinxuntiduki. En matu jaskaxuni en benima paewen dasibi en matu yuiaii. ¹⁸Matudi benimadikanwen, en ikai keska shinain ewen benimaidan.

Filipo anu Timoteo nichinkatsi inikiaki, na janchadan

¹⁹Nukun Xanen Ibuun jaska shinanyan matu anu Timoteo yunukatsi jaska en shinaiin, jau matu ninkatankin matun kaka bexun ea benimawayuxanunan.

²⁰Jaska matukidi en matu shinain keska inun en matuwen nuimis keska tsuan matukidi pe shinanma chanima tsua betsa jayamaki. ²¹Ja betsabun Jesú chibantiai jatunas bestiwen nuikin shinankanikiki, jaska Jesucriston bechipaiai keska akamadan.

²²Timoteo en bake keskai ebe jiwea dayakunkainkin kakape Jesúskidi ebetan yusinkin ea medabewakubainmis jawen jiwea man unaii. ²³Ea jaskada waxanaibu jatun matu unanmai jau ekidi matuki chani kanun ja en

matu anu nichinkatsis ikaii. ²⁴Jaska kasmai ea kayabis kaxun en matu uin katidumenkain ixun jaska nukun Xanen Ibuun shinan besti en manaii, jawaida kanun ixun shinainan.

Filipo anu Epafroditu ja dikabi nichinkatsi inikiaki, na janchadan

²⁵Ja dikabi ja dabe en jatukidi shinainan, nukubetan ikunwain Epafroditon jau ea medabewanun man eanu nichinma ea medabewai ebe dayai bika tenekunkainai Cristokidi kakape yusinmis ana matu anu en nichinyukatsis ikaii.

²⁶Jaska isin teneaikidi man ninkaimabu jawen taea jakidi shinain man jawen punu nukashina jaska shinain matuwendi nui jadi matu jakimamadiki.

²⁷Chanimi ikimaki, isin paepa bitan tenei mawakeanidan. Jakia Dios jawen nuikin ewendi nuidiakin jau ana ea bika betsa tenemayamanun Diosun xuxawaimaki. ²⁸Jaskawen taexun matu anu jawa ana tea wama en matu nichinxunaii, ana matu uinma uin man benimaya ana en matuwen punu nukuyamanunan. ²⁹Nukun Xanen Ibuun taea nukun betsa Epafroditu kai benima paewen ikin peidawaxankanwen. Ja inun, tsuabuda ja keskabudi bechipaikin jawen jancha ninkanun ixun jatu ikubainkanwen. ³⁰Tsuau man ea jaska watidumbajaidabiaken Epafroditu ewen taea jawen jiwea yaushlama mesebiaken Cristo dayaxunaiwen taea ea medabewai juima isin paepa bitan mawakin chanima nuku xununkeanimaki.

Pablon jiwea xenidan, jamenkiaki, na janchadan

3 ¹En betsabu inun en puibuu, Jesúsun nuku mekeawen taea benimanankanwen. En matu yuiyamadan, jabiaskadi en ana matu

kenexunaidan, enadan bikamaki. Matu kenexunkinan, man jawen jiwenun medabewakin en matu axuaiin.² Ja juni yusinan meketikidi padananain ichakanikai daya pepa wanikapaikin matu yusinkin judiobu keska matu jiwemanun ika ikanikiki, dateyamakain matun jina kubichi mextemanun ikadan. Matu jaska wanun ikaibu uindakanwen.³ Jaska nun yunu kayabiaibudan, nun nukuki, nun jabun Dios ken kayabi waibudan. Jesucriston ma nuku pewaxuniwen taexun Diosun Yushin Pepatun nuku kushipa wakin medabewaya jawada nukunmebi nukun yuda anua jina kubichi bemakisa nun mextemis keskawen nun kentidubumaki.

⁴Eadan, jaska shinanti dabanen emebi kein en yudakidi inun en jiweakidi dasibibu en binutiduki. ⁵Diosun Abraham yununiwen taexun en kainshina 8 xabatian en jina kubichi ea mextenibuki. En Israelin baba betsa Benjamín xukua anua eadi en kainiki. Jaskawen taea en ibubu hebreoken eadi en hebreoki. Ja inun, jawen jancha Diosun Moisés yusini chibain dasibi betsabu binui en fariseo iniki. ⁶Ja inun, Dios duawanun ixun Jesucristo ikunwainbu en jatu ichakajaidaway ukubainiki, jaska dabanen en shinan en unanepaiwenan. Ja inun, Diosun Moisés yusini ikunwankin chibain jawa kaneama en pepajaidakunkainaya ekidi jawa chakabu tsuan yuitiduma inibuki.

⁷Na jaska tibi Moisin yusian chibainan, en jaki chiti ikadan, enadan, ewapa benuisma en shinaniki. Jakia natian Cristowen taeidan, en ana jawen teatidumaki. ⁸Jaska tibi jayai en jawen kushipa biakunkaini natian en uianan, jamenki. Jesucristo en mekenan wakin en unainan, jawenadan, binujaidaki, en Xanen Ibu kayabidan. Jaskaken Cristowen taexun dasibi jamapai eanua

chakabu en benu keyuniki. Jaska wakinan, en jiwea xeni chaka keska wakin jenetan janua jaki maei en jawen yudaniki, ⁹jaki nukutan jaki dasidan. Jaska inun, Moisin jancha chibain jawen nuku ibubis nun pepajaidakunkainkatsis ikaiwen ea akama Cristo ewen nui eki nukutan ea shinan betsa wama en ikunwaniwen taexun Diosun jawena ea wakin en chakabu ea buaxuniken Jesús besti en chibankubainaii.¹⁰ Jaskakin Cristo ana en unanjaidakatsis ikaii. Jaska inun, jawen Epa Diosun mawabu ana bestenwanti kushipa en jayakatsis idiaii. Jaska inun, ana jaki dasijaidanun ika ja nuitapawanibu keska eadi dateama mei mawakin en chibankatsis ikaii. ¹¹Chintuanma en jaskakunkainaya Jesúsun enabu jiweabu inun mawabu mai anua nai anu jatu iyunun ika juaya jatube dasikatsi en manakubainaii.

Jesús chibain pepakunkaini jaki nukutikiaki, na janchadan

¹²Jesús besti chibankatsis ibiai en pepai keyudiamma inun en tapin keyudiamadiki. Jakia pepa besti en ikunkainxanun Jesucriston ea bechipaikin ea katuniwen taea jawen shinan chibain pepatan jaki nukukatsis iki jeneama manai en chintunkidanamaki. ¹³En betsabu inun en puibuun, en pepai keyudiamabia jaska en jiwea xeni en ikunkaini jakimai chipu watan unudi en jiwekuinkatsis ikaiwen taea jadidi uinbaini bikabiaken ninkamas en chintuanmaki.¹⁴ Jaska Jesucristowen nuku Diosun yubani jaska nai anua jaki nukukin jadia bixanun ika ninkamas Jesús en dayaxunkunkainaii.

¹⁵Tsuabunda nun ma ikunwan kayabai pepabunan, jaska shinanankanwen. En shinain keska tsuabunda jabias keska man jaska shinamaken jaska ja jamapaikidi Diosun yusinkin matu

uinmakin matu unanmatiduki.¹⁶ Nun ma jaska tapinmabudan, jaskas shinankin betsa wama chibankubainkin jeneyamanankanwen.

**Jesúswen taeadan, nukun mae kayabi
nai anukiaki, na janchadan**

¹⁷En betsabu inun en puibuun, jaska ea inun ea medabewamisbu nun jiwekunkainkin nun matu uinmamis nukun aka nun jaskaiji jiwemis nuku shinankin chibankin nuku mawakubainkanwen.¹⁸ Tsuabuda ichapa matube jiweabun jatun jiwea xeni jenekin betsa wakatsi ikama Cristo cruzki jatu mawaxuni shinanma jaki sinatai keska jiweabu jaskabukidi jawenchains en matu yuimiski. Natian jaska shinain kaxayabi ana jatukidi en matuki chaniai.¹⁹ Ja yudabu jaskabudan, nukun Dioskidi shinanma jabun diosdan, pikekin pi bestimisbudan, ja inun, jawen kennisbudan, yudabu jawen dakebiaibun jabu dakeama jamapai chakabu na mai anua besti shinankin bechipaikin akubainmisbu janu badi jawen jeneaitian jabu benununbadikaniki, Diosun jatu kupiadan.²⁰ Jakia nuku ikidan, nun jaskamaki. Nukun mae kayabi nai anuki. Jaska nun manakaibudan, nukun mekenika nukun Xanen Ibu Jesucristo ana juxanai nun manakakubainaii.²¹ Janua juxun jabiaskadi kushipawen jamapai dasibi meke keyumistun nukun yuda babu atimapa betsa wakin benawaxanikiki, jawen yuda chaxa keska nuku wadiakinan.

4 ¹En betsabu inun en puibuun, en matu bechipaichakayamai inun, en matuwen nuihai inun, en matuwen benimaiwen inun, matuwen taexun Diosun ea manakua en bixanaiwen taea shinain en matu ana uin kakatsis ichakayamaii. En matu jaska shinanyan

chintuanma nukun Xanen Ibu chibanpakekanwen.

**Ikunwainbu jaska shinain jiwtikidi
Pablón jatu yununiaki, na janchadan**

² Evodia inun Sintiqueen, nukun Xanen Ibu ikunwain man nukun puibu matuwen nuikin en matu shinaiin. Nukun Xanen Ibu ebe man dayaxunbiamis man yuananandabeai en matu ninkaidan, jaskama menan daenamedikanwen, en matu yunuaidan.³ Jaska inun, Sízigoon, miadan, min chintuinsmawen taexun mia yununun ninkawe. Nukun pui dabe Evodia inun Sintique ea jatu medabewaxunxanwen, jau daenamenunbunan. Clemente inun medabenanika betsabu ja ainbu dabeebetan Cristokidi kakape en yusianyan jabun ea putama ea medabewai bika tenediakubainbuki, jabudan, jatun kena tibi ja jiwekuinti unaki ma jatun kena Diosun jatu kenekin netanikidan.

⁴ Nukun Xanen Ibu ikunwainan, benimadikanwen. Ana jabias en matu yuiai. Jeneama benimadikanwen!⁵ Jau dasibibun matu unanunbun ikunwain pepabu ikubainkanwen, ma nukun Xanen Ibu juu kemaikikidan.

⁶ Jaska inun, ana jamapaiwen dabanan iyamakanwen. Jakia Diosbe janchakin yukai inun kenwainan, min jamapai jakidi xabakabi yui chanikubainkanwen. Januxun Diosun matu ninkaxun axunken jawen duapa kenwankubainkanwen.⁷ Man jaska waibu Diosun unanuma matu jiwmakin jaska tsuan shinankin ninkatidumawen Diosun jawen unanumawen matun juinti inun matun shinan mekekubainxanikiki, Jesucristo ninkakin man chibaibinwen taexunan.

⁸ En betsabu inun en puibuun, kenekin en ma matu keyuxunai ea ninkaidakanwen. Eska tibi pepa shinankanwen. Dasibi jancha kayabi inun, dasibiwen pepa wai nun jaki mesetidu

inun, dasibi nun kanetiduma inun, dasibi pepas inun, dasibi jawen nun shinan chankantidu inun, dasibibu tsuada jawen pepawen kenwanmisbu inun, jaska tibi jatukidi shinan kayabikubainkanwen, jaskakin Dios benimawakinan.

⁹En jancha ninkakin ea uinkin jawada man tapini inun en matu yusinkubainima jeneama chibankubainkanwen, man jaskaibu nukun Epa Dios unanumatum matu jeneama medabewapakexanikikidan.

**Filipos anuabu Pablón jatu
kenwanikiaki, na janchadan**

¹⁰Badi betsatian man ea medabewani keskai man ana ewen dabanan ikaya en Xanen Ibuwen en benimachakayamai. Jaskaken man ea jakimakidi en shinanmaki. Jakia matun jawada man ea bumatiidubia natian en chaiken jaska waxun man jawaida ea medabewatidubumaki. ¹¹Jaska inun, na jaska matuki chanidan: “En nuitkapaikidi ea medabewai bekanwen”, ixun en matu yuiamaki. Jakia jawada en jaya inun jawada en jayama shinain benimai jaska tibi mei en ma beyakunkainaii. ¹²Jaskai jiwestidan, ma en unaiin, nuitkapa jiwei inun, nuitkapa piti ichapaya jiwei inun, jamapai bika betsa betsapa mei benimai inun, buni tenei inun, janu piti ichapa jayaken nun texewai inun jawa jayamaken en nuitkaaidan, jaska en beyakunkainaii, jawawen nui kemuamadan. ¹³Januxun Criston ea kushipa waya jawen taexun dasibi tenexun en akin keyuxuntiduki. ¹⁴En jaskabiaya matubunan, ewen nuikin en bika teneai ma ea medabewakubainidan, man ea jaska wayamadan, matukididan, peki.

¹⁵Janu matun mai pakea Macedonia anua kaxun Diosun kakape en matu yusinbaini ana mae betsa tibi anu en yusinkin taewakubainaya janua matu anua en kainkainaya ikunwainbu betsabun

ea medabewabumabiaken man Filipos anuabun besti matun pei ea bumakin man ea medabewaniki, jaskai medabenanti en matu yusinma jaska en yusian chibankin jiwea en matu tapinmaima januxun jawen taexun matundi man ea medabewanibuki. ¹⁶Eска ea wakinan, Tesalónica maewan anuxun en jatu yusianyan janu jawenchains man ea pei bumakubainibuki, jawen en jamapai tibi en binunan. ¹⁷Jaskaken pei en matu ea akamabia man ea medabewamiswen taexun matun pepa Diosun jau matukidi ana shinanxanun jaska en matukidi shinaiin. ¹⁸Epfafroditu yunukin matun pei man ea bumaima dasibi en bimaki. Jawen en jamapai en paka keyubia texe en jayayuaki. Jaska inankuin ea yunukan, Templo anuxun intinti pepa ininjaida kuakin Dios inanbu jaska xetei Dios benimamis keskai eadi matuwen en jabiaskadiaii. ¹⁹Man ea medabewakin ea jawa yupawaismakanen, en Epa Dios pepajaidatun matu manakukin matun jamapai tibi matu inankubainikiki, jawen bake Jesucristowen taexun matu duajaidawakinan. ²⁰Jaskaken nukun Epa Dios pepajaida duawakin kenwanankanwen, jeneamadan. Jaskakidan.

²¹Ea en Pablón, en matukidi pe shinankin man ma dasibi Jesucriston enabu medibiken en jancha en matu bumaii. Nukubetan Jesús ikunwainbu ebe jiweabundi matukidi shinankin jatun jancha pepa matu bumadiakanikiki. ²²Ja dikabi dasibi jabun Jesús ikunwainbu inun Roma xanen ibujaidatun jiwe anu dayaxunaibundi jatun jancha matu bumadiakanikiki, matu shinain matuwen nuikinan.

²³Nukun Xanen Ibu Jesucriston jau matu duawakin shinan chankanwankubainunwen.

Jatiski, en janchadan.
Pablo

COLOSAS ANUABU PABLON JATU KENE BUMANIKIAKI COLOSENSES

Pablón jatukidi shinanikiaki, na janchadan

1 ¹Ea en Pabloden, Diosun jawen shinanen Jesucriston jawen kushipaya ea wakin ea katuniwen taexun nukun betsa Timoteobetan ²tsuabuda Colosas maewan anuabu Diosun jawenabu medibi matu wani man nukubetan Cristo ikunwain man chintuinsmaken jabatan en jancha en matu bumai uindakanwen. Nukun Epa Diosun jau matu unanuma jiwemakin duawakin jau matu shinan chankawankubainunwen.

Jesucristo ikunwainbu Pablón jatu shinankin jatuwen taexun kenwankin Dios jatu ea axunkubainikiaki, na janchadan

³Matukidi shinankin nukun Xanen Ibu Jesucriston Epa Diosbe janchakin matu yukaxunkin nun matukidi kenwankubainmiski. ⁴Matukidia kaka juai en ninkamiski, man Jesucristo ikunwain nukubetan ikunwainbu betsa jatube bechipainamei man jatuwen nuimis ninkaidan. ⁵Man jaskaidan, Jesucristokidi kakape chanima ninkatan benimakin matun jiwea nai anu Dios anu man jaya man manakaibu nun matu unaiin. ⁶Jaska inun, mai jidabi anuxun Diosun kakape jawen bakekidi ninkatan ikunwanbauni

pakin yudabun jatu uinmabaunaibu keskai man ikaidan, chanima jabias jabiaskadi matu anudi taxniai man jayaniki, jaska Dios duapakidi janchaibuu ninkai: "Chanimaki", itan man ikunwanibudan. ⁷Man jaska ikaibudan, nukun jaibujaida Epafrasin nuku keska Criston tsuma nukube dayakin matu anuxun chintuanma matu nuku yusinxunkubainmis ⁸jatun matukidia kaka bexun nuku yuikin jaska Yushin Pepatun matu medabewakin amai man bechipainamei nuaibu nukuki chanishinaki.

⁹Jaskawen taea man bechipainameaikidi ninkatan Diosbe janchakin nun matu yukakin jenexuinsmaki, Diosun jau jawen shinan xabakabi matu unanmakin jaskai unanepati tibi inun ninkati shada matu wamakin jawen Yushin Pepatun jau matu inanmakin unanmakubainunan. ¹⁰Man jaska jabun nukun Xanen Ibu chibainbunan, jaskai jiwekin jaska bechipaiai benimawakin axunkubainkanwen. Jaskakin yuda betsabu uinmakin jawada daya pepa betsabu betsapa akin Dioskidi tapin unanepai ewakubainkanwen. ¹¹Jaska inun, eska en matu yukaxunmiski. Diosun jawen kushipaa paepawen jau matu mestenwanunwen. Jaska

kushipa man jayawen taexun jamapai bika tenebiai kushipatan jin jin ikama inun benimakin ¹²Epa Dios kenwankubainkanwen. Jatun matu katunixun ikunwainbu dasibibube nuku mekekubainkin nai anuxun jawada nukuki tanani nuku inankuian jawen xabaki pesetan nun bixakanaii. ¹³Uatian nun Dios unanma meshu chakabun nuku tsumabiaken Diosun nuku putamaniki, jawen bake ja bechipaiaitun jawen xanen anu nuku iyukinan. ¹⁴Cristo mawakin Satanásan nuku tsumani jawena wakin nuku mebikinantan nukun chakabu nuku buaxuniki, ana shinanmadan.

**Cristo nuku mawaxuniwen taexun
Diosun jawenabu jawen meketi
wanikiaki, na janchadan**

¹⁵Dios tsuan uintidumabiaken Cristo ja itsa xabakabi uinkubainibuki. Jawa dasibi dami wadiama jawen bake kayabi bestichai jayaniki. ¹⁶Cristowenan, Diosun dasibi nai anua inun mai anua nun uintidu inun nun uintiduma yushin betsa betsapa kushipayabu inun paepabu Cristowen damiwanikiaki. Jaska damiwakinan, Cristowen taexun atan Diosun Cristo jawena wamaniki. ¹⁷Jaska inun, jamapai betsa betsapa Diosun damiwadiama Cristo jiwepauniaki. Jawen taexun dasibi damiwanixun pewakin keyuninxun jeneama mekekubainmiski. ¹⁸Ja dikabi Cristo jawen jiweawen nukun Xanen Ibuxanun ika kushipai jawen buxkai nuku ixuniki, nun ikunwainbun jawen yuda nun ikanunbunan. Ja dukun jiweniwen taea mawamisbu kushipa binui ja dukun mawabu anua bestein taekin dasibi jatun dukun binu keyuniki. ¹⁹Diosun jawen bake jaska wakinan, ja jawen kushipa inan keyukinan, jaki dasibi chiti iyukatsi anikiaki. ²⁰Jaska inun, Jesús cruzkia

mawai jawen jimi nuku jabaxuniwen taexun nukun chakabu Diosun buaxun jakimakin nuku jakimawatan ana nukuki sinatakatsi ikama Dios nuku daewamakin jawen jaibuabu nuku wamatian jiweabu mai jidabi anu inun nai anu Cristoki dasitan janus nuku xukuwakatsi Diosun jatu dasibi pewakin keyukin daewanikiaki, yudabu inun yudabumadan.

**Criston Dios nuku daewamanikiaki,
na janchadan**

²¹Matudan, uatian jawa unanma matun shinanen matun juintinin chakabu bechipaikin akidan, chajaida jiwea keskaxun Dios man sinatamapaunibuki. ²²Jamen natianan, Diosun bake Cristo ma juni jawen yudawen nuitapatan matu mawaxunkin jawen mawawen Dios matu daewamaxuniki. Jaska matu wakinan, jawen besudi jawa chakabuma inun jawa meshu tsamiamma inun tsua chakabu matuki chanitiduma matu nichinkatsi iki matu ixuniki. ²³Man jaskakatsi ikaidan, matu tibidan, Diosun kakapekidi ninkatan man ma Cristo ikunwani jenekin putai chintuanma juinti mestentan jaska man ikunwainbu manakakubainkanwen. Jaska Diosun jawen bakekidi jawen kakape yudabu mai pakea ichapa anuabun jau unanunbun yusinkin ea en Pablon en jatu medabewakubaunmiski.

**Pablon ikunwainbu uianmabia jatukidi
nuikunkainikiaki, na janchadan**

²⁴Natian matuwen taea nuitapaidan, en benimaii. Jau jawen taea nun bika tenekunkainxanun Criston nuku yunutan ja dukun chanima jawen yudawen ja ikunwanxanaibu medabewanun ika jatu bika tenexunkin jaskawen taea eadi ibubis en yudawen menei en ixundiaii,

man ja ikunwainbuwen taeidan.

²⁵Ja inun, Diosun janchadan, dasibi jiwebaunabu en jatu yuikubaunxanun ea katutan ea yununi jaskawen taea man Cristo ikunwainbu matuwen nuikin en matu medabewakubainxanun Diosun jawen tsuma ea matu waxuniki. ²⁶Na jaska en matu yuiaidan, Diosun jawen kakape Cristokidi badi ichapajaida juneni yuda betsya betsapa badi betsatiyan jiwekubidanibu jatu yusianma junenixun natian jabu Cristowen Diosun medibi jatu waidan, Diosunan, ma xabakabi nuku uinmaikiki. ²⁷Tsuabuda man judiobuma Diosun jawen shinan duapa jaska bebunkidi Cristokidi yubakabiatan juneni ja xabakabi wakin matu unanmakatsis ikikiki, jau mai jidabi anuabun matundi man unanunbun jaska ja jawen shinan dasibikidi junenidan, jadan, Criston aniki. Jaska matundi man Cristo ikunwainwen taea man judiobumabia Cristo ma matuki dasiaki. Jaska inun, nai anu Diosun mae pepajaida anu Dios inun Cristobe matudi man jiwxanaii, man jaskakidi shinankin manakaibudan.

²⁸Jaska Cristokidi matuki chanikin matu yusinkin nema pewakin dasibi matu unanepa wakin jaska Cristo be bun man pepa mapuxanunbun nun matu yusinmiski. ²⁹Na jaska matukidi dayaidan, Criston jawen kushipa ea inani en jawen dayachakayamaxunmiski.

2 ¹Man ikunwainbu Colosas anuabu inun jabu Laodicea anuabu inun dasibi betsabube nun uinanandiabumabia matuwen nui en dayachakayamamis man unanunbun ixun matu shinankin en matu yuiaii. ²Jau man shinan chankain jenetima binunbun inun, jawa betsya shinanma ikunwain betsabube ketaxamei nuinamei man bechipainamenunbun inun, unanepakin Diosun jawen yuba

betsya juneni Cristokidi natian jau xabakabi man ninka pejaidawanunbun en matu dayai jenexunamaki. ³Eskaki, matu yuinun shinaindakanwen. Jawen unanepati pepa inun jawen tapinti dasibidan, Cristo anu jayaki, jaska Diosun jakidi junenidan. ⁴Jaska matu yuikinan, jau ana tsuanda yusian betsawen ana matu padanyamanunbun Cristo besti unanepajaidakidi en jaska matu banabimaii. ⁵Jaska inun, en yuda en matubemabia en shinan matu anuki. Man ma Cristo ikunwanixun jawen daya axunkin chibankubainkin man pewai man ma peken matuwen nui en benimaii.

Cristokidi ikunwain shinan betsya wanibukiaki, na janchadan

⁶Jaskaken man ma Jesucristo ikunwankubainaibudan, matun Xanen Ibu Cristo jiwxenidan, jaska bechipai ai keska ixunkubainkanwen. ⁷Jaska matu yusinmisbu chibankin badi tibi jeneama ana uke medan ikunjaidawakubainkin Cristokidi tapiin ewakainkin matu pepawaikiidi Dios kenwankubainkanwen.

⁸Juni betsabun jatun yusian beya betsawen matu unanepa wapai matu jatu chibanmakatsis ikaibu jatun yusian pe itsa kayatapiamaki. Uindakanwen, tsuabunda Criston yusian danankin jakidi shinain janchaxunabumakidan. Jakia jabu ikidan, na mai anuxun yushin kushipabun yunuai chibankin yusian betsyan ani jawen yusinanain kanenibu chibankin matu amakatsis ikubainkanikiki, jaska jabu yusinanankinan.

⁹Cristodan, Diosuna jasbia nukun yuda keskatan na mai anu uinti shadai taxnikidaniki. ¹⁰Cristo ma man jaki dasitan ikunwainbudan, Cristona dasibi man jayaki, Diosun jawen kushipa jabisdi inaniwen taeidan. Ja dikabi yushin dasibi inun, nai tsuma pepa inun

chakabu dasibi inun, xanen ibubu mai anua xanen ibujaidakin jatu binu keyuaki.¹¹ Jamen, betsadan, Abraham Diosun yununi chibankin Dios unanmanun, iwanan, judiobun jatun juni bake kaiān jatun jina kubichi mextemisbu keska wakin natian man judiobuman Cristo man ikunwainbu matu jaki dasiwakin matun jina kubichi mextea keska wakin matun shinan chakabu inun matun beya chakabu Diosun mextea keska wakin matu putamaniki, shinan betsa wamakinan.¹² Jaska inun, Cristo man ikunwanyan yuda betsabu jatu unanti wamai man nashinibudan, eska tibi jawen shinamatiki. Ninkaidakanwen. Nashimakin matu jenen bichiabudan, Cristobe matu mai wanibu keskaki. Januxun jene anua matu benibidankin taxnimakin kainmaibudan, Cristobe bestean keska wakin matu akawanibuki, jaska wakin Diosun jawen kushipawen Cristo bestenwani ja kushipa man ikunwainwen matu imakinan.¹³ Jamen uatian matu jiweadan, matun chakabu man jenediamawen taeadan, man mawa keska jiwenibuki. Jakia natian tsuabunda Cristo man ikunwainbu dasibi matun chakabu Cristowen matu buaxuniwen taexun Diosun Cristoki ma matu dasiwaran jawen taexun jawen jiwea kayabi matu inaniki.¹⁴ Jaska wakin jawen yunua inun jawen nema Diosun nukubukidi mese wanixun jawen nukun chakabu tibi Diosun tanakin netankubainixun jawen taexun Diosun nuku kupididubiaken ja binumai Cristo cruzkia nuku mawaxunkin nukun chakabu mastakin nuku bepu keyuxuniki.¹⁵ Cristo mawa Diosun ana bestenwaniwen taexun jatu uinmakin Satanás inun jawen tsumabun kushipa Diosun mebinmakin jatu maematan jatu dakewakin keyumaniki, yuda dasibi jabukidi xabakabi unanmakinan.

¹⁶Judiobu jatun beya tibi jayabuki. Jaska inun, jatun beya betsa chibankin piti dasibi pitidubumabia piti betsa besti pitidubuki. Jaska inun, jatun beya betsa chibankin jawen nuxuti betsa atidububia betsa atidubumaki. Jaska inun, jatun beya betsa chibain ichatan besi betsa betsapawen besimisbuki, uxe benatian inun juindukunti sábado tibitianan. Jaska tibi chibankin amisbunan, jau matukidi jaska shinain ja iyamakubainunbunwen.

¹⁷Na beya betsa betsapa tibiwen jawen Cristokidi shinanmati besti ikubainibuki. Jakia Cristo ma juniken ja beya ana kushipa jayama jamenki.

¹⁸Jaskaken tsuabuda pepa kayabitikidi shinain keinsbuma inun, tsuabunda nai tsumabu kenwanmisbu inun, jaskamabia uxa namai keskakin jawada taxnikidanai xabakabi uin jatun shinan medan kein shinan chankanmisbuki. Jaskamisbun jau jabun matu chitekin dakewayamanunbun uindakubanxankawanwen.¹⁹ Ja jabu jaskamisbuden, Cristodan, jatun buxkamaki. Jamen nukubudan, nukun buxkadan, Cristoki. Jaskaken nukun yuda ewakaini pitiwen nun kushipamis keskadiai jabun nukun Xanen Ibu Cristo ikunwainbudan, pabu tibi jaki dasikin nun ewawaiidan, jawada nun unandiamma tapinmakin jaska Dios yubakani Criston jaska shinankin nuku amaikiki.

Cristobe nun jiwxanaidan, junibun yunua keskamakiaki, na janchadan

²⁰Tsuabunda Cristo man ma ikunwainbudan, man ma Cristobe mawani keskabuki. Jaskawen taexun na mai anuxun xanen ibukin jatun kushipawen beya betsa betsapa yunuaibun ana jabun matu tsumatidubumaki. Jaskabia čjaskai ikunwanbumabe jiwxun jabun matu

yunuai ninkakin man chibankin
jenediabumamen, jabu keskakinan?

²¹Jabun yunua eska chibankinan: "Ja
meyamawe", ikaibu inun: "Ja piyamawe",
ikaibu inun: "Ja min mekenen
meyamawe", imisbudan, ²²jaska tibi
jatun yunuadian, junibun jaska shinankin
jatu yusinmisbu besti akaibudan, ja
mabu inun ja pitikidi matu yusinkin
unanmakin tapinmaibudan, jawen
jiwekubainaibu jawaida keyuxanikiki.

²³Ja jaska chanima keska wakin
yusinanamisbudan, unanepakatsis
ikin yusian bena bika ibubis yusinkin
chibanaidakin jatun jiwea pe mekekatsis
ibiai tsuan jawen shinan chakabu
nemakin jenetidumaki. Jaska akinan,
jaska bechipaiaibu besti jatun shinanwen
besti kushipakin yuikubainmisbuki.

3 ¹Cristo mawa bestenwantan Diosun
jawen yusiudi tsamanixun jabe
xanen ibu waiwen taexun matun shinan
betsa watan man ma ikunwainbu
man ma jabe besteni keskawen taea
jawada naiudia Cristowen Diosun pepa
benakubainkanwen. ²⁻³Cristobe man
ma mawani keskawen taexun matun
jiwea Diosun nai anu matu mekexunaki,
jadi Cristobe man jiwxanai anudan.
Janua na mai anu man jawen jiwea
mabukidi besti shinanma Diosun jaska
bechipaimiskidi shinankubainkanwen.
⁴Jaskawen taea Cristo xanen ibui benima
paeya ana juaya matudi jabiaskadiai
man jabe benimachakayamaxanaii.
Cristodan, jibia matun jiwea kayabiki.

Cristoki dasikatsi jiwea bera katutikiaki, na janchadan

⁵Jaskaken na mai anua matun
kemudan, tenankin akawadikanwen,
eska tibi Diosun nemani jeneidan. Ana
ainbu betsa tibiwen kemuama inun,
ana jamapai tibibe chutanamebaunama
inun, jawada kemu atimapra betsa

betsapa man akatsis ikai inun, ana
pei inun mabu betsa ichawanun,
iwanan, yaushikin kenwanti betsa
keska wakin pei inun mabuwen
kemukin kenwanyamakubainkanwen.

⁶Jakia jaska tibi chakabu aki man
Dios ninkama sinatamamiski. Jawen
taexun ja ninkaisbuma Diosun jatu
kupijaidaxanaiwen taea ⁷chakabu
jabiaskadi matun jiwea xeniwen
man abiapauni ⁸natian ana jaska
meama menan jawaida dasibi jene
keyudikanwen, man eskamisdan, man
sinatamisdan, man kemumisdan, man
chakabu wamisdan, man xeti ikama
kunyan imisdan, xedabiaman jancha
chakabu yui xechakamisdan, ⁹man chani
chakamisdan. Natian jaska tibi man ma
jeneamenkain, matun jiwea xenidan.
Jaskaken ana jaska Diosun bechipaiam
chakabu tibi ayamakubainkanwen.

¹⁰Tadi bera sawea keska wakin matun
jiwea man ma benawaki. Matun
jiwea ma benawaidan, jaska Diosun
bechipaimis keska jiwxunbainkanwen,
jatun matu damiwani keskaidan.

Jaskakin ichapa man jakidi unanxanaii.
¹¹Man ma jaskadan, tsuabunda
Cristo ikunwainbu jawenabukidi
eska shinain man janchatidubumaki,
griegonawabudan, judiobudan, jabun
judiobun beya chibankin jabun jina
kubichi mextemisbudan, jabun judiobun
beya chibainsbumadan, nawa xukuabu
tibidan, pubenbudan, jabun jabu
dayaxunmisbudan, tsuan tsumamadan.
Nun jaska betsa betsapabubia jaska
shinain jatukidi janchayamakubainanka
nwen. Cristodan, dasibikidan, dasibibun
xanen ibui keyuaki.

¹²Jaskaken Diosun matu bechipaikin
jau jawenabu medibi tadi man
inunbun matu katunikenan, matun
shinan pepa kainmakinan, tadi
bera sawea keska wakubainkanwen,

yuda betsabuwen nuidan, pepaidan, babutan keanmadan, duapaidan, jin jin ikama manakaidan.¹³ Jaska inun, tsuabunda matu chakabuwaya jawaida jaki sinatama tenetan medabenain jatun chakabu jakimatan ana jakidi shinanyamakubainkanwen, nukun Xanen Ibu matun chakabuwen Dios matuki sinatai buaxuni keska wakinan.¹⁴ Jaskaken na yusian jaska tibi dasibi chibain bechipainamei jeneama inun putanameama pepai man jiwekubaintidubuki.¹⁵ Jakia Criston unanuma matu jiwemayadan, ja matun juinti uke medan xanen ibu wamakanwen. Matu jaska wakatsi ikin Diosun ma matu katusun jabias yuda matu wakatsis ikikiki. Dasibi ma jatun matu axuni shinankin kenwankubainkanwen.

¹⁶ Matubunan, Criston kakape jiwestikidi ichapa man ma tapianan, jeneama akubainkanwen. Eskaidan, jawen yusinanainan, jawen unanepakin betsabun kaneiba jatu ja akin pewakubainkan, matun juintin benimai shinan chankakin: “Peki”, ikin Dios kenwain Dioskidi nawati betsa betsapawen nawakubainkanwen.¹⁷ Jawada tibi man akai inun man yuiaidan, nukun Xanen Ibu jaska bechipai keska jawen kushipawen akubainkanwen, nukun Epa Dios: “Peki”, akinan, man Cristonabunan.

Ikunwainbu kayabi jaskai jiwestikiaki, na janchadan

¹⁸ Beneyabuun, matu yununun ninkakanwen. Ikunwain man ma nukun Xanen Ibuki dasinibudan, matun benen jawadakidi matu jancha wai jawen jancha chibankin ninkasama axunkubainkanwen.

¹⁹ Ainyanbuun, matudi yununun ninkakanwen. Matun ain bechipai

jatuwen nuikin jatu ja akin bikawayamakubainkanwen.

²⁰ Bakebuun, matudi yununun ninkakanwen. Nukun Xanen Ibu benimawakinan, matun ibubun matu yusinkin nemai ninkakubainkanwen.

²¹ Bakeyabuun, matudi yununun ninkakanwen. Matun bakebu tapinmakin jau matuki sinatayamanunbun yunuchakayamakin nemajaidayamakub ainkanwen.

²² Esclavo dayadubuun, matudi yununun ninkakanwen. Matubunan, matun tsuma mai anuabu jatu duawakin matu uianibu inun matu uianbumaken jaska bestiwakin jatu duawai shinanma jakia matun juinti pepawen jawada jatu axunkinan, nukun Xanen Ibu kushipaki mesekin jatu axunkubainkanwen.²³ Jawada daya tibi man jatu axuaninan, chikishbetanan jatu axuanma nukun Xanen Ibu man duawai keska wakin jatu axunkubainkanwen, yudabu jatu uinmakin axuanmadan.²⁴ Ja inun, nukun Xanen Ibu Cristo matun yununika kayabitun matu yunua ninkakin man axunkin man benimawamisdan, ana matu manakukin ichapa matu binumakin jaska yubakani jiwekuian matu inanxanai man ma unaaiin.²⁵ Jamen tsuabunda chakabuwamisdan, jatun chakabuwen Diosun jatu kupixanikiki, yuda betsa betsapabudan, ainbuaibudan, junibudan, bakebudan, ibubudan, esclavo dayadudan, yununikabudan. Jaska waxanikiki, betsa binumamadan.

4 ¹ Yununikabuun, matudi shinanmanun ninkakanwen. Nai anua matun Xanen Ibu yununika matudi man jayawen taexun matun esclavo dayadubu padanma jakia jatu duawakin piti inun tadi jatuki yaushiyamakubainkanwen.

Ikunwainbu jaskai jau jiwenunbun Pabol ana jatu yununikaiki, na janchadan

² Man Cristo chibainbunan, jawada betsakidi man shinain Diosbe

janchakinan, jawa chikishkin jeneama apakekanwen, jaskawen taexun Diosun matu axuan uinkin kenwain: “Peki”, ikunkainidan.³ Jaska inun, nukukididi Dios nuku yukaxundiakanwen, jau nukun Xanen Ibu nuku medabewaya jakidi jawen kakape Cristokidi Diosun juneni xabakabi mae betsa betsapanu nun jatu yusinkin jatu unanmabaununbunan, na jaska jakidi ea nemakin bichikin akawanibu en niakididan.⁴ Ja inun, jaska Diosun bechipaiai ean en jatu xabakabi Cristokidi unanmakin en jatu yusin kanun ea yukaxundikanwen.

⁵ Jaskaken ikunwanbumabe man jiweadan, jatube medabenain pe jiwei unanepakin jatu duawadiakubainkanwen, Cristo man ikunwain jaska bestikidi janchakin jatu ikunwanmakinan.⁶ Jaska inun, jatube janchai jancha duapa inun jancha pepa bestiwen janchakanwen, jaska yuda tibibun bika teneaibu jatu medabewakin jatu kemai janchai peidan.

Jatis jawen jenekin Pablon jatu kenexun yununiaki, na janchadan

⁷ Nukubetan ikunwain nun jabe bechipainamemis Tíquico chintuanma nuku medabewakin nuku keskakin nukun Xanen Ibu dayaxunmistun ekidi kaka matu buxunkin yui kaikiki.⁸ Jaskawen taexun matu anu en nichiaiin, nukukidi matuki chanikin jau matu benimawai kanunan, nun jaska jiweabukidi chanikinan.⁹ Matun mae anuadi nukun betsa nun jabe bechipainamediamis chintuinsmadi Onésimo Tiquicobe kaikiki, jaska nenu Roma anuxun jaska shadabu nuku wabu nun jiweakidi ja dabe matuki chani bukanikikidan.

¹⁰ Jaska inun, Aristarco ebe bichimabun jawen jancha matu

bumadiakin yuikin: “Diosun jau matu duawakubainunwen”, matu waikiki. Bernabén chai Marcosin jabiaskadi jawen jancha matu bumadiaikiki. Marcoskidi en matu yuimaki. Jatianda matukidi bakin matu yusin kaya ikin pewatan duawaxankanwen.¹¹ Jesús jawen kena betsa Juston jawen jancha jabiaskadi matu bumaikiki. Jabu besti Israelin baban Dios dayaxunkin ea medabewakin duawakin ea shinan chankanwankanikiki.¹² Jaska inun, Jesucriston tsuma betsa nukun jaibu Epafras matube jiwemisdan, matuwen nuikin matukidi shinankin Dios matu yukaxunkin jeneama ikunkanikiki, jau chakabuuma man jiwxenun mestentan jaska Diosun bechipaiai dasibi jaska shinain keska man axuin jiwekubainunbun matukidi shinainan.¹³ Jaska nukun jaibu Epafras matu inun dasibi Laodicea maewan anuabu inun Hierápolis maewan anuabuwen nuijaidai en jawen jancha ninkamixun en matu yuiaii.¹⁴ Juni danya Lucas nun jabe bechipainamemis inun Demasin jawen jancha matu bumadiakin yuikin: “Diosun jau matu shinan chankanwanunwen”, matu waikiki.

¹⁵ Ja inun, nukun betsabu inun nukun puibu Laodicea maewan anuabu man ichamisdan, matu shinankin en jancha en matu bumaiii. Ja dikabi nukun jaibu Ninfa inun jawen jiwe anu ichamisbube en janchadi en matu bumadiaii.¹⁶ Na kene en matu bumai uinkin yuikin keyutan januxun Laodicea anu ichamisbudi jatu yunuxankanwen. Janua kene betsa Laodicea anu en jatudi bumai uintan matudi bemaibu matuna uiainbun jatunadi uinxankanwen.¹⁷ Ja inun, Arquipo yuikin: “Nukun Xanen Ibu Jesucriston mia katuxun jawen daya mia yununi jawa kaneama jau pe dayaxunkunkainun”, ea yuixunxankanwen.

¹⁸Na kene keyukinan, en Pablon
emebi en mekenen en jancha matu
bumakin ma en keyuaii, jatun ea
kenexunmistun akai mebintanan. Ea
bichikin akawaxun ea nexayamabu
ekidi shinankin jeneama Dios

ea yukaxunkubainkanwen.
Nukun Epa Diosun jau matu
unanuma jiwemakin pewakin
duawapakekubainunwen.
Jatiski, en janchadan.
Pablo

TESALÓNICA ANUABU PABLON JA DUKUN JATU KENE BUMANIKIAKI

1 TESALONICENSES

Pablón jatukidi shinanikiaki, na janchadan

1 ¹En Pablón, en medabewanika Silvano inun Timoteobetan en matu kene bumai uindakanwen. Tesalónica mae anuxun man ikunwain nukun Epa Dios inun nukun Xanen Ibu Jesucristobe man ma dasia jatubeken Diosun jau matu duawakin unanuma matu jiwemakubainunwen.

Tesalónica anuabun ikunwan pe jiweabuwen taexun Pablón jatukidi Dios kenwanikiaki, na janchadan

²Matu dasibiwen taexun Dios kenwakin matu jakimama shinankin Dios nun matu yukaxunkubainaii. ³Man eskai jiwea ikunwain Jesúski chiti itan, ikunwain betsabube medabenain bika tenebiai jawa chintuanma nukun Xanen Ibu Jesucristo man manaya nukun Epa Diosbe janchakin matu dayuixunkin matukidi shinankin nun jeneama ikunkainaii. ⁴⁻⁵En betsabu inun en puibuun, matu anu kaxun Jesúsun kakape matu yusinkin nukun jancha bestiwenma Jesucristo datan akin nun matu amaimaki. Jakia Diosun kushipa matu uinmakin jawen Yushin Pepawen dami atimaska matu uinmakin ikunjaidawamakin jawen jancha pepa chanima kayabi keyutima unankin nun

matu yusinmaki. Nuku ninkatan man ikunwainwen taexun janu Dios matuwen nuikin jawenabu matu wakatsis ikin matu katuni nun unaaiin. Jaska matu anu nun pe jiweima inun jaska matu medabewa bestikin nun matu bikawama ikima matundi man unanajaidaii.

⁶Chanimu nuku nun ikai keskai inun nukun Xanen Ibu Jesús jiweni keskai matundi man nuku chibanyan matu ichakawakin matu nuitapawabiaibun Diosun Yushin Pepatun matu benimawakubainaya Diosun kakape man ikunwankubainimabuki. ⁷Man jaskaya ja mai pakea dabe Macedonia inun Acaya anuxun Jesúski ikunwanbaunaibun man ikai kaka ninkakin jaska Diosun nuku jiwemakatsis ikai tapinkubaunimabuki.

⁸Matu dukun ikunwankin nukun Xanen Ibu kaka pepa man chibankin jatu uinmaya Macedonia inun Acaya besti anuama jakia matumebidi Diosun jancha ma tapintan matundi man jatu yusianyan paai mae betsapa anuabun man jaska ikunwainbu jabun matu ninkakin keyubaunaibun nun ana jawa jatuki chanitidumaki, man ma jatu amayadan. ⁹Ja inun, man jaskaimabukidi ja mae anuxun nukukidi chanikin chanima jaska man nuku duawaima chanimisbuki. Ja inun, damiwakin yushin itsa wabu man

kenwanbiapauni ja jenetan Dios jiwea kayabi ikunwankin man duawakin taewaimaki.¹⁰ Jaska bestikidi man shinanma jakia Diosun bake Jesús mawa ana bestenwani nai anua chintunkidan ana juxun nuku mekeaya jakia yudabu chakabumisbu Diosun jatu kupikin jau nuku meama iyanun, iwanan, unankin uinxanun ika man manakanaii.

Tesalónica anua eskai Pablo jatube dayanikiaki, na janchadan

2 ¹En betsabu inun en puibuun, matu anu yusin kai jameen nun kama ikima man unaiin. ²Ja inun, matu anu nun jikidiamaken Filipos anuxun nuku ichakawakin nuku nuitapawaimabu man unandiaii. Nuku bika tenemabiaibun Diosun nuku kushipa wakubaina jawen kakape nun matu yusinkubainimaki. ³Januxun matu yunukin yusinkin nun kaneama ikimaki. Ja inun, chakabuwakin nun matu jawa padanma idiaimaki. ⁴Jakia Diosun nuku unanti watan yuikin: “Juni pepabuki”, itan shinankin jau jawen kakape nun yuikubainxanun nuku yununi nun matu yui janchakunkainaii. Diosun besti nukun juinti unanmiswen taexun Dios besti nun benimawakatsis ikaii, yudabu benimawatiwen nuiamadan. ⁵Jaska wakin jancha jawendua bestiwen jau jawen man nuku kenwanunbun nun matu padanma ikima man unaiin. Ja inun, matu padantan pei binun, iwanan, nun matu yusianma ikima Diosun unandiaikiki. ⁶Ja inun, Jesúsun kushipayakin nun matu yunutidubia matu inun yuda betsabu jau nuku xanen ibu wakin kenwanunbun nun jadi yunukin matu jancha wama ikimaki. ⁷Jakia ewabun jawen bakebu pe mekekin pimamis keska wakin matube jiwxun matuwen nuikin unanxubida yusinkin nun matu mextanmakubainimaki.

⁸Jaska wakin matu bechipaikin Diosun kakape yusin benimai matuwen nuijaidai kaxakatsis iki jaska shinain en matu mawaxunkeanimaki. Jaskawen taea ana jabias matukidi shinankin matu medabewanun, iwanan, jamapai betsa nun matu axunkatsis ikaii.

⁹En betsabu inun en puibuun, Diosun kakape matu yusin kaxun matun piti pikin matu bika wakin nun matu chikish wakatsi ikama badidi inun meshu medan dayajaidai yumankin nukun dayawen taexun nukun piti nun bikubainima man unaiin.

¹⁰Jaska man ikunwainbube jiwea pepakunkainkin jawa kaneama nun matu jawa chakabuwama ikunkainima Epa Diosbetan man unaiin. ¹¹⁻¹²Nun matu eska wani man unandiaii. Bestibu tibi matu benimawakin nun matu pewakubainidan, jaska epabun jatun bakebun chakabuwai nemamis keska wakin man Dios jiwxunkin jaska bechipaiai keska matudi man inunbun nun matu yunua matun chakabu unantant man jenebakainimaki. Jaska Diosun jawen mae kayabi pepa anu matu jiwemakatsi ikai ma bebunkidi matu kenani jaskakidi nun matu medabewakubainimaki.

¹³Jaska wakin Diosun kakape nun matu yusinma ninkakin junibun yusian keska man shinanma jakia Diosun jancha besti chibankin shinankin man ikunwanyan jawen janchawen taexun Diosun matu shinan betsa wamakubainimaki. Diosun matu jaska waimawen taexun nun matu Dios kenwanxunkubainaii. ¹⁴Jamen betsadan, Jesúswen taea en betsabu inun en puibuun, Judea anuxun judiobun jawenabun Jesús ikunwainbu jatu ichakawabu Diosun bake Jesucristo ikunwain yumanibu keskai jabiaskadi wakin matunabundi matu ichakawabu matudi man nuitapaimabuki. ¹⁵⁻¹⁶Ja

judiobudan, ja dukun jatun xenipabu betsabun Diosun jancha yuixunikabu betsabu u unuatian jatu tenankubidanixun januxun jabiabun bababundi nukun Xanen Ibu Jesús tenandianixun nukudi ichakawakatsis ikin nuku kainmakin jaska Diosun bechipaiai axuanma nuku putakubainimabuki. Januxun Diosun judiobumadi jatu shinankin jabudi mekekatsi janu jatu anu nuku yunuima nun matube janchaya judiobun nuku nemapaikin judiobu inun judiobuma jatube dasitan jatu nukuki sinatamakubainkanikiki. Jaska wakin jatun chakabu betsa betsapa ana matsankin ichawakubainaibuwen taexun samama jatu kupichakayamakatsi Diosun jatu manakaki.

Tesalónica anu Pablo ana bai kakatsi inikiaki, na janchadan

¹⁷En betsabu inun en puibuun, matu anuxun nuku bika tenemabu nun juima uxe ichapama matu shinankin manui matu ana uin kanun, iwanan, Dios matu yukaxunkin nun matu shinankubainai. ¹⁸Jaskakunkaini nun matuki ana bai kakatsi ikaya en Pablo en yubakabiakunkainaya Satanásan ea bextenun ixun nuku nemaimaki. ¹⁹Nun jaskakunkainki nun matu yusintanima shinan betsama ikunwan bestikin betsabu ikai keskama jatu binui man jawa chintuanmawen taea janu kupiaitian nukun Xanen Ibu Jesús ja nun manaka juaya nukun benima pae matuwen taexun tsuan nuku mebintiduma nun unaiin. Jaskai nun benimaya matuwen taexun Diosun nuku kenwanxanikiki. ²⁰Matuwen taexun Diosun jawen kushipawen nuku duawakin nuku benimawaikiki.

Timoteon jau jatu uintanun Pablon yununiaki, na janchadan

3 ¹Matuwen nuijaidakin matukidi unankatsis ikin ana nun

tenetidumawen taea Atenas maewan anuxun ea inun Silvano manakai jiweyuxun ²nukun betsa Timoteo nukubetan Cristokidi kakape yusinmis matu anu nun nichinmaki, jau matu shinan chankanwankin jau matu ana kushipa wai kanunan. ³Ja inun, jabun nuku ichakawabiaibun Diosun nuku jatube jiwemai man unainwen taea jamapai bika shadabu mei yumanbiajawa dateyamakanwen. ⁴Jaskaken Jesús ikunwandiabuman nuku ichakawaibu nun yumanxanaikidi matu yusin kaimaxun bebunkidi nun matu yuikubainimaki. Na eskatian jaska nun matu yuima keska uinkin man ma tenekin meaii. ⁵Matukidia kaka ninkakatsis ibiai tsua yukatima matu shinain: “Satanásan jatu padan ma chintunshinabumenkain ika datei Jameen nun jatu yusinmamenkain”, ikin ean en ana manatiduma matu anu Timoteo en nichinmaki, jaskamen man ikunwankubainai jau nukuki chanikin nuku banabimayuxanunan.

⁶Jakia man ikunwain chintuanbuma inun man bechipainamei jeneama Tesalónica anua jaska kaka Timoteon ninkatanshinxun nuku yuia ninkai jaska nun matuwen nuiai keskadiai matundi nuku ana beisnun ika man nukukidi shinain matu uintani jushinxun nuku yuikin benimawashinaki. ⁷Jaskaken en betsabu inun en puibuun, nuku bika tenemakin yumanwanbiaibun ja shinanma man Jesús ikunwain chintuanbumaken jaska matu ninkatan jawa ana matuwen dateama nun shinan chankaiin. ⁸Jakia nukun Xanen Ibu ikunwain man chintuanmawen taea nun ana jawa punu nukama matuwen benimai nun jiwea. ⁹⁻¹⁰Janua nukubu matuki ana bai kaxun ana matu yusinkin kushipa wakin jaska nun matu yusin keyudiamma matu yusin kakatsis

ikin meshu medan inun badidi nun matu Dios yukaxunkubainaii. Man jaskakin ikunwain chintuanbumawen taexun man nuku benimawaya jaska waxun matuwen taexun Dios nun kenwankin keyutidumaki.

**Pablo Diosbe janchakin
dayuikubainikiaki, na janchadan**

¹¹Jaskaken nukun Epa Dios inun nukun Xanen Ibu Jesúsun nuku medabewakin jau matu anu nuku nichinkin nuku yunuxanunbunwen, nun matu uin kanunan. ¹²Ja inun, nukun Xanen Ibun jau matu ana ewawakin bechipainamemakin nui ichapa matu inankubainunwen. Matu jaska wa jayatan ikunwain betsabuwen nuikin yudabu dasibiwен nuitishada ikubainkanwen, jaska nun matuwen nuikunkainai keskaidan. ¹³Jaskawen taea nukun Xanen Ibu Jesúsun matu shinan mestenwankin matun jamapai chakabu bextenixun man jawenabu jawa chakabu matukidi metutidubuma man jiweken jatianda nukun Xanen Ibu jawen tsumabube ana juaitian nukun Epa Dios bebun man nia jau matu uinxanun jaska matukidi en shinaiin. Jaskakidan.

**Eskai jiwekin Dios benimawatidubu
Pablón yununiaki, na janchadan**

4 ¹⁻²En betsabu inun en puibuun, Jesúsun nuku yununi jawen yusian nun matu yusintanima man unainwen taexun kenewendi nun ana matu kenexunai uindakanwen. Jaska badi tibi Dios man benimawatidu nun matu yusinkubainima man akai keska wakin ana jabiasdi jeneama akubainxankanwen, iwanan, nun matu ana yunuaii. ³Jaskaken Diosun matu pepa besti wanun, iwanan, matu yunukin: “Ainbu min ainmawen kemuama inun, juni min benemawen

kemuama jaska ja dabe man jaya jatun ainbe besti jau chutanamekubainunbu nwen”, iwanan, shinanmiski, Diosun.

⁴⁻⁵Jaska inun, Dioskidi unanma inun ikunwanbuman ainbuaibu tibiwen kemukin chutabaunmisbu keska iyamakubainkanwen. Jakia Jesús ikunwain ainyankatsis ikin xabakabi Dios uinmai pe jiwenun ika jabe biakanantan nuitkaawama jatun mabu mekei jau pe besti ikubainunbunwen, jatun ainbe menamei chutanameidan. ⁶Januxun bebunkidi nemakin jaska nun matu yuima ana ninkaidakanwen. Tsuabunda juni betsa padankin jawen ain mekin jatu ichakawaibu Diosun jatu kupixanikiki. ⁷Jakia nun jaska chakabui atimapakunkainmis Diosun bechipaismaki. Jaskawen taea nun pepa bestikubainunbu jawenabu wakin Diosun nuku katuniki. ⁸Januxun tsuabunda na yusian danankin junin yusian dananma jakia Diosun jawen Yushin Pepa matu inanmis danankanikiki.

⁹⁻¹⁰Ja inun: “Jesús matubetan ikunwainbu jatube bechipainamei jatuwen nuikubainkanwen”, akin Diosun ibubis matu yusinkin yunuima tapinmaxun man akai Macedonia mai pakeanuxun ikunwain dasibibun man jatube jaskaiwen taexun jawa ana betsa maewama nui bechipainame chakayamakunkaini bextekeama ipakekanwen. Man jaskakunkainaiwen taexun ana jaskakidi nun matu kenexuntidumaki. ¹¹⁻¹²Jakia jaska nun matu yusinkin nun matu uinmatanima man nuitkaabukidi shinanma chikishama ea iki daketapama matun mekenen dayakunkainkin matun jamapai bikubainkin unanuma jiwekin jatu yuanmayamakanwen, man jaskaibu ikunwanbuman matukidi pe uinkin jawa chakabuuma jau shinanunbunan.

**Jesús ana juidan, eskakidanxanikiaki,
na janchadan**

¹³En betsabu inun en puibuun, Jesús ikunwain betsa mawaya man punu nukayamaxanun bun matu yusinun ea ninkakanwen. Jesús ikunwain mawai jabun Jesús ikunwanma keskabumaki. Jaskawen taea kaxai bis ichakayamai: “Ana jiweamaki”, iwanan, shinankin yuiyamakubainkanwen. ¹⁴Jakia nukudan, nun ana jaskakidi shinanmaki. Jesús mawa Diosun ana bestenwani nun ikunwaiin. Jaska wani ikunwain nukudi nun mawa Jesús bestenwani keska watan ja juaitiandi Diosun nukudi bestenwantan Jesúsbe nuku iyuxanai nun unain.

¹⁵Na eska matu yuikin jaska nukun Xanen Ibu nuku yusini matu yusinun ninkakanwen. Jesús ana juaya jaki nukui nun ikunwain jiweabu nuku dukun nun bebuama ixanaii. ¹⁶Jakia Dios nai anua sai ikin jawen nai tsuma xanen ibu yunua jatun dasibibu ichawaya Diosun trompeta jawen nai tsuman chan chan akaya nai anua nukun mekenan Cristo butui xaba puchinin nikken Cristo ikunwain mawanibu jabu dukun Diosun ana bestenwantan ¹⁷nuku nun jiweabudi jatube Diosun nuku ainiaya nai kuin medan Jesúski nukutan nun jabe jiwepakexanaii, ikibi ikidan. ¹⁸Jaskawen taea na yusian jancha ninkai ana jawa dateama shinan chankain jatube benima namedikubainkanwen.

5 ¹⁻²En betsabu inun en puibuun, badi jawen jeneai anu nukun Xanen Ibu juxanai tsuabunda manama shinanma juni yumetsu meshu medan jawaida jumis keskai Jesús jawaidakidanxanai man ma unanyan jatianda juxanai nun ana jadidi yuikin matu kenexunamaki, man ma tapinkenan. ³Jaskaken ana jawaiki yudabu dateama yuikin:

“Unanuma jiwei jawaki mesei dateama jiwekubainankanwen”, ikubaini ana jawaiki mesei dateabumaken Jesús ana niti ikama jawaidakidan jatu kupixaniki, ainbu bake kainun ika isin bedukutan ana maianma kainmis keskaidan. ⁴Jamen en betsabu inun en puibuun, matudan, man ma unanepabuki, tsuanda kakape tapinkin ikunwankatsi ikabuma keskamadan. Jatianda nukun Xanen Ibu jui jaskakidanxanikidi ana matu yuinun ninkakanwen. Juni yumetsunun ika jawaida jatianda tsuan unanmaken jumis keskai nukun Xanen Ibu bebunkidi tsua yuiama jawaidakidan taxnixanikiki. Jaskaya jabun ikunwankatsi isbuma meshu medan jiweabu keska teku iki: “Jabaa!” ixankaniki. Jakia jabun ikunwainbu jawa dateama ixankaniki, nun ja manakamis juayadan. ⁵Jaskawen taeadan, matudan, dasibibun Jesús man ikunwain man ma xabaki pesea keskabuki. Jakia nukubudan, nun meshu anua keskabumaki. ⁶Nun jaskawen taeadan, yuda betsabu jawa unanma uxamisbu keskama chikishyamakubaina nkanwen. Jakia ibubis mekekin pe besti shinankin jaska Jesúsun mia bechipaiai keskai chibankin manakubainkanwen. ⁷Jamen, ja meshu medan keska jiweabudan, uxabu inun paemisbu keskabuki, jawada ixanai unanbuma inun jatiandi Cristo ana juxanai shinanbumadan. ⁸Jakia nukubudan, nun ma meshua anua xabaki taxnia keskabu nun ikunwankin pewakubainmiswen taea nukun Xanen Ibu ana juxanai jawa jakimama manakubainankanwen. Nun jabubetan ikunwain betsabube duapai bechipainamei medabenankin nukun Epa Dios ja bestiki chiti ikubainankanwen. Nun jaskaibudan, romano soldadobun jawen yuda junenun, iwanan, mane tadi manankidia

sawemis keskai jawaki dateama nun pe mekeia jiwetidubuki. Jaskai jawa dateama nukun Xanen Ibu manakin jatun besti nuku mekexanai nun manaii. Jaskakin jau soldadobu tsuan jatu deteyamanun bun jatun buxka mekekin junekin mane maiti sawemisbu keskai nukudi dateama pe mekeia nun jiwetidubuki. ⁹⁻¹⁰Chanim a nukuwen taea Jesucristo nuku mawaxuniwen taexun Diosun nuku jawen kupikatsi ikama nun jiweabu inun nun mawabu nukun Xanen Ibu Jesucristowen nuku meketan nuku jabe jiwemaxanai nun unaiin. ¹¹Jaskawen taea ana Jesús ikunwankubaini jeneama betsabube benimai kushipanamekubainkanwen, man ma ikunkainmis keskai jeneamadan.

**Jaskai ikunwainbun shinain jiwenunbun
Pablón jatu yununikiaki, na janchadan**

¹²⁻¹³En betsabu inun en puibuun, matu medabewanikabun matu medabewakin nukun Xanen Ibun daya akin jaska man kaneaibu matu pewakin yusainbu jatukidi pechiamma jatu shinankin bechipaikin duawadiakubainkanwen, jatun daya pepawen taexunan. Ja inun, matubetan ikunwainbube unanuma jiwekubainkanwen. ¹⁴En betsabu inun en puibuun, nun ana matu yunuai ninkaidakanwen. Dayama chikishaibu jatu yusin pewakin jatu ja akubainkanwen. Ja inun, jatunmebi jawada chakabuwatan kasmai ninkatan bextekei babuaibu jatu medabewakubaindiakanwen. Ja inun, betsabun dama ikunwainjuinti xubu jeneama jatu medabewakubaindiakanwen. Ja inun, yudabu jiwe chakabu jaskaida jatuki sinatama unanxubida jatu tapinmakubainkanwen. ¹⁵Ja inun, yuda betsan matu chakabuwaibu ana jatube manakunama man pepakatsis

ikaidan, jaska chakabu juai tenetan pepakin ikunwain betsabube medabenankin man akai keska wakin mai jidabi anuabu yudabu axundiakin jatu medabewakubainkanwen.

¹⁶Jaskakubaini benimai jeneyamakubainkanwen. ¹⁷Jamapai tibikidi jawaida shinantan Diosbe janchakubainkanwen. ¹⁸Jawada tibi man jaya inun man jayama jaska Diosun matu unainwen taexun ja besti kenwankubainkanwen, man jaskaibu Diosun matu bechipaikiki, man Jesucristo ikunwainbuwen taexunan. ¹⁹Tsuabuda Diosun Yushin Pepatun medabewa jawen kushipawen dayaibu nematimaki. ²⁰Jaska inun, Yushin Pepatun Dios janchaxunika wakin yusinmai dananyamakubainkanwen.

²¹Tsuabunda yuikin: "Diosun jancha en matu yusiaiin", ikin jatu yusiaiinbu jaska Diosun jancha kayabi yusinmenkain unanti wakin ninkakubainkanwen. Diosun jancha yusin pe waya unantan ikunwankin ja yusian man chibantidubuki. ²²Jamapai chakabu shadabu danankubainkanwen, ninkamadan.

²³Nukun Xanen Ibu Jesucristo juaitian dasibibu man tsua chakabuuma Dios jamebi unanuma jiweatun matu medibi pepajaidawakin matun jamapai chakabu putamakin matu mekekubainkatsi matun shinan inun matu yushin inun matun yuda jawa chakabuma jau matu pe bestiwakubainunwen. ²⁴Jaska wakin Diosun matu katunixun jenebaianama matu pepawakin menexuanxanikiki.

²⁵En betsabu inun en puibuun, jau nukudi medabewanun nuku jakimama Dios nuku yukaxunkubainkanwen.

²⁶Ja inun, ikunwain beaibu matun betsabube kayabi keska wakin jatu ikin beyawakubainxankanwen, benimawakinan. ²⁷Jaskaken nukun

Xanen Ibun ea kushipa waniwen
taexun matu yununun ikunwainbu
dasibibu ichati tibi anuxun na kene en
matu bumakin ynuuai xabakabi jatu

yuixunkubainkanwen. ²⁸Man jatu jaska
waya nukun Xanen Ibu Jesucriston jau
matu dasibi duawakubainunwen.

Jatiski, en janchadan. *Pablo*

TESALÓNICA ANUABU PABLON JA KACHU JATU KENE BUMANIKIAKI

2 TESALONICENSES

Pablón jatukidi shinanikiaki, na janchadan

1 ¹⁻²En Pablón, en medabewanika Silvano inun Timoteobetan en ana matu kene bumai uindakanwen. Tesalónica maewan anuxun man ikunwainbu nukun Epa Dios inun nukun Xanen Ibu Jesucristobe man dasiken Diosun matu duawakin jawama unanuma jau matu jiwemakubainunwen.

Jesucristo ikunwainbu Pablón jatu shinankin kenwankin Dios jatu yukaxunkubainikiaki, na janchadan

³En betsabu inun en puibuun, chanima matun shinanen Jesús ikunjaidawai man ma yumei kushipai en matu unaia. Jaskakin ana jeneama ikunwain betsabube kushipai nui jenenameyamakubainxankanwen. Man jaskaya matukidi shinankin Dios matu yukaxunkin matuwen nun Dios kenwankubainaii, jaska nuku yunuayadan. ⁴Janua matu ichakawakin yumanwanbiaibun ikunwain kushipai man jawa chintuanma ikunkainaya jaska shinankin janu ikunwain ichamisbu tibi anuxun benimai nun matukidi chanii nun janchakunkainaii. ⁵Bika tenei man jaskaya Dios kaneismatun yuda dasibibu unankin matun pepawen matu unanti watan matukidi pe shinanyan janu Dios

xanen ibumis anu jabe man jiwenun matu jikimaxanai nun unaia.

⁶⁻⁸Jamen jabun Diosun jancha tapinkin Dioskidi shinankatsi ikama inun Xanen Ibu Jesúsun jancha chibankatsi ikabuma jatu manakukin kupinun ika jui nai anua chi jede nakua Jesús jawen nai tsuma kushipabuya jabube taxnikidan jatu kupi juxanikiki. Na jaska bika tenemakin nuku nuitapawaibudan, jaska Diosun matu jatu bika tenemaidan, jawen dateyamakanwen. Jaska wakin jabun matu nuitapawamisbu jatu bextetan matu inun nuku ichakawamisbu binumakin nuku juindunkunkakin unanuma nuku jiwanmaxanikiki. ⁹Jamen nuku jaska wamisbuwen taexun jabu kupikin nuitapawadiakin ikibi imakin jawen kushipa paewen benukin inun jawen chaxa pepa jawendua jatu uinmakatsi ikama ja bebunga chajaida jatu putaxanikiki. ¹⁰Jaskaken jawada nukun Xanen Ibukidi nun matu yusin chanitanima man ikunwainwen taexun jatianda nukun Xanen Ibu janu juaitian dasibi mai jidabi anuxun nun ikunwanbaunaibun chanima uintan duawakin nun kenwanxankanaii.

¹¹Jaskawen taea Diosbe janchakin matukidi yukakin nun jeneismaki. Diosun matu kenakin katunixun pepabu matu wakatsis ikaikidi matu

yukaxunkinan, man ikunwainwen taexun jawen kushipawen jamapai pepa akin betsabube medabenamei man jiwekubainunbun en matu ea axunkubainai.¹² Jaska en matukidi Dios yukaxunmiswen taexun matu uinkin nukun Xanen Ibu Jesús dasibibun kenwanxankanikiki. Man jaska waibu Jesúsun matu duawakin matu kenwandiaxanikiki, jaska nukun Epa Dios inun nukun Xanen Ibu Jesucriston nuku bechipaikin jaska shinankubainm isdan.

**Jesús ana juxanaikidi Pablon xabakabi
jatu yusiniaki, na janchadan**

2 ¹En betsabu inun en puibuun, badi jawen jenei keyuaitian dasibibu nuku ichawanun ika nukun Xanen Ibu Jesucristo nai anua ana chintunkidan jua nun jabe ichaxankanaikidi matu yuinun ninkakanwen,² eska taxnixanaikidi bebunkidi nun matu ana xabakabi yusianan. Tsuanda Yushin Pepatun yuia keska shinankin: "Nukun Xanen Ibu Jesús ma juaki", ikin matu padainbu inun, yusian betsa tapintan: "Jesús june ma juimakiaki", ikaibu inun, nukuki padana en kene keska buxun matu yuikin: "Pablo eska chanikiki, Jesús ma juimakiaki", ikin man jaska tapianma ibiaimaken matu padankin yuia akeakeaibu ninkatan e iki juinti metexeketan matun shinan jawaida maewai jatuwen dateyamaxankanwen.
³⁻⁵ Ja inun, matube jiwexun jawada en matu yusintanimadan, man ma daki jakimai ikai matu ana yuinun ninkakanwen. Dios ikunwainbu ichapabun Dios danain chintuinbun Jesús juxanai ma kemaya juni chakabu kushipa bebunkidi ja dukun juxanikiki, ja juni chakabun ibudan, jau Diosun kupiti tenechakayamaxanun Diosun ma jaki tanaxun pewanidan. Ja Dioski

sinatamistun Diosun yunuti inun jawen nemati danankin jamapai tibi kenwankin chibainbu nemanun, iwanan, jamapai dami shadabu kenwanmisbu jatu binukin maematan jamebi kein janua Templo Jerusalén anu tsauxun yuikin: "Eadan, en Dioski", ixanikiki. Jaskawen taexun jau matu padanyamaxanunbun jatu jawa ninkamayamaxankanwen.⁶ Ja juni chakabu jawen yuba idiamaken natian kainmayuama tsuanda nemayukubainai man unain.⁷ Ja juni chakabu Satanásan kainmaxanaidan, ma june yubakai dayaikiki, yudabu padankin chakabu ewawaidan. Jaskabiaya jatun nemakubainmisxun jenea janua ana nemamaken taxnixanikiki.⁸ Janua ja juni chakabu taxniken nukun Xanen Ibu Jesús dasibi jawen chaxa kushipaya jukidan ja juni chakabun kushipa mebinkin paismawatan jawen jaxpawen xuun akin kupikin tenanxanikiki.⁹ Ja juni chakabu jawen xanen ibu Satanásan kushipa wakin medabewaya dami atimaska betsa betsapa wakin yudabu padanxanikiki.¹⁰ Jabun Diosun kakape Jesúswen mekekatsi iki bechipainameama dananankin chanima jancha danainbu ja juni chakabunan, chakabu atimapa betsa betsapawen jatu padanyan jaska uintan chibainbu¹¹ jaskawen taexun Diosun chani yushin jatu padanmaya jaska chani jancha kenwainbu¹² atimas janu kupaitian ja jancha chanima danankin chakabu besti bechipaibu Diosun jatu jawen kupixanikiki.

**Jawenabu wanun, iwanan, bebunkidi
Diosun jatu katuniaki, na janchadan**

¹³ En betsabu inun en puibuun, Dios matuwen nuikin matu bechipaikin bebunkidijaida matu katuniwen taexun chanima jawen paxati man bixanai jawen Yushin Pepatun matu medabewai

kai ma matukidi pewaniken chanima man ikunwanyan jaskawen taexun matu medibi waniki. Man jaskaken Dios nun matukidi pe kenwanxunkubainaii.
¹⁴Kakapekidi datan akin nun matu yusianyan Diosun matu ikunwanmaniki, jau nukun Xanen Ibu Jesucriston kushipaki dasitan man jawenabu ikunkainxanunbunan.

¹⁵Jaskawen taea en betsabu inun en puibuun, matu jaska wakin katuniken nukun yusian beya bena jadi matun mae anu kaxun ibubis nun matu yusintanima inun nukun kenewen nun matu yusiainan, jakimama chibankubainkanwen.
¹⁶⁻¹⁷Januxun nukun Xanen Ibu Jesucristo jamebi inun nukun Epa Dios nukuwen nuikin bechipaikin nuku duawakin nuku shinan chankanwan niti ikama nai anu nun jatube jiwanikan manakamakin nuku yubaniki. Janua mestenwantan matu juinti shinan chankanwankin matu kushipa wai jeneama jamapai yuikin man akai pepas jau matu amakubainunbunwen.

Nukun dayakidi Dios nuku yukaxunkubainkanwen, jatu wanikiaki, na janchadan

3 ¹En betsabu inun en puibuun, nun ma matu kene keyuxunai uindakanwen. Jesúskidi kakape ninkaxun man shinan betsa waima keska wakin nanta manibaunabundi jabundi Jesúskidi kakape ninkatan jau jawaida shinan betsa watan Dios kenwandianunbun nun jatu yusinkubaunaya Diosbe janchakin kushipa nuku yukaxunkubainkanwen.
²Ja inun, dasibibun Jesús ikunwanbumawen taexun yuda betsa chakabubu inun dakeisbuman chakabuwakubainkin nuku ichakawaibu jau nuku nemaxunun Dios nuku ea

axunkanwen. ³Jaska wakin Satanásan matu kanemakatsis ikaya nukun Xanen Ibu nuku jakimaismatun nuku xununbainama matu kushipa wakin mekekin chakabu matu binumakubainxanikiki. ⁴Ja inun, nukun Xanen Ibube nun jabe dasitan matu yusintanima jawa jeneama chibankin man jabias akubainxanai jaskakidi nun matu ikunwaiin. ⁵Epa Dios nukuwen nuimis keskai betsabube man nuinameaidan, jaska Criston bika tenei jawen kushipa babuama ini keskai matudi man babuyamanunbun jau nukun Xanen Ibun matu medabewakubainunwen.

Chikishbu tapinmatikiaki, na janchadan

⁶En betsabu inun en puibuun, nukun Xanen Ibu Jesucriston nuku yunumiswen taexun nun matudi yunuai, ninkakanwen. “Nukubetan Jesís ikunwankatsi ibiai tsuada nun yusiajin chibanma inun beya bena nun matu yusinma danankin akabumadan, ana jatukidi shinanyamakubainkanwen”, jatu dakewakinan. ⁷⁻⁸Jamen eadan, matube jiweyuxun jawa tidumakin matu daketapawama tsuabunda piti nun jamen pianma ikimaki. Jaskakin nukun jamapai ibubis bi badidi inun meshu medan dayachakayamai yumankin nun matu bikawama ikimaki. Matube jiweyuxun nun matu uinmaima keska ikubainkanwen, tsua Jameen ea iki daketapamadan. ⁹Ja inun, nun Jesúsun kushipayabun matu yusinkubainkin jawen taexun matun piti nun yukatidubia nukun piti inun nukun tadi jawen biti man nuku dibibiaken nun matu jawa yukama ikimaki. Jakia ibubis mekenen dayai jaska nun jiweyuskeskai matundi nuku chibain man jiwekubainxanunbun nun matu uinmaimaki. ¹⁰Jaska matu yusin

kainmaxun matu yunukin: “Tsuabuda dayakatsi ikama chikishaibudan, jau jatu pimayamadianunbunwen”, iwanan, nun matu yusinmaki.¹¹ Jakia matukidia chani juai nun ninkashinadan, jatididan, man chikish dayama jawawakatsi ikama kaka betsaa betsapa besti ninkatan betsabu yui man yuananan bestikubainkanikiaki.¹² Jaskaken nukun Xanen Ibu Jesucriston kushipawen nun matu yunuaii. Yudabu chikishbu yunukin tapinmakin: “Jaska besti jiwtidubuma jau tadi medibi jatun daya tapintan ana yuda betsabu xetukin yuanmama jau jatun piti inun jatun mabu jau ibubis bikubainunbunwen”, iwanan, matundi man jatu yununun nun matu yunudiaii.

¹³En betsabu inun en puibuun, jawada daya pepa aki man jawen jiwmesis akidan, punu nukai jin ikin jeneyamakanwen.¹⁴ Ja inun, nukun

jancha nun matu bumai jatidibun ninkakin tapinkatsi ikama jatun chakabu unain jau dakenunbun ana jatube mapuyamakubainkanwen.

¹⁵Jakia jatuki sinatama min betsabube min ikai keskakin jatu jancha chakabuwama jatu yusinkin nema bestikubainkanwen.

¹⁶Nukun Xanen Ibu jamebi jawenabu unanuma jiwmekubainmistun matudi unanuma jiwmakin jawada badi tibi betsaa betsapa man akai jau matu uindakubainunwen.

¹⁷Ea Pablon, en jancha matu bumakin jaska ibubis en mekenen kenekin en keyumis keska wakin en matu axuaiin, en tsumapan ana ea axuanmakenan.

¹⁸Jaskaken nukun Xanen Ibu Jesucriston jau unanuma jawama matu duawakubainunwen.

Jatiski, en janchadan.

Pablo

TIMOTEO PABLON JA DUKUN KENE BUMANIKIAKI

1 TIMOTEO

Pablón Timoteokidi
shinanikiaki, na janchadan

1 ¹Ea en Pabloden, Dios nukun mekenika inun Jesucristo jawen yubakaniken nun jiwxanai nun manaitun Jesucriston kushipaya ea waxun ea yununibuki. ²Timoteoon, en mia kene bumai uindawe, min Jesucristo ikunwainwen taea min en bake kayabi keskakidan. Nukun Epa Dios inun nukun Xanen Ibu Jesucristo miwen nuikin jau mia unanuma jiwemakin pewakin duawapakekubainunbunwen.

**Yusian pepadan, chakabube
jusitimakiaki, na janchadan**

³Macedonia mai pakea anu kakin Efeso anuxun min jatu pewakin min jatu medabewayunun en mia bashibidiana keska jabias en mia ana yunuaii. Tsuabunda ja jatun yusinanbun jatun shinan medibis jau jatu yusinchakayamanunbun jatu nemakin pewawe. ⁴Tsuabunda jatun xenipabu jiwenibu tanakubainaibu inun jatun xenipabun beya jawendua keska jatu yusin chakaibu jau ninkayamanunbunwen, ja miyuidan, jamenkidan. Jaska yuimisbube janchanamei jau jamenyamanunbunwen. Jaska Diosun bechipaiai jawa jatu

amakin medabewatidubumaki. Jakia Jesucristo ikunwankin besti jaska Dios yubakani bechipaikin ikunwain besti man jiwedidubuki.

⁵Na jaskakidi shinankin en mia yunuaidan, tsuabuda jatun juinti detsisma pepawen shinankin dakeama Jesucristo ikun kayabi waibu jau jatuwen nui nun jabube bechipainamekubainunbun jaskabu besti ikunwainbu chanima jatu yusinkubainwen. ⁶Jaska tibi besti yui ja iki inun jamen jancha chakabu chibain yusian pepa chibanma kanekanikiki, jatun shinan jusitan benuidan. ⁷Jabudan, yusian kayabi unanmabia Moisin keneniwen yusinanpanpaikin jatunmebi yuibiai jabun ibubis ninka pewama inun yusin pewai keska shinain: “En pe jatu yusiaiin”, ikin yuimisbuki.

⁸Jaska Diosun shinankin Moisés kenemanidan, tsuabunda jaska jawen shinan chibankin nun akaidan, jaska pe nun unankanaii. ⁹Jidabibun shinanankanwen, jaska nemati tibi yununi inun yunumisbu jayadan. Jaska tibi kenekinan, pepabukidi tanakin akabumaki. Jakia eskawen taexun anibu keyuismaki, jatun xanen ibu ninkabiakin jawen jancha chibainsbuma inun, chakabu tibi akin Dios sinatamamisbu inun, Dioski kaxekin jawen kenwantiki

meseisbuma inun, jawen epa kasmai jawen ewa jaki pubenkin tenainbu inun, yuda betsaki sinatakin tenanmisbu inun,¹⁰ chutabaunmisbu inun, juni dabe chutanamemisbu inun, ainbu dabe chutanameaibu inun, yuda betsabu yumetsuxun jawen pei bikatsi dayadu wakin inanmisbu inun, chani chakamisbu inun, jamen uianmabia yuda betsaki yubakatan padananmisbudan, jaskabunaki, jaska jabun yusian kayabi chibainsbumadan.

¹¹Na nemati tibi jayawen Diosun kaka pepa jawen bakekidi Dios duapajaidatun ea yusintan jaska en chanikunkaunun ea yununiki.

**Pablowen nuikin Diosun
katunikiaki, na janchadan**

¹²Nukun Xanen Ibu Jesucriston ekidi pe shinankin en chintuntiduma shinankin ea duawakin jawen daya ea yuniwen taexun chanima jatun ea kushipa wa en kenwankubainai. ¹³Ja dukunan, Jesucristokidi chakabu yui jaki xechakakin ja ikunwainbu danankin en jatu ichakawayuniki. Jaskati dabanen Jesucristo en ikunwandiamma jaska en shinain inun jaska en akubainai Dios en benimawai dabanen en ibiaya ja en kaneaiwen taea Dios ewen nuichakayamaniki. ¹⁴Nukun Yavé Dios ja besti nukipajaidakin ea duawa chakayamakin jawen shinanwen en shinan ea betsa wamatian Jesucristo en ichakawabiaya ja ikunwainbuwen ea jatuwen nuitiwaniki, Jesucristowen taexunan.

¹⁵Na jaskadan, chanima kayabiki, tsuabunda ikunwantidubudan. Chanima Jesucristo mai anu taxnidan, chakabu wamisbu jau Diosun jatu kupiyamaxanun jatun chakabu buatan jatu mekenun ika juniki. Jamen eanan, chakabu wakin yuda dasibibu en binujaidaniki. ¹⁶Ea

en jaskabiaken Dios ewen dabanan ikin ea kupikatsi ikama jau Jesucristo ewen nuikin ea medabewakin jin jin ikin jawaida shinanbauns aismadan, ea uinmani jaska tsuabunda ea shinankin ewen taexun jabundi ea uinkin Jesucristo ikunwankin jiwea kayabi bixankanikiki. ¹⁷Janua Dios nun uintidumabia ja bestitun nuku mekei xanen ibujaidakunkaini niti ikama jiwmistun dasibi damiwani jeneama jau dasibibun kenwankubainunbunwen. Jaskakidan.

¹⁸⁻¹⁹Timoteoon, ebetan Jesucristo dayaxuni min en bake keskaki. Ea ninkawe. Jesucristo ikunwain jaki dakeama chakabu nemakin chanima jancha min jatu yusinpakenun Diosun jatu yunua Jesucristo ikunwainbu yusinan mekenikabun mia katunibuki. Jabiaskadi shinankin eandi en mia yunuaii, min kaneama ixanai unainan. Jakia yuda betsabu jatiditun Jesucristo ikunwankin taewabianixun chakabu metan ma chintuambuki, januxun kupixanai anu buidan. ²⁰Ja inun, Himeneo inun Alejandron jabiaskadi jatun jiweawen jatun yusian kanekin yusinchakaibu jau ja dabe ikunwainbube ana ichayamanunbun en jatu nemaimaki. Jabun shinain keska Satanásan jau jatu amanun en jatu jaska nemaimaki, ja Dioskidi chakabu yuiaibu ja ibubis keneaibun Diosun jatun shinan betsa watidu jau unanxanunbunan.

**Diosbe janchatikidi yusinikiaki,
na janchadan**

2 ¹Eска dukunkidi jatu yusinkubainwen. Yudabu betsa betsapabu Diosun jau jatu medabewakubainun Diosbe janchakin jatu yukaxunkin betsabukidi jatu ea axunkin janchakin jatukidi Dios kenwankubainkanwen. ²Diosun

yusian pepa chibain unanuma benimai jiwexun jawama pepa besti jawa dakeama nun jiweyukubainunbun xanen ibubu inun yununikabu jaska tibikidi jatu yukaxunkubainankanwen, jau Diosun nukukidi jatu pe shinanmanunan.³ Jaska nun jatukidi shinankin jatu yukaxunaidan, jadan, peki, nukun mekenika Diosun jaska bechipaimiskenan.⁴ Jatunan, jakidi jawen kakape chanima dasibibun unankin jau ikunwain mekexanunbun Diosun bechipaikiki.⁵ Jaskawen taea eska Dios jawen shinan jayaki. Diosdan, bestichaiki. Janua nuku itsa jabe janchaxunmisdan, bestichaidiki, ja Jesucristodan, Dios nuku daewaxuni janchaxunmisdan.⁶ Cristo tsuabunda ikunwainbu Diosun jatun chakabu buaxunxanaiwen taea Jesucristo jamebi mawakin jabun ikunwanxanaibu jatu mekeniki. Jaskaken na jabiatián Diosun yununi tsuabuda jakidi chanibauntidubuki.

⁷ Jaskawen taexun Diosun ea katutan jawen kakape yuixunika ea wakin Jesucriston kushipaya ea watan judiobuma anu na yusian Jesucristokidi chanima en ja ikunwain en chanikauanun ea yununiki. Na jaska mia yuikinan, chani chakakin en mia yuiamaki.

Ainbun jatun yuda dauamisbukidi jatu nemanikiaki, na janchadan

⁸ Jaska inun, betsadan, janixunda ikunwainbun Dios kenwanun ika icha junibu jau mexantan Diosbe janchakubainunbunwen. Jaskai Diosbe janchai jaska bestiama jaska Diosun bechipaiai benimawai besti jiwei jawa tsuki sinatama tsua ja akama jau pe besti medibi jiwekin jatu uinmakubainunbunwen.⁹ Ja inun, jabiaskadiai ainbuaibun ikunwain

mapuadian, jawenduaxun junibu kemumama inun jatun yudaki bachi jawen kemumati jatu shinainbu jau saweyamanunbunwen. Bu chunpia inun mane ichapa inun bachi kadujaida jaska bestiwen jau jawenduayamaku bainunbunwen.¹⁰ Jakia ainbuaibun Dios ikunwain benimawakinan, jaska bechipaiai nixun dayaxunkin jatu medabewakin pepa besti aki jawen dava itsai jau jawenduakubainunbunwen.¹¹ Januxun Diosun jancha yuiaibu anu buadan, jau pes bestixun yusiaibun jau jatu ninkakubainunbunwen.

¹²⁻¹⁴ Ja dukun damiwakin taewakinan, Adán Diosun damiwaniki. Ja kachu jawen ain Eva damiwadianiki. Adán Satanásan padanun, iwanan, yuama jakia jawen ain Eva padankin ja dukun chakabuwamaniki. Jaskawen taexun xanen ibukin ainbuaibun yunutiduma inun junibu yusintidubuma en jatu nemamiski, jau pesxun ninka bestikubainunbunan.¹⁵ Jakia ainbuaibun Jesucristo ikunwain pe jiwei betsabuwen nui duanamekin jaska Diosun bechipaiai axuin medibikin chibankubainaibudan, tsuanda bake bitan jatuwen nuikin pe yumewakubainmisbudan, Diosun ja ainbuaibu mekekubainxanikiki.

3 ¹Na janchadan, chanima jabiaskaki.

**Jatun mekenikai uinikabuidan,
eska itikiaki, na janchadan**

Jadatubunda Jesucristo ikunwainbu jatun mekenikakatsis ikidan, daya pepa akatsi ikaibudan, jaskadan, peki.² Na eska yunua daya bidan, jau eska tibi ikubainunbunwen. Duapa jakidi chakabu yuisbuma inun, ainyankatsi ikin ainbu bitan jeneisma betsawen kemuisma inun, jawen jancha kayabi binumakin kaneama pe shinankin akubainmisbu inun, jaki kaxeisbuma inun, bai mapuabu jatu itan jatu uxanmisbu inun, yusinanain

pekunkainmisbu itidubuki. ³Ja dikabi eska tibi meama shinanmisbudan, paeankidi shinainsbuma inun, detenamekatsi ikin shinainsbuma inun, mabu inun peiwen kemuisbuma inun, duapakatsis iki pepamisbu itidubuki. ⁴Ja inun, jawen jiwe anu jatube jiweabu jatu meke pewaxun jatu pimakin pewamisbu inun jawen bakebu jau jaska jiwenun bun jatu yunua chibain jawa chakabu mekin tsua bikawaisbuma itidubuki. ⁵Tsuanda jabe jiweabu jatu meke pewaismatunan, ikunwainbu Diosun enabu jaska waxun jatu pe meketidubumadiki. ⁶Ja inun, mekenika katukin dama ikunwankin taewabainai jawaida uintan katuyamakubainwen. Jamen dama ikunwain man jaska katua: "Ea besti en pejaidaki", iki keanyan Diosun Satanás putani keska wakin jaskadi wakin jatu putadiatiduki. ⁷Ja inun, ikunwanbuman ja juni pepa jawen shinan unantan jakidi pe shinamisbu besti uinkubainkin mekenika katutiki, Satanásan padankin jatu achia jawaida kanekin jau jatu uinmachayamaxanunan.

Medabewanikabu katukinan eskabu atikiaki, na janchadan

⁸Jabiaskadi wakin medabewanikabu katukinan, eskadi akubainkanwen. Junibun jakidi pe shinain jaki kaxeisbuma inun, jawada yubaka bestitan kaneisbuma inun, paeinsbuma inun, jatu bepadantara pei inun jatun mabu ibubis binumatan ichawaiusbuma jau ikubainun bun wen. ⁹Ja inun, Diosun yununi jawen baken kakape chanima unanjaidai jaskawen jiwekainkin ikunwain jatun shinan pepaya jau ikubainun bun wen. ¹⁰Ja dukun jatun jiwea pemenkain ixun uinkubainkin jakidi jawa chakabu kaianmabumaken unantan medabewanika dayanika katitudubuki. ¹¹Jabiaskadi wakin

ainbuaibudi medabewanika katukatsis ikinan, jakidi pe shinain jaki kaxeisbuma inun, jatun chani tuekin jatu ninkamaisma inun, patapai kaxeisbuma inun, dasibi jawen pepa jatu uinmakubainmisdan, jaska keskabu besti akubainkanwen, katukinan.

¹²Medabewanika junidan, ainbu bitan bake watan jabetan yumewai jabe putanameisbuma inun, jawen jiwe anu jawen bakebu inun jatube jiweabu jatu meke pewaxun jatu pimakin pewamisbu jau jaska ikubainun bun wen. ¹³Janua medabewanikabu pepakin Jesucristo dayaxunkinan, betsabu uinmai jawa chakabu amaken jabun kenwantidubuki. Janua Jesucristo ikunwainwen taea benimai unanuma jiwekubaintidubuki.

Chanima jancha xabakabi ja ikunwain eskatikiaki, na janchadan

¹⁴En jawaida samama mia uin kakatsis ibiai jaskabia en mia kenexunyuaii. ¹⁵En yane katiduma shinankinan, jaskai Dios jiweatun enabun chanima jancha Jesucristokidi jatun matu tsuma unankin chanima jancha besti shinain jawen nemakanain jaskai jiwei jau mekei penun bun jaskakidi min jatu yusinun bebunkidi en mia kene bumaii. ¹⁶Dasibi Jesucristo nun ikunwainwen Diosun nuku duawai nun unan keyutidumabia chanima xabakabi jaska wani jaska shinain tsuabuda jaskakidi yui nun jawen ja itidubumaki. Jakia jawen bake ikunwankin Dios nun benimawatiduki. Eskaki, mia yuinun ninkawe:

Cristo uidan, junin yuda bitan taxniniki.
Cristodan, jawa chakabu jayama pepa bestiki, iwanan,
Diosun Yushin Pepatun jawen jiweakidi yuiniki.
Bestenkaina Diosun nai tsumabundi uindiakubainibuki.

Ja inun, nawa betsa betsapa anuxun
Jesúsun tsumabun kakape jakidi
yusinkubaunaibun
ichapabun ikunwainbun Diosun nai
anu ana jawendi ainitan
xanen ibu wani nun unaiin.

**Jesucristo ikunwain
betsabu chintunxanaibukidi
yusiankiaki, na janchadan**

4 ¹Jesucristo ana jua kemaya jaskai
jabun ikunwain betsabu chintuin
bebunkidi jaskanunbadiaibukidi
Diosun Yushin Pepatun xabakabi
nuku unanmai mia yuinun ninkawe.
Jabun Jesucristo chibankin jenetan
yushin chakabu padananainbu inun
Satanásan tsumabun jatun yusian jabu
anua juai ninkatan chibankankanikiki.
²Ja yudabu bepadamenikabu inun
chanichakanikabu jabu jawaki
dakeisbuma jabun jatun yusian
chibankankanikiki. ³Ja junibun
yusianan, ainyain inun beneyatikidi inun
piti betsa tibikidi piaibu nemamisbuki.
Jakia Diosun piti shadabu damiwani
tsuabunda jabun Cristo ikunwainbun
chanima unankin Dios kenwantan
pitidububiaken ja piti betsakidi jatu
nemamisbu jabun mesewakin yusiaibun
ninkakin chibankankanikiki. ⁴Jamapai
piti shadabu Diosun damiwanan: “Peki”,
aniki. Jaskawen taexun jawada Diosun
nuku inan bixun pikinan, dananma
kenwantan jau pikubainunbunwen.
⁵Jaska piti tibi Diosun jawen janchawen
yuikin pewani shinankin jabe
janchaxun nun piadan, ma dasibi nuku
pe waxunkubainmiski.

⁶Na jaska jancha kayabi en mia
yuiaidan, nukun betsabu inun nukun
puibun ikunwainbun jabiskadi jatu
yusinkubainwen. Jaskakin jawen
ikunwanti jancha min jaya inun yusian
pepa min chibain ana jawen juinti

kushipakunkaini Jesucriston tsuma pepa
min ikunkainxanaii.

⁷Jakia jabu patapaibu inun
ikunwanbuman miyui jawama
yuaibu ninkai jatu anu nashui ikama
ikunkainwen. Jamen mia ikidan, jaska
Diosun mia jiwemakatsis ikai pepai
mimebi min shinanen mekei yudabu
uinmai jiwekunkainwen. ⁸Junin
jawen yuda kushipa wai pebiaken Dios
jiweakidi yubakani jancha unankin
chibankin jawen juinti kushipa waidan,
ja binua pejaidaki, natian nun jiwea
inun chipu uatian Diosbe nun jiwxenai
nun manakaidan. ⁹Ja jancha chanimaki,
dasibun ninkakin ikunwantidubudan.
¹⁰Jaskawen taea dayakin Dios
jiweatun yuda betsa betsapabu
medabewakatsis ibiaya tsuabunda
jawen bake Jesucristo ikunwainbu
besti jatu mekekubainxanaiwen taea
nun jabe jiwxenai manakakin jabias
jawen jancha nun yusianyan nuku
ichakawabiabu jatu ikunwanmanun ika
nun dayakunkainaii.

¹¹Jabiaskadi en mia yuiai yunukin
jatu yusinkubainwen. ¹²Min bedunan
juni ewadiamabiatun min jatu yusiai
jau mia dananyamanunbun pe
bestikunkainwen. Ja inun, min jancha
pe taxnimakin duapai jatuwen nuikin
Jesucriston yusian ikunjaidawakin
min ikunwain jatu uinmawe, jau
jaskadiakin yuda betsan ikunwantan
jiwediakubainunbun ikunwainbu jatu
yusinkubainwen. ¹³Nenua en mia anu
jikidiamaken nukun betsabu inun
nukun puibu Éfeso anuxun ikunwainbu
ichabu Diosun jancha jatu yuixunkin
benimawakin jatun juinti kushipa wakin
jatu pe besti yusinkin jeneyamawe. ¹⁴Ja
inun, min mae anuxun Jesucristonabu
mekenenikabun mia mamepixun Dios mia
yukaxunabu jawen Yushin Pepa mia
yunua mia kushipa wanidan, unanumas

jamakidi janchama jaska Diosun
mia medabewani jakidi besti janchai
dayakunkainwen, kaneamadan.

¹⁵Jaskai mimebi ana unanepai
shinan pepakunkaini dasibibun
jau mia uinunbun daya betsa
akama min kushipa jidabiwen
jatu yusinkubainwen. ¹⁶Mimebi pe
mekekin uindawe, jaska betsabu min
jatu yusiankidan. Dasibi shinan pe
bestiwai chintunyamakunkainwen. Min
jaskakunkainaya mia inun min jancha
jabun ninkaibu jatube Diosun pewen mia
manakuxaniki, jiwe kayabimakinan.

**Ikunwainbu betsabu
medabewakin shinantikiaki, na janchadan**

5 ¹Kaneaibu pewakin jatu ja
ayamakubainwen. Jakia anibu inun
mestebun kaneaya min epa keska wakin
jatu medabewakin jancha kushipawen
jatu bekunyan akama jatu pewen
shinanmakubainwen. Bedunan inun juni
ewan kaneaya min betsabu keska wakin
medabewakin jatu pewakubainwen.
²Yuxabun kaneaya min ewa keska wakin
jatu medabewakin pewakubainwen.
Chipash inun ainbu ewandi kaneaya
min puibu keska wakin medabewakin
jatu pewakubainwen, jatuwen
kemuamadan. Jaska wakin dasibibu jatu
medabewakubainwen.

³Ainbu ewa beneyabiani ana bene
jayabuman Jesucristo ikunwainbu
chanima nuitapa kayabiaya jawenabu
jayamaken Jesucristonabun duawakin
jau jatu medabewakubainunbunwen.
⁴Jakia beneyabiani nuitapaibu jatun
bakebu inun jatun bababu jayadan,
jabun dukun jau jatu medabewakin
jawen tapinkubainunbunwen,
jatunabu kayabibunan. Jaska
jatunabu medabewakin jatuwen
nuikinan, Dios benimawakin shinan
chankawantidubuki. ⁵Ainbu ewa

beneyabianibun Jesucristo ikunwain
jawenabu jayama Diosun jau jatu
medabewanun jaska manakakin badidi
inun meshu medan Dios kenwankin
jabe janchakin jawen piti inun jawen
mabukidi yukamisbuki. ⁶Jakia ainbu
ewa beneyabiani betsabun Diosun
jancha shinanma patapakin jawada
akatsi ikai amisbudan, jiwebia jawen
yushin ma mawaki. Jaskawen taea
Dios jatuki sinataikiki. ⁷Jaskaken
jau ikunwanbuman jatukidi chakabu
yuiyamanunbun ikunwainbu yusinkin
jau jatunabu medabewakubainunbun
jatu yunukubainwen, jatu
shinanmakinan. ⁸Jaskaken tsuabunda
jawanabuskidi shinankin jatuwen nuikin
medabewama Jesucristo ikunwanbiai
danankanikiki. Jatunabuwen nuikin
medabewamawen taeadan, jabun
ikunwanbuman shinan betsabu waisma
keska jabun ikunwanbiai shinan jayama
nuima chakabuki.

⁹Jabun ikunwain yuxabu 60 badiya
unudi kai beneyatan betsawen kemukin
jeneama ipauni enauma ikunwainbun
medabewatidudan, eska atiki. ¹⁰Jatun
bakebu ma pe yumewani inun, bai
beaibu jatun jiwtetan itan Jesucristonabu
betsabu duawakin beya wakin jatun
tae juchupaunibu natian jadi nuitapaya
medabewakin pe besti dayakunkaini
taexun Jesucristonabun ja pepabu
besti jatukidi shinankin jau
medabewakubainunbunwen. ¹¹Jaska
inun, ainbuai bu beneyabia jawen
benen jeneima kasmai mawai maken
yuxabudiamadan, jau ikunwainbun
jaska shadabu jau jatu tanatan medab
ewayamakubainunbunwen, Jesucristo
dayaxunkatsi yubakabiaima jakimatan
juniwen kemui ana beneyakatsis
itidubukidan. ¹²Janua ana beneyama
ikunwainbu medabewai jatube dayakatsi
yubakabiaima ibubis shinan betsatan

ja yubakaima ana shinanma kanei chakabuaya Dios jatuki sinatatiduki.¹³ Jaska inun, yuxabudiamma jatun piti inun jatun mabu inankin man jatu medabewaiwen taea jaska besti bi ana dayakatsi ikama jiwe tibi anu besti jikikunkauni chikish pikutidubuki. Ja chikish pikuimadan, jaska bestiamma jiwe betsa tibi anu tsauxun jatubetan chani yui inun betsabuki chanichakakin jaska chani yui beyatidubuki, jaskai chakabui pikuidan.¹⁴ Ikonwanbuman jau nukuki kaxeyamanunbun ainbu beneyabiaima ma jawen bene mawa kasmai jenebainima yuxabudiamman, jau ana beneyakubainunbunwen. Jaskatan bake bitan jatun jiwe medanua pe dayakin jau jatu duawakubainunbunwen.¹⁵ Uinwen. Jatidi ainbu yuxabudiamma beneyabiani ana beneumaken jatu medabewabiabu ana Jesucristo chibankatsi ikama Satanásan jaska bechipaiai chibainbu uinkin eska en mia yunuaii.

¹⁶ Januxun yuxabu beneuma nuitkaapai enayakenan, jau jawenabun medabewakubainunbunwen, ikunwainbukidi shinankin jatu bika wamamadan. Jakia ikunwainbu ichaxun yuxabu betsabu enauma besti medabewatidubuki, jatun piti inun jatun mabu jawa jayamaken jatukidi shinankinan.

¹⁷⁻¹⁸ Mekenikabukidi ana mia yuinun ninkawe. Moisin Diosun jancha kenekin: “Min jemaintin anuxun min ina awan jawen taewen min xekiwan pema pema akin mia xemexunaya disipiwen xenexyamakanwen, jau dabukun pinunan”, iwanan, yununiki. Jaska yuikinan: “Dayakapabu jau jatu pakakubainunbunwen”, ani keska wakin mekenikabu tibi jabun matu yusianbudan, jadatuda bestitun Diosun jancha matu yusin jenekatsi ikama matu yusinkin matu medabewakubainaibuwen

taexun matundi ja matun mekenika duawakin peiwen kasmai jawadawen medabewakin jawen jawada inankubainkanwen.

¹⁹ Jaska inun, mekenikatun chakabu wakin kaneaikidi juni bestichai miki chanikin jakidi mia yuiai ninkayamayuwe. Jakia mekenikakidi jabias chakabukidi dabe kasmai dabe inun bestitun mia yuiaibu: “¿Chanimenkain? ¿Chanimadaka?” ikin unanti watiki.²⁰ Januxun chakabu wakubainaibu pewanun itan Dioski jatu datemakin dasibibudi jau datedianunbun ichaxun ninkaibun pewakin jatu mesewakin xabakabi nemakubainwen.

²¹ Natianan, Dios inun nukun Xanen Ibu Jesucristo inun jawen nai tsuma katuabun jabun ea ninkaibun en mia yunu kayabiai ea ninkawe. Min jaibuaibu kasmai yuda betsabu tsuanda jamapai mekin chakabu washinamenkain, chakabu wamamenkain, bebunkidi chakabu shinanma dasibibu jabias ma miki chaniaibun besti unanti watan jatu pe wakubainwen.²² Ja dikabi jau tsuanda Diosun daya axunun katukatsis ikinan, jin jin, iwanan, uindiama mamepixun jawaida Dios yukaxunyamawe. Jakia jawen chakabu unandiamma kanekin min jawaida katukin: “¿Jawen chakabudan, unanma ikimenkain?”, iwanan, mikidi shinantidubuki. Jaska juni betsan chakabu min pewaxuntidumadan, mimebi mekekin uindakubainwen.

²³ Min jatu babu min isinkunkainmiswen taexun ana unpax besti akama uva vino juxkeishttan akubainwen, badi tibidan.

²⁴ Jaska inun, jatidi ikunwanbiakin yudabun bedubi chakabu wamisbuki. Betsabun june chakabu wadiamisbuki. Jaskaibu jatu uinbiamisbukan mian jawa unanma jawaida jatu katukin

mamepiyamakubainwen, chipu jatun chakabu taxnitidukidan.²⁵ Jabiaskadi wakin medabenankin pepawaibu bebunkidi unanmisbuki. Jakia betsabun chakabuwakin june abiaya atimas tapindiamisbuki.

6 ¹Jamen betsadan, tsuada juni betsan esclavo dayadutunan, Jesucristo ikunwankin jau jatun tsuma duawakin ninkai jau jatukidi pe shinankubainunbunwen, jatu jeneamadan. Jatu jaska uinmamaken Jesucristokidi nun jatu yusia inun Diosun kena yuda betsabun yuantedubuki, “Janis jatu yusinkanidaka”, nuku wamakinan. ²Ja inun, jatun tsumapan Jesucristo ikunwanyan jabatan ikunwandiadaan, jawen betsakeskai jau jaki mesekubainunbunwen. Uatian imisbu keskama jau dayai pexunkin jatu binumakubainunbunwen, jatun tsumapan jatu dayaxunbiamisbu jabatan ikunwainan, betsaknuikipa keskaya jau jaki chiti ikubainunbunwen.

Jawada nun jayawen besti benimakunkaintikiaki, na janchadan

Na jaska tibi yusinkin jatu tapinmakubainwen.³ Tsuanda jatu yusinkatsis ikin jatun shinan betsajaida itimaskakidi jaska jatu yusianan, nukun Xanen Ibu Jesucriston nuku yusini keskama inun jaska jakidi shinankin nun jatu yusinmis keskama jatun shinanan besti kenkin yusinkatsis ikanikiki.⁴ Jawen taea besti kein unanmabia ja iki jaskakidi shinain jamebi jatun shinan jatu atimapwa wamamisbuki. Eska tibi jatun shinan medanua taxnidan, jawada betsana ja jawena jaska jayama uin jaskai ja besti jaska jayamen iki sinataidan, yuananain betsabube danananaianan, bechipainameama xeti ikama jatuki ja ikidan,⁵ yuda betsabapsabube jatun yusian jancha kayabi

unanbumabe kemanamei jeneisma inun jaska ikunwankin yusiainwen taexun pei ichapa bitikidi shinankanikiki. Jatu uindakubainwen.⁶ Jaskakidi nukubun nun jadidi shinankin ikunwainbudan, chanima kayabiki. Diosun jawen pepa tibi mabu keyumis keskama nuku inain inun nuku inanxanaiwen taea nun benimajaidakunkainai. Jaskaken natian jaska nun jaya bestiwen benimayunankanwen.⁷ Na mai anu taxnidan, nun jawauma kainiki. Janua mawakainkin nun jawa buama idiaxanaii.⁸ Jaskawen taea Dios nun ikunwainbudan, tadi inun piti inun janu uxati jaya ja besti nun jayadan, jaskawen besti benimakubainankanwen.⁹ Jakia tsuabuda mabu inun pei bestiwen kemuaibudan, jabun jawa unanmawen taeadan, bidun tibi keska jatun kemupae tibiwen jatu achi keyua jaska tibi taxniaiwen taea jawa shinanma: “En peaii”, i bestikin jamapai chakabu jawendua besti bechipai jawen jiwe chakai pikukunkaini jawen jiwea benui janu kupiaitian jawa pepa biama benuxankanikiki.¹⁰ Pei inun mabudan, jatun kemuti pae chakabun jatu achia janu jayaki. Jaska mabu inun peiwen kemui Jesucristo ikunwainbu bestibu jas besti dayanun ika jaska bechipaiai jatun shinan pe jenetan ana Jesucristo ikunwain shinanma ma jakimawen taea janua jakidi jawen chakabu betsabetsapa taxnibidankin jatu nuitapawamiski.

Jesucristo chibankin jau pe besti yusinkubainun Pablo Timoteo yununiaki, na janchadan

¹¹ Jakia miadan, Diosun ma mia jawena wakin katuniwen taexun jawada chakabu betsabetsapa bechitan danain ana jadi kayamawe. Min pe dayai jiwekatsi ikaidan, min daya bikabiaken

Diosun mia unainwen taea ikunwain nui bechipainamei kushipai juinti kushiamma babutan jatu uinmai jatube jiwekunkainwen.¹² Jaska min jiwea ikibi ika bibiatan min benutiduma Diosun mia inankatsi mia kenakin katuniwen taexun jaska min ikunwain min ma ichabu anua xabakabi chanini jatu unanmakubainwen, Jesucristo chibain chintuanma dasibi Diosun mia yunumis dateama shinankin akubainkinan.

¹³ Diosun dasibi damiwakin jiwea jatu inankin keyumis inun nukun Xanen Ibu Jesucriston jaska xabakabi juni dateama romano xanen ibu Poncio Pilatoki chanikin ma yuinitun natian nuku uiainbun mia medabewakin en mia yunuai.¹⁴ Na jaska tibi en mia yunuai jaska chibankin min jiwea pe mekexun kaneama mikidi pe jatu uinmaidakubainwen, janu nukun Xanen Ibu Jesucristo kushipai juaitian jau mikidi jawa chakabu tsuan yuiyamaxanunan.¹⁵ Januxun Dios dasibi binu keyuatun jatun besti pepa meke keyua jatun yununika xanen ibubu dasibi inun xanen ibu bexmasbu dasibidi binu keyuatun janu nukun Xanen Ibu ana nukun anu taxnimakatsis ikin ma janu yubakani meneaya nichinxanikiki.

¹⁶ Ja ibubis mawatiduma inun, ja besti jiwemis xaba chaxakapa jiweaki tsua jadi jaki kematidumadan, tsuan uintiduma inun tsuan uinakama jiweaki. Jaskaken jawen kushipa pae nukaisma duawakin jau kenwanpakenunbunwen, niti ikamadan. Jaskakidan.

¹⁷ Tsuanda ikunwain jawen pei inun jawen mabu ichapa jayabun shinain: “Natian en mabu en jayawen en jawen jiwei peaki”, ikin jau ana jaskakidi shinain jawen kenyamanunbun jatu yuiwe. Ja jaskakidi shinanmisbudan, jatun mabu chapumiswen jatu mestenwantan jiwematidumaki. Jaskaken uatian imisbu jaska shinanma jakia natianan, Diosun nuku benimawakin jatun jamapai betsa betsapa yaushiamma nuku inankubainmis jaska besti bi jau jiwekubainunbunwen.

¹⁸ Jaska inun, jatun jamapai mabu jaya betsabudi paxkaxunti shinankin jaska Diosun bechipaiai aki jau pepakubainunbun jatu yunudiawe.

¹⁹ Jaska wakubainmiswen taexun Dios jatuwen benimakin jatun duapa pepawen badi jawen jeneaitian Diosun jatu manakuxanai chanima jiwekuian kayabi bi jaki nukununbadikanikiki.

²⁰⁻²¹ Timoteoon, min shinan mekeidawe, jaska Jesucristoki min chiti ikawen taeadan. Jaskai betsabu tatimai unanepanun ika kemanamei ana Jesucristo ikunwanma jatun shinan medibi watan ma chintuanbuki. Jaskaken mianan, ja janchachakaibudan, jatun yusian chakabuwen padananain: “Nukun jancha unanepati kayabiki”, ikin yusian pepa bextenun ikaibu jamen jatu ninkayamakubainwen.

Nukun Xanen Ibun jau jatube mia duawakubainunwen.

Jatiski, en janchadan.

Pablo

TIMOTEO PABLON JA KACHU KENE BUMANIKIAKI

2 TIMOTEO

Pablón Timoteokidi
shinanikiaki, na janchadan

1 ¹Ea en Pabloden, Diosun jaska shinainwen Jesucriston kushipaya ea wakinan, jawen yunuawen ea aniki. Jaska wakinan, jamen ea akama jakia jaska bebunkidi Dios yubakani jawen jiwea keyuisma ikibi ikakidi jaska shinankubainmis jaska jayawen taexun Jesucristo ea katumaniki. ²Timoteoon, en mia kene bumai uindawe, min Jesucristo ikunwainwen taea min en bake kayabi keskakidan. Nukun Epa Dios inun nukun Xanen Ibu Jesucristo miwen niukin jau mia unanuma jiwemakin pewakin duawapakekubainunbunwen.

Pablón Timoteo paxkabidanimaxun Dios kenwanxunkubainikiaki, na janchadan

³Punu nuka juinti nishma min bashikuimaken mia shinankin janu en Diosbe janchaitian badidi inun meshu tibi mia jakimama mikidi Dios kenwakin en mia yukaxunkubainmiski, ean Dios duawakinan. Jaska en shinan jawa chakabumakidi ea shinanmaya en akubaini, jaska nukun xenipabun Dios ikunwakin apaunibu keskadi wakinan. ⁴En mia paxkabidana min ewen nui kaxaya nenu juimaxun en mia shinan jeneamaki. Jaskawen taea ana

miki nukutan en mia ana uin miwen en benimakatsis ikaii. ⁵Ja dukun min chichi Loida inun min ewa Eunicen Jesucristo ikunwani chintuinsbuma keska jabias shinan miandi min ikunjaidawakin min shinan min betsa watiduma en unaiin.

Jesucristokidi yusin
daketimakiaki, na janchadan

⁶Jaskaken natian en mia yunukin yuaidan, ninkaidawe. Diosun jawen kushipa pepa jau mia inankin kayati wamanun mia mamepixun en mia yukaxuniki. Jabiaswen ana kushipai chi ketianbu ji imis keskai ana min kushipa babu wayamawe. ⁷Diosun jawen Yushin nuku inankin yushin babu dateti nuku inanma iniki. Jakia jawen Yushin kushipa pepa inun jawen bechipai nuinameti inun jawen nukunmebi nun pepakin shinantidu nuku inaniki. ⁸Mia jaska waxuniwen taea nukun Xanen Ibukidi yusin jakidi janchai jaki dakeyamakunkainwen. Ja dikabi, jawen taexundi nenu ea bichiabuwen taea ewendi taea ekidi janchaidi ewen dakeyamadiawe. Dateama eskakunkainwen. Diosun nuku kushipa wakubainmiswen taexun Jesucristo mekenankidi kakape nun jatu yusianyan nuku ichakawaibuwen taexun miadi bika tenemabiaibu jatuwen dateama Diosun kushipayaxun yusinkin jeneyamawe.

⁹Eska Diosun bebunkidi shinanidan, jawada pepa nun amiswen taeama jakia jaska Diosun na mai anu jawa wadiamajaidabia bebunkidi jawen shinan duapawen taexun jawen janchawen jiwei nun jawenabu medibi pepakubainxanunbun nukun chakabuwen nuku kupikatsi ikama jaska yubakaniken taexun tsuabunda Jesucristo ikunwainbu nuku katukin kenanixun natian nuku ma mekekubainikiki. ¹⁰Januxun chanima Diosun jawen nuikipa nuku unanmakinan, jawen bake Jesucristo nukun mekenanwankin mawaben dasibibu nun datemis jatun maemakin nuku binuxuniki. Ja kakape jakidi jiwea jancha yuikin datan ati shada ana juneama wakin xabakan taxnimakin xabakabi waniki.

¹¹Jaskawen taexun Diosun ea katutan jawen bakekidi kaka pepa judiobuma en jatu yusinkubaunun ea yunukin Jesúsun kushipaya ea wanixun ea yusinan waniki. ¹²Ea jaska waniken Diosun jancha en yusinkubaunmiswen taexun ichakawakin ea bichibiabun en Jesús ikunwankin taewaya ea mekenitun badi jawen jeneaitian ea mekekubainxanai unain en dakeamaki. ¹³Jesucristo nuku ixuniwen taea ikunwain bechipainamekin en mia yusinmis keska wakin jancha kayabi kayatapia yusinkin jeneyamawe. ¹⁴Jaska wakin Jesúskidi yusian min tapini jau tsuan betsa wayamanunbun Diosun Yushin Pepa nukuki dasiatun mia medabewaya jawen kushipawen uindakubainwen.

¹⁵Jaska inun, min ma unaiin. Asia mai pakea anuabun Jesús ikunwainbu dasibi eki dakei eki pechitan ana ea medabewabumaki, Figelo inun Hermógenes dikabitunan. ¹⁶⁻¹⁷Ea jaska wabiaibun nenu Roma anu en bikai jiwebiaken nukun jaibu Onesíforon Roma

anu jikitushitan jawa juindukuanma ea bechinun ika ea benachakayamakin atimas ea bechimaki. En mane dispi chiwetameyawen en menexekeaki dakeama jawenchains ea medabewakin ea shinan chankanwanbidanbidani maki. Ea jaska waimaken Diosundi jawenabuswen nuikin jau jatu medabewakubainunwen. ¹⁸Éfeso anuxun Onesíforon nuku medabewakubaini min unanjaidaii. Badi jawen jeneaitian Diosun yudabu jatu unanti waitian nukun Xanen Ibun jau Onesíforo duawaxanunwen.

Soldado pepa keskatikiaki, na janchadan

2 ¹Min en bake keska Jesucristoki dasia min jawen kushipa jayanun Diosun jawen pepa mia inanidan, jawen besti kushipakunkainwen. ²Ichapabu en jatu yusinkubaunai min ninkakin tapinmisxun akai keskadi min jatu tapinmaidan, ja junibu pe jiwekin ikunjaidawai chintuanma jatu uinmai duapakunkainkin yudabu yusinkin jatu medabewatidubu jatu katutan jau jabiaskadi yusinkubainunbun jatu yunukubainwen.

³Jamen mia ikidan, soldado keskai jiwe. Jaskakin en ikai keska jiwekin Jesucristo min ikunwanyan mia ichakawabiabu Jesucriston tsuma pepai nuitapabiai bika tenei jiwekunkainwen.

⁴Uinwen. Chanima soldado unanepatun jawen xanen ibun yunua besti dayaxunkatsi jawa jamebi jawen shinanen bechipai atidumaki, jawen xanen ibu besti benimawanun ikadan.

⁵Ja dikabi, jabiaskadiai, buda putanika beyuskin jawen yunuti inun jawen nemati chibambuma jawen manakuti pepa jayatidubumaki. ⁶Ja inun, juni betsan yunu banaima jawen dayaxunikan mekexunmiswen taexun janu tsekatitian bai ibuan tsekakin jawena dukun biama

ja dayaxunmis paxkaxunkin jawena dukun inantiki. ⁷Na jaska tibikidi en mia yuiai shinankubainwen. Min jaska waya nukun Xanen Ibun mia medabewakin dasibi mia tapinmaxanikiki.

⁸Nukun xenipabu xanen ibu pepa Davidin baba Jesucristo mawa Diosun ana bestenwani kaka pepa datan akin en jatu yusinmisdan, jakimama shinaindakubainwen. ⁹Jesucristokidi en yusinkubaunmiswen taexun ea ichakawabu tenekin en meaui. Juni atimapajawaki dateama chakabuwai bechitan amisbu keska wakin ea nemakin mane dispiwen ea menexabu keska wadiakin Diosun jancha kakape yuikin en datan amisdan, ja tsuan nemakin nexatidubumaki. ¹⁰Jaskaken tsuabuda Diosun katunibu Jesucristo ikunwain pepai jau jatun chakabuwen Diosun jatu kupiama jatu paxawakin piskuma jau jawen kushipa ikibi ikanu jau janu jiwedixanunbun natian ea jiweyuxun en jatu bika tenexunuaii.

¹¹Na jaska en mia yuiaidan, chanima jaidaki. Shinaindawe.

Tsuabuda nun ma jabe mawani keska jabun nun shinainbudan, jabusdi nun jabe jiwxankananii, niti ikamadan.

¹² Tsuabuda Cristowen taea nuitkaabaii babuama kushipakin nun binukubainaibudan, chanima janu xanen ibuai anu jabe nun xanen ibuxanaii.

Jamen tsuabunda jakidi chani peama yui keyainsbumadan, jabiaskadi Cristo jatukidi Epa Dios chanikin jatuki dakedixanikiki.

¹³ Jamen nukubu nun shinan betsa betsapa wai chintunbiamisken jatunan, jawa shinan betsa betsapa waisma ikunkainunbadikiki, jaskatan jamebi ibubis chani chakatidumadan.

**Pablon yusinmis keska wakin
jau Timoteon adiakubainun
yununiaki, na janchadan**

¹⁴En mia yuiai keska shinankin betsabu jatu yusinkin tapinmaidakubainwen. Diosun ninka keyuaya yusian betsa betsapakidi yui jau kemanameyamanunbun jatu nemakubainwen, tsua jatu medabewatidubumakidan. Jaskaibu tsuanda jatu ninkai e ixankanikiki, Jesucristo ikunwanpaidan. ¹⁵Jamen mia ikidan, jin jin ikama min Dios dayaxunaidan, Diosun besuubi jawa bedabini min dakeama ixanaidan, chanima jancha Jesucristokidi dasibi jatu yui pepakunkainwen. Min jaskamiswen taexun Diosun mia unanti wakin: “Juni dayakapakunkainkin min ea dayaxunmis peki”, iwanan, mia yuixanikiki. Shinaindakubainwen.

¹⁶Tsuabunda janchawen besti jamapai bemakis pepakidi shinain kemanamei janchakin jaska bestikidi shinainbu tsuabunda jatu ninkai jatun yusianwen beyai xuxatidumai atimapai pikukubainkanikiki. ¹⁷Jatun yusianan, isin chakabu taxni su ika ewakunkainmis keskaki. Jaska keskadi wakin jatun yusianwen yudabu yusinkin jatunabu chakabu pa wamakanikiki. Jatu uindakubainwen. Jaska keskai Himeneo inun Fileton jatu chibankin ¹⁸chanima jancha jetenan ma jamakidi jatun shinan benuabuki. Jabun jatu yusinkin yuikinan: “Ikunwainbu mawadan, ana bestenxanaidan, nun ma jayaki”, iki mapubaunkin jatu padankin Jesús ikunwain jatidi chintunmakanikiki. ¹⁹Jatu jaska wabiaibun ma medibi Diosun jawenabu kushipa wakin mestenwani jawa ana betsa wama ixanai ma Diosun jancha kaneama kenenibu jayaki. Jaskaken:

“Nukun Xanen Ibu jadatuda jawenabu ma unainkiki”, ja inun: “Tsuabunda nukun Xanen Ibu kenawen Diosbe janchakinan, jatun chakabu chitetan jau jenekubainunbunwen”, adiani kenenibu jayaki.

²⁰Jaska inun, juni mabuyatun jiwe ewapa medan jawen mabu tibidan, oro inun plata jawendua besti jayamaki. Jakia ja dikabi ji mabu inun mai mabu pepa bexmas jayadiki. Ja mabu dabe jaska keska dabes jayamaki. Betsa jawa jusiama jawen pepajaida besti atiki. Janua betsa jawen jamapai wakin pepa bexmas dasibibun metidubu jayadiki.

²¹Ja mabu pepa oro keskadan, tsuabunda chakabu jenetan jawen Xanen Ibu pepakin dayaxuni jawa chakabu jusikin ana meama ja besti pepaxunaiwen taexun jamapai daya pepa betsa betsapa jawen Xanen Ibu Jesúsun yunutiduki.

²²Jaskawan taexun bedunanbu jamapai tibiwen kemumisbu keska jenetan janua ana jaska jiweama paxakunkainwen. Eska bestiwen jiweiti pepa benakubainwen, jawa chaní chakama inun, Jesucristo ikunwain inun, nui bechipainamei inun, unanuma jiwei dasibu juinti xunpinbubetan nukun Xanen Ibu kenwankubainkinan. ²³Ja dikabi, unainsmapabu kemanamei sinatanamemisbuwen taexun jatu ninkayamakubainwen. ²⁴Nukun Xanen Ibu dayaxunikabia nukun beyawen jamakidi janchawain detenameai keskai nun maputidubumaki. Jamen nuku ikidan, dasibibube pepaidan, dasibibu yusinti shadaidan, dasibibu jawada kaneaibu jawaida jin jin, iwanan, jatun chakabu wama jiwekunkaintiki.

²⁵Tsuabuda ninkaisbuma inun patapabu min jatu medabewakin pewakatsis ikaidan, juinti babutan jawa sinatama eska shinankin jatu unanmakubainwen, Diosun jawen chakabu unanma shinan

betsa watan: “Jaskadan, chanimaki”, ikin jatun chakabu jenetidubu manakinan. ²⁶Min jaska waya jabu diablo Satanásan jatu beya wakin tsumawani jabun mia nemakubainshinabu bestean keskatan kainkainkin Jesucristokidi chania jancha unantan ana chakabu wakatsi ikama jabun Satanás mepanmabaintidu buki.

**Ma badi jawen jeneaitian
yudabu jaskaxanaibu Pablo
yuiniaki, na janchadan**

3 ¹Janu Jesucristo ma ana ju kemaya bika betsa betsapa kainbidanxanaidan, min ma unain uindakubainxanwen. ²Ja yudabu eska bestiwen jamebi kenkin jatun mabu inun jatun pei bestiwen kemui “Eadan, tsua ea keskamaki”, ikin Dioskidi jancha chakabukin jatun ibuan jancha ninkama inun, jawa pepa shinanma inun, Dios kenwainbuki meseama chakabuxankanikiki. ³Yuda betsabu duawatikidi shinanma inun, jawa jatuki nuitimakidi shinanma inun, yuanananti besti shinain inun, jatun jiwea mekekin pewama puben besti shinankin jawada pepa Diosun bechipaimis danain jaki sinataxankanikiki. ⁴Jaska inun, betsadan, yuda pepabu tsuabuda jatuki sinataibu jatun jatu unanmamis inun, jawada itidu bebunkidi shinanma jamapai amisbu inun, jamebi kenkin shinankin: “Yuda betsan atidumbiaken ean besti en atiduki”, iwanan, shinain inun, jawen kemu pae bestiwen shinain pe jiwenun ika Dios benakin shinanma idiaxankanikiki. ⁵Jatun kexawen bemakis xabakabi Dios kenwanbiakin jawa jawen jiweawen pepakin uinmama Diosun kushipaki dakekin kenwan kayabiamma dananxankanikiki.

Jaska keskabudan, jatube ketaxameama jatu dunkekubainwen.

⁶Jamen betsabu ikidan, eskakanikiki. Jatubeten chani yui shadanun ika ainbuaibu jawa unanma chakabui jiwekin kemu betsa betsapa teneai anu jatun jiwetan jikitan jatu yusinchakakin jatun tsumabu jatu wamisbuki. ⁷Jabun jawadakidi tapinbiakubainkin jawa chanima jancha xabakabi ninka pewatidubumaki. ⁸Juni mukaya dabe Janes inun Jambrésin Moisin jancha bextenun ika inibu keskakin jabu padananainbun chanima janchadi nemanun ika ja junibu jatun shinan pema inun ikun kayabi wama jamakidi kanekanikiki. ⁹Ja padananainbu unainsmapakin jancha kayabima jatu yusiainbu dasibibun unantan ichapabu jatuki chiti ikama ixankanikiki. Jaska Moisés bextenun ika Janes inun Jambrés tatima ini keskai jabudi jaskaxankanikiki, bextekeidan.

**Jawen jenekin Pablo Timoteowen
nuijaidakin yununiaki, na janchadan**

¹⁰Mianan, ja padananainbu min jatu chibanmaki. Jamen jaska yusiin en jiwmis keska min chibanmiski, eska tibi ea chibainan. Jaska en shinamis inun, jaska en ikunwanmis inun, jaska jawaida jin jin ikama en tenemis inun, en nui bechipainamemis inun, jamapai ekidi kainbidanai tenei en kushipamis inun, ¹¹jaska Antioquía anuxun inun, Iconio anuxun inun, Listra anuxun ea ichakawakin ea bika tenemakubidayamabu min unain keskakin miadi bika tenemaibu min teneai ea keskakin min mekubainai. Ea jaska tibi wabiaibun nukun Xanen Ibuán ea jatu mepamakubainyamaki. ¹²Jamen chanima tsuabunda Diosun jancha ikunwain pepakin Jesucristoki dasia jiwekatsis ikaibudan, jatu bika tenemakin jatu nuitapa waxankanikiki. ¹³Jakia juni chakabu inun jabu

padananainbudan, jatun jiwea pe buama piku bestixankanikiki, jatu padainbuwen inun ibubis padananainan.

¹⁴Jaskabiaibun miadan, Diosun jancha pepa mia yusianbu tapintan min ikunwani jabiaskas shinankin chibankubainwen. ¹⁵Min bakeishta Diosun jancha pepa medibi mia yusinkin mia tapinmakin jawen besti paxati Jesucristokidi mia unanmabu ninkakin min ikunwanidan, shinaindawe.

¹⁶Dasibi Diosun janchadan, junibun shinanma Diosun jatu shinanma jabunkenenibudan, jadan peki. Jawen yuda betsabu yusinti inun jawen jatu nemakin bexteti inun, jatu jawen pewati inun, jau jawen jiwei pebainunbun jawen jatu unanepa watiki. ¹⁷Jaska yununiwen taexun jabu Diosun yunuá jawen jancha yuixunikabu jawen janchawen unanepakin pepajaidakin Dios dayaxunkin pepa betsapa betsapa axuntidubuki.

4 ¹Epa Dios inun Jesucristo ja xanen ibujaidai jawen kushipawen juxun mawabu inun jiweabu unanti waxanaitun nuku xabakabi uiainbun en mia yunuchakayamai ea ninkaidawe.

²Eska en mia shinanxunaidan, Diosun jancha jatu tapinmakin jawa jeneama badi tibi benuama akubainwen, janu ninkakatsis ikin ninka pewaibutian inun janu ninkakatsi ismabia inun janu bika teneabitianan. Jaska wakin jatu ikunwanmakin jatun chakabu jatu jenemakin jatu benimawakin jatu yusiin jin jin ikama akubainwen.

³Chipu badi betsatian yudabu ichatan yusian kayabi ana ninkakatsi ikabuma ixankanikiki. Jakia jaska jabun ninkakin bechipai besti anun ikaibu jatun yusian pepamabiaken jawen benimanun ixun jawada jaska ninkakatsi ikaibu besti jatu yusinmanun ixun yusinan ichapabu jatu yusinmaxankanikiki, ⁴Jesucristokidi

chanima jancha jenei jaki pechitan miyui betsa betsapawen besti yusiaibnu chibankinan.⁵ Jamen mia ikidan, dasibi min shinanen mekei pekin bika tenebiai Jesucristokidi kakape datan akin jatu yuikin daya pepa en mia yunubainai shinan betsa wama jatu yusinkubainxanwen.

⁶Jamen eadan, natian ma en yuda Jesucristo inankin en mawaxunxanai ma kemaikiki. ⁷Eadan, Jesucriston soldado pepa detenamekin jatu binumis keskakin jabun ea ichakawaibu en binuaii. Kushibainkin jatu maemakatsis imisbu keskakin jaska ewen Dios yubakani jawa chintuanma en ma ixuanki. Ikuwanixun jawen kakapekidi yusin bikabiakin en jawa jeneama ikunkainaii. ⁸Natian en dayaxunkunkainmiswen taexun jaska jayanun ika en imis en maiti manakuti pepa Diosun ea mekexunkubainmis badi jawen jeneaitian jancha pewanika duapatun Jesucriston ea inanxanai en manaii. Jaska wakinan, ea besti inanma dasibi jabun Jesucristo ana chintunkidanxanai bechipaikin manaibudi jatu inanxanikiki.

**Pablon jaibuaibun jaskawaibukidi
Timoteoki chaninikiaki, na janchadan**

⁹Jawa teai bika teneama jawaidakidan juxun ea uiyuwe. ¹⁰Demas jawen jiweawen besti inun mabuwen kemukin ea jenebaini Tesalónica maewan anu kashianki. Crescente Galacia mai pakea anudi kadiashinaki. Tito Dalmacia mai pakea anudi kashianki. ¹¹Lucas besti nenu ebe jiweaki. Jukin Marcos benakin bechitan iwxanwen, mibetan nenuxun ea medabewatidukidan. ¹²Nukun jaibu Tíquico Éfeso anu en yunuuyuaii. ¹³Tróade anu nukun jaibu Carpon jiwe anu en matsu tadi en jenebidanyama inun en una ichapa inun ja xunská min ja jakimatiduma en una bichi sebi

ewapa en bashibidanyama jukin ea keyu bexunxanwen.

¹⁴Mane mabu wanika Alejandron ea jadakidi shinantima kaya wakin ea ichakajaidawaimaki. Jaskawen taexun nukun Xanen Ibun jaska bechipaiai keskawen kupixanikiki. ¹⁵Nun jatu Jesucristo kakape yusinmiskidi nuku jatu dananmaikiki. Jaskawen taexun miandi jakidi uindakubainwen.

¹⁶Jamen betsadan, ja dukun Roma xanen ibubu ninkamakin judiobun ea kunyan akaibun en chakabuma en jatu yuiaya tsuan kedabewai ea janchaxunama dakekin dasibi en jaibuaibun ea jenebainimabuki. Ea jaska wabiabainimabun jatun chakabuwen taexun jau Diosun jatu kupiyamaxanunwen. ¹⁷En jaibuaibun ea jenebiabainabun jawen binuti Jesucristokidi jawen kaka pepa jawen paxatikidi en jatu yui keyuaya judiobuma dasibibun jau ninkanunbun nukun Xanen Ibun ea jeneama ea kushipa waxun jatu daewakin mese anua ea piskumaimaki, ea jaska nukun Xanen Ibun jatu binumakin inu keneya pintsi kexea keska anua ea binumakinan. ¹⁸Chakabu dasibi nukun Xanen Ibun ea binumakubainkin janu xanen ibuai pepa jawendua nai anu ea paxawatan ea mekexanai en una in. Jaskaken niti ikama ja duawakin kenwanankanwen. Jaskakidan.

¹⁹Jaska inun, jadi jiweabu Prisca inun Áquila inun Onesíforon enabu: “¿Jaska pebumenkain?” ikin en jancha en jatu bumai ea jatu yuixunwen. ²⁰Corinto anu Erasto bashikuaya en juyamaki. Ja inun, Trófimon isin teneai Mileto anu en bashiyubidanyamaki. ²¹Ui matsu inun niwe kushipa bediamaken manama jawaida juwe. “¿Jaska min pemen?” ixun Eubulo inun, Pudente inun, Lino inun, Claudian nenuxun

dasibi ikunwainbubetan jatun jancha
mia yunukanikiki.²²Nukun Xanen
Ibu Jesucristo mibe nixun jau mia
medabewakubainunwen. Ja inun, Éfeso

anuxun ikunwainbu dasibi Diosun jau
matu duawakubainunwen.
Jatiski, en janchadan.
Pablo

TITO PABLON KENE BUMANIKIAKI

TITO

Pablón Titokidi shinanikiaki, na janchadan

1 ¹Titoon, en mia kene bumai uindawe. Ea en Pabloden, Diosun jawen tsuma ea wakin Jesucriston kushipaya ea waniki. Jabiatundi ea yunukin tsuabunda jakidi chanima jancha nun jatu ikunwanmaxanai jabu Diosun katuni jabun jau tapinkin jau unanti wakubainwaxanunbun jaska besti chibantikidi en mia yuiaii. ²Dios chanichakaismatun mai damiwadiama jawen janchawen jiweakidi yubakani jatun jiwea ikibi ika tsumatun jawa betsa wama ixanai nun manaii. ³Natian janu ma menekin janu ati wani anu jawen bakekidi kakape nun unanxanunbun nukun Epa Dios mekenantun nuku unanmani jaska wanixun eki chiti ikaya jawen yunuawen jawen jancha en jatu tapinmakubainaai. ⁴Titoon, chanima ebetan ikunwain min en bake kayabi keskaki. Nukun Xanen Ibu Jesucristo jawen Epa Diosbe miwen nuikin mia unanuma jiwemakin jau mia duawakubaunbunwen.

**Jaska wakin mekenikabu katutikidi
Tito yusinikiaki, na janchadan**

⁵Natukan Creta anua nun dayai taeima anuxun jatu medabewakin pewakin mae tibi anuxun ikunwainbu mekenikabu

wakin min jatu katunun jaska shinankin mia yunutan en mia jenebidanimaki.

⁶Mekenika katukinan, eska jiweabu jatu unankin uintan akubainwen. Tsuan jatukidi chakabu yuisma inun, ainyankatsi ikin ainbu bitan jeneisma betsawen kemuisma inun, jawen bakebu jabatan Jesucristo ikunwainbu jawen bakebu jawa metimakin jatu uinmai jatuki ja imaisbuma ja jawen bakebu juanti kushi sinatapaisbumaken min jatu katuxuntiduki. ⁷Ja daya pepa ikatsi ikin jatu bebxununbun min jatu katutidudan, bebukin Diosun enabu jatu mekemakatsi ikin jaska tibi Diosun bechipaiai akatsi ikaibu jatu katukin yunukinan, jatun jiwea jawa chakabu jayama pe besti ikubainaibu jatu akubainwen. Jatun shinan betsa maewatidubuma akama inun, sina besu akama inun, paenkatsis imisbu inun, janchawen jatu bekunyan amisbu inun, jatu bepadantan jatun pei inun jatun mabu ibubis binumatan pei ichawamis jaskabu uintan katutimaki. ⁸Eskabu min jatu atiduki. Ninkawe, bai mapuabu inun ikunwainbu beaibu jatu itan duawamisbu inun, jawada pepa besti ikaibu bechipaimisbu inun, jawada adiama pe shinanmisbu inun, jawada janchatan kanekatsi isbuma inun, duapai Dioski datemisbu inun,

jatun jiwea pe mekekubainmisbudan.
⁹Jaskamisbuwen taexun ikunwain
 betsabudi medabewakin jatu
 benimawakin yusian pepawen jatu
 ikunwanmakin jabun jamakidi shinan
 chakaibu jatu medabewatidubuki. Jatu
 jaska wakin Jesucristokidi chanima
 jancha nun jatu yusinmis ikunwankin
 betsa tibi shinanma nukun yusian jau
 chibandiakubainunbunwen.

**Yusinanain bepadamemisbukidi Tito
 shinanmanikiaki, na janchadan**

¹⁰Creta anuabu juinti kushi jancha
 ninkaisbuma midimabuki. Jabun
 judiobun beya chibain yusinan
 pepanikapaikin jatu padankin jancha
 kayabiwen ikama jawen jaskatima kaya
 jatu yusinkin yudabu padankanikiki.
¹¹Jatu yusin pewabumabia jatun mabu
 bian shadanun ika peiwen kemukin
 jiwe anua yuda betsa jawenabuya jatu
 shinan betsa wamakin jatu padanbiabu
 jatu ninkakanikiki. Jaskawen taexun
 mekenikabun mibetan yusinkin jau jatu
 nemakubainunbunwen.

¹²Jatunabu betsa unanepatan
 jatukidi kenekin yuikin: "Creta anua
 enabudan, jabunan, jawada akamabia
 jamen kemutapai chani chakamisbu
 inun, puben bestibu inun, pikebu
 inun, jawa dayama chikishmisbuki",
 anidan, ¹³chanima jatukidi yuikin aniki.
 Jaskawen taexun jancha kushipawen
 Creta anuabu nemakin jatu xabakabi
 unanmakin jatu kunyan akubainkanwen.
 Man jatu jaska waya ana jamapai tibikidi
 ninkakin shinanma Jesucristokidi
 ikunwankin pe besti shinantidubuki,
¹⁴judiobun beya miyui bechipaibiamisbu
 natian ana jaska shinanma danain ana
 yusian kayabiki pechitidubumakidan.

¹⁵Eskakidi min jatukidi
 shinankubainun mia yuinun ninkawe.
 Jawada uke medan shinan pepa tsuabuda

jaya ja medanua shinan pepas kainmakin
 pepakidi shinanmisbuki. Jamen jabun
 Jesucristo ikunwanbumadan, uke medan
 pepa besti jayama shinan chakabudi
 jaya uinchakatidubuki, jatun juinti
 medanua chakabu jaya kainmaibudan.

¹⁶Jaskawen taexun jabun yuikin:
 "Dios en ikunwaiin", ibiakin jamapai
 chakabu betsa betsapa akin Diosun
 jaska bechipaimis akama dananmisbuki.
 Jabunan, eska tibi wakinan, jatuki
 sinatakin tsua bechipaimama inun, juinti
 kushi sinadanwan jawa jatun shinan
 pepamawen taexun jawada pepa wakin
 Dios axuntidubumaki.

**Jancha pewen yusinkin jatu medabewakin
 pewatikiaki, na janchadan**

2 ¹Mianan, jawada min jatu yuikatsis
 ikaidan, na en mia yuiai keska
 wakin jabias Diosun jancha kayabi
 pepawen jatu yusinkubainwen. ²Juni
 ewabu jatu medabewakatsis ikin
 yusinkin, jau padanananma jancha
 kayabi besti yuikubainunbun, inun
 jatun jiwea pe jau mekenunbun, inun jau
 jatun shinan pe mekediakubainunbun
 inun, Jesucristokidi ninkatan jau
 chiban pewanunbun inun, nui jau
 bechipainamenunbun inun, jawada
 bika betsa betsapa mei jau kushipakin
 binukubainunbun jaskakidi jatu
 yuikubainwen.

³Ainbu ewabu jatu medabewakatsis
 yusinkin jabiaskadi jatu akubainwen.
 Jatun jiweawen pe jiwekin Dioskidi
 jau pe shinanunbun inun, jau ana
 yuanananyamanunbun inun, jau ana
 paenyamanunbun inun, jaska Diosun
 bechipaimis jawen jiweawendi jau
 dasibibu uinmakubainunbun jatu
 yuikubainwen.

⁴Jaska wakin chipash beneyabu
 yusinkin jau jawen bene bechipainunbun
 inun jau jawen bakebudi bechipaikin

duawakubainun bun jatu unanmakin jatu yusinkubainwen.⁵ Ja inun, jau tsua Diosun janchaki jancha chakabuyamanun bun jatu yusinkin jaska jatun shinan pe meketidubukidi inun, ibubis jatun yuda pe meketidubukidi inun, jatunabu inun jatun mabu tibi jiwe anu pe dayakin meketidubu inun, jawada pepabu bechipaitidubu inun, jatun benebe janchawen binunametidubuma chipashbu yusinkin min jatu unanmadiatiduki.

⁶ Ja juni ewabu inun bedunanbu jau jatun shinan pe mekekubainun bun ⁷ miandi min jiweawen min ikai keskai dasibibu jau pepa idianun bun jatu yusinkinan, jawa tsua bepadananma inun, tatimama pe bestikin jatu ixunkin uinmakubainwen.⁸ Tsuabuda nukun yusianki ja ikaibu jatu dakewakin jau ana nukukidi jawa chakabu yuiyamanun bun jancha pekidi besti yui nemakanantikidi besti jatu yuikubainwen.

⁹ Ja dikabi esclavo dayadubun jau jatun tsumapan jancha ninkatan jau chibankubainun bun jatu yusindiaxunkubainwen, jau duapakin jatun tsumabu benimawakin jatube jancha kemanameama inun¹⁰ yumetsuama inun, jau jawa jatu padanma dasibi jatu axunkubainun bunan. Jatu jaska wamakin nukun mekenan Diosun janchakidi dasibi pepa atikidi jatu uinmaxunkin jatun tsumabu min jatu bechipaimatiduki.

¹¹ Diosun yudabu mai jidabi anua jawen duapawen jawen paxati Jesucristo jatu unanmakin bitidubu inun bitudubuma jatu xabakabi taxnimaxuniki.¹² Jaska Dios nukuwen nuikin paxati nuku unanmakin yusianan, jawen chakabu atimapta tibi inun jawen kemuti tibi na mai anuxun nun amis jawen

kushipa pepawen nun chitetidubuki, natian jiwea bera bestiwen jiwekatsis ikin jawa ana shinan chakabuwen shinanma pe besti akin jaska Diosun nuku jiwemakatsi ikai jawen pepati akidan.¹³ Jaska jiwekunkainkin nukun Dios binua inun nukun mekenan pepa kushipa Jesucristo xanen ibujaidai ana nuku chintunxunkidanxanai manai nun benimaii.¹⁴ Diosun nuku kupiaya jau nukun chakabuwen taea nun benuyamaxanun bun dasibi chakabu ana shinantima wakin Diosun nuku buaxunun, iwanan, Jesucristo yunua jamebi mawakin jawen jiwea nuku inain nuku mawaxuniki. Nuku jaska wakin jawenabu kayabi pepa nuku waniwen taexun ja besti jiwxunkin nukun pepa uinmai dayaxunkubainankanwen.

¹⁵ Jatu yusinkinan, kushipai mestenepatan na jancha en mia yusianwen jatu benimawakin nemakin jatu pewakubainwen, jau tsuan mia danankin ichakawayamanunan.

Jesucristo ikunwain jaskai jiwekunkaintikiaki, na janchadan

3 ¹Ikunwainbu jau eskakubainun bun en mia jatukidi shinanmai. Jabun mae yunuabu xanen ibubun jatu jawakidida yunuabu jatu ninkatan jau axunkubainun bunwen. Jawa chikishama jamapai tibi jatu yunuabu: "Jamaki", ikama jau axunkubainun bunwen.

² Tsuakida jancha chakabukin jau yuiyamakubainun bunwen. Ja inun, duapa besti inun pepajaida bestikinan, jatuwen nuikin jointi babutan dasibibu jatu jaibuwakin jau jatu uinmakubainun bunwen.

³ Nukudan, jabiaskadi jatu itsadi nukun shinan betsa wadiama jiwxun Dios chiban pewama benua keska nixun jamapai betsa betsapa mei kemui chakabun dayadui nun mapupaunibuki.

Jaskai jiwea chakabui betsa jawada jaya uin jaska jayatima jawen kemui jatuki sinatai inun bechipainameama jatu danain inun betsabube danananainan.

⁴Jakia januxun nukun mekenan Dios dasibi mai anuabu nukuwen nuikin nuku bechipaikin jawen pepa nuku unanmaniki. ⁵Nukubun jawa wakin nun pexunamabia jawen nui pepas jawa jusiamawen nuku mekekin piskumaniki, nukun chakabu chuka keska wakin, nuku ana kain bera wakin jawen jiwea bera nuku inaniki, jawen Yushin Pepawenan. ⁶Nukun mekenan Jesucriston jawen pepa jawa yaushlama jawen Yushin Pepatun kushipa nukuki dasiwaniki. ⁷Nukumebi nun Dios jawa pepa axuntidumabiaken duapa nukuwen nuikin nukun chakabu nuku buaxuntan jawen pepawen jawen jiwekuinti nun bixanai nun jawen manakanun jawen Yushin Pepa nukuki dasiwaniki.

⁸Na jaskakidi yusianan, chanima kayabiki. Jenekin betsa wama jakidi jatu yusinkubainwen, jabun Dios ikunwainbu duapai jau jawendi jamapai pepa akubainunbunan. Na jancha jaska tibiwenan, jaska jayatan dasibube pepatidubuki. ⁹Jakia Diosun Moisés yusinmaniwen taea jawen yunuti inun jawen nemati inun jatun xenipabukidi janchai judiobu sinatai kemanamei tsua medabewatidumabia ja iki kunyan ikaibube jatube kemanamei jaskayamakunkainwen, mia ninkabumakenan.

¹⁰Tsuanda Jesucristo ikunwainbu jatu itimaska wakin jatu paxkakatsi ikaibu

medabewanun, iwanan, kenatan min yuia ninkamaken ana ja kachu kenatan min yuia ninkamadiken januxun jau ana matube ichayamaxanun nematan jatu nichinwen. ¹¹Ja yudabunan, jamapai chakabu wakin jawen juanti medanxun ana Dios ninkabuma ibubis jamebi jatun chakabuwen Dios ma kupimaikiki.

Tito dayaikidi kenekin keyuniaki, na janchadan

¹²Uian niwejaidaitian Nicópolis anu en jiweyuxanaii. Min dayai anu Artemas kasmai Tíquico en yunua mia anu kaya janu jawaqidakidan Nicópolis anu eki nukui juxanwen. ¹³Nukun jaibu Zenasin gobierno yunuti inun jawen nemati unanjaidai inun yusinan Apolos mia anu kai jikishina janua kaya jau bui nuitapayamanunbun ana jatun jamapai ikunwainbu jatu inanmakin jatu medabewamaxanwen, jau jaya butanunbunan. ¹⁴Min jatu jaska wamaiwen taexun nukunabundi tapintidubuki, jatun jiweawen pe medabenameti shada jatu uinmakin Dios dayaxunaibu jatu medabewatidubuki, jatun jiwea pekidi jatu shinanmakinan.

¹⁵Dasibi nenu ebe ikabun jatun jancha mia bumakanikiki. Jadi mibe idiabu anu nukun jaibu nukubetan ikunwainbu nuikin nun jatun bechipaiai nukun jancha nun jatun bumadiaii. Diosun jawen pepawen jau matu dasibi duawakubainunwen.

Jatiski, en janchadan.

Pablo

FILEMÓN PABLON KENE BUMANIKIAKI

FILEMÓN

Pablón Filemónkidi
shinanikiaki, na janchadan

¹En Pablo Jesucristokidi kakape en yusinbaunai ea nemakin bextenun ixun ea bichikin akawanibu inun nukun betsa Timoteobetan min nukube dayamis nukun jaibu pepa Filemón, en mia kenexun bumaii, ²ja inun, jabu mibetan Jesucristo ikunwainbu min jiwe anu ichamisbu anudan, nukun pui Apia inun nukun betsa Arquipo, nukubetan Jesucristokidi kakape yusinkin bika tenemisbu anudan. ³Man unanuma jiwekubainxanunbun jaskatan ibubis man jawa watidumabiaken Epa Dios inun nukun Xanen Ibu Jesucristo matuwen nuikin matu medabewakin jau matu duawakubainunbunwen.

Pablón Filemón kenwankin Dios yukaxunkubainikiaki, na janchadan

⁴⁻⁵Nukun Xanen Ibu Jesucristo bechipaikin ikunwakin min chibankubainai inun dasibi jawenabu medibiwen nuikin min jatu duawamiskidi kakape ninkatan benimakin janu en Diosbe janchaitian mikidi shinankin en Dios en mia kenwanxunkubainmiski. ⁶Mia jaska waxunkinan, nun jaska Jesucristo ikunwakin chibain keska miandi jaska

shinankin jawen pepawen Diosun nuku dasibi duawamis min ninka pewanun en mia Dios yukaxunkubainmiski.

⁷Jesucristowen en betsaa, min nukipawen taea miwen taea benimai en shinan chankaiin, ikunwainbu Diosunabu medibi juinti shinan chankanwakin min jatu nuikipa wakubainmiswen taeandan.

Pablón Filemón jawen esclavo dayadu Onésimo ea axuniakiaki, na janchadan

⁸Jaskawen taexun ea en Criston kushipayabiatun en mia yunua en yunua chibankin min atidubia ⁹jaskakidi en mia shinanma jakia nui nun jaibunameaiwen taexun en mia ea akaii. Eadan, en ma mestebuaii. Jaskabiaken Jesucristo en dayaxunkunkainaiwen taexun natian ea bichikin akawaxun ea meneximabuki. ¹⁰Jaskawen taexun mia daewakin mia anu Onésimo en nichiaiin, jau mia dayaxundi kanunan. Nenu ea meneximabu anu jiwexun Onésimo Jesucristo ikunwanmakin en shinan betsa wamaimawen taea min dayadu esclavo en bake keskaki.

¹¹Uatian min esclavo daya chakabui mia anua paxabiaima ikis nukubetan Jesucristo ikunwainwen taea ana jaskamaki. Nuku dabe medabewatiduki, nuku duawakinan. ¹²Onésimo en

bechipajaidai mia anu en ana nichian kaikiki. Jaki dakeama min ea atidu shinankin jaska keska waxanwen.

¹³Jesucriston kakapekidi datan akin en yusinkubaunpanan bichikin ea nemaimabu min ea jaska waxun medabewatidumaken miwen Onésimon ea medabejaidawakubaini yaushikin en nichinkatsi ikamabia ¹⁴min ekidi shinankin yunuama ibianiken en mia jaskanwantidumaki. Min shinanen min ea yunu bestia jaska ea bechipaikin min ea amaxuntiduki. ¹⁵Chania uatian jaskatanda Onésimon mia jeneyubidanima natian ana chintunkaina uatian min jabe imis keskama ma mibetan ikunwainwen taea min betsa kayabi keska ipakexanikiki,

¹⁶ana min dayadu keskama min dayadu pepa binua min bechipaiai min betsa kayabi keskadan. Ean en bechipaichakayamabiaya mian bechipaikin min ea binumaxanimenkain. Dayadu esclavo besti jayama jakia dayadu binuan keskai mibetan Jesús ikunwainwen taea min betsa keska min jayaxanaii.

¹⁷Jaskawen taexun ebetan Jesús ikunwankin min ea jaibuwaniki. Jaska ekidi shinankin min ea duawai keska wakin ewen taexun Onésimo ana idixanwen. ¹⁸Mia jaska wakin ichakawabidanimamenkain. Mia dibimatan paxaimamenkain. Jaskadada

ikidanimadan, en pechiki netanwen, ¹⁹en mia pakaxanaidán. En mia Jesús unanmaniwen taexun miandi min ea dibijaidaki. Jaskakidi ea shinanwen. Na mia kenexunkinan, en meken kayabiwen en Pablon en mia axuaiin. ²⁰En betsaan, eskaki, shinanwen. Min ebetan Cristo ikunwainan, nukun Xanen Ibu benimawanun ika ana jaki sinatama ewen nuikin Onésimo ea jaska waxunxanwen, ea juinti shinan chankanwankinan, jaska nun Criston betsawen taeandan.

²¹En jancha min ninkakin chibanmis unankin en mia kenexun bumaii, jaska en mia ea akai binukin min pepawaxanai shinankinan. ²²Ja inun, Diosbe janchakin man ea yukaxunaiwen taexun Diosun jawawama jau jatu ea nichinmaxanun ikunwankin en manaii, dateamadan. Jaska inun, matu uin ka janu en iki kaxanai anu en uxati ea pewaxunxanwen.

²³Jesucristo ikunwain achixun ebe Epafras menexabu jawen janchadi mia bumaikiki. ²⁴Marcos inun, Aristarco inun, Demas inun, Lucasin ea medabewai dayamisbun jabiaskadi shinankin jatun jancha mia bumadiakanikiki.

²⁵Nukun Xanen Ibu Jesucriston jawen pepawen jau matu duawakubainunwen. Jatiski, en janchadan.
Pablo

JESÚSUN TSUMA BETSAN JESÚSUN ENABU HEBREONAWABU KENEXUNIKIAKI

HEBREOS

**Natian Diosun jawen bakewen jawen
jancha nuku unanmanikiaki, na janchadan**

1 ¹Jancha pepa en matu bumai uinkin ninkaidakanwen. Ja dukunan, nukun xenipabube Dios janchaidan, jawen jancha yuixunika tibiwen jawen jancha jatu yuimakin jawenchains jatu yusinkin betsa tibiwen taxnimakin jatu yuikubainiki. ²Jaska wabiakubainkin jawen bake kushipa watan mai jidabi dasibi damiwamanixun dasibi ibu wamanixun natian jawen jenekin jawen juni bake janchamakin Epa. Diosun jawen jancha nuku unanmaniki. Jaskakidi matu ana yusinun ninkakanwen. ³Jawen Epan kushipay chaxakapa jawendua keskaditun dasibi betsa betsapa damiwani jawen jancha kushipawen mekekubainmiski, jau jawa benuyamanunbunan. Ja inun, jawen Epa nuku daewaxuni mawakin nukun chakabu buatan jawen Epa kushipajaida dasibi binu keyuatan yusiudi tsaua nai anua ma jabe xanen ibukunkainikiaki.

**Diosun bake pepatun nai tsumabu
binu keyunikiaki, na janchadan**

⁴Jau Jesúsun dasibibu yunu keyukubainxanun Diosun yuikin: “Nadan, en bakeki”, akin nai tsumabu dasibi jatun kushipa binumaniki, jawen

kena tuxkutima inankinan. ⁵Dios jawen bakekidi janchani matu yuinun ninkakanwen. Diosun jawen nai tsuma betsa yuikin:

“Min en bakeki”, akin betsa yuitaskama inikiaki. Jakia jawen bake bestikidi janchaidan, eskaniki: “Min en bakedan, natian en jiwea mia inankin en mia yunuaai”, aniki. Ja inun, jawen nai tsumabukidi jaska yuiamabia jawen bakekidi yuikin: “Eadan, en jatun epa ikunkainxanaii, jawenaden.

Jadan, en bake ikunkainxanikiki, enadan”,

Diosun adianiki. Jakia jawen nai tsumabu jawen bakebumawen taea jaska jatu yuitaskama iniki. ⁶Kene betsa anuxun jawen bake bestichai nukun Juchi Kayabi Iyua yudabube jiwemaxanaikidi jatuki chanikin yuikin:

“Jau dasibi en nai tsumabun en bake duawakin kenwandianxanunbunwen”, adianiki. ⁷Jakia jawen nai tsumabukidi yuikin:

“En daya jau ea axununbun niwe bidenepe inun chi jede kushipa keska wakin en nai tsumabun jau daya betsa betsapa ea jabuan axunkubainxanunbun

en jatu yununiki”,
anikiaki.⁸ Januxun jawen bakekidi
yuikin:
“Diosun, mia xanen ibuidan,
min ea keska xanen ibui ikibi
ipakexanaii,
xanen ibui jawa chakabu jayamadan.

⁹ Jawada pepa bechipaikin jamapai
chakabu min dananmisdan,
min jaskamiswen taexun ea en min
mekenika Diosun en mia katuaki.
Xeni maxu akin unanti wakin en
miwen benimaii,
min jaibuaibu keskawama jatu mia
binumakinan”,
aniki.¹⁰ Ana jawen bake yuikin:
“Xanen Ibuun, jawa
jayamajaidabiaken
mianan, damiwakin taewakin
nai inun mai jidabi ibubis min
damiwaniki.

¹¹ Miadan, jawa betsama min
ipakexanaii.
Jakia min dami wanidan,
keyuxankanikiki, tadi chukai
keskaidan.

¹² Tadi katunkin akawamisbu keska
wakin
dasibi tsuanda tadi pekatan betsa
sawemis keska wakin
nai inun mai min ana bena waxanaii.
Jakia miadan, maei min
betsatidumajaidaki,
min jiwea keyuisma min jayadan”,
aniki.¹³ Januxun Diosun jawen nai
tsumabu betsa eska jatu yuitaskama
iniki:
“Miki sinatakin mia danainbu
kupikin
en jatu mia maemakin keyumadiama
manai en yusiudi tsauyuwe”,
aki jawen bakekidi besti janchaniaki,
jawen nai tsumabukidi yuiamadan.¹⁴ Ja
inun, Diosun jawenabu kayabi jabun
jiwea ikibi ika bitan nun paxaxanaibu

nuku yaushikin jawen nai tsumabun
jau nuku mekekubainun bun Epa Diosun
jatu yunukubainmiski. Dasibi Diosun
nai tsumabudan, yushinki, jabun Diosun
daya axunmisbudan.

Jawen paxati kayabi danainan,
mesekiaki, na janchadan

2 ¹Diosun baken nai tsumabu
binuuatun jamebi jatu yusini
jaskakidi jancha nun ninkanidan,
ana jakidi ninkajaidakubainankan
wen, ja jetenan bai betsawen nun
buyamanun bunan. ²Ja inun, jawen nai
tsumabu janchamakin uatian Diosun
jawen jancha jawen nai tsumabuwen
jatu yusinmapauniki. Ja Diosun yunuti
inun jawen nemati kushipa jayanibudan,
tsuanda ninkakin chibanma chakabu
waibu jawen taexun jawa kaneama
Diosun jatu kupikubainiki. ³Uinwen.
Ja dukun nukun Xanen Ibuun jamebi
jawen paxati jakidi ibubis bebunkidi
chani taeniki. Januxun nuku yubakin
tsuabunda jakidi ninkai chanima
Diosun jancha nun unankubainibuki.
Nukubudan, jawen paxati ewapa
chanima jubianiken mekei peama jiwe
kayabikatsi ikamadan, jaskatan ibubis
nun paxatidubumaki.

Diosun bake nukun yuda keska
iyuniaki, na janchadan

⁴ Ja inun, jawen Yushin Pepawen
jawen e imakin unanmati damiwamakin
na yuba bena Jesùsun tsumabubetan
Epa Diosun jatu mestenwanmaniki.
Jaska wanixun jawen shinanen nuku
tibi jawen daya betsa betsapa nuku
inanmiski, jaska shinain keska nuku
tibi inankinan.⁵ Bawaitian na mai
anu Diosun damiwani anu yudabu
jiwebaunxanaibu anuxun jau Diosun nai
tsumabun yunuyamaxanun bun Diosun
janu jatu yunuama iniki, na jaskakidi

nun janchaidan. ⁶Jamen kene betsa anuxun Davidin xabakabi wakin yuini matu yuinun ninkakanwen:

“Nun yudabu jawauma keskabiaken jaska min nukuwen nuimis en shinamiski.

⁷ Min nai tsumabu jatu kushipa watan yudabu jatu kushipa inankin min jatu bexmas wayuniki,

dasibi min damiwani

jatu ibuwamayukin jatu duawakinan.

⁸ Jaskaken dasibi jau mekekubainxanunbun min jatu yununiki”,

aniki. Jaskabiaken mai jidabi damiwani jau jawen xanen ibuxanunbun Epa Diosun jatu yuba keyubiani yudabun dasibi ibuwai xanen ibuaibu nun uindiamaki. ⁹Nai tsumabu kushipa keskama Jesús kushipa bexmas keska wayutan Diosun jawen nui nuku uinmakin Jesús taxnimatan jau dasibibuwen taea mawatan bestenun Diosun yunua jaska chibain nuitapatan mawatan binuniwen taea natian Jesús kushipajaida dasibibu binua jawen ibu dapi ma tsaua nun unaiin.

¹⁰Diosun dasibi damiwakinan, jawena aniki, jawen kushipawenan. Jaska bechipaiai keska dasibi jawen bakebu jawen kushipayadi jau jabe jiwxanunbun jaska shinankin Diosun jawen bake Jesucristo nuitapawakin dasibi menemakin nukun mekenika nuku waxuniki. ¹¹Dasibun nun Dios bechipaikin chibainbudan, nukun Epa Dios medibitun nuku jawen bakebu wakin nuku medibi wamiski. Jaskawen taea jawen bake Jesucristo nukuki dakeama nuku kenakin: “En betsabuki”, ikin nukukidi yuimiski.

¹²Diosun jancha yuixunikatun Diosun Mesías taxnimaxanaikidi yuikin:

“En betsabu inun en puibu anuxun Dios mia kenwankin mikidi nawakin en jatu unanmakubainxanaii”,

iniki. ¹³Janua kene betsa anuxun yuikin:

“Eandi min en Dios en mia ikunwankubainxanaii”,

iwanan, ana yuikin:

“Jabu Diosun jawen bakebu ea inantau ea jatu mekemanibe en jatube nenuki”,

iniki.

¹⁴Jatun ibubun jatu bake bikin jabias nami inun jimi jaya wamiski. Jaska keskadiai Jesús damidiatan taxninun ika yudabun nami inun jimi keska biniki. Jaska bitan jawen jatu tenanmis kushipa diablo Satanás jaya maemakin binuntan jatu mexpamanun ika jawen yudawen Jesús yudabu mawaxuniki.

¹⁵Ja mawaiwen jatu jaska waxunkin jabu mawaki datei jiwekubainmisbu dasibi Jesúsun nun jabun ikunwainbu ana jawa mawaki datetima nuku waxuniki, bai chakabu pewakin akawakinan. ¹⁶Jaskawen taea chanima nai tsumabu medabewanun ika juama jakia Abrahamnen Dios ikunwanpauni keska jawen bababu medabewanun ika Diosun bake juniki. ¹⁷Jawen betsabu inun jawen puibu keskatan jatun yuda bitan Dios dayaxuni ja bebunga jawenabu janchaxunika binua inun ika jawen yuda Dios inain mawai jawa chintuanma pepa duapa iniki, yudabu Dios jatuki sinatamis jatu medabewakin jatun chakabu buaxunun ikadan.

¹⁸Januxun Diosun bake unanti wanun ixun Satanásan padanpanan Jesús ibubus yumankin binun keyuniwen taexun natian tsuabuda Satanásan padandiai Diosun baken nuku medabewadiatiduki.

**Moisés pepabiaken Jesúsun
binunikiaki, na janchadan**

3 ¹Nuku jaska wakubainaiwen taea en betsabu inun en puibuun, nun ikunwanxanunbun Diosun nuku kenakin katuniwen taea nun jawenabuki.

Jaskaken Diosun jawen bake jawen kushipaya yununika wakin ja Diosbe nuku janchaxunika Xanen Ibu Jesucristo dasibi betsabu jatu binundian, ja besti shinankubainkanwen. ²Diosun nukun xenipabu xanen ibu Moisés jawada yunua kaneama chibankin Diosunabu mekekubainikiaki. Janua Jesúsdi katunixun jawen daya yunua Jesúsundi kaneama chibankin jawenabu kayabi nuku mekediakubainikiki, Moisés binukinan. ³Jamen tsuanda jiwe bena pepawaken jawen jiwe kenwanbiakin jawen ibu ja jiwe binumakin kenjaidawadiamisbuki. Ja keska wakin Diosun Moisés kenwanbianiken jawen bake Jesúsun Moisés binuniken Diosun ja binumakin kenjaidawamiski. ⁴Ja inun, junibun damiwakin jiwe inun mabu wabiamisbun jatu binukin nai inun mai jidabi Diosun jawen bakebetan damiwaniwen taexun yudabu jatu binua nun unain. ⁵Jamen dasibi Diosun ani chipu nun ninkaxanai Diosun enabu jawen jancha Moisin jatu yuixuni chibambianidan, jawen tsuma besti iniki. ⁶Jakia Cristodan, chanima jawen bake kayabitun Diosunabu mekei Diosbe jatu janchaxuni kaneismaki. Jaskaken Cristo ikunwankin chibankin shinan betsa wama nun mestenwantan benimakin nun manaibu Jesúsun nuku benubainama ixanikiki.

**Diosun enabudan, Dios anu juindukunti
jayakiaki, na janchadan**

⁷Jaskawen taexun Diosun Yushin Pepatun jawen jancha yuixunai chanimanu matu ana shinanmakin yuunun ninkakanwen.

“Natian Diosun jancha matun man ninkaibudan,

⁸ matun juinti kushiyamanakanwen, nukun xenipabun janu tsua jiweabumanuxun

Dios ninkama danankin unanti wamakin sinatamanibu keskakinan.

⁹ Ja inun, janu tsua jiweabumanuxun en kushipawen jatu e imakin unanmati dami 40 año en jatu ima atanbidanai uinmabiakin en jancha ninkama ea unanti wakin matun xenipabun ea sinatamakubaunibuki.

¹⁰ Ja yudabun ea jaska waibu jatuki sinatakin yuikin: ‘En shinan bechipaikin unanti wakatsi ikama danankin jatun juinti pepadiabuman jatunmebi benui mapuabuki’, iki

¹¹ jaskawen taea jatukidi yubai: ‘En jatuki sinataiwen taea janu mai pakea pepa en jatu yubabiani anu jau jikiyamaxanunbunwen’;

ika Dios yubakaniki.

¹² Jaskawen taea en betsabu inun en puibuun, matun juintinin chakabu shinankin ana ikunwanti kushiwama chintuntan Jamebi Jiwemis Dios jenebainkatsi ikama matu tibi ibubis mekekin shinan pewadikubainkanwen.

¹³ Jaskama matubudan, jaska Diosun jancha natian chaniaya natian besti matun shinan man jawaida pewatidubuki. Jaskawen taea manama benimadabe bestinankanwen, badi tibidan, jau tsuan taska betsa matu padanyamanunbun inun chakabun matu mextea chintuin matun juinti man kushiyamanunbunan.

¹⁴ Cristobe jiwekatsis ikin jawen kakape ninkatan nun ikunwankin taewanidan, betsa wama jabiaskas jakidi shinankubainankanwen.

¹⁵ Diosun jancha jawen Yushinin matu yuikin:

“Natian Diosun jancha matun man ninkaidan,

matun juinti kushiyamakanwen,
matun xenipabu janu tsua
jiweabumanuxun
Dios ninkama danankin unanti
wakin sinatamanibu keskakinan”,
iniki.

¹⁶ ¿Tsuabun animen, Diosun jui
ninkabiatan chipu sinatamakaninan?
Jabu Moisin Egipto mai anua dasibi
jatu paxawanibu jabun anibuki.
Shinaindakanwen. ¹⁷ ¿Tsuabuki
inimen, 40 año Dios jatuki sinataidan?
Janu tsua jiweabumanuxun Dios
ninkama jatun chakabuwen jatu kupia
mawakubidankin imanibuki. ¹⁸ Ja mae
pepa Canaán anu Diosun jatu yubai
jatukidi janchai: “En jatu janu jikimatan
jatu juindukunmaxanaidan, jabuan
en jancha ninkama danainbudan, jabu
jikiama ixankanikiki”, iniki. ¹⁹ Chanimá
Diosun jancha ikunwankin chibankatsi
ikama jabu jikiabuma inibu jaska
jatukidi nun unaiin.

4 ¹ Ja jaskanibukidi natian nun
yuikubainaidan, jawen mae pepa
jaska Dios yubakani janu juindukuin
jikikatsi iki nun ikaibudan, jaska
keskadiki. Uindakanwen. Betsabun
matun shinan man betsa wamaken
jaskawen taea man jikitidumadiki.
² Chanimaki. Matun xenipabu jawen
yubati jancha Diosun Moisés jatu
yuimani keska wakin jawen kakape
jancha juindukunti betsakidi Jesúsun
jawen tsumabu unanmatan jatu nukudi
yusinmani nun ninkadiakubainaii.
Nun jatu keskatidumaki.
Uindakubainankanwen. Jaskai
nukun xenipabun jawen yuba jancha
juindunkuntikidi ninkabiai ikunwanma
inun jawa chibanma ikubainaibuwen
taexun jawen mai pepa yubani anu
jau jikiyamaxanunbun jatu yubanitun
jatu nemaniki. ³ Tsuabunda nun
ikunwainbu Diosun juindukunti pepa

anu nun jikitidubuki. Jakia tsuabuda
nukubetan ikunwanbumadan, jawa
jikitidubumajaidaki.

“En jatuki sinataiwen taea
janu en juindukunti pepa en jatu
yubabiani anu
jau jikiyamaxanunbunwen”,
ika Dios yubakakin yuini shinankanwen.
Dios jaska yubakabiani mai jidabi
damiwatanan, juindukunti pepa ma
pewani jayaki, janu ikunwainbu nun
jikitidubudan. ⁴ Jaska Dios dayani Moisin
jawen jancha keneni séptimo díakidi
yuikin:

“Dasibi damiwakin jawen daya
keyutan
séptimo día Dios juindukuniki”,
jatu watankeneniki. ⁵ Kene betsa anu
janu jawen juindukunti anu yudabu
jikitidu kasmai jikitidumamenkain, jawa
jawen jancha ninkaisbumawen taea
jatuki sinatai yubakai:

“Janu en juindukunti pepa
en jatu yubabiani anu jau
jikiyamaxanunbunwen”,
ika Dios janchaniki. ⁶ Jabu dukun nukun
xenipabun jawen jancha pepa ninkabiatan
danain mai pepa juindukunti anu jikiama
inibuki. Jakia betsabu jikinibuki. Natian
ja yubani janchadan, betsa wadiamaki.
Jaskawen taea ja juindukunti pepa anu
tsuabunda ikunwain nun jikixanaii.
⁷ Jakia jawen jancha danainbu yuini
keska wakin Diosun yudabu shinan
beta wamakatsis ikin janu xaba betsa
pewaitian jaska jancha taxnimanunbadiai
pewakin ana janchaniki. Badi ichapa
katan anunbadiaikidi bebunkidi nukun
xenipabu xanen ibu David jakidi
nawamakin yuimakin:

“Natian matun man Diosun jancha
ninkaidan,
matun juinti kushiyamakanwen”,
akin janchamai ikunwanxanaibu
dasibibukidi Dios jatu yubakaxuniki.

⁸Ja inun, jawen jancha dananibun bakebu mai pepa anu Josuéñ jatu iyuxun janu juindukunti kayabi jatu ibuwamaya janu juindukunti betsakidi Dios yubakai ana janchama ikeaniki.
⁹Jaskawen taea jawen juindukunti pepa naiudi nun Dios ikunwainbu medibi nun jawenabu jikixanaibu jayayuakiaki.
¹⁰Ja inun, Diosun juindukunti pepa anu tsuabuda ma jikia ana dayama Diosbe juindukunpakexankaniki, damiwakin keyutan Dios juindukuni keskaidan.
¹¹Jaskawen taea jawen juindukunti pepa anu jikixanun ika nukun medabenan Jesús chibain yumanbiai chintuntas kayamanankanwen, ja jabun jawen jancha ninkama nukun xenipabun dananibu keskakin jatu tanain jatu chibanyamanankanwen.

¹²Ja Diosun jancha kainkinan, paepa jiwea keskatun nukun shinan pewakin juni jawen nupe kenu dabeyatun juinti uke medan chapaxun uian keska wakin nukun shinan inun nukun yushin unanti wamiski. ¹³Dasibi Diosun jatu damiwanidan, unanti waya tsuan jani juntain junetidubumaki. Dasibi nukun akadan, jidabi nukun unanti waxanikiki, nukuki kenemis bepentan manakukin pewakinan.

Jesús Diosbe nukun janchaxunika binua kayabikiaki, na janchadan

¹⁴Diosun bake Jesús iwani ana jawendi naiudi kani jawen Epabe nukun janchaxunika binua nun ikunwainwen taexun nukun shinanwen mestenwantan chibankin jeneyamakubainankanwen.
¹⁵Jaska jiwea bika tenei nun yumankunkainmis keskai nukun Diosbe nukun janchaxunika binua na mai anua jiwedia nukun itsai jamapai tibi mei bika tenediae yumankunkainiki. Jaskabiai jawa chakabu mekin kaneama iniki. ¹⁶Jaskaken jawada mei nun bika

teneaitian jau nuku medabewanun Diosun kushipa shinankin jaki dateama ikunwain jaki chanikin ea akubainankanwen, jau nukun Epa Dios nukipatun nukuwen dabanan ikin jawen duapawen nun nuitapai jau nuku medabewanunan.

5 ¹Jaska inun, jawenabu chakabukubainmisbuwen taea Dios jatuki sinatai jabuan jatu daewaxunkin medabewakin chaxuwan tesenxun jau jatu kua keyupakexunxanun bun dasibi Diosbe jawenabu janchaxunika xanen ibu tibi junibu anua Diosun katumiski, Moisin betsa Aarón katuni keska wakinan. ²Jamen yuda betsa imis keskai Diosbe judiobu janchaxunika xanen ibu tibitun ibubis mekei peama kanemisbuwen taea jaska shinain jatuwen nuidiatidubuki, unandiabuma inun chakabuwakin kaneabiwenan. ³Ja inun, jawen chakabuwen inun nukunabun chakabuwen taea Dios sinatai Diosbe nukunabu janchaxunika xanen ibu tibitun Diosun yununi chibankin Templo jemaintin anuxun yuinaka jatu menu keyuxunkin Dios jatu daewaxunpakemisbuki. ⁴Ja inun, tsuanda ibubis eiskaun shinain: “Diosbe enabu janchaxunika xanen ibunun”, ika jamebi katukutidubumaki. Jakia Diosun Aarón katuni keska wakin tsuada katukatsis ikin duawakin jatun besti jatu kenakin katukubainmiski. ⁵Jabiaskadi wakin Cristo ibubis katukui nukun janchaxunika binua ibubis ikama iniki. Jakia Diosun duawakin yuikin:

“Min en bakedan, natian en jiwea mia inankin en mia yunuaii”, aniki. ⁶Januxun jawen kene betsa anuxundi yuikin:

“Miadan, minabu ebe janchaxunika niti ikama min ipakexanaii, Melquisedec ipauni keskaidan”, aniki.

⁷Ja inun, nenu mai anu yudabube Cristo jiweyua mawawen dateyamanun ika yumain sain iki kaxai jawen Epa Diosun medabewatidu shinain jabe janchakin jau jawen date yushin nemaxunun jawen kushipa ea aniki. Jawen Epan jancha ninkakin danainsmawen taexun Epa Diosun jaska wai ninkatan jawen date nemaxuniki.

⁸Ja inun, Diosun bakebiatun jawada bika tenekin ninkakin chibancajidanun itan jamapai shadabu jaska Diosun bechipaimis Criston ninkajaidai ixunkunkainiki. ⁹Jaskai pepakunkaini jawen besti jiwekuiian bi nun jawen paxatidubu nuku ixuin ja besti bai ikibi iniki, nun jabun ikunwankin chibancaxanaibu nuku ixuinan. ¹⁰Jawen bake jaska yubani keska watan Melquisedec keskadi wakin jawenabu Diosbe janchaxunika xanen ibu binua jau niti ikama ipakexanun Diosun ja uinkin katunixun yununiki.

**Jesús ikunwanbiatan jenetimakidi
jatu yununiaki, na janchadan**

¹¹Jaskai Diosbe Jesús nuku janchaxunmiskidi ichapa en ana matu yuitidubia man unanxubida tapiainwen taea en matu yusiaian bikajaidaki. ¹²Ja inun, badi ichapa ikunwanbiakubaini man yusinanandiamaki. Jakia natian yusian betsa betsapa Dioskidi jau tsuabunda unanxubida matu mextanmabaikin ana yusin pewanunbunwen. Jamen ja dukun jawaida bechipaikin ikunwankin man tapinibuki. Jakia natian man ma punu nukai babujaidai. Janun piti kushipa pinun ika keskama man bakeishtan chuchu jenediamma keskabuki. ¹³Ja inun, bakeishtan chuchu besti amis keskabudan, tsuanda jaska nukun Xanen Ibu bechipaiai tapianma man kanekubainaii. ¹⁴Jakia yuda ewabun

piti kushipa pimisbu keskabun jabuan besti jawada pepa inun jawada chakabu unanti wakin Diosun jancha pepa unankin katutidubuki.

6 ¹Jaska tapinkubaini ewaidan, nun yuda ewa keska itidubuki. Jaska bebunkidi Cristokidi matu yusinkin taewanibu jaskakidi nun ana jawenchains chintuanbidanbidankin nun matu yusintidumaki. Eska tibikididan, ikunwandiabuma jatu ikunwanmatikididan, jawada chakabu betsa betsapa aki jawen taea mawa kayabi anu bumisbu jatu putamakin yusiankididan, jaska wakin Dios chibankin ikunwantikididan, ²jatu nashimakatsi jatu yusiankididan, jabun Cristo ikunwainbuki mapepixun jatu Dios yukaxuntikididan, mawabu ana bestenxanaibukididan, Diosun jatu unanti watan janu jatu bika tenemapakexanaikidi jaskas yusianwen besti nun matu yusintidumaki. ³Jakia ikunwain jaska tibiwen nun ewakin nun anunbun Diosun nuku medabewaya jaskai Jesúski nun chiti ipakenunbun ana matu yuinun ninkakanwen.

⁴⁻⁶Tsuabuda Diosun jawenabu wakatsi jatu katuxun jawen Yushin Pepa jatu inankin jatu medabewamapakeaya jawen jancha pepa unain Jesús ana juaitian jaskasnunbadiai keskai jiwei taekin jabun Jesús ikunwankin chibancbiai putai chintuntan jatunmebi ana shinan betsa watidubumaki. Jabu Diosun baken janchaki kaxekin danankin ana cruzki mastha keska wakin jatunabudi Jesúski kaxemaibuwen taexun jatu yusinkin nukundi jatun shinan jatu betsa wamakin nun jatu pewatidumaki. ⁷Ja inun, mai pepa anu ui imakin yudabun yunu banaimabu main yume pewai janu Diosun jatu manakumiski. ⁸Jakia mai betsa anu Diosun ui imabia yudabun yunu banaimabu main yumewama chaka

inun muxa bestiken ja mai chakabu Diosun danankin yupumisxun jawen jenekin kuaxanikiki. Jesús ikunwankin jetenan Dios dayaxunchakaibudan, ja mai keskabuki.

⁹En betsabu inun en puibuun, jaskakidi en matu janchawabiaidan, matukidi en shinanan, bai pepaki nukutan man jawa chintuntidubuma man ma mestenwantan paxani en shinaiin.
¹⁰Ja inun, Jesús ikunwainbu betsabu medabewai jatuwen nuikin bechipaikin man Dios bechipaikin Diosun jaska bechipaiai akin man benimawamiswen taexun jawa kanema matun pepadi jakimama matu duawakin matu jawa dananma idiaxanikiki, jaska natian man adiakubainaibuwanen.
¹¹Jaska matu tibitun shinankin man akaidan, betsabu uinmakin jeneama shinan chankankin jawada pepa man uinkatsis ikai jeneama menekin akubainkanwen, jaska Dios yubakani jeneama manakinan.
¹²Ja inun, Jesús chibain chikishi jau man punu nukayamanunbun Jesús ikunwankubainkin jawen unanuma jiwti Dios yubakani bikubainaibu keska wakin jatu chibankin pepa besti wakubainkanwen, janu man mawaitianan.

**Dios yubakai jawen unantinani
betsa waismakiaki, na janchadan**

¹³Januxun matun xenipabu Abraham Diosun yubakatsi ikin tsuan Diosun kushipa binua datan atiduma Dios ibubis datan ikin yubakakin
¹⁴Abraham yuikin: "Chانيا ean mia pawakin min bababu ichapa mia waxunkin en mia duawakubainxanaii", aka
¹⁵ninkatan jawen yubati jancha manai jin jin ikama ikunkainkin atimas jaska Diosun yubani bi benimanikiaki.

¹⁶Ja inun, nukunabu yubakakatsi shinain: "Jawada en jatube yubakai

en akamaken jadatuda kushipatun jau ea jaskada waxanunwen", iki tsuada kushipaki mesei yubakamisbuki. Janua jaskakidi yubakaimawen taea ana shinan betsakin ana tsuan yuba betsa wakin maewatidumaki, jawen taea jaa ikidan.
¹⁷Dios jaska yubakani menexanai jawen yubakatidan, jawa maewama tsuabunda chanima ikunwankin xabakabi bixanaibu jatu inankatsi Dios jawen bakewen chanima axanai jakidi yubakaniki, mestenwainan.
¹⁸Jaska Dios yubakamis yubanametan maewai chani chakaismawen taea jawen nukuwen nuixanai nun jaki iduxanunbun ja ikunwankin manakanankanwen, nuku axunxanikikidan, jawen taea yubakanivenan.
¹⁹Na jaska ikunwankin nun manakaibudan, nukun yushin nun ma mestenwanbuki, jawen xaxu tsumakin mai betanti xankama putakin mestenwankin mai pus amamisbu keska wakinan. Nukun shinan jaska mestenwanwen taea Jesúsun ma nuku pewaxuni anu jawa dateama nukun Dios medibi anu nun kematiduki.
²⁰Nai anu jaskai buaibu ja dukuntun bai wai nuku bai bepenxuni tsua bebui jikidiama ja nukun Diosbe janchaxunika binua ipakexanai Melquisedec dayapauni keska nuku ixuin kaniki.

Cristodan, Melquisedec jawenabu Diosbe janchaxunpauni keskakiaki, na janchadan

7 ¹Melquisedeckidi ana matu yuinun ninkakanwen. Ja Melquisededan, Salem xanen ibu inun nukun Dios binuabe jawenabu janchaxunika inikiaki. Nukun xenipabu Abraham xanen ibu betsabube detenamekin jatu maematan jawada yumetsubainshinabu jatu detexun mebintankin beaya Salem mae xanen ibu Melquisedec kainkain jaki nukuxun Diosun Abraham jau duwapakexanun Melquisedecin Dios

yukaxunikiaki. ²Jaska waxunaya Abrahamnen jawenabu yunua nawabun mabu mebinshina paxkakin manchin meken dabeti wabu Melquisedec duawakin kenwakin mabu manchin bestichai Abrahamnen inankuinikiaki. Jamen betsadan, Melquisedec jawen kena maewadan, xanen ibu shinan pepaki. Ja inun, jawen kena betsa Salem xanen ibu maewadan, jawenabu unanuma jiwetanika xanen ibuki. ³Ja inun, betsadan, nukunabu Diosbe nuku janchaxunikakidi jatu unankin jatun epa inun jatun ewa inun jatun xenipabukidi unankin nun jatu tanakubainmiski. Jakia Melquisedec betsajaidakiaki, tsuan unanmadan. Jawenabukidi tsuan unanma inun jawen kaiankidi tsua jakidi janchaisma inun mawani tsuan unanmakiaki. Jakia Diosun bake keskai jawenabu Diosbe janchaxunika ipakediaikiaki, jeneamadan.

⁴Ja inun, Melquisedec xanen ibujaidakin nukun xenipabu Abraham xanen ibubia ja binuawen taexun nawa xanen ibubube detenamekin maematan jatun mabu bexun meken dabeti manchintan Abrahamnen Melquisedec paxkaxunkin manchin bestichai inankuinikidi ana matu yuinun ninkakanwen. ⁵Ja dukun, Abrahamnen baba Levín bababu Diosbe nukunabu janchaxunikatun Moisin jatu yusini jancha chibankin dasibi jatunabu jabias Abrahamnen bababubia yuda betsabu anua jatu akawakin jabuan yunu manchianbu jabun dukun ja piti paxka taewaxunmisbuki, manchin betsa Levín bababu inankinan. ⁶Melquisedec Levín babamabiatun Abraham anua jawen mabu manchian betsa binikiaki. Ja inun, betsadan, Diosun Abraham duawakin ma yubabianiken Melquisedec xanen ibujaidatun nukun xenipabu Abraham bexmas medabewakin duawanikiaki.

⁷Tsuada kushipa bexmas jau Diosun duawanun betsan binuatun Dios yukaxunmisdan, jaska nun unaiin. ⁸Uinkin shinankanwen. Levín bababu Dios dayaxunkin jawenabu Israelbun inankuin bixunbiakubainmisbuden, debukubidanmisbuki. Jamen Melquisedeckidi kenenibudan, jiwepeakeiwen taea Abraham anua inankuin bikinan, Levín bababu binuniaki. ⁹Na jaska yuikinan, Levín bababu jawenabu Diosbe janchaxunika iki kai shinankin Abrahamnen Melquisedec inani keska wakin natian amisbuden, jaska Melquisedec pakakin inankinan, Abrahamnen janubi ibubis pakanikiaki, ja mabu manchin meken dabeti watan jatiubus bestichai inankinan. ¹⁰Melquisedec Abraham kawanaiki nukuni keskadan, dasibi Abrahamnen bababu kaindiabumabiaken jawen yuda medanua jabuki nukuni keska nun shinantiduki. Chanima Melquisedecin jawen kushipawen Abraham inun Levín bababu binua iniki.

Diosbe jawenabu janchaxunika binua bena wanikiaki, na janchadan

¹¹Israelbu Diosun jatu jawen pepawayukatsi jawen yunuti inun jawen nemati jancha Moisés jatu inanmakin yununiaki. Jawen taexun Levín bababu Diosbe jawenabu janchaxunika wakin ja jancha chibankin jau jatu pewakubainxanunbun, iwanan, Diosun Moisés jabu katumanikiaki. Jatu jaska waniwen taexun jabuan jawa pewama kanekubaini jiwenibuki. Jaskawen taea juni betsa Diosbe nuku janchaxunika betsa Dios anua juniki. Jamen Aarónen bababun amis keskama jakia Melquisedec imis keskai Diosbe nukunabu janchaxunika bena jau ipakexanun jaska Diosun shinanixun jawen yunuti maewanikiaki. ¹²Janua

Jesús Diosbe nuku janchaxunika yunukin nukunabu Diosbe nuku janchaxunikabu jatu binumakin jatu jamen waniki. Ja dikabi jawen yunuti inun jawen nemati jancha betsa wakin Diosun maewadianiki. ¹³⁻¹⁴Nukun Xanen Ibukidi kenenibudan, Israelbu xukua betsa anua taxniniki, Levín bababu anuamadan. Ja xukua anua jawa Diosbe jawenabu janchaxunika jayadiama iniki. Jakia Judán bababu anua nukun Xanen Ibu Jesús taxninidan, dasibibun unankanikiki. Jamen Moisin Diosbe jawenabu janchaxunikabukidi kenenikan, Judán bababu anua kainxanaikidi jawa jatuki chaniama iniki.

¹⁵Jaska Diosbe nuku janchaxunikakidi Diosun jawen yusian maewanidan, chanima xabakabi nun unantidubuki, Diosbe nuku janchaxunika betsajaida Melquisedec keska nukun Xanen Ibu nuku waxunidan. ¹⁶Jaska junibu jau nukunabu Diosbe janchaxunika binua ikunkainxanun Levín bababu anua katumisbu keska wakin ja jancha yununi chibankin nukun Xanen Ibu Diosun katuama iniki. Jakia jiwea kushipa jaya tsuan yamawatidumawen taea niti ikama nuku janchaxunpakeikiki. ¹⁷Ja kaindiamabia jau jawenabu Diosbe janchaxunika ipakexanun jakidi kenenibudan, eska yuiaki:

“Miadan, minabu ebe janchaxunika niti ikama min ipakexanaii,

Melquisedec ikunkaini keskaidan”, aniki. ¹⁸Jabu dukun katuxun Diosun jawen janchayabi jatu yunubiani ja yunuti xeni babutun nun jaki chiti ibia nukun jiwea jawa nuku pepawatidumaken Diosun nemakin bexteyuniki. Jaskawen taexun Jesús nuku janchaxunika taxnimatan jatun daya binumaniki. ¹⁹Diosun Moisés yunua jawen jancha kenen i chibantibai jatun nuku pepawatidumaken jawen

xantukun betsa yunukin nuku jawen yuba bena pejaida wakin ja chibain jaki dasitan Diosun enabu kayabibu nun jiwxanunbun nuku axuniki.

Jawenabu ini keskama Diosbe ja nuku janchaxunika binua Jesús jiweakiaki, na janchadan

²⁰Ja inun, Jesús katukinan, Dios ibubis yubakakin betsa watimawakin mestenwankin Jesús katuniki, jau nuku janchaxunpakeyanunan. Jakia Diosun jawa yubama yunukin Levín bababu katunikiaki, Diosbe jau nukunabu janchaxunika ikubainunbunan. ²¹Jamen nukun Xanen Ibu katukinan, jawen yuba kanetima waniki. Jakidi tana yubakaikidi David jakidi janchakin kenenin:

“Diosun jawen bake katukin jakidi yuikin:

‘Miadan, ebe minabu janchaxunika min ipakexanaii, niti ikamadan’, akin yubakin Diosun ma yui janchaxu ana jawen shinan betsa wama ixanikiki”;

akin nuku kenexuniki. ²²Ja dukun nuku yubani keskama Jesúswen jawen yubaka bena binumakin pepajaida waniki. ²³Ja inun, Moisin jancha chibain Diosbe nukunabu janchaxunikabu midimabu dayabai betsa taska tsua jiwei ikibi ikama dasibibu mawakubainmisbuki. ²⁴Jakia Jesús ana mawatidumawen taea ja besti Diosbe nuku janchaxunkunkainaya betsan jaska waxun jawen daya mebintidumaki. ²⁵Tsuabunda Jesús ikunwain jawen Epa Dioski dasia Diosun kupiti binui paxaabu jiwekuian inankin jatu medabewai Diosbe nuku janchaxunpakeikiki, jawa niti ikamadan.

²⁶Janua Jesús Diosbe nuku janchaxunika binua nun jaska keskadiai

jiwetidu ja jawa chakabu jayama inun jawa detsis jayama medibi pepa besti jaska yudabu chakabukin Dios sinatamamisbu keskama pepakin keyu jatu binutan naiudi pepajaidai jaudi nuku jiwei kaxuniki. ²⁷Ja nukunabu Diosbe nuku janchaxunikabu binuabunan, xaba tibi yuinaka betsa tenantan jatu kuakin menu keyuxunmisbuki, ja dukun jatun chakabu dukun buatan ja kachu jatunabun chakabudi buaxunkinan. Jamen Jesúsdan, jatu keskamaki. Jatun nukun chakabu Dios buamai jawen jiwea yaushiamma cruz anua besti wai jawen jiweawen nuku mawaxunkin ana mawatimai ibubis Dios nuku daewaxuniki. ²⁸Ja inun, Diosun Moisés yusini jancha chibain pepakatsi ibiai Diosbe jatunabu janchaxunikabun kanemisbuki. Januxun Diosun jawen yunuti inun jawen nemati yunu keyunixun jawen bake yubakin katukin nukunabu Diosbe janchaxunika binua pepajaida jau ipakexanun jakidi yubakatan katuniki.

Diosun Jesúwen yuba bena pejaida wanikiaki, na janchadan

8 ¹Nun jaska jakidi janchaidan, nuku Diosbe janchaxunika binua nun ja shinan kaya waidan, nai anu jawen ibu Diosun tsauti yusiudi nuku tsauxunaki. ²Janu Dios jiwea anua Diosbe nuku jabi janchaxunika kayabi jawen daya akidan, jaska jatu yusinmaniwu taexun jatun yusian nun ikunwaiin. Chanima Diosbe nuku janchaxunmistun jatu dasibi binutan januxun tsuan ana ichakawatima anu Diosbe xanen ibukin janu Dioski nukuti kayabi Diosun besti ani anuxun nuku inun jawen Epa Dios daewakin nuku jaibunamemaikiki, ana sinatamamadan, junibun Templo wama ini anuxunan. ³Ja inun, Diosbe jawenabu janchaxunika

tibidan, Diosun jatu katukubainmiski, jau jabun jatu medabewakin jawen Dios daewati yuinaka inankuiainbu jau jabun kuaxunkubainunbunan. Jakia Jesucristo nuku janchaxunika inun ikadan, jawen yudawen jawen jiwea yaushiamma jawen Ibu Dios nuku daewaxunun ika nuku mawaxuniki. ⁴Jamen nenu mai anuxun Diosun jancha Moisin yusini chibankin Diosbe nukunabu janchaxunikabun chaxuwan bake inun ina awa tesenxun kuakin ma jatu menu keyuxunkubainmisbuwen taeadan, nukun Xanen Ibu Jesúsdan, jania Diosbe nuku janchaxuntiduma ikeanaii. ⁵Ja inun, jaska Mati Sinai anuxun Diosun nai anua tadi inun bichi jiwe dami Moisés uinmashina Moisín jatu amanun ikaya januxun Diosun Moisés ana yuikin:

“Uindawe. Jaska mati anuxun en mia uinmashina keska ja itsa jatu amaxanwen”,

aniwen taexun Diosun Moisés uinmani ja kayabima ja itsa uinmani keska ja Israelbu jawenabu Diosbe janchaxunikabun chibankin akubainmisbuki. ⁶Jakia Cristo nuku janchaxunika kayabidan, ja jawen Epabe nuku janchaxunkin nukukididi shinain nukuwen dabanan Dios jakidi yuba bena pejaida ana tsuan betsa watima waniki, jawen taexun jawa kanetima chanima yuba mestenwankinan.

Ja dukun Diosun yubani yamawai kai ana bena yubaxanaikidi janchanikiaki, na janchadan

⁷Janua ja dukun yubani pepajaidaken jawen yubati jancha ja kachu Diosun ana yubama ikeaniki. ⁸Jakia ja yudabu Diosun uian jawa jawen yunuti pe chibankumaken januxun jatukidi jawen yuixunika Diosun Jeremías yuikin:

“Diosun yuikin: Jawatianda Israelbu inun

- Israelin bake betsa Judán bababube en jatube yubakai benaxanaii.
- ⁹ Na jaskakidi jatube yubakaidan, ja baditian jatun xenipabu Egípto mai anu jiweabu en kushipawen en jatu tsekabidankin iweni keska ja shinanwen en jatu ani keska en wama ixanaii.
- En jabu jatu yubani ea chibankin pewabumawen taexun en ma jatu jeneaki, iniki, Xanen Ibu Diosdan.
- ¹⁰ Jamen janu jatiada Israelin bababukidi en ana jatukidi yubakaidan, eska en ixanaii.
- Jatiada jaska en jatube yubakai benaidan, ana bemakis en jancha en jatu yunuamaki.
- Janua janu jatuki dasikatsi jatun buxka anu en jancha mistukin jatun juinti bena watan en jancha jatuki kenea keska en waxanaii.
- Januxun jabun mekenika Dios ea en ikaya jabu enabu bera medibi kayabi ikubainxankanikiki.
- ¹¹ Jatian en jatu jaska waken en jatun mekenan Dios dasibun unanxankanikiki, xanen ibujaidabu inun jawaumabundidan.
- Dasibi jabun ma ibubis ea unan keyuaibun tsuabunda jawen jaibuabu inun jawen betsabu ekidi jatu shinanma ixankanikiki.
- ¹² Jatun chakabu jatu buaxuntan en ana jaska jatukidi shinanma ikunkainxanaii”, aka jawenabu yusintan Jeremíasin nukudi kenexuniki. ¹³ Janua jawen yubati jancha benakidi Diosun Jeremías

jancha watan shinain: “Ja dukun en yubati jancha xeni en anidan, ana ikama ixanikiki”, ikin ana atimawakin shinankin: “Bena en yunuaya ja dukun en yununi xenikunkaini yamai kaikiki”, iwanan, Diosun shinaniki.

Dios daewati pe bexmaskidi Diosun Moisés yunua jatu amayunikiaki, na janchadan

9 ¹ Jaska inun, Diosun Moisés ja dukun yubakin yunukan, na mai anu ja jiwe medanxun jaska wakin Dios kenwankin daewakubaintidubu jatu amaniki, jaska wakubidanibu inun natian nuku axunmisbudan. ² Janu jaki Dioski nukuti tadi jiwe wanibukidi ana matu shinanmanun ninkakanwen. Ja dukun tadi jiwe nakentan tadi puntenibu anudan, janu jawen mabu betsa ja dukun taeaki, jawen chi ketin inun jaki misi manchinti tapu medibi janu misi mania Dios kuaxunti jayaki, jawen kenadan: “Medibi dintuki”, anibukiaki. ³ Janua ja kachu tadiwen pakea betsa unudi ja xaba dintu betsadan, jawen kenadan: “Janu Dioski nukuti medibijaida dintuki”, anibukiaki. ⁴ Ja dintu medanan, jabianuxundi jakixun inti kuati oro mane chi tapu jayaniki. Ja inun, jawen Diosun yubani jancha aduti bau medibijaida oro jaswen dasibi bepukin keyua jayanikiaki. Ja medan oro mane shumuki janu tsua jiweabumanuxun Diosun jatu inankin jatu pimapauni maná dudu inun, Aarónen mestenti dami jukuin juani ji inun, mishki tude sapa dabeki Diosun yunuti inun jawen nemati 10 jancha kenenji jayanikiaki. ⁵ Janua jawen unanmati aduti bau mamaki Diosun kushipa unanmati nai tsuma itsa dami dabe besun dabetan jawen peiwen jawen jatuwen nuiti bau beputi achimanibukiaki. Dios kenwanti mabukidi jatis en matu yusinyuaii.

⁶ Januxun jawen Dios kenwanti mabu jaska pewatan Dios kenwain xaba tibi

janu dukun medibi dintu besti anu Diosbe nukunabu janchaxunikabu jikipaunibukiaki, kenwankin Dios yuinaka menuxunkinan. ⁷Jakia ja kachu medibijaida dintu anu año tibi xaba bestichaitian bestiwai Diosbe nukunabu janchaxunika xanen ibu binua besti jikikin ibubis kanediamiswen taexun yuinaka jimi buxun jawen nuiti bau beputiki jimi basha basha akin Dios daewayupaunibukiaki, jawen chakabu inun jawenabun chakabu Dios jakimawakin jau ana jatukidi jaska shinanyamakubainunan. ⁸Na jaska wakubainibudan, natian Diosun Yushin Pepatun ja jaska wakubidanibu keska xabakanxun kenwankubidanibu nuku unanmaikiki. Jabiaskadiaj ja bai chibain Dioski nukuti medibijaida anu tsua jikiama ipaunibuki, Jesucriston nuku bepenxundiamawen taeadan. ⁹Ja inun, jawen Dioski nukuti tadi jiwe anuxun jawen daewati bexun inanbu jatu kuaxunkin keyubiaken tsuan shinan pewakin keyuama ipaunibuki. Jaska wakinan, jawen nun unantidubu apaunibuki. ¹⁰Ja inun, jawen yubati jancha bena Diosun yuidiamma jaska wakin jau pixanunbun inun, jaska wakin jau nuxuxanunbun inun, jaskai pepai jau dachukixanunbun yusinkin jatun yuda bestikidi Diosun jatu yununi jawen jatu medabewayuniki. Jakia natian na jabias jancha chibankin tsuan ibubis jatun shinan mekekin pewatidubumaki.

**Dios daewati pejaida Cristo
inikiaki, na janchadan**

¹¹Jakia Cristo na mai anu ma iwaniki. Eskatian jadan, nukun Xanen Ibu Diosbe nuku janchaxunika binujaida jaska Diosun yuba bena nuku inaniwen nuku mekekubainikiki. Janu Cristo jikinidan, na mai anuxun junibun jiwe wani keska anu jikiama jakia jaskadada ma jadi

Diosun pewaxuni anu jikitan jadia nuku Diosbe janchaxuni jawa apaunibu keska wama jatu binua pejaida kaneisma nuku ixunkunkainikiki. ¹²Cristo ma nuku jikixuntanan, jatun nuku yuinaka jimiwen Dios daewaxunun ika ikama iniki. Jakia nukun chakabuwen taea nuku mawaxuni besti wai ana mawatimai jawen jimi jabakin jau Diosun nukun chakabu buaxuntan nuku kupiyamaxanun Dios be bun jikitan nuku daewaxuniki, jawen jiwe paketi pe nuku waxunkinan. ¹³Chanima Diosbe nukunabu janchaxunika dayakin ina awa bene inun chaxawan jimi basha basha akin inun ina awa bake yuxan menua jawen mapu unpaxki mutsaxun ja mapu pae watan jatuki basha basha adiakin tsuabunda chakabu washina jawen chakabu tuxkuakin ana jawenabubetan tadi inun bichi jiwe inun chipu Templo anuxun ana Dios kenwantidu wakin jatu pewakubainkanikiki, bemakis besti wakinan. ¹⁴Jaska wapaunibu pebia jaska binumakin Criston jawen jimi jabanidan, kushipa paejaidaki. Jaskaken Diosun Yushin niti ismatun medabewaya inankuinti jawa chakabu jayama keskakin Jesucristo ma ana bestenkin Dios nuku daewaxuniki. Mawai jawen jimi jabaniwen taea natian nukun shinan chakabun nuku kanemakin jawen nuku tenanmis nuku buaxuntan nukun kupiti bitan jiwe kui nuku inankin pewaniki, Jamebi Jiwemis Dios besti duawai ja dayaxuni nun jiwe kubainxanunbunan.

**Natian Jesucristowen taea yuba bena
nun jayakiaki, na janchadan**

¹⁵Tsuabuda Diosun jatu katunibu jabun jiwe kui ikibi ika bixanaibu Diosun jatu yubani jaska Jesucriston pewanun ika dasibibu mawaxuntan unudi Dioski inun yudabuki janchaxunikai

dasitan, jaskatan Diosun yuba bena pewakin jawen taexun nukun chakabu nuku buaxuniki, ja dukun yubani jancha chibankma nun kanei nun chakabukubainmisbu nuku pewaidan.¹⁶⁻¹⁷ Jaska inun, jawen mabu paxkakin jawenabun jau ibu waxanunbun yuda mawadiama ibubis jawenabuki tanakin janchawen kasmai kenewen amisbuki. Jakia ja mawadiamaken jawen yubaka jancha chibankin jawen mabu ibu watidubumaki. Jakia ma mawaken jaska bebunkidi yubakaima ibu watidubuki. Jaska keskai Jesús nuku mawaxuntan ana besteniwen taea jaska Diosun nuku yubani nun ma jayaki.¹⁸ Chania Diosun ja dukun yubanidan, yuinaka ina tesean jimiwen jawen dukun jatu unanmati taewamakin jatu yununiki.¹⁹ Jaska inun, Diosun yunuti jancha tibi inun jawen nemati jancha tibi Moisin jawenabu dasibi yusinxun jatu kenexuntan, chipu chaxuwan dani tashipa wa ni peiyabi tsumaxun ina awa bake jimi inun unpax nexua pukutantankin Diosun jancha una bashatan jawenabu basha basha akin²⁰ jatu yuikin: “Matu yuinun ninkakanwen. Na jancha en matu yuixuwen Diosun matu ma yubaxuki. Ja inun, na jimidán, jawen Diosun matu yubaxu shinamati jimiki”, atan²¹ Moisin jatu jaska watan jabiaskadi wakin medibi wakin janu Dioski nukuti tadi jiwe inun jaki Dios kenwanti mabu dasibiki Moisin ina awa bake jimi basha basha akin keyuniaki.²² Diosun Moisés jawen jancha yununiwen taeandan, mabu inun tsuabuda Diosuna wakin jatu medibi wakinan, jimi jabama jatun chakabu buatiduma inikiaki. Jakia Diosunabu medibi jatu wakinan, jatun chakabu buaxunkin jimi jabai bestiwen atiwakin yununiki, Moisinan.²³ Jaskawen taexun chanima jimiuma tsua medibi itidumawen taexun

yuinaka midima detekubainpaunibuki, jatun chakabu ana Diosun shinantima wamakinan. Jakia jaska wakinan, jaska chipu Jesucriston nukun chakabu nuku buaxunxanai ja binumakin ja kayabima mawakin ja keska wakin akubainibuki.

Jabun ikunwanxanaibun chakabu buanun ika Cristo nuku mawaxunikiaki, na janchadan

²⁴ Janua janu Dioski nukuti tadi jiwe junibun na mai anuxun anibu anu Jesucristo jikiama, jakia nai anu janu Dioski nukuti kayabi anu jikinixun Dios bebungua natian nuku janchaxunkin Jesucriston nuku ea axuinkiki.²⁵ Ja inun, Aarónen bababu Diosbe nukunabu janchaxunika xanen ibu binua año tibi dayaidan, jimi betsabu bui jikitan Dios inankin Dios uinmai janu medibijaida anu jikipaunibу keskai Criston jawen jimi buxun inankin basha basha akubaintima iniki.²⁶ Cristo jaskatianidan, mai damiwakin taewaitian nukun chakabu buanun ika mawani nuku mawaxunpakei ikeanaii. Jakia badi jawen jeneaitian jaska Epa Dios jakidi yubakani natian jawen jancha chibankin nukun chakabu nuku buaxuni mawakin jawen yuda jawen ibu nuku inanxunkin nukun chakabu buaxunun ika Cristo bestiwal taxnitan mawaniki.²⁷ Yudabu dasibi besti wai mawamisken januxun chipu Diosun jatu unanti waxanikiki.²⁸ Ja inun, Cristo jaska keskadiai jawen jiweawen besti wai mawadiakin Dios nuku inanxunkin nun jabun ikunwanxanaibun ichapabun chakabu nuku buaxuniki. Chipu ana ja kachu Cristo juidan, ana chakabu pewatanun ika juama jakia nun jabun manaka bestiabu nuku paxa watan mekenun ika ana juxanikiki.

Diosun Moisés jawen jancha yununidan, ana jawen jatu pewatidubumakiaki, na janchadan

10 ¹Janua Diosun jatu yubani Moisin jatu yusinpauni jawen yubati

bena jaska jawen besu taxnimaxanai jawen bemaikia unanmati besti iniki, jaskaida mawaida kushipa ja kayabimadan. Jaskaken Diosun jancha Moisin yusiniwenan, tsuabuda dasibi pepatidumawen taea badi tibi jabias daya chaxuhan bene inun ina awa bene tesenxun kuakin keyuxunpakebiakin Diosbe nukunabu janchaxunika xanen ibu binuatun nukunabun jatun shinan jatu betsa wamakin dasibi jatu pewakin keyuxuntidubuma ikubidanibuki.

²Chanima Diosun jancha kushipa jayatun jatun chakabu ma pewaken jabun shinan ibubis ma pe mekinan, ja yuinaka menukin Dios inankubainaibudan, jenekeanibuki.

³Badi tibi chaxuhan inun ina awa tesenxun jatuhu kuaxunkin Diosbe nukunabu janchaxunika xanen ibu binuatun jatun chakabu ana jatu shinanmakubainmiski.

⁴Jakia yuinaka mawa jimiwen jatun shinan chakabu pewakin jatu buaxuntidubumaki.

Jesucristo mawakin Dios nuku ma daewaxuniaki, na janchadan

⁵Jaskaken Jesucristo mai anu dami taxnimaxun yudabu yusinkin taewakatsi jawen Epa Dios yuikin:

“Epaan, yuinaka inun xachi bimi dudu kuaibu besti min ana bechipaiamaki.

Jaskaken min shinanwen en akubainxanun juni kuin yuda min ea inaniki.

⁶Ja inun, jatun chakabu buakatsi ikin inankuin buxun

jatun chakabu buaxunkin jatu kuaxunaibu min ana jaska bechipaiamaki.

⁷Jaskaken eska unantan jaska ekidi kenenibudan,

min shinanen besti anun ika en ma taxniaki”,

aniki. ⁸Ja dukunan, Diosun Moisés jatu yusinmaní keska abiakin kaneabuwen

taexun Diosun jatun inankuin inun jatun chakabu buaxunkin jatu menu keyuxunbiakubainaibun Diosun ana bechipaiama inun benimama ikunkainaya ⁹Jesús juxun yuikin: “Jaska min shinanen besti anun ika en ma taxniaki”, ikin jawen Dios daewati xeni jawama wakin keyutan jawen Dios daewati bina jamebi jawen jiweawen nuku bina waxuniki. ¹⁰Janua Diosun shinan besti chibain bestiwai jawen yuda Dios inain nuku mawaxuntan ana besteniki, ana betsation mawatimaidan. Jaska wakin Jesucriston Diosunabu nuku wakin ma nuku medibi waniki.

¹¹Jaska inun, jatun chakabu jatu buaxunun, iwanan, inankuin betsa betsapa Dios inankin jabias bestikima yuinaka kuai bikamisbuki, jaskawan jatun chakabu tede akin keyutidumbabia Dioski nukuti Templo jemaintin anu dayakin badi tibi nukunabu Diosbe janchaxunikabun jabiawens daewati wakubainmisbuki.

¹²Jamen Jesucristo ikidan, jabun nun ikunwanxanaibu nukun chakabu nuku buaxunun ika besti ja bestiwai cruzkia nuku mawaxuntan ana ipatimai bestentan jawen Ibu Diosun yusiudi januxun betsabu binuan besti natian ma tsauaki, janua nuku janchaxunku nkainxanaidan. ¹³Jadixun tsuabunda Cristo danain jaki sinataibu Diosun jatu maemamakin jawauma jatu waxanai manayui Jesucristo tsauaki.

¹⁴Jesucriston jawen jiwea besti wakin Dios inankin ma dasibi pejaidawai mawaniwen taea tsuabuda Diosun ma jatu pewani ma medibi jiwexunkanikiki.

¹⁵Diosun Yushin Pepatun betsa watimawakin jawen yuixunika Jeremías yuikin yubai:

¹⁶“En Yavé Diosun jatu yuikin:

‘Janu jatiada Israelbukidi en ana jatukidi yubakaidan,

eska en ixanaii.
Jatiada jaska en jatube yubakai benaidan, ana bemakis en jancha en jatu yunuamaki.
 Janua janu jatuki dasikatsi jatun buxka anu en jancha mistukin jatun juinti bera watan en jancha en jatuki kenea keska waxanaii”, iwanan, ana ja janchakidi yuikin:
“Jatun chakabu jatu buaxuntan en ana jaska jatukidi shinanma ikunkainxanaii”, Yavé Diosun ea washinaki, aka Jeremíasin ninkatan nuku kenexuni. **“Ma nukun chakabu pewatan nuku buaxuniken ana tsuan jatun chakabu buanun ixun yuinaka ana tesenxun jau ana jamen yuinaka kuayamakubainunbunwen.**

Dios yubakaniki jaki dasi kakatsi chintuntimakiaki, na janchadan

“En betsabu inun en puibuun, jaskawen taea Jesucristo nuku mawaxunkin jawen jimi jabawaniwen taeadan, natian jawa dateama Diosbe janchanun ika jawen dintu medibi anu jikiai keskatan nun jaki ma kematidubuki. **“Ja medibi dintu anu janu besti wai jawenabu Diosbe janchaxunika besti jikibiakubainmisbun eskatian Jesúsun ja tadiwen bepunibu keska nuku bepenxunkinan, jawen yudawen mawakin ja medibi dintu bepunibu bepean keska waniki, jawen taea ja bai bera chibankin jawen kai nun Diosbe janchakubainxanunbun nuku axunkinan.** **“Natianan, nukun Diosbe nuku janchaxunika kayabi Dios bebur ma niaki.** **“Jaskawen taea nukudi Diosbe janchanun ika nukun shinan chakabun nuku mekemis ana mekemama unpaxwen chuki keskatan nuku juinti xunpintan chanima**

kayabi ikun kayabi wai Diosbe janchakubainankanwen. **“Jabias mestenwantan shinan betsa betsapa wai chintuanma jaska nun ikunwankin yuiai besti manakakubainankanwen.** Chanima Dios yubakanixun nuku axunxanikiki, kaneamadan. **“Ja inun, nun jabun ikunwainbuden, medabenain bechipainamei pepai duanamekubainankanwen.** **“Ja inun, Diosun jancha tapin ichai jeneyamakubainankanwen, jaskai betsabu babui chintunkanikikidan.** Jaskama betsabube medabenankatsis ikin jatu uinmakin jamakidi shinanbiabainaibun jatu beya wakin shinan chankanwankin jatu benimawakubainkanwen. **“Jatu jaska wakin ma Jesús ana jua kemai uinkatsidan, shinan chankanjaidai jatube ichai jeneyamakubainkanwen.**

“Ma Jesucristokidi unanti wakin chanima tapinbiatan jadatubunda jawa shinan betsa maewama ana nukunmebi chakabu mei atimapai juinti kushikin nun akaibudan, ana jawa betsawen Dios daewati nun jayamajaidakiaki. **“Chintuntan nun jawen jiwei kaidan, Dios jatuki sinatakin jatu kupichakayamakin chi medan jatu menukin keyuxanai besti manakanikiki.** Uindakanwen, mesekidan. **“Nukun xenipabun Diosun Moisés yusian jancha ninkama chakabuwaibu dabe kasmai dabe inun besti jabias jakidi yui kaneabumaken jatu unanti watan jawa jatuwen nuiama kupikin tenanpaunibukiaki.** Natian ja yununi mese jayayuaki. **“Matubunan, shinankanwen.** Tsuabun mexanimenkain, ja jawa jatuwen nuiama Diosun jatu kupichakayamaxanaaidan. Jesucriston jimiwen jawen jatu yubani Diosun Yushinin jawen taexun jatu bechipaibia tsuabunda Diosun bakeki jamein jaki

kaxekin jawen jimi jatu jabaxunbiani danankin ichakanikiki, jawen taea jabun ikunwainbu pepati wabianikenan.
³⁰Januxun Diosun jawen jancha yunui jamebi yubakai janchai: "Tsuanda matu chakabuwaya meyamaxankanwen. Emebi En Jiwemistun ja chakabuwaibu ean en jatu kupixanaii", iniki. Ana betsa chani: "Yavé Diosun jawenabu unanti watan jatu manakuxanikiki", adianiki.
³¹Chانيا jawada tibi chakabuui ikaibudan, mese bexmaski. Jamen Dios Jiweatun jatu kupiai tibi ixanaidan, mese mepakekubainxankanikiki, jau jaki besti datekubainunbunwen.

³²Janu man Jesús ikunwankin taewaitian man ini shinankanwen. Jabun ikunwankatsi ikabuman matu bika tenemabiabu mestentan man binukubainyamaki. ³³Januxun jatidi matubi ichakin midimabun uiainbun bika betsa betsapawen matu memaibun janua betsabu ja nuitapaibube jatuki dasixun jen iyamai dateama man jatu medabewakubainbuki. ³⁴Jesúsunabu betsabu jatuki sinatakin bichiti jiwe medan jatu bichiabu nuitapaibuki man batantanaya matun mabu inun matun jiwe matu bianbun jawa yuima benimakin matun jamapai jatu jenexunkin Dios kenwankin jawen mae pepa nai anu jawa chapuisma janu jiwei ikibi iki man kaxanai jaska man shinankubainyamaki. ³⁵Jaskawen taexun man ikunwainan, benuyamakanwen, man ma jaki chiti ika bika tenemiswen taexun matu ichapa manakuxanikiki. ³⁶Jamen matu akabumaki, bika tenemakinan. Jaska Dios yubakani jaska shinain keskawen matu akaibudan, dateama binui jawen mestenkubainkanwen. Man jaska tenekubainmisbuwen taexun jaska Dios yubakaniwen matu manakua chanima man uinxanaii. ³⁷Diosun jawen jancha yuixunika jancha wa jatu kenexunkin:

"En jaskakidi yubakaidan, jawa manakubidanama jawaida iki juxanikiki.

³⁸Tsuabuda pepabunan, jaska en yubakai shinankin ikunwain jawen jiwxankanikiki. Jamen tsuabunda ja en yubakai ikunwankin mestenwankatsi ikama chintuainbudan, en ana jabuwen benimama ixanaii", aka ninkaxun nuku kenexuniki.
³⁹Jaskaken betsabun Jesús chibain chintuainbu jabu Diosun kupiaya ea inun man ebetan Jesús ikunwain chintuanma nun chibankubainmisbudan, jawen paxai Diosbe nun jiwekunkainxanaii.

**Jaskakin jatun xenipabu
ichapabun Diosun jancha
ikunwanpaunibukiaki, na janchadan**

11 ¹Diosun yubakati jancha chanima ikunwankin jawa uindiamabia jamapai tibi pepawen Diosun nuku duawaxanai jayakatsi jawa shinan betsa wama mesten besti watan nun manaka jaidakubaintidubuki. ²Nukun xenipabu ichapabun Diosun yubakati jancha jaya ja ikunwankubainaibuwen taexun Diosun jatun shinan unantan jatukidi pe shinain benimakunkainiki.

³Jamen jawada nun uiain inun nun uintiduma dasibi mai inun nai anu damiwakinan, jawen jancha kushipawen besti Diosun damiwanidan, ikunwankin nun unankubainnaii.

⁴Ja inun, Adánen juni bake dabe Diosun yunushina jawen jancha Abelin ikunwankin chibankin jawen Dios kenwanti chaxuwani tesenxun kuakin keyuxunbiaya jawen betsa Caínen Diosun yunua jancha chibanma jawen bai anua yunu besti kuaxunkin Dios kenwanpaabiaya Abelin kenwanti besti Diosun bechipaikin jawen jancha

ikunwain unain: "Juni pepaki", anikiaki. Ja inun, Abel mawabianiken jaska ikunwankin tates taewatan jenebaini jabiawendi nun ikunwankubainxanun Diosun jancha Abelkidi kenenibu uinkin nun unandiakubainmiski.

⁵Ja inun, Henoc juni pepatun Diosun jancha ikunwankin chibankin jeneama Diosbe jaibunamekin Dios benimawakubainaya jawenabu uinmamabainkin jau mawayamanun Henoc Diosun nai anu aininiaki. Jaska kenenibu nun uinmiski. ⁶Ja inun, tsuabunda Diosun jancha ikunwanbumadan, jaskatan Dios benimawatidubumaki. Jakia tsuabunda Dios jiwea jaya inun jatun jatu manakuxanai benakin jau ikun besti wakubainunbunwen.

⁷Ja inun, nukun xenipabu Noén Dios ikunwanyan Diosun bebunkidi jaska waxanai idiamma uianmabia juni pepakin Diosun yunuti chibankin jawen jawenabu paxawakatsi nunuti ewapa wanikiaki. Jaska Dios ikunwainwen taexun Diosun mekekin jawen pewen manakukin paxawanikiaki. Jabias jancha ikunwankin chibainwen paxakin yudabu mai jidabi anuabu Noén jatu kupinikiaki.

⁸Ja inun, Abrahamnen Dios ikunwankin chibankubainaiwen taea Dios jabe jadia yubakakatsi ikin Diosun kena jawa jen iyamama ikunwainwen taea jawen mae jenei taxnikaini jani kai unanmabia ja mai pakea betsa anu Diosun inanxanai anu kanikiaki. ⁹Diosun jaska yubaimawen taea jawen shinanen besti ikunwain ja mae anu chipu ibuwanunbadiai ja shinain nawa betsa keska jiweyuniaki. Jaska jiweidan, tadi puntebaunkin jiwe watan jiwea akeakeniki. Jabiaskadaija jawen bake Isaac inun jawen baba Jacob ja Diosun jatu yubani ibuwaxanun

ika jiwediakubainbukiaki. ¹⁰Diosun jawen dami jawa kaneismatun ma jatu mestenwanxuni anu jadi jatu jiwemaxanai maewan Abrahamnen shinain na mai anuxun dukun mana taewanikiaki.

¹¹Ja inun, Abrahamnen ain kayabi Sara ma yuxabujaidakin bake bitidumabiaken Abrahamnen ikunwan besti ja dikabi ma ika kai mestebujaidabia Diosun medabewa bake wanikiaki, Dios jabe yubakaima padanma ja menexunxanai ikunwankubainyamawen taexunan.

¹²Tsuan jaska watidumai Abraham anibujaidabiatun bake waima janua jawen bababu midimajaida bishiti inun ian kexa anu mashiti tsuan jati tanatiduma keska pajaidanbukiaki.

¹³Jamen ja yudabu jaska Diosun jatu yubani jadi jiwediamabia ikunwan besti mawani bukiaki. Jakia Diosun yubani bebunkidijaidaxun ikunwankin besti shinain punu nukama manakakin jabun ibubis shinain: "Na nawan mai anu baii niyua keskakin Diosun mae pepa nai anua nun jadi kaxanai anu nun manakakunkainaii", ikubainbukiaki.

¹⁴Jabun jaska yuibiakin jatun mae kayabi bechidama xabakabi ninkakin unanbiai jaskada dabanen ja mae manaka bestikubainkanikiki. ¹⁵Jaska jatun mae anua benibu pe dabanen shinain ana jawendi chintunkeanibukiaki.

¹⁶Jaskama ja mae pepajaida jawendua nun jaska uindiamma chakabuma nai anu Diosun jatu yubayama shinain jabianus jiweyuni bukiaki. Jaskaken jabu katuni Diosun ma jatun maewan pewaxuniwen taea Dios jatuki dakeama jatu shinain: "En jatun medabenan Yushinki", imiski.

¹⁷⁻¹⁸Ja inun, Abrahamnen Dios ikunwaniwen taexun Diosun jawen bake Isaackidi yubakin yuikin: "Isaacwen min bababu ichapa mia waxunxanikiki", abianixun januxun časka ikun ea

chibainmenkain? ixun unanti wa jawen bake Isaac Abrahamnen Dios inankin kua keyuxunun, iwanan, jawa yaushi jawen nuiama jawen bake bestichai iyui kanikiaki.¹⁹ Jaska Diosun axuan uinkin jawen kushipakidi Abrahamnen tapiniki, Diosun mawabu bestenwantidukidi tapinkinan. Jaskawen taexun jawen bake inankin Dios tenanxunbiai kaxun ana jawendi jawen bake jiwea chintunwanbidankin jawa wama ixu keska iwenikiaki. Jaska wakin Diosun kushipa jawen shinanmati xabakabi jatu unanmaniki.

²⁰ Ja inun, Diosun jawenabu duawaxanai Isaacun ikunwakin jawen bake Jacob inun Esaú jancha pewen Dios jatu yukaxuniaki.

²¹ Ja inun, Jacobun Dios ikunwain ma mawa kemaxun jawen mestenti tsumatan Dios kenwakin jawen baba José juní bake dabe jancha pepawen jatu duawakin yukaxundianikiaki.

²² Ja inun, Diosun Israelbu Egipio anua jatu taxnimabainunbadiai José juní ikunwain mawakin jawenabu jatu yuikin: "Nenua kainbainikan, mai pakea pepa Diosun matu ibu wamaxanai anu en xau en bababun jau ea bununbadinunbunwen", akin jatu yununiaki.

²³ Ja inun, Israelbu pajaidaibuwen taea Egiptonawa xanen ibu jatuwen datekin jatu juni bakebu kaian jau tenankubainunbun ixun jatu yunubaimaken jawa dateama Moisin ibubun Dios ikunwakin jatu bake jawenduajaida kaianwen nuikin uxe dabe inun besti juneyunibukiaki.

²⁴ Ja inun, Egiptonawa xanen ibu faraónen ainbu baken Moisés jene anu nunua nexetan ma yumewaimawen taea juni ewa Moisés jawen bake jatu wamakin jatu kenamakatsi ikama Dios ikunwainwen taea²⁵ Moisin katukinan,

Egiptonawabun beya jatubetan mei benimai jatube chakabui jiwekatsi ikama jaska jawenabun bika teneaibube medabewai jatube n uitapakatsi jaska shinankin katuniaki.²⁶ Januxun Dios ikunwakin jawada Dios yubakani manakin Egiptonawabun mabu pepa betsa betsapa Moisés inainbuwen taea Mesías Cristo ja kenwanma xanen ibu wabu jawen kentidu unanbiai xanen ibu jiwe anua kainkaini Dios kenwain jatun medabenan Mesías Cristo jawenabubetan manakai bika tenei yumanbiai manakuti pepa Dios anua jawa benuama inanxanai Moisin jaska katuniaki.

²⁷ Jaskaken Egiptonawabu xanen ibu jaki sintabiaya jawa jaki dateama Egipio mai pakea anua kainkainima Dios uintidumabia ikunjaidawakin shinan betsa wama ikunkainikiaki.²⁸ Ja inun, Diosun yunua ninkatan ikunwakin Moisin jawenabu Pascua besi jatu tates taewamakin misi xaxama inun chaxuwan bake nami xui jatu pimakin chaxuwan jimi jiwe tibi janu jikiti xui xexekaian jatu kepuxmakin keyuken Diosun nai tsuma debuwanikatun Egiptonawan juni bake iyuabu dasibi jatu debuwabiakin Israelbu jawa meama dunkebainikiaki.

²⁹ Ja inun, Israelbu Egipio anua paxai bui lanenwan Tashipa namakis paxkatan Diosun jatu bai wakin metu waxuna Diosun meketi kushipa ikunwain Israelbu pukei keyuaibun jakia Egiptonawabu jabias baiwen jatu chibambaini pukedaijasai keyunibukiaki.

³⁰ Jaska inun, Israelbun Diosun yunua ninkatan katan katankin xaba metutitian jatu dunkebaunaibun Jericó mae mishki ewapabuwen kenebaunibu di iki keyuaya Dios ikunwakin Israelbun jatu detekin maemakin yamawanikiaki.³¹ Ja inun, jabianuadi

Rahab ainbu jininipabia Dioski mesekin Israelin baba dabe unantinain buabu jatu itan medabewashinawen taexun chakabukubainmisbu Jericó anu jabe jiweabu jatu yamawakin Israelbun Rahab tenanma inibukiaki.

³²Matun xenipabun Dios ikunwankin Gedeón inun, Barac inun, Sansón inun, Jefté inun, David inun, Samuel inun, Diosun jancha yuixunika betsa betsapabun jaska wakubainibu ana en matu yuikatsi ibiakin jaska waxun en matu yui keyutidumaki. ³³Betsabun Dios ikunwankin xanen ibu betsabun mae mebinibukiaki. Betsabun Dios ikunwankin jatun mae anu xanen ibukin jatu pe jiwemakubainibukiaki. Betsabun Diosun yubaka jancha ikunwankin Diosun kushipa bitan jatuna wakubainibukiaki. Betsabu inu pubenbu anu yunukin jatu bichiabu Dios ikunwainwen taexun jawen kushipawen Diosun jatu nemaxuna jabu piama inikiaki. ³⁴Betsabu ichakawakin tenanun, iwanan, chi medan jatu putabu Dios ikunwankin jawen kushipawen chi nematan jawa menuama kainibukiaki. Betsabu nupe jawen detenameti bestiwen jatu detepananbun Dios ikunwainbuwen taea paxanibukiaki. Jaskaken juinti babubun ikunjaidawakin taewaibu Diosun jatu kushipa wakubainaya nawabun Diosun enabuki sinataibu detekatsis ikaibu maemakin jatu paxamanibukiaki. ³⁵Ja inun, betsadan, ainbu betsabun jatun bakebu mawa manukin Dios ikunjaidawaibu Diosun jatu bestenwanxuniaki.

Jamen juni betsabun Diosun jancha chibankubainaibuwen taexun jatuki sinatakin jatu ichakawakin jaska jabun bechipai keska biama paxama jakia mawa ana bestentan jiwea pepa bixanai shinain mawakubainibukiaki. ³⁶Ja inun, betsabun Diosun jancha

ikunwanmisbu nuitkaapawakin jatu kaxewakin betsabu kusha kusha akin betsabu mane dispiwen nexatan jatu bichimapaunibukiaki. ³⁷Ja inun, betsadan, Dios ikunwainwen taexun betsabu mankanwen jatu tsaka tsaka akin jatu tenanpakeaibun betsabu jawen ji nisatiwen jatu mextekin nisanibukiaki. Dios jatu dananmakatsi ikin jamapai shadabu bika jatu tenemakin jatun nupe chaipawen betsabu jatu detekin tenainbun betsabu ichakawakin jatu nuitkaapabu paxai jamakidi kakin chaxawan bichi tadi besti sawea yumanjaidakubainibukiaki, ³⁸jabu jaskanu jiwtidubumabia mae chakabu janu tsua jiwtidubumanu buni yuinaka keskai mati tenanman tanpe anu jiwekubaunidan. Jaskai yumankubainaibun jabun jatu ichakawaibu jatu binujaidabiaken junibu chakabun jawa jatu kenwanma jatu danan bestikubainibukiaki.

³⁹Jaskabia jabun Diosun yubani shinankin ikunwainbuwen taexun jawen yubaka jatu uinmadiamabia Dios jatuki pechiamma jatu unanti watan jatuwen benimakunkainikiaki. ⁴⁰Diosun jatu jaska wakinan, jaska yubakani jabu bebunxun besti akatsi ikama nukubukididi shinankin janus nuku xuku watan jaska yubakani pejaida nuku inankatsi nuku jatube ichawaxanikiki, jiwekuian anu nuku jatube jiwmakinan.

**Jawen bake ikunwainbu Diosun jatu
pewamiskiaki, na janchadan**

12 ¹Jaskaken nukunabun jabu dukuntun Diosun yubaka jancha ikunwankin bika betsa betsapa jatu tenemakin memabu jabuan jatun shinan nuku uinmakubainixun natian nuku uinkanikiki. Shinanankanwen. Nuku jatun itimaska wai inun jamapai chakabu tibitun nuku bexetidu jenetan

beamabainkin jawada pepa Diosun nuku yubamis ja shinain kushipai dayaxunkin jeneyamakubainankanwen.² Cristo nuku ixuni jakidi dukun unankin shinankubainankanwen. Jabun nun ikunwainbu nun jaki chiti ikabu jatunan ma nuku pewaxunkubainikiki. Jaskawen taea Jesús cruzkia nuitapaidan, ja ichakawakin nuitapawaibu jawen dake shinanma nuku mawaxuniki. Jaskaidan, nuitapawabiabu mawakin binutan benima paepayabi jawen Epan xanen ibu tsauti yusiudi jabe xanen ibui tsauxanai unain iniiki.

³ Ja inun, yudabu jatu medabewakin jatu uinmabia jabun ikunwankatsi ikama juni chakabubun Jesús ichakawabu yumanbiakin jawen Epan yunuti jancha Jesúsun jeneama ini jaska keska shinankubainkanwen, Jesús ikunwain punu nukai Diosun baiwen kabiai man bextekeyamakubainxanunbunan.⁴ Ja inun, chakabu tibi binui man bika tenekubainai Jesús nuku ixuni keskai tsua man mawadiamaki.⁵⁻⁶ Ja inun, nun jawen bakebu Diosun nuku yusini man jakimaii. Matun xenipabu xanen ibu unanepa Salomónen eska jawen bakebu yuikin:

“En bakebuun, jaska Dios matuwen nuikin

matu pewamis matu yuinun
ninkakanwen.

Diosun tsuabuda bechipaikin
jawada bika tenemakin jatu
kupimiski.

Ja inun, tsuabuda Diosun jawenabu
wakin

jatun chakabu jatu unanmamiski,
nun ana ayamaxanunbunan.

Jaskawen taexun jawada
bikawen Diosun matu unanmai
dananyamakanwen.

Ja dikabi, matu kunyan akaya
punu nukadiyamakanwen”,

jatu jaska wapauni na jancha jakimayamakanwen, Diosun jabias matu ana yuiai keska shinankinan.⁷⁻⁸ Ja inun, juni dasibubun jatun bakebu bechipaikin yusinkin jatu pewamiswen taexun: “En bakebu pewanun”, iwanan, jawada bika Diosun matu tenemakin matu pewaikiki, matu besti pewamadan, jakia ikunwainbu betsa betsapa jabiaskasdi jatu wakinan. Jamen bika tenemakin Diosun matu pewama man jawen bakema keska itiduki, bake ibuuma keskaidan.⁹ Ja inun, nun juni ewadiama nukun ibubun nuku yusinkin nemajaidakin nuku tapinmakubainbuki. Jatun yusian bikabiaken tapinkin nun jatu bechipaikubainbuki. Jakia jaska nun wani binukin nukun Epa Dios nai anua bechipaikin natian jawen jancha ninkakubaini nun jabe jiwxanaii, jawa chakabuwen nuku kupiamadan.¹⁰ Na mai anu nuku jiwmakin yumewakin nukun ibubun yusinkin bika tenemakin nuku bexmas pewayunibuki. Jakia nun Diosunabu medibi wakin nuku pewakin bika tenemakin Diosun shinanmis keska chanima nukundi nun shinankubainunbun Diosun nuku pevakubainmiski, nuku ja keskadi wanun ikadan.¹¹ Ja inun, chanima Diosun pevakin kupiai xuama mebiatan chipu jakimatan januxun jawen yusian pepa tapinkin jawen jiwea unanuma pe jiwekunkainai unantidubuki.

¹²Diosun pevat yusian bikabiaken ana mestein kushipakin ana Dios kenwain matun meken meshantan danti ixun kenwakin jeneyamakubainkanwen.¹³ Ja inun, Jesús ikunwain jawawenda bika teneaibu punu nukai jau chintunyamanunbun jaska Diosun bechipaiai yusinkin bai kayabikidi jatu pe unanmakubainkanwen.

**Diosun jancha danainan,
mesejaidakiaki, na janchadan**

¹⁴Ja inun, tsuabuda dasibubube man unanuma jiwekatsis ikaidan, nukipakin

dasibi nukun Xanen Ibun yusian chibain pepa besti jiwekubainkanwen. Jamen man pepai jiweismadan, jaskatan nukun Xanen Ibuki dasitan man jiweitidubumaki.¹⁵ Tsuabuda Diosun inankuin pepa dananma jau jayai keyununbunwen. Jamen jaskama tsuada man juinti sinayadan, sika tacha paepa keskatun jatu daunkin akawakin yudabu man jatu dananmatiduki. Uindakubainkanwen.¹⁶ Matunan, tsuada chutawen kemukin Diosun jawen pepa ma matuki tanabiani kaneyamakanwen. Jaskakin Esaún Dioskidi shinanma piti bestiwen kemukin shinankin jawen betsa maxkubiaken jawen piti pinun, iwanan, jaska iyuatun pepa bimis inaniki, jawena benukinan.¹⁷ Jamen Esaún chipu jawen epa yuikin: "Min bake iyua besti eadán, jau Diosun ea duawaxanun Dios ea yukaxundiawe", atushia jakia jawen bake maxku Jacobun jawen epa Isaac padan dama Dios yukaxunkin menetan jawen epan jaska waxun Esaú ana jawawen pewatima nemabia kaxajaidakin Esaún ana yukabia jawen epan jawen yuba jaska waxun ana maewaxuntima inikiaki, jaska matubun man unanain. Man chipu jaskadiatidubuki. Uindakubainkanwen.

¹⁸Nukunabu Israelbu chaimaxun uinibu keska ma jaskamaki. Jatukidi ana matu yuinun ninkakanwen. Jabunan, mati ketia jede ji ikai tsuan metiduma iniki. Ja inun, meshu medan inun niwe kushipa xunku ikai anu mapunibu keska man jaska keskamadiki.¹⁹ Ja inun, trompeta chan ikai ninkama jawa Diosun jui kainyain ninkamadi inibuki. Jamen jabuan ja jui taxnai ninkakin jau ana janchayamanun nemakin ea anibuki.²⁰ Jaska Diosun xabakabi jatu yuia jawenabu Moisin nemakin: "Tsuada jawen mati anu paiken jau mawanun mankanwen tsaka tsaka akasmakin chachitiwen pupe

akin jatu debuwakanwen, inabu inun yudabudan", akin jatu yuiai ninkai jaska tenetidubuma inikiaki, ja yunuti mesewen taeandan.²¹ Diosun jawen kushipa taxnima mesejaida uiainbun jabiaskadiai Moisin jatu yuikin: "Eadi datei en saki saki ikaii", inikiaki.

²²Matudan, nukun xenipabu na mai anua Dioski nukua datenibu keskama chanima kayabi Mati Sión inun Dios jiweatun maewan Jerusalén pepa chaxa chaxa ikai nai anu janu jawen nai tsumabu janu jaki dasia tsuan jati tanatiduma jabun Dios kenwainbu jaskabu anu man ma ikunwain jaki kemaki.²³ Jabu dukuntun Dios ikunwain jawen bake ikubainibu ma jatun kena nai anu jatu kenexun netani ja yudabu Dios jiwelexuni pemisbu jatun yushin Dios dasibi pewanikatun ma jatu jawa chakabuma wayama Dios dapi ma jaki kemani mapuabu nun shinaiin.²⁴ Ja dikabi Jesúsun jawen yuba bena nuku waxunkinan, mawai jawen jimi jabakin Abelin jimi binuniki, jawen taexun Diosun nukun chakabu nuku buaxunti wakinan. Jamen Abelin Jimidan, jawen taea Dios sinatai jawen yupukunaniki, tsuan chakabu buatimadan.

²⁵Ja inun, Mati Sinaí anuxun Diosun jawen yunua jatu yuibia ninkama jawen kupiti paxama inibuki. Ikiti nai anuxun Diosun jawen bakebetan nuku yusiaín jaskanibu keskakin nun ninkama nukudi nun jaskatan paxatidubumawen taexun jawada Diosun nuku unanmai jaki pechitan dananma uindakubainankanwen.²⁶ Ja inun, jatu yusiaintian jawen juiwen Dios jiwehistun mai pacha sakumatan chipu ana jatu yubakin: "Ana bestiwakin mai inun jawada nai anua dasibi en ana pacha sakumaxanaii, mai bestimadan", jatu waimaken nuku kenexunibuki.²⁷ Jakidi yuikin: "Ana bestiwakin en

axanaii”, inidan, ja mai damiwani anua jamapai tibi maewa akeaketan januxun jawada Diosun bechipai maewama jau betsama ipakexanun bun dasibi damiwani Diosun ana pacha sakumaya jawada Diosun mekekatsi ikama jamebi yamai keyuxanaidan, nun tapintidubuki.²⁸ Janu Dios xanen ibui jiwemis jawen xanen nuku janu jiemaxanaidan, jawa maeama iyanikiki. Jaskaken Dios pejaida wakin kenwakin shinan chankanwakin jaki mesekin jawada jaska bechipaiai keska benimawakin axunkubainankanwen.²⁹ Nukun Dios kushipadan, chi keskaki, dasibi yamawakin keyutidutan.

**Jaskakin nun Dios shinan
chanwanwantidukiaki, na janchadan**

13 ¹Ma jawen jenea yusian kene en matu bumai uinkanwen. Jesús matubetan ikunwainbube nui jeneama jatube bechipainamei duanamepakekubainkanwen. ²Jaska besti shinankin jamapai pepa jakimama matuki bai beaibu itan jatu duawakin pimakubainxankanwen. Jabiaskadi wakin ikunwainbu betsabun Diosun nai tsumabu jawa unanma jatu pimakin uxanpaunibukiaki.

³Ja inun, Jesús ikunwainbuwen taexun bichiti jiwe anu jatu bichiabu jatuwen pechiama jatuwen nuikin matu jabe bichiabu keska shinankin jatu medabewakubainxankanwen, jaskai nuitapaibu unankinan. Ja inun, jatu ichakawaibuwen nuikin jatu medabewakanwen, jabiaskadi matu waibu man metidu shinankinan.

⁴Ja inun, chutanamebaunmisbu inun beneyabia inun ainyanbia chakabui kemumisbu Diosun jatu unanti watan kupia akeakexanaiwen taea tsuanda ikunwain ainyantan betsawen ana kemuama ja besti uin

jaska man bechipainamedabeai mekei jabe jiwekubainkanwen. Beneyatandi betsawen ana kemuama ja besti uin jaska man bechipainamedabeai mekei jabe jiweiakubainkanwen.

⁵Jaska inun, jawen mabu icha wanun ika peiwen kemuama jawada besti man jayawen benimakubainkanwen, Diosun nuku yubakin: “En matu putama inun en matu jenetaskama iyanaii”, inwen taeandan. ⁶Jaskaken ma nuku yubani jaska jaki chiti itan jawa dateama yuikin:

“Yavé Diosun ea medabewamiswen taea
jamapai tibiwen tsuabunda
chakabuwanun ixun
ea amanun ikaibu
‘En Xanen Ibun ea medabewaya en
dateamaki’”,

ikin jatu yuikubaintiki, dateamadan.

⁷Jaska inun, Diosun jancha Cristokidi jabun matu yusinkin matu pe mekekubainkin matu shinan betsa wamanibuki. Jaskawen taexun jabun Dios ikunwankin chibankubainibu jaska jatun jiwea pepa akin jenebainibu shinankin matundi ikunwandiai jabiaskadiai jiweiakubainkanwen.

⁸Ja inun, Jesucristodan, jawa maei betsaisma jabiaskaski, uatian inun, natian ikai inun, ipakexanaidan. ⁹Jaskaken yusian betsa betsapa benawakin matu yusainbu jatu jawa ninkayamakubainxankanwen. Jamen nun Dios shinankubainaibu nukuwen nuikin medabewakin nuku kushipa wamiski. Jakia jabu padananankin betsa kaya jatun beya pitikidi matu yusinkin bikawaibu jatu ninkayamakanwen, piti beya betsakidi chibankin matun juinti tsuan ana kushipa watidumakidan.

¹⁰Ja inun, nukun chakabu buanun ika Jesús ma nuku mawaxuni nukubu nun jayabiaken tsuabunda judiobun xenipabun beya jenekatsi ikama

yuinaka menukin jatun chakabu buanun ikaibudan, jamen akanikiki. Nukun medabenantun kushipa jayatidubumadiki. ¹¹Ja inun, Dios daewakin nukunabun chakabu jau Diosun buatan ana shinanyamanun Diosbe nukunabu janchaxunika xanen ibu binuatu yuinaka tesenxun jatun jimi medibijaida dintu anu buken janua jawen nami mae pekachuxun jawen yuda kuakin keyumisbuki. ¹²Jabiaskadi wakin jawen jimiwen jawenabun chakabu Dios buamaxunkin nuku medibi pepawanun ika mae pekachu anuadi Jesús nuku tenanxunabudi nuku mawaxuniki. ¹³Jaskaken Jesús anibu keska wakin nukudi nuitapa wakin dakewaibu ja bai Jesúsun nuku tatesxunbaini chibankin judiobun beya ana shinanma nuitapabiai dakeama ikubainankanwen. ¹⁴Jaska inun, na mai anu nun jiweyuanan, mae putatimai jas ibua jawen nui nun janus ipatidubumaki. Jakia Diosun maewan pepa ja yubani taxnimaxanai jaskawen nun jiwxeanai shinan bestikin nun manakayuaii. ¹⁵Jaskaken Jesucristo nuku mawaxuni shinankin jeneama nukun juiwen Dios kenwankubainankanwen. Jaska wakin nun Dios benimawatiduki, yuinaka kuapaunibu keska wakinan. ¹⁶Ja inun, Dios shinan chankanwanun, iwanan, ana matun jamapaiwen nuiama pepakin ikunwain betsabuwen nuikin jatun medabewai jawada man jaya ichapa kasmai eskadabes paxkaxun yaushiamma jatun inankin jeneyamakubainkanwen, jaska wakin Dios shinan chankanwankinan. ¹⁷Ja inun, matu yusinkin mekekubainaibu jatun yusian ninkatan jatuki chiti ikin chibankubainkanwen. Jaska matu putama jawa juindukuanma mekekubainmisbu jabiaskadi Diosun unankin jatun manakumiski. Ja inun,

jatun daya itimaska wama ninkajaidakin man jatu benimawakubaintidubuki. Jakia ninkama man jatu itimaska wakin man jawa tapinkin pewai kaintidubumaki.

¹⁸Ja inun, Jesúsun jancha yusinkin nun pe chibanmis unankin dasibi pe jiwekin nun jatu pe uinmakubainun bun Dios dayuikin nukukidi ea axunkubainkanwen. ¹⁹Ja inun, matu anu en ana chintunkatsis ikaiwen taexun menan Dios ea yukaxundikanwen, matu anu en jawaida kaxanunan.

Diosun jau jatu duawakubainun yununiaki, na janchadan

²⁰Nukun Xanen Ibu Jesúsun jimwién Diosun yuba bera ikibi ika ma pewani jawen bake chaxuwan mekenika pepa keska nukun mekenan bestenwanitun unanuma jawen kushipawen nuku jiwemakubainkatsis ikikiki. ²¹Diosun jaskakidi matu shinain yubakani jatun jau matu dasibi pewakubainunwen. Jabiaskadi wakin jaska bechipaiai keska wakin jau nuku amadiakubainunwen, Jesucristowen taexunan. Jaskaken nukun medabenan Cristo kenjaidawakubainankanwen. Jaskakidan.

²²En betsabu inun en puibuun, en kene chaipamawen en matu medabewakin benimawakatsis ikai jawa eki sinatama shinan pewatan uindakubainkanwen. ²³Ja inun, nukun betsabu Timoteo bichiti jiwe anua ma taxnimashinabu en matu unanmai. Jawaidakidan eki nukuaya jabe kaxun en matu bechimai kaxanaii.

²⁴Ja inun, matu yusinkin matu mekekubainmisbu inun Diosunabu matubetan ikunwanmisbu dasibidi en jancha en matu bumaii. Ja inun, Italia mai pakea anuxun ikunwanmisbun jatun jancha matu bumadiakanikiki.

²⁵Jaskaken Epa Diosun jau matu dasibi duawakubainunwen, jawen pepawenan. Jatiski, en janchadan.

SANTIAGON JATU KENE BUMANIKIAKI

SANTIAGO

**Santiagon jatukidi shinanikiaki,
na janchadan**

1 ¹Matu Israelin 12 juni bakebun jatun bababun man Jesucristo ikunwainbu mai jidabi anu man sa ini manibaunbu en Santiagon, Dios inun nukun Xanen Ibu Jesucriston tsumapan en matu kene bumai uindakanwen.

**Jawen shinan Diosun nuku tapinmai jawen
kushipakunkaintikiaki, na janchadan**

²En betsabu inun en puibuun, jawada bika betsa betsapa man mekin tenebiai Diosun benimati man jayawen shinan chankankanwen. ³Man ma unaiin, jaska man ikunwain matu unanti wakin matu bika tenemaibudan. Jaskawen taexun jaska matu nuitapa waibu keska tapinkin tenea akeakekin ana jawen kushipakin man tapin jawen ewakunkainaii.

⁴Jawada man teneai jawen Diosun matu kushipa wakin matu ewa wanun, iwanan, matu shinan nukumakatsis ikai jawen kushipai man ana jawawen bika tenetidumai ja jawen Diosun matu unanti wai jayai keyudikubainkanwen.

⁵Tsuada jatidi man unanepadiamanan, Dios yukakubainkanwen. Jawen unanepadan, jatun matu inainkiki, jawa yaushiamadan. Man jaska Dioskidi shinankin dasibi jawada akatsis

ikai matu axuntidu jayaki, jawen unanepa keyutiduma jaya inun jatun jawa matukidi chakabu shinankin metuismadan. ⁶Jaska Diosbe janchakin yukakinan, chanima ikun besti wakin akubainkanwen: “Ea inantidumenkain”, ikin shinan dabewama akinan. Jamen man shinan dabewama shinankin man ea akaidan, ianenwan niwen bechuduwanキン tunkax abubumis keska wakin man akawaii. ⁷Tsuabuda jaska keskakin jatun shinan betsa wa akeakekin yukamisbudan, jawada Dios anua bitidubumaki, ⁸natian jatun jamapaikidi Dios yukabiatan jaskas ikunwankin shinanma pena betsation ana jaskakidi yukashina ikunwankin mestenwamamadan.

⁹Jaska inun, ikunwain betsa mabu ichapa jayama tsuan jakidi shinainsmabia Jesucristo ikunwainwen taexun Diosun kenwanxanaiwen taea jau benima bestikunkainunwen.

¹⁰Man ikunwain mabuyabuun, matun mabu bestiwen jawen kein man shinanyamanunbun Diosun matu ma yusinmawen taea matudi benimadikanwen, matun mabu man jayabiadan, jadan, ni maxu jawen juayabis debumis keska man unainan.

¹¹Mabuya jiwebiani eskaxankanikiki. Jakidi matu yuinun ninkakanwen. Ni

jua tuea jawenduabiaken badi taxni
kujaidakidankin jua jawendua pepabia
benukin badin utsi wakin nidi amis
keskai jaska keskadiai juni mabuwanyan
jiwea mawai jawen mabu jawenduayabia
jawan mabu inanananmis jabu benui
yamanunbadikanikiki.

¹²Tsuabunda ikunwain bika
betsa betsapa tenebiai babuama
binukubainmisbu Dios jatuwen
benimakin jatu manakukin jaska jabun
Dios bechipaimamisbu jaskabu jatuki
Dios yubakai jiwekuian jatuki tanani
jatu jawen manakuxanikiki, maiti
sawemakin akawakinan. ¹³Ja inun,
chakabun Dios unanti watiduma inun
jau nun chakabu wanun Diosun nuku
yunutaskaismaki. Jaskawen taexun
tsuabunda jatun shinanwen jawada
kemu taxnia uin kanekatsis ikin yuikin:
“Diosun unanti wakin ea kanemakatsis
ikikiki”, iwanan, jau jaska ibubis
shinain janchayamakubainunbunwen.
¹⁴Diosun jaska yunuamabiaken ibubis
jatun shinanen chakabu shinankin
jaska bechipaiai keska aki jaki nexei
chakabu beyakubainmisbuki. ¹⁵Na
chakabudan, eskaki. Matu yuinun
ninkakanwen. Tsuabunda jabun jointi
medan jawada chakabu shinankin me
taewatan: “Jawamaki”, ikin chakabu
betsa betsapa mekin mata wakubaini
Diosbe ana jaibunameama jawen jancha
ana chibankatsi ikama ikubainaibuwen
taea niti ikama Diosbe jiweama mawai
benuxankanikiki. ¹⁶En betsabu inun
en puibuun, en matuwen nuiaidan, jau
ibubis man padanananyamanunbun
matu xabakabi yuinun ninkakanwen.
¹⁷Nukun Epa Diosun badi inun uxe
inun bishi damiwanitun jawen shinan
betsa betsapa waisma inun jakidi
jawa juneamawen taea jaska tibi jawa
chakabuma pepa besti janua juai nuku
inankubainikiki. ¹⁸Ja inun, Diosun

nuku jaska wakatsis ikin jawen kakape
chanimawen nuku jiwea bera inaniki.
Nuku dami waniwen taexun nukun
dukun jawen bake ikunwankin nun
taewani nun jayabuki.

**Diosun jancha chibain jaskai
jiwetikiaki, na janchadan**

¹⁹En betsabu inun en puibuun,
en matuwen nuaikididan, eskaki,
shinaindakanwen. Jawada Diosun
matu dasibi yusinkatsis ikai menan
jawaida ninka peidawakubainkanwen.
Jakia jawada yuui man janchakatsis
ikai unanxubida jatu yuikanwen,
jawa jatuki sinatamadan. ²⁰Jamen
yuda betsa ja aki sinatakinan, jaska
Diosun bechipaiai keska aki man
pepatidumaki. ²¹Jaskawen taea matu
dasibun jaska Diosun atimapa
danamis chakabu betsa betsapa man
jaya jenekin puta keyudikanwen. Man
jaska waiwen taexun Diosun kakape
matu yusianbu man ma ninkanidan,
jawa dananyamakanwen. Ja Jesúsun
janchadan, kushipa paepaki. Jatun matu
paxa waxanikiki.

²²Diosun jancha Cristokidi kakapedan,
bemakis besti ninka bestiamma jaska
jancha man ninkai keska ja jancha
ninkatan akubainkanwen. Jamen jaska
man jancha chibanmadan, ninkabiai
ibubis man padananan bestitidubuki.

²³Tsuanda Diosun jancha ninka
bestimisdan, ja jancha chibain jaki
meseamadan, yuda betsan jawen
besu jawen beisitiwen ²⁴uinbiakin
jawen besu jaskadada ibubis uinbiatan
nasaukekaini jawaida jakimamiski,
jaskadada uinxu shinamadan. Jaska
keskadiai Diosun jancha ninka bestitan
jakimakubainkanikiki, jatun chakabu
pewakatsi ikamadan. ²⁵Jamen tsuabunda
Diosun jancha yununi ninka bestiamma
jakimakatsi ikama jaska chaniai chibain

jatun chakabu jenei pepakubaintidubuki. Jaska bestiamu jawen jiwekaini chintuanma jaska tibi Diosun janchan yunuai menei jaskai shinan chankankanxankanikiki.²⁶ Jakia tsuabunda Dios jiwea kenwakin shinankin: “Dios ikunwain en jiwxunkunkainai”, iwanan, shinanbiakin jawada atimapa shinanchakakin yui xeti itibia nemai xeti itidumawen jatun shinan pe mekeamawen taea ibubis padananankin kanekin Dios benimawatidumaki, Jesús ikunwain jamenkinan.²⁷ Jakia tsuabunda chanima Dios jiwea kenwan kayabikin nun akaibudan, nun eska itidubuki. Matu yuinun ninkaidakanwen. Nun pepa jawa chakabuma ikatsis ikaidan, nukun Epa Dios benimawakin eska uinmakubainkanwen. Bake ibuumabu inun, ainbuabu jatun bene ana jayabuma nuitapaibu jabuwen nuikin jabun jawada bixunkin jatu medabewakubainkanwen. Ja inun, jamapai yudabun akai chibain kemui idumapamayamakubainkanwen.

**Diosun jancha chibain medabenain
eskatiakiaki, na janchadan**

2 ¹En betsabu inun en puibuun, betsadan, nukun Xanen Ibu Jesucristo pepajaida man ikunwainwen taexun yuda tibiwen nuichakai betsa katukin betsa dananyamakubainkanwen.²⁻³ Jaskawen taexun miyuiwen matu yuinun ninkakanwen. Xanen ibun mane oro meichikiti sawea inun, tadi jawenduaaida sawea matube ichanun itan matu anu jikiaya juni betsan yuikin: “Na tsauti bebunua peki tsauxun ninkayuwe”, iwanan, man jatu duawayu juni betsa nuitapai tadi chuka sawea matube ichanun itan matu anu jikiaya juni betsan yuikin: “Main tsauxun ninkayuwe. Nikatsi iki min nixun ninkatiduki”, iwanan,⁴ juni nuitapai

dakewakin xanen ibu pe bestikidanai ikin man duawakubainmiski. Jaska katukin jaska Diosun matu amakatsis ikai man akama ikunkainai, shinanchakakinan.

⁵ En betsabu inun en puibuun, matuwen nuikin en matu bechipaiai en jancha ninkaidakanwen. Na mai anua tsuabuda nuitapaibu Diosun katua jabun Dios ikunwan kayabiaibu pepakanikiki. Janua chipu jaska jiwekunkainaiwen taexun niti akama nai anu jabe jiwemaxanai Dios yubakanixun dananma jatu bechipaimisxun jatu manakuxanikiki, nai anu jatu jiwemakinan.⁶ Matubunan, shinankanwen, jabuwen datekin man jaska jatukidi shinainan. Ja yuda mabuwanyanbu man duawaidan, jabunan, matu ichakawamisbuki. Ja inun, jabiabundi matu achixun xadabainkin xanen ibubu matu inanmisbuki.⁷ Jabunan, nukun Xanen Ibu Jesucriston matu katuni jakidi jawen kenawen man janchai jancha chakabuwen jakidi matu chitemisbuki. Matu jaska wamisbukidi shinankanwen.⁸ Jaska Diosun jawen jancha yuixunikabu jatu kenemakin jatu yusinma akeakeni tibi binua Jesúsun ja kene ana jatu yusini matu ana yuinun ninkaidakanwen: “Mimebi min yuda min nuimis keskakin yuda betsabu tibiwen nuikubainkanwen”, iniwen taea jaska chibankubainkin jawada Diosun bechipaimis akin man chibainkin akin pewaidan, jaskadan, peki.⁹ Jakia jadatuda mabuya inun peiya besti jatukidi shinankin ja yuda betsa mabuuma jawawen matu medabewatidubuma jatu shinankin kanekin Diosun yununi pewama matumebi Diosun kupiti man ichawaii.¹⁰ Tsuanda dasibi Diosun yusian chibankatsis ibiakin jakia yusian bestichai chibanma kanekin dasibi ja

Diosun Moisés yununi inun nemani man ma jabiati chakabuwaki, matun yuda jawawen xuxati jayamaidan.¹¹ Ja inun, Diosun Moisés jawen yusian kenemakin yuikin: “Ainyanbia inun beneyabia betsabe chutanametimaki”, ani inun: “Matunmebi pubenkin yuda betsabe tenantimaki”, akin yuiken janua man ainyan inun man beneya yuda betsabe min chutanameamadan, jaskai man peaii. Jamen jaskabiai juni betsabe tenankin Diosun yusianki meseama patapakin man kanekubainaii.

¹²Tsuabunda Diosun yunuti inun jawen nemati Jesúswen jatu unanti wakatsi ma pewaniwen taexun jadakidida man janchai inun man jatu uinmakubainaidan, chanima Jesúsun yunuti benawen ma matu taxnimakubainikiki. ¹³Diosun nuku eska waxanikiki. Matu yuinun ninkakanwen. Tsuabuda nun jatuwen nuisbuma Diosundi nuku unanti wai nuiama ixanikiki. Jamen tsuabuda nun jatuwen nuikubainmisbudan, janu kupikin unanti waitian jawa nuku ichakawama jatu binumakin nuku paxa wakin binumaxanikiki.

Jadatubunda ikunwan kayabi wai medabenain unantikiaki, na janchadan

¹⁴En betsabu inun en puibuun, tsuabuda eska janchamisbuki. “En Dios jiwxunkin pe chibankin en ikunwaiin”, ibiamisbu jakia jaska Diosun yununi axunkin benimawatitudubumaki, jamen jawen jancha bestiwen yuidan, jawa jawen ikunwain kayabi xabakabi jawen jatu uinmakin axuanmabiadan. Jaska Dios ikunwainkidi besti janchamisbudan, Dios anu mekei paxati jawen ikunwain jayamaki. ¹⁵Shinankanwen. Eksa ikunwain betsabe juni kasmai aimbu jadatuda nuitapai tadiuma inun pitiuma natian jawa jayama jiweyukem

¹⁶tsuanda tadi inun piti jatu inankin medabewayukatsi ikama jawa jatu medabewatikidi jawen shinanan medabenan besunmai jatun kexa bestiwen yuikin: “Tadi pe sawetan jawada piti man pikatsis ikai pikin yaniwatan unanuma jiwekunkainwen”, iwanan, jancha pepa yuibiakin jaska jatu uinmakin axuanmabia matun jancha jamenki. ¹⁷Jamen tsuada: “Dios en ikunwaiin”, iwanan, kexa bestiwen yuiaidan, jaska besti kainmaikiki, jaska Diosun bechipaiai xabakabi axunkin uinmamadan. Jawen akadan, mawa keskaki.

¹⁸Jaskai tsuanda ikunwan kayabi wadiamabe janchai eskai man unantinatidubuki. Matu yuinun ninkakanwen. Tsuabubeda janchakin yuikin: “Mianan, Cristo min ikunwanyan eanan, yuda betsabu en medabewakubainaii, ikin en yuiaiwen taexun jaska yuda betsabe betsapa medabewai en pe jiwmis mia uinmakin jaska Cristo en ikunwain en mia uinmatiduki. En akaya jakia mian tsuada medabewama jaskada Cristo min ikunwain xabakabi min ea uinmatidumaki. Janchawens besti ikunwankin min jawada min ea uinmatidumaki”, akin man jatu dakematiduki. ¹⁹Januxun matu betsandi shinankin yuikin: “Epa Dios ja besti kushipaken ja besti en ikunwaiin”, ikin man pe shinankin yuiaii. Jaskabiaken yushin chakabubun jabiaskadi ikunwanbiai Dioski datei jawen yuda chuduin saki saki idiamisbuki, kupixanaiki dateidan. ²⁰Jaskaken Dios ikunwainan, ana unainsmapayamakanwen. Cristowen Dios man jamen ikunwan bestiadian, jamenki. Jaskaken man kanemis jamenwanma unantan ana jameanma ikun kayabi wakin Cristowen Dios

dayaxunkubainkanwen.²¹ Nukun xenipabu Abrahamkidi matu shinanmanun ninkaidakanwen. Jawen bake Isaac kainma ma bedunanken Diosun Abraham ikunwain unanti wakin yuikin: "Min juni bakedan, ja min bechipajaidai, min bake Isaac Mati Moriah anu iyuxun chi tapu watan jakixun ea inankin kuakin menuxanwen", aka iyuxun samama chachinun, iwanan, uinmakin akaya Diosun nemanikiaki. Jaska wakin jawen shinan pewen Dios benimawaya: "Ea ikunwain juni pepaki", aniki.²² Jaska nukun xenipabu Abrahamnen Dios axunkin uinmai jawen akawen jaska ikunwain kayabi xabakabi wamaniki.²³ Jaska Abrahamnen Dios ninkaxun jawen jancha chibankin jawen bake yaushama jawada Diosun yunuaxuniwen taexun Moisin jakidi kenekin yuikin: "Abrahamnen Diosun jancha ikunwaniwen taexun Diosun shinankin: 'Abraham juni pepaki'", aniki. Januxun ana Diosun yuikin: "Abrahamnan, en jaibuki", anikiaki.

²⁴ Jaskaken bemakis Dios ikunwan bestiamia jakia Diosun yunuadi jadatubunda man axuainwen taexun Diosun matukidi: "Ma pe waniken jaska shinankin ikunwankin man uinmakin jawada axundiaidan, man ma pediki, ikunwan bestikin man akamadan", shinankin matun aka uindakubainkanwen.²⁵ Abraham keskai Rahab atiabiamis Dioski mesekin Israelbun xanen ibun tsuma unanepa unantinan dabeniaka Jericó maewan anu jikiton Rahabin jiwe anu jikiaibu jatu unanti watan Jericó maewan xanen ibuki chaniabu jawen soldadobu jabu unantinantan chaninika dabe jatu achimanun, iwanan, Rahabin jiwe anu jikiabu Rahabin jatu medabewakin soldadobu padanxunkin jawen jiwe anu adubiatan jatu yuikin: "Chanima en jatu

uinxuki. Jakia jadakidida ma bukanikiki. Jatu benatankanwen", atan bai betsawen jatu nichinkin medabewanikiaki. Rahabin jatu jaska waiwen taexun jawen akawen Diosun pepa wadianiki.²⁶ Ja inun, yuda yushinyanbia jawen yushin kainkainaya mawamiski. Jaska keskadiai ikunwan bestikin jaska Diosun yunuachibankin dayaxunama jawen akadan, jamenki, jatun shinan pewama mawa keskadan.

Nukun jancha paepa chi keskakiaki, na janchadan

3 ¹En betsabu inun en puibuun, matuwen nuikin ana matu yusinun ninkakanwen. Jatida ichapa matumebi jatun yusinanun ika jawen kemuyamakanwen. Na jiwea nun unanmabia nun Dios dayaxunun ikaibudan, jaska tibi jatu medabewai nun janchakin jatu yusinbiamis jabiawen taexundi jawa kaneama Diosun nuku tibi unanti waxanikiki.

²Dasibibunan, nun kanejaidamisbuki. Jaskakenan, tsuabunda jancha chakabu yui xechakakin kanekatsis ikama jawen yuda mekekin jamapai tibi shinankin jawen shinan meke pewatan jawen jiwea kayatapinbaintidubuki.³ Ja inun, jaska keska wakin caballo nun mekebainmisbukidi matu yusinun ninkakanwen. Caballo jawen yuda jidabi mekemabainkatsi jau nuku ninkabainun jawen jaxpanu mane jankixkuntan jawen buxka buxkean akeakebainkin dasibi jawen yuda jidabi nun mekemabainmiski.⁴ Ana jaska keskadi betsadan, xaxuwan ewapa niwewanen tuabiabainmisken janida bukin juni jatun bunikatun jadidi bukatsis ikin jawen buxkean akeakebainti jaiman keska chinetamea jatiumawen bukin kayatapian akeakebainmisbuki.

⁵Jaska keskadi wai nukun janawenan,

jamapai betsa betsapakidi nun jawen janchamiski, pepa inun chakabu jatu yuikin jatu shinan junekin jatu shinan pe wamakinan. Jaska keskadi wakin nun jatu eska watiduki. Bai ewapa chi deken pishtawen ketian ja bai ewapa menu keyukin tawakada abainmiski.

⁶Nukun janchadan, chi keskadiki. Jaska keskawen tsukida shinanchaka pishtakin nun xechakai janchaidan, nun ja jatu dabankakin nuitkapa watiduki. Jamapai jancha chakabu nun yuiaidan, paeki. Jaska shinain nun janchamiswenan, ibubis nukun jiwea bai menukin itsa wakin nun benumiski. Satanás chi anu kaxanaitun jatun matu shinannamiski, matun jiwea pe kainai nakumakin chakabu wamakinan. ⁷Ja inun, yuinaka ni medan jiweabu inun, peiyabu inun, nutawen mapumisbu inun, ianenwan medan yuinaka jiweabu nukuki nukuai bitan pubenbiaken dasibi daewakin unainsmapa watan yudabun beya wakin daewatidubuki. ⁸Jakia tsuan nukun jancha nemakin ibubis mekekin pematidumaki. Ja chakabu jaki mata jatun binua jaska waxun jancha pe yuitidumaki, ja chakabu ichapa pae matadan. ⁹⁻¹⁰Ja inun, janchakin jabias janawen nukun Xanen Ibu Epa Dios pe yuikin kenwanbiatan yudabu ja itsa wakin dami wanidan, jabias kexawen jatuki xechakakin nun jatu yupumiski. En betsabu inun en puibuun, nun ana jaskatidubumaki. Shinaindakubainkanwen. ¹¹Ja inun, jabias chachanua unpax paisma inun unpax muka jabaismaki. ¹²Ja inun, higuera ji bimi ja besti bimimiski, xenan ikamadan. Ja inun, nishi betsa jawen bimi besti imiski, higuera ikamadan. Ja inun, ian batapanu unpax paisma nun bitidumaki. Nukun jancha jabias keskadi wakin jabias janawen jancha pepa inun jancha chakabu nun yuiaama itishadaii.

Jaskaken nukun jancha Dios mekematan Dios kenwain yudabuki ana xechakai ana jatuki en jen iyamakubainkanwen.

Unanepa kayabidan, eskatikiaki, na janchadan

¹³Eskai unanepa kayabi man jiweditu matu yuinun ninkaidakanwen. Chanima matubu jatidibun Diosun jancha unanjaidakin man ninkajaidakubainaibunan, kaneama yudabu matun shinan pe jatu uinmai pejaida jiwekubainkanwen. Man jaska jiweabu jawada pe man akubainmis shinankin ana yuiaama duapa bestikin jaska Diosun shinanwen babutan unanepajaidakin xabakabi yuda betsabu man jatu uinmatidubuki. ¹⁴Jakia matubu betsa unanepakatsis ibiai yuda betsabu tibi jawada jaya min mia jaskatiduma shinain matun jointinin pubenkin jatu paxkanun ika xanen ibunun ikin jaska Diosun bechipaimis chanima man jayamabia jaska bestiwen man kenkubainkanaii. ¹⁵Jaskakin kanei ibubis unanepapaikin jaska Diosun shinain anua juai akama jakia jaska Dios ikunwanbuma inun Satanásan shinannmis jaska keskadianun ika man ikaii, yuda betsabu tibi binunun, ikidan. ¹⁶Janua matu anua tsuada unanepabiaya ja chibankatsi ikama jaki sinatai eadi jaskadianun ika shinain xanen ibunun ika man binunanain man jaskaibu tsuan matu pe meketimaken jamapai chakabu tibi mekin man akai jayaki. ¹⁷Jakia jaska Dios anua juai jaya jawen unanepakin akidan, man eskatidubuki. Matun yuda man xanen ibubia matun shinanwen xanen ibukidi shinanma jatu binukatsi ikama pe besti ikunkaini xabakabi man jatu uinmatidubuki. Ja dikabi duapai inun, jatuwen nuikin betsabu janchai nemama ninkamis inun, daewanika inun, betsabuwen nui medabenan

bestimis inun, bepadameama dasibi jatu medabewamis inun, chanima yui kayabimis inun, yudabu padainsma inun, Dios chibain chintuanma inun, pepas besti katui unanepabu man jiwestidubuki.¹⁸ Jaska unanuma man jatu jiwestankubainai ja unanumawen taeadi yuda betsabu unanepadiakin xabakabi jatu uinmadiakin pe besti man jatu uinmakubaintidubuki.

**Diosbe jaibunametan ana
chintuntimakiaki, na janchadan**

4 ¹Man unain ikai janua jukin matu ja imakin janchawen janubi chitenamemakin matu detenamemaidan, jaska kainkinan, matun jointi medanua kemu chakabu taxnikin matu imaiiki. Man jaskakunkainaidan, shinankanwen. ²Ja inun, jawada bikatsis iki kemubiakin man bitidumawen taea jawada yuda betsya jaya uin jawen man kemuai yuda betsaki sinatakin man tenankatsis ikai. Ja inun, yuda betsya mabu jayaken putamatan bianun ika nui sina detenun ikasmal man ja ibestimiski. Jabiaskabiaken jawada Diosun matu inantidu yukakin man ea aismawen taexun Diosun jawa matu inanmaki. ³Ja inun, jawadakidi Dios man yukamiski. Januxun man yukakin man ea abia jawa man bismaki, man jamakidi yukachakaiwen taexunan, jaskadan, jaska Diosun shinain keska akatsi ikama jaska matumebi jawen bepadamei ibubis benimai man jamen chakawakatsi ikin jakidi shinainan. ⁴Jaskati kemain yudabun man ikunwankin pewabumaan, ejaskai Dios jaibu wabiatan matumebi jawada Diosun danain man akubainai? Jaskaken tsuabunda jawada Diosun bechipaiama bechipaikin Dios danain ana jabe jaibunamekatsi ikabumaki, ana chintuntan jaki sinatamaidan. ⁵Matu shinanmakatsi ikin Diosun

jancha jakidi kenekin yuikin: “Diosun Yushin Pepa nuku medan jiwemanitun nuku yaushikin mekekubainmiski”, iwanan, yuikin jamen jakidi keneama iniki. ⁶Jakia jamapai tibi nun akaidan, jawen pepawen nuku medabewakin binumaikiki. Jaska jawen jancha yuixunikatun kenekin: “Tsuabunda yuikin: ‘Jamapai betsya betsapa emebi en atiduki’, ikin keainbudan, Diosun jatu bextemiski. Jamen tsuabuda babutan yuikin: ‘Diosun besti ea medabewaya jawada chakabu jawen pepawen besti en dainbaintiduki’, ikaibu duawakin jabu medabewakubainmiski”, iniki. ⁷Jaskawen taexun Diosun medabewakin jau matu mekekubainun jaska bechipaiai axunkin chibankubainkanwen. Jaskai jen iyamakin diablo Satanásan matu chakabuwamakatsi ikaya: “Diosun ea mekeaya en mia ninkamaki. Tudi kadiwe”, man wakubainaya Diosun kushipaki datei Satanás paxaxanikiki. ⁸Jaskaken tsuabunda Dios inun Satanás ja dabe chibankin man shinanchakaya matu yusinun ninkakanwen. Janun Dios shinan kayabikin jaibu kayabi wadikanwen, jadi jau matube jaibunain dasinunan. Man jaskakubainaibudan, jaska nukun meken detsis mepanui nun yamamis keska wakin matun jointiwen man shinan chakabuwai jaki pechi jakimatan yamawadikanwen. Jaska wakin man Dios bechipaikin jaibu wakatsis ikaibu Diosun matu jaibu waxanikiki. ⁹Ja inun, man jabe jaibunameama chakabuwakubainaibuun, ana pepeama matun chakabu unantan jawen kaxakatsi iki ana usain benimama jointi nishmai punu nukatan matun shinan inun matun jointi wedadikanwen. ¹⁰Janua shinan betsai babutan nukun Xanen Ibu bebunxun yuikin: “Eanan, chakabu besti en akubainmiski. En chakabu ea buaxuntan ana shinanma

ea mekekubainwen”, man akubainai duawakin Diosun jawena wakin matu kenwakin binumaxanikiki.

¹¹En betsabu inun en puibuun, betsabun ikunwainbu betsabukidi jawada chakabu ninkatan yuda betsabu yuibaunkin man jabu yuaiin, jatukidi jaskatimabiakenan. Chanima Diosun nuku yusinkin: “Matunmebi man nuimis keskakin yuda betsapa tibiwen nuikin jatu duawakubainkanwen”, iwanan, nuku yusiniki. Jaskaken tsuabunda ikunwain betsabu chitekin Diosun yusian chitediakin jadatuda yusian man bechipaimabia jawen besti jatu unanti wakin man jatu chitea akeakeaiki, matun yunukin akawakinan. Jatu jaska wai man daki ana Diosun yusian chibankatsi ikama danain man jaki meseamaki, jawen yunutikidan, Diosun abiaxanayadan.

¹²Ja inun, jawada nun anunbun Diosun jawen jancha nuku inankin yununiwen taexun ja bestitun yudabu kupia akeaketiduki, jatun pepawen inun jatun chakabuwenan. Jabiaskabiaken jawen janchawen yununi shinanma kanei matudan, jabun matu enawaibu jatu unanti wakin jatu chitenun ixun man kanekubainnai. Jatu jaska watimaki.

**Tsuada yubakai kenbiatan
meshukidi jaskadaxanai tsuan
unanmakiaki, na janchadan**

¹³Eskakididi natian matu yusinun ninkakanwen. Jawada Diosun matu amakatsi ikai shinanma jawada matumebi man akatsi ikai akin tsuanda yuikin: “Ikis kasmai, meshukidi kasmai, jadakidida maewan betsanu kaxun jadixun badi jidabi mabu inananan akeakekaunkin pei ichapa bikin en icha watanxanaii”, iki man jamen yubakai. ¹⁴Meshukidi jawada kainkin mia itimaska watidu min unanmaki.

Nukun jiweadan, basnun keskakidi nun shinantidubuki. Penama basnun bututan mayakabiaxu jawaida pua iki mainbainmis keskai natian man jiwebia meshukidi man mawatidu tsuan unanmadiki. ¹⁵Jakia eskakin man shinan pewatiduki, matu yusinun ninkakanwen. Tsuanda shinankin yuikin: “Nukun Xanen Ibun ea mekexun jiwemayaya jawada jaska ea shinanmai en atiduki. Ea shinanmamaken en atidumaki”, ikin pe man shinankubaintidubuki.

¹⁶Jamen jaskama matu ibubis janchai kenkin jawada Diosun matu amakatsis ikai shinanma jaska man akatsi ikai besti matumebi kenkin anun ibestikunkainaidan, chakabuki. ¹⁷Jaskawen taexun tsuabunda jawada pepa Diosun bechipaimis unanbiakin man akamadan, chakabukin Dios man paxkaii.

**Mabuwanyanbu jaskaxanaibu bebunkidi
jatu yuinikiaki, na janchadan**

5 ¹Mabuwanyanbuun, jaska kainbidanaya mei kaxai sain iki man nuitapaxanaikidi matu yuinun ninkakanwen. ²Natian mabu inun pei ichapa inun, tadi pepa man jayaki. Jakia matun pei yamaya matun tadi jawendua jawen masanen pikin pesa pesa akin keyudiaxanikiki. ³Ja inun, matun oro pei jexe inun matun plata pei jexe ichapabiaken tsua medabewakin jatu inanma man adu bestikubainmis pui ichai keyuxanikiki. Jesús ana judiamaken natian matun pei man icha wamiswen taea Jesús ana ma jua kemaya ja mane pui ichai jabai ja matuki chaniai keskaya jawen taexun Diosun chi keskawen matu yama waxanikiki.

⁴Jaskaxanikiki. Ninkaidakanwen. Dayakapabu jatu dayamakin matun bai jatu udumakin jatu padankin jaska wakin man jatu bexpa bechimis yuiaibu

nukun Epa Dios kushipajaidatun jatu ninkamiski. Ja inun, matun yunu matu tsekaxun manchinxunmisbun jaska man jatu pakama yui matuki ja ikaibu ninkadiamiski, Epa Diosunan. ⁵Na mai anu yuda mabuwanyan jiweadan, matun man uintidubuki. Jatidibudan, eska bestiwen jiweabuki. Tadi jawendua sawea inun, mabu jawendua besti jaya jawen besti kemuaibudan, ina awa pi chakayama xuananwan nia keska ma janu dete kemabu keska man jiweabuki. ⁶Matunan, jadatubunda jawa matu chakabuwaisbuma betsabu tenankin ichapabu man jatu ichakawamiski, jabun jawa matu nemakin yuiabumadan.

Jawada bika tenebiai jin jin ikama tenetikiaki, na janchadan

⁷En betsabu inun en puibuun, nukun Xanen Ibu ana juxanaya jin jin ikama tenetan manakakubainkanwen. Jaska keskadiakin bai wanikatun jawen yunu banaima unanxubida ewai kaniaya jawen yunu pikatsis ikin uiokin mai mechawakin jau mai bepaki wayunun, iwanan, jin jin ikama manamiski. ⁸Matubudi jin jin ikama tenetan manakaidan, chintuanma shinan mestenwakanwen, nukun Xanen Ibu jawaida juxanikikidan. Uindakubainkanwen.

⁹En betsabu inun en puibuun, Epa Diosun dasibibu jatu unanti waxanai ma jua kemaki. Jau matu jatube unanti watan kupiyamaxanun ana nukun betsabube ja iki chitenamedabeyam akubainkanwen. ¹⁰En betsabu inun en puibuun, nukun xenipabun Diosun jancha yuixunikabun Diosun jancha xabakabi jatu yusin bika tenebiai jin jin ikama tenetan jiwepaunibukidi shinain jabiaskadiai jiwekubainkanwen. ¹¹Ja inun, chintuanbumawen taexun Diosun duawakin jatu kenwankubainiki.

Nukubu nun shinan chankankatsis ikaidan, jawada bika tenekin jaska besti meama jawen kushipakin binukin nun tenetidubuki, jaska nun bechipaamabiadan. Jaska nukun xenipabu Job ini man ninkamiskidi xabakabi ana matu shinanmanun ninkakanwen. Jamapai bika tibi yudabun tenetidubu Jobun tenekubainaya jawen yuda chami keyuni inun jamapai bikajaida teneai Diosun nemama ibiaya Jobun Dios ikunwanpakekubaini chintuanma inikiaki. Jaska Jobun ikunjaidawai nukun Xanen Ibu Diosun jaskada watan jawen nuikin duawakin atimas jawen isin xuxawatan ana jawenabu inun jawen yuinaka debui keyuima ana jawenchains inan akeakebainikiaki, jawen shinan pepawen Dios Jobwen nuikinan, nukun Xanen Ibu nui chakama inun medabenan chakaismatun jawen nuikin axunkinan.

¹²En betsabu inun en puibuun, jawada jatu axunkatsis ikin jawen jatu mestenjaida wamanun ixun Dioskidi kasmai jamapai tibikidi janchai jabukidi yubakayamakubainkanwen. Jakia: “En akaii”, itan kaneama akubainkanwen. Jamen: “En akamaki”, iki yuidiatan adiayamakubainkanwen, man jaskakin kaneismawen taexun jau Diosun matu kupiyamaxanunan.

Diosbe janchatikidikiaki, na janchadan

¹³Tsuabunda man jamapai bika betsa betsapa meaidan, Diosbe janchakin jawen kushipa yukakubainkanwen. Ja inun, tsuabuda juinti benimai shinan chankankin Dios kenwain jau jatun juiwen nawakubainunbunwen. ¹⁴Jaska inun, tsuada ikunwain betsa isin teneaya jabun matu yusinkin mekenikabu jatu kenakanwen, jabu bexun nukun Xanen Ibun kena kushipawen jadatuda xeniwen puxatan jau xuxawanun jau

Dios jakidi yukaxunkubainunbunan.

¹⁵Dios ikunjaidawai man jabe janchaxunaya ja isin teneai xuxa wakin nukun Xanen Ibun ana benikin jatu kushipa waxanikiki. Ja inun, ja isin teneaitun jawada Diosun nemani kanei chakabudiashina Diosun buaxuntan ana shinanma ixanikiki. ¹⁶Jaskaken matun chakabu ana juneama jaska man kanekubainai ikunwain betsabube yuinamekin chanikin Dios ea akin jau matun chakabu buatan matun yuda xuxawanun yukakubainkanwen. Diosun mia unan keyuaya man jabe jaskai janchaidan, chanima tsuada yuda pepakidan, Diosun kushipa pae ichapa jayaki. ¹⁷Ja inun, nukun xenipabu Elías nuku keskakidi ana shinanankanwen. Bika tenei Diosbe nun jaibunameai keskai chintuanma Elíasdi jiwekunkainikiaki. Jakia jawenabun Dios chibankumawen taexun Elíasin Dios yukakin yuikin: “Enabu min kushipa uinmakin ana ui jatu

inanyamayukubainwen”, akin yukakin ui nesewaima badi dabe inun besti namakis ui ana imama inikiaki. ¹⁸Januxun Dios ana yukaken jawen kushipa jatu uinmakin ui ana tuea janua yunu pakiwa ewai ana bimijaida jayakunkainikiaki.

Ikunwanbiatan ja bai chanima jeneabu medabewatikiaki, na janchadan

¹⁹En betsabu inun en puibuun, tsuada matumebi chakabui bai pepa jetenan man ma benukanen, jau ikunwain betsan mia medabewakin jau ana matu chintunwankubainunbunwen.

²⁰Shinankanwen, matu tibibun man jatu medabewakatsis ikaibudan, chintunkin jatun bai pepa benushinabu man jatu medabewaidan, chanima mawa kayabitidububiaken man jatu kainmakin paxa waii, Diosun jawen jatu kupiti ichapa jayabubiaken jatu Dios daewaxunkin buamaxunkinan.

Jatiski, en janchadan.

Santiago

PEDRON JA DUKUN JATU KENE BUMANIKIAKI

1 PEDRO

**Pedron jatukidi shinanikiaki,
na janchadan**

1 ¹En Pedro Jesucriston kushipayatun en jancha en matu bumaii, man mae pakea tibi Ponto inun, Galacia inun, Capadocia inun, Asia inun, Bitinia anu man jiwebaunabu anudan. ²Epa Diosun tsuabuda katukatsis ikin bebunkidi jaska shinain keska man ixanunbun jawen Yushin Pepawen matu pewanixun ma matu medibi waniki. Jaskawen taexun man chibankubainxanunbun jawen jimiwen Epa Dios daewakin Jesucriston matun chakabu buaniki. Jawen taexun Epa Diosun jawen pepa ichapa yaushiamma matu inankin jau matu unanuma jiwemakubainunwen.

**Ikunwainbu Diosun jatu kenwankin
duawaxanikiaki, na janchadan**

³Nun jawen bakebus pepawen nuku kupia nun jabe jiwxanunbun nukun Xanen Ibu Jesucristo nukuwen nuijaidaya Diosun ana bestenwankin nuku bake kain bena keskati waniki, ja shinankin jiwea ikibi ika betsa ja manakai jiwti nuku inankinan. Jaskawen taexun nukun Xanen Ibu Jesucriston mekenika Dios, jawen Epadan, kenwandiakubainnakanwen. ⁴Nai anu jawa yamatiduma inun,

meshu tsamtiduma inun, jawa chapui nidi itiduma Dios matuki tanatan jawada pepa aduni Jesucriston jawen manakukin matu inan akeakexanikiki, man jawen jiwxanunbunan. ⁵Matun shinanwen man Diosun kakape ikunwankubainaiwen taea Diosun jawen kushipa paewen matu mekekubainkin jaska yubakani janu badi jawen jeneaitian jaska matu pewaxuni man unankubainmis ibubis janu jaki nukukin man uinxankanaii.

⁶Jaskawen taea natian bika betsapena jawen matu unanti waibuwen jaskawen benimatinabiaken man jawen benimayutidubuki. ⁷Janua xanen ibujaidai Jesucristo ana juxun matuwen benimakin jau matu kenwanxanun jaska oro mane tashipa chiwen pewakin jas wamisbu keska wakin: “Jaska man Jesús ikunwainbudi pewakin matun shinan man ma mesten matu uinun”, ixun jabun matu ichakawaibu Diosun jawen matu unanti waikiki. Jaska oro mane tashipa bikatsi imisbu keskakin Jesús ikunjaidawai chintuanma pepakin man jatu binuaii.

⁸Jaska inun, Jesucristo uianma ibiani man bechipajaidaii. Ja inun, natian uianma ibiani man ikunjaidawadiaii. Jaska benima pae man jaya janchawen besti ja benima pae tsuan jaska

taxnimatidumaki. ⁹Jaska Jesucristo shinankin man ikunwain Diosun kupitiwen yudabu kupiaya matun binui man paxaxanai man jadi shinaiin.

¹⁰⁻¹¹Jaska wakin Diosun matu duawakin yunuxanaikidi jawen jancha yuixunikabun Mesíaskidi bebunkidi ichakawabu nuitapatan jatu maemaxanaikidi Criston Yushinin jatu unanmaya Diosun jatu kenema jabun ibubis tapinun ixun benajaidakin shinain: “¿Tsuamen? ¿Jatian jaskaxanimenkain?” ikubainibukiaki.

¹²Ja Mesíaskidi jatu chanimakin jau Diosun jancha yuixunikabun ibubis Diosun yusian ninkatan jakidi jatuna besti watidubuma Diosun jabu chipu jiwxanaibudi jau jabundi jakidi unanxanunbun, iwanan, jabu matu kenemaxuniki, matu medabewakinan. Mesías Cristokidi kakape matu

unanmakatsi ikin jawen Yushin Pepa nai anua yunua januxun Jesúskidi yusinan betsabun jakidi datan akin matu unanmakubaunibuki. Na jabias kakape matu yusiaibnu Diosun nai tsumabundi ana tapinpai idiakanikiki.

¹³Jesucristo man ikunwainwen taea ana tatinama dasibi matun shinan mestenwantan jaskaki chiti itan dateyamakubainkanwen. Jesucristo ana juxanai manakakin Diosun jawen pepawen matu duawaxanai ikunwankin jaskakidi besti manayukubainkanwen.

Diosun ja jiwea keska na mai anu nun medibi pepai jiwxunyununbun nuku katunikiaki, na janchadan

¹⁴Uatian Dios unandiamma chakabu bechipai man chakabupaunibuki. Jaskaken natian Diosun bakebui ana jaska man bechipaipauni keska jiweama bake mishtinbun jatun ibuan jancha ninkatan chibanmisbu keska jiwekubainkanwen. ¹⁵Natian ana

jaskama matun jiwea betsa watan medibi pepakubainkin bika tenekin jatu uinmakubainkanwen, jatun matu katuni medibi pepa jiwea keskadiaidan.

¹⁶Diosun Moisés yuikin: “En medibi pepawen taea matudi medibidi pepakubaini jiwekubainkanwen”, ikai ninkatan keneniki.

¹⁷Jabiaskadi wakin yudabu betsa betsapa dasibi uinkin jatun shinan tibi inun jaska wamisbu tibi kaneama Diosun unanti waxanaiwen taexun Dios dayuikin: “Epaan, ea mekewe”, aki badi tibi matun jiweawen duawakin kenwain jaki mesekubainkanwen. ¹⁸Jamen matu ikidan, matun xenipabun Dios unanma chakabu besti akin jatun matu medabewakin jiwemakin pewatiduma beyawanibu man jatu chibankin akubainidan, man unanjaidaii. Tsuan jaska matu meketidumajaidabiaken jawen matu kainmakinan, jawada mabu chapumis oro inun plata mane keskawen matu akama ¹⁹jamjen jaskama chaxuwani bake pepa jawa chami jayama detexun menu keyukin Dios daewapaunibu keska wakin jawen bake Cristo mawakin jawen jimi pepajaida dasibi betsana binuawen Dios jawena nuku wati wamakin jawen daewati waniki. ²⁰Ja inun, nai inun mai damiwakin taewadiama Mesías Cristo yunununbadikatsi Dios bebunkidi yubakaniken janu ma badi jawen jeneaitian ma kemaya matu medabewanun ika Jesús taxniniaki.

²¹Jaskakidan Criston jawen Epan jancha matu unanmaiwen taexun man Dios ikunwanibuki. Jaska matu wabiaya tenanbu Diosun ana bestenwankin Xanen Ibu wani na jabiatian matun shinanwen jakidi ikunwankin Diosun jiwekuian matu inanxanai man jaki chiti ixun manakakubainaii.

²²Man ma jaskawen taea natianan, Diosun kakape Jesúskidi ninkatan

ja jancha chanima chibain man ma medibi pepabuki. Jaskakubainkan, ikunwain betsabube bechipainame kayabikubainkanwen. Jaskakin matun juinti jawa chakabu jayama inun matun kushipa jidabiwen betsabu medabewai jatuwen nui bechipainamei jatube duanamepekanwen.²³ Man jaskakunkainxanun Diosun ana matu kain bera keska waniki, matun ibubu chutanamekin matu bawani keskama jakia Diosun jancha jiwea betsaismaja man ikunwankin shinan betsawaiwen taexunan, nukunabube dananananma man bechipainamekubainunbunan.

²⁴ Jaska Diosun jancha betsawaismakidi jawen jancha kenexuniika Isaíasin yuikin:

“Yuda dasibi ni maxu keskabuki.

Ja inun, jawen jawenduai jawen
pepamisbudan,

ni maxu jawen sua keskabuki.

Badi betsatian ni maxu chushiaya
jawan juadi utsitan nidi imiski.

²⁵ Jakia Yavé Diosun janchadan,
betsai keyuisma ipakeai jayaki”,
aniki. Na jabias jancha Jesúskidi kakape
jakidi datan aki jawen yuiniaka betsabu
matuki chanidianibuki.

**Jesúswen taexun Diosun jawenabu
bera wanikiaki, na janchadan**

2 ¹Jaska inun, jamapai chakabu
tibi man akeakemis inun, man
padanananmis inun, man bepadamemis
inun, tsuada jawada pepa jayaken
man jaskatiduma shinain man jatuki
sinatamis inun, jawada yuda betsai ikai
uintan matunamabia jawen taea man
yuananan akeakemis ana jaskakidi
shinanma jenedikubainkanwen.

²Bakeishta kain taea chuchu beya
wamakin amabu jawen yumeti unanmis
keskakin nukun Xanen Ibu Jesúsun
yusian kayati wakin jawen juinti
kushipanun ixun jawen jiwekuin paxati

jancha tapin mestenkubainkanwen,
³nukun Xanen Ibu Jesúsun matu
mekemis jawen pepa unankin man ma
unanti wawen taeandan.

⁴Jesús jiwe mestenwanti mishki
keska junibun dananbianibun Diosun
bechipajaidakin katuni bestibu
tibi ja mishki jiwea pepa jaibu
wai jaki ketaxamekubainkanwen.

⁵Man jaskakunkainaya man Jesúsun
ikunwainbu dasibi mishki jiwe keska
wakin jawen kenwanti kayabi matu
wakubainikiki, jaskai duanamei man
ma jaki dasiabudan. Matu dasibi
man Diosbe janchaxunikabudan,
man jawenabu medibiki. Jesucristo
man ikunwainbuwen taexun jaska
Diosun bechipaiai akin man Dios
benimawakubainnaii. ⁶Jaskai kaikidi
jawen yuixuniika Isaías Diosun yuikin:

“Uian. Katuxun jawen jiwe
mestenwanti mishki pepa keska
xanen ibu kushipa Jerusalén anu en
taxnimaxanaii.

Jawen jancha jabun ja ikunwainbu
ean en jatu dakewama ixanaii”,
aka ninkatankeneniki. ⁷Na jaska
keneni keska tsuabunda ma ja mishki
kushipa ikunwainbu matudan, man
ja bechipajaidaii. Jamen tsuabunda
ja mishki kushipa ja ikunwanma
danankubainkanikiki, ja keneni keska
wakinan:

“Mishki jiwe wanikabun ja mishki
dananbiaibun
jawan jiwe mestenwanti kayabi
mishki pejaidaki, kushipadan”,
aniki. ⁸Ja dikabi Diosun na eskakidi
Isaías yuikin:

“Jaki juti itan tin iti mishkiki, jawen
jatu sinamatidán”,
ani keskadiai tsuabunda ja jancha jakidi
kakape ninkatan chibankatsi ikama
danain jaki juti itan jaki sinatai keskabu
Diosun jabu kupixanikiki.

⁹Janua matudan, yuda xuku betsa matu katuniki. Ja inun, xanen ibu binua Diosbe janchaxunikabu matu dasibi wakin ikunwainbu medibi xukua betsa matu wakin Diosun ibu wakin bechipaikin jawenabu matu wadianiki. Jaskawen taexun jakidi jawen daya pejaida Dioskidi man chanikubaunxanunbun man meshu medan ika keskaxun chakabu wamisbu janua matu kenakin Criston xaba jawendua anu matu jikimakin jiwemakatsi matu taxnimaniki. ¹⁰Ja inun, ja dukun Diosunama man inibuki. Jakia natian man ma Diosun enabuki. Ja dukun Dios matuwen nuiama ibiani na jabiatian matuwen Dios nuikiki.

**Dios kenwain pepakin jatu
uinmatikiaki, na janchadan**

¹¹En betsabu inun en puibuun, en matuwen nuikin yunuai ea ninkakanwen. Man chakea juima man ikunwanbumabe jiwea nashui ika keskabudan, ja yudabun jaska shinain jabun kemu paewen matun yushin achixun yabutan matu bika tenematidudan, jaska bechipaama jenekubainkanwen. ¹²Jakia ikunwanbumabe man jiweadan, Dios kenwain jatu nashui ika jiwexun pepakin jatu uinmakubainkanwen. Man jaskaiwen taea man yuda chakabu ikai dabanen shinankin matu yuanbiamisxun matun pepa winkin jabundi Jesucristo ikunwankin Dios kenwantidubuki, Diosun janu yudabu unanti wakin keyuxanaitianan.

Xanen ibu tibi ninkatikiaki, na janchadan

¹³Nukun Xanen Ibuwen taea na mai anu matun xanen ibubu jatu ninkakin chibankubainkanwen, ja dukun jatun mai pakea xanen ibu betsa binuatuun yunu keyua ¹⁴inun jabu xanen ibu

bexmasbu xanen ibujaidatun jatu yunua chakabu waibu jatun yununikabu jatu kupimamis inun pepa akaibu jatun pewen kenwanmisbudan.

¹⁵Eска Diosun matukidi bechipaikin shinainkiki. Man pe besti wai jatu uinmakubainkanwen, jabun matu yuainbu inun jancha unanmabia unainsmapai matukidi sinatai jancha chakabumisbu jau bextekei ana matukidi janchayamanunbunan.

¹⁶Ja inun, Diosun kupiti Jesúsun chanima ma matu binumaniki. Jaskawen taexun: “En ma kupiti jayamaki”, itan matumebi ana chakabu unanti wamanun ika ana jaska shinanyamakubainkanwen, ana Diosun kupidiki dateama jawen tsumabu pepa besti ikubainidan.

¹⁷Dasibibun matu yunumisbu jatu ninkakin uinmakubainkanwen, matubetan ikunwainbube nuinamei inun Diosun kushipaki mesekin jawen jancha chibain inun romano xanen ibu binuatuun jawen jancha ninkatan chibandiakinan.

**Jesús yumaní keskadiatiaki,
na janchadan**

¹⁸Jamen jabun man jatu dayaxunmisbuun, jaska matun xanen ibun yunuai dananma ninkatan axunkubainkanwen, matun xanen ibu duapa inun matun xanen ibu duapamadi axunkin uinmakinan. ¹⁹Man Jesús ikunwainan, chanima ja dukun matun jiweadan, Jesúsunaki. Man jawa chakabu wamabiaken matun tsumapan matu bika betsabu betsapa memabiaibun jawa yuaima tenetan jaska Diosun bechipaiai axuin jaskai mestentan jiwekubainkanwen. ²⁰Ja inun, man chakabuwaiwen taexun matun xanen ibun matu kupia yumain sinatama man pe bexmaski. Jakia Jesús ikunwain man pepaiwen taexun ja shinanma matun xanen ibun matu kupia yumain jawa

yuiama man sinatamaken Dios matuwen shinan chankanmiski. ²¹Eskawen taexun Diosun matu katukin kenaniki. Man jawa bika tenediamaken Cristo dukun ja dukuntun matu bika tenexuniki, ja chibankin matundi man bika tenediaman unbunan. ²²Shinankanwen, Cristodan, matu eskaxunikidan. Tsua betsa padantaskama inun jawada Diosun nemani inun yununi kanekin jawa chakabuwamajaida matu ixuniki. ²³Januxun Cristo ichabiabu jatu bebis kemanamei janchama iniki. Isin tenemabiabu jawen jatu dateti jancha kushipa taxnimama iniki. Jamen jaskama Diosun jatu unanti wakin chanima kaneismatun jau mekekubainun jawen jiwea jawen Epa Dios inankubainiki. ²⁴Cristo jamebi jawen yuda cruzki dunua mawakinan, nukun chakabu nuku buxuniki, nukun shinan betsa wamakin nun ana chakabu jusiyamaxanun nuku buaxunkinan. Janua jiwea bena nun ma jaya nun ma pepai jiwekunkainaii. Cristo mawakin jau ana chakabun matu tsumayamaxanun matu mexpamaniki, yuda betsabu jatun isin teneai xuxawakinan. ²⁵Ja dukun na mai anu jiweadan, chaxuhan ibuuma benuabu keska man iki taenibuki. Jakia natian Cristo ikunwankin matun jiwea chakabu jenetan man ma Cristo chibanyan janua mekenika pepatun ma matu mekexun uinkiki.

**Ainyan inun beneyabu jaskai
jiwetikiaki, na janchadan**

3 ¹Ainbu beneyabuun, matudi yuinun ninkaidakanwen. Matun benen matu yunua ninkatan jabebis yununamei jen iyamama axunkubainkanwen. Jaskakin jatiditun matun benen Diosun jancha ikunwandiamma duawai man

pepakunkainai matu uinkubainmiswen taexun janchawensma man pepawamiswen matun bene bestibu Jesús man ikunwanmatiduki, ²Dioski mesei pe jiwekin man jatu uinmakubainaiwen taexunan. ³Jaska inun, eska bestiwen bemakis jawendua bestitan jatu uinmakatsis iki buxtiwen buxeketan usuntinin usuakeakei oro mane jawenduawen davaa bachi kadujaida sawe bestitan jatu uinmai mapuyamakubainkanwen. ⁴Jakia jaskai bemakis bestima matun juinti uke medan matun shinan duapa betsaisma jaska matun yushin ja pepa jawendua duapai juinti pepaya man kunyan ismakenan, jaskawen jawenduati Diosun bechipaimisdan, keyuismaki. ⁵Jabiaskadiai en xenipabu ainbu pepabun Dios ikunwankin jatun mabu jawendua saweawen jawenduama jakia jatun benen jancha ninkai jawenduapaunibukiaki. ⁶Eska wakin Saran jawen bene Abraham xanen ibu wakin jawen jancha ninkatan chibarpaunikiaki. Matudan, tsuada man Saran bai tanakatsis ikaidan, jawen baba keskakinan, jawaki dateama pepa bestikin matun bene uinmakubainkanwen.

⁷Ja dikabi man juni ainyanbuun, matudi yuinun ninkakanwen.

Matun ain matube jiwea jabebis ninkakanankubainkanwen.

Jatun yuda kushipa bexmas man unaiin. Jaskabiaken Diosun jabe matu jiwekuian inanxanai keska jaska Diosun bechipaiai keska matun aindi jatu uinmakin duawadiakubainkanwen. Man jaskamiswen taexun Diosbe janchakin man yukai matu ninkakubainxanikiki. Jamen jaskama man jabe jiwechakaxun Dios yukaidan, matu jawa ninkama ixanikiki.

Jesús ikunwan kayabi wadan, bikabiaken tenekubaintikiaki, na janchadan

⁸Jaska tibi en matuki chanixudan, jaska bestiwen jiwekin Jesús ikunwainbu tibibube jabias shinanwantan jatuki dasia binunananma pepai babu keskatan keanma bechipainamekubainkanwen.
⁹Ja inun, matu chakabuwabu jatubebis ana chakabuwama inun matu ichabu jatubebis ana manakunain ichakananma ikubainkanwen. Jakia matu duawakatsi Diosun matu katuniwen taexun matu ichakawabiaibun ja shinanma pepakidi besti jatu yuikubainkanwen, jau Diosun jatu medabewakin duawadiakubainunan.
¹⁰Jaskakidi xanen ibu Davidin jatu yuikin:

“Tsuabuda na mai anu badi ichapa unanuma jiweyuktsi ikinan, jatun kexawen jancha chakabukin chani yuiktsi ikamadan, jatun jana jau mekekubainunbunwen.

¹¹Jamapai chakabuki jadi kemama jaskai unanumakin pe besti benakin jaska jau chibankubainkanwen.

¹²Pepabu mekekubainkin jawada yukaibu medabewakatsi iki Dios paxtixun jatu ninkamiski. Jakia jabun chakabuwaibu uin jatuki Dios sinatai jatukidi pechimiski”, jatu watankeneniki.

¹³Januxun man jawa chakabuwama pe besti ikubainaibu jaska watan tsuan matu jawawen taexun chakabuwatidumaki. ¹⁴Jakia Jesús ikunwain jaska pepawen dayai man jiwebiaken matu ichakawabiabu man nuitkaabiaya Diosun matu duawakubainai shinain juintinin benimakubainkanwen, e iki jatuwen jawa dakeamadan. ¹⁵Jamen Cristo matun Xanen Ibu axunkinan, matun jiwea inankin kenwankubainkanwen.

Matun jiwea man ma pewaken tsuanda jaska man Cristokidi kakape ikunwain matu yukaibu man jatukidi pe xabakabi chanikin man jatu kematiduki,
¹⁶babutan keanma jatu pewen jancha wakinan. Jawa matun jiweakidi shinain man bika teneamaken jaska man Cristo ikunwain shinan chakabuma matu unantan ja jabun jancha chakabuwen matu yuain jancha chakabumisbu ibubis jatun janchawen daketidubuki.

¹⁷Jamen man chakabuwaya matu kupiaibu matun chakabuwen taea tenekanwen. Jakia Jesús ikunwakin jawada pepa man abiaya jawen taexun matu ichakawaibu Diosun jatu nemama man yumainan, chakabumaki. ¹⁸Jakia Cristo pepabia nun chakabuwen taea nukuwen nui nukun chakabu buanun ika bestiwai ana mawatimai nuku mawaxuniki. Cristo jawa chakabuwamabia Dios yudabu mekemanun ika nukun chakabuwen nukuwen nuitapaniki. Jawen yuda babu mawabiaken jawen yudaya ana mawatidumai jawen yushin besteni jiwekunkainikiki. ¹⁹Yushin ichapabu Diosun nichinkin bichini kini anu Jesúsun yushin jadi kaxun jatu jancha wakin jaska Satanás maematan jawen jiweakidi jatu yuitanikiaki. ²⁰Jamen nukun xenipabu Noén jawen nunuti waya jabias jabu yushin patapanibu nichindiamana jau Diosun jancha ninkanunbun jin jin, iwanan, jawaida jatu kupiktsi ikama Diosun jatu manayuaya jawen jancha dananibukiaki. Ja inun, ui jeneama jene ewa wakin yuda betsa betsapabu jatun chakabuwen taexun ja jenewen jatu kupikin Diosun dasibi yamawanikiaki. Januxun yuda eskadabes 8 besti nunuti medan Diosun jatu kupima Noéwen besti paxai mekenibukiaki. ²¹Januxun natian Jesús man ikunwanyan ja jenewen Diosun

jatu kupini man shinanyan jabun matu nashimakin matun yuda detsis chukaisbumaki. Jakia nukun chakabu Diosun buatan nukun shinan jau nuku pewaxunkubainun nuku imamisbuki. Jakia nukubu paxaidan, Jesucristo besteni ja besti chibankubaini nun ixankanaii.²² Janua Jesús mawa ana bestean nai anu ka jawen Epa Diosun yusiudi tsaua Diosun nai tsumabu inun xanen ibu kushipa dasibibu Diosun Jesús yununi Jesús xanen ibukin dasibibu jatu mekekubainikiki.

4 ¹Na mai anua jawen yudawen Cristo nuitapai yumanı keskai ja ini keskadiakin matundi chibankubainkanwen, tsuanda jawen yudawen bika betsa betsapa chakabu tibi mebiai ja chakabu Criston binuni man maemadiatidubukidan. ²Jatixun matun kemu na mai anuxun jenetan jatixunda matun jiweawen besti jaska Diosun shinankin bechipaiai matun jiweawen dayaxuni jiweyukanwen. ³Jamen Dios man ikunwandiamja ja ikunwanbuma keska man idiapaunibuki. Jawada jakimatishada kemuti chibainan, ja inun, kemui ainbu tibibe menamei inun, piti midimawen kemutapai inun, nawai beyusi paein inun, dami yushin kenwain man chakabujaidai keyudianbuki. ⁴Jakia natian ana ja jaskaibube ana jatube ketaxametan man ana jatube betsa betsapai kemutapamaken man jatube ikin jatu uinmapauni jabu matuki en jen ikin matu yuanmisbuki. ⁵Natian ja jabu jaska jiwekubainmisbu Dios beburua jaki chanixanaibu pewamisxun janu badi jawen jeneaitian Diosun jiweabu inun mawabu jatu unanti watan jatu kupixanikiki. ⁶Jatu jaska waxanaiwen taea tsuabuda jatun yudawen chakabui mawa keska jiwekin yudabun jatukidi uin janchabiamiswen taexun Diosun jatu

unanti watan kupididubia jatun shinan betsa watan jatun yuda chakabubiaken yusinanamisbun Criston kakapekidi jatu yusianbu jatun yuda chakabubia shinan betsa watan jatun yushin Diosbe jiwtidubu jatu yusinbaunibuki.

Jesucristo dayaxuni medabenantikiaki, na janchadan

⁷Janua na mai keyui ma kemaya ana tatinama matun shinan pe mekei unanepai chanima kayabi Diosbe janchai jeneyamakubainkanwen. ⁸Matu dasibidan, eska besti ikubainkanwen. Jawada man jatubetan kanemis man nui ichapa jayadan, jawendi matun chakabu man buatiduwen taea nuinamei inun bechipainame kayabikubainkanwen. ⁹Tsuada nia matun jiwe anu mapekeiba jatuki dakekenain jancha chakabuwama jatube beyanamekubainkanwen. ¹⁰Jaska Diosun matu kushipa inankin duawamis jawen dayakin pewakubainkanwen, jawen duapa kushipa tibi ma matu inani man jayawen taexun betsabu uinmai medabenainan. ¹¹Jaska inun, tsuanda yusinkatsis ikinan, Diosun matu yusinmis keska besti jau jatu yusinkubainunbunwen, ibubis jatun janchawen akamadan. Ja inun, tsuanda yuda betsabu medabewakatsis ikin jaska Diosun matu kushipa inanmis jatu uinmakin jau jatu medabewakubainunbunwen. Jawada betsa betsapawen medabenankin man akubainaidean, jawen Dios jatu kenwanmakubainkanwen, Jesucristowen taexunan. Man jatu jaska wakubainaidean, Jesucristo xanen ibumis dasibi kushipa pepa jawenaki, ikibi ini jawen kushipa paepa jeneismadan. Jaskakidan.

Nun Cristo ikunwain nuku ichakawabu benimaticikiaki, na janchadan

¹²En betsabu inun en puibuun, matuwen nuikin matu yuinun

ninkakanwen. Dasibi ikunwainbunan, bika betsa tibi nun tenekubainmisbuki. Ma matudi memaidan, ja bikawenan, jawen e iki jawen nuiama mestentan tenekubainkanwen.¹³ Jaska matu memabiaibu Cristo ani keska wakin jabiaskadianiwen taexun matu tenemadiakanikiki. Jaskawen taea Cristo xanen ibujaidai ana taxnikidan matu benimajaidawaxanai shinain natian jaskawen benimatinabiaken Cristowen taea benimayukubainkanwen.¹⁴ Ja inun, man Cristokidi yusinkubainaibuwen taexun jaska bechipalama tsuabuda matuki sinatai ja ikaibuwen taea man ma Diosun pepa jaya jawen benimakubainkanwen, Diosun Yushin Pepatun matu medanxun matu jenebainama jawen kushipa matu uinmakubainikikidan.¹⁵ Matun yuda betsa nuitapaidan, eskawen taea imisbuki, pubenbuden, yumetsubudan, ichakanikabudan, yuda betsa bika waiwen taexun jatu yumanwanmisbuki. Jamen matu ikidan, man jatu keska jiweamabia matu yumanwainbuden, jaska peki.¹⁶ Jaskawen taea man xabakabi Cristo chibainbu matu nuitapa wabiaibu jatuwen datei dakeama man Cristonabuwen taea jawen Dios kenwankubainkanwen.

¹⁷Jesucristo ikunwain nun jawenabuwen taexun natian bika betsa tibi memakin nuku tenemakubainkanikiki. Jaska nun tenebiamisken Jesús ana juaya jabun Diosun kakape dananmisbuden, jabu Diosun kupiadan, *č*jaskadada Diosun jatu kupiaitian yumankin tenechakayamax ankanimenkain?¹⁸ Nun Diosunabu bika betsa betsapa tenebiai paxai Jesúsbe jiwenun ika nun manaibun jabun chakabuwakin Diosun jancha danankin ninkaisbuma jatu chakabuwen Diosun jatu kupiaitian jaskadada bika jatu

tenemachakayamaxanikiki.¹⁹ Januxun Diosun yunua jawen shinanen tsuabunda aki bika teneaibudan, jaskaibu peki. Januxun jawada pepa akinan, jau jeneyamakubainbunwen. Jau matu mekekubainun matun jiwea Dios inankubainkanwen. Jatun nuku damiwanixun nuku jeneisma ikunkainkin nuku uinmaxanikiki.

Mekenikabu jatu yusinikiaki, na janchadan

5 ¹Nukun Xanen Ibu Cristo nuku yumanxunai en uiniwen taexun natian jabuan mae tibi anuxun Cristo ikunwainbu matu mekenikabu en matu jatu yusin pewakatsis ikai ea ninkakanwen. Eadi Cristo ikunwainbu en jatun mekenandiki, jabu keskadidan. Ja inun, Cristo xanen ibujaidai jukin jawen kushipa nuku uinmaya eadi en jatube benimachakayamaxanaii.

²Diosun enabu chaxawan keska matube jiweabu Diosun matu yununi jatu mekeidakubainkanwen, man jaska pe shinankin jatu medabewakatsi ikaidan, jaska Diosun bechipaiai keska wakinan. Jatu yunu bestiama inun pei binun ika kemuama jakia shinan tibi wama pe bestiwen nuikin jatu pe mekekin axunkubainkanwen.³ Ja inun, matudan, jabu matube ichamisbuden, man jatun ibumaki. Jaskawen taexun matun jiwea pepa jatu uinma bestikin chibanmakubainkanwen, jatube medabenankinan.⁴ Janua mekenika kayabi Xanen Ibu Cristo juxun man jamapai binumisbu kupiti pepawen matu manakukin maiti jawendua keska chaputima matu inanxanikiki, Cristobe matu chaxakapawakinan.

Ikunwainbu chintuntimakidi yusinikiaki, na janchadan

⁵Jabiaskadiakin jabuan man jatu chibainbuun, mekenikabun matu

yusinkin yunumis ninkatan jatun jancha chibankubainkanwen. Dasibi man jabun ikunwainbudan, babutan keanma ninkakanankubainkanwen, eskawen taeandan. Diosun jancha yuixunikatun kenekin:

“Tsuabunda yuikin:

‘Jamapai betsa betsapa emebi en atiduki’, ikin keainbudan,
Diosun jatu bextemiski.
Jamen tsuabuda babutan yuikin:
‘Diosun besti ea medabewaya
jawada chakabu jawen pepawen
besti en dainbaintiduki’,
ikaibu duawakin jabu
medabewakubainmiski”,

iniki. ⁶Chania Diosun kushipawenan, matu axuntidu jayawen taea babutan keanma manakakubainkanwen. Janu akaitian Diosun matu duawakin xanen ibu wakin kenwanxanikiki. ⁷Ja inun, jawada tibiwen man bika tenei teai niti imis tibi Dios inankubainkanwen, jatun matukidi shinainkikidan.

⁸Inu keneya pintsikin yuinaka achitan pinun ika benabauni pubein janx janx iki tekeden tekeden imis keskakin diablo Satanásan matu bepadantan matu maemanun ixun benakubaundiaikiki. Jaskawen taea ibubis pe mekekin jamapai chakabu ana meama janun bestentan uindakubainkanwen.

⁹Man ikunwain mestentan Satanásan kemuti ana meama jenei jen iyamakubainkanwen, na jaska tibi man meaidan, matubetan ikunwainbu mai jidabi anuadi jabias keskadi tenediaibu shinaindakubainkanwen. ¹⁰Ja dukunan,

badi ichapama man nuitapayuaii. Diosun jaska matu memabiatan jabiatundi matu kushipa wakin paxkatima watan ja jawen mestenwantiwen matu pepa wakin keyuxanikiki. Jesucristobe nun jaki dasitan jiwea ikibi iki nun pepai kushipaxanun bun jabias Dios nuikipatun jawena wakatsi ikin nuku katuniki. ¹¹Ja nukun Dios xanen ibu kushipajaidadan, jau jabiaskas ikunkainunwen, niti ikamadan. Jaskakidan.

Pedro jatuwen nuinikiaki, na janchadan

¹²Nukun betsa Silvano chintuinsma en yunua na en jancha eskadabes matu kenexunxu en matu anu bumai ninkakin uinxankanwen. Na jaska Cristo ikunwakin jawen matu nuimai man ikaidan, chanima Dios matuwen nuikin jawen pepa matu uinmaikiki. Jaskaken jawa chintuin niti ikama man ikubainun bun matu medabewakin kenexunkin en matu yusinxu inun en matu mestenwanxu jawen taexun Diosun pepa bikubainkanwen, ja nui pae man jayawen taeandan.

¹³Roma anuxun ikunwainbu Diosun jabu matube katuni inun Marcos en bake keskatun jatun jancha matu yunudiakanikiki.

¹⁴Jaska inun, Cristo chibainbu tibi jatuki nukutan jatun dananma jatube bechipainamekubainkanwen.

Cristo ikunwain man jawenabudan, jau Diosun unanuma matu jiwemakubainunwen.

Jatiski, en janchadan.

Pedro

PEDRON JA KACHU JATU KENE BUMANIKIAKI

2 PEDRO

Pedron jatukidi shinanikiaki, na janchadan

1 ¹En Simón Pedro Jesucriston tsuma jawen kushipaya ea waniki. Nukun mekenika Dios Jesucriston kaneisma nun ikunwainbu keska man nuku chibankin ikunwandaibuwen taexun en matu kene bumai uindakanwen. ²Dios inun nukun Xanen Ibu Jesús jaibuwakin man jatu unanajaidaya unanuma matu jiwmekin matu duawachakayamai bikubainkanwen.

Diosun katuabudan, ewatikiaki, na janchadan

³Dios kushipa paepatun jaska jatun bechipaiai keska jawen jiwekin nun jakidi shinankubainunbun nuku inanki, Jesucristo nun ikunwanyan Diosun nuku kenatan jawen daya pepa nun jayaxanunbun jawen kushipa medibiwен nuku katukinan. ⁴Na jaska tibi nuku amaidan, jaska bebunkidi Dios ibubis janchai jawen kushipajaidawen yubakani chanima betsa waisma jaska ikunwakin man shinan betsa watan man ma Diosun beya ibu wawan taea na mai anuxun chakabu kemu paewen ikaibuwen jatu binui man ma Diosunabu paxatidubuki.

⁵Jaskawen taea man ikunwain kushipakin eska tibiwen ana matsankin

binumakubainkanwen. Jesucristo ikunwain matun shinanwen pe jiwekubainkanwen. Ana Diosun kakape ninka pejaidawatan ⁶ibubis matun yudakidi shinan pewatan mekekubainkanwen. Jaskai man jin jin imis tapiin bextekubainkanwen. Jaskai Diosbe man jaibunamejaidai ⁷matubetan ikunwainbube jaibunain beyanamei jaska tibiwen nuii jiwekubainkanwen.

⁸Man jaska tibi jaya man jawen ewaidan, chanima nukun Xanen Ibu Jesucristo unankin man jamen jaibuwamaki. Ja inun, matun jiweadan, jamenmadi ixanikiki. ⁹Jakia tsuabuda jaskakubainabumadan, bekunman jawen jiwea jaskaxanai unantiduma keskabuki. Diosun jatun chakabu ma jatu buaxunbiani ana jabun shinankatsi ikama jakimatan Dioskidi ana shinanbumaki. ¹⁰En betsabu inun en puibuun, Diosun matu kenaxun katutan jawena medibis matu wakatsis iniki. Man jawenabu jeneama ikatsis ikaibudan, chanima ikunwain man jaki nukukatsis ikai matun shinan mestentan ikubainkanwen. Jaska tibi en matu yunuai keskaidan, man jaskakubainaibudan, babui chakabuwen taea kanei man chintuanma ixankanaii. ¹¹Man jaskai jiwekubainaibu benimakin matu kenwanchakayamakin jawen

mae bera anu janu man jikinun jawen beputi matu bepenxuntan: "Nedi jiki bekanwen", matu waxanikiki, janu nukun mekenan Xanen Ibu Jesucriston matu bichikinan, niti ikama man jabe jiwepakexanunbunan.

**Diosun janchadan, jamenmakiaki,
na janchadan**

¹²Ma bebunkidi chانيا jancha matu yusianbu unankin man mestenwani man jawen jiwea jaska dasibi matukidi shinankin eandi matu shinanmakin en jenekatsi ikamaki. ¹³Natian en jiweyuadan, chانيا jaska en shinanmis na janchawen matu e imakin matun shinan en ana matu mestenwanmakatsis ikai ea ninkakanwen. ¹⁴Nukun Xanen Ibu Jesucriston ma janu ea yuini ma en mawaxanaidan, ma kemaikiki. ¹⁵Na eska matu axunkinan, ma en mawaimaken jaska shinankin Jesucristokidi yusian man ana shinankubainyanbunan en matuki xabakabi chaniaii.

¹⁶Nukun Xanen Ibu Jesucristo kushipajaidai ana juxanaikidi xabakabi matu yusinkin jawen bepadanti miyui jawendua nun matu yuiana iniki. Jakia nukun Xanen Ibu kushipa chaxajaidai ibubis nukun beduwen uinixun matu padanma nun matu yuini. ¹⁷Jawen Epa Diosun kenwankin kushipa wai nun uiyanan jaskabiamma Diosun jawen jui taxnimakin jawen bake pepa wakin jancha wakin yuikin: "Nadan, en bakeki. En bechipajaidai, en Katuadan", ikai ¹⁸jawen jui nai anua juai nukubun nun ninkaniki, nukun Xanen Ibu ja mati medibi anu jabe nun mapuabunan.

¹⁹Jaska wakin Diosun jancha yuixunikabu jawen bakeskidi jatu kenemani janu xabakabi Diosun nuku unanmakin keyuniki. Jaska ja jakidi kenenibu chanimaki, shinaindakanwen. Jaskakidi man tapinkubainaidan,

matun jiwea man pewakubainai janu nukun Xanen Ibu juaitian dasibi matun jiwea matu betsajaida waxanikiki. ²⁰⁻²¹Jaskawen taea Diosun jancha yuixunikabudan, jatunmebi jatun shinanen janchataskama jakia Diosun jawen jancha jatu yuimaya Yushin Pepatun jatu medabewakubainikiaki. Jaskadan, chanimaki. Jaska wakin Diosun jatu yusinkin kenemaniwen taexun jaska Diosun jatu yusinmani keska wakin jatu yusindiakubainkanwen. Na jancha en matu yuiaidan, jakimayam akubainkanwen.

**Yusinan padanananmisbu
eskaxankanikiaki, na janchadan**

2 ¹Israelbu en xenipabu anu Diosun jancha yuixunika machupa nashui ika jayanibuki. Jabiaskadiai matu anudi yusinan machupa matu nashui idia jayabuki. Jabu jatun jancha jawenduabia jatun shinan chakabuwen matu daunkin akawakaniki, nukun Xanen Ibun ma nuku meketi pewabianiken jawen kushipa danain padananainbudan. Jaska matu yusinkin jusiaibu Diosun jawaida jatu kupixanikiki. ²Jatun jiwea kemu pae jamapai chakabuwen ikaibu yuda ichapabun jatu chibain Jesucriston bai chanimabiaken jawen taea ikunwainbu yuain jancha chakabukaniki. ³Jabunan, matun pei ichapa binun ixun chani jancha yusinkin matu padankin ichakawaxankaniki. Jaskanunbadiaiabu ma bebunkidi Diosun jatu kupini jawa betsa waismawen taexun tsuan Dios jatu daewaxuntidumawen taexun Diosun jatu kupikatsi manayuikiki.

⁴ Jawen nai tsumabu jatiditun jawen jancha ninkabuma jatun chakabu Dios jakimakatsi ikama jakia mai kini keyatapa xankinjaida meshu medan janua paxatidubuma anu jatu putatan

nexaxun jatu mekeyuniaki, chipu janu kupiaitian jatu unanti wakatsidan.

⁵ Ja dikabi Noé jiweatianan, ja mai ja dukun damiwani anu yudabu chakabubu kupinun, iwanan, jatun chakabu jakimakatsi ikama Diosun jene yunuxun jabu jasai keyuaibun Noé paxaxanun ika jawen jiwea chakabu buama Dioskidi besti chanikunkainkin jaben yudabu 7 besti jabube paxaya janua jabuan Noén jancha ninkakin Dios ninkaisbuma jatun chakabuwen jasai keyunibukiaki.

⁶ Natian tsuabunda jaben jancha ninkama chakabukubainaibu Diosun jatu kupixanai jau bebunkidi dasibi chakabumisbum Diosun eskaibu jatu kupini jau jakidi unanxanunun mae dabe Sodoma nawabu inun Gomorra nawabu kupikin chiwen jatu menu keyukin Diosun jatu yamawakin mapu besti jatu wanikiaki.

⁷⁻⁸ Diosun jatu jaska waitian Sodoma anu Abrahamnen beden Lot nawabube jiwxun jatun chakabuwen betsa betsapaibū jatube nashui ika jiwxun badi tibi jaskaibu uin inun jabu ninkai jatun chakabuwen taea juinti nishma jaska waxun jatu medabewatimaken chutaname bestinun ika kemukin Lot bikawaibun jatu kuadiama Lot juni pepaken Diosun paxawanikiaki.

⁹ Noé inun Lot Diosun paxawanixun tsuabuda jabenabu ikatsis ikin jatun jiwea Dios inanmisbudan, jaben taexun jawada bika tibi jatu memabiaibun nukun Xanen Ibun unankin jatu chakabu binumadiakubaintiduki. Jamen jabu chakabumisbudan, janu badi jaben jeneaitian jatu unanti watan jatu kupixanai unandiaikiki.

¹⁰ Nukun Xanen Ibuan jatu kupikinan, jabu dasibibu jatun kemu pae jeneisbuma inun jaben kushipa danankubainaibu jatu axanikiki. Jabu yusinanain padanananmisbudan, juinti kushitan tsua ninkaisma inun

kenkin shinan betsa wakatsi ikabuma jawaki dateama jatun janchawen yushin chakabu jatun xanen ibuya jatu ichakin ja amisbuki.

¹¹ Jakia Diosun nai tsumabu kushipa yununikabun jatu binunbiaxun jatun kushipa uinmakin jatukidi yuikin Satanás jawen tsumabuya jatu chitekin ja aisbumakiaki, Dios janchaxunkinan.

¹² Ja junibu padanananmisbudan, jawa ninkati kayabi jayabumaki, yuinakapan shinanyan keskabudan. Yuinakadan, chanima jaben ninkatinins jiweabuki, tsuanda achixun detexun pimisbu inun pisbumadan. Ja padanananmisbu jaska keskabuki. Diosun bai kayatapiakidi unan pewamabia jakidi janchachakamisbuki. Jakia jaskabu mawaidan, yuinaka deteabu imis keskaxankanikiki.

¹³ Jabuan dukun yuda betsabu nuitapawashina jabuwen taexun Diosun jatu manakukin kupia nuitapaja idadiaxankanikiki. Jabu padananankin jabun shinain xabakabi jamapai chakabu aki: “Nun benimakunkainaii”, iki jiwxun man ikunwainbu beyusai anu matu nashui itan matube benimawanun ika man jaben dakeai jabu matu jusimakin atimapa tibi wakin matu dabinwanmisbuki.

¹⁴ Ja padanananmisbunan, jatun kemu paewenan, ainbu tibi ja bechipaiai kasmai ja ichakawa bestikatsis ikai jatu amisbudan, jaskawen taea jatun chakabu ichapa matak, jawa jenetidubumadan. Jatun kemu paewen ikunwain juinti babubu padankin jatu chakabuwamamisbuki. Jatu jaska wamamisbu jatun kemu pae jeneisbumadan, jabis ja junibu Diosun unantau jatu kupixanikiki.

¹⁵ Jaska Bosoran bake Balaam ini keskai jatu uinmachakai pepa ana chibanma jaki pechitan kanei jatunmebi benukin ja padanananmisbun Diosun jancha ana ninkabumaki. Jamen Diosun jancha jatu

yuixunbiamis Balaam peiwen kemukin Diosunabu yupukin chakabuwapanan¹⁶ Diosun jancha shinamma kaneaya jawen burro janchaismabia junin janchawen yuimakin Balaam tatima ikaskaini kapanan jawen burron janchawen nemakin Diosun kunyan anikiaki.

¹⁷Ja yusinan padananmisbudan, unpax bana taxka jeneuma keska inun nai kuin niweya bebiai uiuma jawa cha akama keskabuki, jatun yusian jawa pepa jayamadan. Ja jabu jaskamisbudan, Diosun jatu kupia ikibi ika meidan, janu meshu ten ikijaidai anu jatu putaxanikiki. ¹⁸Jawada janchakin yuiaibu jawendua kemutapabia jamenki. Jabun dama ikunwankin taewashina mestendiabuma ja chakabukidi yusinkin chanima jancha jatu jenemakanikiki, jatun yuda atimapa betsapatiwidu jatu yusinchakakinan. ¹⁹Jabu chakabun jatu tsumawawen taea ja junibun jawa jatu nematidubumaki, ja ikunwankin taewaibun akaibudan. Nuku tibidan, jatun nuku mekeadan nun jawen tsumawen taea ja padanananmisbun tsumadan, chakabu bestiki, tsuan danankin jenetidumadan. ²⁰Ja dukun Nukun Xanen Ibu mekenan Jesucristo unantan jatun chakabu putakin pewabiani jabias chakabun ana jatu achixun yabuadun, bexmas ibiani ana chakabui pikujaidamisbuki. ²¹Ja dukun Jesucristo chibanti unanma ikaibudan, mawaida chakabuma ikeankanaii. Jakia Diosun jancha medibi jatu yusianbu unantan ana chibankatsi ikama danankin jenei chakabui pikukubainmisbuki. ²²Ja pananananmisbu jaskakidi jatu yuini chanima jabiasakanikiki. Uindakanwen. “Kaman janantan chintunkidan ana jawendi pimisbuki. Ja inun, ina yawa pupusjaida dachukin xunpinwanbiabu

ana chintunkain pupuski idumai ana jawen meweki pukumiski.” Jaska en matu yuiai keskakanikiki, chakabui ana pikuidan.

Nukun Xanen Ibu ana juxanikiaki, na janchadan

3 ¹En betsabu inun en puibuun, matuwen nuikin ana en matu kenexunaidan, eskawen taexun en matu axuaiin. ²Shinankanwen. Uatian Diosun jancha yuixunika medibibun yusinibu inun ja dikabi nukun Xanen Ibu mekenan jancha nuku yununi jabias jawen kushipayabun matu yusinkubainaibu jakimayamakubainkanwen.

³Na jaska dasibi en matuki chaniai man bebunkidi unantidubuki. Chanima janu badi jawen jenei ma kemaya yudabu jiwe chakaxun ibubis chakabu shinankin man ikunwainbu matuki kaxeii en jen ibiai ⁴yuka ikin: “Cristo yubakai: ‘En ana juxanaii’, ikainidan, ɿjania? jaska man chanimsdan. Nukun ibubun ninkabaini ma mawanibuki. Jaskabia Diosun mai bawani anu nun jiwea jabiaskas kaikiki”, ikin matu yukakubainxankanikiki.

⁵Bebunkidijaida iki taenitian Diosun nai inun mai jawen janchawen damiwakin taxnima ja dabe jenesbiaken nai inun mai paxkakin jene anua mai taxnimatan mekebianiken ja yudabun Dioskidi jawa shinankatsi isbumaki. ⁶Ana badi ichapajajaida kaken jabias jenewen mai jidabi achimakin jiweabu tenankin keyuniaki. ⁷Jakia nai inun mai natian jayayuadan, jabiaskadi wakatsi Diosun mekeyukubainikiki. Janu badi jawen jenei keyuaitian unanti wakin yuda chakabubu kupikatsi Diosun jawen janchawen yunukin nai inun mai chiwen yamawakin jabun Dios dananmisbu janu jatu benu keyuxanikiki.

⁸En betsabu inun en puibuun, eskakididi en matuwen nuiai

shinankubainkanwen. Xaba tanakin badi tanadai man jawen dabanan ikunkainmiski. Jakia Jesucriston jaska shinainsmaki. Xaba bestichai jawaida keyumis inun 1,000 badi kabiaya nukun Xanen Ibu jawen nuismaki. Ana jakimayamaxankanwen. ⁹Janu Jesús juti wani ma binuaya jabun shinanchakai janchamisbudan, eskaki, shinankanwen. Nukun Xanen Ibusudan, matuwen taeadan, jin jin ikamaki. Dasibibu Dioskidi shinan betsatan jau benui mawa kayabi iyamaxanunbun tenetan matu manakai ikunkainikiki.

¹⁰Jawatianda nukun Xanen Ibu juidan, tsuan ana jakidi shinanmaken yumetsu jua keskanunbadikiaki. Janua kanatun ichakayamai keskawen nai anu yamawakin jabun tsumabauna chi kushipajaidawen menukin mai jidabidi damiwani kupikin yamawaxanikiki.

¹¹Jaska dasibi Diosun yamawaxanai man unainwen taea natian man jiweyuanan, jaska Diosun bechipaiai keska aki medibi pepai jiwepekekanwen.

¹²Janun jau Diosun yudabu kupiyunun manama jawaida jawen bakekidi kakape chanikin yuibaunkanwen, jau samama judinunan. Janu ana manama jukinan, nai chiwen menuaya ja jabuan tsuma chin menukin metexa nidi ixiangikiaki.

¹³Nukubunan, eska uinkatsi nun manakanai. Nai inun mai bena Diosun ma nuku bebunkidi yubanidan, ja jaska taxnidan, kaneisbuma inun pepabuna besti ixiangikiaki.

¹⁴En betsabu inun en puibuun, en matuwen nui jeneama en matu yusinkubainai eskakidi shinankanwen. Jau dasibi man jawa detsisma inun jawa chakabu jayama inun unanuma man jiwe bestiken jau Jesucristo matuki nukuyuxanun en matu yusinxu shinain jakimama manakakubainxankanwen.

¹⁵Shinaindakanwen. Nukun Xanen Ibu nukuwen nui jin jin ikama pewen nuku paxawakatsi nuku medabewaikiki. Jabiaskidi nukun betsa Pablón matu kenea akeakexunyamaki, Diosun medabewaya unanepakinan. ¹⁶Pablón kene betsa tibi anu yusian bikabiaken na jaska en matuki chaniai keska betsabun ninka pewama inun jointi babun ikunjaidawabuman Pablón jancha maewakin inun Diosun jancha kenenibú maewa akeakei ibubis jatunmebi chakabutan benuxankanikiki.

¹⁷En betsabu inun en puibuun, matuwen nuijaidakin ma bebunkidi jaskaxanaibu en ma matuki chanixuki. Mekeidakubainkanwen, man pebiakainaya jau juni chakabun matu padankin jau matu chintunmayamaxanunbun mestenxankanwen. ¹⁸Jakia nukun mekenan Xanen Ibu Jesucristo ana unankin beyajaidawai jawen nuiwen ewakubainkanwen. Jadan, dasibibun Jesús kenwankin jeneama jau apakenunbunwen. Jaskakidan.

Jatiski, en janchadan.

Pedro

JUANEN JA DUKUN JATU KENE BUMANIKIAKI

1 JUAN

**Jancha kayabi jawen jiwei ikibi
iti jayakiaki, na janchadan**

1 ¹En betsabu inun en puibuun, en matu kene bumai uindakanwen. Mai damiwadiama Cristo jiweni natian jiwea man ninkakubainaidan, jaskadan, nukun dukun jawen daya tateskin taewabainai nukubun nun ninka taewabainiki. Januxun nukun beduwen daiskin mekin jatun nuku jiwekuinmamis ja jancha jiwea jaya nun beiskubainiki. ²Ja jiweadan, Jamebi jawa juneama ikunkainai nukun uinixun jakidi xabakabi chanikin jawen kaka matukidi jiwea ikibi ika jaya nun matu yuikubainai. Jawen Epabe dasia nuku xabakabi uinmakubainai nukubun nun uinkubainiki. ³Ja kakape nukubun uinkin nun ninkanidan, Epa Dios inun jawen bake Jesucristobe nun jatube dasia keskadiai matudi man nukube dasidianunbun nun matuki chanikunkainai. ⁴Nukubun jaskas nun shinain man nukubetan ikunwainbukidi ibubis shinan chankain nun benimachakayamakubainunbun na kaka pepa nun matu kenexunaii.

**Jesucriston nukun chakabu buanixun
Dios nuku daewaxunkubainikiaki,
na janchadan**

⁵Dios dasibi xaba keska pepajaidaki, jawa padanananti chakabu jayamadan.

Jesucriston na kaka pepa jaskakidi nuku yusiain nun ninkani januxun jabiasdi yusiin nun matuki chanikunkainaii.

⁶Jakia tsuanda yuikin: “Ma en Dioski dasiaki”, ibiakin chakabuwakubaini jiwea man padananan bestiaii, chanima xabakabi jatu uinmakin mawamamadanan. ⁷Jakia tsuanda Diosun jancha ikunwantan chibain man pepai jiweabudan, Diosun xabaki man ma pesea keskabuki. Jaskawen taea nukubun ikunwainbu nun ma dasiabuki. Januxun chanima jawen bake Jesucristo nukuwen taea mawakin jawen jimi jabakin Dios nuku daewaxunkin ma nukun chakabu nuku bua keyuxuniki.

⁸Jamen tsuanda ikunwanbiakin jawen shinan kayabi unanma yuikin: “Eanan, en jawa chakabuwaismaki”, iki bemakis besti shinankin nukunmebi ibubis nun padanantiduki, jancha kayabi jayamadan. ⁹Jakia jau nukun chakabu nuku buaxunun jawada mekin nun jatuhu meshu washinaki dateama Dios inun tsuabuda nun chakabuwashina jau ninkanunbun xabakabi nun jatuki chaniaya Dios pepa nukuwen nuikin nukun chakabu buatan ana shinanma nuku jakimawatiduki. ¹⁰Jakia tsuanda yuikin: “En jawa chakabuwaismaki”, ikin Dios chani chakai dabanan yudabun jawen jancha ninka pewadiama jaska

dasibibu nun chakabu jayabuwen taea
nun jaska yuitidubumaki.

2 ¹En bake keskabuun, Diosun
jancha chibankin man ana
chakabuwayamanunbun en matu
kenexun bumai ninkakanwen. Man
jaskabia tsuanda kanekin man chakabu
meayadan, nukun janchaxunika
Jesucristo jawen Epa bebun nia nun
jayaki, jatun jawa kanenimatun nuku
medabewaidan. ²Nuku besti ixuanma
jakia mai jidabi anu jiwebaunabun
chakabudi buanun ika Jesucristo
mawakin jawen Epa nuku daewaxuniki,
chaxuwan menukin inankin
daewapaunibu keskakinan.

**Ikunwainbu yunua benawen jawen
jiwetikiaki, na janchadan**

³ Ja Diosun yununi nun jabuan
chibankubainaidan, nukubun nun
ma unanti watan mestenwanan,
chanima nun ma janu jaki dasiabuki.
⁴ Jakia tsuanda yuikin: “Dios en ma
unaiin”, ibiakin jawen yunua jancha
chibanmadan, ja juni chanichakaikiki,
Diosun jancha chanima jaki jayamawen
taeidan. ⁵Jamen tsuada shinan
betsatan Diosun jancha chibankin
axunkayabiaidan, chanima kayabi
jawen xabakabi Diosun nui jaya ja
medanua taxnikiki. Jamen nukubu
nun jaskadiaibudan, nun jakidi dasiabu
nun ma unankanaii. ⁶Ja inun, tsuanda
yuikin: “Ma Dioski dasia en jiweaii”,
ikidan, jaska Jesucristo jiwekunkaini
keskai jau idiakubainunbunwen.

⁷En betsabu inun en puibuun, en
matuwen nuikin ja dukun Jesucriston
nuku yununi bena en betsabuun.
Jabias nukun betsabun matu yusiaiinbu
man ninkakin taewanidan, jadan,
man ma ninkaniki. Shinaindakanwen,
man bechipainamekubainunbunan.
⁸Jabias kabiaken na yunua bena keska

wakin ana matu shinanmakin en matu
kenexunaii. Ja dukun Diosun nuku
yunukin: “Minabube bechipainemekuba
inxankanwen”, iwanan, nuku yununiki.
Jaskaken jaska Cristo nukuwen nuikin
nuku bechipaimis unankin yunua
bena taxniai keska wakin en ana matu
shinanmai. Matun jiwea xeni man
jenekubidani ma chanima xaba kayabiki
man pesea keskabuki. Na man jaskai
jiweadan, Criston yununi kayabiki.

⁹Tsuanda yuikin: “Cristo ikunwain ma
en jawen xaba jayaki”, ibiai ikunwain
betsa danain jabe dakekenainan, jawen
jiwea xeni jene keyudiamu meshu medan
jiwea keskayuaki. ¹⁰Jakia tsuanda jawen
jancha chibain ikunwain betsabube
bechipainamemisdan, ana jawawen
taea chintuain chakabun kanemakin
achitidumaki. ¹¹Jamen tsuada
ikunwainbube bechipainameama jatube
danananain dakekenainan, jawen jiwea
pemawen taea meshu medan nia jani
kai unanma keskaki. Ja meshu medan
niadan, jawen jiwea xenin jawen shinan
bepu keyua bekun keska jiweaki.

¹²En bake keskabuun, Jesucriston
jawen jiweawen nuku medabewanun ika
taxnitan nuku mawaxuniwen taexun
Epa Diosun matun chakabu buatan
matu jaibuwani shinankin en matu
kenexunaii. ¹³Epabu inun ewabuun,
Diosun mai damiwadiama jawen bake
jabe jiwekunkaini man ma ikunwankin
unainwen taexun en matu kene
bumaii. Bedunanbu inun chipashbuun,
Diosun jancha chibanajidakin jointinin
mestenwantan man yushin chakabu
Satanás maemaiwen taexun en matu
kene bumaii.

¹⁴En bake keskabuun, man ma Dios
unanyanan, en matu kenexunaii. Ja
dikabi jawen bake jabe jiwekunkaini
man ma ikunwankin unainwen taexun
en matu kene bumaii. Bedunanbu inun

chipashbuun, juintinin mestentan man ma Diosun jancha ninkatan chintuanma chibankin jawen Satanás man ma maemawen taexun en matu kene bumaii.

Na mai anua mabuwen besti kemukin Dios benimawatidubumakiaki, na janchadan

¹⁵Yudabu na mai anu jiwexun jaska bechipaikin chakabu akaibu danain ana jatube nashui itan ana bechipaipay amakubainkanwen. Jamen betsabun jatun jiwea inun jatun beya chakabu man bechipaikubainaidan, Epa Dios man bechipaiamaki, danankinan.
¹⁶Na mai anu yudabu jiwexun akin taxnimaibudan, beya chakabudan, Dios anua juamaki. Jaska juidan, yudabun jatun yuda atimapawati bestiwen kemui inun, jatun beduwen besti mabu uinkin jaska bechipaikin keska taxniai jawen besti kemui kein jiweabuki. ¹⁷Janua yudabun jaska shinankin abiamisbudan, jatun kemu paedan, keyukunkainikiki. Jakia shinan betsa watan jaska Diosun bechipaimes aki jiwekubainaibudan, jabe jiwekuinxankanikiki, ikibi ikidan.

Cristoki sinatai taxnixanikiaki, na janchadan

¹⁸En bake keskabuun, ma badi jawen jenei keyuikiki. Badi jawen jeneaitian juni xanen ibukin Jesucristo mebinun ika jaki sinatai jaki bepadamei juxanai man ninkanidan, na jabatian ichapabu jaki sinatai ja keska ma taxniaibu man uiaiin. Jaskawen taexun ma badi jawen jenei ma kemai man unantidubuki.
¹⁹Jabu taxnidan, nantekoa beama jabia nuku anua iki taebainkanikiki. Nukube ichabiamisbu Jesucristo danain ana nukube ichama jaki sinatakanikiki. Jamen nukubetan ikunwainbunan, nuku paxkabainama itidubuki. Jakia nuku paxkabainaibu uinkin ikunwan kayabiabuma man xabakabi unantidubuki.

²⁰Jesucristo medibitun jawenabu wakin ma matu paxkaniki, jawen Yushin Pepawenan. Jaska dasibitun man ma jakidi jawen jancha chanima man ma jayaken ana tsuan matu padantidumaki. ²¹Januxun man jancha kayabi unanmawen taeama jakia jancha kayabi man unainwen taexun en matu kenexunaii. Cristo anua jancha chakabu taxniamaki. Jakia jancha kayabi besti janua taxnikunkainmiski. ²²Jakia ētsuabu ikanimenkain, Cristoki chanichakai padananainan? Jabu padananankin jakidi janchakin yui: “Jesúsdan, Diosun Katua Mesíasmaki”, ikaibudan, ja junin jawen kushipa mebinun ika jaki bepadamekin jawen Epa inun jawen bakeki sinatakin jatuki dakekenanamemaikiki. ²³Jaska inun, tsuabuda Diosun bake danain jaki dakeidan, jawen Epa Dioskidi dakediaikiki. Ja inun, tsuabuda dakeyamakain jakidi janchai peii: “En Jesús ikunwaiin”, ikin jawen Epakidi xabakabi wadiaikiki.

²⁴Jaskaken matunan, Diosun jancha man ninka taewanidan, matun juinti medan ja kaka pepa man mekeea matuki ma dasia janu jawen bake inun jawen Epabe man ma jatuki dasia jiwekunkaindixanaii. ²⁵Jaska Jesucriston ma nuku yubabaini nun ma jaya jawen taea jiwei ikibi ika nun ipaxanaii.

²⁶Ja jabun matu padankatsis ikaibukidi en matu kenexunaii. ²⁷Jakia chanima Diosun Yushin Pepa Jesucriston matu inankin ma matu medibi wani jatun besti jawen yusian chanima jawa matu padanma yusinkin matu medabewakubainaya ja padanananmisbun jatun janchawen matu yusintidubu jayamaki. Jaskawen taea man ma Jesucristoki dasiabudan, jaska Diosun Yushin Pepatun

besti matu yusiaín betsa wakin
jeneyamakubainkanwen.

²⁸En bake keskabuun, natian
Jesucristoki dasitan jeneyamakanwen,
jaki chiti ikidan, janu ana nukuki
nukui juaitian damapai nun jaki datei
daketidubumakidan, ja bebunuadan.

**Diosun bakebu jaskaibu nun
unantidukiaki, na janchadan**

²⁹Chanima Jesucristonan, jawa
kaneama ini man unaiin. Jaskawen taea
tsuabunda jawada Diosun bechipaiai
akubainaibudan, pepabu Diosun bakebu
man unantidubuki.

3 ¹Shinankanwen. Nukubudan, nukun
Epa Diosun nuku bechipajaidakin
nun jawen bakebu nuku kenaikiki. Jakia
tsuabunda Dios unanbumawen taexun
nun jawen bakebu nuku unanbumadiki.
²En betsabu inun en puibuun, en
matuwen nuaídan, nun ma Diosun
bakebuki. Chipu jaskadada nun ixanai
natian nun unandiabumaki. Jakia
nukun Xanen Ibu Jesucristo ana nukuki
nukuitian janu jabe ja keskadi ikin
janu jaskadada nuku wai nun uinxanaii.
³Na jaska dasibi jakidi shinankin nun
manaibudan, nukun shinan chakabu
jaki pechi nun pepa bestikatsis ikin nun
benakanaii, Jesucristo pepani keskanun
ikadan.

⁴Tsuabunda chakabu meaibudan,
jabuan Diosun jancha chibanma
danankin chakabu ewawakanikiki,
jaska yunuti tibi jayabiaken
chakabuwakin ja chibanmadan.
⁵Yudabun chakabu buanun ika
Jesucristo na mai anu taxnitan Diosun
yunua kanei chakabuwama inidan,
man unaiin. ⁶Tsuabuda nun ma jaki
dasiabudan, nun ma mestenwan ana
jawa chakabuwakubainamaki. Jakia
tsuabunda chakabuwakubainaidan,
jabuan Jesús jaibuwakin unandiabuma

ikubainkanikiki. ⁷En bake keskabuun,
jau tsuan matu padanyamanun en
matu yuiai ninkakanwen. Jesucristo
pepa ikunkaini keskakin tsuanda
chibankin pepa akubainaidan, ja
junidan, jawen shinan pepadiki. ⁸Jakia
tsuanda chakabu akubainaibudan,
Satanás chibankin akanikiki. Bebunkidi
Satanásan Dios ninkama jatun
dukuntun jakidi chakabuwanixun jatun
jatu amakubainikiki. Jaskawen taea
Satanásan jaska jatu amakubainmis
yamawakin keyunun ika Diosun bake
taxniniki.

⁹Jadatuda nun ma Diosun bakebudan,
nun ana chakabu mekubaintidubumaki,
jawen jiwei shinan pepa ma nuku
medan naneawen taeandan. Jaskawen
taea nun Diosun bakebu nukunmebi
nukun jiwea nun mekekubaintidubuki,
ana chakabuwamadan. ¹⁰Diosun
bakebu inun Satanásan bakebu man
unanti watidudan. Tsuanda pepa
akubainama inun ikunwainbube
bechipainameamadan, Diosunabumaki.

**Betsabuwen nuikin jatu
uinmatikiaki, na janchadan**

¹¹Jesús man ikunwakin taewaya matu
yusinkin: “Matubetan ikunwainbube nui
jatube bechipainamekubainkanwen”, ika
jancha man ninkanidan, jabiaskadi ana
en matu shinanmai. ¹²Adáñen bake
dabe inibukidi matu ana shinanmanun
ninkakanwen. Caínen Satanásan shinan
chibankin jawen betsa tenanikiaki.
¿Jaskadawen taexun animen? Caínen
jawen jiwea pepamaken jawen betsan
Diosun yunua aki pepaya jaki sinatakin
tenanikiaki. Caínen jawen betsa Abel
bechipaíama ini keskadiai nukubudan,
jaskayamakubainankanwen.

¹³En betsabu inun en puibuun, jabun
ikunwanbuman Diosun jancha ninkama
matu danain matuki dakekenainbunan,

jatu uin datei e iyamaxankanwen.
¹⁴Uatian nun bechipainameamadan, nun mawa keska inibuki. Na jaska unankinan, natian nukun betsabube nun bechipainameaibudan, nun jiwea jayaki. Jakia jabu bechipainameabumadan, ma mawanibu keska jiweyubuki.
¹⁵Tsuada ikunwainbu betsawen nuiama dakekenanmisdan, juni pubenki. Ja juni jaskabudan, jamebi jatun jiwekuian jayatiduma man unaiin. ¹⁶Nun nui kayabi jaya nun tapintidudan, jaska Jesucristo nukuwen dabanan jawen jiwea nuku inani nun shinantidubuki. Jaskawen taea nukubundi nukun betsabu nun jatu bechipai kayabiai nun jatu uinmatidubuki. ¹⁷Jakia tsuada mabujaidayatun ikunwainbu betsaa nuitapai uinbiai bedu chankaxun jatu medabewakin jawa inainsmadan, jawa Diosun nui jayamaki. ¹⁸En bake keskabuun, chanima Dios bechipaikin duawakinan, jancha bestiwen akama ikunwain betsabuwen nuii medabenankin jatu uinmakin axunkubainankanwen.

¹⁹Jamapai tibi kanebiakubaini nukunabube nun bechipainamemiswen taexun Diosun nukun chakabu nuku buaxuni nun unantidubuki. ²⁰Nun chakabu wakubainmis nukun unan keyubiaya Dios nun yuka nukun chakabu nukun buaxuntan ana shinanma unain ana punu nukayamakubainankanwen. ²¹En betsabu inun en puibuun, matuwen niukin en matu medabewaidan, nukun chakabu nun ma pewa ana jawawen taea Dioski nun datetidubumaki.
²²Jaskawen taexun jawen jancha chibankin jaska bechipaiai akin nun benimawakubainai unan keyuaya januxun jawada bikatsis ikin Dios nun yuka nukun axunxaniki. ²³Jawen bake Jesucristo nun ikunwanxanunbun inun nun bechipainamekubainunbun

Diosun jawen yunuti yununiki. Jabias keskadi jawen baken nuku yunudianiki.

²⁴Tsuanda Diosun jancha nun chibainbudan, nun jaki dasia jiwea inun jadi nukuki dasidia jiwediaki. Ja inun, jawen Yushin Pepa nuku yunua nun biniwen taexun nukuki dasia jiwea nun unankanaii.

Jadatuda Diosun Yushin Pepa jaya unantikiaki, na janchadan

4 ¹En betsabu inun en puibuun, matuwen nuikin na jaska taxnibidanaibukidi en matu yusinkatsis ikaii. Mai jidabi anu Diosun jancha yuixunikanikapai jabu chani chakaibudan, midima jayaki. “Eadi en Diosun jancha yuixunikaki”, ikaibudan, dasibi jatu ikunwanyamakanwen. Jakia jatu unanti wakinan, ɿchanima jabu Diosun Yushin jaya ikanimenkain? ɿjayamabia machupai ikanimenkain? Jatu uinkubainkanwen. ²Jaskakidi janchaibu man unantidubudan, jabu Diosun Yushin Pepa jayadan, jabun ikunwankin yuikin: “Jesucristo taxnidan, yuda kayabi bitan kainiki”, ikaibu Diosun Yushin Pepa jaya man unantidubuki. ³Jakia tsuanda Jesucristokidi unanmabia yuikin: “Yuda kayabiamma iniki”, ikaibudan, Diosun Yushin Pepa jayamaki. Ja junin Jesucristo xanen ibu mebinun ika jaki sinatai jaki bepadamei juxanai yushin jayaki. Jaskakidi ja yushin juxanai man ninkanidan, jadan, ma na mai anu yudabu anu kainma ma niaki.

⁴En bake keskabuun, man Diosunabudan, jawen Yushin Pepa kushipa man jayawen taexun Satanás jatu medabewabiamisken ja padananaibun man jatu binu keyuaki. Satanás kushipabiaken Diosun Yushin Pepa kushipajaidatun ma binuaki, matu medabewakinan.

⁵Ja yusinan padananainbudan, jatun yusianwen janchaidan, jatun beyakidi besti janchakanikiki. Tsuabuda jabu keskabundi jatu ninkakanikiki. ⁶Jakia nukudan, nun Jesúsun kushipayabudan, nun Diosun bakebuki. Nun yusianyan jabun Dios unankin nuku ninkaibun jabun Dios unanbuman nuku ninkaisbumaki. Ja jaskabudan, jadatuda chanima Yushin Pepa jaya inun jadatuda padanan yushin jayabu nun unantidubuki.

**Ikunwan kayabiae unantidan,
bechipainamei beyanamei jatuki
dasiakiaki, na janchadan**

⁷En betsabu inun en puibuun, nui pae Dios anua jumiski. Jaskawen taea tsuabuda nun jawen bakebui ikaibudan, Dios unankin jaibuwakanikiki. Jaskaken nukubu nuii bechipainamekubainank anwen. ⁸Dios nuikipabiaken tsuanda ja bechipainameti shinamadan, Dios unandiabumaki. ⁹Jesú ikunwain jawen taea nun jiwea jayaxanunbun Diosun jawen bake bestichai yudabu anu yununiki, nukuwen nuikin nuku bechipaiai nuku uinmakinan. ¹⁰Nuku bechipaiai jaska uinmakinan, nukun dukun nun Dios bechipaiaama iniki. Jakia nukuwen nuikin nuku bechipaikanan, jawen bake yununiki, jau ja mawakin daewaiwen nukun chakabu buatan ana shinanyamakubainxanunan.

¹¹En betsabu inun en puibuun, en matuwen nuikunkainaaidan, chanima nuku jaska wakin Diosun nuku bechipainikenan, nukubudi jabiaskadiai ikunwain betsabube nui bechipain amekubainankanwen. ¹²Tsuan Dios uinpaunima inun uintidumabiaken nukubu nun bechipainameaidan, Dios nukuki dasia nukube jiweaki. Nukube dasiawen taea ja nui chanima kayabi nun jayaki. ¹³Nukubu nun Dioski dasia

jiwea inun ja nukube dasia jiwea jawen nun unanti wakubainunbun jawen Yushin Pepa nuku inaniki. ¹⁴Chanim Epa Diosun jawen bake jau yudabu mai jidabi anu jatu mekekubainxanun yununi nukubun uinxun nun xabakabi jakidi chanikunkainmiski. ¹⁵Jamen tsuabunda yuikin: “Chanim Jesús Diosun bake kayabiki”, ikaibudan, Dioski dasia jiweabu inun Dios jatuki dasidiaki.

¹⁶Chanim Dios nun bechipaiaidan, ikunwakin nun ma Dios unankanaii. Diosdan, nuikipa bechipainamenikaki. Tsuada ja nui jaya jiweadan, Dioski dasia jiweaki, Diosdi jaki dasidiadan.

¹⁷Jaskakunkaini chanima nun nui jayakunkainmisbudan, Diosun Jesucristo bechipaimis keska wakin nukudi jabiaskadi wakin nuku bechipaimiswen taea janu badi jawen jeneaitian Diosun jatu unanti waya nun jawa dateama ixanaii. ¹⁸Janida janu nui jayadan, janu date jayamaki. Tsuada nui kayabi jayadan, ikunwainbuwen nui bechipainame kayabikin jawen date putamisbuki. Jamen betsabu date jayadan, jawen kupiti shinamisbuki. Jaskawen taea tsuada datekepadan, nui kayabi pae jaki nukudiamaki.

¹⁹Diosun dukun nuku bechipaikin taewaniken jawen taea nukudi nun jatube bechipainametiduki. ²⁰Jadatuda ikunwain betsabu jabe ikunwain jabe uinanbanbiai jabe bechipainameadanan, jabiaskadiai Dios nun uianmabedi bechipainametidubumaki. Jaskawen taea tsuanda yuikin: “Dios en bechipaiaii”, ibiai samama ikunwainbu betsabu danain jabe dakekenainan, ja juni chani chakaikiki. ²¹Jesucriston nuku yunukanan, eska yuiniki: “Tsuanda Dios bechipaikanan, matubetan ikunwainbudi jatuwen nuikin bechipaidiakubainkanwen”, nuku waniki.

**Ja ikunwantidan, nui kayabi
jayakiaki, na janchadan**

5 ¹Tsuabunda Jesús ikunwankin yuikin: “Chanima Jesús Diosun Mesíaski”, akin yuiaibudan, Diosun bakebuki. Ja inun, tsuanda Epa Dios bechipaiaidan, Diosun bake betsabudi bechipaidiaikiki. ²Epa Dios bechipaikin jaska yununi nun chibainbudan, Diosun bakebu nun jatube bechipainameai nun unaiin. ³Dios nun bechipaiaidan, jawen yunuti inun jawen nemati nun chibankubainaii. Jawen yunuti chibainan, xankamama bikamaki. ⁴Nun tsuabuda Diosun ma jawen bakebu nuku wa tsuabunda jatun jiwea chakabu chibankin Dios danainbu nun jatu maemaii. Nun Jesús ikunwainwen taexun jawen kushipayakin ja yudabun chakabu akaibu nun ma jatu binuaki. ⁵Januxun: “Jesús Diosun bakeki”, akin tsuanda ikunwankin yuikinan, jabu bestitun Dios danainbu jatu binukanikiki.

⁶Jesucristo taxnikidanan, eskakin dasibi jatu unanti wamakin kayatiwamaniki, ja dukun jenewen ikaibu anu jadi nashidan, janua dasibibun bedubidi cruzkia dunua jawen jimi jabakin jatu uinmakinan. Jenewen nashi bestiaman jakia mawai jawen jimi jabakin jatu unanti wamaniki. Jaskanidan, Diosun Yushin Pepatunan, jamebi unainkiki. Jaska unain nukukia chanima chanimiski. ⁷Ja Jesús jaskani jabu chaniaidan, eskaki. Jawen unanmati dabe inun besti chaniti jayaki, ⁸Yushin Pepadan, jenewen nashinidan, mawai jimi jabanidan. Jabu dabe inun bestidan, jatun shinanan, jabiaskas shinan kanemaki. ⁹Jawada kaka yudabun bexun yuiaibudan: “Chanimaki”, ixun nun jatu ninkamiski. Jamen Diosun ibubis jawen bake kayabikidi nukuki chanikin ja kaka taxnimanidan, yudabun kaka yuimisbu

keskama ja binua mestenepajaidaki. ¹⁰Tsuanda Diosun bake ikunwainan, jamebi jawen juinti medan ja kaka jaya yuimakin xabakabi wamaikiki. Jakia tsuanda Dios ikunwanmatunan: “Diosdan, chaniki”, ikin jatu shinanmamiski, ja chanichakakinan, Dios ibubis jawen bakekidi chanini ikunwanmadan. ¹¹Ja inun, Dios chanii: “Jiwea ikibi ika en matu inanxanaii”, inidan, ja jiweadan, jawen bake anu jayaki. ¹²Ja inun, tsuanda Diosun bakeki ma dasikin ikunwainbudan, ja jiwea ikibi ika jayaki. Jamen tsuada Diosun bakeki dasikin ikunwanmadan, ja jiwekuian jayabumaki.

Nui jancha jawen jeneakiaki, na janchadan

¹³Jesús Diosun bake man ikunwainbu na yusian en matu kenexunaii, Diosbe man jiwei ikibi ika man ma jaya man unanunbunan.

¹⁴Jaska Diosun shinain keska shinankin jawada nun yukai nuku ninkamis dateama nun unaiin. ¹⁵Nun jabe janchakin yukai Diosun ma nuku ninkatan jawada nun ma yuka nuku inanxanai nun unaiin. ¹⁶Ja inun, chakabu dabe jayaki. Ja chakabu dabedan, betsa Diosun buakatsis ikikiki. Bestichai buakatsi ikamadan, mawa kayabi anu katiduki, Jesús mawabiaxuni danankin chakabu wamisdan. Jaskawen taexun ikunwain betsan jawada chakabu Diosun bechipaiana ana akai uintan man medabewakatsis ikaidan, jau Diosun kupiyamaxanun shinan pewamakin medabewakin matun betsa Dios yukaxunkanwen. Jamen betsandi jaska Diosun jawen chakabu buaxunkatsi ikama uinbiakin Diosbe janchaxunyamakanwen, jawen jiwea ma kupiti jayakidan. ¹⁷Jawada chakabu tibi danankin Diosun bechipaismaki. Bechipaismabia betsa betsapa jatun

jiwekuian benumakatsis ikama jatu buaxunmiski.

¹⁸Tsuanda ikunwankin Dios jawen Epa wai ma jaki dasiadan, ana chakabu mekubaintiduma nun unaiin, Diosun bake Jesúsun mekekubainayadan. Ja dikabi Satanásan yunuken ikunwainbu kanematidumaki. ¹⁹Satanásan mai jidabi anu jiweabu jatu padan keyuikiki. Jamen nukudan, nun Diosun bakebu nun unandiaii. ²⁰Diosun bake taxnitanan, jamen juama Dios mekenika

kayabi nun unanxanunbun jawen unanepa nuku inanun ika juni nun unaiin. Nun ma ja chanima kayabiki dasia jiweabudan, jadan, jawen bake Jesucristoki nun ikaki, jabias Dios mekenika kayabitun jiwei ikibi ika nuku inanmisdan.

²¹En bake keskabuun, yushin dami kenwanmisbu beyanu ja dapi buyamakubainkanwen.

Jatiski, en janchadan.
Juan

JUANEN JA KACHU JATU KENE BUMANIKIAKI

2 JUAN

**Juanen jatukidi shinanikiaki,
na janchadan**

¹Eadan, mekenikatun en matu jancha bumai uindakanwen. Diosun matu katua jawen jancha ninkai man ichamisbu en matu bechipaiiaii, ean bestimadan. Jakia dasibi jabun Diosun kaka pepa chanima unankin ikunwainbun matu bechipaidikanikiki. ²Eskawen nun matu bechipaiaidan, ja jancha chanima nun jayatun jaska ja chanimatun nukun juinti medan nun mekeia jatun nuku shinanmakin nuku yuimapakeikiki. ³Epa Dios inun jawen bake Jesucriston jatun pepawen jau matuwen dabanan ikin unanuma shinanmakin jawen jancha chanimawen inun jawen nuiti kayabi matu inankin jau matu jiwekubainunbunwen.

**Diosun jancha chibain
bechipainametikiaki, na janchadan**

⁴Jaska Epa Diosun nuku yununi matubu jatiditun chibanjaidai matukidia beabu jatuki en nukua chanima jaska jancha chanimawen jiweaibu jatu uin en benimajaidaimaki. ⁵En betsabu inun en puibuun, natian matuwen nuikin matukidi shinankin matu ea akin en matu yunuaii, nukun betsabube nuii nun bechipainamekubainunbunan. Na

jaska en matu kenexunaidan, yunuti bena en matu axuanmaki. Jakia jabias Jesucriston nuku yusin taewani en matu ana shinanmakin axuaaiin.

⁶Diosun jawen jancha yunukinan: “Nui bechipainamei besti jiwestiki”, anidan, ja jaska yununidan, ma bebunkidi man ninkaniki. Jaskawen taea nuikipai jiwekubainkanwen.

**Yusinanain padananainbu
unantikiaki, na janchadan**

⁷Yusinan ichapabu padananain mapuxun: “Jesucristo Dios anua taxnitanun ika nukun yuda bitan kaiantma iniki”, ikin jabun ikunwanbuman jatu unanmakatsi ibiakin xabakabi jakidi chanikin yui pewabumaki. Ja jabun jaskakin yuaibudan, ja juni yusinanbudan, jakidi padananankanikiki. Jaskabu anua junin Jesucristo xanen ibu mebinun ika jaki sinatai jaki bepadamei taxniaki. ⁸Jesús ikunwankin jawen daya nun amiswen taexun jau matuwen pepawen Diosun matu manakuxanai man bixanai benukatsi ikamadan, chintuanma ja padananainbu jatu uindakubainkanwen.

⁹Tsuanda Criston yusian chibankin taewabiatan jawen yusian jawena medibis ana chichitan yusianinan, Dios jayamaki. Jakia tsuanda Criston yusini

ja jancha kushipa betsa wama jabias chibainan, Epa Dios inun jawen bakebe dasia jabe jiweaki.¹⁰En matu yuiai keskarbu Jesúsun jancha kayabi matu pe yusianbuma jabun matu yusinun ika buaibudan, jabe janchanameama inun matun jiwe anu jatu ikin mapemayamaxankanwen.¹¹Tsuanda ja padananaainbu jatube janchanamekin beyawakinan, jawen chakabu jabetan abainxankanikiki. Uindaxankanwen.

¹²Jancha ichapa en matu yuikatsis ibiakin en jati matu kenexunkatsi ikamaki. Jakia matuki bai ka en matube janchanamekatsis ikaii, beisinain nun benimanamexanunbanan.

¹³Nukubetan Jesús ikunwainbu Diosun jatu katuabu en jatube ichamisbun jatun jancha matu bumadiakanikiki jau man unanuma jiwenunbunan.

Jatiski, en janchadan.

Juan

JUANEN ANA JA KACHU KENE BUMANIKIAKI

3 JUAN

Juanen Gayo kenwanikiaki, na janchadan

¹Min en jaibu pepa Gayo anu min jaibu mekenika Juanen chanima en mia bechipaijaidaitun kenexun en jancha en mia bumai uinxanwen.

²En betsaan, Jesús ikunwakin min shinan min ana kushipa wakubainai keskadiai jawa isin teneama min jiwei pekunkainun Diosbe janchakin min jiwea dasibikidi en mia yukaxunmiski, miwen nuikin mia bechipaikinan.

³Nukubetan Jesús ikunwain betsabu bea eki nukutan mikidi eki chanikin: “Gayon Jesúsun chanima jancha chibankin chintuanma jawen jiweaki”, ikin ea yuiabu ninkai en benimajaidashinaki.

⁴Man en bake keskarbu jabias shinanwen man chibain matukidi ninkai en shinan chankankunkainmis en benima pae tsuan ea mebintidumaki.

⁵En betsaan, miwen nuikin en yuiaidan, ikunwainbu betsabu dasibi shinan pewen min jatu medabewakubainmis keska wakin ana jatu binumakinan, jabu min jatu uinmachakayamaidan, chakea yusinanantanun ika beaibu medabewakin beyawakin min jatu duawamis ⁶nenu nun jiweabu anudi bea janu nun ichabu anuadi min jatuwen nuikin medabewamiskidi

nukuki chanimisbuki. Jaskaken mia anua buaibu jatu nichinkin jatu medabewakin jau jawa yupama jaya butanunbun piti inun jawada min jaya jatu inanpakekubainwen, Diosun jaska bechipaimis akinan.

⁷Jabunan, Jesucristokidi yusintanun ika buxun jaska jatun shinanen jabun ikunwanbuma daketapawatidubumaki, jamapai shadabu jatu yukakinan. ⁸Jau jatun jawada yupayamanun bun jaskawen taea nukuin nun jatube dayakin jabu nun medabewanun Criston nuku yununiki, jabuan Jesucristokidi chanima yusinbaunaibudan, jabu medabewati shada nuku wakinan.

Diótrefes inun Demetriokidikiaki, na janchadan

⁹Uatian min mae anuxun ikunwain ichamisbu yunukin en jatu kene bumaimaki. Jakia Diótrefes nukun yunuti kushipa bechipaima ibubis yunukatsis ikin nukun jancha ninkamakiaki. ¹⁰Jaska bestiama, jatunan, nukukidi chakabu yuikin nuku yuankin nukuki kaxei chanichakamiskiaki. Ja inun, yusinan betsabun matu medabewanun ika matu anu buaibu matu beyawamamakin nemai inun tsuanda jatu beyawakatsis ikaibu nemakin jau jabe man ana

ichayamanunbun matu nematan
taxnimamiskiaki, xanen ibukinan.
Jaskamisken ea kayabis matun mae
anu kaxun kenatan jabe janchakin en
chitexanaii.

¹¹En betsaañ, en miwen nuiaidan,
beya chakabu chibanna beya pepa
besti akubainwen. Tsuanda beya pepa
akaibudan, Diosun enabuki. Jakia
tsuanda beya chakabu akaidan, Dios
unanbumaki.

¹²Dasibibun: “Jaska kaka
taxnimakanwen”, ika en ikaidan,
Demetrio bestikidia jancha taxnia en
ninkaii, jawen kaka chanimadan. Jaska
jakidi kaka kaianyan nukundi jakidi

janchakin jabiaskadi nun shinaiin.
Nuku nun padananain janchaisma min
unaiin.

¹³Jancha ichapa en mia yuikatsi
ibiakin en jati mia kenexunkatsi ikamaki.

¹⁴Jakia samama mia anu ka uinanain en
mibe janchai kaxanaii.

¹⁵Jau Diosun mia unanuma
jiwemanunwen. Nenuxun nukun
jaibuaibun jatun jancha mia
bumakanikiki, min unanuma jiwenunan.
Mia anuabu nukun jaibuaibu tibi
en janchadi ea jatu banabimakin
keyuxunxanwen.

Jatiski, en janchadan.

Juan

JUDASIN JATU KENE BUMANIKIAKI

JUDAS

**Judasin jatukidi shinanikiaki,
na janchadan**

¹Tsuabuda Epa Dios matuwen nuikin matu kenatan katuni man jabu Jesucriston matu tsumaxun mekekubainai en Santiago betsa Judas Jesucriston tsumapan, en jancha en matu bumai uindakanwen, ²Dios matuwen nuikin unanuma matu jiwemakin jau ana matu duajaidawakubainunwen.

**Yusin padanananmisbu Diosun jatu
kupixanikiaki, na janchadan**

³En betsabu inun en puibuun, matuwen nuikin jaska Jesucriston matu inun ea nuku paxawakatsi janchanikidi matu kenexunkatsi ibiakin ja akama eskaibukidi jatu uinkin jabukidi shinankin Diosun kakape nun matu Diosunabu wakin yusini jabun betsa wakin matu bika tenemakin inun yuda betsabu jau jatu padanyamadianunbun man jatu nemakubainun jaskakidi kenexun en matu bumai uindakanwen. ⁴Ja inun, ja bebunkidi ja yudabukidi Diosun jawen jancha jatu kenemani jabu padanananmisbu kupinunbadiai jabias yuini keska na jabiatian yudabu betsa betsapa june chakabu jayabia matube ichai unantinantan jatun chakabu jenekatsi ikama jabun shinanwen matu

padankin yuikin: “Dios pepatunan, jawada chakabu man wabiaya matun chakabu buatan kupiama ixanikiki”, akin jamapai atimapa matu yusin jatun jiwea pewai bexteketsi ikama Jesucristo besti nukun Xanen Ibubiaken jawen kushipa danankanikiki.

**Diosun jatu unanti watan
kupinunbadikiaki, na janchadan**

⁵Egipto anua Israelbu Diosun jatu taxnimabidani man unanbiaya jaskakidi man shinanunbun ana matu yuinun ninkakanwen. Ma jatu paxawabiaima Israelbu jabun Diosun jancha ikunwankatsi ikama danainbuwen taexun janu tsua jiweabumanuxun Yavé Diosun jatu kupikin tenankubidani man unaiin. ⁶Ja dikabi Diosun jawen nai tsumabu nai anua jabu tibi ja mekei janu jau xanen ibununbun jatu yunubia jaska besti mekekatsi ikama jatun daya jenebidanaibu Diosun jatu nemakin janu meshujaida kainkaintidumanu jatu bichitan janu badi jawen jeneai anu jatu kupiaitian jabudi kupixanai jatu mekea mapuabuki. ⁷Ja jawen nai tsumabu jatu axanai keskadi wakin nawabu Sodoma inun Gomorra maewan inun jatu dapi mae udama anu jiweabu chutawen kemukin junibu jabe junibe chutanameaibu Diosun jatu kupikin

jawen yusian danainbu chi nukaismawen jatu kupixanai keska wakin xabakabi Sodoma inun Gomorra jatu kupiniki, jabias nukubundi jatuwen taexun nun unanxanunbun jatu kupikinan.

⁸Jatu jaska wani shinanbai ja padanananmisbun xabakabi shinain jiweama yuikin: “Diosun ea jadi yusinkiki”, iki jatun shinan medibiswen janchai yudawen besti kemui chutanamekin Dios xanen ibuai ichakin danankin Diosun nai tsuma kushipabudi ja amisbuki. ⁹Jakia Diosun nai tsuma xanen ibu Miguelin dasibi nai tsuma betsabu binujaida Satanásbe janchai Moisés mawa jawen yuda jadatutunda jawena watidu yaushi ja idabenamekin Miguelin jancha pepawen besti jancha wakin Satanás yuikin: “Yavé Diosun jau mia chitenunwen”, ibianiken ¹⁰jawada unankin ninkabuma ja padanananmisbu yupukunankubainmisbuki. Jaska jatun shinanan, yuinakapan shinanyan keskabuki. Jatun shinan chakabuwen taeadan, jatunmеби jatun kupiti bikanikiki.

¹¹Uian. Jabu ikidan, Caínen jawen betsa tenani keska ja chibankin chakabuwakanikiki. Jaska inun, juni betsa Balaam pei binun ika kemui ini keskadiakin Diosun bai kayatapia benui yusinan betsabu padananain peiwen kemudiakanikiki. Jaska inun, juni betsa Corén Diosun yunua danain benuni keskai ja padanananmisbu jabu mawadiai pemaxankanikiki.

¹²Jaska inun, man Jesús chibainbu ichatan duanamekin man piaibun ja padanananmisbu dakei jawa dateama matube nashui itan pike bestikin tsua duawama benimanikapaikin matu dakewamisbuki. Jabu mekenikabia ibubis besti jawen yuda shinainmekemisbuki. Jabun yusianan, nai kuin juxupa tuyabainaya ui juama

mai mechawaisma keskai jabu janchajaidakin yudabu medabewakin kushipa waisbumadiki. Ja inun, janu ni bimiyamisbutian ji betsa betsapa bimbiamisken jabu janchanwainbu ninkakin jawen medabewati ji bimiuma xanashina betsea keskai padanananmisbun tsua medabewaisbumaki. ¹³Ja inun, ianenwan niwen bechuduankin tunkax akin kexa anu bakux jenebainmis keskakin jabun chakabuwai padananankin dake pae xabakabi jenebainaibu dasibibun uintidubuki. Ja inun, bishi jawen bai ana tanabainama keskai ja padanananmisbu unanumas buaibu ana tsuan chibantidubumaki. Jaskawen taexun janu meshujaida Diosun jatu waxuni anu janu jatu nichintan kupijaidaxanikiki, niti akamadan.

¹⁴Ja dukun Adánwen pakea 7wen jawen baba Henoctian ja yudabu chakabukidi bebunkidi Dios janchaxunkin yuikin: “Uian. Yavé Dios juidan, jawen nai tsuma midima tsuan jati tanatidumaya juxun ¹⁵yudabu dasibi jatu unanti wakin jabuan chakabu betsa betsapa amisbu inun jatun jancha pemawen Dioskidi yuimisbu Diosun jatu kupixanikiki”, ani ¹⁶jabias keska menei jawada tibi bechipaiama ja iki yuain jawadawen ibubis jawenas benai benimanun ika jatun kemu pae besti chibain inun kein mia akaitun besu wakin dasibibu jatu binumakin maemaikiki, jatu kenwanmaidan.

Ikunwankin kaneaibu nui paewen jatu medabewatikiaki, na janchadan

¹⁷Jakia en betsabu inun en puibuun, en matuwen nuiaidan, nukun Xanen Ibu Jesucriston jawen kushipayabu jatu yunua jaska jabun matu yusini ana matu shinanmanun shinaindakanwen. ¹⁸Jawen tsumabun matu yusinkin:

“Chanima janu badi jawen jenei ma kemaya yudabu jiwe chakaxun ibubis chakabu shinankin matukidi kaxekenanxankanikiki”, jaska shinankin matu yuinibudan,¹⁹ chanima na jabiatian ja yusinananaain padananain kaxekenainbun Dios shinanma ibubis jatun kemuti shinan chibankin ikunwainbu tadi paxkakin Diosun Yushiunma wakin jatuhakanikiki.

²⁰ En betsabu inun en puibuun, tsuabuda en matuwen nuaidan, matu yuinun ninkakanwen. Ikonjaidawai ana kushipanamei jawen besti mestentan chintuanma medibi jiwestunyukin Diosun Yushin Pepatun matu shinanmakin yuimaya Diosbe janchai jawen kushipawen dayuikubainkanwen.²¹ Jaska inun, Dios matuwen nuimis inun matu putaisma unain Jesucristo janu juxanai man manaiwen taea nukun Xanen Ibu Jesucristo nukuwen dabanan ikin jiwekuian ikibi ika nuku inanxanikiki.

²² Jesucristo ikunwanbiai teabu jatuwen nuikin medabewakubainkanwen, shinan dabeaibudan. ²³ Man jabuwen

nuikin medabewakatsis ikaidan, jatun kupiti ma kemawabu chi anu ma kemai keskabu menan jatu nexea keska wadikanwen. Betsabu jabun chakabu man bechipaimabia matumebi meketan jatuh jiwea beya jusiama dananbiakin jau Jesucristo ikunwanunbun jatuh medabewakubainkanwen.

²⁴⁻²⁵ Nukun Epa Dios ja besti nukun medabenan yushin dasibi kushipa jayatun matu kushipa wakin matuh shinan chakabun ana matu kanematidu nemaxunkubainaya jawen bake xanen ibujaida juaya yuda dasibibu unankin jatuh kupiaitian matudi ja be bun jawa chakabu man jayama jawen besuudi matu nichintan benima pae matu inanyan man benimajaidaxanaii.

Jaskaken nukun Xanen Ibu Jesucristowen taexun Epa Dios duapa pepa inun, jatuh besti kushipa binu keyua inun, yunuti kushipa pae jayajaida iki taeni inun natian jaya inun ipaxanai jaya kenwankubainankanwen, jeneamadan. Jaskakidan.

Jatiki, en janchadan.
Judas

JASKA INUNBADIAI JESUCRISTON JUAN UNANMANI JANCHAKIAKI

APOCALIPSIS

**Na jancha Juanen jatu
kenexunikiaki, na janchadan**

1 ¹Ja dukun Diosun Jesucristo ixanai unanmaniki. Januxun eadi samama jawaida jaskaxanai ea en jawen tsuma Juan unanmakatsis ikin jawen nai tsuma Jesucriston yunua ea uinmashinaki, na jaska inunbadiai dasibi nun jawen tsumabun tapintan jatu yusinkubainxanun ea unanmakinan.

²Jaskawen taexun Diosun jancha inun, Jesucriston ea unanmashina en ninkashina inun, dasibi en uinshina jawa chanichakama en matu yui kayabaiii. En jancha chanima uinkin ninkaidakanwen.

³Tsuabunda na en jancha jatu yuiaibu inun jabun na jancha ninkatan: “Chanimaki”, ikin chibankubainxanaibudan, Diosun jabu benimawaxanikiki, jaska inunbadiai chanini ma jamapai taxni taeai uinan.

⁴Man Jesús chibainbu ja 7 yusinanain ichamisbu tibi Asia mai pakeanuabuun, en Juanen, en matu kene bumai ninkaidakanwen. Ja ini inun, ikunkainai inun, ana juxanaitun, nukun Diosunan, jau matu duawakin jawen pepa matu inankin unanuma matu jiwemakubainunwen. Jabiaskadi wakin ja 7 yushin pepa jawen xanen

ibu tsauti be bun mapuabu jau jabun jabiaskadi matu wanunbunwen.

⁵Ja dikabi Jesucristo jawa chani chakaisma mawatan ja dukun besteni inun mai jidabi anu jabu xanen ibu betsa betsapa binui jatun xanen ibumisdan, jau jatun matu unanuma jiwemadianunwen. Ja inun, nuku bechipai nukuwen nuikin nukun chakabuwen taea mawakin jawen jimi jabakin nuku buaxundianiki.

⁶Na jabiatian jawen Epa Dios dayaxuni nuku jabe janchanika wakin jatun nuku xanen ibu keska waniki. Jaskawen taea dasibi jawenas kushipa jaya inun pepa jayaken niti ikama kenwankubainankanwen. Jaskakidan.

⁷Uian. Nai anua nukun Xanen Ibu nai kuinwen juai dasibibun uinxankanikiki. Ja dikabi jabun jatu tenanmanibu inun jabun dananmisbu mai jidabi anu manibaunabun uin datei kaxaxankanikiki. Jaskaxankanikiki, chanimadanan.

⁸Janua mai jayadiama nukun Xanen Ibu Dios dasibi kushipajaida jiwea jaya inun, natian jiwekunkainai inun, ana juxanaitun ea yuikin: “Ea dukun en jiweni inun en jawen jenea debesekeaki”, ea waxuki.

**Jesúsun Juan betsa watan
uinmanikiaki, na janchadan**

⁹Ea en matun betsa Juanan, matu keska Jesúski dasia Diosbe xanen ibuibe nia betsa betsapa tenei chintuanma Jesúsun kushipawen en binukubainaii. Ja inun, Diosun kakape yusinkin Jesúsun nuku mekekatsis ikai xabakabi en jatu yuikubainaiwen taexun na natukan jawen kena Patmos anu ea nichianbu ¹⁰nukun Xanen Ibu janu besteni xaba domingo betsatian Dios en yushinki nukuxun ea betsa wa en ninkaya en pechiudixun jui kushipajaida trompeta mimawati keskawen ¹¹tsuanda ea yuikin:

“Jawada en mia uinmai unaki kenexun Asia mai pakea anu ja 7 yusinanain ichamisbu tibi anu bumaxanwen, Éfeso anu inun, Esmirna anu inun, Pérgamo anu inun, Tiatira anu inun, Sardes anu inun, Filadelfia anu inun, Laodicea anudan”, ea waya

¹²tsuan ea jancha wai dabanen uinun ika nasauketan uinkin jaki bin tsautti 7 oro mane chanka daka tsaubauna uinkin ¹³ja namakis juni kayabi keska nia en uinxuki. Jakidi matu yuinun ninkakanwen. Jawen tadi chaipa jupuxku anu kesua inun, jawen oro mane nanexeketi xuchi puchinin kesuaki. ¹⁴Ja inun, jawen bu juxupajaida inun, jawen bedu chi jede chaxa keskaki. ¹⁵Ja inun, jawen tae mane tashipa betsa jawen kena bronce chi medan napua chaxajaida keskaki. Ja inun, jawen jui jene didi ikai ninka keskaki. ¹⁶Ja inun, jawen meken yusiudi 7 bishi tsuma inun, jawen jaxpanu nupe detenameti chaipajaida kenu dabeya tukuan jayaki. Ja inun, jawen besu badi keska chaxakin xabawaki.

¹⁷Jaska uin jawen tae naman mawa keskai tsistikain en tin ika daka jawen meken yusiudi ea mekin yuikin:

“Dateyamawe. Eadan, ea dukun en jiweni inun en jawen jenea debesekeaki. ¹⁸Ea en jiwea en mawani natian ana en besteni niti ikama en jiweapekaii. Ja inun, jiwemati kushipa inun kupiti kushipadan, ea besti en jayaki. Janu mawai ikibi ixanaibu anudan, ean besti en yunutiduki. ¹⁹Dasibi min uinxu inun, na jabiatian ikai inun, jaskadada inunbadiai unaki jatu kenexundiwe. ²⁰Ja jawada junea min uinxu xabakabi mia yusinun ninkawe. Ja 7 bishi en meken yusiudi en tsuma min uinxudan, ja 7 mae ichamisbu tibitun medabenan Dios yuixonikaki. Ja dikabi jaki bin tsautti 7 oro mane chanka daka min uinxudan, ja 7 mae ikunwainbu ichamisbuki”, iwanan,

**Éfeso anuabu dukun kene bumai
chani taenikiaki, na janchadan**

2 ¹ana Jesúsun ea yuikin: “Ja mae anu jatun Diosun jancha yuixonika Éfeso anua ichamisbu mekea na jancha en mia yuiai kenexundiwe: ‘Ja 7 bishi en meken yusiudi en tsuma inun jaki bin tsautti 7 oro mane chanka daka namakis anu en nimistun na jancha en matu yuiai ninkaidakanwen.

²Ea chibankin ea dayaxunkin bika tenei man chintuanbumaki. Ja inun, tsuabunda matu padanmisbun yuikin: Jesúsun kushipawen en jawen yuixonikaki. Ea ninkakanwen, ikaibu unantan jatu danankin ³en jancha jeneama ea duawanun ika ewen taea nuitapabiai punu nukai chintuanma man chibankubainai en matu unaini.

⁴Jakia na bestiwen en matu chiteai ninkakanwen. Ja dukun ea ikunwakin taewakin man ea duajaidawakubaini keskama man ana jabias keska ea wamaki. ⁵Jaskawen taexun jaska man ea duawakin taewani keska jani man benukainimamen, ana shinanjaidatan

matun juinti pewakin shinan betsa watan ana Dios anu chintuntan ea chibankubainkanwen. Jamen man jaska betsa wamaken matu anu ana kaxun matu danankin matun oro mane chanka daka matu anua mebinkin en tsekaxanaii. ⁶Jamen ja padanananmis Nicolaus chibamisbu en dananchakayamamis keska wakin matundi man jatu bechipaiabuma en unaiin. ⁷Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, mae pepa naiudi janu Dios jiwea anua jawen benimai jiweti ji bimi en matu pimaxanaii, niti ikamadan', ikin", ea waxu en matu kenexunaii.

**Esmirna anuabu kene jatu
bumanikiaki, na janchadan**

⁸Ana Jesúsun ea yuikin:

"Ja jatun Diosun jancha yuinika Esmirna anu ichamisbu mekea anu na jancha en mia yuiai kenexundiwe:
 'Eadan, ea dukun en jiweni inun en jawen jenea debesekeaki. Mawabiatan en ana besteni en jiweatun en matu yuiai ninkakanwen. ⁹Natian bika betsa betsapa tenei jawauma man nuitkaabu en unaiin. Jaskabia chanima matun manakuti ichapa nai anu matuki nun tana man jayaki. Ja inun, jabu matukidi jancha atimapá janchai inun ibubiskidi yui: En judioki, ibiae ikun kayabiwama jaska Satanásan bechipaiai besti chibamisbu en jatu unandiaii.
¹⁰Matu bika memaxanaibuwen taea dateyamakanwen. Eska wakin diablon bestibu matu jatu achimatan bichiti jiwe anu matu bichimaxanikiki. Jaska wakin dasibi man ea ikunwainbu matu bika tenemaibu jawen matu unanti wa akeakexankanikiki. Jaskawen taea 10 día besti jaska matu tenemaibuwen

taea chintunyamaxankanwen. Matu ichakawakin matu tenanbiaibun tenekubainxankanwen. Matu jaska waibuwen taexunan, eanan, matun manakuti inankinan, jiwea kayabi en matu inanxanaii. ¹¹Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, ana jadia dabeki mawakin chi jede meama ixankanikiki", ea waxu en matu kenexunaii.

**Pérgamo anuabu kene jatu
bumanikiaki, na janchadan**

¹²Ana Jesúsun en Juan ea yuikin: "Jatun Diosun jancha yuinika Pérgamo anu ichamisbu mekea na jancha en mia yuiai kenexundiwe:

'En mane nupe chaipajaida kenu dabeya jayatun en matu yuiai ninkakanwen. ¹³Janu Satanás xanen ibui tsaua anu man jiweabu en unaiin. Ja inun, Antipas en jancha yuixunika chintuanma matun mae anuxun tenanbianibun ja shinain matudi chintuanma eki jawa dakeama yudabuki chanikin en yusian ikunwankin man chibankubainai en unandiaii. ¹⁴Man jaskabia kanei eska tibi matu anu jayabu matu yuinun ninkakanwen. Ja man jabube ichabiamis jatidibun Balaamin yusini putabumaki. Israelbu jau Dioskidi chakabuxanunbun Balaamin nawa xanen ibu Balac yusinchakakin yuikin: Jatu beyusmakin yushin dami kenwanti betsa nami inanshinabu jatu pimaxanwen, ani inun matun bake chipashbe jatu chutanamemati jatu shinanmaxanwen, ani jaska jeneabumaki. ¹⁵Ja dikabi jatiditun Pérgamo anuxun Nicolausin jatu yusinchakani chibankin putabumadiki. ¹⁶Man jatidi jaskabia Dios man chibankatsis ikaidan, matun chakabu jenetan matun shinan betsa

watan Dios anu bedikanwen. Tsuada jaskabumaken samama jatu anu kaxun jabun chakabuwaibu kupikin na en nupe chaipa en jaxpanu en tukuanwen en jatube detenamei kaxanaii.¹⁷ Man pabinkiyabunan, Yushin Pepatun ja man ichamisbu matu yuiai ninkakanwen: Tsuabunda ea dananma jabun maemakin binumisbudan, pewen kupikin misi naiudia Diosun junemis en jatu pimaxanaii, nai anu unanuma ebe jatu jiwemakinan. Ja inun, kena bena nenkati juxupaki jatun kena nea en jatu inanxanaii. Ja jabun biaibun besti ja kena unanxankanikiki, tsua betsan unantidumadan”, ea waxu en matu kenexunaii.

**Tiatira anuabu kene jatu
bumanikiaki, na janchadan**

¹⁸ Ana Jesúsun ea yuikin: “Jatun Diosun jancha yuinika Tiatira anu ichamisbu mekeka na jancha en mia yuiai kenexundiwe: ‘En Diosun baken, na en bedu chi jede chaxa keska inun na en tae mane tashipa betsa jawen kena bronce denke denke aka chaxajaida keskayatun en matu yuiai ninkakanwen.¹⁹ Jaska matun shinan pepa jayaxun ea chibain man jiwekunkainai en unaiin. Jaskaken nuinamekin ea ikunwain chintuanma ea chibankin ea duawanun, iwanan, jamapai betsa betsapa pepa man akin taewani man binumai en unandiaii.²⁰ Man jaskabiai eska besti matu anu jayaki. Ja ainbu man Jezabel wamis jatun chakabuwaikidi man nemaisma ja bestikidi matu yuinun ninkakanwen. Ja Jezabelin matu padankin yuikin: Eandi Diosun jancha en yuimiski. Ea ninkakanwen, matu watan man en tsumabu bestibu matu ichawaxun yusinkin yuikin: Ainbu min ainmabe min chutanameadan, peki. Juni min benemabe min chutanameadan,

pediki. Jamapaibe chutanameadan, pediki, akin pitikidi matu yuikin: Ja yushin dami betsa kenwanti nami inanmisbu man piadan, jawa chakabumaki, iwanan, matu padankin matu chakabuwaibainmiski.²¹ Jamen jau Jezabelin jawen chakabu jenekin jawen shinan betsa wanun ixun en manakabia shinan betsa wakatsi ikama jawen kemu chutanametikidi jenekatsi ikamaki.²² Jaskaken kupikin en isin chakabu tenemaxanaii. Ja inun, ja ainbu Jezabel inun dasibibun ja chibain jabe chutanamei atimapamisbun en yusian danankin jamapai chakabuwen kemumisbu bikajaida en jatu tenemaxanaii, jabun jawen yusian dananbumadan.²³ Ja inun, ja ainbun jancha ninkamisbu tenankin en jatu yamawaxanaii. En jatu jaska waya dasibibun shinan inun jabun jointi en unanjaidamis jabun ea ikunwankin chibanmisbun chanimba unanxankanikiki. Ja inun, jatidibun jaska jiwea bechipaimisbu unantant pepabu pepawen jatu kupikin chakabubu chakabuwen en jatu kupixanaii.²⁴ Jamen Tiatira anuxun ja ainbun yusian danankin Satanásan shinan junea jawen kushipawen dayanun ixun jatidibun man unankatsi ikabumadan, man peken matukidi en ana jancha jayamaki.²⁵ Jakia na besti matu yuinun ninkakanwen. Diosun yusian man jaya ja chibankin jenepakeyamaxankanwen, en ana juuyuxanaidan.²⁶ Tsuabunda ea dananma chakabu maemakin binumisbudan, jawa jeneama jaska en bechipaiai apakemisbudan, janu en ana juai anu en jatu xanen ibu wakin kushipa waxanaii, jau nawa xukuabu mekenunbunan.²⁷ Jaska en Epan ea yunua en jabe xanen ibumis keska wakin xanen ibukin ea chibankubainmiski jatu mekebiabu

en jancha ninkaisbuma mane mestenti tsumaxun man jatu yamawaxanaii, jaska mai kenti wamistun jawen kenti chakabu pusamis keska wakinan.²⁸ Ja dikabi pena bishi chaxamis keska en matu inanxanaii.²⁹ Man pabinkiyabunan, Yushin Pepatun ja man ichamisbu matu yuiai ninkakanwen”, ea waxu en matu kenexunaii.

**Sardes anuabudi kene jatu
bumanikiaki, na janchadan**

3 ¹Ana Jesúsun ea yuikin: “Jatun Diosun jancha yuinika Sardes anu ichamisbu mekeea na jancha en mia yuiai kenexundiwe: ‘Ja 7 Diosun Yushin en jaya inun ja 7 bishi en tsumaxun en mekeatun en matu yuiai ninkakanwen. Jaska man jiwxun jatu kaka jawendua ninkamabiai uke medan man mawa keskabu en matu unaiei.

²Janua jaska Diosun matu shinanmakin jawen jancha matu chibankin makatsis ikai chibankin man keyudiamajaida unankin matu yununun ninkakanwen. En jancha unanajaidabiakin man akin pewamaki. Ana chibanma man jakimakin man ma jeneaii, mawai keskaidan. Man tsuabuda jaskadan, uxu bestein keskatan matun juintinin shinan mesterwantan ana en Dios chibankajidakubainkanwen.³ Januxun Diosun jancha yusinanbun matu yusianbu man ninkani shinankanwen, shinan betsa watan ana chiban taewakanan. Jamen man ea ninkakatsi ikabumaken yumetsu june jumis keskai man ea manachakaya jatiada eadi june juxun en matu datetushixanaii.

⁴Jabiaskabiaken jatidi Sardes anuabun jawa chakabuwakin man kaneisbumaki, matun tadi detsis keska wamadan. Jabudan, ebetan tadi juxupa sawea ebe mapuxankanikiki, jaska jabu pepakin binumisbudan.⁵Tsuabunda ea dananma

jabun maemakin binumisbudan, tadi juxupa sawexankanikiki. Ja dikabi jatun kena Diosun jiwemati una anua en tede akama ixanaii. Januxun en Epa inun jawen nai tsumabu bebun jatu nichintan en jabu jatu unanmaxanaii.⁶ Man pabinkiyabunan, Yushin Pepatun ja man ichamisbu matu yuiai ninkakanwen”, ea waxu en matu kenexunaii.

**Filadelfia anuabu kene jatu
bumanikiaki, na janchadan**

⁷Ana Jesúsun ea yuikin: “Jatun Diosun jancha yuinika Filadelfia anu ichamisbu mekeea na jancha en mia yuiai kenexundiwe: ‘Ea en medibi inun en chanimajaida David kushipa ini keska binua jawen bepenti shabi en jayaki. Tsuanda ja mae bepean tsuan beputiduma inun ja mae bepua tsuan bepentidumaki. Jaska mekeatun en matu yuiaii.⁸Eanan, dasibi man akubainai en unaii. Uinkanwen. Matu bebun matu anu beputi bepenmana keska jawa tsuan matu beputiduma en matu bepenxunaki. Jaskawen taea man chintuanma en jancha chibankin man kushipa midin jayabia eki dakeama jatu yuikin: En Jesúsunabuki, man imiski.

⁹Ja inun, judiobu betsabu jaska Diosun bechipaiai akamabia janchawen besti yuikin: Nun judiobuki, ibiakin Satanás chibankin jaska bechipaiai axuin jiwenisbu judio kayabibumadan, en matu bechipajaidamis jau unanunbun jatu babu watan matun tae naman en jatu danti imaxanai manayukanwen.

¹⁰Ja inun, ichakanikatun mai jidabi anu dasibi maniabu jatu bika tenemakin ichakawayra man Filadelfia anuabun en yusian jancha chibankin jawa man jeneismaken matu medabewakin jawa putama en matu kekekubainxanaii.¹¹ Ja inun, matun pepa jawen kupiti jau tsuan matu bianbainyamaxanun en yusian

shinankin chibankin jeneyamakanwen, en samama ana chintunkidanxanaidan.
¹²Tsuabunda ea dananma jabun maemakin binumisbudan, janu en Epa Diosun jiwe anu jawen chibu betsa keska tsuan betseketeduma keska en matu waxanaii. Janua man jani ana kainbainama inunbadiaii. Jaska inun, en Epa Diosun kena matuki kenekin netankin jawen mae Jerusalén Bena ja mae nai anua butuxanai jawendi matuki kenekin netankin en kena benadi en matuki netanxanaii. ¹³Man pabinkiyabunan, Yushin Pepatun ja man ichamisbu matu yuiai ninkakanwen”, ea waxu en matu kenexunaii.

**Laodicea anuabu kene jatu
bumanikiaki, na janchadan**

¹⁴Ana Jesúsun en Juan ea yuikin: “Jatun Diosun jancha dayaxunika Laodicea anu ichamisbu mekea na jancha en mia yuiai kenexundiwe. ‘Dasibi Diosun jakidi yuiai en Jabiaskaki, imistun mai jidabi inun nai jidabi damiwakin ewen Diosun ani chanima jancha besti chanii en kaneismatun en matu yuiai ninkakanwen.

¹⁵Man ea chibanjaidama inun ea dananjaidakubainama man shinan bekaxnaibu en unaiin. Jaskatimaki. Tsuabunda ea chibankatsis ikin jau ea chibar kayabinunbunwen. Jakia tsuabunda ea chibankatsis ikabuma danankin jau ea jene kayabinunbunwen.

¹⁶Jamen tsuabuda ekidi shinan bekaxnadabei maniabuwen taexun

janain keskakin en matu putaxanaii.

¹⁷Jaska inun, matumebi shinankin yuikin: Mabu ichapa jaya pei ichapa jaya dasibi en jayaki, ikin man shinanbiakin en yusian shinankin man chibankumawen taea man ibubis nuitkapi jawa jayama bekun tadiuma keska man jiwekunkainaii. ¹⁸Jamen

tsuabuda man pepakatsis ikaibu matu yusinun ninkakanwen. Dasibi pepa jas man jayakatsis ikaidan, oro chiwen kuakin jas wa man bikatsis imis keskakin en yusian kayatapia ea anua bikanwen, jawen kemutapatidan. Ja inun, matun yuda man jawen dakeai junenun ixun tadi sawea keskakin matun chakabu ea buamanun ixun tadi juxupa ea anua bia keska wakin matun chakabu jenetan ea chibankubainkanwen. Ja inun, uin pewanun ika bedu daunwen ika keskakin en yusianwen matu kaya watidu ea anua bidiakanwen. ¹⁹Ja inun, dasibi man enabuwen nuikin matu medabewa bestinun ixun jancha kushipawen matu ja akin en matu yusinxuwen taexun en yusian ninkakin pewatan matun shinan betsa watan shinan chankajaida bestikunkainkatsis ikidan, Dios anu bedikanwen. ²⁰Uian. Matu tibi jaibuwakatsis ikin matun beputi keska matun juinti anuxun ean en matu kenakin akawai. Tsuanda en jui ninkatan ebe jaibunamekatsis ikin beputi keska matun juinti man ea bepenxuna matun jiwe anu jikitan en matubetan pikatsis ikaii. ²¹Tsuabunda ea dananma jabun chakabu maemakin binumisbudan, jatu manakukin ea dapi tsaukin en jatu xanen ibumaxanaii, jaska ean en binu keyuni en Epa dapi tsaua en jabe xanen ibuni keska wakinan. ²²Man pabinkiyabunan, Yushin Pepatun ja man ichamisbu matu yuiai ninkakanwen”, ea waxu en matu kenexunaii.

**Nai anuxun Dios kenwainbu
Juanen uinikiaki, na janchadan**

4 ¹Jaska ninkashina inun jati uinxu naiudi besuxun beputi bepean uintan jui trompeta mimawati kushipa keskawen jawen dukun Jesúsun janchai en ninkashina ana jabianwendi ea jancha

wakin yuikin: "Ea anu inayuwe, min inaken jaskadada ana betsa betsapa inunbadiai en mia uinmaidan", ea watan ²jawaida ea betsa watan en yushinki dasitan ea uinma nai anu inaxun en uinxu matu yuinun ninkakanwen. Jadi Xanen Ibu jaki tsautiki nukun Epa Dios tsaua en uinxuki. ³Ja tsaua jawen yudadan, diamante keska kasmal rubí keska nenkati kadujaida chaxajaida bakamana bakamana ikaya jawen tsauti keskuauana namakis nawan bai tapia esmeralda nenkati nanketapa keska chaxa chaka ikikiki. ⁴Janua Dios xanen ibu jaki tsauti anu 24 tsauti betsa janu sedebauna uinkin 24 mekenikabu jabu jaki tsauabu tadi juxupa sawea xanen ibun oro mane maiti maiabu en uiyanan ⁵Dios janu tsaua anua kana bakatan tin ikaini danka ikainaya Diosun besuudi jawen medabenan yushin 7 nanopadina bin dekua nichinbauna chaxa keskabuki. ⁶Jaska inun, tsauti besuudi ianenwan bexnanjaida bakamanaya ja dapi jiweabu dabe inun dabe ja tsauti anu mapubauna jabun besuudi bedu sankan daka inun jatun pechiudi bedu pesankan dakabu ⁷ja dukun inu ewapa betsa jawen yuda león keska ja kachu ina awa bake keska ja kachu betsa junin besuya keska ja kachu betsa tete ewapa nuyai keska ⁸jatibu 6 punyan peiya jabun yuda jidabi jawen bedunati chaxa dakabun badidi inun meshu medan Dios kenwakin jabun jeneisbuman yuikin:

"Min pepajaidaki.

Min dasibi kushipa binuaki.

Mai jayadiama nukun Xanen Ibu
Dios

dasibi kushipajaida jiwea jaya inun,
natian jiwekunkainai inun,
ana min butuxanai nun unaai", ikin

⁹Dios niti ikama jiwea ja dabe inun
dabe jiweabun jamapai pepa jakidi
shinankin jawen pepakidi yuikin

kenwainbun ¹⁰ja 24 mekenikabun kenwandiakin danti ixun xanen ibujaidawakin jabun jatun oro mane maiti mabikitan inankin jawen tae naman manchintan yuikin:

¹¹ "Dasibi damiwakin
min shinanwen jamapai dasibi min
damiwani
min nukun Xanen Ibu inun
min nukun mekenika yushin Dioski.
Jaskawen taexun mia besti
kenwakin
nun mia duawakubainaii",
akaibu uinkin en matu kenexunaii.

**Chaxuan baken una sebi keneya
chudenikiaki, na janchadan**

5 ¹Januxun en ninkaya una sebi kene
dabeya uke medan inun bemaki
keneya 7 jawen tsamia tsuan june
mekin bepentiduma inun chudediam
unantiwen tsami dakabidana Dios
jawen tsautiki tsauxun jawen meken
yusiudiawen tsuma en uiyanan ²nai
tsuma kushipatun uinbaunkin jui
kushipawen jabu yukakin:

"¿Tsua pepa kushipajaidatun atidumen?
ja una tsamia tibi daxnukin jatun
chudeaidan", jatu wa ³jakia nai anu inun,
mai anu inun, janu mawabun yushin
maniabu anu tsua pepajaida jayamaken
tsuan chudexun uintidumaken

⁴chanima tsua pepa kushipa juxun
chudexun uintidumawen taea nui en
kaxajaidaya ⁵mekenika betsan ea yuikin:

"Kaxayamawe. Xanen ibu Davidin baba
betsa ja Judán baba yuinaka dasibibun
xanen ibu inu betsa jawen kena león
nun dabimis pepa kushipajaidakin jak
sinataibu maemanitun ja unanti tsamia
tibi jatun daxnu daxnu akin keyutan ja
una chudetiduki. Manayuwe", ea waya

⁶januxun Dios tsaua nashui ika
namakis ja jiweabu dabe inun dabe
mapubaunabu inun jabianudi ja 24

mekenikabu tsaubaunabu anu ja namakis nashui ika chaxuwan bake jawen yuda chachinibu mawa keska nia 7 maxunyan inun 7 beduya en uinxuki. Chaxuwan bake jawen 7 bedudan, ja jawen yushinwen mai jidabi anu Diosun jatu yusinmakubainaidan, jaska en uinxuki. ⁷Januxun chaxuwan bake ja Dios janu tsau anu kemaxun jawen meken yusiudi anua una sebi bitan tsumaken ⁸janua benimajaidakin ja jiweabu dabe inun dabe inun ja 24 mekenikabun jatun mimawati betsa jawen kena arpa inun oro mane kencha ni pei ininti ja kuaxunti keska mata jaska jawenabu Diosbe janchamisbu tsumaxundi jabu dasibibun chaxuwan bake kenwain jaki danti itan ⁹dasibibun nawati bema juiwen nawakin yuikin:

“Min pepajaidaki.

Mawakin min jimiwen yuda xukuabu tibi anua inun,
nawa tibi anua inun,
jancha tibi anua inun,
mai pakea tibi anua Epa Dios
bixunkin jawenabu jatu wakin
¹⁰Diosbe janchaxunikabu min ma jatu waniki.

Diosbe janu xanen ibuxanaibu jatu wanixun

mai anua jabu xanen ibuxankanikiki.
Jaskaken mian besti Diosun una
bixun min chudetiduki.

Min pepajaidaki”, akaibun

¹¹januxun ana uinkin en ninkaya ja jiweabu inun ja mekenikabu inun nai tsuma midimajaida Dios xanen ibu jaki tsauti dapi manibaunabun ¹²jancha kushipawen jabun yuikin:

“Chaxuwan bake keska deteabu ana besteni pepa kayabidan, jatun besti bitiduki, kushipadan, pepa tibidan, unanepajaidadan, xanen ibu kushipadan.

Duawai shinan chankain
benimawakin nun ja kenwaii”,
ikaibun

¹³januxun ana en ninkaya ja dasibi
Diosun damiwakin jatu jiwemani nai
anuxun inun, mai anuxun, inun mawabu
yushin bumisbu anuxun, inun ianenwan
anuxundi jabun kenwandiakin yuikin:

“Ja Xanen Ibu jaki tsauti anu tsauta
inun
chaxuwan bake jatu duawakin
shinan chankanwankin
jawen benimawatiwen jau xanen
ibujaida wakubainunbunwen, niti
ikamadan”, ikaibun

¹⁴ja jiweabu dabe inun dabebun
jabiaskadi shinankin kemakin:
“Jabiaskaki”, idiaibun ja 24 mekenikabu
danti iki beti itan kenwandaibun

**Ja dukun 4 jawen unanti
tsamia Jesucriston daxnukin
taewanikaki, na janchadan**

6 ¹januxun Diosun chaxuwan baken
jawen unanti ja dukun tsamia
daxnuaya ja jiweabu dabe inun dabe
betsan jawen jui tin ikainkainai keskai
uinkin en ninkaya jatun yuikin: “Juwe”,
akai

²en uiyanan janua caballo juxupaki
tsuada kanunyan katsaua xanen ibun
maiti betsa Diosun inan maia junibube
detenamekin binumakin jatu maema
akeakebaini kaken

³januxun Diosun chaxuwan baken
jawen unanti tsamia ja segundo
daxnuaya ja jiweabu betsan yuikin:
“Juwe”, akai ⁴en uiyanan janua caballo
beta tashipaki tsuada betsa jaki
tsaukainkin kushipa bibainkin jau
mai jidabi anu tsuabuda ana unanuma
jiweama janubi jau detenamebaununbun
nupe chaipa inantan yunua kaya

⁵januxun Diosun chaxuwan baken
jawen unanti ana ja tercero tsamia

daxnuaya jiweabu betsan kenakin yuikin: "Juwe", akai en uianyan janua caballo betsa meshupa tsuada betsa jawen xankama unanti tsuma jaki tsaua ⁶ja jiweabu dabe inun dabe anua ja jancha kainmakin yuiai en ninkaya: "Piti yama tukantian xekiwan ja misi wati kilo bestichai jawen kadu xekamakin xaba bestichai daya pei wakubainwen. Ja inun, misi wati betsa cebada pe bexmas kilo dabe inun besti jawen kadu xekamakin xaba bestichai daya pei wakubainwen. Jakia piti xeni inun uva vino ana kadu wayamakubainwen", aka kaya

⁷januxun Diosun chaxawan baken jawen unanti ana ja cuarto tsamia daxnuaya jiweabu betsan yuikin: "Juwe", akaya ⁸en uianyan janua caballo betsa pashin bexunaki tsuada betsa jawen kena Mawamanika jaki katsaua inun janu mawabu bumisbu jabun xanen ibu jachun juai en uianyan Diosun mai jidabi anuabu yudabu xukua tibi jabu anua paxka akeakekin ja dabe xanen ibu watan ja cuarta parte jatu inankin kushipa wakin yunukin nupewen jau detenamenunbun inun, buniwen jau tenanmanunbun inun, isin betsa betsapawen jau tenanmenunbun inun, yuinaka pubenbun jau jatu pimanunbun ja kushipa inan bibainaya

Ja quinto inun sexto jawen unanti tsamia Diosun chaxawan baken daxnuniaki, na janchadan

⁹januxun Diosun chaxawan baken jawen unanti ja quinto tsamia daxnuaya jabun Jesús ikunwankin Diosun jancha Jesúskidi yusinkubaini bika betsa betsapa tenebiai chintuanbuma jatu tenanbu chi tapu januxun Dios kenwankin inankuinti januxun kuamisbu anu ja naman ja pepabun yushin datanbu en uianyan ¹⁰jabun

jancha kushipawen yuikin: "Min nukun Xanen Ibu binu keyua medibi min chanima kayabiki. Jaskaken mai anuxun jabun nuku tenanibudan, ejatian min jatu unanti watan jatu nuku kupixunxanai?" akabu

¹¹yushin datanbu Diosun jatu yuikin: "Matudan, juindukunyukanwen. Ikismaki. En tsumabu betsa matu keska ea dayaxunmis jabudi jau tenanyununbunwen. Jabun matu tenanmis keskadiwakin en jatu kupixanai manayukanwen", itan jabu tibi pepawen kupikin tadi juxupa chaipa jatu inankin sawemakin keyuya

¹²januxun Diosun chaxawan baken jawen unanti ja sexto tsamia daxnuaya en uianyan pacha sakujaidai badi nukai meshua tadi meshupa keska dakaken uxedi jimi keskai tashia dakaken ¹³janua niwe bidenepan ji bimi jushindiamma nidi amis keskai bishi tsekebidani mai anu nidi iake iakeaibun ¹⁴janua nai yamakaini una sebiki ikaskainaya mati inun jene anu mai natukan maeakei xekekaunaya ¹⁵janua mai jidabi anua xanen ibujaidabu inun, soladobu xanen ibubu inun, mabuwanyanbu inun, yuda kushipabu inun, dasibi jatun jatu dayaxunmisbu inun, yuda tsuan tsumama dasibi jatibu datei mai tanpe inun mishkipanwan mati janu junenun ika buxun ¹⁶jaki junenun ixun mati inun mishkipanwanbu yuikin: "Janu kopi ma jua tsuan nematidumaki. Epa Dios jawen xanen ibun tsautiki tsaua inun jawen bake chaxawan bake nukuki sinataiwen taea nuku junei nukuki di idikanwen. ¹⁷Ma ja xaba janu Diosun jatu kupiaitian ma jua tsuan ana nematidumaki", akeakeaibun

Diosun bebunkidi jawenabu katuni jawen nai tsumabun jabu unanti wanikiaki, na janchadan

7 ¹ja binukainaya januxun ana uinkin nai tsuma dabe inun dabe mapua

akeakeabu en uiyanan betsa badi juaikidi este anu nia betsa badi jikiaikidi oeste anu nia betsa norte anu nia betsa sur anu nia jabun niwe dasibi tsumaxun nemakin mai inun ianenwan inun ji mapua jau niwe janu xunku ikin jau ichakawayamayununbun ²janua nai tsuma betsa badi juaikidia estekidia jukin nukun Epa Dios jiweatun jawenabu unanti waxunti jayatun jui kushipawen ja nai tsuma dabe inun dabe jabu kushipa mai inun ianenwan daunti jayabu jatu ³yuikin: “Meyamayukanwen. Diosun tsumabu jabun betunkuki netankin jabu Diosunabu nun unanti wadiamaken mai inun ianenwan inun ji mapua ichakawakin daunyamayukanwen, Diosunabu jau mawayamayununbunan”, jatu wa

⁴ jaska wakin 144,000 Israelin 12 juni bakebun bababu xukuabu Diosun jawenabu jawen betunkuki jawen unantiwen unanti wakin yuda betsa betsapabu katukin

⁵ Judán bababu 12,000 jawenabu wakin unanti netankin Rubénén bababu 12,000 jabiaskadi wakin Gadin bababu 12,000 jabiaskadi wakin

⁶ Aserín bababu 12,000 jabiaskadi wakin Neftalín bababu 12,000 jabiaskadi wakin Manasésin bababu 12,000 jabiaskadi wakin

⁷ Simeónen bababu 12,000 jabiaskadi wakin Levín bababu 12,000 jabiaskadi wakin Isacarin bababu 12,000 jabiaskadi wakin

⁸ Zabulónen bababu 12,000 jabiaskadi wakin Josén bababu 12,000 jabiaskadi wakin

Benjamínen bababu 12,000 jabiaskas wakin
Diosun jatu unanti wakin katumai en ninkaxuki.

Nai anuxun jati tsuan tanatidumabun tadi juxupa saweabukidi yuinikiaki, na janchadan

⁹ Januxun ana uinbaunkin yudawan jati tsuan tanatiduma en uinxu matu yuinun ninkakanwen. Nawabu mai pakea tibi anuabu inun, yuda betsa xukua tibi anuabu inun, dasibi jancha tibi anuabu inun, mae tibi anuabu Dios xanen ibu jaki tsauti inun chaxuwan baken besudi jabu nixun tadi juxupa chaipa sawexun xenpan tsuma nixun ¹⁰jui kushipawen jabun yuikin:

“Nukun Epa Dios xanen ibu jaki tsauti anua inun jawen bake chaxuwan bake nukun meketidan, jabuanuaki”,

ikaibun ¹¹dasibi Diosun nai tsumabu inun, jabu jiwea dabe inun dabe inun, ja 24 mekenikabu jatibu xanen ibun tsauti anu mapubaunabu Diosun besuudi main beti ixun kenwankin ¹²yuikin:

“Nukun Epa Dios unanepa Xanen Ibu kushipajaidaki.

Benimawakin jawenduawakin kenwankubainankawanen, niti ikamadan.
Jaskakidan”,

ikaibun ¹³januxun mekenika betsan ea yukakin: “Na tadi juxupa saweabudan, ɿtsuabumen? ɿJania beabumen?” ea wa ¹⁴kemakin: “Xanen ibuu, min mian unaiin”, en wa januxun mekenikatun ana ea yuikin: “Chanimaki. Ichakawanikatun yuda dasibi mai jidabi anuabu bikawakin jatu nuitapawaya yudabun jatun chakabu jenekin jabun tadi detsis keska chaxuwan baken jimiwen chukakin jabun detsis yamawakin jabun tadi juxu pejaidawabuki.”

¹⁵ “Jesúsun jaska wakin na
mapubaunabu jatu pepawa
Dios xanen ibu jaki tsauti anu
manixun
meshu medan inun badidi Dios janu
jiwe anuxun
duawakubainaibu Diosun jabu
mekekubainxanikiki,
shinan chankainbudan.

¹⁶ Jadia ana nuitapai buni unpax
manui ikama inun,
badin ana jatu kuama inun,
xana bakakin ana jatu bikawama
ixankanikiki.

¹⁷ Ja inun, chaxuwan bake Dios xanen
ibu jaki tsauti namakis niatun
unpax paisma pejaida chacha jene
jawen jiwemati jaya anu jatu
iyuxun amai
jatun mekenan ixanikiki.
Januxun ja kaxamisbu
Diosun jatun bedu beun jene dasibi
taxka waxanikiki”, ea wa

**Jawen jenekin séptimo tsamini
daxnuniaki, na janchadan**

8 ¹januxun Diosun chaxuwan baken
ja séptimo jawen unanti jawen
jenekin tsamini daxnuaya janua Diosun
mae anua dasibi media hora nishma
dakatan binukainaya

²januxun ja 7 nai tsumabu Diosun
besuudi mapuabu jabu tibi mimawati
trompeta jatu inain en uiyanan ³nai
tsuma betsan oro mane kencha tsumatan
Dios kenwakin jawen inankuinti janu
janati tapu anu Dios xanen ibu jaki tsauti
besuudi ka nia jabun Dios kenwainbun
jancha duapa inintibe jusixun janu
kenwanti tapu anu jau manchinun ni pei
ininti pepa ja bechipaimis ichapa nai
tsuman inan ⁴bixun nai tsuman jawen
mekenki tsumaxun ja ininti inun ja Dios
yukamisbu chi deken matsistua menui
jawen kuin inin pejaida inabainaya

ikunwainbun jancha duapa Dios
yukamisbu ja kuinyanbi jusia inadiaya
⁵januxun nai tsuman oro kencha ana
tsumaxun chi deken janu kenwanti
tapu anua beakin mata waxun mai anu
udenkin sa aka jadia kana baka baka
itan tin ikainkaini pacha sakuya

⁶januxun ja 7 nai tsumabu jabiatitundi
trompeta jabun mimawati mawanun,
iwanan, tsumabun

**Cuatro trompeta mawakin chan
anibukiaki, na janchadan**

⁷ja nai tsuma betsa ja dukun primeron
jawen trompeta chan akin taewaya mai
pakea tibi anu nidi iake iakekaunkin
badux ui inun chi ja dabe jimiyabi jusia
Diosun puta mai pakea tibi anu kuakin
ja pakea betsa anu kauankin ni inun ni
maxu tercera parte kuakin basi nanke
dakayabi dasibi kuaken

⁸januxun nai tsuma ja segundon jawen
trompeta chan akaya tsuanda ianenwan
jatiubukuns watan pake dabe inun besti
jabiatibus waken mati ewapa menuai
keska ianenwanu Diosun puta pukukin
ianenwan pakea betsa jimiwaya ⁹ja
jabias pakea ianenwan medan jiweabu
mawaibun ja pakea anu xaxuwan
nexeabudi mushi mushi ikaya

¹⁰januxun nai tsuma ja terceron jawen
trompeta chan akaya jene inun chacha
mai pakea betsa tibi anu bishiwan jede
ji iki bin dekua keska chaxajaida nai
anua kauani tercera parte mai anu
inun jene betsa anu inun chacha anu
tin iki kauanaya ¹¹ja bishiwan jawen
kena Muka mai anu tin ikin mai pakea
tibi anu jene tercera parte unpax
mukajaidawaken yuda ichapabun ja
unpax aki mawaibun

¹²januxun nai tsuma ja cuarton jawen
trompeta chan akaya tsuanda badi inun
uxe inun bishi jabun chaxa kushipa
jatiubukuns watan pake dabe inun besti

jabiatibus waken nai tsuman pakea betsa ichakawakin xaba betsa tibi badi nukawakin meshu tibi uxe inun bishi nukawakubainaya

¹³januxun ana uinkin en ninkaya tete ewapa nai natukanu nuyakauankin junin jui kushipa keskawen yuikin: “Juaai, juaai, nai tsuma dabe inun bestitun jabun jatun trompeta jawaida chan akaya dasibi na mai anu jiweabu nuitkaapai yumanxankanikiki”, ikaya

Quinto nai tsuman jawen trompeta mawakin chan anikiaki, na janchadan

9 ¹januxun ja quinto nai tsuman jawen trompeta chan akaya bishi keska mai anu kauani tin ika en uiyanan mai kini keyatapa xankinajida janu yushin chakabu jiweabu anu jawen bepent shabi ja bishi keska Diosun nai tsuman inanken ²bishi keskatun jawen kini bepeanyan janua chi kuin midima bai ewapa kua keskai meshu tuenabainkin badi inun nun jawen juinsinamis meshu waya ³kuin puebainai nakui shininwan midima mai anu pai butuabu nibu keska wakin Diosun jatu paepawakin pubenwankin ⁴yunukin: “Mai anuxun basi piama jamapai miban shadabu piama ji piama yudabu jabun betunkuki Diosunabu jawen unanti netanbuma besti pikin jatu ichakawakubaintankanwen, ⁵cinco uxe jatu isin tenemabiakin tsua tenanmadan”, jatu wa buxun yudabu ichakawakin nibu keskakin jatu pikin jatu isinjaida tenemakubainaibun

⁶ja jatu jaska waitian yuda midimabu isin tenei mawakatsis ibiajunti xukubiai mawabuma ixankanikiki.

⁷Ja shinikidi matu yuinun ninkakanwen. Jabun yudadan, caballo jawen detenametanun ixun pewamisbu keska inun, xanen ibun oro mane maiti maia keska inun, jabun besu juni

kuin besu keskaki. ⁸Ja inun, jabun bu ainbun bu keska inun jabun xeta inu puben leónen makuxpi chaipa keskaki. ⁹Ja inun, jabun yuda achimati mane kushipajaida sawea inun jabun punyan peiwen nuyai caballo midimatun jawen tadanbaintiwen tadanbainkin detenameaibu iyui banabainaibu keskabuki. ¹⁰Ja inun, jabun jina nibu jina keskawen yudabu pikin jatu chakabuwa uxe meken bestiti isin tenekubainxankanikiki. ¹¹Ja inun, shinin xanen ibudan, ja kini keyatapajaida jatun yunumis nai tsumaki. Jawen kena hebreo janchawen Abadónki. Ja inun, jawen kena griego janchawen Apoliónki. Ja inun, jancha kuinwen kenadan, Yamawanikaki.

¹²Janua ja dukun mesejaida atimapa keyukainaya janua dabe taxnidiana jayayuaki.

Sexto nai tsuman jawen trompeta mawakin chan anikiaki, na janchadan

¹³Ana ja sexto nai tsuman jawen trompeta chan chan akai en ninkaya Diosun besuudi ja Dios kenwanti oro mane tapu anu ja dabe inun dabe dexun tibi jaki mani chimei chankan tsamia anua jui taxni janchakin ¹⁴ja nai tsuma trompetaya yuikin: “Ja nai tsuma dabe inun dabe jenewan Éufrates dapi nexea pekatan jatu nichindiwe”, aka ¹⁵jaska was ja nai tsuma dabe inun dabe jatu peka mai jidabi anu yuda tibi manibaunabu jau na jabia hora inun, dia inun, uxe inun, año tercera parte jau jatu tenan atanunbun nai tsuma betsan ja nai tsumabu dabe inun dabe jatu nichian taxnibainaibun ¹⁶jabun soldadobu cabalokki katsaunabudan, 200.000.000ti yuikanxu jaskaxanaibu en matu kenexunaii.

¹⁷En nama keskatan jaska en uinxu inun jaska en ninkashina matu yuinun

ninkakanwen. Juni tibitun jawen xuchi achimati mane tashipa chi keska inun, nanketapa jacinto keska, inun pashinipa azufre keska saweabun jabun caballo buxka inu león buxka keska jayabun jawen jaxpa anua chi inun, kuin inun, azufre pashinipa kui taxnibainaya¹⁸ dabe inun besti pakea anu yudabu ja dabe inun besti isin chakabu ja caballo jaxpa anua kainkainkin chi inun, kuin inun, azufre kainkainkin jatu tenan keyukan¹⁹ ja caballo jawen jina dunu keskaki, jawen jina inun, jawen dekin inun jawen xeta paepawen yudabu jatu chakabuwaidan.

²⁰Jakia ja yuda texeabu isin chakabuwen jabu mawabuma jabun chakabuwakubainkin jeneama yushin chakabu kenwankin jeneabumadiki. Ja inun, yushin dami betsa oro mane inun, plata mane juxupa inun, bronce mane tashipa inun, mishki dami inun, ji dami ja dami betsa betsapabun uintiduma inun, ninkatiduma inun, maputiduma kenwankin jeneabumaki. ²¹Ja dikabi detenamei jeneabuma inun, yushin chakabun xuun itiwen daunananin jeneama inun, juni inun ainbu betsa betsapabube chutanamei jeneama inun, yumetsui jeneama chakabupakexanaibu en Juanen jaskaxanaibu en uinxuki.

Una pishta sebi bepemana nai tsuman benikiaki, na janchadan

10 ¹Janua nai tsuma kushipa betsa nai anua butuai en uinxu matu yuinun ninkakanwen. Jawen yuda nai kuinen yabua inun, jawen buxka nawan bai tapia keska inun, jawen besu badi keska chaxa inun, jawen bikedan chi deken keskaki. ²Ja inun, una pishta sebi bepemana tsumabidana jawen tae chishabukuntan jawen tae yusiudi ianenwan bepaia inun jawen tae yusmaudi maiki paiaki. ³Ja nai tsuma

sai iki inu león pubein tekeden imis keskai jui kushipawen sai iken janua 7ki jui taxni tin ikainkaini keska en ninkashinaki. ⁴Jawenchains 7ki denke iki betsa betsapai jancha ninkatan jawen jancha kenenun ixun en pewaya naiudixundi jui betsawen tsuanda ea yuikin: “Ja jawenchains ja 7ki den iki betsa betsapai min ninkabiaxudan, ja keneama junewe, tsua yuiyamadan”, ea waya

⁵janua ja nai tsuma ianenwan bepaia inun mai anu paia jawen meken yusiudi naiudi sanantan ⁶ja jiweibi jiweni jiwea jatun nai wani inun mai wani inun ianenwan wani dasibi jabu jawen jiwebaunabu jakidi jancha betsa watimakidi yuikin: “Badi jawen jeneidan, jatixun bestiki. ⁷Ja 7 nai tsumabu jawen jenea séptimon jawen trompeta chan akaya Diosun tsumabu jawen jancha yuixonikabu jaska inunbadiaikidi Dios june yubakapauni ma jatixun besti menexanikiki”, ikaya

⁸ja jui nai anua taxniai en ninkashinatur ana ea yuikin: “Ja nai tsuma jawen tae betsa ianenwan bepaia jawen tae uke betsa maiki paitatun una pishta sebi bepemana tsumaki nukuxun mebinwen”, ea wa ⁹kaxun yuikin: “Ja una pishta sebi bepemana min tsumadan, ea inanwen”, en aka ea yunukin: “Naki, pidiwe. Min pia min jana buna bata keska ibiatan min jatu mukajaidaikiki”, ea wa

¹⁰ja una sebi pishta nai tsuman tsuma mebintan en pia en jana buna bata keska batabiakaini en jatuki nanekin muka wabainaya ¹¹januxun nai tsumabun ana ea yuikin: “Diosun mia ana yunuaidan, mia yuinun ninkawe. Mae betsa betsapa anu jiweabukidi inun, nawa mai pakea betsa betsapakidi inun, jancha tibi janchaibukidi inun, xanen ibu kushipajaida betsa betsapakidi jawen

jancha bena xabakabi jatu kenexunkin jaska Diosun jatu jaska waxanai jatukki chanidiwe”, ea wa en ninkaxuki.

11 ¹Januxun jawen mestenti tanati tawa mexte nai tsuman ea inanxun yuikin: “Benikaini kaxun ja tanatiwen Dios kenwanti Templo Jerusalén anu tanatan tapu janu jawen inankuinti janamisbu tanatanwen. Januxun jatibun januxun jabun Dios kenwankubainmisbudi númerowen yudabudi tanadiawe. ²Jakia jawen kenwanti Templo jemaintin Diosun nawabu ma jatu yunuima januxun jabun 42 uxe Dios danankin jawen mae pepa ichakawakubainxanaibu jemaintin anu tanayamawe. ³Januxun ea Diosun en tsuma dabe en kushipa inankin en jatu yunua yudabuwen nuijaidakin bexa tadi sawetan 1,260 xaba en kakape yusin janchakubainxankanikiki”, ea waxu ⁴jatukidi matu yuinun ninkakanwen. Na Diosun jancha yuixunika dabedan, olivo ji dabe inun bin pejaida dabe keskabun mai dasibi jatun damiwani Ibu Diosun yunua anun ikaibudan, jawen besuudi nia keskabuki. ⁵Jabu dabe tsuabunda jatu danankin jatu chakabuwanun ikaibu ja jabu jaki sinataibu jatun jaxpawen jabuin xuun akin chi jede taxnimakin jatu kuakin tenanxankanikiki. ⁶Ja inun, Diosun jawen kushipa jatu yunua jawen jancha yusinkubainkin jau ana ui iyamayunun nai beputidubuki. Ja inun, jabun jene dami wakin jimi watidubuki. Ja inun, jawatianda jatu dasibi tenemakatsis ikin jamapai isin inun jamapai betsa shadabu mai anu jiweabu jatu bika tenema akeaketidubuki, Diosun kushipa Jayabuwen taexunan.

⁷Jakia Diosun jancha kakape jatu yunua yusinkin keyuaibun jawada atimapa pubenepa mai kini keyatapajaida anua mapekekidan jatube

achinamekin jatu maemakin tenanyan ⁸Jerusalén bai kaya namaki jabun yuda datanbu na jaskaidan, januxun jatun Xanen Ibu cruzki mastanibu anu ja maewan Jerusalén anu yuda jiweabun Diosun jancha danankin ninkaisbuma Sodoma inun Egipto anu jiwenibu keska ikubainaibu anu jatun yuda dakaken ⁹xaba dabe inun besti namakis mae tibi anu jiweabu inun, yuda betsa xukuabu tibi inun, jancha betsa betsapawen yuiaibu inun, mai pakea betsa betsapa anuabun ja mawa daka jau maiwayamanubun jatu yunuabuma ¹⁰Diosun jancha yuikin jabun jatu ja akaibu ma mawabuwen taea midimabu mai anu jiweabu benimai shinan chankain jatun jaibaubube jatun jamapai jamen inananaibun

¹¹janua jaskabiaibun xaba dabe inun besti namakis ka jawen jancha yuixunikabu Diosun ana jatu bestenwan ana jiwei benidabebaunaibu dasibibun jatu uin date paepaibun ¹²janua nai anua jui kushipawen Diosun jancha yuixunika dabe Diosun jatu kenakin: “Nedi inadi bekanwen”, jatu wa ninkatan nai kuinwen inaibu ja jaki sinatashinabun uiainbun ¹³ja jaskabaini nesebainaibun pacha sakuya ja mae décimo parte pake betsa di akaya 7,000 yudabu debuaibun dasibi yuda betsabu jabu jiweyuabu datejaidai damapaikin Dios nai jidabi xanen ibu kushipajaida ikunwanmabia kenwainbu jaskaxanaibu ninkakin en uinxuki.

¹⁴Janua ja segundo mesejaida atimapa keyukainaya janua ana betsa tercero taxnidiamma jawaida kaindiaikiki.

Ja 7 nai tsumabu jawen jenea séptimo trompetayatun jawen trompeta chan anikiaki, na janchadan

¹⁵Ja 7 nai tsumabu jawen jeneatun trompeta chan akai en ninkaya nai anua jui kushipawen jabun kenwankin yuikin:

“Nukun Xanen Ibu Dios inun jawen bake Mesías Cristo besti natian mai jidabi anu ja besti xanen ibukin jatu mekekubainxanikiki, niti ikamadan”,
 ikaibun ¹⁶ja 24 mekenikabu Dios xanen ibun jaki tsauti dapi janu tsauabun jabun Dios kenwain jawen tae naman maiki danti iki beti ixun ¹⁷yuikin:
 “Yavé Diosun, min pejaidaki. Mai jayadiama min jiwenidan, natian betsama jabias min jiweaki. Xanen ibu betsya yamawatan min kushipa min jayakunkainmiswen yuda dasibibu mekei mia besti min ma xanen ibui taeaii. Mia besti kushipa dasibi binu keyua min pepa nun mia kenwaii.”
¹⁸ Ja dukun mai jidabi anuabun mia bechipaiama mia danan paepawai miki sinatakubainimabuki Jakia miadi natian jatuki sinatadaijanu jatu kupinun ika min ma taxniaki. Januxun mawabu bestenwantan jatu unanti wakin min tsumabu min jancha yuixunikabu inun, minabu wakin medibi min jatu wani jabu dasibi xanen ibubu inun xanen ibubuman mia chibankin mia kenwankubainmisbu jabun pepawen min jatu manakuxanaii. Jakia jabun jawada mai anuxun pepa yamawakin mia chibankubainama mia dananmisbu jabun chakabuwen jatu unanti watan manakudiakin jabun chakabuwen miandi min jatu yamawai kaii”,

akaibu en ninkaya

¹⁹januxun Templo nai anua bepenxun ja jiwe medanua Diosun nukun xenipabu yubani kene ji bauki adua jatu uinmaya kana baka baka iki tin ikainkainaya pacha sakuaya badux ui ewapabu nidi iki jaskai keyuxanai en uinxuki.

Ainbuki yushibu xeanan pubenikiaki, na janchadan

12 ¹Janua nai anua unanmati betsa taxnikidani ainbu jawen bachi badin chaxapan yabua inun, jawen tae uxen tachaxa inun, xanen ibun maiti 12 bishi nea maia ²ja ainbu tuyabake kainun ika isinjaida mei bis ikai en uianyan

³janua jawen unanmati dami betsa nai anua taxnia yushibu xeanan tashipa jawen yuda kapetanwan yuda keska 7 buxkaya 10 maxunyan buxka tibiki xanen ibun maiti maia taxnitan ⁴tsuanda bishi jatiubukuns watan pake dabe inun besti jabiatius waken pakea betsa yushibu xeanantun jawen jina bekun bekun akin bishi pakea betsa mai anu udentan ja yushibu xeanantun ainbu tuyabake kainun ikai ja dapi jawen besuudi nixun jawen bake kaiain achixun xeanun, iwanan, manaya ⁵ja ainbu anua juni bake kaintan ewatan nawa betsa betsapa dasibi binukin jabun Dios ninkabuma jawa kaneama kipi jau xanen ibuxanun ja bakeishta kaian xeanantun xeanpanan iyukin jawen xanen ibun tsauti anu Diosun paxawakin ainiken ⁶ainbu janu tsua jiweabumanu paxawakin mae betsa Diosun ainbu pewaxuni anuxun 1,260 xaba jadixun jau pimakubainxanunbun jadi yunua ainbu paxaken

⁷janua nai anua Diosun nai tsumabu xanen ibujaida Miguel jawen tsumabube inun yushibu xeanan jawen tsumabuyadi jatube detenameaibun ⁸yushibu

xeanantun maematidubumawen taexun
nai anu ana jabube jiwestidubuma
Miguelin jatu udenkin ⁹ja yushibu
dunuwan jiwei taeni xeanan chani ewan
yuda dasibibu jatu padankubainmis nun
Diablo Satanás wamis jawen tsumabube
mai anu jatu maemakin nidi akabun

¹⁰janua jui kushipa nai anua kaiain en ninkaya yuikin:

“Nukun betsabu jabun ikunwainbu
badidi inun meshu medan Dios
bebunxun
nuku jatu chitenkin yuanmis ma
putabuki.

Pejaidaki. Natian Dios xanen ibuaya jawen bake Mesías Cristo jabe xanen ibukin

jatun kushipajaidawen nuku mekekin
taewakanikiki,
ja yaushikin ana tsua benutimadan.

11 Jabu nukun betsabun Satanás
maemakinan,
Jesús Diosun chaxuwán bake jabu
mawaxunkin
jawen jimi jabaniwen taea inun
jawen kakape jancha chanikin
jawa dateama jatun jiwea
benutiduma unankubainmixsun
jabu mawawen dateisbuman Satanás
ma maemadiabuki.

¹² Jaskawen taea nai inun man janu
jiweabuun, benimadikanwan.
Jakia man mai anu inun ianenwan
anu jiweabuun, man peidakawan.
Satanás pubenjaidatun badi
ichapama besti matu ichakawatidu
shinain matu anu ma jadi butuaki”,
jatu wa

¹³januxun yushibu xeanan ma mai
anu puta uintan ja juni baken ewa
yushibu xeanantun ichakawakin
nuitapawakin taewakubainaya ¹⁴janu
tsua jiweabumanu chai jadixun badi
dabe inun besti namakis keska Diosun
ainbu medabewakin pimakubainun.

iwanan, tete ewapan punyan damiwatan
Diosun ainbuki tsamian jawen nuyakaini
janu jiwxanai anu paxawaxanun ikaya
¹⁵yushibu xeanan jaki sinatajaidakin
jawen jaxpakan unpax tuae chada
chada ikin jene ewabainkin jau ainbu
nuntanbainun, iwanan, aka ¹⁶jakia
main ainbu medabewakin ja yushibu
xeanantun jene wa ja mai jaxpatan jene
tsu akin keyuaya ¹⁷jaskaya yushibu
xeanan ainbuki ana sinatajaidakin ana
jawawen jaska watima jawen bababu
texebun Diosun jancha chibankin Jesús
ikunwankubainaibu tenanun ika ¹⁸ja
yushibu xeanan ianenwan kexa janus
kexea niken

Jesucristo xanen ibuni mebinun
ikai inun jawen janchaxunika
padanananaxanaikidiaki, na janchadani

Tsua jabe detenamekin maematidumaki. Pejaidaki”, ikaibun

⁵januxun yushibu xeanantun yuinaka mese ja kushipa jaska tibiwen jau kushipanun yuikin: “Jamapai jancha atimapai Dioskidi xechakai 42 uxe kushipakunkainwen”, aka ⁶jaska yunua akin Dioskidi jancha chakabui jakidi jamapai betsa betsapa atimapai yui inun jawen kenwanti Templokidi inun nai anu jiweabu jawen janchawen jatu ichakubainaya ⁷ja dikabi yushibu xeanan jau Dios chibankin Jesúis ikunwainbube detenamei jau jatu maemanun kushipa inankin yunutan yuda betsa xukuabu tibi inun, mae tibi jiwebaunabu inun, jancha tibi yuiaibu inun, nawa mai pakea tibi anu jiweabu xanen ibukunkainwen, ikin jancha wakin meneken ⁸ja yuinaka mese atimapai kenwankinan, jabu mai jidabi anu jiweabu tsuabuda bebunkidi Diosun mai dami wadiama jabun kena chaxuan bake nuku mawaxunitun unaki keneama ini jabun besti duawakin kenwanxankanikiki.

⁹Tsuabuda man pabinkiyabunan, ninkakanwen:

¹⁰ “Tsuada bichiti jiwe anu iyukatsi ikin bichiti jiwe anu jatu bichixankanikiki.

Januxun tsuada nupe chaipawen jatu tenankatsis ikin nupewen jatu debuwaxankanikiki”, jabun chanima Dios ikunwakin jabun jawa shinan betsa wama jatun kushipa jatu uinmaxankanikiki, ikunwain medibibunan.

Yuinaka ewapa mese atimapajaida mai medanua ja kachu kainikiaki, na janchadan

¹¹Janua yuinaka ewapa mese atimapajaida betsa mai medanua taxnikidana en uinxu matu yuinun ninkakanwen. Chaxuan bake

maxun dabeya keska yushibu xeanan dunuwan taeya Satanáskidan padananain janchai ¹²ja yuinaka mese atimapai betsadan, ja ja dukun tenanibubia ma jawen dete bunitun jawen kushipa dasibi jayatun ja bebxunxun mai jidabi anu jiweabu ja ja dukun yuinaka mese atimapai jatu kenwanmakubainkin ¹³januxun dami tsuan jaska atiduma yudabun bedubi kainmakin naiudia chi jede pakeaya ¹⁴jatu jaska waxun uinmakin ja yuinaka mese atimapai ja dukuntun besuudi jamapai atimaska akaiwen yudabu dasibi padankin ja kachukeatun yunukin yuikin: “Yuinaka mese atimapajaida ja tsuanda buxkaki chachini mawa ana besteni jiwea keska ja itsa damiwadikanwen”, jatu wa ¹⁵ma damiwabun yuinaka ja kachukeatun ja ja dukun yuinaka mese kushipa inan ja damiwabu jiwemakin janchamaya jabun ja kenwanbuma jau jatu tenanun ¹⁶januxun dasibibu jatidi xanen ibubu inun xanen ibubuma inun, jatidi mabuwanyanbu inun nuitapaibu inun, jatidi tsuanda tsumabu inun tsumaumabu yuinaka mese atimapai ja kachukeatun jawenabu unanti wakin betsabu jabun meken yuisiudi tuxkutimawen netankin betsabu jabun betunkuki netankin wabu ¹⁷tsuabuda ja yuinaka mese atimapan kena inun jawen unanti número jayabumanan, jawa jabun jatun jamapai inantidubuma inun bitidubuma jatu wamaxanikikiki.

¹⁸Jaskaken unanepajaidatun ninka pejaidawatan tanaidan, eskatiki. Matu yuinun ninkakanwen. Yuinaka ewapa mese atimapai jawen número 666dan, juni betsan jawen kena unanmati númeroki. Ja número unainan, bikajaidabia unanepatun besti tanatidu buki.

**Nai anuxun nawati benawen kenwain
nawanibukiaki, na janchadan**

14 ¹Januxun ana uinkin Diosun chaxuan bake Sión mati anu ja yudabu 144,000 jabe mapuabu jatibu jawen kena inun jawen Epa Diosun kena ja dabetu kena jatun betunkuki kene nea jabe mapuabu en uinxu matu yuinun ninkakanwen. ²Nai anua jui betsa kaiai jene didi ikai jui keska inun, kana tin ikainaitun bana jui keska inun, yuda ichapabun jabun arpa mimawati mawaibu jui keskawen ja mapuxun ³nawa bena nawaibu en ninkaxuki. Dios xanen ibu jaki tsauti besuudi inun ja jiweabu dabe inun dabebun besuudi inun, ja 24 mekenikabun besuudi jawen nawati benawen ja 144,000 jabu ja yudabu anua katukin Diosun jawenabu jatu wani nawaibu uinkin en ninkaxudan, jabun besti ja nawati bena unankanikiki, tsua betsan ja tapintidubumadan. ⁴Ja nawakin Dios inun jawen bake chaxuan besti duawakin kenwankubainbunbun Diosun jabu ja dukun inankuin keska wakin jabu dukun katuniki. Jaska Dios inankuinmisbu keska wakin jabun jatun yuda Dios inun jawen bake inanbu jatu mekenibu jabun ainbu betsabu chutabaunabuma pepa besti Diosun chaxuan bake janida kai anu jabu jachun buxankanikiki. ⁵Jabudan, jabu anua tsuan chani bechitidubuma inun jawa chakabu jatukidi yuitidubumaki.

**Nai tsumabu inun nukun
Juchi Kayabi Iyuatun yudabu
kupixankanikiaki, na janchadan**

⁶Janua ana betsa taxniai en uianyan nai tsuma betsa nai natukanu nayakaunkin Diosun jancha kakape bunikatun mai anu jiwebaunabu nawan mai pakea tibi anu inun, yudabu

xukuabu tibi anu inun, jancha tibiyabu anu inun, mae tibi anu jiwebaunabu jancha ikibi ika jatu yuinun ika ⁷jui kushipawen yuikin: “Diosun nai inun mai inun ianenwan inun unpax chacha tibi damiwanitun yuda dasibi unanti watan na jabiatian jatu kupikin taewaikiki. Jaskaken menan jaki danti itan Dioski datekin kenwandikanwen”, ikainaya

⁸janua ja nai tsuma betsa ja kachukeatun chibanaibainkin jui kushipawendi yuikin: “Babilonia maewan ken ewa ma yamaikiki. Babilonia anuabun chakabujaidawakin chutawen kemukubainkin nawa betsa betsapabu dasibi jabiaskadi chakabu atimapa jatu wamakubainaibuwen taexun jabun maewan Babilonia Diosun kupikin ma yamawaki”, ikainaya

⁹janua nai tsuma betsan chibandiabainkin jui kushipawendi yuikin: “Tsuabunda yuinala mese atimapa inun jawen dami kenwanun ika jabu jeen iyamama jatun betunkuki inun jatun mekenki jawen unanti man jatu netanmamisbudan, ¹⁰Dios ma jawen sinata pae jatuki tanani jawen jatu kupijaidakin azufre pashinipawen jatu nuitapawakin tsekeden imakin chiwen menukin jatu kupijaidaxanikiki, Diosun nai tsumabu inun chaxuan bake bebunxunan. ¹¹Ja inun, tsuabunda yuinala mese atimapa kenwakin jawen dami kenwandaibu jawenabu wakin jawen jatu unanti wai jatu nemama jatun kena jatu netanmamisbu badidi inun meshu medan jeneama ja kuinwen chi nukaismawen dunua nuyai badi tibi jawa juindukuanma isin tene chakayamakubainxankanikiki”, ikainaya

¹²januxun jabun chanima Jesús ikunwakin jabun jawa shinan betsawama Diosun janchawen jiwekin jatun kushipa jatu uinmaxankanikiki, ikunwain medibibunan.

¹³Januxun nai anuxun jui betsa taxnikin ea yunukin: “Na jancha kenediwe. Na jabia unudi pakea nukun Xanen Ibuki dasitan mawakubainxanaibudan, Diosun jatu benimajaidawaxanikiki”, ikaya januxun Yushin Pepatundi ea yuikin:

“Jabiaskaki. Jabudan, jatun daya jetenan juindukun bestixankanikiki. Ja inun, jamapai shadabu Cristo axunkubainmisbuwen Diosun jatu manaku bestixanikiki”, ea wai ninkakin jaskaxanaibu en uinxuki.

¹⁴Janu ana betsa kaiaín uinkin nukun Juchi Kayabi Iyua nai juxupa kubuduki tsaua xanen ibun oro maiti maia inun jawen mekenwen beki machatu chaipa ewapa kenujaida tsuma en uinxuki. ¹⁵Templo nai anua nai tsuma betsa kainkidankin ja nai kubuduki tsaua yunukin jui kushipawendi yuikin: “Yudabu mai anu jiweabu yunu baimabu keskadan, ma janu kania tsekatí keskaki. Janun min beki machatu chaipa min tsumawen xachiwan mextea keska wakin ichawaxun adudiwe”, aka ¹⁶januxun ja nai kubuduki tsauatun jawen beki machatu chaipa bekunkin Diosunabu mai anuabu mextea keska wakin jatu ichawaxuki, mekekinan.

¹⁷Janua nai tsuma betsa Templo nai anua beki machatu chaipa kenujaida tsuma kaindiakidanaya ¹⁸janua nai tsuma betsan chi dasibi yununika Dios kenwakin tapu janu jawen inankuinti janamisbu anua kainkidankin nai tsuman beki machatu chaipa tsuma jui kushipawen yunukin: “Yudabu chakabu uva bimi ma jushian keskaki. Kania tibi mextexun ichawadiwe”, akaya ¹⁹janua Diosun nai tsuman jawen beki machatu chaipa tsumaxun yudabu uva bimi kania keska tibi mextexun jawen bimi jene biti tsiniti anu manchinxuki, jau jabuki sinatakin tsinikin akawakin jatun

chakabuwen kupinunan. ²⁰Januxun mae benanta uva bimiki paikin jawen jene bimisbu keska wakin Diosun jabun jimi jabamakin bai mata keska wakin caballo jawen kui anu kesunbainkin 300 kilómetro jabamabainxanai en uinxuki.

Yudabu jatu ichakawati 7 nai tsumabu jaya Juanen uinikiaki, na janchadan

15 ¹Januxun jawen jatu unanmakin ichakawati mese 7 jawen jenea jaska nai anua kaiaín ja uin e iti chakabuaidawen jaska nai tsumabun Diosun yudabu nuitapawakin jatu ichakawaxanai 7 nai tsumabun kencha tibiki jawen jenea Dios sinatamis tsumabu en uiyanan

²janua ja dukun ianenwan bexnanjaida bishtu keska chiyabi jusia jayaki. Jaskadan, eskaki. Jabun ja yuinaka mese atimapajaida inun, jawen dami danankin kenwanbuma inun, jawenabu jawen unanti número kena danankin Diosun jancha chibankin Jesús ikunwankubainkin maemashinabu jabu ianenwan dapi mapuxun Diosun mimawati arpa jatu inan tsumabu en uinxuki. ³Jabu nawakin Diosun tsuma Moisés inun Jesús chaxuwán bake ja dabetan nawatiwen Dios kenwakin nawakin yuikin:

“Dasibi jamapai dami ewapa tibi akin min jatu e imati anidan, min mia bestiki,

Yavé Dios kushipa dasibi binu keyuadán, mai jidabi yudabun min Xanen Ibudan.

Tsua padanma min shinan kayatapiawen chanima min nuku pe mekekubainmiski.

⁴ Mia besti medibi jiwea min kaneisma unankin yudabu betsa betsapa dasibibun mia yui mesewai datebetanan duawakin mia kenwanxankanikiki,

min pepawen kaneama min
akubainmiswen taexun”,
akaibun
⁵jaskaibu naiudi en uiyanan Diosun
jiwe nai anu bepenmanakainaya Dios
yubakatan Moisés jiwe wamani ⁶ja
medanua 7 nai tsumabun ja tibitun jawen
jatu ichakawati tsuma kainbidanaibun
jabun tadidan, juxupa chaxajaida sawea
inun oro nanexeketi xuchi puchinin kesua
sawea mapuabu ⁷ja jiweabu dabe inun
dabe betsan ja 7 nai tsumabu tibi oro
kenchaki Dios jiwei ikibi ini jiweatun jawen
yudabu kupiti mata jatu inan akeakeaya
⁸Dios kushipa duapajaida chi kuin keska
jawen medibi dintu mata anua juiki. Ja
7 nai tsumabu jabu tibitun ichakawatiwen
yudabu ichakawakin keyudiabumaken
Diosun Templo anu yane jikitidubumaki.

16 ¹Januxun en ana ninkaya nai
anu Dios kenwanti Templo
anua jui kushipawen 7 nai tsumabu
tsuanda yunukin jatu yuikin: “Matun 7
kenchaki Dios sinatamis mata mesejaida
mai anu buxun jiweabuki jatu juka
akeakeditanwanen”, jatu wa

**Diosun jawen jatu kupiti 7 nai tsumabun
kencha mata juka akeakekubainaibu
uinikiaki, na janchadan**

²nai tsuma betsa ja dukun kaxun
jawen kenchaki Dios sinatamis mata
mai anu jukaya ja yudabu mai anu
jiweabu jabu ja yuinaka mese atimap
jabun unantiyabu inun jawen dami
kenwanmisbu jabun yudaki chami isin
atimapka kainkin isinjaida jatu tenemaya

³janua nai tsuma ja segundo kaxun jawen
kenchaki Dios sinatamis mata ianenwanu
jukaya juni puben jatuki sinatakin jatu
chachia mawai jimi jabamis keskai
jene pisiwa jene medan jiweabu dasibi
mawaibun

⁴janua nai tsuma ja tercero kaxun
jawen kenchaki Dios sinatamis mata

jene kayabi dasibi inun chacha dasibi
anu jukaya jene dami jimi keyuaya
⁵nai tsuma jene jatun mekemistun Dios
yuikin:

“Mai jayadiama min jiweni inun
natiandi Dios medibi jiwemistun
jawa kaneama
jabis jatu unanti wakin min amisdan,
min mia besti nun unaai.

⁶ Min jancha yuixunikabu inun
Jesús chibainbu ichakawakin
jabun jimi jabawakin
tenankubainmisbu
jabudi jatu kupikin jimi min jatu
amaii.

Jaska menun ika imisbudan, jau
jaskanunbunwen”, akaya

⁷januxun Dios kenwankin tapu
janu jawen inankuinti janamisbu
anuxun tsuanda yuikin: “Xanen Ibu
Epa Dios dasibi binuatuun, januki.
Dasibi kushipayakin kaneisma yudabu
unanti watan chanima min shinan
kayatapiawen mian besti min jatu
kupiaii. Min pejaidaki”, akaya

⁸janua nai tsuma ja cuarto kaxun jawen
kenchaki Dios sinatamis mata badi anu
jukakin badi kushipa wa ja badin kushipa
bitan yudabu menuaya ⁹jawen kupiti tibi
Diosun yunukin jatu tenemaiwen taexun
ja kujaidaiwen menubiakin jaska shadabu
mebiai Dioski xechakakin kenwanun ixun
shinan betsa wabumaki.

¹⁰Janua nai tsuma ja quinto kaxun
jawen kenchaki Dios sinatamis mata
yuinaka mese atimapajaida jaki tsauti
anu juka jawen mae meshuaya yudabu
ana jawen jaskatima isin tenei jatun
jana buxtebainbaina manibia ¹¹jabun
isin chakabu tibi mebiai inun chami
tenebiai jabun jiwea chakabu jenekatsi
ikama Dios nai anu jiwea jaki xechakai
jancha chakabu yui jeneabumaki.

¹²Janua nai tsuma ja sexto kaxun
jawen kenchaki Dios sinatamis mata

jenewan Éufrates anu jukaya jau xanen ibubu badi juaikidia jau jawen benunbung bai tapinxuni jene netsuaya

¹³januxun yuinaka mese atimapa jaxpa anua inun, yushibu xeanan jaxpa anua inun, juni betsan padan jancha yusinmis jaxpa anua jabu tibi anua yushin chakabu jeu keska kaiain en uinxuki. ¹⁴Ja yushin tibidan, jawen yushin chakabuwen dayakin dami atimaska betsaa betsapa jatu waxunkin xanen ibubu dasibi mai jidabi anua jatu taxnibidan jatun soldadobuya detenamemanun, iwanan, jatu icha waken januxun Dios kushipa binuatun janu akaitian jatu maemakin yamawaxaniki.

¹⁵Jaskai en uiyanan Jesús chani: “Uian. Ea ana matu anu kaidan, en yumetsu kai keskakainxanaii, tsuan jaska ana shinanmakenan. Jabu man benimaxanaibudan, uxa keskama bestenxun min jiwea min tadi min meke pewa keska ixankanwen, jawa min tadi pekatan nia keskamadan, matun yuda tadiuma nia jawen man daketidu keska iyamakanxunan”, ea waya

¹⁶januxun yushin chakabu jeu keskabu buxun jau Diosbe detenamenunbung jawen hebreo janchawen Harmagedón mae anu xanen ibubu dasibi jatu ichawabu

¹⁷janua ja nai tsumabu jawen jenea ja séptimo kaxun jawen kenchaki Dios sinatamis mata jawen juinsinaibu anu niwe anu jukaya janua Dios xanen ibu jaki tsauti jawen jiwe anua jancha kushipa kainkin yuikin: “Ma jatis besti en keyuxuki”, ikaya

¹⁸janua kana baka baka itan tin ikainkaini mai tako aki mai pacha sakui yudabu mai anu jiweabu: “Jaskakunkidanai nun meismaki”, iki mesejaidaibun ¹⁹dasibi yudabun maewan Diosun tekekin keyukin ja maewan

Babilonia kushipajaidabia jawen chakabu shinain jaki sinatajaidakin pakea dabe inun besti waxun jatu kupijaidakin ²⁰dasibi natukan tibi yamawadiakin mati dasibi yamawakin ²¹jaska waya naiudia badux ui itamama betsa 40 kilo yudabuki nidi imaya badux ui mesejaidawen taea yudabu Dioski xechakaxanaibu ninkakin en uinxuki.

Maewan betsaa ainbu jininipa keska Diosun kupixanikiaki, na janchadan

17 ¹Januxun ja 7 nai tsumabu betsan 7 kenchaki Dios sinatamis mata tsuma juxun ea yuikin: “Nedi juwe, ainbu jininipa jenewan nemaki tsaua en kupiai en mia uinmaidan. ²Mai jidabi anu xanen ibubu jawen kemui jabe chutanamei keskai ma jabe beyabuki. Jaska inun, yudabudi mai jidabi anuabudi Dios kayabi ikunwanma jamen yushin betsaa betsapa ikunwain jawen kemui chutai keskai jabun kemu paewen paean keskabuki. Uinwen”, iwanan,

³janua ja nai tsuma ja en yushinki nukuxun nama keskawen ea uinmaitun janu tsua jiweabuma anu ea iyua jadixun uinkin ainbu betsaa yuinaka mese atimapajaida tashipaki katsaumea en uinxuki. Ja yuinakadan, 7 buxkaya inun 10 maxunyan inun Dioski xechakati kena jaki yabukuaki. ⁴Ja inun, ja ainbordan, tadi tashipa uxna duakabi inun tashipajaida sawea inun, jawen jawenduai daukin oro mane inun, nenkati mane jawendua kadujaida sawea inun, chudi mane perla juxupa kadujaidadi saweatum jampai pepa danain jawen atimapamis kenchaki tsuma jaya ⁵inun, jawen betunkuki jawen junea kena kenea: “Babilonia maewan mesejaida ea en jatun ibu jininipaki. Ea anu ainbu jininipa dasibi inun jampai shadabu mai jidabi anuxun pepa danankin chakabuwamisbu

jiweabuki”, ika netanki. ⁶Jaska inun, Jesús chibankin jawen jancha yusinmisbu midimabu ja ainbu jininipa itsa maewan Babilonia anuabun jatu tenanxun jabun jimi akai keska paean jaskai uinkin shinain e iki teku itan en pes niken ⁷nai tsuman ea yuikin: “⁸Jaskai e iki min jawen dateai? Ja ainbu inun ja yuinaka atimap mese 7 buxkaya inun 10 maxunyan ainbu jaki tsaua ja dabekidi junea xabakabi mia yuinun ninkawe. ⁹Yuinaka mese atimapajaida min uinxudan, bebunkidi jiwebiani natian ana jiwea jayamabia jaskabia ana jawen jenei Dios kupimakin keyumayui kini keyatapa xankinjaida anua mapekei taxnia Diosun yamawaxanikiki. Jaskakidanai mai damiwaitian tsuabuda Diosbe jiwekuinxanaibu unaki Diosun jabun kena netanma ini yuinaka mese atimapajaida mawabiani ana un unuatiandjiwea mapekeia jabun uinkin yui: ‘Jabaa! ¹⁰Jawamen?’ ixankanikiki.

⁹Ja yuinaka mese atimapajaidakidi unanepa bestibun shinankin unantidubuki. Jawen 7 buxka unantidandan, 7 mati Roma anuki, jaki ainbu tsaua unantidandan. Ja dikabi jawen 7 buxkadan, 7 xanen ibu jawen unantidiki. ¹⁰Ja inun, 5 xanen ibu ma mawanibuki. Jakia betsa natian xanen ibuikiki. Ja inun, betsa xanen ibunun ika judiamaki. Janua ja jawen jenea xanen ibui juandan, jatixuinda badi ichapa xanen ibuama ixanikiki. ¹¹Ja inun, ja yuinaka mese atimapajaida ja xanen ibu 7 betsa ibiani ja dukun jiwebiani natian ana jayamabia ana jiwea ja octavo xanen ibu ixanikiki. Jakia atimas ja yuinaka mese atimapajaida jawen jenekin Diosun kupikin yamawaxanikiki, niti akamadan.

¹²Ja inun, ja 10 maxun min uinxudan, 10 xanen ibubu betsaki. Jabu xanen ibui taediabumabiaken yuinaka mese atimap xanen ibukin jawen kushipa

jatu yunutan uxas eskadabes ja 10 jabe xanen ibumaxanikiki. ¹³Ja inun, ja 10 xanen ibunan, jabe xanen ibukin yuinaka mese atimapan jabias jawen shinan axunkin medabewakin jawen yunuti chibankin ¹⁴chaxuwan bakebe detenamexankanikiki. Jakia chaxuwan bake Jesucristo dasibi xanen ibubu inun dasibi yununikabu binukin keyumiswen taexun jabu Diosun katuxun jatu kenani chintuainsbumabetan ja 10 xanen ibubu maemaxankanikiki, nukun Xanen Ibu Jesucristobetanan”, ea watan

¹⁵ja dikabi nai tsuman ana betsa ea yuikin: “Ja jenewan namaki ainbu jininipa tsaua min uinxudan, ja mae tibi anu jiwebaunabu inun, yuda tibibu inun, jancha betsa betsapa yuiaibu inun, mai pakea ichapaki. ¹⁶Ja inun, ja 10 maxun xanen ibubu inun ja yuinaka mese atimapajaidatun ja ainbu jininipa ichakawakin jawen kushipa danankin jamapai jawendua jaya yamawakin ana jawen nuiama jenekin nuitapawakin jawen nami pikin keyutan jawen xau kuaxankanikiki. ¹⁷Ja inun, ja 10 xanen ibubunan, ja yuinaka mese medabewakin jabun kushipa inankin jabun jawen yunua chibankatsis ikin jaska Diosun jatu jaska wamakatsis ikai jatun juinti medan jatu shinanmaya jaska yubakani menemakin Diosun jatu amakubainxanikiki. ¹⁸Ja inun, ja ainbu jininipa min uinxudan, ja maewanki, xanen ibu kushipa tibi yunumisdan”, ea waxuki.

Diosun Babilonia maewan yamawaxanai uinikiaki, na janchadan

18 ¹Ea jaska watanaya nai tsuma betsa nai anua butukidankin kushipajaida jaya jawen chaxawen mai chaxawakin ²jancha kushipawen sai ikin yuikin:

“Babilonia maewan ken ewa ana jawama

jawen kushipa ma bextekeaki.
 Janu Satanásan tsumabu inun,
 jatun yushin chakabubu inun,
 peiyabun pisi pimisbu inun,
 yuinaka atimapá piama nun dananmis
 ma jabu jawen jiwekanikiki.

³ Ja inun, mai pakea tibi anua bea
 jawen jamapai tibi kemui
 jawenduawen kemui
 jabe chutanamei keskaibu inun,
 xanen ibu kushipa betsapa
 tibidi chai jiwea
 midimabun Babiloniabe atiai keskai
 jabe yubakamisbuki.

Ja inun, ja mabu inanananmisbu mai
 jidabi anuadi bea
 janua mabuwanyain jabun mabu
 inankin pei midima bimisbuki”,
 ikaya

⁴janua jui betsaa nai anua taxnikin yuikin:
 “Enabuun, ja maewan anua
 taxnidibainkanwen,
 jau jabun chakabu akaibube man
 jusiama inun
 jau Diosun atimapawen jatu kupikin
 matu dikabis jau matu
 kupiyamaxanunan”, iwanan,

⁵ “Jabun chakabudan, jamapai
 ichawakin maspuwakubainkin nai
 anu mati aka keska waibu
 juneama ma xabakabi Diosun jatun
 chakabu betsaa betsapa uinkiki.

⁶⁻⁷ Jaskawen taexun Babilonia ainbu
 keskakin
 ibubis daui jamapai mabu pepa
 shadabu bi kenkin yuikin:
 ‘Tsuabuda ebe detenamekin ea
 maematidumaki.

Ja inun, jawawenda dabanan en
 kaxama ixanaii.

Jakia dasibi pepa shadabu jaya
 xanen ibu ainbu keska en jiweaki’,
 imiswen taexun jawen chakabuwen
 inun jatu chakabuwamiswen
 taexun

dabeki kupikin ja maewan ainbu
 keska jabias keska wakin
 kupichakayamakanwen,
 n uitapawakinan.

Babilonia maewan anuabun
 yuda betsabu kemumakin
 kenwanmamiswen taexun
 ichakawakin jabiaskadi wakin jatu
 n uitapawa chakayamadiakanwen,
 jau ana betsaa betsapa bikajaida
 tenenunbunan.

‘Jakia dasibi pepa shadabu jaya
 xanen ibu ainbu keska en jiweaki’,
 imiswen taexun jawen chakabuwen
 inun jatu chakabuwamiswen
 taexun

dabeki kupikin ja maewan ainbu
 keska jabias keska wakin
 kupichakayamakanwen,
 n uitapawakinan.

⁸ Jabun chakabuwakubainmisbuwen
 taexun
 nukun Xanen Ibu Dios
 kushipajaidatun ja maewan ainbu
 jininipa keska kupikin
 jabias xabatian yuda ichapa tenankin
 betsabu bika tenemakin inun
 buni tenemakin maewan
 kuaxanikiki. Manayukanwen”,
 iwanan,

⁹ ana nai tsumapan ea yuikin:
 “Maewan kuaya chi kuin nuyabainai
 xanen ibu betsaa betsapabu jawen
 jamapaiwen kemui jabe chutanamei
 itsai kemui jabe jawen jawenduamisbu
 chakabu jatubetan akubainmisbun uin
 jawen nui sain iki kaxachakayamakin
¹⁰ ja keska tenekatsis ikama datei chai
 mapubaunxun yuikin:
 ‘Yuu, yuu. Babilonia min maewan
 ewapa kushipabiaken
 jawaida Diosun kupikin mia
 yamawaxuki.’

¹¹⁻¹³ Oro mane inun, plata mane
 inun, nenkati jawendua kadujaida inun,

chudi mane juxupa bemisbu ana tsuan biama ixankanikiki. Ja inun, tima tadi pepajaida inun, chaxa tadi betsa uxna duakabi betsa tashipa bemisbu inun, ji ininipa mabu inun, elefante makuxpi itsa jawen mabu inun, ji pepa mabu kadu betsa betsapa bemisbu inun, bronce mane inun, hierro mane inun, epa juxupa pejaida mabu bemisbu ana tsuan biama ixankanikiki. Ja inun, betsabun canela jawen piti nis pejaidawati inun, piti nis wati betsa betsapa inun, inti betsa betsapa bemisbu inun, uva vino inun, piti xeni pepa inun, xekiwan dudu pepa bemisbu ana tsuan biama ixankanikiki. Ja inun, ina awa inun, chaxuwan inun, caballo inun, jawen tadanbainti inun, yuda betsa jau tsuanda tsuma wanun bibidan jatu inanmisbu ana tsuan biama ixankanikiki. Jaskaken inanananmisbu mai jidabi anu Babilonia maewanwen taea kaxachakayamai jawen taea sain ixankanikiki, ana janixun jatun mabu jadi buxun inantimawen taeandan, akin yuixankanikiki”, iwanan,

¹⁴jabun maewan ana yuikin:

“Babilonia anuabuun, jamapai bimi shadabu man jawen kemujaidamis inun
man bechipaimis man ana jayamaki.
Dasibi jawen mabu jawendua tibi inun
mabu kadu tibi ma benui keyuaki.”

¹⁵Janua jamapai pepa shadabu inananankin pei ichapa bikubainshinabu ja maewan anuma nanta mapua ana inananantidubuma uin inun jatu kupiaiwen taea jatuwen datei nui kaxai sain ikin ¹⁶yuikin:

“Aitaa. Aitiin. Maewan kushipa ja ainbu jawendua keska
janu jiweabun tima tadi pepajaida sawekin
tadi uxna duakabi inun tashipa sawekin

jawen daui oro mane inun, chudi mane juxupa inun,
nenkati pepa mane kadujaida sawebiabu

¹⁷ejatun mabuwan jawaida jaskaxumen?”
ikaibun

jabun xaxuwan yunumisbu inun, jabun xaxuwan tuenbainkin buxken buxken abainmisbu inun, xaxuwanwen bumisbu inun, ianenwan anu dayamisbu nanta mapubaunxun ¹⁸maewan kuaya chi kuin tuyabainai uin sai ikin yuikin: “Aitaa. Aitiin. Maewan betsa ana jaska keska jayanakamaki”, iwanan, ¹⁹jatun beya chibain mai mishpu kudu maputukui kaxai sain ikin bis ikin yuikin:

“Aitaa. Aitiin. Dasibi xaxuwanyanbu Babilonia anu kaxun
jatun mabu pepa jawendua inananantan
pei midima bibidan bibidanaibu ja maewan ma jawaida yamaxuki”, akin yuixankanikiki, ea waya

²⁰jaskaya jui betsa kain chanii:

“Nai anuabu inun, man Diosunabu medibibu inun,
man jawen jancha yuixunikabu inun,
man Jesúsun kushipayabudan,
Diosun na maewan chakabujaida kupikin
matuwen dabanan xunsa sinatakin axanaiwen taea matudan,
benimai shinan chankankubainxankanwen”, ikai ninkatan en matu kenexunaii.

²¹Januxun nai tsuma betsa kushipajaidatun jawen deneti mishkipawan binibainkin ianenwan anu udenkin pukuxun yuikin:

“Na mishkipawan ianenwanu en pukuxu keska
ja maewan Babilonia tsuan ana uintiduma ipakexanikiki.

²²Ana benimakin arpa mimawati mawaibu inun,

tepe dewe shadabu mawaibu inun,
trompeta mimawati mawaibu inun,
mimawati betsa betsapa mawaibu
matun maewan anuxun
ana jawa mimawabuma ixankanikiki.
Ja inun, jamapai mabu betsa betsapa
wamisbu
matun maewan anu ana jaska tibi
daya jayama idiaxankanikiki.
Ja inun, piti pepawai mishki
denetiwen dayaibu
jawen jui denke ikai tsuan ana
ninkabuma idiaxankanikiki.

²³ Ja inun, junin ainbu ainwakin
jawen jaibuabu beyusmaya benimai
chikishtapamisbu
tsuan ana ninkama idiaxankanikiki.
Ja inun, matun mabu inanananika
kushipabun
mai jidabi anu jatu paxkaxunmis
inun
jabianuxundi mai pakea tibi anua
beaibu
mukayakin jatu padanmisbuwen taea
matun maewan anu tsua ana
jayamaken
ana tsuan bin chaxawakin
dekuabuma idiaxankanikiki”,
jatu jaska waxanai uinmakin ana ea
yuikin:

²⁴“Ja mae Babilonia anuxun Diosun
jancha yuixunikabu inun ikunwainbu
betsabun Jesús chibainbu inun
yuda betsabu jatu tenankin jabun
jimi jaba wamisbuwen taexun na
maewan jaki sinatakin Diosun kupikin
yamawaxanikiki”, ea wa

19 ¹januxun en ninkaya nai anua
tsuada midimabun yuikin:
“Aleluya! Nukun mekenika Dios nun
kenwaiin.
Duapa kushipajaidatun nun
jawenabu nuku mekepakexanikiki.
² Ja inun, yuda dasibibu unanxun
kaneama kupimiswen taexun

maewan ainbu jininipa
keskatun yudabu dasibi
chakabuwamakubainai ma
kupikiki.
Ja inun, ainbu jininipa
keskatun Diosun tsumabu
tenankubainmiswen taexun
Diosun jawen maewan jaki sinata
paepakin yamawaikiki”, itan
³ januxun jabun ana yuikin:
“Aleluya! Dios pepajaidaki.
Ja maewan kuin inai juxu
puepkexanikiki”,
ikaibun
⁴jaskaibun ja 24 mekenikabu inun
ja jiweabu dabe inun dabetun Dios
jaki tsautiki tsaua naman danti iki
maiki beti ixun kenwakin yuikin:
“Jau jaskanunwen. Aleluya! Chanima
Epa Dios pepajaidaki”, ikaibun ⁵en
ninkaya ja Dios tsaua namanua jui betsa
taxnidia kin yuikin:
“Man Diosun tsumabuun, mai jidabi
anua betsabu
man xanen ibubu inun betsabu man
xanen ibubuman
Diosun kushipaki mesekin duawai
pepakin kenwankubainkanwen”,
ikaibu uinkin ninkatan en matu
kenexunaii.

Diosun chaxuwan bakebetan ikunwainbun
jabetan pixankanikiaki, na janchadan

⁶Januxun en ninkaya yuda midimabu
janchai jene didi ikai keskawen inun tin
ikainkainai keskawen yuikin:
“Aleluya! Nukun Epa Dios
kushipajaida dasibi binu keyua
ja bestitun nuku dasibi mekei ma
xanen ibui taeikiki.

Pejaidaki. Kenwanankanwen.

⁷Ainbu jawen bene juabe jiwenun,
iwanan,
jawen jamapai pewakin akawai
Jesúsunabu jabe jiwekatsis ikanikiki.

Ja jaskadan, Jesucristo chaxuwan
baken
jawenabu niti akama jabe
jiwemaxanikiki.
Jaskaken benimai shinan chankain
tse ikin
Dios kenwanankanwen.

⁸ Tima tadi juxupa chaxakapa pejaida
ja Diosunabu medibi jabun jatun
shinanwen kaneama chibani
pewamisbun jau sawenunbun,
iwanan,
jatun jiwea medibi unanmati ja tadi
ma jatu inan saweabuki”,
ikaibu en ninkaxuki.

⁹ Januxun nai tsuman ana ea yuikin:
“Diosun jancha kayabi en mia yuiiai
ninkatan kenediwe, eskadan. Chaxuwan
bake keskatun jawenabu nai anu jabe
jiwemanun, iwanan, jatu ichawaxun
jabetan pidan, benimachakayamaxankan
ikiki”, ea jaska yuiaya

¹⁰kenwanun ika jawen tae naman en
danti itanaya ea nemakin yuikin: “Eki
jaskayamawe. Mia inun Diosunabu
betsabun Jesucristo chibankin jawen
jancha yusinmisbu keska eandi Diosun
jancha bunika en jawen tsumadiki.
Jaskaken ea kenwanma Dios besti
kenwanwen”, ea waxuki.

Jaskadan, tsuabuda Jesúskidi
kakape Yushin Pepatun xabakabi jatu
shinanmaya jabu yusinanbu jakidi
chanikin banabimabaunmisbuki.

Caballo juxupaki katsauntan chakabubu kupi kanikiaki, na janchadan

¹¹ Janua nai bepeanyan xanen ibu
jawen kena Chanima Jancha Kaneisma
caballo juxupaki katsauna en uinxu
matu yuinun ninkakanwen. Xanen
Ibu pepatun yudabu unanti wai jatube
detenamenun inun ikaidan, ¹²jawen
bedu chaxadan, chi jede keskaki. Ja
inun, xanen ibu kushipajaidaiwen taea

Xanen Ibun maiti ichapa maia jayaki.
Ja inun, jawen junea kena ja bestitun
unain ja kena jaska jaki neaki. ¹³ Ja
inun, jawen tadi saweadian, jimiki
pukua saweaki. Ja inun, jawen kena
betsadan, Diosun Jancha Kayabiki.
¹⁴ Ja inun, jawen soldadobu nai anua
tima tadi juxupa pejaida jawa detsisma
saweadi caballo juxupabuki katsaumea
jachun kainbainkin jatun Xanen Ibu
chibankinikanikiki. ¹⁵ Ja Xanen Ibu
kaidan, xanen ibu yununika mane
kushatia inun jawen jaxpa anu nupe
chaipa kenujaida kaian tukunwan jawen
jabun Dios ninkaisbuma mai jidabi
anuabube jatube detenamei kaidan,
jaskawen taea ja Xanen Ibu kayabistun
jamebi ja jatuki Dios sinatai jatu
uinmakin jaska uva vino tsinikin pema
pema amisbu keska wakin Dios kushipa
binu keyuatun jawen puben pae jatu
memai kaikiki. ¹⁶ Ja inun, jawen kena
mestenepa Dasibi Xanen Ibabu Inun
Dasibi Yununikabu Binukin keyuaki, ika
jawen tadi chaipaki inun jawen kishi
kateki ja dabeki jawen kena neaki.

Jesúski jabu jaki sinataibu jatu maemanikiaki, na janchadan

¹⁷ Januxun en uiyanan nai tsuma betsa
badi medan nixun dasibi jabu peiyabun
pisi pimisbu nai natukanu nuyabaunmisbu
jatu kenakin jui kushipawen yuikin:
“Nenu bei nedii ichai bekanwen, jau
Diosun matu pimanunan. ¹⁸ Jabube Xanen
Ibu detenamekin maema jabun namidan,
xanen ibubun nami inun, soldadobu jabu
xanen ibubun nami inun, jamapai juni
kushipabun nami inun, caballo nami
inun, dasibi caballoki katsaunabun nami
inun, junibun tsumabun nami inun, tsuan
tsumabuman nami inun, jamapai yuda
betsa betsapabun Dios ninkaisbuma
Jesúsun jatu maema jabun nami
pikanxunan”, ikai en ninkaxuki.

¹⁹Januxun ana en uiyanan yuinaka mese atimapajaida inun, xanen ibubu mai jidabi anua inun, jatun soldadobu icha ja caballo juxupaki katsaua jawen soladobuya jatube detenamenun ika icha maniabun ²⁰ja padan jancha yuixunikatun yuinaka mesen besuudi atimaska betsa betsapa tsuan atiduma wakin jabu yuinaka mese atimapajaidatun kena jabu jen iyamama inun jawen dami kenwanmisbu jatu padanmiswen taexun padan jancha yuixunika Xanen Ibu binuatun tsumabun achikin yuinaka mese atimapajaida jabe achitan ninkaibu janu ian azufre pashinipa menui jede ji ji ikai anu ja dabe jatu putabu ²¹caballoki katsaunxun jawen nupe chaipa jawen jaxpanu tukuanwen dasibi yuda betsabu Jesúsun jatu detekin keyukan peiyabun dasibibu jabun nami pi xuku dakakin yani waibu en uinxuki.

1,000 año Jesucristo xanen ibuxankaniki, na janchadan

20 ¹Januxun en ana uiyanan nai tsuma betsa nai anua butukidankin ja kini keyatapa xankinjaida jawen bepentí shabi inun mane dispi chiwetameya ewapa tsuma en uinxu matu yuinun ninkakanwen. ²Ja nai tsuma jukidanan, yushibu xeanan ja dukun dunutan padananain taeni jawen kena dabe Diablo inun Satanásdan, achixun mane dispiwen nexatan 1,000 año ³kini keyatapajaida anu udenxun jawen beputiwen bepukin mestenjaidawatan jawen unantiven beputiki tsaminkin unanti watan 1,000 año bichitan janu mekekubainxanikiki, jau ana mai jidabi maniabu jatu padanyamanunan. Jakia ja 1,000 año keyukainaya jau ana jatu jaskadawanun jawa wama kainmatan ana jatixuinda badi Satanás yunuama ixanikiki.

⁴Januxun jabun jatu unanti waxanai jaki tsauxun unanti wati jabun jatun kushipa biaibu en uinxuki. Ja dikabi Diosun yusian chibankin chintuanma Jesúskidi yusinkubainaibu jabun buxka texteabu jatun yushin en uinxuki. Jabu ikidan, ja yuinaka mese atimapajaida inun, jawen dami kenwanbuma inun, yuinaka mese atimapajaidatun enabu unanti jabun betunkuki inun jatun meken pechiki jatun kene netanmakin amama ikubainimabuki. Jaskawen taea ana bestein benibaun 1,000 año Cristobe xanen ibuxankaniki. Jaskaibu en uinxuki, ⁵jabu dukun mawakubidanpaunibu bestein taeidan. Janua 1,000 año keyui maekainaya ja mawanibu betsabudi bestendiaxankaniki. ⁶Ja inun, Diosun jawenabu wakin medibi wanixun jabu dukun bestenwanan, benimajaidaxankaniki. Jabudan, ana jawa jatun kushipa mawa dabeki jayamajaida ixankaniki. Jaskawen taea Dios inun Cristo dayaxuni janchaxuni besti jabe xanen ibui 1,000 año jabe xanen ibuxankaniki.

⁷Januxun ja 1,000 año binukainaya mai kini keyatapajaida anua jawen nai tsuma Satanás Diosun mistumanixun kainma ⁸taxnitan nawabu dasibi mai jidabi anu jiwebaunabu anua tibi jatu padankin ja mae Gog inun Magog anua jawenabu soldadobu ichapawakin ianenwan kexanua mashiti wakin jabube detenameti ichawaxanikiki.

⁹Mai jidabi anua bui Diosunabu jatu manakai ichabu inun ja maewan Diosun bechipajaidai ja dabe kexei beabu anu Diosun nai anua chi jede jatu anu puta jatu kuakin yamawatan ¹⁰janu ja ian janu azufre pashinipa menui jede ji ji ikai anu yuinaka mese atimapajaida inun padan jancha yuixunika nai tsumabun udenibu anu Satanásdi udean jadia badidi inun

meshu medan niti akama Diosun jatu isin tenemachakayamaxanikiki, jawa juindukunti jayama niti ikama akibi akinan.

**Jawen jenekin mawanibu
nukun Xanen Ibun jatu unanti
waxanikiaki, na janchadan**

¹¹Januxun Xanen Ibu jaki tsauti juxupa jawendua jaida nukun Xanen Ibu jaki tsaua en uinxuki. Tsauken badi inun, uxe inun, bishi inun, mai keyu tsekebaini nishmai yamakainaya ¹²janua dasibi xanen ibubu inun xanen ibubuma mawani ana bestantan Xanen Ibun besuudi mapuabun jawada betsa betsapa akubainibu Diosun jaki kenemis una ichapa bepentan janua una betsa tsuabunda Dios chibankin Jesús ikunwain niti ikama Diosbe jiwekuinxanaibu jabun kena Diosun jaki kenediakubainmis una betsa jawen jiwe mati kene bependiaxun ja jabu jiwe xun jaska wamisbu jatukidi ja unaki kenekubainmisxun dasibi mawanibu ana bestean mapuabu jabis jatu yuikin jatu unanti wakeakeaya ¹³ianenwan batapa anua mawanibu inun janu mawabu bumisbu anua mawanibu jabu Diosun bestenwantan ichawaxun jaskadada jiwekubainibu jabu tibi unanti wakin pepabu inun chakabubu jatu kupiaya ¹⁴jatun jatu mawamanika inun janu mawabu bumisbu anu ja ian janu menui jede ji ji ikai anu jau dabeki mawakin menununbun jatu udean ¹⁵tsuabunda Dios chibankin Jesús ikunwanbuma jabun kena Diosun jaki kenemis una anu jabun kena jayama ja ian janu menui jede ji ji ikai anu ma jatu puta keyuabuki.

**Jerusalén bena Juanen
uinikiaki, na janchadan**

21 ¹Ja jaska butian jabu dukun badi inun, uxe inun, bishi inun,

mai damiwani bepemanai xabakainaya ianenwan batapadi jayamaya jabiatandi ana uinkin nai bena inun mai bena taxnidiai en uindiashinaki.

²Januxun ana betsa taxnikidanai uinkin ainbun juni benewanun, iwanan, jawen beneki nukui kanun ika jawendu ai keskamis Jerusalén maewan bena ma dasibi iduya pepaya Diosun nai anua buteaya ³xanen ibu jaki tsauti anuxun jui kushipawen yuiai en ninkaya: “Uian. Na maedan, jaki, ja medan yudabube Dios jiwe pakexana aidan. Jawen jatube jiwe idan, jawen abubes ixanikiki. Dios ja besti jabun mekenika ixanikiki.

⁴Jaskawen taea jabu kaxamisbu jatun beun taxka watan ana mawa jayama inun, ana sain ikama inun, kaxa jayama inun, isin jayama dasibi jaska Diosun jawen bika jiwei wani bextekin ana ja jayama waki”, ikaya

⁵janua xanen ibu jaki tsauti anuxun nukun Xanen Ibun ea yuikin: “Chanim jancha shinan kaya en mia yuiai kenediwe, eskadan. Uian. Eanan, dasibi en bena wakin keyuai”, itan

⁶ana ea yuikin: “Dasibi jaskaxanai en yuini dan, ma en akin keyuaki. Ea dukun en ini inun niti ikama en jiwe pakexana ii. Tsuabunda unpax akatsis ikin manuaibu keska ea anu beaibu en jatu jiwea inan xanai, jawa jatu pakamamadan.

⁷Ja inun, tsuabunda ea dananma jabun maemakin binumis budan, ea en jatun mekenika Dios ikaya jabu en bakebu

na mae bena anu jawa benuama ebe jiwei ikibi ipakexan kanikiki. ⁸Jakia Jameen ekidi janchabai eki dakemis inun, eki pechia jawa shinainsbuma inun, yuda betsabe dananana misbu inun, yuda betsabe tenan misbu inun, chutaname baun misbu inun, mukayakin Satanásan kushipa yukamisbu inun,

yushin dami betsa kenwan misbu inun, chani chakabaun misbu jabu dasibi en

kupia janu buidan, ja ian janu azufre menui jede ji ji ikai anu ja dabeki mawa mexankanikiki”, ea wa en matu kenexunaii.

⁹Januxun 7 nai tsumabun ja 7 Diosun yudabu jawen jenea kupiti mese kencha betsa mata tsuma eki nukuxun ea yuikin: “Chaxuhan baken ainyanxanai yusinkin mia kayatiwamanun nedixun uinyuwe”, iwanan, ¹⁰ja nai tsuma en yushinki nukuxun nama keskawen mati keyatapa anu en yushin ea iyuxun Jerusalén maewan pepajaida medibi Diosun nai anua buteai ea uinmashina matu yuinun ninkakanwen. ¹¹Jawen maewan chaxadan, Diosun xabawaki. Nenktati betsa diamante kadujaida bexnan bishtu keska bakamanai chaxamai en uinxuki. ¹²Jawen kene keyatapa kushipawen dakenbauna inun, jawen jikiti xui beputiya 12 jayaki. Ja inun, ja jikiti xui tibi anu nai tsuma betsan kexea inun jikiti xui mamaki tibi Israelin 12 bababu xukua tibitun jabun jatun kena betsa tibi kene jayaki. ¹³Ja inun, badi juaikidi esteudi jikiti xui dabe inun besti jaya inun, norteudi jabiatidi jaya inun, surkidi jabiatidi jaya inun badi jikiaikidi oesteudi jabiatidi jayadiki. ¹⁴Ja inun, jawen kene keyatapa jawen kushipa wati 12 mishkipawan jawen mestenwankin tsamabauna keneyaki. Ja inun, chaxuhan baken 12 tsuma kushipayabun kena tibi mishkipawan tibiki nea jayaki, jatun kenadan.

¹⁵Janua ja nai tsuman ea jancha waitun maewan inun jawen jikiti xui inun jawen kene kauana tananun, iwanan, jawen tanati tawa keska oro tsumaxun ¹⁶jawen tanaxuki. Maewan jawen chaipa inun jawen jaxpa inun jawen keyatapa jawa binuama jabiatixunbus 2,200 kilómetro iakea jayaki. ¹⁷Januxun kene jawen jaxpadi tanaxuki. Junibun tanamis keska wakin

nai tsuman ja tanatiwen kene jawen kextu 64 metro tanaxuki.

¹⁸Jawen kenekidi matu yuinun ninkakanwen. Ja dukun mae jidabi oro keska dasibi tashipa chaxajaidaki. Ja inun, jawen kenedan, jaspe nenktati nanketapa bexnan kadujaida kenekauana jayaki. ¹⁹Ja inun, mishkipawan jabuki kene tsamabaunabu nenktati kadujaida tibiwen dauyaki. Mishkipawan ja dukun diamante nenktati bexnanjaida jayaki. Ja segundo zafiro nenktati nanketapa jayaki. Mishkipawan ja tercero ágata nenktati nanketapa kudupa jusia shiwaya jayaki. Ja cuarto esmeralda nenktati nanke kudupa jayaki. ²⁰Ja quinto ónlice nenktati juxupa inun tashipa bexmas jusia shiwaya jayaki. Ja sexto rubí nenktati tashi bexmas jayaki. Ja séptimo crisólito nenktati pashinipa kudupa jayaki. Mishkipawan ja octavo berilo nenktati ankunepa jayaki. Ja noveno topacio nenktati pashinipa jayaki. Ja décimo crisoprasa nenktati ankunepa bexmas jayaki. Ja undécimo jacinto nenktati nanke bexmas jayaki. Ja 12 mishkipawan jawen jenea ja duodécimo amatista nenktati minanepa jayaki. ²¹Ja inun, ja 12 beputi tibidan, perla chudi mane ewapajaidabuki. Ja inun, maewan jawen niti bai kayadan, bexnanjaida oro jas bixtu keska bakamanaikiki.

²²Ja inun, Diosun maewan bena jidabi anuxun Epa Dios Xanen Ibu binu keyua inun jawen bake chaxuhan jabu kenwankubainmisbuwen taea jawen kenwanti jiwe jayama en uianma ixuki.

²³Ja inun, ja maewan anudan, Epa Dios jawen kushipawen chaxajaidamis inun chaxuhan bake bin keskai chaxai ji imisken ana badi inun uxe jawen chaxa ana jabu jayamaki. ²⁴Jaska inun, nawabu dasibi ja maewan anu mapuidan, bin chaxa keskawen mapuxankanikiki. Ja inun, xanen ibu Diosunabu mai jidabi anuabun

jatun mabu pepa Dios inanxankanikiki.
 25 Ja inun, jawen beputidan, xaba ikibi ikawen taea bepenmanaibi bepenmanaki, jawa ana yame jayamawen taeadan.
 26 Ja inun, beputi xui anu jikikin nawa betsa betsapa shadabun Dios kenwakin dasibi jawen jawendua jayabu inanun ika jikixankanikiki. 27 Jaskabiaken tsuabuda atimapamisbu inun, jawada Diosun dananmis amisbu inun, jabu chani chakamisbu jabu jadi jikitaskama ixankanikiki. Jakia jamen jabu jikidan, tsuabunda kena chaxuhan baken jiwe kuian una medan Diosun netani jabu besti Diosun mae bena anu jikixankanikiki.

22 ¹Januxun xanen ibu jaki tsauti
 Dios inun chaxuhan bake jaki tsauabu anua jene jiwekuian jaya kauana bexnan pejaida bixtu keska nai tsuman ea uinmaxuki. ²Jaska ja bai kaya namakis jene kexa uke dabebi jawen jiwemati ji mapubaina en uinxuki. Jawen bimi betsa betsapa uxe tibi betsa maei bimimisbuki, jau Diosunabun pipakexanunbunan. Ja inun, jibia ji peiwen yudabun jamapai betsa betsapa tenekubainaibu jawen peiwen xuxatidubuki. ³Ja inun, Diosun mae anu jawa yupukunanti jayamaki. Ja inun, xanen ibu jaki tsauti anua Dios inun jawen bake chaxuhan bake tsauabun ja mae medanxun Diosunabun jabun jatu kenwankubainxankanikiki. ⁴Jadia Diosbe beisinan dabexankanikiki, Diosun kena jatun betunkuki nea jayadan. ⁵Jadi jiweabu anu ana yame jayama inun janu jiwxun nukun Xanen Ibu Dios jatu jiwemakin jatu xabawaxunken jabu jabe xanen ibui jeneama ipapakexankanikiki. Jaskawen taea ana badin chaxa inun binman chaxa jayama ixankanikiki.

Jesús ana juxanaxi ma
 kemaikiaki, na janchadan

⁶Januxun nai tsuman ea ana yuikin:
 “Chania jancha en mia yuiai ninkawe.

Nukun Xanen Ibu Diosun jawen jancha yuixunikabu jawen jancha jatu yunumistun jaskadada samama ixanai jau jawen tsumabun yusinxanun, iwanan, en jawen nai tsuma jawen jancha eadi yunuxuki, en mia tapinmanunan. Diosun chanima jancha tibi yubakatan axanai en mia uinmaxu en mia yuiai ninkatan ikunwandiwe”, ea waya

⁷Jesúsundi ea yuikin: “Uian. En samama ana kaxanaii. Jaskaken na jancha jaskadada inunbadiaikidi chaniai kenkin min una waidan, tsuabunda ikunwankin chibankanaibudan, Diosun jatu benimawaxanikiki. Manayuwe”, ea waxuki.

⁸En Juanen dasibi na jancha ninkakin na betsa betsapa uinkin keyui benimai juinti shinan chankain nai tsuman ea uinmakubainxu kenwanun ika jawen tae naman en danti ikaya ⁹ea nemakin yuikin: “Jaskayamawe. Mia keska eadi en Diosun tsumaki. Min betsabu Diosun jancha yuixunikabu betsa inun dasibibun na jancha kenkin min una wai jabun chibankanaibu keska eadi en jatu keskaki. Dios besti kenwanwen”, ea watan

¹⁰nai tsuman ana ea yuikin: “Dasibi en mia uinmaxu jaska inunbadikiki. Jaskawen taexun na Diosun jancha juneama na min una wai ma badi keyui kemai jawen unanxankanikiki. Ana juneama xabakabi jaska tibi kainkunkaini menekunkainxanikiki.

¹¹Jaska inun, tsuada chakabui jiweadan, jatu bexteyamawe, jau jabiaska chakabu chibain jiwenunbunan. Ja inun, tsuada atimapa jiweadan, jau jawen atimapa chibain jiwepakunbunwen. Ja inun, tsuada pepai jiwekatsis ikidan, jau pepa besti wakubainunbunwen. Ja inun, tsuada medibi Diosunabuidan, jaska Diosun bechipaiai keska jau ikubainunbunwen”, ea waya

¹²Jesúsun ana ea yuikin: “Uian. En samama ana kaxanaii. Kakinan, jatun manakuti tibi en jatu buxunxanaii, jaska tibi jiwemisbu keska jatu inain kaidan. ¹³Ea dukun en taxnini inun en jawen jenea debesekaeaki. Ja inun, eadan, ea dukun en ini niti ikama en jawen jeneaki. Ja inun, ea dukun en ini niti ikama en jiwepakexanaii”, ea waxuki.

¹⁴Uinwen. Tsuabuda benimati jayadan, jatun tadi patsa keska wakin jabun shinan kayabiwen Jesús ikunwankin chakabu Dios buamakubainmisbu jawen mae bera anu jikitan jabu besti pekin jawen benimai jiweti ji bimi pikubainxankanikiki. ¹⁵Jamen betsabudan, Dios danankin jamapai chakabuwamisbu inun, mukayakin Satanásan kushipa yukamisbu inun, chutanamebaunmisbu inun, yuda betsa tenanmisbu inun, yushin dami betsa kenwanmisbu inun, dasibi jamapai tibi bechipaibaunmisbu inun, chaní chakamisbu jabu jaskamisbu besti bashikuxankanikiki, jabu Diosun mae pepa anu jikiamadan.

¹⁶Januxun Jesúsun ana ea yuikin: “Eadan, Davidin baba inun pena bishi chaxajaidamis keskatun en Jesúsun en mia yuiai ninkawe. Diosunabu ichamisbu betsa betsapa anu jaska en uiain min jatu pewakin e imaxanun, iwanan, en nai tsuma en mia anu yunua jaska dasibi mia uinmaxuki, jau en jancha min jatu bumaxanunan”, ea waya

¹⁷janua nun Chaxuwanen ainan jabun nun ikunwainbunan, Yushin Pepabetan Jesús yuikin: “Judiwe!” nun ikaya tsuabunda nuku ninkakin: “Jau

judinunwen!” jau idianunbunwen. Ja inun, tsuabuda unpax manui keskakin Dios benakin Jesús chibankatsis ikin jau ikunwanunbunwen. Jaska watan jawen unpax jiwemati jaya jau aki benunbunwen, jawa pakamadan.

¹⁸Na jancha dasibi Diosun ea bebunkidi uinmaxu ninkatan en matu yuiai ninkaidakanwen. Na dasibi jancha Diosun ea yuixuyabi padananankin tsuabunda ibubis jatun jancha kenekin ana unakia kene chichikin ewa watan yuikin: “Nadan, dasibi Diosun janchaki, chanimadan”, itidubu bebunkidi en matu mesewaaii. Tsuabunda jaska waxanaibu jatu kupikin ja ichakawati betsa betsapa ea yusinxuwen Diosun ana kupiti betsawen jatu kupixanikiki. ¹⁹Ja inun, tsuabunda na jancha Diosun ea yuixu en una waxukia ja unakia jancha betsa tede akaibuweng taexun Diosun jawen benimai jiweti ji bimi jaki tanabiayama jatu mebintan jawen mae pepa anu na unaki ea kenemaxu keska wakin Diosun jatu jikimama ixanikiki.

²⁰Na jancha jatun ea pewamaitun yuikin:

“Chanima en samama ana kaxanaii”, ikaki.

Jabiaskaki. Nukun Xanen Ibu Jesucristoon, menan jawaida judiwe, nun mia shinainan.

²¹Nukun Xanen Ibu Jesucriston jau matu dasibi jawen pepawen duawakubainxanunwen.

Ea uinmakubidanxu en jancha chanimadan, jatiski.

Juan